

Nuevo Testamento en mixteco

Atatláhuca Mixtec

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at dbs.org/bibles.

SAN MATEO.....	4
SAN MARCOS.....	40
SAN LUCAS.....	62
SAN JUAN	99
HECHOS	126
ROMANOS.....	160
1 CORINTIOS	174
2 CORINTIOS	187
GÁLATAS	196
EFESIOS	201
FILIPENSES.....	206
COLOSENSES	210
1 TESALONICENSES	214
2 TESALONICENSES	217
1 TIMOTEO.....	219
2 TIMOTEO.....	223
TITO	226
FILEMÓN	228
HEBREOS.....	229
SANTIAGO	239
1 PEDRO	243
2 PEDRO	247
1 JUAN	250
2 JUAN	254
3 JUAN	255
JUDAS.....	256
APOCALIPSIS	258

SAN MATEO

Lista ñayuu yucūn jeē ní quiiji Jesucristo (Lc. 3.23-38)

1 Yāha cúu lista ñayuu yucūn jeē ní quiiji Jesucristo. Te máá yá ni quiiji nuū yucūn rey David, te David ni quiiji nuū yucūn Abraham.

² Abraham ni cuu de tátá Isaac, te Isaac ni cuu de tátá Jacob, te Jacob ni cuu de tátá Judá jíin táca ñani i.

³ Te Judá ni cuu de tátá Fares jíin Zara, te náná ndindúú i ni cuu Tamar. Te Fares ni cuu de tátá Esrom, te Esrom ni cuu de tátá Aram. ⁴ Te Aram ni cuu de tátá Aminadab, te Aminadab ni cuu de tátá Naasón, te Naasón ni cuu de tátá Salmón. ⁵ Te Salmón ni cuu de tátá Booz, te náná i ni cuu Rahab. Te Booz ni cuu de tátá Obed, te náná i ni cuu Rut. Te Obed ni cuu de tátá Isaí. ⁶ Te Isaí ni cuu de tátá David, tēe ni cuu rey. Te rey David ni cuu de tátá Salomón, te náná i, xīhna gā ni cuu ña ñasihí Urías.

⁷ Te Salomón ni cuu de tátá Roboam, te Roboam ni cuu de tátá Abías, te Abías ni cuu de tátá Asa. ⁸ Te Asa ni cuu de tátá Josafat, te Josafat ni cuu de tátá Joram, te Joram ni cuu de tátá Uzías. ⁹ Te Uzías ni cuu de tátá Jotam, te Jotam ni cuu de tátá Acaz, te Acaz ni cuu de tátá Ezequías. ¹⁰ Te Ezequías ni cuu de tátá Manasés, te Manasés ni cuu de tátá Amón, te Amón ni cuu de tátá Josías. ¹¹ Te Josías ni cuu de tátá Jeconías jíin táca ñani i, máá tiempo jeē cuángoo ñayuu Israel preso nde ñuu Babilonia.

¹² Te náa cáyucú i yūcuán, te Jeconías ni cuu de tátá Salatiel. Te Salatiel ni cuu de tátá Zorobabel. ¹³ Te Zorobabel ni cuu de tátá Abiud, te Abiud ni cuu de tátá Eliaquim, te Eliaquim ni cuu de tátá Azor. ¹⁴ Te Azor ni cuu de tátá Sadoc, te Sadoc ni cuu de tátá Aquim, te Aquim ni cuu de tátá Eliud. ¹⁵ Te Eliud ni cuu de tátá Eleazar, te Eleazar ni cuu de tátá Matán, te Matán ni cuu de tátá Jacob. ¹⁶ Te Jacob ni cuu de tátá José, tēe ni cuu yíi María. Te María ni cuu ña náná Jesús, Yaā naní Cristo.

¹⁷ Te nde Abraham te nde David ni īyo uxī cuūn yucūn. Te nde David te nde náa cuangoo ñayuu Israel preso ñuu Babilonia ni īyo inga uxī cuūn yucūn. Te nde ná ni jengoo i preso te nde ni cacu Cristo, suni ni īyo inga uxī cuūn yucūn.

Jeē ní cacu Jesucristo (Lc. 2.1-7)

¹⁸ Te jeē ní cacu Jesucristo, súcuan ni cuu: Náná yā María, je ni cundaā jeē quiijnáhan ña jíin José. Te nde ná tu quiijnáhan ña jíin de, te ni jecūhun séhe ña ni sáha Espíritu Santo. ¹⁹ Te José, tēe quiijnáhan ña jíin, chi tēe ndaā cúu de. Te tu ní cúní de cuāha de jnūhun canu ña, chi sa cúní de jeē na jécuiñī sāhi jéē ma quiijnáhan de jíin ña. ²⁰ Te níní súcuan nácani ni de, te jíin jéni ni quee-ni ñn ndajéhé máá Jítóho yō Yaā Dios nuū de, te ni cahān yā jíin de:

José, séhe yucūn David, ma yūhu ró cueca ró ñasihí ró María, chi séhe jeē scácu ña, vēji i nde nuū máá Espíritu Santo. ²¹ Te scácu ña ñn séhe yíí. Te snání ró i Jesús, chi máá i cúu Yaā jnama ñayuu nuū cuéchi i, áchí ndajéhé.

²² Súcuan ni cuu tǎcá jniñu yáha, návāha squícu jnūhun Jítóho yō Yaā Dios jeē ni cáhān tēe ni nacani jnūhun ya nde jenahán. Te suhva ni cahān de:

²³ Coo ñn sūchi sīhí, te nihīn séhe i, te scácu i ñn séhe yíí, te conaní sūchí un Emanuel.

Achí tutu. Te sīhví yáha cúní cahān: Yaā Dios ndeé yá jíin yó.

²⁴ Te ni natahū ni José, te ni sáha de nájñūhun ni cahān ndajéhé Jítóho yō jíin de. Te ni jeca de María ni cuu ña ñasihí de. ²⁵ Te tu ní quíxí de jíin ña, chi nde ni scácu ña séhe yíí núú ña. Te ni snaní de i Jesús.

Jeē ní quiijicoo tēe mago nuū yā

2 Te ná ni cacu Jesús ini ñuu Belén ndañúū Judea, te tiempo un ndácu rey Herodes jniñu. Yūcuán na te jecu tēe ndíchí jéē cascuáha siquī quími, ni quiijicoo de nde jicá, ichi nuū cáne niāndii, te ni jinūcoo de ñuu Jerusalén. ² Te ni cacajñūhún de ñayuu:

¿Ndé nuū íne sūchí jeē ní cacu jeē coo rey ñayuu hebreo? Chi ichi núú cáne niāndii ni cajito ná ñn quími cáhnu jeē cúu seña jeē ní cacu i. Te vējicoo ná chiñúhún ná i, áchí de.

³ Te rey Herodes, ná ni jini de jnūhun yáha, te ni cunéé ni de, nde jíin táca ñáyuu ñuu Jerusalén. ⁴ Te ni nastútú de tǎca sūtú cácujuhnu jíin tēe cástéén tutu ley Yaā Dios nuū ñáyuu. Te ni cajñūhún de tēe un ndé nuū cacu Cristo achí tutu. ⁵ Te ni cacachi nuū de:

Ini ñuu Belén ndañúū Judea. Chi suhva cáhán nuū tútu ni tee tēe ni nacani jnūhun ya nde jenahán:

⁶ Te róhó ñáyuū ñuu Belén ndañúū Judá, cújéhnū ga ñuu rō vēsú tāca gá jeē cújéhnū ini Judá. Chi suu ini ñuu rō quenda ñn Yaā ndacu jniñu, te coto ya ñayuu maá rí Israel, achí Yaā Dios. Achí tutu.

⁷ Yūcuán na te Herodes ni cana sáhí de tāca tēe ndíchí un jéē naní mago. Te ni cajñūhun yúcún de ndé quívn̄ ní cane quími ún. ⁸ Te ni tají de tēe un quíngoo de ñuu Belén. Te ni cahān de:

Cuángoo ní te cajñūhun yúcún ní ndé nuū íne sūchi lúlí un. Te núu ni nanihīn ní i, te quijicoo ní castūhun ní nuū ná, návāha suni máá ná quichiñúhún ná i, achí rey.

⁹ Te jeē ní cajini de jnūhun ni cahān rey, te cuangoo de. Te máá quími cáhnu jeē ní cajito de ichi núū cáne niāndii, yósnúu núū de cuahān nde ni jinū nuū íne sūchi lúlí un, te yūcuan ní jecuiñ̄. ¹⁰ Te ná ni cajito de jeē ní jecuiñ̄ quími ún, te yōhyo ni cacusiñ̄ ni de. ¹¹ Te ni jinūcoo de ni quívicoo de ini vehe, te ni cajito de nuū sūchi lúlí un jíin náná i María. Te ni cajecuiñ̄ yití de nuū i, te ni cachiñúhún de i. Te ni canune de yejnū de, te ni casocō de oro jíin súde cútú jíin súde uvuā nuū i. ¹² Yūcuán na te ni scóto jēni de, ni cachi nuū de jeē ma nuhún de nuū Herodes. Te inga ichi cuanuhun de ñuu de.

Jeē ní jinu José cuangoo de nación Egipto

¹³ Te náa cuánuhun tāca tēe mago, te ni scóto jēni José jeē ñn ndajéhé maá Jítoho yō Yaā Dios ni cahān yā jíin de:

Ndocuiñ̄ te cunu ró quíngoo ró jíin sūchi lúlí jíin náná i nde nación Egipto. Te yūcuán coyūcu ró nde castūhun rí nuū rō. Chi Herodes je yajni nanducú de sūchi lúlí jíin jeē cáhni de i. Achí yá.

¹⁴ Te ni natahū ni José. Te cuangoo de jíin sūchi lúlí jíin náná i, te ñuú ní cajica de cuangoo de nación Egipto. ¹⁵ Te ni coyūcú de yūcuan ndé ni jihī Herodes. Te sūcuan ni cuu návāha squícu jnūhun Jítoho yō Yaā Dios jeē ni cahān tēe ni nacani jnūhun ya nde jenahán: Nde nación Egipto ni cana ri Sēhe ri vēji i, achí Yaā Dios, achí tutu.

Jeē ní ndacu Herodes jniñu jeē na cúū tāca sūchi yíí lúlí

¹⁶ Yūcuán na te Herodes ni jini de jeē sūcuan ni castáhú tēe mago un de, te yōhyo ni quít̄ ni de. Te ni tají de soldado cuangoo, te ni cajehni tāca sūchi yíí lúlí jéē uú cuiyā jíin jéē yiquín gá jeē cáyucú ini ñuu Belén jíin táca ñuu yajni. Chi je ni cajñūhun yúcún de tāca tēe mago un nasaa tiempo ni cuu jeē ní cacu Jesús. ¹⁷ Te sūcuan ni squícu jnūhun ni cahān Jeremías, tēe ni nacani jnūhun Yaā Dios nde jenahán, chi ni cahān de:

¹⁸ Ini región Ramá ni jini sōho ri jeē cándahyū te cándahyū cohó.

Chi ñahan cácuu yucūn Raquel, cándahyū ña jehē séhe ña, te tu cácuu ña ndusiñ̄ ni ña, chi ni cajihī i. Achí tutu.

¹⁹ Yūcuán na te ni jihī Herodes. Te ni scóto jēni José jeē ñn ndajéhé Jítoho yō Yaā Dios ni cahān yā jíin de nuū ndeé de nación Egipto. ²⁰ Te ni cahān yā jíin de: Ndocuiñ̄ te nuhun rō ñuu rō Israel jíin sūchi lúlí jíin náná i. Chi je ni cajihī tēe cánducú cahni sūchi lúlí jíin nuú. Achí ndajéhé.

²¹ Yūcuán na te ni ndocuiñ̄ de, te cuanuhun de nación Israel jíin sūchi lúlí jíin náná i. ²² Te ni nihīn de jnūhun jeē Arquelao ni nucuiñ̄ de nuū tatá de Herodes, te máá de ndácu jniñu región Judea. Te ni yūhú de nuhun de yūcuán. Te ni scóto jēni de jeē na quíhín de región Galilea, te cuangoo de. ²³ Te ni jinū de yūcuán, te ni coyūcú de ñuu naní Nazaret. Sūcuan ni cuu návāha squícu jnūhun ni cacahān tēe ni canacani jnūhun Yaā Dios nde jenahán. Chi ni cacachi de jeē cahān ñayuu jeē tēe ñuu Nazaret cúu Jesús.

Jnūhun Juan tēe scuándute

(Mr. 1.1-8; Lc. 3.1-9, 15-17; Jn. 1.19-28)

3 Te ni yāha tiempo, te ni jinū Juan tēe scuándute nde nuū ñúhun téhé ndañúū Judea, nácani de jnūhun suhva:

² Nacani ni rō jijnáhan ró jéē stóo ró cuéchi ró, chi je ni cuyajni Yaā ndeé andiv̄ jéē ndacu ya jniñu nuū rō. Achí de.

³ Te Isaías, tēe ni nacani jnūhun Yaā Dios nde jenahán, suhva ni tee de jnūhun Juan nuū tútu:

Coo ñn tēe cana jee nde nuū ñúhun téhé: Sátūhva ró máá ró jijnáhan ró, chi quee maá Jítoho yō.

Te sáha ró jniñu ndaā, chi vēji ya, achi de. Achí Isaías.

⁴ Te sahna ñúhun Juan cúu ixi quít̄ nání camello, te núhni ñn cinturón ññ chíji de. Te jeē técu de cúu t̄ca ndicuéhȳ jíin ndúxi yocō. ⁵ Te ñayuu ñuu Jerusalén jíin táca ñáyuū región Judea jíin ñáyuū yúcu yajni yuyúte Jordán, ni quijicoo i nuū de. ⁶ Te ni canacani ndaā i cuéchi i nuū Yaā Dios, te ni scuándute de i ini yūte Jordán.

⁷ Te ná ni jito de jeē véjicoo cuehē tēe grupo fariseo jíin tēe grupo saduceo nuū scuándute de, te ni cahān de jíin:

Va sēhe coō cácuu ró, chi xeēn rō nájñūhun coō. ¿A cájeni ni rō jeē cuu cunu ró cācu ró núū castigo xeēn jeē quíji? ⁸ Núu sūcuan te sáha ró jniñu váha, te sūcuan stéen rō jeē ní canacani ndije ni rō jeē stóo ró cuéchi ró. ⁹ Te ma cáni ni rō cahān rō jeē cuu cācu ró s̄iqū jeē cácuu ró yúcūn Abraham. Chi cáhán r̄ jíin ró jeē cuu sáha Yaā Dios jeē tāca yúū yáha nduu sēhe Abraham jeē candíje váha, te núu cúní yā. ¹⁰ Te cácuu ró nájñūhun nundéhé jeē tu jéhe ndehē váha. Te vijna jeé íyó túhva Yaā Dios jeē cuáha ya castigo xeēn,

nájnūhun je íyó túhva ñn cāa jeē cahnde nde yoho yujnu. Núu súcuan te sáha ya jíin ró nájnūhun jíin táca yujnu jeē tu cúun ndehē váha, jeē tahndé te cayū nuū ñuhún. ¹¹ Te ruhū chi jíin ndute scuándute ri rohó, te yūcuan cúu jeē steén rō jeē ní canacani ni rō jeē stóo ró cuéchi ró. Te Yaā jeē quiji, chi nájnūhun scuándute ya rohó cúu jeē cuáha ya Espíritu Santo condee ini anuá rō, te poder yā cúu nájnūhun ñuhún. Te Yaā quiji chi cújéhnū ndasí yá. Chi tú na vé jéhnū cuiti cúu ri nuū yā, ni jeē cuajníñu ri nuū yā vésú ñn jniñu lúli gá nájnūhun jeē quénehen ri ndijēn yā. ¹² Te sáha ya nájnūhun sáha tēe scánda trigo, chi sásñn ya ñayuu váha jíin ñayuu cunéé, nájnūhun cúndoo trigo jeē quénda sñn paja. Te nastútú yá trigo yā ndívi ini yacā yā. Te paja chi jnaa yā nuū ñuhún jeē ma ndahvá cuiti. Achí Juan.

Jeē ní jendute Jesús

(Mr. 1.9-11; Lc. 3.21-22)

¹³ Yūcuán na te ni quenda Jesús región Galilea, te ni quee yā yūte Jordán nuū íne Juan, návāha scuándute de ya. ¹⁴ Te tu ní cúní Juan scuándute de ya, chi ni cahān de jíin yá:

Sa suhva cánuú jeē scuándute máá ní sãñá, ¿te ndese cúu jeē sa nuū ná vēji ní? áchí de.

¹⁵ Te ni cahān Jesús jíin de:

Tuú chi sáha ró, chi súcuan cánuú squícu yó táca jniñu ndácu Yaā Dios, achí yá.

Yūcuán na te ni scuándute de ya. ¹⁶ Te ná ni cuu ni jendute Jesús, te ni quenda ya nuū ndúte. Te ni nune-ni andívi, te ni jito ya jeē cúun Espíritu Yaā Dios vēji, te cāa nájnūhun ñn paloma, te ni quee xiní yā.

¹⁷ Te ichi ándiví ni cahān ñn jnūhun:

Yáha cúu Sēhe ri jeē maní ndasí rí jíin, te yōhoyo cúsiñ ri rí jíin, áchí.

Jeē ní jito ndee jexeén Jesús

(Mr. 1.12-13; Lc. 4.1-13)

4 Yūcuán na te ni jinū Jesús nde nuū ñuhun téhé ní sáha Espíritu Santo. Te yūcuán coto ndee jexeén yā, chi cúní jeē sáha ya cuéchi.

² Te ni ñyo ndite ni yā uū xico nduú uū xico ñuú, sáa te jíi yā sōco. ³ Te ni quee máá jéxeén jeē cóto ndee un yá, te ni cahān jíin yá:

Núu máá ró cúu Sēhe Yaā Dios, te cahān rō jeē yuū yúcu yáha na ndúu staā caji rō, achí.

⁴ Te ni cahān yā jíin:

Tuú chi yósó núu tútu i: Nasūu máni máá jíin stáa cátecu ñayuu, chi suni jíin táca jnūhun cáhān Yaā Dios, achí yá.

⁵ Yūcuán na te cuahān jexeén un jíin yá nde ñuu i Jerusalén. Te ni jeni ya xiní torre templo. ⁶ Te ni cahān jíin yá:

Te núu Sēhe Yaā Dios cúu ró, te síngava ró máá ró nde nuū ñuhun, chi jnama ya rohó. Chi yósó núu tútu: Tejniñu ya ndajéhé yā quijicoo coto rōhó.

Te cunundee yā rohó jíināhan ya, návāha ma cáchihi ró jéhē rō nuū yuú.

Achí tutu. Achí jexeén.

⁷ Te ni cahān Jesús:

Tuú chi suni yósó núu tútu jeē ma cóto ndee ñayuu Jitoho i Yaā Dios, núu jnama ya i chí tuú, áchí yá.

⁸ Te jexeén un ní jeca tucu ya cuahān jíin yá nde xiní ñn yucu súcún ndasí. Te ni steén tãcá nación ní cáhnu ñayívi núu yā, te yōhoyo luu cāa ndihí. ⁹ Te ni cahān jíin yá:

Tãcá ñuu yáha cuáha ri nuū rō, te núu cuiñi yítí ró chiñúhún ró ruhū, achí.

¹⁰ Yūcuán na te ni cahān Jesús nuū jexeén:

Satanás, cujiyo quihīn rō, chi yósó núu tútu jeē chiñúhún ñayuu maá Jitoho i Yaā Dios, te nuū maá-ni ya cuajníñu i. Achí yá.

¹¹ Yūcuán na te ni cujiyo-ni jexeén un cuahān. Te ni quecoo ndajéhé Yaā Dios ni cajejníñu nuū yā.

Jeē ní quejéé Jesús nácani ya jnūhun región Galilea

(Mr. 1.14-15; Lc. 4.14-15)

¹² Te ná ni nihīn Jesús jnūhun jeē íne Juan vecāa, te cuanuhun yā región Galilea. ¹³ Te tu ní cóndee yā ñuu Nazaret, chi ni jehēn yā ni condee yā ñuu Capernaum. Te ñuu un íne yumar, máá región Zabulón jíin Neftalí.

¹⁴ Te súcuan ni squícu jnūhun ni tee Isaías, tēe ni nacani jnūhun Yaā Dios nde jenahán:

¹⁵ Región Zabulón jíin Neftalí, ichi jeē yíhi yumar, lado yūte Jordán nuū cáne niāndii, jíin región Galilea nuū cáyūcú ñayuu tãcá nación tu jíní jnūhun ya.

¹⁶ Ñayuu ún chi nájnūhun cáyūcú i nuū néē, te coto i nájnūhun ñn luz cáhnu.

Te ñayuu je yajni naa, nihīn i jnūhun váha ndasí, suu jnūhun jeē jnama ya anuá i.

Achí Isaías.

¹⁷ Te nde quiví yúcuán ní quejéé Jesús nácani ya jnūhun, te ni cahān yā suhva:

Nacani ni rō jíināhan ró jéē stóo ró cuéchi ró, chi je ni cuyajni Yaā ndeé andívi jéē ndacu ya jniñu nuū rō, achí yá.

Jeē ní cana ya cuūn tēe jññ chācá

(Mr. 1.16-20; Lc. 5.1-11)

¹⁸ Te jica Jesús yumar Galilea cuahān yā. Te ni jito ya nuū uú jnáhan ñani. Te ñn de cúu Simón jeē suni nání Pedro, te inga de cúu Andrés. Te tēe cájññ chācá cácuu de, te cásínga de ñunu de ini mar. ¹⁹ Te ni cahān yā jíin de:

Condiquīn ruhū na quíhín yō, te nasáha ri rohó tēe nihīn cuehē ñayuu candíje ruhū, nájnūhun cánihīn rō chācá, áchí yá.

²⁰ Yūcuán na te ni castóo-ni de ñunu de, te ni candiquīn de ya.

²¹ Te ni jica ya jecu gā, te ni jito ya nuū inga uú jnáhan ñani. Te cácuu de Jacobo jíin Juan, sēhe Zebe-

deo. Te cáyūcú de ini barco jíin tátá de Zebedeo, cá-nachijnñi de ñunu de. Te suni ni cana ya de jeē cóndiquin de ya. ²² Te ni castoo-ni de tátá de jíin barco, te ni candiquin de ya cuango de.

Jeē ni steén yā nuū cuehē ñayuu

(Lc. 6.17-19)

²³ Te ni jica cuu Jesús ñi región Galilea, ni steén yā jnūhun ini tǎcá vehe i jeē cúu sinagoga. Te ni nacani ya jnūhun vāha ndese ndácu Yaā Dios jniñu. Te ni nasávāha ya ñayuu cácuñu tǎcá-ni cuehyi. ²⁴ Te ni jitē núu jnūhun ya cuahān ñi región Siria. Te nuū yā ni caquindeca i tǎca ñayuu cácuñu, ñayuu cándoho tijní nuū cuehyi, jíin jéē jetú, jíin jéē ñúhun tachí ini, jíin jéē jihí yñí, jíin jéē ni jjin. Te ni nasávāha ya i jíināhan i. ²⁵ Te cuehē ñayuu región Galilea jíin Decápolis, jíin ñayuu ñuu Jerusalén jíin región Judea, jíin tǎca ñuu ichi núu cáne niāndii yūte Jordán, ni cacondiquin i ya.

Jeē ní nacani ya jnūhun nde nuū yúcu

5 Te ni jito Jesús nuū ñayuu cuehē. Te ni caa ya yu-cu cuahān yā, te ni cucōo ya. Te tēe cáscuáha jíin yá, ni jinūcoo de nuū yā yūcuán. ² Te ni quejéé yá ni steén yā tǎca jnūhun yáha nuū de:

Jnūhun yōhyo ndetū

(Lc. 6.20-23)

³ Yōhyo ndetū ñayuu jeē cánacuni i jeē tu íyó váha ánuá i síquī cuéchi i, chi je ni quivicoo i ndaha Yaā andiví jéē ndácu ya jniñu nuū i.

⁴ Yōhyo ndetū ñayuu cácuñuñyá ni, chi ndusiñi ni i sáha Yaā Dios.

⁵ Yōhyo ndetū ñayuu cáhīyo vītá suchí ini, chi ni je-jnūhun ya jeē cutahū i ñayiví.

⁶ Yōhyo ndetū ñayuu jeē nájñūhun jeē cájiti i sōco cájichí i, súcuan jnáa i sáha i jniñu ndaā, chi máá yá chindéé ñáhán yá i jeē cuu sáha i.

⁷ Yōhyo ndetū ñayuu cácuñuñyá ni jnáhan, chi suni cundáhú ni Yaā Dios i.

⁸ Yōhyo ndetū ñayuu cáhīyo ndoo ini anuá, chi coto i nuū Yaā Dios.

⁹ Yōhyo ndetū ñayuu cánasámaní jnáhan, chi cahān Yaā Dios jeē sēhe ya cácuu i.

¹⁰ Yōhyo ndetū ñayuu jeē cájito xeēn inga ñayuu i síquī jeē casáha i jniñu ndaā, chi je ni quivicoo i ndaha Yaā andiví jéē ndácu ya jniñu nuū i.

¹¹ Yōhyo ndetū máá ró jíināhan ró núu cácahān neé i nuū ró jeē síquī ruhū, te coto xeēn i rōhó, te stáu yáhu i rōhó, vēsú tú cuéchi ró. ¹² Na cúsiñi ni ró jíināhan ró núu súcuan, te sa víhyá gā cusñi ni ró, chi cáhnu ndasí coo tahū ró nde andiví. Chi suni súcuan ni cajito xeēn i tǎca tēe ni canacani jnūhun Yaā Dios jeē ní quijicoo xihna gā vēsú rohó.

Jnūhun yátá síquī ñi jíin síquī luz

(Mr. 9.50; Lc. 14.34-35)

¹³ 'Máá ró jíināhan ró cájeñiñu ró ini ñayiví nájñūhun jéñiñu ñi nuū cúñu návāha tú tehyū. Te núu ñi ún na nǎa jeē uhvuá, ¿te ndese nduu uhvuá tucu? Tuá cuajniñu cuiti gā, chi sa cate ñayuu te cueñū i síquī.

¹⁴ 'Máá ró cácuu nájñūhun luz jeē steén ini anuá ñayuu ñayiví. Te cácuu ró nájñūhun ñi ñuu íne xiní yúcu, jeē ma cúu quisáhi. ¹⁵ Te ni tu nǎstñiñ ñayuu ñi lámpara te chune i chñi cajón, chi sa suhva jéni i nuū sucún, návāha cundijin nuū tǎca jéē cáyūcú ini vehe.

¹⁶ Te suni súcuan na steén ró luz maá ró nuū tǎca ñayuu, te suu cúu jeē cúni i jniñu váha casáha ró, te cahān i jeē yóhoyo váha Yaā cúu Tátá ró jeē ndeé yá andiví.

Jeē ni steén yā síquī ley Yaā Dios

¹⁷ 'Ma cáni ni ró jíināhan ró jéē véji ri snáa rí ley jeē ni jéhe Yaā Dios nuū Moisés, jíin jéē snáa rí tǎca jnūhun ni cacahān tēe ni canacani jnūhun ya jenahán. Tú véji ri jeē snáa rí, chi sa suhva jeē steén cají rí jnūhun ndiso. ¹⁸ Chi jendaá cahán rí jíin ró jeē núu níni íyó andiví jíin ñayiví, te ma nǎa cuiti ni ñi punto ni ñi letra nuū tútu ley yā, chi nde na síquī tǎcá ndiñi jnūhun jeē cahán. ¹⁹ Núu súcuan te núu ñi ñayuu tu síquī i ñi jnūhun yáha jéē ndácu ley yā, vēsú ñi jnūhun lulí gá cúu, te núu steén i jeē suni súcuan sáha sava ga ñayuu, núu súcuan te cuu i ñayuu núu ga ichi andiví nuū ndácu Yaā Dios jniñu. Te núu ñi ñayuu síquī i te steén i jeē síquī ñayuu, yūcuán na te cujéñu i ichi andiví nuū ndácu Yaā Dios jniñu. ²⁰ Chi cáhán rí jíin ró jeē núu tú coo ndaā gā jniñu casáha ró vēsú jniñu casáha tēe cásteén tutu ley yā jíin tēe grupo fariseo, te ma quivicoo cuiti ró ndaha Yaā andiví jéē ndacu ya jniñu nuū ró.

Jeē ni steén yā jeē ma quití ni yō

(Lc. 12.57-59)

²¹ 'Je ni cajini ró jnūhun ni cacahān jíin ñayuu jenahán, jeē ma cáhni i ndiñi, te na-ni ñayuu núu cahni i ndiñi, te cundaā cuéchi i nuū tǎca tóhō, achí. ²² Te ruhū chi cáhán rí jíin ró, vēsú núu máá jéē quití ni ñi ñayuu jito i jnáhan i, suni cundaā síquī cuéchi i ún. Te núu ñi ñayuu cahān neé i nuū jnáhan i, núu súcuan te cundaā cuéchi i un núu justicia cujéñu ga. Te núu ñi ñayuu cahān i nuū jnáhan i: Róhó jéē canéé íi, achí i, núu súcuan te quiví i nuū ñuhún infierno te núu ma nacani ni i.

²³ 'Jeē yúcuu te núu ni jinū ró nuū altar jíin jéē socó ró nuū Yaā Dios, te núu ni nucūhun ni ró jeē ni sáha ró cuéchi síquī jnáhan ró, ²⁴ núu súcuan te squéndōo ró jéē socó ró ún xiin altar, te xihna gā quihñi ró ndumaní ró jíin jnáhan ró. Yūcuán na te nandicó ró socó ró.

²⁵ Te núu ñn ñayuu quihñ i jíin ró nuū tohó jeē cacān i cuēchi siquī rō, núu súcuan te níni cuáhān rō jíin i ichi te sándaā maá ró jíin i, návāha ma squívi i rōhó núu juez. Chi juez siáha de rōhó núu policía, te chune de rōhó vecāa. ²⁶ Te jendaá cahán rī jíin ró jeē ma quénda cuiti rō yūcuán, chi nde chunaa rō ndihí cuiti xūhun jéē cájicān de.

Jeē ni stéén yā jeē ma cósquí ndéē jnáhan

²⁷ Ni cajini ró jnúhun ni cacahān jenahán jeē ma cósquí ndéē jnáhan ñayuu. ²⁸ Te ruhū chi cáhán rī jíin ró jeē núu ñn tēe ndéhe de nuū ñn ñahan jeē ndíyo ni de ña, yūcuán na te je ni casíquí ndéē de ñahan ún ini anuá de.

²⁹ Núu súcuan te núu tinūu lado váha ró sáha jeē quívi ró cuéchi, váha ga quenehen ró te scāne ró, návāha tuá sáha ró cuéchi. Chi váha gā jeē náā ñn tinūu ró vésú jeē cóo ndihí yiquí cúñu rō te quihñ rō infierno. ³⁰ Te núu ndaha váha ró sáha jeē quívi ró cuéchi, váha ga cahnde rō te scāne ró, návāha tuá sáha ró cuéchi. Chi váha ga jeē náā ñn ndaha ró vésú jeē cóo ndihí yiquí cúñu rō te quihñ rō infierno.

Jeē ni stéén yā jeē ma ndusñin jnáhan

(Mt. 19.9; Mr. 10.11-12; Lc. 16.18)

³¹ Te suni ni cacahān nde jenahán: Núu ndé ñn cúní stóo ñasihí, te na cuáha acta nuū ña jeē ndusñin jíin ña. ³² Te ruhū chi sa cáhán rī jíin ró jeē núu ñn tēe stóo de ñasihí de, te núu nasūu jéē tñjni ni ña, núu súcuan te sáha de jeē casíquí ndéē ña de, chi condee ña jíin inga tēe. Te núu ñn tēe condeca de ñahan ní ndusñin, suni casíquí ndéē de ña.

Jeē ni stéén yā siquī jnúhun jéjnūhun téyí

³³ Te suni ni cajini ró jnúhun jeē ni cáhān jíin ñayuu nde jenahán: Núu ni jéjnūhun téyí ró jeē squícu ró, jító jíinúu Yāā Dios, núu súcuan te cánuú squícu ró jéē ni cáhān teyí ró un, áchí. ³⁴ Te ruhū chi cáhán rī jíin ró jínáhan ró jeē ní ñn siquī jníñu ma cahán teyí ró nde jíin síhví Yāā Dios, ni ma cahán teyí ró jeē jító jíinúu yā. Te núu jéjnūhun téyí ró te tú váha jeē ndácunehen ró andíví ni ñayíví. Chi andíví cúu nuū íin mesa nuū ndácu Yāā Dios jniñu. ³⁵ Te ñayíví cúu nájnūhun teyū nuū íin jehē yā. Te ni ma ndácunehen ró ñuu Jerusalén, chi suu cúu ñuu maá Yāā cúu Rey cujéhnu. ³⁶ Ni ma cahán rō jeē na cóndee cuēchi siquī rō núu tu squícu ró. Ma cahán rō súcuan, chi ma cúu cuiti sáha ró jéē ni ñn ixi xíní rō nducuíjín chí ndujnú. ³⁷ Chi suhva-ni cahán rō: Cúu, achi rō. Tuú, achi rō. Chi núu chisóo gā rō jnúhun cahán rō, te nuū jexeén vēji.

Jeē ni stéén yā jeē ma cuáha yó jéē ndútahū ñayuu

(Lc. 6.29-30)

³⁸ Ni cajini ró jnúhun jeē ni cáhān jíin ñayuu jenahán: Núu ñn tēe ndahva de tinūu jnáhan de, suni súcuan na

ndáhva tinūu de. Te núu ñn tēe stáva de jnúhun jnáhan de, suni súcuan na stáva jnúhun de, áchí. ³⁹ Te ruhū chi sa cáhán rī jíin ró: Ma nácuāha ró jéē ndútahū tēe sáha ndevāha jíin ró. Chi sa núu ndé tēe cani de yiquí núu lado váha ró, te váha ga suni cuāha ró inga lado cani de, vésú jeē nácuāha ró jéē ndútahū de. ⁴⁰ Te núu ndé tēe stáu yáhu de rōhó te quénde de camisa rō, suni cuāha ró jnúhun jeē na quihñ de jíin ndé ticāchi ró. ⁴¹ Te núu ndé tēe scāca de rōhó jéē condiso ró ndajníñu de ñn kilómetro, te caca ró úu kilómetro jíin de. ⁴² Te na-ni ñayuu núu jíicān i ndajníñu ró, te cuāha ró núu i. Te ñayuu jíicān núu ndajníñu nuū rō, ma sasáhán ró cuāha ró núu i.

Jnúhun jeē cundáhú ni yō ñayuu cájito uhū yohó

(Lc. 6.27-28, 32-36)

⁴³ Te suni ni cajini ró jnúhun jeē ni cáhān nde jenahán: Cundáhú ni rō ñayuu cáhíyo maní jíin ró, te coto uhū rō ñayuu cájito uhū rohó, áchí. ⁴⁴ Te ruhū chi sa cáhán rī jíin ró: Cundáhú ni rō ñayuu cájito uhū rohó. Te cacān rō jeē váha coo ñayuu cácahān ndevāha siquī rō. Te sáha váha ró jíin ñayuu cáquítñ ni nuū rō. Te cacān tahú rō jehē ñayuu cácahān neé núu rō te cájito xeēn i rōhó. ⁴⁵ Te súcuan stéén rō jeē cácuu ró séhe máá Tátá rō, Yāā ndeé andíví, chi máá yá jéhe niāndii cúndijin nuū ñayuu cunéé jíin ñayuu váha. Te jéhe ya saū nuū ñayuu casáha jniñu ndaā jíin núu ñayuu casáha jniñu néé. ⁴⁶ Chi núu íyó mání rō jíin máá-ni ñayuu jeē maní jíin ró, te tú na tahū nihñ rō nuū yā. Chi nde tēe cástútú xúhun renta jeē castáhú, suni súcuan casáha de. ⁴⁷ Te núu máni jnáhan ró cáhán yíñhún ró jíin, ¿te na vé jeē váha ga sáha ró núu súcuan? Chi nde ñayuu tu cácañdíje Yāā Dios, suni súcuan casáha i. ⁴⁸ Núu súcuan te ndaā na cóo ndihí jeē sáha ró, nájnūhun íyó ndaā ndihí jeē sáha Tátá rō, Yāā ndeé andíví.

Jeē ni stéén yā ndese sáha yó jniñu váha

6 Te jeē sáha ró táca jniñu váha nuū Yāā Dios, coto ró jéē ma sáha ró máá síquī jeē cúní ñayuu te cuajnúhún i rōhó. Chi núu súcuan sáha ró, te tú na tahū rō cuāha máá Tátá rō, Yāā ndeé andíví. ² Jeē yúcuán te jeē sáha ró caridad, te ma sáha ró jéē cúní táca ñayuu, nájnūhun casáha tēe stáhú-ni, cáhñin de nuū cúchítú ñayuu ini táca vehe íi sinagoga jíin núu yáhu. Chi súcuan casáha de návāha cuajnúhún ñayuu de jeē váha casáha de. Jendaá cahán rī jíin ró jeē tahū de cúu jeē jéjnúhún ñayuu de. ³ Te rōhó jíináhan ró, núu casáha ró caridad, te sáha yuhu rō, návāha nde amigo váha ró tú cuni jeē sáha ró. ⁴ Súcuan na sáha yuhu rō caridad. Te máá Tátá rō jeē jító ya jeē sáha yuhu rō, ñn quívi te cuāha ya tahū cuu ró.

Jeē ni stéén yā ndese cacān tahú yō

(Lc. 11.2-4)

⁵Te jeē cájicān tahú rō, te ma sáha ró nájñuhun cásáha tēe stáhú-ni. Chi cánujnahan ni de cuiñi de cacān tahú de nuū iyó chitú ñayuu ini tācá vehe īi sinagoga jíin táca yíqui yáhu, návāha cuni ñayuu te cuajnúhún i de. Jendaá cahán rī jíin ró jeē maá yúcuan-ni cúu tahū jeē nihín de, suu jeē jejnúhún ñayuu de. ⁶Te róhó jíjnáhan ró, núu cájicān tahú rō, te ndívi ró ini vehe ró te casí rō yehyí. Te cacān tahú rō nuū maá Tátá rō, Yaā ndeé yuhu jíin ró. Yūcuán na te máá Tátá rō jeē jíto ya jeē súcuan sáha yuhu rō, sáha ya jeē jíicán rō.

⁷Te jeē cájicān tahú rō, te ma cahán saá-ni ró jnúhun jeē tu cájecūhun ni rō, nájñuhun cásáha ñayuu tu cájini jnúhun Yaā Dios. Chi cájeni ni i jeē núu cuehē jnúhun súcuan cahān i, te sáa te cuni sōho ya, te tuú.

⁸Núu súcuan te ma sáha ró nájñuhun cásáha máá i. Chi máá Tátá rō, je jíin yā na vé cájini ñúhún ró nde ná tu cacān rō nuū yā. ⁹Núu súcuan te suhva cacān tahú rō:

Tátá maá ná jíjnáhan ná jéē ndeé ní andiví,
níní na cóo yíñúhún ná nuū ní, chi Yaā īi cúu ní.

¹⁰Te ñúhun ni na jéē yachí quiji quiví ndacu ní jniñu ní ñáyivi yáha.

Te na cóo tācá jniñu núnahan ni ní,
nájñuhun iyó ini andiví, súcuan na cóo ini ñayiví.

¹¹Staā jeē cátecu na táca quiví, cuāha ní núu ná vijna.

¹²Te cone cahnu ni ní núu tāca cuéchi cásáha ná núu ní,

nájñuhun cáhine cáhnu ni na núu ñayuu casáha cuéchi nuū ná.

¹³Te ma cuáha ni jnúhun jeē coto ndee jexeén sãñá,
chi sa suhva jnama ní sãña núu tāca jéē neé.

Chi máá ní cúu Yaā ndácu jniñu, te jní ní poder,
te yōhyo luu cújéhu ní ní cáni. Súcuan na cóo.

Amén.

Achí rō jíjnáhan ró.

¹⁴Chi núu cone cáhnu ni rō nuū ñayuu casáha cuéchi nuū rō, te suni súcuan cone cáhnu ni maá Tátá rō andiví nuū cuéchi ró. ¹⁵Te núu ma cóne cáhnu ni rō nuū ñayuu casáha cuéchi nuū rō, te suni súcuan ma cóne cáhnu ni maá Tátá rō nuū cuéchi ró jíjnáhan ró.

Jeē ni stéén yā siquí jnúhun condite ni

¹⁶Te núu condite ni rō jeē chiñúhún ró Yaā Dios, te ma sáha ró nájñuhun cásáha tēe stáhú-ni. Chi cásáha de jeē coto xí de, te súcuan stéén de nuū ñayuu jeē iyó ndite ni de, návāha cuajnúhún i de. Jendaá cahán rī jíin ró jeē maá yúcuan-ni cúu tahū jeē nihín de, suu jeē jejnúhún ñayuu de. ¹⁷Te máá ró jíjnáhan ró, núu iyó ndite ni rō, te sa chuhun vāha ró xíní rō te nandahá núu rō, ¹⁸návāha ma cúni ñayuu jeē iyó ndite ni rō. Chi máá-ni Tátá rō jeē ndeé yuhu yā jíin ró, cuni yā, te ñi quiví te cuāha ya tahū cuu ró.

Ndese coo cúcá yó nde andiví

(Lc. 12.33-34)

¹⁹Ma cóndihvī ni rō caya rō ndajniñu cúcá ini ñayiví yáha, chi quiví tiquíxin, te cáne xehyu, te tíví. Te suni quívicoo ñacuíhná te sácuíhná. ²⁰Chi sa suhva sáha ró táca jniñu vāha návāha cayā tahū rō nde andiví. Chi yúcuan má quiví tiquíxin ni ma cáne xehyu jeē tíví. Ni ma cúu quiví ñacuíhna sácuíhná. ²¹Chi nde nuū nihín rō tahū vāha ró, yúcuan cúu nuū cóndihvī ni rō siquí.

Tinūu cúu lámpara yiquí cúñu

(Lc. 11.34-36)

²²Tinūu ró cúu nájñuhun lámpara nuū yiquí cúñu rō. Núu súcuan te núu tinūu ró iyó ndijin, te níñi yiquí cúñu rō cúndijin. ²³Te núu tinūu ró tu iyó ndijin, te níñi yiquí cúñu rō iyó nee. Te suni súcuan cúu ánuá rō, chi núu máni jeē jéni néé ni rō, te nacā jeē nee gā iyó ini anuá rō núu súcuan.

Jeē ma cóndihvī ni yō siquí xúhun

(Lc. 16.13)

²⁴Ni ñi mozo ma cúu cuajniñu de nuū uū patrón. Chi quití ni de nuū ñi te coo maní de jíin inga, chí squícu vāha de nuū ñi te sájéé ni de nuū inga. Te suni súcuan ma cúu cuajniñu ró núu Yaā Dios te núu máni siquí xúhun ndíhvī ni rō.

Yaā Dios ndíto ya yohó

(Lc. 12.22-31)

²⁵Núu súcuan te cáhán rī jíin ró jíjnáhan ró: Ma nácani ndasí ni rō siquí jeē cótecu rō, núu ndese caji rō coho ró, ni siquí sahma, núu ndese cuhun ró. Chi Yaā Dios ni sáha ya jeē técu rō jíin yiquí cúñu rō, te nagā ni cuu jeē ma cuáha ya jeē cáji rō jíin jéé cúhun ró.

²⁶Condēhe ró ndese cátecu saa, chi tu cátaji tí, ni tu cánastútú té jeé chívāha tí, ni tú yacā té. Te vēsú súcuan te máá Tátá rō andiví scáji yā té. Te cánuú ndasí gá rō jíjnáhan ró vēsú tācá saa ún. ²⁷¿Te ndé ñi ró, á cuu scuéhu ró máá ró sava metro gā, vēsú na nácani ndasí ni rō?

²⁸¿Te najehē cánacani ndasí ni rō jeē ma nihín rō sahma? Condēhe jíjnáhan ró ndese jéé ita tāca yúcū. Chi tu sájniñu, ni tu táu. ²⁹Te cáhán rī jíin ró jeē ni rey Salomón, quiví ní ñúhun de sahma vāha ndasí, tu ní ñúhun de sahma lúu súcuan nájñuhun ita ún. ³⁰Te núu súcuan jéhe Yaā Dios sahma lúu ita un jéé jéé vijna te sajnē cayū nuū ñuhún, te nagā ni cuu róhó jíjnáhan ró jéé ma sáha ya jeē nihín rō sahma. ¿Te naun tu cácan-dije nihín ró jéé ndíto ya rohó? ³¹Núu súcuan te ma nácani ndasí ni rō siquí jeē cáji rō, jeé coho ró, jeé cuhun ró. ³²Chi tāca ñayuu ñayiví jéé tu cácan-dije cúu jeé máni siquí jeé yáha cándihvī ni i. Te máá ró jíjnáhan ró, chí iyó Tátá rō andiví, te jíin yā jeé cájini ñúhún ró tāca jéé yáha. ³³Te sa suhva cánuú gá jeé

condihvĩ ni rō siquĩ jniñu jeē ndácu Yaā Dios nuū rō, jíin síquĩ jeē sáha rō jniñu ndaā jeē núnahan ni yā. Yūcuán na te sáha ya jeē nihín rō tāca jéē yáha. ³⁴ Núu súcuan te ma nácani ni rō siquĩ jeē cóo sajnē, chi vijna cúu vijna te sajnē cúu sajnē. Chi cani ni rō siquĩ jnúndóho jeē iyó ná ñn ná ñn-ni quivĩ.

Jeē ma cahán yō siquĩ cuéchi jnáhan yō
(Lc. 6.37-38, 41-42)

7 'Ma cahán rō siquĩ ñayuu ndese sáha i, návaha suni ma cahán Yaā Dios cuéchi siquĩ maá rō jeē casáha rō súcuan. ² Chi nájnūhun cácahān rō siquĩ cuéchi ñayuu, suni súcuan cahān yā siquĩ cuéchi rō. Te cūhva jeē cándihvĩ ni rō siquĩ i, suni cūhva yúcuan sáha ya jíin rō. ³ Chi cuéchi jnáhan rō cúu nájnūhun jeē íne ñn yāca lúlí tñūú i. ¿Te naun casáha rō cuenta jeē súcuan, te tu casáha rō cuenta cuéchi máá rō jeē cúu nájnūhun jeē íne ñn nduhu tñūú máá rō? ⁴ ¿Te naun cácahān rō jíin jnáhan rō: Na táva rī yāca íne tñūú rō, te tu cácani ni rō jeē íne ñn nduhu tñūú máá rō? ⁵ Tēe stáhú-ni cácuu rō núu súcuan. Xīhna gā tñūú máá rō tava rō nduhu, te yūcuán na te cuu condēhe váha rō jéē táva rō yāca tñūú jnáhan rō.

⁶ 'Ma sáha fuerza rō ñayuu cunéé quívicoo i nuū jnúhun ī yā núu tu cúní i. Chi ndonda i siquĩ rō nájnūhun ina jeē cáyĩhĩ tē rohó. Te ma nácani rō jnúhun ya nuū ñayuu jeē tu cúní cuiti cuajnúhún. Chi cándāa i nájnūhun quĩñi jeē jeñú tē siquĩ perla jeē ndeé yahu ga.

Cacān yō nuū yā te nihín yō
(Lc. 11.9-13; 6.31)

⁷ 'Cacān rō nuū Yaā Dios, te cuāha ya nuū rō. Te nducú rō tāca jéē váha iyó núu yā, te nihín rō sáha ya. Te cacān tahú rō nde nihín rō, nájnūhun sáha ñayuu cahán yehyĩ ndé nune quivĩ i. ⁸ Chi tāca ñayuu jicán, cuāha ya nuū i. Te ñayuu nducú, suni nihín i. Te ñayuu cahán, nune ya ichi nihín i jeē cuní i.

⁹ ¿Te ndé ñn rohó núu sēhe rō jicán i staā nuū rō, te á cuáha rō ñn yuū nuū i? ¹⁰ ¿Te núu jicán i ñn chācá, te á cuáha rō ñn coō nuū i? Tú cuiti súcuan. ¹¹ Núu súcuan te máá rō jijnáhan rō, vēsú ñayuu iyó cuéchi cácuu rō, te cájini rō cuāha rō jéē váha nuū séhe rō. Te nagā ni cuu máá Tátá rō andiví jéē ma cuáha ya jeē váha nuū ñayuu jicán nuū yā.

¹² 'Te nájnūhun cúní rō jeē sáha vāha ñayuu jíin rō, suni súcuan na sáha vāha rō jíin i. Chi tutu ley Moisés súcuan ndácu jniñu, jíin táca tutu tēe ni canacani jnúhun Yaā Dios.

Siquĩ jeē quíví yó yéhyĩ túú
(Lc. 13.24)

¹³ 'Condihvĩ ni rō quívicoo rō ndaha Yaā Dios. Chi cúu nájnūhun ñn yéhyĩ túú. Chi yéhyĩ jíin ichi jeē cuahán nuū jnahnú ndetú ñayuu, jité te cáhnu, te cuehē i

quívicoo yūcuán. ¹⁴ Te yéhyĩ jíin ichi jeē cuahán nuū nihín tahú i cotecu i, chi tuū yehyĩ te cuĩñi ichi, te jecu-ni i cánihín i.

Jíin jniñu casáha ñayuu te nácani yō ndese ñayuu cácuu i
(Lc. 6.43-44)

¹⁵ 'Te ma cándije cuiti rō tēe stáhú jéē cácahān de jeē jnúhun Yaā Dios cácani de. Chi nájnūhun lanchi, quiti tú xeēn, súcuan casáha de vējicoo de nuū rō. Te ini anuá de chi cácuu de nájnūhun yihĩ, quiti xeén.

¹⁶ Jíin jniñu casáha de te nacuni rō de ndese tēe cácuu de. Chi cúu nájnūhun jeē tu scóyo rō ndehē uva xinĩ íñu, ni tu scóyo rō higo xinĩ íñu yóquin. ¹⁷ Te tācá yujnu váha chi jéhe ndehē váha, te yujnu néé chi cúun ndehē neé. ¹⁸ ññ yujnu váha ma cúun ndehē neé, te ni ñn yujnu néé ma cuáha ndehē váha. ¹⁹ Te tācá yujnu jeē tu jéhe ndehē váha, chi tahndē te cayū nuū ñuhún. ²⁰ Te suni súcuan cácuu tēe ún, chi jíin jniñu casáha de te nácani rō ndese tēe cácuu de.

Nasūú ndihĩ ñayuu quívicoo andiví
(Lc. 13.25-27)

²¹ 'Nasūú ndihĩ ñayuu jeē cahán i Jitoho i ruhū cúu jeē quívicoo nuū ndácu Tátá rī jniñu nde andiví. Chi quívicoo máá nene ñayuu jeē squícu jniñu cúní Tátá rī andiví. ²² Te quivĩ jeē sándaā rī jniñu ñayuu, te cuehē i cahán jíin rí: Jitoho na jijnáhan ná, ni canacani ná jnúhun jíin síhvĩ ní, te ni caquenehen ná táchĩ jíin síhvĩ ní, te ni casáha ná cuehē jniñu jéhnu jíin síhvĩ ní jeē náá ni ñayuu sáha. Achi i. ²³ Yūcuán na te cahán rī jíin ñayuu ún: Tu jíin cuiti rī rohó. Cuijyo quingoo rō, chi ñayuu casáha jniñu néé cácuu rō, achi rī.

Siquĩ uú vehe
(Lc. 6.47-49; Mr. 1.22)

²⁴ 'Núu súcuan te tāca ñayuu jeē cájini sōho jnúhun cáhán rī te squícu i, cácuu i nájnūhun ñn tēe ni nacani váha ni, te ni jeni de vehe de siquĩ cáva. ²⁵ Te ni cuun saū, te ni ndaa yūte, te ni quee tachĩ xeén, te ni cachundahá vehe ún. Te tu ní cótúú, chi siquĩ cáva ndeé. ²⁶ Te tāca ñayuu jeē cájini sōho jnúhun cáhán rī te tu squícu i, cácuu i nájnūhun ñn tēe cánéé jeē ní jeni de vehe de nuū ññti. ²⁷ Te ni cuun saū, te ni quiji ndute ñuhún cuehē, te ni quee tachĩ xeén, te ni cachundahá vehe ún. Te ni cotúú-ni, te ni naa ññni. Achí yá jíin i jijnáhan i.

²⁸ Te ná ni jñnu ni cahán Jesús tāca jnúhun yáha, te ñayuu cuehē un ní canaa ni i ni cajini i jnúhun ni steén yā. ²⁹ Chi ni steén váha ya nuū i, chi máá yá cúu jeē ndíso jniñu siquĩ ndihĩ. Te tēe cástéén tutu ley Yaā Dios, tu súcuan cástéén de.

Jeē ní nasávāha ya ñn tēe ndóho cuehyī stehyú

(Mr. 1.40-45; Lc. 5.12-16)

8 Te ni nanuu Jesús yucu ún, te cuehē ñayuu cándiquīn i ya. ² Te ñn tēe ndóho cuehyī stehyú, ni quee de nuū yā. Te ni jecuiñī yitē de nuū yā, te ni cahān de jíin yá:

Jíin na jeē cuu sáha ní jeē nduvāha ná, te núu cúní ni, áchí de.

³ Te Jesús ni soó yá ndaha ya siquī de, te ni cahān yā: Cúní rī. Te na nduvāha ró, áchí yá.

Te ná ni cahān yā súcuan, te ni nduvāha-ni tēe ndóho cuehyī stehyú un. ⁴ Yūcuán na te ni cahān Jesús jíin de:

Ma cáchi cuiñi rō nuū ní ñn. Chi quisteén rō maá ró nuū sutú, te condahá ró jeē socó rō nuū Yaā Dios, nájnūhun ni ndacu Moisés jniñu jenahán, návāha cuni ñayuu jeē ní nduvāha ró. Achí yá.

Jeē ní nasávāha ya mozo capitán

(Lc. 7.1-10)

⁵ Te ni quīvi Jesús ñuu Capernaum. Te ñn tēe nación Roma jeē cúu capitán, ni quee de nuū yā, te ni cahān ndahú de jíin yá:

⁶ Mozo na cáti i vehe ná, chi ni ñin i te ndóho xeēn i, áchí de.

⁷ Te ni cahān Jesús:

Quihīn rī nasávāha ri i núu súcuan, áchí yá.

⁸ Te ni cahān capitán jíin yá:

Tu cújēhnu ná jeē quihīn ni quīvi ní vehe ná. Chi máá jeē cahán-ni ní, te na nduvāha-ni mozo na. ⁹ Chi máá ná suni ndíso jniñu ná ní casáha tēe cácujeñu ga. Te cújēhnu ná núu táca soldado na. Te núu cáhán na jíin ñn de jeē na quihīn de, te cuahān de. Te núu cáhán na jíin inga de jeē na quíji de, te quíji de. Te núu ndácu ná ñn jniñu nuū mozo na, te sáha i. Achí de.

¹⁰ Te jeē ní jini Jesús jnūhun yáha, te ni naa ni yā. Te ni cahān yā jíin ñayuu cándiquīn yā ún:

Jendaá cahán rī jíin ró jeē ni nación yō Israel tu ní níhín rī ni ñn ñayuu cándije níhin súcuan, nájnūhun cándije tēe yáha, vésú tēe nación tu jíin jnūhun Yaā Dios cúu de. ¹¹ Te cáhán rī jíin ró jeē quíjicoo cuehē ñayuu ichi núu cáne niāndii jíin ichi núu quee niāndii. Te cucōo i caji i staā jíin Abraham jíin Isaac jíin Jacob nuū ndácu Yaā Dios jniñu nde andiví. ¹² Te sava ñayuu nación Israel jeē maá i quívicoo núu, te sa quenehen ya i quihīn i nuū néē, chi tu ní cácdíje i. Te yūcuan ndáhyū i te nacayihí yuhu i jeē ndoho xeēn i. Achí yá.

¹³ Yūcuán na te ni cahān yā jíin tēe cúu capitán:

Cuánuhun vehe ró, chi sáha ri nájnūhun cándije ró jeē sáha ri.

Te mozo de un ní nduvāha-ni i máá hora un.

Jeē ní nasávāha ya naná chíso Pedro

(Mr. 1.29-31; Lc. 4.38-39)

¹⁴ Te ni jehēn Jesús vehe Pedro. Te ni jito ya naná chíso de jeē catú ña yíhi quíji ña. ¹⁵ Te ni jniñi ya ndaha ña, te ni quenda-ni quíji ún ña. Te ni ndocuiñī ña, te ni sáha ña jeē ní cayejí de jíin yá.

Jeē ní nasávāha ya cuehē ñayuu

(Mr. 1.32-34; Lc. 4.40-41)

¹⁶ Te jeē ní cuaa ni quecoo ñayuu jíin cuehē ñayuu jeē ñúhun tachī ini i. Te ni quenehen ya tachī un cuán-goo jíin jnūhun cáhán-ni ya. Te suni ni nasávāha ya tā-ca ñayuu cácuñū. ¹⁷ Te súcuan ni cuu návāha cundaā jnūhun ni cahān Isaías, tēe ni nacani jnūhun Yaā Dios jenahán: Máá yá ni tejiyo ndínuū cuehyī cándoho yó, áchí Isaías.

Siquī ñayuu jeē cácuñi i condiquīn i ya

(Lc. 9.57-62)

¹⁸ Te ni jito Jesús jeē ní ndicó ndúu cuehē ñayuu yā. Te ni cahān yā jíin tēe cácuáha jíin yá jeē na yáha de jíin yá inga lado mar. ¹⁹ Te ñn tēe stéén tutu ley Yaā Dios, ni quee de nuū yā, te ni cahān de:

Maestro, condiquīn na níhín quihīn yō ndé-ni cúu-ni nuū quihīn ni, áchí de.

²⁰ Te ni cahān Jesús jíin de:

Tāca ñucuii, íyó yáū cava cáñuhun ti. Te suni saa, iyó táca tē. Te ruhū, Yaā ní nduu tēe, tuū nuū cusú rī, achí yá.

²¹ Te inga tēe ni cahān de jíin yá, te tēe scuáha jíin yá cúu de:

Condetu ní ndé na quíchindūji ná tátá na xíhna gā. Yūcuán na te condiquīn na níhín, áchí de.

²² Te ni cahān Jesús jíin de:

Condiquīn ruhū na quihīn yō. Te stóo tāca ndíyi na chindūji jnahán ndíyi, chi ndíyi cácuo ñayuu tu cácdíje. Achí yá.

Jeē ní jecuiñī tachī níhin jíin mar ni sáha ya

(Mr. 4.35-41; Lc. 8.22-25)

²³ Yūcuán na te ni quívi Jesús ini barco, te tēe cáscuáha jíin yá ni quívicoo de cuahān de jíin yá. ²⁴ Te nuū mar ni jequíhi ñn tachī níhin, te ni stóna ndute mar, ni quívi ini barco un. Te Jesús chi quíxí yā. ²⁵ Te tēe cáscuáha jíin yá ni castóna de ya, te ni cacahān de:

Jnama ní yóhó, chi je quee yó chíji ndute, áchí de.

²⁶ Te ni cahān yā jíin de:

¿Naun cáyūhú ndasí ró? Te tu cácdíje níhin ró jeē cácu ró sáha ri, achí yá.

Yūcuán na te ni ndocuiñī yā, te ni cahān yā nuū tachí níhin un jíin núu mar. Te ni cuu nayúú ñi-ni. ²⁷ Te ni canaa ni de jíinahan de, te ni cacahān de:

¿Ndé ñn ga cúu tēe yáha, jeē ndé tachí níhin jíin mar cájetáhú jeē cahán de? áchí de.

Tēe Gadara jeē cándoho tachī

(Mr. 5.1-20; Lc. 8.26-39)

²⁸ Te ni jinū yā inga lado mar, máá región ñayuu Gadara. Te uū tēe ni quendacoo de nde nuū yíndūji ndīyí, ni quijnahan de ya. Te cáñuhun tachī ini de, te síquī jeē yóhoyo xeēn tachī ún, te ni ñin ñayuu tu cúu yāha i ichi yúcuan. ²⁹ Te ni cacana cóhó de ni casáha tachī:

¿Naun vēji ní núu ná, Jesús Sēhe Yaā Dios? ¿A vēji ní yáha jeē stóho ní sáña ndé ná tu quee maá quívī? áchí.

³⁰ Te nde jicá jecu cáhīin cuehē quínī cájitu tī. ³¹ Te tachī jeē cáñuhun ini tēe un ní cacahān ndahú jíin yá: Núu quenehen ní sáña, te cuāha ni jnūhun na quívī-coo ná ini quínī cáhīin yūcuán, áchí.

³² Te ni cahān yā jíin:

Cuángoo núu súcuan.

Te ni quendacoo tachī ún ini tēe ún, te ni quívīcoo ini quínī. Te quínī un ní cajinu tī ni caningava tī ñin yucáva, te ni ndaquīhī tī ndute mar, ni cajihī tī.

³³ Te tēe cándito tī ni cajinu de cuango de jeē ní cayūhú de. Te ni najinūcoo de ñuu. Te ni cacastūhún de tādá jniñu yúcuan, jíin ndese ni cuu jeē ní quenda-coo tachī ini ndíndúú tēe ún. ³⁴ Yūcuán na te ndivii ñayuu ñuu un, ní quendacoo i cuacondēhé i Jesús. Te ná ni jinūcoo i nuū íne ya, te ni cacahān ndahú i jíin yá jeē na quénda ya región yúcuan quíhīn yá.

Jeē ní nasávāha ya ñin tēe ndóho cuehyī ní jíin

(Mr. 2.1-12; Lc. 5.17-26)

⁹ Yūcuán na te ni ndīvi Jesús ini barco. Te ni nayāha ya cuahān yā inga lado mar, te ni najinū yā ñuu maá yá. ² Te ni caquindeca ñayuu ñin tēe ndóho cuehyī ní jíin, cátú de nuū ñin camilla. Te ni jini Jesús jeē cácan-díje i jeē cúu nasávāha ya tēe ní jíin ún. Te ni cahān yā jíin de:

Na ndúndeyí ni rō séhē, chi je íne cáhnu ni rī nuū tā-ca cuéchi rō, áchí yá.

³ Yūcuán na te jecu tēe cástéén tutu ley Yaā Dios, ni cajeni ni de síquī yā: Jeē cahán tēe yáha súcuan, chi cáhán de jnūhun ndevāha jeē quití ni Yaā Dios. ⁴ Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha ri? ⁵ Jeē uú jnūhun yáha, ¿ndé ñin yí gá cáa? ¿A jéē cahán rī jíin tēe cúhú: Je íne cáhnu ni rī nuū tāca cuéchi rō? ¿Chí yí gá jeē cahān rī: Ndocuīñī te caca rō, chi je ni nduvāha rō, achi rī? ⁶ Te vijna te na stéén rī jeē maá rí, Yaā ní nduu tēe, ndíso jniñu ri ini ñayīvi yáha jéē cóne cáhnu ni rī nuū cuéchi.

Yūcuán na te ni cahān yā jíin tēe ní jíin ún:

Ndocuīñī te naquihin rō camilla rō te quinhun rō vehe rō, áchí yá jíin de.

⁷ Yūcuán na te ni ndocuīñī-ni tēe ún, te cuanhun de vehe de. ⁸ Te ná ni cajito ñayuu un jéē súcuan ní sáha ya, te ni cayūhú i. Te ni cacahān i jeē yóhoyo vāha Yaā

cúu Yaā Dios jeē súcuan ní jēhe ya poder nuū ñin tēe jeē cúu nasávāha de ñayuu, achí i cájito i Jesús.

Jeē ní cana ya Mateo

(Mr. 2.13-17; Lc. 5.27-32)

⁹ Te ni quenda Jesús yūcuan cuáhān yā. Te ni jito ya nuū ñin tēe nání Mateo, néne de nuū cutútú xúhun renta. Te ni cahān yā jíin de:

Condiquín ruhū na quíhīn yō.

Te ni ndocuīñī de, te cuahān de jíin yá.

¹⁰ Yūcuán na te ni jehēn yā ni yeji yā staā vehe de. Te cuehē tēe cástútú xúhun renta jíin inga tēe casáha cuéchi, suni cáyūcú de cáyeji de staā jíin Jesús jíin tēe cáscuáha jíin yá. ¹¹ Te tēe grupo fariseo, ni cajito de, te ni cacahān de jíin tēe cáscuáha jíin yá:

¿Naun yéji maestro rō jíin tēe cástútú xúhun renta jíin inga tēe casáha cuéchi? áchí de.

¹² Te ni jini Jesús, te ni cahān yatá yá jíin de:

Ñayuu cáhīyo vāha, tu jíni ñúhún i tēe tájné, chi ñayuu cácuhū cúu jeē jíni ñúhún. ¹³ Cuáhán jíinahan rō núu súcuan, te nacani ni rō na vé cúu jeē cahán jnūhun yáha jéē yosó núu tútu í: Cúni rī jeē na cúndáhú ni rō jnāhan rō, nasūu jéē socó rō quití nuū rī, achí Yaā Dios nde jenahán. Te ruhū nasūu jéē vēji ri cana ri ñayuu tú cuéchi, jeē cúu i nájnūhun ñayuu cáhīyo vāha, chi sa suhva vēji ri cana ri ñayuu iyó cuéchi, jeē na nácani ni i te stóo i cuéchi i. Achí yá.

Jeē ní cacajnūhún de ya síquī jeē cóndite ni

(Mr. 2.18-22; Lc. 5.33-39)

¹⁴ Yūcuán na te tēe cáscuáha jíin Juan tēe scuándute, ni quecoo de nuū Jesús. Te ni cacahān de jíin yá:

Sáña jíin tēe grupo fariseo, tijni jínu cáhīyo ndite ni na núu Yaā Dios. Te tēe cáscuáha jíin máá ní, ¿naun tu casáha de súcuan?

¹⁵ Te ni cahān Jesús jíin de:

¿A cuu condite ni de níni jéē iyó rí jíin de? ¿A cuu cucuíhyá ni ñayuu cáhīin vico nándāha, te núu níni néne tēe nándāha? Te quee quívī jeē cújīyo tēe nándāha, te quívī ún chi condite ni i.

¹⁶ Te ni cahān yā uū jnūhun yatá síquī jeē tu quíjnāhan jnūhun jeé jéē steén yā jíin táca jnūhun jenahán. Achí yá:

Ni ñin tu náchuhun ñin pedazo sahma jéé núu ñin sah-ma túhú. Chi núu súcuan te ndīyī pedazo jeé un, te tahndē gā jeē tuhú un, te nducáhnu ga nuū catáhdé un. ¹⁷ Te suni tu cáchuhun vino jeé ini ññ túhú. Chi núu súcuan te ndatā ññ ún, te naa vino jíin ññ. Chi cánuú jéē chúhun i vino jeé ini ññ jéé, te súcuan te quéndōo vāha ndíndúú. Achí yá.

Jnūhun sēhe sǎhǎ Jairo jíin ñahan ní quehé yusáhma ya
(Mr. 5.21-43; Lc. 8.40-56)

¹⁸ Te níní cáhán Jesús tāca jnūhun yáha, te ñin tēe cújéhnū nuū ñáyuu hebreo, ni quee de nuū yā. Te ni jecuiñǎ yitǎ de nuū yā, te ni cahān de:

Sēhe sǎhǎ ná sá ní jihǎ i. Te núu na quíhín yō soó ní ndaha ní síquǎ i, te natecu i. Achí de.

¹⁹ Te ni ndocuiñǎ Jesús, te cuahān yā jíin de, te suni cuangoo tēe cáscuáha jíin yá. ²⁰ Te mēhñū ñáyuu cuangoo jíin yá ni quee ñin ñahan, te je ni cuu uxǎ uū cuiyā ndóho ña cuehyǎ niñǎ. Te ni quee ña ichi yátá yā, te ni quehé ña yusáhma ya. ²¹ Chi ni jeni ni ña: Vēsú maá sahma ya na níhín rǎ quehé rǎ, te nduvāha ri, jéni ni ña. ²² Te ni ndió cóto Jesús, te ni jito ya nuū ña, te ni cahān yā:

Na ndúndeyǎ ni rō, séhē. Ni candíje ró jēe cuu nasávāha ri rohó, te jeē yúcuan ní nduvāha ró, áchí yá.

Te ni nduvāha ña maá hora un.

²³ Te ná ni jinū Jesús vehe tēe cújéhnū ún, te ni jito ya nuū tēe cácuu músico jeē quíchindūji de i, jíin núu ñáyuu cuehē, cásaáa i. ²⁴ Te ni cahān yā jíin i:

Cujiyo jíináhan ró, chi sūchi sǎhǎ yáha, tu ní jíhǎ i chi quixǎ-ni i, áchí yá.

Te ni cajecū catá i jeē ni cáhān yā. ²⁵ Te ni quenehen ya ñayuu cuehē ún, te ni quǎvi ya ini vehe. Te ni jniñ ya ndaha sūchi sǎhǎ ní jihǎ ún, te ni ndocuiñǎ-ni i. ²⁶ Te ñǎ región yúcuan ní jitē núu jnūhun jniñū jéhnū ní sáha ya ún.

Jeē ní nasávāha ya uū tēe cuáá

²⁷ Te ni quenda Jesús yúcuan cuáhān yā. Te uū tēe cuáá cuángoo de yatā yā, cácana jee de:

Maá ní jeē cúu ní Sēhe yucūn David, cundáhú ni ní sáña víi, achí de.

²⁸ Te ná ni jinū yā vehe, te ni jinūcoo tēe cuáá un núu yā. Te ni cahān yā jíin de:

¿A cácandíje ró jēe cúu nanune ri tñūu ró? achí yá.

Te ni cacahān de:

Cácaníje ná, áchí de.

²⁹ Yūcuán na te ni tee ya ndaha ya tñūú de, te ni cahān yā:

Na sáha ri nájnūhun cácaníje ró, áchí yá.

³⁰ Te ni cananune-ni tñūú de. Te Jesús ni cahān ñihín ya jíin de:

Ma cáchi cuiñǎ rō nuū ni ñin, áchí yá.

³¹ Te maá de chi ni quendacoo de, te ni cajete-ni de jnūhun ñǎ región yúcuan jēe súcuan ní sáha ya jíin de.

Jeē ní nasávāha ya ñin tēe ñǎhín

³² Te nuū ní quendacoo tēe un cuángoo de, te ni quecoo ñayuu jíin ñin tēe ñǎhín, jeē ñúhun tachǎ ini de. ³³ Te ni quenehen ya tachǎ un cuáhān. Te tēe ñǎhín un ní nacahān de. Te ni canaa ni ñayuu ni cajito i, te ni cacahān i:

Ná tu cuni cuiñǎ yō ni ñin jniñū súcuan ini ñuu Israel, achí i.

³⁴ Te tēe grupo fariseo chi ni cacahān de:

Tēe yáha chi quenehen de tachǎ jíin fuerza maá jex-eén jeē cújéhnū nuū tachǎ, achí de.

Jeē cundáhú ni yā ñayuu cuehē

³⁵ Te ni jica cuu Jesús tācá ñuu jíin rancho, te ni steén yā jnūhun ini tācá vehe i sinagoga. Te ni nacani ya jnūhun vāha ndese ndácu Yaā Dios jniñū. Te ni nasávāha ya ñayuu cácuu na-ni cuehyǎ cándoho i.

³⁶ Te cundáhú ni yā jíto ya nuū ñáyuu cuehē ún. Chi cándoho i te cácuu i nájnūhun lanchi jeē tú jitocho tǎ, chi tu ndíquin i Yaā cúu Jitocho i.

³⁷ Yūcuán na te ni cahān yā jíin tēe cáscuáha jíin yá:

Ñayuu yáha cácuu i nájnūhun trigo jeē tahndé, te ndaā jeē cuehē cúu, te tēe cahnde chi jecu-ni de cúu.

³⁸ Núu súcuan te cacān tahú rō nuū maá Jitocho rō Yaā Dios jeē na tájǎ yá cuehē tēe na quíngoo de cahnde de trigo, cúu jeē nácani de jnūhun ya nuū ñáyuu. Achí yá.

Jeē ní nacǎji ya uxǎ uū tēe apóstol

(Mr 3.13-19; Lc. 6.12-16)

10 Yūcuán na te ni cana ya uxǎ uū tēe jeē scuáha de jíin yá. Te ni jēhe ya poder nuū de jeē quenehen de tachǎ ini ñayuu, jíin jēe nasávāha de ñayuu cácuu tācá ndínuu cuehyǎ.

² Te yāha cúu sǎhvǎ ndíhúxǎ uū tēe apóstol un: Tēe ñin cúu Simón jeē suni nání Pedro, jíin ñani de Andrés. Te uū gā de cácuu sēhe Zebedeo, te nání de Jacobo jíin Juan. ³ Yūcuán na te Felipe, Bartolomé, Tomás, Mateo tēe ni stútú xúhun renta, Jacobo sēhe Alfeo, jíin Lebeo jeē suni nání Tadeo, ⁴ jíin Simón tēe grupo cananista, jíin Judas Iscariote, tēe jeē ní nastúu de ya.

Jeē ní tajǎ yá ndíhúxǎ uū de quinacani de jnūhun

(Mr. 6.7-13; Lc. 9.1-6)

⁵ Te ni tajǎ Jesús ndíhúxǎ uū tēe yáha jeē quíngoo de. Te ni ndacu ya jniñū nuū de ndese sáha de:

Ma quíngoo ró núu ñáyuu jeē násūu ñáyuu hebreo cácuu i, ni ma quívicoo ró tāca ñuu ñayuu Samaria.

⁶ Chi nuū maá-ni ñayuu nación yō Israel quíngoo ró, chi cácuu i nájnūhun lanchi jeē ní sana. ⁷ Te jeē quíngoo ró te suhva nacani ró jnūhun: Je ni cuyajni Yaā ndeé andívǎ jeē ndacu ya jniñū nuū rō, achí rō. ⁸ Te nasávāha ró ñáyuu cándoho cuehyǎ stehyú jíin ñáyuu cándoho tāca gá cuehyǎ, te nastécu rō ndíyi te quenehen ró táchǎ ini ñayuu. Te súcuan-ni ni jēhe ri poder nuū rō jeē sáha ró, te suni súcuan-ni sáha ró jíin i.

⁹ Te ma cóndiso ró xúhun oro, ni xúhun plata, ni centavo cuechǎ. ¹⁰ Ni ma cóndiso ró ñunu stáá caji rō ichi, ni ñga camisa, ni ndijēn, ni vara. Chi síquǎ jniñū jeē nácani ró jnūhun nuū ñáyuu, te cánuú coto i róhó.

¹¹ Te na-ni ñuu chí rancho núu ni jinūcoo ró, te yūcuán nducú ró ñin ñayuu vāha, te coyūcu ró vehe i

nde quingoo tucu ró. ¹² Te jeē quívi ró vehe ñayuu ún, te cahān rō jeē na quíji jñūhun ndeyí jñūhun siñ ni nuū i. ¹³ Te núu ñayuu vāha cácuu i, te jñūhun ndeyí ní cahān rō quendōo siquī i. Te núu nasūu ñayuu vāha cácuu i, te jñūhun ndeyí ní cahān rō ma quéndōo siquī i. ¹⁴ Te núu íyó ñayuu jeē tu cájetáhú i rōhó, ni tu cúní i cuni nahín i jñūhun cahān rō, yūcuán na te quendacoo ró vehe un chí ñuu ún, te scóyo ró tēcachā jehē rō, te súcuan stéén rō jeē iyó cuéchi i jeē tu ní cájetáhú i. ¹⁵ Jendaá cahán rī jíin ró jeē quívi juicio te xeēn gā coo castigo siquī ñuu casáha súcuan vésú siquī ñuu Sodoma jíin ñuu Gomorra nuū ní casáha ndasí ñayuu cuéchi.

Jeē coto xeēn ñayuu de jíjnáhan de

¹⁶ Cuni sōho ró, chí tájí rí rohó quíngoo ró nájnūhun lanchi mēhñu yíhī. Núu súcuan te coo listo rō nájnūhun coō, te coo víta ni rō nájnūhun paloma. ¹⁷ Te condito ró máá ró nuū ñayuu, chí quee quívi jeē quíndeca i rōhó núu tohó, te cani i rōhó ini tēcá vehe i sinagoga. ¹⁸ Te suni nde nuū tēcá gobernador jíin rey quíndeca i rōhó jéē siquí ruhū. Te súcuan te nune ichi jeē nacani ndaā rō jñūhun ri nuū de jíin núu ñayuu tēcá nación jeē tu jíin jñūhun Yaā Dios. ¹⁹ Te núu ni jendeca i rōhó núu tēcá tée ún, ma nácani ndasí ni rō ndese cahān rō. Chí máá hora un te máá yá steén nuū rō ndese cahān rō. ²⁰ Chí nasūu máá ró cúu jeē cahán, chí Espíritu maá Tátá rō cúu jeē cahán jíin yuhu ró.

²¹ Te sava ñayuu tu cácuandije, nastúu i ñani i jeē na cúu. Te tátá nastúu sēhe. Te sēhe ndonda siquī tatá jíin náná jeē na cúu. ²² Te ndihí ñayuu quitē ni i nuū rō jeē siquí ruhū. Te ñayuu jeē cuiñi ñihin nde jeē jínu jñúndóho, ñayuu ún chí cācu ánuá i. ²³ Te núu cájito xeēn i rōhó ññ ñuu, te cunu ró quíhīn rō inga ñuu. Chí jendaá cahán rī jíin ró jeē ma ndécāva ró caca cuu ró ndihí nación yō Israel te ndijí-ni máá rí, Yaā ní nduu tēe.

²⁴ ññ tēe scuáha, tu cújéhnu de nuū maestro de. Ni tēe cúu mozo, tu cújéhnu de nuū patrón de. ²⁵ Tēe scuáha chí nájnūhun ndóho maestro de suni súcuan ndoho nahín máá de, te tēe cúu mozo suni ndoho de nájnūhun ndóho patrón de. Núu súcuan te núu ruhū cácahān i jeē Satanás cúu ri, te nagā ni cuu jeē ma cahán i jeē rohó cácuu Satanás.

Jeē ní cachi yā ndé ññ cúu jeē yūhu yó

(Lc. 12.2-9)

²⁶ Núu súcuan te ma yūhu ró coto ró ñayuu. Chí tēcá jñūhun cácahān sāhí i ma quéndōo sāhí cuiti, chí ndihí natūu ndijin, te cuni ñayuu. ²⁷ Jñūhun ní cahān rī jíin ró jeē tu ní jíin ñayuu, na nácastūhun cájí ró nuū i. Te jñūhun ní nacani sāhi rí nuū rō, na nácani jee ró yátā tēcá vehe. ²⁸ Te ma yūhu ró coto ró ñayuu cahni yiqui cúu rō, chí ma cúu cahni i ánuá rō. Chí sa suhva yūhu

ró jéē ma stívi ró núu Yaā Dios, chí cuu snáhnú ndetū yā rohó jéē quívi ánuá rō jíin yiqui cúu rō infierno.

²⁹ Te tēcá saa chí tú yahu ndéé tē, chí nde uū tē jeē ññ centavo lulí. Te ni ññ tē tu ñinga nuū ñūhun te núu tu jéhe Tátá rō jñūhun, chí ndíto ya tē. ³⁰ Te nagā ni cuu rōhó jíjnáhan ró, chí nde ndihí ixi xíní rō je ni cahu ya. ³¹ Núu súcuan te ma yūhu ró jíjnáhan ró, chí cánúu ndasí gá rō nuū yā vésú cuehē tēcá saa.

Ñayuu jejnúhún Jesucristo nuū inga ñayuu

(Lc. 12.8-9)

³² Te tēcá ñayuu jeē cuajnúhún rúhū nuū inga ñayuu, suni súcuan cuajnúhún rí i nuū Tátá rī, Yaā ndeé andiví. ³³ Te tēcá ñayuu jeē ma cuajnúhún rúhū nuū inga ñayuu, suni súcuan ma cuajnúhún rí i nuū Tátá rī, Yaā ndeé andiví.

Jeē siquí Jesús te cusñin ini ñayuu

(Lc. 12.51-53; 14.26-27)

³⁴ Ma cáni ni rō jíjnáhan ró jéē véji ri jeē cóyūcu mání ñayuu ñayiví. Tú véji ri jeē cóyūcu mání ñayuu, chí sa suhva cuajnáhan i jeē siquí ruhū. ³⁵ Chí jeē siquí ruhū te cusñin ini sēhe yí jíin tátá, te sēhe síhí jíin náná, te sēhe jēnu jíin náná chíso. ³⁶ Chí tēcá ñayuu candije ruhū, chí jnáhan vehe i cúu jeē quitē ni nuū i.

³⁷ Te núu ndé ññ ñayuu maní gā i jíin tátá i chí jíin náná i vésú jíin rúhū, nasūu ñayuu vāha cúu i jeē cóndiquīn i ruhū. Te núu ndé ññ ñayuu maní gā i jíin sēhe yí i chí jíin sēhe síhí i vésú jíin rúhū, te suni nasūu ñayuu vāha cúu i jeē cóndiquīn i ruhū. ³⁸ Te na-ni ñayuu núu tu jéhe i jñūhun ndoho i jñúndóho vésú nde cuu i jeē siquí jeē cóndiquīn i ruhū, nasūu ñayuu vāha cúu i jeē cóndiquīn i ruhū. ³⁹ Te núu ndé ñayuu cúní i cācu i nuū jñúndóho quiji nuū i jeē siquí ruhū, núu súcuan te jnahnū ndetū i ññ cáni. Te núu ndé ññ ñayuu vésú na cúu i jeē siquí ruhū, te cotecu i ññ cáni.

Jeē iyó táhū yō nuū Yaā Dios

(Mr. 9.41)

⁴⁰ Te ñayuu cuatáhú rōhó jíjnáhan ró, núu súcuan te ruhū cájetáhú i. Te ñayuu cájetáhú rúhū, cájetáhú i Yaā ní tají rúhū véji ri. ⁴¹ Núu na-ni ñayuu cuatáhú i ññ tēe nácani jñūhun Yaā Dios, siquí jeē jíca de jñiñu Yaā Dios, núu súcuan te inuú-ni coo tahū de nuū Yaā Dios jíin tēe nácani jñūhun Yaā Dios. Te núu na-ni ñayuu cuatáhú i ññ tēe ndaā, siquí jeē tēe ndaā cúu de, núu súcuan te inuú-ni coo tahū de nuū Yaā Dios jíin tēe ndaā. ⁴² Te núu ndé ñayuu cuáha i vésú ññ ñajin ndute míjin coho ññ sūchi yáha, siquí jeē cúu i sūchi cándije ruhū, ndaā ndije cúu jeē nihín i tahū i. Achí yá.

Jeē ní tají Juan uū tēe nuū yā

(Lc. 7.18-35)

11 Te ná ni jīnu ni ndacu Jesús jniñu nuū ndihúxí uū tēe cáscuáha jíin yá, te ni quenda ya yūcuan cuáhān yā jeē steén yā te nacani ya jnūhun tācá ñuu región yūcuán.

² Te íne Juan vecāa. Te ni nihīn de jnūhun tācá jniñu sáha Cristo. Te ni tají de uū tēe cáscuáha jíin de, ³ cua-cajnūhún de ya:

¿A máá ní cúu Cristo jeē achí tutu jeē quíji, chí conde-tu yó inga tēe quíji? áchí de.

⁴ Te ni cahān yā jíin de:

Cuángoo te castūhun ró nuū Juan tācá jniñu cájito ró jíin jnúhun cájini ró. ⁵ Te cachi rō nuū de jeē ñáyuu cuaá cánanune tīnūú i, te ñayuu yacuá cánacaca i, te ñayuu ndóho cuehyī stehyú cánduvāha i, te ñayuu sohó cánanune sōho i, te ñayuu jihí nátecu i sáha ri. Te suni nácani ri jnūhun nuū ñáyuu ndahú jéē jnama Yaā Dios i. ⁶ Te yōhyo ndetū tēe jeē ma nácani yátá ni de jeē ruhū cúu Cristo. Súcuan cachi rō nuū Juan. Achí yá jíin de.

⁷ Te náa cuanuhun ndīndúú tēe ún, te ni quejéé Jesús cahān yā jnūhun Juan jíin ñáyuu:

¿Na vé ni jécondēhe ró jijnáhan ró nde nuū ñúhun téhé? ¿A ñn tēe jéni ñn jéni uū ni, nájnūhun ite jeē cánda sáha tachí? ⁸ Te núu tuú, ¿te na vé ni jécondēhe ró núu súcuan? ¿A ñn tēe cúní cujéhu jeē ñúhun sahma lúu? Tuú chí cájini rō jeē tēe cáñuhun sahma lúu, máni ini vehe rey cáyūcú de. ⁹ ¿Te na vé ni jécondēhe ró núu súcuan? ¿A ñn tēe nácani jnūhun Yaā Dios? Cáhān rī jíin ró jeē suu ni jecondēhe ró, te cújéhu ga Juan yáha vēsú tāca gá tēe ni canacani jnūhun Yaā Dios. ¹⁰ Chi jnūhun Juan cúu jeē ni cáhān Yaā Dios jeē yosó núu tú-tu i:

Tají rí tēe nacani jnūhun ri cosnūú de ichi núú Cristo, návāha coo tūhva ñayuu jeē jinú yā.

Achí Yaā Dios, achí tutu. ¹¹ Te jendaá cahān rī jíin ró jeē ini ñayīvi yáha cújéhu ga Juan tēe scuándute vēsú tāca gá tēe jeē ni íyo ini ñayīví. Te vēsú súcuan te tāca tēe núu ga ini ñuu nuū ndácu Yaā andíví jniñu, cújéhu ga de vēsú Juan.

¹² Te nde quivī ní quee Juan tēe scuándute, te nde vijna, chí cánducú ndéyí ñáyuu quívicoo i ndaha Yaā andíví jéē ndácu ya jniñu nuū i. Te nde ñayuu xeēn cánducú ndéyí i siquī. ¹³ Chi nde ná tu quíji Juan, te ni t̄yo máá ley Moisés, te suni ni t̄yo tāca tēe ni canacani jnūhun Yaā Dios. Te ni cacastūhún de ndese coo jeē ndacu Yaā Dios jniñu. ¹⁴ Te ni cacahān de jeē ndíji Elías. Te núu cácuni rō cuatáhu ró jnūhun, te jíin rō jeē máá Juan cúu tēe jeē ní cachi tutu jeē quíji, chí cúu de nájnūhun Elías. ¹⁵ Tāca rōhó jéē jíni sōho, na chúsóhó ró.

¹⁶ Yāhá cachi rī ñn jnūhun yátá návāha na cúni rō ndese cúu ñayuu tiempo vijna. Cúu i nájnūhun sūchi lúli cáhīn nuū yáhu cácasquí i. Te cácana ndee i xinī

jnáhan i: ¹⁷ Ni cativi rī scuilí, te tu ní cájita jéhé ró. Te ni cajita ri yaa jeē cuihyá jíta, te tu ní cándaHyū rō, achí i. Te nájnūhun cándāa sūchi lúli un jéē tu ní nújnahan ni i ni ñn, súcuan cándāa ró. ¹⁸ Chi ni quíji Juan te cuehē jínu ni t̄yo ndite ni de, tu ní yéji de ni tu ní jíhi de. Te tu ní cánujnahan ni rō, chí ni cacahān rō jeē ñúhun tachí ini de. ¹⁹ Yūcuán na te ni quee maá rí, Yaā ní nduu tēe, te yéji rī jíhi ri, te tu cánujnahan ni rō, te chísoó jnúhun ró cácahān rō jeē máni máá jéē yéji rī jíhi ri vino. Te quíjnáhan ri jíin tēe cástútú xúhun renta jíin táca gá tēe cásaha cuēchi, áchí ró. Te núu cúndichí ñn tēe jíin jnúhun Yaā Dios, te jíin jniñu sáha de te nátūu jeē tēe ndichí cúu de. Achí yá.

Jeē ní cuxeēn yā nuū sava ñuu nīhni ni

(Lc. 10.13-15)

²⁰ Yūcuán na te ni quejéé yá cúxeēn yā nuū tācá ñuu nuū ni sáha ya cuehē jniñu jéhu, chí tu ní cánacani ni i jeē stóo i cuēchi i. Te ni cahān yā:

²¹ Nacā jeē xeēn ndoho ró, ñáyuu ñuu Corazín. Te nacā jeē xeēn ndoho ró, ñáyuu ñuu Betsaida. Chí núu ini ñuu Tiro jíin ñuu Sidón ni sáha ri jniñu jéhu jeē ni sáha ri ini ñuu maá ró, te yachí nacani ni ñayuu ñuu un jéē stóo i cuēchi i núú. Te sáha i seña jeē steén jeē nácani ni i siquī cuēchi i, chí cahun i sahma jnúú te chuhun i yaā xinī i núú. ²² Núu súcuan te cáhān rī jíin ró jeē quivī coo juicio te xeēn gā coo castigo siquī rō jijnáhan ró vēsú jeē ni íyo siquī ñuu Tiro jíin ñuu Sidón. ²³ Te rōhó ñáyuu ñuu Capernaum, ¿á cájeni ni rō jeē cujéhu ró nájnūhun ñn jeē cáa cuahān ichi ándiví? Tuú chí sa nanuu ró ndé lugar nuū cáyūcu ánuá ndīyí. Chí núu ini ñuu Sodoma ni sáha ri jniñu jéhu jeē ni sáha ri nuū maá ró, te coo ñuu yūcuan ndé vijna núú. ²⁴ Núu súcuan te cáhān rī jíin ró jeē quivī coo juicio te xeēn gā coo castigo siquī rō vēsú jeē ni íyo siquī ñáyuu ñuu Sodoma. Achí yá.

Nehen nuū rī ndetātu ró, achí yá

(Lc. 10.21-22)

²⁵ Te suni quivī un ní cahān Jesús:

Na cútahū na núú ni Tātā, Jitoho andíví jíin ñáyiví. Chí ni jesi ní táca jnúhun ndichí ní, jeē ma cúni ñayuu ndichí jíin ñáyuu tūhva cuenta ñayīvi yáha. Te ni steén ni núú ñáyuu cácuu nájnūhun sūchi lúli. ²⁶ Chí súcuan ni nujnahan ni ni Tātā, achí yá.

²⁷ Te ni cahān gā yā:

Ndivi ni jēhe Tātá rī nuū rī. Te tu cájini ñayuu ndé ñn cúu ruhū, Sēhe Yaā Dios, chí máá-ni Tātá rī cúu jeē jiní yā ruhū. Ni tu cájini ñayuu ndese Yaā cúu máá Tātá, chí máá-ni Sēhe cúu jeē jiní. Te íyo ñáyuu jeē cúní máá Sēhe steén yā nuū i ndese Yaā cúu Tātá yā, te máá i suni cuni i. ²⁸ Tāca ró jéē ni cúta ró jíin táca jniñu jíin ley jeē yí sáha jíin ró, nehen quívicoo ró ndaha ri, te ndetātu ró sáha ri. ²⁹ Quiví ró núú jniñu ndácu máá rí, te scuáha ró coo ró nájnūhun íyo máá rí. Chí vītá ni rī te suchí ni rī. Te súcuan te ndetātu ró jíin ánuá rō sáha

ri. ³⁰ Chi tú yíjé jéé cuandetū rō nuū rī, ni tú yíjé jéé squícu ró jniñu ndácu ri. Achí yá.

Jeē ní cataxín de yoco trigo quiví ndétátú

(Mr. 2.23-28; Lc. 6.1-5)

12 Te ñin quiví ndétātu ní yáha Jesús cuahān yā nuū cáa trigo. Te tēe cáscuáha jíin yá, cájī de sōco. Te ni quejéé de cátaxín de yoco trigo cáyeji de. ² Te ni cajito tēe grupo fariseo, te ni cacahān de jíin yá:

Condēhé, chi tēe cáscuáha jíin ró casáha de jniñu jeē tu íyó váha sáha yó quiví ndétátú, áchí ley Moisés.

³ Te ni cahān maá yá jíin de:

¿A tu ní cácahu ró tutu ndese ni sáha David, ñin quiví jeē ni jíin de sōco jíin tēe cáhīin jíin de? ⁴ Te ni quiví de ini vehe Yaā Dios. Te ni yeji de pan íi jeē yosó ndijin nuū Yaā Dios. Te tú na ley jeē cáji de, ni tēe cáhīin jíin de, chi máa-ni sutū cuu caji. Te vēsú súcuan te tú na cuēchi ní íyo siquí de. ⁵ ¿Te á tu ní cácahu ró tutu ley Moisés, ndese cásjniñu sutū ini templo, vēsú quiví ndétātu cúu? Te tú na cuēchi íyó síquí de, vēsú quiví ndétātu cásjniñu de jniñu jeē cácu de sutū. ⁶ Te cáhān rī jíin ró jeē maá rí jeē íyó yáha, cújéhu ga rī vēsú templo. ⁷ Te tu cájecūhun ni rō jijnáhan ró jnūhun yáha jeē yosó núu tútu íi jeē ni cáhān Yaā Dios: Jeē cuní gā rī cúu jeē cundáhú ni rō jnáhan ró, vēsú jeē socó rō quití nuū rī, achí yá. Te núu jeē ní cajecūhun ni rō jnūhun yáha, te ma cahān rō súcuan siquí tēe jeē tú na cuēchi núu. ⁸ Chi ruhū, Yaā ní nduu tēe, máa rí cúu jeē ndácu jniñu siquí ndese sáha ñayuu quiví ndétátú, áchí yá.

Jeē ní nduvāha tēe ni ichí ndaha

(Mr. 3.1-6; Lc. 6.6-11)

⁹ Yūcuán na te cuahān Jesús, te ni quiví ya ini vehe íi sinagoga. ¹⁰ Te yūcuan íne ñin tēe ni ichí ñin ndaha de. Te cácu ni tēe grupo fariseo jeē nihīn de cuēchi siquí yā, te ni cacajñuhún de ya:

¿A íyó ley jeē cuu nasávāha yó ñayuu cuhú quiví ndétátú? áchí de.

¹¹ Te ni cahān yā jíin de:

¿Ndé ñin róhó, núu névāha ró ñin lanchi, te núu nínga tí ini ñin yaū quiví ndétátú, te á tu jéhén rō natava rō tē, chí naún? ¹² ¿Te á tu cánuú ndasí gá ñin tēe vēsú ñin lanchi? Núu súcuan te vetū-ni sáha yó jniñu váha quiví ndétátú, áchí yá.

¹³ Yūcuán na te ni cahān yā jíin tēe ni ichí ndaha ún: Scáá ndaha ró.

Te ni scaá de, te ni nduvāha-ni nájnūhun íyó inga.

¹⁴ Yūcuán na te ni quendacoo tēe grupo fariseo, te ni candajñuhún de siquí Jesús, ndese cahni de ya.

Jnūhun Jesús jeē ni cáhān Isaías nde jenahán

¹⁵ Te ni jini Jesús jeē súcuan cájeni ni de, te ni quenda ya yūcuan cuahān yā. Te cuehē ñayuu cándiquín i ya. Te ni nasávāha ya ndihí ñayuu cuhú. ¹⁶ Te ni ndacu ya

jniñu nuū i jeē ma stéén i ya. ¹⁷ Te súcuan ni cuu návāha squícu jnūhun ni cahān Yaā Dios siquí Jesús, te ni nacani Isaías jnūhun ya un ndé jenahán:

¹⁸ Yāha cúu mozo rī jeē ní nacāji rī, te manī rī jíin yá, te cúsiñ ni rī jíin yá.

Te cuāha rī Espíritu rī coo jíin yá.

Te máa yá sándaā jniñu ñayuu tācá nación.

¹⁹ Ma tejnáhan ya, ni ma cána jee ya, te ni ma cahán jee ya ichi jeē cúni ñayuu.

²⁰ Ma sáha xeñ yā jíin ñayuu ni cunihin jnūndóho siquí,

ni ma snāā yā ñayuu jeē maá lulí-ni cácandíje.

Chi cújéhu ya siquí ndihí, te ndaā ndacu ya jniñu.

²¹ Te ñayuu tācá nación cocuhun ni i jeē jnáma ya i. Achí Yaā Dios, achí Isaías nde jenahán.

Jeē ní cacahān de jeē jejniñu ya fuerza Satanás

(Mr. 3.19-30; Lc. 11.14-23; 12.10)

²² Yūcuán na te ni caquindeca i nuū yā ñin tēe cuáa ñíhín, chí ñúhun tachí ini de. Te ni nasávāha ya de. Te ni ndundijin tinū de te ni nacahān de. ²³ Te ndihí ñayuu cuehē un ní canaa ni i cájito i, te ni cacahān i:

¿A tēe yáha cúu jeē ni cáhān Yaā Dios jeē cacu nuū yucūn David? áchí i.

²⁴ Te tēe grupo fariseo, ni cajini de jeē súcuan cácahān i. Te ni cacahān de:

Tēe yáha ma cúu quenehen de tachí núu jeē tu sáha de jíin fuerza Satanás jeē cújéhu nuū tachí, áchí de.

²⁵ Te Jesús ni jini yā jeē súcuan cájeni ni de, te ni cahān yā jíin de:

Tācá nación jeē casásñin máa te cájejnáhan máa, núu súcuan te snāā jeē íyó váha máa. Te núu ñin ñuu chí ñin vehe casásñin máa te cájejnáhan máa, te ma cúu ga coyūcu cáhnu.

²⁶ Te suni súcuan Satanás núu quenehen jnáhan tachí, núu súcuan te sásñin máa. ¿Te ndese cuiñi ñihin Satanás jeē ndácu jniñu núu súcuan? ²⁷ Chi cácahān rō jeē jíin fuerza Satanás quenehen rī tachí.

Te núu súcuan cúu núu, te ñayuu cascuáha jíin máa ró jijnáhan ró, ¿na jíin fuerza cáquenehen máa i tachí, cájeni ni rō? Núu súcuan te máa i jijnáhan i cachi jeē ní castívi ndasí suhva ró ni cacahān rō jeē cáquenehen rī tachí jíin fuerza Satanás. ²⁸ Te tuú chí sa jíin Espíritu Yaā Dios cúu jeē quenehen rī tachí. Núu súcuan te je ndéé Yaā Dios mēhñu ró jeē ndácu ya jniñu.

²⁹ ¿Chi ndese cuu quiví ñin tēe ini vehe tēe ndacuí jeē quenehen de ndajniñu de? Chi cánuú jeē xíhna gā cuhni de tēe ndacuí ún, te yūcuán na te cuu quenehen de ndajniñu ún. Te suni súcuan cúu jeē jíhni rī Satanás te quenehen rī tachí.

³⁰ Te ñayuu tu íyó manī jíin rí, núu súcuan te jíto uhū i ruhū. Te ñayuu tu nástútú jíin rí, núu súcuan te sa jéte núu i ñayuu vējicoo nuū rī.

³¹ Jeē yūcuan cáhān rī jíin ró: Íyó modo coo jnūhun cáhnu ni nuū tāca cuéchi cásaña ñayuu, jíin núu tāca jnūhun néé cácahān i. Te núu cahān ndevāha i siquí Espíritu Santo, te ma cóne cáhnu ni Yaā Dios nuū i.

³² Te núu na-ni ñayuu cahān i siquĩ ruhū, Yaā ní nduu tēe, cuu cone cáhnu ni Yaā Dios nuū i. Te núu na-ni ñayuu cahān ndevāha i siquĩ Espiritu Santo, ma cóne cáhnu ni Yaā Dios nuū i, ni jeē iyó i ñayivi yáha, ni ñí tiempo quiji.

Jnūhun yujnu váha jíin yujnu néé

(Lc. 6.43-45)

³³ 'Núu yujnu váha, te vāha ndehē, te núu yujnu néé, te cánéé ndehē. Chi jíin ndéhē te jini yō ndese yujnu cúu. Te suni súcuan ñayuu. ³⁴ Va sēhe coō cácuu ró, chi xeēn rō nájnūhun coō. ¿Ndese cuu cahān rō jnūhun vāha, chi ñayuu casáha néé cácuu ró? Chi jniñu jeē jeni ni anuá ñayuu, máni yūcuan cáhán i. ³⁵ Tēe vāha cáhán de jnūhun vāha, chi iyó ndáā anuá de. Te tēe sáha néé cáhán de jnūhun néé, chi cánéé ánuá de. ³⁶ Te cáhán rī jíin ró jeē tācá na-ni jnūhun cácahān ñayuu, nacuāha i cuenta jnūhun un quivĩ coo juicio. ³⁷ Chi jíin jnūhun ni cahān rō sándaā yā siquĩ rō, núu jeē quéndōo ndaā rō chí jéé cóndee cuēchi siquĩ rō. Achí yá.

Jeē ní cajicān ñayuu tu cácañdije ñi jniñu jéhu

(Mr. 8.12; Lc. 11.29-32)

³⁸ Yūcuán na te jecu tēe grupo fariseo jíin tēe cástéen tutu ley Yaā Dios, ni cacahān de jíin yá:

Maestro, cácuni na jéé sáha ní ñi jniñu jéhu jeē steén núu máá ní cúu Yaā ní tají Yaā Dios, achí de.

³⁹ Te ni cahān yā jíin de:

Ñayuu yáha jeē casáha jniñu néé, tu cájetáhú cuiti i Yaā Dios. Te cajicān i ñi jniñu jéhu jeē steén núu Yaā ní tají Yaā Dios cúu ri. Te tuá na ñga jniñu jéhu steén rī nuū i, chi máá-ni jniñu jéhu nájnūhun ni cuu jíin Jonás, tēe ni nacani jnūhun Yaā Dios. ⁴⁰ Chi nájnūhun ni ine Jonás chíi chācá cáhnu unī nduú unī ñuú, suni súcuan ruhū, Yaā ní nduu tēe, cuu rī te cone ri chíi ñuhun unī nduú unī ñuú, te sáá te natecu rī. ⁴¹ Te tāca ñayuu ñuu Nínive nuū ní nacani Jonás jnūhun, natecu i jíin ñayuu tiempo yáha, quivĩ juicio jeē sándaā yā cuēchi, te cahān i cuēchi siquĩ ñayuu yáha. Chi máá i ni canacani ni i ni castóo i cuēchi i quivĩ ní nacani Jonás jnūhun nuū i. Te vijna chi cújéhu ga ruhū Yaā íne yāhá vēsú Jonás, te tu cácañdije ró ruhū. ⁴² Te reina jeē ní cújéhu nación ichi sur, natecu ña jíin ñayuu tiempo yáha, quivĩ juicio jeē sándaā yā cuēchi, te cahān ña cuēchi siquĩ i. Chi nde jicá téyí ní quiji ña ni jini nahín ña jnūhun ndíchí ní cahān rey Salomón. Te vijna chi cújéhu ga ruhū, Yaā íne yāhá vēsú Salomón, te tu cácañdije ró ruhū.

Tachí jeē nastútú jnáhan ndívi ini ñayuu

(Lc. 11.24-26)

⁴³ 'Núu ni quenda ñi tachí ini ñi tēe tu cácañdije, te jica cuu nuū ñuhun téhé, ndúcú nuū ndétátú, te tu níhín, yūcuán na te jeni ni maá: ⁴⁴ Na quínuhun rī vehe nuū ní quenda ri. Te núu ni ndee tucu, te jito jeē tēe tu

cácañdije ún, cúu de nájnūhun ñi vehe iyú te ni ndundoo. ⁴⁵ Yūcuán na te jéquiñ uxā gā tachí neé gá vēsú maá. Te quívicoo ini tēe un jéé cóyūcu yūcuan. Núu súcuan te xeēn gā ndoho tēe un jéé sándañhí vēsú jeé xíhna ñuhún. Te suni súcuan ndoho ñayuu tiempo yáha jeē casáha néé. Achí yá.

Náná yā jíin ñani yā

(Mr. 3.31-35; Lc. 8.19-21)

⁴⁶ Te níni súcuan cáhán yā jíin ñayuu ún, te ni quee naná yā jíin táca ñani yā, ñi ña nuū quéhe, te cúní ña cahān ña jíin yá. ⁴⁷ Te ni cachi ñi tēe nuū yā:

Náná ni jíin táca ñani ni cáhñi nuū quéhe, te cácuni cahān jíin ní, achí de.

⁴⁸ Te ni cahān yā jíin tēe ni cahān súcuan jíin yá:

¿Ndé ñi cúu náná rī, te ndé ñi cácuu ñani rī? Achí yá.

⁴⁹ Te ni steén ndaha yá nde nuū cáyūcu tēe cáscuáha jíin yá. Te ni cahān yā:

Suni náná rī jíin ñani rī cácuu táca jéé yáha. ⁵⁰ Chi tāca ñayuu casquícu jniñu cúní maá Tátá rī, Yaā ndeé andiví, suu cácuu ñani rī, cuāha ri, náná rī. Achí yá.

Jnūhun yátá siquĩ tēe jéte trigo

(Mr. 4.1-9; Lc. 8.4-8)

13 Te quivĩ un ní quenda Jesús vehe cuahān yā, te ni jinū yā ni cucōo ya yumar. ² Te ni cutútú cuéhē ndasí ñayuu nuū yā. Te ni quivĩ ya ini ñi barco, ni cucōo ya. Te táca ñayuu un cáyūcu i yumar. ³ Te jíin jnūhun yátá ni cahān yā cuéhē jnūhun nuū i, te súcuan ni cahān yā:

Ñi tēe cate trigo, ni quenda de jeē cáte de. ⁴ Te ná ni quejéé de jéte de, te jecu trigo ni jitē yuhíchi. Te ni quecoo saa, ni cayejí tē. ⁵ Te jecu gā trigo ni jitē nuū ñuhun yuū, nuū tú cuéhē ñuhun. Te yachí-ni ni cane, chí tu cóquin ñuhun. ⁶ Te nuū ní cane niāndii, te ni ichí-ni, te ni casun, chí tu ní níhín nuū quihín yoho. ⁷ Te jecu gā trigo ni jitē nuū náne iñu. Te ni jehnu iñu ún, te ni jesí nuū. ⁸ Te jecu ni jitē nuū ñuhun váha, te ni jēhe cuéhē nunī. Sava ni jēhe ciento jeē ñi ñi, te sava ni jēhe unī xico, te sava ga ni jēhe ocō uxī. ⁹ Tāca róhó jéé jini sōho, na chúsóhó ró. Achí yá.

Najehē cahán yā máni jnūhun yátá

(Mr. 4.10-12; Lc. 8.9-10)

¹⁰ Yūcuán na te tēe cáscuáha jíin yá un ní quecoo de nde nuū yā, te ni cacajnūhún de ya:

¿Najehē cúu jeē máni jnūhun yátá cáhán ni jíin ñayuu? achí de.

¹¹ Te ni cahān yā jíin de:

Róhó jíinánan ró chí sáha ya jeē cájecūhun ni rō jnūhun ni yisāhi yáha, ndese quívicoo ñayuu ndaha Yaā andiví jeē ndacu ya jniñu nuū i. Te ñayuu yáha jéé tu cácañdije, chí ma jécūhun ni i. ¹² Chí ñayuu je jécūhun ni, chí steén gā yā nuū i, te víhyá gā cuni i. Te ñayuu tu cácañdije, sa suhva naa jecu jeé je jíin i ún.

¹³ Jeē yúcuan cáhán rī jnūhun yátá jíin i. Chi vēsú cájito i, te quendō i nájñūhun jeē tú na vé ni cájito i. Te vēsú cájini sōho i, te ma jécūhun ni i, te quendō i nájñūhun jeē tú na vé ni cájini i. ¹⁴ Ñayuu yāhá chi squícu síquī i jnūhun ni cahān Yaā Dios jeē ní nacani Isaías, tēe ni nacani jnūhun nde jenahán:

Vēsú cuni nahín ró, te ma jécūhun ni rō,
te vēsú coto ró, te ma nácuni rō.

¹⁵ Chi ñayuu yáha yōhoyo ni ndunīhni ni i, te yōhoyo uhū chusóhó i, te nájñūhun cájesi i tñūú i, návāha coo nájñūhun jeē tu cájito i, ni tu cájini nahín i, te ni ma jécūhun ni i, ni ma násāma ini i quīvīcoo i nuū rī jeē nasávāha ri anuá i nuū cuéchi i. Achí Yaā Dios, achí tutu.

¹⁶ Te máá ró jijnáhan ró, yōhoyo ndetū rō, chi cájito ró jíin tñūu ró, te cájini nahín ró jíin sóho ró. ¹⁷ Chi jendaá cahán rī jíin ró jeē cuehē tēe ni canacani jnūhun Yaā Dios jíin cuéhē tēe ndaā, ni cacuni de coto de jeē cájito máá ró, te tu ní cájito de. Te suni ni cacuni de cuni sōho de jeē cájini sōho máá ró, te tu ní cájini de. Achí yá.

Jeē ní castūhun cájī yá jnūhun yátá tēe jéte trigo

(Mr. 4.13-20; Lc. 8.11-15)

¹⁸ Núu súcuan te cuni nahín jijnáhan ró na vé cuni cahān jnūhun yátá tēe jéte trigo: Trigo un cúu jnūhun Yaā Dios. ¹⁹ Te ñayuu cájini sōho jnūhun ndese ndácu Yaā andiví jniñu, núu tu cájecūhun ni i te cácuu i nájñūhun trigo jeē ni jítē yuhíchi. Yūcuán na te quíji jexeén te quénde-ni jnūhun ini anuá i. ²⁰ Te trigo jeē ni jítē nuū ñúhun yuū cúu nájñūhun ñayuu cájini sōho jnūhun, te yachī-ni cájetáhu i te cácusī ni i jíin. ²¹ Te tu cúcutú jnúhun ún ini anuá i, te jecu-ni quivī cájetáhu i. Te núu ni quejéé jnúndóho, chí jíto xeēn ñayuu i síquī jnúhun ún, te quejéé nácani yátá ni i. ²² Te jeē ni jítē nuū náne iñu cúu ñayuu cájini nahín jnúhun, te cándihvī ni i síquī jeē iyó ini ñayiví yáha, te cúní i cucúcá i, te stáhu un i cujnēñu i jíin. Te ndihī jeē yáha jési nuū jnúhun ya, te tu íje i jíin jnúhun ya. ²³ Te trigo jeē ni jítē nuū ñúhun váha cúu nájñūhun ñayuu cájini nahín jnúhun, te cájecūhun ni i, te cáhije i jíin jnúhun ya. Te sava i cúu nájñūhun nunī jeē jéhe ciento jeē ññ, te sava ga i jéhe unī xico, te sava ga i jéhe ocō uxī. Achí yá.

Jnūhun yátá síquī ite lasú

²⁴ Te ni cahān yā inga jnūhun yátá jíin de: Jeē ndácu Yaā andiví jniñu cúu nájñūhun ññ tēe jeē ní jete de trigo váha nuū ñúhun de. ²⁵ Te iyó ññ tēe jíto uhū de tēe chíi trigo. Te náa cáquixī tēe chíi trigo jíin táca jnáhan de, te ni jehēn ni jete ndiquin lású nuū trigo de, te cuahān. ²⁶ Te nuū ní cane trigo ún, te ni cane

yoco i, te suni súcuan ni jehnu ite lasú un. ²⁷ Yūcuán na te ni jengoo mozo ni cacahān i jíin patrón i: ¿A násūu trigo váha ní jéte ní núu ñúhun ní? ¿Te ndese cúu jeē ní canecoo ite lasú nuū? ²⁸ Te ni cahān de jíin i: ññ tēe jíto uhū ruhū ni sáha jeē yáha. Te ni cacahān mozo un jíin de: ¿Núu súcuan te á cúní ni jéē na quíngoo ná te jnūhun ná? áchí i. ²⁹ Te ni cahān de: Tuú, chi núu jnūhun ró lású un te sanaa te jnūhun ró ndé jíin trigo. ³⁰ Váha ga na cuéhnu máá ndé quivī tahndé. Te quivī un cáhán rī jíin tēe cahnde jeē xīhna gā ite lasú cahnde de, te chucú tútú de návāha cahmu yó. Yūcuán na te trigo chi cahnde de ndiví ini yacā rī, achí de. Achí yá.

Jnūhun yátá síquī ndiquin mostaza

(Mr. 4.30-32; Lc. 13.18-19)

³¹ Te suni ni cahān yā inga jnūhun yátá jéē steén yā ndese ndúcuehē ñayuu ndácu Yaā andiví jniñu nuū: Ndúcuehē i nájñūhun jéhnu ññ ndiquin mostaza jeē ní jequin ññ tēe nuū ñúhun de. ³² Te jendaá jeē ññ ndiquin lúli gá cúu vēsú táca gá ndiquin. Te núu ni jehnu, te cúu cáhnu ga vēsú táca gá yucū, chi ndúu nájñūhun ññ yujnu. Te quíjicoo saa, te cásáha tī tacā tī chíji ndaha ún. Achí yá.

Jnūhun yátá síquī levadura

(Lc. 13.20-21)

³³ Te inga jnūhun yátá ní cahān yā jíin de: Jeē ndácu Yaā andiví jniñu nuū ñayuu cúu nájñūhun levadura jeē ní quihin ññ ñahan. Te ni saca ña jíin únī kilo harina, nde ni ndaa ndihī ñujen ni sáha. Achí yá.

Jeē máni jnūhun yátá cáhán yā jíin i

(Mr. 4.33-34)

³⁴ Táca jnúhun yáha ní cahān Jesús jíin ñayuu cuehē ún. Te táca jéē ní steén yā, máni jnūhun yátá ní cahān yā jíin i. ³⁵ Súcuan ni sáha ya návāha squícu jnūhun ni cahān tēe ni nacani jnūhun Yaā Dios nde jenahán:

Cahān rī táca jnúhun yátá jíin ñayuu,
te cachi rī táca jnúhun yísāhí ndé quivī ní jecōo ñayiví.
Achí tutu, achí yá.

Jeē ní castūhun cájī yá jnūhun ite lasú

³⁶ Yūcuán na te ni nacuatáhu Jesús nuū ñayuu. Te ni ndiví ya ini vehe. Te tēe cáscuáha un ní jinūcoo de nuū yā, te ni cacahān de jíin yá:

Nacani cájī ní jnūhun yátá ite lasú nuū ná, achí de.

³⁷ Te ni cahān yā jíin de:

Jeē jéte trigo vāha un cúu máá rí, Yaā ní nduu tēe.

³⁸ Te ñuhun un cúu ñayiví. Te trigo vāha un cúu ñayuu cáyihī ndaha Yaā Dios jeē ndácu ya jniñu nuū i. Te ite lasú un cúu ñayuu cáyihī ndaha jexeén. ³⁹ Te tēe jíto uhū jeē ní jete lasú un cúu máá jexeén. Te quivī tahndé cúu quivī jinu ñayiví. Te tēe cahnde un cácuu ndajéhé Yaā Dios. ⁴⁰ Te nájñūhun tahndé ite lasú te cayū nuū

ñuhún, súcuan coo quiví jínu ñayiví. ⁴¹ Chi máá rí, Yaā ní nduu tēe, tají rí ndajéhé rí quingoo. Te nastútú yá tāca ñáyuu casquíví jnáhan nuū cuéchi, jíin ñáyuu casáha jniñu néé, quenehen ya i mēhñu ñáyuu ndácu ri jniñu nuū. ⁴² Te jnaa ya i cayū i nuū ñuhún. Te yūcuan ndáhyū i te nacayihí yuhu i jeē ndoho xeēn i. ⁴³ Yūcuán na te ñayuu squícu nuū yā chi ndindēé i nájñuhun niāndii, te coyūcú i nuū ndácu máá Tátá i jniñu. Tāca róhó jéé jíni sōho, na chúsóhó ró.

Jñuhun yátá síquī yejnū xūhún jeē yísāhí

⁴⁴ Te jeē ndácu Yaā andiví jniñu nuū ñáyuu, suni cúu nájñuhun ñn yejnū xūhún jeē yísāhi chíji ñn ñuhun. Te ni nanihñ ñn tēe, te ni nacasi tucu de síquī. Te jeē cúsiñ ni de jíin, te ni jehēn de ni xícó ndihí de jeē névāha de, te ni jeen de ñuhun ún.

Jñuhun yátá síquī perla jeē ndeé yahu

⁴⁵ Te jeē ndácu Yaā andiví jniñu nuū ñáyuu, suni cúu nájñuhun ñn tēe jéen xíco, te ndúcú de perla váha. ⁴⁶ Te ni jini de ñn perla jeē yáhu ndasí, te ni jehēn de ni xícó ndihí de jeē névāha de, te ni jeen de perla un.

Jñuhun yátá síquī ñunu jñí chācá

⁴⁷ Te jeē ndácu Yaā andiví jniñu nuū ñáyuu, suni cúu nájñuhun ñn ñunu jeē cásingava de ini mar, te quívicoo ndinuū chācá. ⁴⁸ Te núu ni chítú ñunu ún, te cá-natava de yundúte. Te cácucoo de cánacāji de chācá. Te chācá váha cájnaa de ini jíca, te chācá tú váha cáscáne de. ⁴⁹ Te suni súcuan coo quiví jínu ñayiví. Chi quijicoo ndajéhé yā, te sásñin ya ñayuu casáha jniñu néé mēhñu ñáyuu casáha jniñu váha. ⁵⁰ Te ñayuu cunéé chi jnaa ya i cayū i nuū ñuhún. Te yūcuan ndáhyū i te nacayihí yuhu i jeē ndoho xeēn i. Achí yá.

Jñuhun yátá síquī ndajniñu ndeé yahu

⁵¹ Te ni cajñuhun yá de jíin náhan de:
¿A ní cajecūhun ni rō tāca jñuhun yáha, chí tuú? achí yá.

Te ni cacahān de jíin yá:
Ní cajecūhun ni ná, achí de.

⁵² Te ni cahān yā jíin de:
Iyó váha núu súcuan. Te ñn tēe stéén tutu ley Yaā Dios, núu je ni cutūhva de ndese ndácu Yaā andiví jniñu, te cuu stéén de tāca jñuhun síquī ún. Chi cúu de nájñuhun ñn tēe chíí vehe. Te ini yejnū de táva de ndajniñu ndeé yahu, sava jeē jeé jíin sava jeē je ni cunahán iyó. Achí yá.

Jeē cuánuhun yā ñuu Nazaret

(Mr. 6.1-6; Lc. 4.16-30)

⁵³ Te ná ni ndihí ni cahān Jesús tāca jñuhun yátá yáha, te ni quenda ya yūcuan cuáhān yā. ⁵⁴ Te ni najinū yā ñuu yā Nazaret. Te ni steén yā jñuhun ini vehe ñn sin-

agoga yūcuán. Te ni canaa ni ñayuu cájini nahín i, te ni cacahān i:

¿Ndé nuū ní cutūhva tēe yáha tāca jñuhun ndíchí? ¿Te ndese cúu sáha de tāca jniñu jénu yāhá? ⁵⁵ Chi sēhe carpintero cúu tēe yáha, te náná de cúu María, te ñani de cácuu Jacobo, José, Simón, jíin Judas. ⁵⁶ Te suni cáyūcu cuáha de jíin yó yāhá. ¿Te ndese jíin de tāca jñuhun yáha núu súcuan? Achí ñayuu.

⁵⁷ Te súcuan ni cacujéé ni i nuū Jesús. Te ni cahān yā jíin i:

Tāca tēe nácani jñuhun Yaā Dios, iyó yíñuhún ñayuu jíin de, te máni ñayuu ñuu má de jíin ñáyuu vehe má de cúu jeē tu iyó yíñuhún jíin de. Achí yá.

⁵⁸ Te tu ní sáha ya cuehē jniñu jénu yūcuán, chi tu cácuandije i ya.

Jeē ni jíhí Juan tēe scuándute

(Mr. 6.14-29; Lc. 9.7-9)

14 Te tiempo yúcuán te Herodes, tēe ndácu jniñu región Galilea, ni jini jñuhun de jñuhun Jesús.

² Te ni cahān de jíin ñáyuu cáhñin jíin de:

Tēe yúcuán cúu Juan tēe ni scuándute, te ni natecu de. Jeē yúcuán iyó poder de sáha de jniñu jénu. Achí de.

³ Chi Herodes, je ni ndacu de jniñu jeē na quíví Juan vecāa, jíin jéé na cónuhñi de jíin cadena. Súcuan ni sáha de jeē síquí Herodías, ñasihí ñani de Felipe. ⁴ Chi Juan ni cahān de nuū Herodes:

Tu iyó ley condeca ró ña, achí de.

⁵ Te jeē yúcuán ní cuni Herodes cahni de Juan. Te yúhú de jeē quítí ni ñayuu, chi ndihí i jéni ndije ni i jeē ñn tēe nácani jñuhun Yaā Dios cúu Juan. ⁶ Te ñn quíví ní sáha Herodes ñn vico quíví ní cacu de. Te sēhe síhí Herodías ni quíví i ni jita jéhé i nuū ñáyuu ní cana de ún. Te ni cusíñ ni Herodes ni sáha i. ⁷ Te ni jejñuhun téyí de jeē cuáha de núu na vé cacān i nuū de. ⁸ Te ni jehēn i ni cajñuhún i náná i na vé cacān i. Te ni ndiví i nuū Herodes, te ni cahān i:

Cuāha ní xíní Juan tēe scuándute, cone nuū ñn cohō, achí i.

⁹ Yūcuán na te rey Herodes ni cucuhyá ni de. Te síquí jeē ni jéjñuhun téyí de, jíin jéé ní cajini sōho tēe cáyeji staā jíin de, jeē yúcuán ní ndacu de jniñu jeē na cuáha nuū i. ¹⁰ Te ni tají de soldado jeē na quícahnde xíní Juan ini vecāa. ¹¹ Te ni quee soldado un jíin xíní Juan, íne nuū ñn cohō, te ni jēhe nuū súchi síhí un. Te máá i ni jendeca i nuū naná i.

¹² Yūcuán na te ni jengoo tēe cáscuáha jíin Juan, te ni candonehen de yiquí cúñu Juan, te ni cachindūji de. Yūcuán na te ni jengoo de ni cacastūhún de nuū Jesús.

Jeē ni scáji yā uhūn mil tēe

(Mr. 6.30-44; Lc. 9.10-17; Jn. 6.1-14)

¹³ Te ná ni jini Jesús jñuhun, te ni cujiyo ya yūcuan cuáhān yā jíin barco, jeē cóne sñin ya ñn lugar nuū tú ñayuu. Te ni cajini ñayuu jeē cuahán yā. Te tācá ñuu ni

quendacoo i cájica jéhé i, cuajnahán i ya. ¹⁴ Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, te ni nasávāha ya tāca ñáyuu cácuahū jeē véjicoo i jíin. ¹⁵ Te nuū ní ini, te tēe cás-cuáha jíin yá, ni quecoo de nuū yā, te ni cacahān de:

Je ni ini, te yāhá chi tú na ñayuu yúcu. Núu súcuan te tají ní ñayuu na quíngoo i tācá ñuu, te cuaan i jeē cáji i.

¹⁶ Te ni cahān Jesús jíin de:

Tu jíni ñúhún quíngoo i, chi cuáha máá ró jeē cáji i, áchí yá.

¹⁷ Te ni cacahān de jíin yá:

Tú na vé cánevāha ná yáha, chi uhūn-ni staā jíin úū-ni chācá, áchí de.

¹⁸ Te ni cahān yā jíin de:

Cuāha na quíji, áchí yá.

¹⁹ Te ni cahān yā jíin ñáyuu un jéé na cúcōo i nuū íte.

Te ni quihin ya ndíhúhún staā jíin úū chācá un. Te ni ndacoto ya ichi ándiví, te ni nacuatáhú yá. Te ni tahú cuéchí yá staā ún, te ni jēhe ya nuū tēe cáscuáha jíin yá. Te máá de ni casaja de nuū ñáyuu cuehē ún. ²⁰ Te ndivii i ni cayeji, te ni candutú chíji i. Te ni canastútú de pedazo jeē ní quendōo, te ni chitú úxí uū jíca. ²¹ Te tēe ni cayeji un cúu nájnūhun uhūn mil, te sñn ga cúu ñahan jíin súchi lúlí.

Jeē ní jica jéhé yá nuū mar

(Mr. 6.45-52; Jn. 6.16-21)

²² Yūcuán na te ni cahān-ni Jesús jíin tēe cáscuáha jíin yá jeē na quívicoo de barco, te cosnūú de quíngoo de nde inga lado mar, níni jéé nátají yá ñayuu un quínungoo i. ²³ Te nuū ní cuu ni nacuatáhú yá nuū i, te máñúhún-ni ya ni caa ya yucu, cuacacān tahú yā. Te ni cuaa, te íne máñúhún yá yūcuán. ²⁴ Te barco un, je ni cuu sava nuū mar cuahān. Te ndute mar un nátundahá níhin barco, chi vēji tachí ichi núú de. ²⁵ Te jeē yínee gā ni quee Jesús nuū de, jíca jéhé yá nuū mar. ²⁶ Te tēe cáscuáha ún, ni cajito de ya jeē jíca ya nuū mar. Te ni candondava de, te ni cacana cóhó de jeē cáyūhú de.

Jíhná cúu, áchí de.

²⁷ Te ni cahān-ni Jesús jíin de:

Ndeyí coo ni rō, te ma yūhu ró, chi máá rí cúu, áchí yá.

²⁸ Yūcuán na te ni cahān Pedro jíin yá:

Núu máá ní cúu, te cahān ni jíin ná jéé na cáca jéhé ná nuū mar te jeē na núú ní, áchí de.

²⁹ Te ni cahān yā:

Nehen núu súcuan, áchí yá.

Te ni quenda Pedro ini barco, te ni jica de nuū ndúte cuahān de nuū Jesús. ³⁰ Te nuū ní jini de jeē níhin yíhi tachí, te ni yūhú de. Te ni quejéé de quéé de chíji ndute. Te ni cana cóhó de:

Jnama ní sáña, áchí de.

³¹ Te Jesús ni jññ-ni ya ndaha de. Te ni cahān yā jíin de:

Tēe tu cándíje níhin cúu ró. ¿Naun ni nayūhu ró? Achí yá.

³² Te ni quívi ya ini barco un jíin de, te ni jecuíññ-ni tachí. ³³ Yūcuán na te tēe cáhiin ini barco un, ni caje-cuíññ yití de nuū yā. Te ni cacahān de:

Jendaá ndije jeē Sēhe Yaā Dios cúu ní, áchí de.

Jeē ní nasávāha ya ñayuu cácuahū región Genesaret

(Mr. 6.53-56)

³⁴ Te ni quenda jíyo ya jíin de nuū mar un, ní jinū yā región Genesaret. ³⁵ Te ñayuu yūcuan ní canacuni i ya. Te ni cascáca i jnūhun tācá ndañúú yūcuan jéé ni jíinū yā. Te ñayuu ni caquindeca i ñayuu cácuahū nuū yā.

³⁶ Te ni cacahān ndahú i jíin yá jeē na quéhé i vēsú yusáhma ya. Te tāca ñáyuu jeē ní caquehé sahma ya, ni canduvāha i.

Siquí ndese cújnehén ñáyuu

(Mr. 7.1-23)

15 Yūcuán na te jecu tēe grupo fariseo jíin tēe cástéén tutu ley Yaā Dios, ni quendacoo de ñuu Jerusalén, te ni quecoo de nuū yā. Te ni cacahān de jíin yá:

² Tēe cáscuáha jíin ró, ¿naun cástívi de costumbre jeē ní cajequin ñayuu jenahán? Chi tu ní cáscuícu de costumbre jeē nándahá de nuū yā te caji de staā. Achí de.

³ Te Jesús ni cajnūhun yá de:

Te máá ró jijnáhan ró, ¿suni naun cástívi ró jniñu ní ndacu Yaā Dios nuū rō? Chi sa costumbre maá ró cúu jeē casquícu ró. ⁴ Chi ni cahān Yaā Dios: Coo yíñúhún ró jíin tátá rō jíin náná rō. Te núu ndé ñn cahān siquí tatá chí síquí naná, na cúu nahín, áchí Yaā Dios. ⁵ Te máá ró chi cacahān rō jeē cuu cahān ñn tēe jíin tátá de jíin náná de: Ma cúu chindéé ñáhán ná níhin cuáha na jéé cáji ni jéé cúhun ní, chi ndíhi jeē névāha ná, je ni socō na núú Yaā Dios. ⁶ Te tēe cahān súcuan, tuá cánuú chindéé ñáhán de tátá de náná de, áchí ró jijnáhan ró. Te súcuan cástívi ró jniñu ní ndacu Yaā Dios, jeē siquí costumbre ni cajequin máá ró. ⁷ Tēe stáhú-ni cácuu ró. Ndaā ni nacani Isaías jnūhun siquí rō nde jenahán, yósó núú tútu íi jeē ni cáhān Yaā Dios:

⁸ Ñayuu yáha chi máá yuhu-ni i cájetáhú i ruhū, te nasūu ndé jíin ini jíin ánuá i.

⁹ Te cáchiñúhún sáa-ni i ruhū, chi jnūhun cástéén i cúu jniñu ní candacu tēe, te nasūu jéé ní ndacu máá rí cúu.

Achí Yaā Dios. Achí yá.

¹⁰ Te ni cana ya ñayuu cuehē ún, te ni cahān yā jíin i:

Cuni sōho vāha jijnáhan ró, te chuhun ni rō: ¹¹ Nasūu jéé quívi ini yuhu ñayuu cújnehén i sáha. Chi jnūhun jeē quénda yuhu i, yūcuan cúu jeē cújnehén i sáha, áchí yá.

¹² Yūcuán na te tēe cáscuáha jíin yá, ni quecoo de nuū yā, te ni cacahān de:

¿A jíin ni jéé ní caquíññ ni tēe fariseo jeē ní cajini sōho de jnūhun ni cahān ní? áchí de.

¹³ Te ni cahān maá yá:

Cácuu de nájnūhun yujnu jeē tu ní náchuhun Tátá rī, Yaā ndeé andiví, te ñn quiñvī te jnuhun ya quihīn. ¹⁴ Na quíngoo máá de. Chi cácuu de nájnūhun tēe cuáá cástéén ichi nuū inga tēe cuáá. Chi núu ñn tēe cuáá stéén de ichi nuū inga tēe cuáá, te ndindúú de ñinga de xehvā. Achí yá.

¹⁵ Te ni cahān Pedro jíin yá:

Castūhun cájí ní jnúhun yátá yáha nuū na jíinahan ná, áchí de.

¹⁶ Te ni cahān Jesús:

¿Te á suni máá ró ná tu jecūhun ni rō chí naún? ¹⁷ ¿A tu cájecūhun ni rō jeē tāca jéé yéji ñayuu, chi quiñvī chíji i, te quénda-ni cuahān? ¹⁸ Te jnūhun jeē quénda yuhu ñayuu, chi nde ini anuá i vēji, te yūcuan cúu jeē cu-jnehén i sáha. ¹⁹ Chi nde ini anuá ñayuu quénda jeē jéni néé ni, jeē jéñni ndīyī, jeē casíquí ndéé jnahan, jeē jíca jnéni, jeē sacuíhná, jeē cahán jnūhun stáhú, jeē cahán yāa síquī jnahan. ²⁰ Tāca jéé yáha cúu jeē cu-jnehén ñayuu sáha. Te núu tu squícu i costumbre jeē nándahá i te caji i staā, tu cúnéhén i sáha. Achí yá.

Ñahan inga nación jeē ní candíje ñihin

(Mr. 7.24-30)

²¹ Te ni quenda Jesús yūcuan cuahān yā región Tiro jíin Sidón. ²² Te ñn ñahan ñuu Canaán, néne ña región Tiro jíin Sidón, te ni quee ña nuū Jesús. Te ni cana jee ña:

Tátā, Sēhe yucūn David, cundáhú ni ni sáña víi. Chi sēhe síhí ná, ñúhun tachī ini i, te yōhyo xeēn ndóho i, áchí ña jíin yá.

²³ Te tu ní cáhán cuiti yā jeē ni cáhān ña. Yūcuán na te ni quecoo tēe cáscuáha jíin yá, te ni cacahān de:

Cahān ni jíin ña na quihín ña, chi cána jee ña vēji ña yatā yō, achí de.

²⁴ Te ni cahān yā jíin ña:

Nuū maá-ni ñayuu nación Israel ni tají Yaā Dios sáña vēji ná, chi cácuu i nájnūhun lanchi, quiñvī ní sana.

²⁵ Te ñahan ún chi ni quee ña, te ni jecuiñvī yití ña nuū yā, te ni cahān ña:

Tátā, chindéé ñahán ní sáña víi, achí ña.

²⁶ Te ni cahān yatá yá jíin ña:

Tu íyó váha jeē quénde yō staā sēhe, te cuāha yó núu ina, achí yá.

²⁷ Te ni cahān ña:

Jendaá cahán ni Tátā, te chindéé ñahán ní sáña vēsú cúu ná nájnūhun ina. Chi suni máá tē cánihīn nahín tē pedazo staā cuechí jéé cóyo chíji mesa jitoho tē cáyeji tē, achí ña jíin yá.

²⁸ Yūcuán na te ni cahān Jesús:

Yōhyo váha jeē cándíje ñihin ní súcuan, nánā. Te na sáha ná jéé cuní ni, áchí yá.

Te máá hora un ní nduvāha-ni sēhe síhí ña.

Jeē ní nasávāha ya cuehē ñayuu cácuu

²⁹ Te ni quenda Jesús cuahān yā yūcuán, te ni yāha ya yumar Galilea. Te ni caa ya ñn yucu, te yūcuan ní cucōo ya. ³⁰ Te cuehē ñayuu ni quecoo i nuū yā, te cándeca i tāca jéé cájica chácuá, jeē cuaá, jeē ñihín, jeē cacúh-ndú, jíin cuéhē gā ñayuu cácuu. Te ni cajequin i nuū jehé Jesús. Te ni nasávāha ya i jíinahan i. ³¹ Te ni canaa ni ñayuu un cájito i jeē nácahān ñayuu ñihín, nduvāha ñayuu cuhndú, nácaca váha ñayuu chacuá, nánune tinūu ñayuu cuaá. Te ni cacahān i jeē yóhyo váha Yaā cúu Yaā Dios ñuu i Israel.

Jeē ni scáji yā cuūn mil tēe

(Mr. 8.1-10)

³² Yūcuán na te ni cana Jesús tēe cáscuáha jíin yá, te ni cahān yā jíin de:

Cúndáhú ni rī ñayuu cuehē yāhá, chi je ni cuu unī quiñvī cáyūcú i jíin rí, te tuá na vé caji i. Te tu cuní rī natají rí i nuhun ndite i, chi núu súcuan te sava ichi te cuíta ñi i. Achí yá.

³³ Te ni cacahān tēe cáscuáha jíin yá:

¿Te ndé nuū nihín yō staā caji ñayuu cuehē yāhá? Chi yāhá tú na ñayuu yūcu, achí de.

³⁴ Te ni cajnúhun yá de:

¿Nasaa staā cánevāha ró?

Te ni cacahān de:

Uxā-ni, jíin jecu chācá lúli, áchí de.

³⁵ Yūcuán na te ni cahān yā jíin ñayuu cuehē un jéé na cúcōo i. ³⁶ Te ni quihin ya ndihúxá staā jíin cháca ún, te ni nacuatáhú yá nuū Yaā Dios. Te ni tahú cuéchí yá, te ni jēhe ya nuū tēe cáscuáha jíin yá, te máá de ni casaja nuū ñayuu. ³⁷ Te ndihí i ni cayejí, te ni candutú chíji i. Yūcuán na te ni canastútú de pedazo jeē ní quendōo, te ni chitú úxā jíca. ³⁸ Te tēe ni cayejí ún, nde cuūn mil de cúu, te sñn ga cúu ñahan jíin súchi lúli.

³⁹ Yūcuán na te ni nacuatáhú yá nuū ñayuu ún, te cuanungoo i. Te ni ndiví ya ini barco, te cuahān yā región Magdala.

Jeē cájicān de ñn jniñu jéñnu nuū yā

(Mr. 8.11-13; Lc. 12.54-56)

16 Te ni quecoo tēe grupo fariseo jíin tēe grupo saduceo nuū yā. Chi cácuu de coto ndee de ya, te ni cajicān de jeē na sáha ya ñn jniñu jéñnu jeē coo ñn seña ichi andiví. ² Te máá yá ni cahān yā jíin de:

Núu ni ini, te cácahān rō: Nandii, chi ni nasácuéhé i andiví, áchí ró. ³ Te jenéhen chi cácahān rō: Vijna te cu-un saū, chi ni nasácuéhé i andiví, áchí ró. Tēe stáhú-ni cácuu ró. Chi cájecūhun ni rō ndese stéén seña andiví, te tu cájecūhun ni rō ndese stéén táca jniñu jéñnu sáha ri tiempo yáha. ⁴ Ñayuu yáha jeē casáha jniñu néé, tu cájetáhú cuiti i Yaā Dios. Te cájicān i jeē sáha ri ñn jniñu jéñnu jeē coo ñn seña andiví. Te tuá na inga jniñu jéñnu stéén rī nuū i, chi máá-ni jniñu jéñnu

nájñuhun ni cuu jíin Jonás, tēe ni nacani jñuhun Yaā Dios nde jenahán. Achí yá.

Te ni stóo ya de jíinánhan de, te cuahān yā.

Jñuhun levadura tēe fariseo

(Mr.8.14-21)

⁵ Te tēe cáscuáha jíin yá ni canaa ni de condiso de staā náa cuango de jíin barco inga lado mar. ⁶ Te ni cahān Jesús jíin de:

Coto má candíje ró levadura tēe grupo fariseo jíin tēe grupo saduceo, achí yá.

⁷ Te tēe cáscuáha un ní cacahān má de:

Va siquī jeē tú na staā ndiso yó, jeē yúcuan cáhān yā súcuan, áchí de.

⁸ Te ni jini Jesús, te ni cahān yā:

¿Najehē cácahān rō jeē ni cáhān rī súcuan siquī jeē tú na staā cándiso ró? Tēe tu cándíje nīhin cácuu ró.

⁹ ¿A ná tu jecūhun ni rō jeē tu ní cáhān rī súcuan siquī jeē tu ndiso ró stāā? ¿A tu cánucūhun ni rō jeē ní tahú cuéchí rí uhūn staā ni cayejí uhūn mil tēe, te nasaa jíca ni canastútú ró jeē ni quéndōo? ¹⁰ ¿Te á tu cánucūhun ni rō jeē ní tahú cuéchí rí uxā staā ni cayejí cuūn mil tēe, te nasaa jíca ni canastútú tucu ró? ¹¹ ¿Te najehē tu cájecūhun ni rō jeē násūu síquī staā ni cahān rī jíin ró jeē ni cáhān rī jeē coto má candíje ró levadura tēe fariseo jíin tēe saduceo? Achí yá jíin de.

¹² Yūcuán na te ni cajecūhun ni de jeē tu ní cáhān yā jeē coto de jeē ma cáji de pan jeē yíhi levadura, chi sa suhva ni cahān yatá yá jeē ma cándíje de jñuhun stáhú cástéén tēe fariseo jíin tēe saduceo.

Jeē ni cáhān Pedro jeē Jesús cúu Cristo

(Mr.8.27-30; Lc.9.18-21)

¹³ Te nuū ni jíin Jesús región Cesarea Filipo jíin tēe cáscuáha jíin yá, te ni cajñuhun yá de:

Ruhū, Yaā ní nduu tēe, ¿ndé ñin cúu ri cácahān ñayuu?

¹⁴ Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jñuhun Yaā Dios nde jenahán. Te sava ga i cácahān jeē Jeremías chí inga tēe ni nacani jñuhun Yaā Dios cúu ní. Achí de.

¹⁵ Te ni cahān yā jíin de:

Te máá ró, ¿ndé ñin cúu ri cácahān rō? achí yá.

¹⁶ Te ni cahān Simón Pedro:

Máá ní cúu Cristo, Yaā ní tají Yaā Dios. Te cúu ní Sēhe Yaā Dios, Yaā técu ní cáni, áchí de.

¹⁷ Te ni cahān Jesús:

Yōhoyo ndetū rō, Simón sēhe Jonás, chi nasūū ñin ñayuu ni steén jñuhun yáha nuū rō, chi sa suhva máá Tátá rī, Yaā ndeé andiví, ní steén yā nuū rō. ¹⁸ Te ruhū suni cáhān rī jíin ró jeē máá ró cúu Pedro, jeē cuní cahān: yuū. Te jñuhun ndaā jeē ni cáhān rō jeē máá rí cúu Cristo, suu cúu nájnūhun ñin yuū cáhnu. Te siquī yuū cáhnu yáha sáha ri jeē quítuu vehe, te vehe un

cúu ñayuu cácahān ruhū. Te tu ndé vé cundeyí cuiti siquī i, ni jñuhun xeēn jeē cájihī i, tuá na vé cúu sáha jíin ánuá i. ¹⁹ Te máá ró condiso jñiñu ró sáha ró jeē quívicoo ñayuu ndaha Yaā andiví jeē ndacu ya jñiñu nuū i. Te táca jeē cási rō jeē ma sáha ñayuu ini ñayiví yáha, suni casí jeē cáyucú nde andiví. Te táca jeē cuáha ró jñuhun sáha i ini ñayiví yáha, suni jeē cáyucú nde andiví cuáha jñuhun. Achí yá.

²⁰ Yūcuán na te ni ndacu ya jñiñu nuū tēe cáscuáha jíin yá, jeē ma cáchi de nuū ní ñin ñayuu jeē cúu ya Cristo.

Jeē ní castūhún Jesús jeē cúu yā

(Mr.8.31-9.1; Lc.9.22-27)

²¹ Te nde saá ní quejéé Jesús cástūhun cáji yá nuū tēe cáscuáha jíin yá jeē jíini ñúhún quihīn yā ñuu Jerusalén.

Te táca tēe jéhnū jíin sūtū cácujeñu jíin tēe cástéén tutu ley, stóho ndasí de ya. Te cahni de ya, te nuū uní quiví te natecu yā, achí yá. ²² Yūcuán na te Pedro, ni cana máñúhún de ya, te ni quejéé de cáhān de nuū yā: ¿Naun cáhān ni súcuan? Chi tu cuní Yaā Dios jeē cuu súcuan. Tu jíini ñúhún cuiti ndoho ní jñúndóho yáha, áchí de.

²³ Te ni ndió cóto ya nuū Pedro, te ni cahān yā jíin de:

Cujiyo quihīn rō, chi cáhān rō ná cáhān Satanás. Chi tēe ndúcú stívi rúhū cúu ró. Te tu jéni ni rō nájnūhun jéni ni Yaā Dios, chi sa suhva jéni ni rō nájnūhun cájeni ni ñayuu. Achí yá.

²⁴ Yūcuán na te ni cahān yā jíin tēe cáscuáha jíin yá:

Na-ni ñayuu núu cuní i condiquīn i ruhū, na cási i jeē cuní má i, te na cóndiquīn i ruhū te cuāha i jñuhun ndoho i jñúndóho jeē siquí rī, vēsú na cúu i. ²⁵ Chi núu ndé ñayuu cuní i cácu i nuū jñúndóho quiji nuū i jeē siquí ruhū, núu súcuan te jñahnū ndetū i ní cáni. Te núu ndé ñayuu, vēsú na cúu i jeē siquí ruhū, te cotecu i ní cáni. ²⁶ ¿Chi ndé cuajñiñu vēsú na cundeyí ñayuu nihīn i ní ñayiví, te núu quiví i nuū jñahnú ndetū i? Chi tú na jíin cuiti chunaa ñayuu jeē cácu ánuá i. ²⁷ Chi ruhū, Yaā ní nduu tēe, ndiji ri jíin táca ndajéhé rī, te yōhoyo luu cujéñu ri nájnūhun cújéñu Tátá rī. Yūcuán na te cuāha ri tahū nuū ñin ñin ñayuu núu ndese jñiñu ni casáha i. ²⁸ Te jendaá cahān rī jíin ró jeē sava tēe cáhīn yáhá, ma cúu de chi nde cuni de jeē máá rí, Yaā ní nduu tēe, ndácu ri jñiñu jíin poder rī.

Jeē tucu ni nduu ya

(Mr.9.2-13; Lc.9.28-36)

17 Yūcuán na te nuū iñú quiví te Jesús ni jeca ya Pedro jíin Jacobo jíin Juan ñani Jacobo, cuahān sñin ya jíin de ñin yucu súcún. ² Te yūcuán, tucu ni nduu ya nuū de. Chi ni ndindēe núu yā nájnūhun niāndii. Te sahna ya ni nducujín quiyí ndasí, nájnūhun nduva luz. ³ Te ni cajito-ni de jeē Moisés jíin Elías, tēe ni cahīyo jenahán, cándajnūhún de jíin yá. ⁴ Te ni cahān Pedro jíin yá:

Nacā jeē váha jeē cáhīin ná yáha. Te núu cúni ni te na sáha ná únī vehe ramada, ñn cuu máá ní, ñnga cuu Moisés, te ñnga cuu Elías, achí de.

⁵ Te níni cáhán gā de, te ni quiji vicō nūhun jeē yaa ndasí, ni jesi-ni nuū de. Te nuū vicó un ní cahān ñn jnūhun:

Yáha cúu Sēhe ri jeē maní ndasí rí jíin, te cúsiñ ni rí jíin. Na cúni nahín ró jnūhun cáhán yā. Achí.

⁶ Te jeē súcuan ni cajini sōho tēe cáscuáha ún, te ni cajecava ndeyi de, chí yōhyo ni cayūhú de. ⁷ Yūcuán na te ni quee Jesús, te ni soó yá ndaha ya siquī de. Te ni cahān yā:

Ndocuiñī, te ma yūhu ró jijnáhan ró, áchí yá.

⁸ Te ni candacoto de, te tuá tēe un ní cájito de, chí máá ñn na Jesús.

⁹ Te ni cananuu de jíin yá yucu ún. Te ni ndacu ya jniñu nuū de:

Ma cáchi rō nuū ní ñn jeē súcuan ni cajito ró, chí nde na nátecu maá rí, Yā ní nduu tēe, áchí yá.

¹⁰ Yūcuán na te tēe cáscuáha jíin yá, ni cacajñuhún de ya:

Núu súcuan te tēe cástéén tutu ley Yā Dios, ¿najehē cáhān de jeē cánuú ndiji Elías xīhna gā, te sáá te qui-ji Yā cúu Cristo? achí de.

¹¹ Te ni cahān Jesús jíin de:

Jendaá cúu jeē xīhna gā quiji ñn tēe cuu nájnūhun Elías, te sátūhva de ndīhi, áchí tutu. ¹² Te cáhán rí jíin ró jeē jé ni quiji tēe ni cuu nájnūhun Elías, te tu ní jíni ñayuu jeē suu de cúu. Te ni casáha ndevāha ñayuu jíin de ndīhi jeē ní cacuu ni maá i. Te suni súcuan stóho i ruhū, Yā ní nduu tēe. Achí yá.

¹³ Yūcuán na te tēe cáscuáha un, ní cajecūhun ni de jeē cahān yā jeē Juan tēe scuándute, ni cuu de nájnūhun Elías.

Jeē ní nasávāha ya ñn sūchi jíhí yīhí

(Mr. 9.14-29; Lc. 9.37-43)

¹⁴ Te ni najinū yā jíin de nuū ñáyuu cuehē ún. Te ni quee ñn tēe, ni jecuiñī yití de nuū yā, te ni cahān de:

¹⁵ Cundáhú ni ní séhe yí ná, chí yōhyo xeē ndóho i cuehyī jíhí yīhí. Te je ni cuu cuehē jínu cótúú i nuū ñuhún jíin núu ndúte. ¹⁶ Te ni quindeca ná i nuū tēe cáscuáha jíin ní, te tu ní cúu sávāha de i, áchí de.

¹⁷ Te ni cahān Jesús:

Ñayuu yōhyo ñhni ni cácuu ró chí tu cáchandije ró jéē cuu nduvāha i. ¿Nasaa ga quivī condee rí jíin ró? ¿Te nasaa ga quivī cuandeyí ni rí jíin ró? Cuáquihin sūchí un na quiji i, áchí yá.

¹⁸ Te ni cahān yā nuū tachí, te ni quenda-ni ini sūchí un. Te ni nduvāha-ni i máá hora un.

¹⁹ Yūcuán na te tēe cáscuáha un, ní cacajñuhún sñn de ya:

¿Najehē tu ní cúu quenehen ná tachí un jijnáhan ná? achí de.

²⁰ Te ni cahān yā:

Siquī jeē tu cáchandije ñhin ró jéē cuu sáha ró. Chí jendaá cahán rí jíin ró, jeē núu candije ró vésú ñn tíh-lí-ni, cūhva nájnūhun ñn ndiquin mostaza, te cuu sáha ró táca-ni jniñu yí. Chí cuu cahān rō jeē na cújiyo yucu yáha quihīn ñnga lado, te cujiyo-ni. Te táca-ni jniñu chí cuu sáha ró, te núu candije ñhin ró jéē cúu. ²¹ Te ñn tachí súcuan chí ma quénda cuiti quihīn, te núu tu cacān tahú rō te coo ndite ni rō. Achí yá.

Jeē ni cáhān tucu ya jeē cúu yā

(Mr. 9.30-32; Lc. 9.43-45)

²² Te jíca cuu Jesús jíin de jijnáhan de región Galilea, te ni cahān yā jíin de:

Máá rí, Yā ní nduu tēe, nastúu i ruhū nuū táca tēe xeēn. ²³ Te cahni de ruhū, te nuū uní quivī te natecu rí, achí yá.

Te ni canducuíhyá ndasí ni de jeē ni cahān yā jnūhun yáha.

Siquī xúhun cuajniñu ini templo

²⁴ Te ni jinū yā ñuu Capernaum jíin tēe cáscuáha jíin yá. Te tēe cástútú xúhun templo ni quecoo de, te ni cacajñuhún de Pedro:

Te maestro maá ró jijnáhan ró, ¿á tú cuāha de xūhún cuajniñu ini templo, chí naún? áchí de.

²⁵ Te ni cahān Pedro:

Cuu, áchí de.

Te ná ni quivī de ini vehe, te xīhna gā Jesús ni cahān yā jíin de:

¿Ndese jéni ni rō, Simón? Táca tēe cácuu rey ini ñayiví yáha, ¿ndé núu cájicān de xūhun renta jíin xúhun cuajniñu ñuu? ¿A núu séhe de chí núu ñáyuu sñn vehe? áchí yá.

²⁶ Te ni cahān Pedro:

Nuū ñáyuu sñn vehe, áchí de.

Te ni cahān Jesús:

Núu súcuan te tú na ñnga cujéhu nuū séhe rey jeē cacán xūhún un núu i.

Súcuan ni cahān yā jeē cujéhu ya cúu ya Sēhe Yā Dios. Te ni cahān yā:

²⁷ Te na chúnaa yō, návāha tu squítí ni yō de. Núu súcuan te cuáhán ndé yumar, te scāne ró gancho jeē jñí chācá, te tava rō chācá jéē jñí xīhna gā. Te ndica rō yuhu ti, te yūcuan níhīn rō ñn xūhun jéē cánda chunaa rō jeē cájicān de. Te quindeca ró núu de jeē cúu ruhū jíin rōhó. Achí yá.

Ndé ñáyuu cúu jeē cujéhu ga

(Mr. 9.33-37; Lc. 9.46-48)

18 Te suni quivī un ní quecoo tēe cáscuáha un núu yā, te ni cacajñuhún de ya:

¿Nde ñn cujéhu ga nuū ñáyuu jeē ndácu Yā andiví jniñu nuū? achí de.

² Te ni cana ya ñn sūchi lúli, te ni jeni ya i mēhñú de.

³ Te ni cahān yā:

Jendaá cahán rī jíin ró, núu tú nandió cóo ni rō te cani ni rō nájnūhun ñn sūchi lúlí, ma quívi cuiṭi rō ndaha Yaā andiví jeē ndacu ya jniñu nuū rō. ⁴ Núu súcuan te ñayuu jeē jéni ni i jeē tu cújéhnú i, nájnūhun jéni ni sūchi lúlí yáha, suu i cújéhnú ga nuū ñáyuu jeē ndácu Yaā andiví jniñu nuū. ⁵ Te na-ni ñayuu núu jeē siquī ruhū jetáhú i ñn sūchi lúlí nájnūhun sūchi yáha, te ruhū jetáhú i. Achí yá.

Xeēn coo siquī ñáyuu quívi nuū cuéchi

(Mr. 9.42-48; Lc. 17.1-2)

⁶ Te núu ñn sūchi lúlí yáha cándije i ruhū, te núu quívi i cuéchi sáha na-ni ñayuu, te vāha ga núu ni conuhnī ñn yōso cáhnu sucūn ñayuu ún, te quēe i chīji ndute mar nuú. ⁷ Nacā xeēn cúu jíin ñáyuu ñayiví, chi máni íyó jeē nducú squívi ñayuu nuū cuéchi. Te máni súcuan coo ini ñayiví. Te nacā xeēn ndoho ñayuu jeē squívi jnáhan nuū cuéchi.

⁸ Núu súcuan te núu ndaha ró chí jéhē rō sáha jeē quívi ró cuéchi, vāha ga cahnde rō te scāne ró na quihín, návāha tuá sáha ró cuéchi. Chi vāha ga jeē coo chácuá ró chí coo tícúhndu ró te quívi ró núu cotecu rō ní cāni, vēsú jeē cóndee ndíndúú ndaha ró jéhē rō te quívi ró núu ñuhún jeē cayú ní cāni. ⁹ Te núu tinūu ró sáha jeē quívi ró cuéchi, vāha ga tava rō te scāne ró na quihín, návāha tuá sáha ró cuéchi. Chi vāha ga jeē coo ñn-ni tinūu ró te quívi ró núu cotecu rō ní cāni, vēsú jeē cóndee ndíndúú tinūu ró te quívi ró núu ñuhún in-fierno.

Jnūhun yátá síquī lanchi jeē ní sana

(Lc. 15.3-7)

¹⁰ Coto ma sájéē ni rō nuū ní ñn sūchi lúlí yáha. Chi cáhán rī jíin ró jeē tāca ndajéhé andiví jeē ndíto ya i, níni cáhīin ya nuū maá Tátá rī andiví. ¹¹ Chi ruhū, Yaā ni nduu tēe, vēji ri jeē jnáma ri ñayuu jeē ní sana i nuū Yaā Dios.

¹² ¿Te ndese cájeni ni rō? Núu ñn tēe ndéca de ñn ciento lanchi, te núu sana ñn tí, ¿á tu stóo de cuūn xico xahūn cuūn gā tē yucu, te ndicó de quinanducú de quití ní sana ún? ¹³ Te núu ni nanihīn de tí, te ndaā jeē yóhyo ga cúsiñi ni de jíin quití ún vēsú jíin cúūn xico xahūn cuūn gā quití jeē tu ní sana. ¹⁴ Te suni súcuan maá Tátá rō, Yaā ndeé andiví, tu cúní yā jeē jnahnú ndetū ni ñn sūchi lúlí yáha.

Siquī jeē cóne cáhnu ni yō nuū jnáhan yó

(Lc. 17.3)

¹⁵ Te núu jnáhan ró ní sáha de cuéchi siquī rō, núu súcuan te castūhun ró nuū mañúhún-ni de jeē ní sáha de cuéchi siquī rō. Te núu ni jetáhú de jnūhun ni cahān rō jíin de, núu súcuan te je ni ndumanī de jíin ró ni sáha ró. ¹⁶ Te núu tu ní jétáhú de jnūhun cáhán rō, te quicāna ró ñn chí úu gā ñayuu quihīn rō jíin núu de, cuu i testigo jíin ró, te cundaā cuéchi de te ndumanī de

jíin ró. ¹⁷ Te núu tu ní jétáhú tucu de jnūhun cácahān tēe ún, yūcuán na te castūhun ró nuū ñáyuu cácañdije. Te núu tu ní jétáhú tucu de jnūhun cahān ñayuu cácañdije ún, te siaá rō de na cóo de nájnūhun ñn tēe tu cándije nuū Yaā Dios chí tēe stútú xūhun renta.

¹⁸ Jendaá cahán rī jíin ró jeē tāca jeē cási rō jeē ma sáha ñayuu ini ñayiví yáha, suni casí jeē cáyūcú nde andiví. Te tāca jeē cuáha ró jnūhun sáha i ini ñayiví yáha, suni jeē cáyūcú nde andiví cuáha jnūhun.

¹⁹ Te suni cáhán rī jíin ró, núu uñ jnáhan ró ini ñayiví yáha, inuú cani ni rō siquī ñn jeē cacán tahu rō, núu súcuan te máá Tátá rī andiví cuāha ya jeē cájicān rō.

²⁰ Chi núu ndé mí ndútútú úu chí úní ñayuu jeē cáchiñúhún i ruhū, te yūcuan íne ri jíin i, áchí yá.

²¹ Yūcuán na te ni quee Pedro nuū yā, te ni cajnūhún de ya:

¿Nasaa jínu cone cáhnu ni na núu jnáhan ná jeē sáha de cuéchi siquī ná? ¿A ndé uxā jínu chí naún? áchí de.

²² Te ni cahān Jesús:

Tu cáhán rī jíin ró jeē maá úxā jínu, chi nde uxā jínu jeē uní xico uxí.

Jnūhun yátá síquī mozo jeē tu ní íne cáhnu ni

²³ Núu súcuan te Yaā ndeé andiví, suhva cúu jeē íne cáhnu ni yā nuū ñáyuu ndácu ya jniñu nuū: Cúu nájnūhun ñn rey jeē cuní de sándaā de jíin mozo de jeē cátaū nuū de. ²⁴ Te ni quejéē de sándaā de jíin i. Te ni caquindeca i ñn mozo jeē taú tijni millón peso nuū de.

²⁵ Te tú na vé névāha mozo un chunaa nuū de. Te ni ndacu de jniñu jeē na cúyāhu mozo un jíin ñasihí jíin séhe jíin táca ndajniñu, te nucūnaa xūhun táu.

²⁶ Yūcuán na te ni jecuiñí yití mozo un, te ni cahān ndahú de jíin patrón de ún: Condetu ní, te na chúnaa ndihí ná xūhun ní, áchí de. ²⁷ Te maá patrón ni cundáhú ni de mozo de. Te ni ine cáhnu ni de jeē taú mozo de ún, te ni siaá de jeē ma chúnaa gā.

²⁸ Te ni quenda mozo un cuáhān de, te ni najnáhan-ni de jíin ñn jnáhan mozo de jeē taú jecu peso nuū de. Te ni jññ de tēe ún, te ni quitu de sucūn, te ni cahān de: Chunaa jeē taú rō nuū rī, achí de. ²⁹ Te jnáhan mozo de un ní jecuiñí yití núu de, te ni cahān ndahú jíin de: Condetu te na chúnaa ndihí ri xūhun ró, achí.

³⁰ Te maá de tu ní cúní de, chi ni chune de tēe un vécāa nde quiví nachunaa jeē taú nuū de. ³¹ Te tāca jnáhan mozo de ni cajito jeē súcuan ni sáha de, te ni cajnahuhū ndasí ni de. Te cuango de nuū patrón de, te ni cacachi de ndihí ndese ni cuu.

³² Yūcuán na te patrón un ní nacana de mozo un, te ni cahān de jíin: Mozo ndevāha cúu ró. Chi ni ine cáhnu ni rī ndihí jeē taú rō nuū rī, chi ni cahān ndahú ró jíin rí. ³³ Te nájnūhun ni cundáhú ni rī rohó, suni súcuan ni jini ñúhún cundáhú ni rō jnáhan mozo rō nuú, achí de. ³⁴ Te ni quití ndasí ni patrón, te ni ndacu de jniñu jeē na quívi vecāa nde nachunaa ndihí jeē taú nuū de.

³⁵ Te ni jīnu ni cahān yā, te áchí yá:

Nájnūhun ni sáha rey un jíin mozo de, suni súcuan sáha máá Tátá rī andiví jíin táca róhó núu tu cone cáh-nu ni rō nuū jnáhan ró nde jíin ini jíin ánuá rō, núu na-ni cuēchi sáha i nuū rō. Achí yá jíin de jíinánhan de.

Siquí jeē ma stóo jnáhan tēe jíin ñahan
(Mr. 10.1-12; Lc. 16.18)

19 Te nuū ní ndihí ni cahān Jesús táca jnúhun yáha, te ni quenda ya Galilea cuahān yā. Te ni jinū yā región Judea, inga lado yūte Jordán, ichi núu cáne niāndii. ² Te cuehē ñayuu ni candiquín i ya, te yūcuan ní nasávāha ya ñayuu cácuhū.

³ Yūcuán na te ni quecoo jecu tēe grupo fariseo nuū yā, chi cácuuni de coto ndee de ya núu ndese cahān yā. Te ni cacajnūhún de ya:

¿A iyó ley jeē cuu ndusín ñn tēe jíin ñasihí de núu na-ni siquí cúu, chí naún? áchí de.

⁴ Te ni cahān yā:

¿A tu ní cácahu ró tutu ñ ndese ni sáha Yaā Dios ñayuu nde xīhna ñúhún? Chi tēe jíin ñahan ni sáha ya, achí. ⁵ Te suni ni cahān Yaā Dios: Jeē yúcuán cúu jeē stóo tēe tátá de náná de, te quijnáhan de jíin ñasihí de, te ñn na cuu ndindúú de, áchí Yaā Dios, achí tutu. ⁶ Núu súcuan te tuá cúu uū jnáhan de, chi ñn na cúu. Jeē yúcuán tu iyó váha jeē stóo jnáhan, chi jeē ni squíjnáhan Yaā Dios cúu, áchí yá.

⁷ Te ni cacajnūhún de ya:

Núu súcuan ¿te naun ni ndacu Moisés jniñu jenahán jeē núu stóo ñn tēe ñasihí de, te na cúvāha acta jeē ndusín de jíin ña? áchí de.

⁸ Te ni cahān yā jíin de:

Siquí jeē níhni ni rō jíinánhan ró, jeē yúcuán ní jēhe Moisés jnūhun jeē stóo ró ñasihí ró. Te nde xīhna ñúhún chi nasūu súcuan ní cuu. ⁹ Te ruhū chi cáhán rī jíin ró, núu ñn tēe stóo de ñasihí de, te núu nasūu jēe tñjñi ni ña, te quijnáhan de jíin inga ñahan, núu súcuan te cásiquí ndéē de ña. Te núu ñn tēe condeca de ñahan ní ndusín, suni cásiquí ndéē de ña, áchí yá.

¹⁰ Yūcuán na te ni cacahān tēe cáscuáha jíin yá:

Te núu ma cúu stóo tēe ñasihí de, núu súcuan te vāha ga ma cóndeca de ñahan, áchí de.

¹¹ Te ni cahān yā jíin de:

Jnūhun ni cahān rō yāhá, tu níhín jniñu nuū ndihí tēe, chí máá nene tēe jeē ni sáha Yaā Dios jeē nihín jniñu nuū. ¹² Chí iyó tñjñi siquí jeē jési jeē ma cóndeca tēe ñahan. Chí sava tēe ni cacacu de jeē ma cúu condeca de ñahan. Te sava ga tēe ni sáha ñayuu jeē ma cúu condeca de ñahan. Te sava ga tēe ni cajeni ni maá de jeē ma cóndeca de ñahan siquí jeē ndihví ni de jíin jniñu jeē ndácu Yaā andiví nuū de. Tēe jeē cúu cuatáhu jnúhun jeē ma cóndeca de ñahan, na cuatáhu de núu súcuan. Achí yá.

Jeē ni jíicān tahú Jesús jehē sūchi lúlí
(Mr. 10.13-16; Lc. 18.15-17)

¹³ Yūcuán na te ni quecoo ñayuu jíin sūchi lúlí, jēe na sóo yá ndaha ya xiní i te cacān tahú yā jehē i. Te tēe cáscuáha jíin yá, ni cacahān de nuū ñayuu vejicoo jíin i. ¹⁴ Te ni cahān Jesús:

Cuāha jnūhun na quíjicoo sūchi lúlí jíñā nuū rī, te ma cási rō jeē quíjicoo i. Chí ñayuu jeē ndió cóo ni i caní ni i nájnūhun sūchi yáha, suu i quívi ndaha Yaā andiví jēe ndacu ya jniñu nuū i, áchí yá.

¹⁵ Te ni soó yá ndaha ya xiní i jíinánhan i. Te ni quenda ya yūcuan cuahān yā.

Jnūhun tēe cúcá
(Mr. 10.17-31; Lc. 18.18-30)

¹⁶ Te ñn tēe suchí ní quee de nuū Jesús, te ni cacajnūhún de ya:

Tēe vāha cúu ní Maestro. Te cachi ní, ¿na jniñu váha sáha ná te nihín tahú na cotecu na ñí cáni andiví? áchí de.

¹⁷ Te ni cahān yā jíin de:

¿Naun cáhán rō jeē tēe vāha cúu rí? Tú ni ñn tēe vāha iyó, chí máá ñn-ni Yaā Dios. Te núu cúní rō cotecu rō ñí cáni, te squícu ró jniñu ní ndacu ya. Achí yá.

¹⁸ Te ni cahān de:

¿Ndé-ni jniñu cúu núu súcuan?

Te ni cahān yā:

Ma cáhni rō ndēyi. Ma cosíquí ndéē jnáhan ró. Ma sacuíhna ró. Ma sajnūhún ró. ¹⁹ Cuatáhu ró nuū tatá ró nuū naná rō. Te cundáhu ni rō jnáhan ró nájnūhun cundáhu ni rō maá ró, achí yá.

²⁰ Te ni cahān tēe suchí un:

Tácá jniñu yáha je ni squícu ná ndé ná lulí ná. ¿Te na vé cúmaní gā sáha ná núu súcuan?

²¹ Te ni cahān Jesús:

Núu cúní rō squícu ndihí ró, cuahān te xico ró ndihí jeē névāha ró, te cuāha ró núu ñayuu ndahú. Te nde andiví cuāha ya jeē ndetū ndasí coo ró. Yūcuán na te quiji ró condiquín rō ruhū quihín yō, achí yá.

²² Te tēe suchí un, ná ni jini sōho de jnūhun yáha, te ni cucuíhyá ni de te cuahān de, chí cúcá ndasí de.

²³ Yūcuán na te ni cahān Jesús jíin tēe cáscuáha jíin yá:

Jendaá cahán rī jíin ró, tēe cúcá chí yōhyo yí quívicoo de ndaha Yaā andiví jēe ndacu ya jniñu nuū de. ²⁴ Te cáhán tucu rí jíin ró jeē yachí gā yāha ñn camello yaū yutícuí, vésú jeē quívi ñn ñayuu cucá ndaha Yaā Dios jeē ndacu ya jniñu nuū i, áchí yá.

²⁵ Te tēe cáscuáha jíin yá, yōhyo ni canaa ni de jeē ní cajini de jnūhun yáha, te ni cacajnūhun jnáhan de:

¿Ndé ñayuu cúu jeē cácu núu súcuan?

²⁶ Te ni ndacoto Jesús nuū de, te ni cahān yā:

Ñayuu chí ma cúu squívi i máá i ndaha Yaā Dios, te máá yá chí ndihí-ni cuu sáha ya, achí yá.

²⁷ Yūcuán na te ni cahān Pedro:

Saña jijnáhan ná ní castóo ná ndihí jeē cánevāha ná, te cándiquīn na níhín. ¿Te na vé nihín na núu súcuan? áchí de.

²⁸ Te ni cahān Jesús jíin de:

Ruhū, Yaā ní nduu tēe, jendaá cahān rī jíin ró jijnáhan ró jéē ñn quivī conene rī mesa ndacu ri jniñu, te yōhyo luu kujéhu ri ini ñayivi jéé. Te quivī ún te máá ró jeē ní cacondiquīn rō ruhū, suni coyūcu ró nuū uxí uū mesa ndacu ró jniñu. Te sándaā rō jniñu ndihúxí uū yucūn ñayuu Israel. ²⁹ Te tāca ñayuu jeē ni stóo vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, siquī jeē cóndiquīn i ruhū, te nanihīn i ñn ciento gā jeē súcuan. Te suni nihīn tahu i cote-cu i ññí cáni. ³⁰ Te cuehē ñayuu jeē vijna cácuu i nuū, nduu i sandihí. Te ñayuu jeē vijna cácuu i sandihí, nduu i nuū. Achí yá.

Jnūhun yátá síquī tēe cásajniñu

20 ¹ Te suhva cúu jeē ndácu Yaā andiví jniñu nuū ñayuu: Cúu nájnūhun ñn tēe chíí ñuhun. Te ñn nehen ní quenda de, ndúcú de tijni mozo jeē taxín ndéhē uva de. ² Te ni sándaā de jíin mozo un jéé chúnaa de ñn denario jeē quiví. Te ni tají de tēe un cuángoo jeē taxín uva de. ³ Yūcuán na te ni quenda tucu de nájnūhun cahñ. Te ni jito de nuū sava ga tēe cáyūcu sáa-ni de nuū yáhu. ⁴ Te ni cahān de jíin: Róhó jijnáhan ró, cuángoo taxín ró uva rī, te chunaa vāha ri yāhu ró, áchí de. Te tēe un cuángoo de. ⁵ Te ni quenda tucu de jeē cuácuu cahuxí uū jíin jéē cuácuu cahunī, te suni súcuan ni nihīn tucu de mozo. ⁶ Te jeē cuácuu cahuhūn ni quenda tucu de. Te ni nihīn tucu de jecu gā tēe cáyūcu sáa-ni nuū yáhu. Te ni cahān de jíin: ¿Najehē cáhñ sáa-ni ró yáha ññí ndiáca? áchí de. ⁷ Te ni cacahān tēe ún: Siquī jeē tú ni ñn ní cána saña jéē sájniñu ná. Te ni cahān de jíin tēe ún: Núu súcuan te suni máá ró quingoo ró taxín ró ndehē uva rī, chi chunaa vāha ri yāhu ró, áchí de. ⁸ Te nuū ní ini, te tēe chíí ñuhun ni cahān de jíin tēe cújéhu nuū mozo de: Cana xinī tēe cásajniñu te chunaa rō yāhu de, te xihna gā tēe ni quivícoo sandihí, te sáá te tēe ni quivícoo xihna ñúhún, áchí de. ⁹ Te ni quecoo tēe jeē ni quivícoo cahuhūn. Te ñn denario ni caquihin ñn ñn de. ¹⁰ Yūcuán na te ni quecoo tēe jeē ni quivícoo xihna ñúhún. Te cájini ni de jeē cuehē gā quiyāhu de. Te ñn-ni denario ni caquihin ñn ñn de. ¹¹ Te nuū ní caquihin de, te ni caquejéé de cácahān sōo de siquī tēe chíí ñuhun, áchí de: ¹² Máá ná jijnáhan ná, ndiáca ni casájniñu ná, te ni candoho ná jéē jihní. Te tēe yáha jéē ni quivícoo sandihí, chi máá ñn hora-ni ni casájniñu de. Te ñnuú-ni ni chiyāhu ní saña jíin de, áchí de. ¹³ Te tēe chíí ñuhun ni cahān jíin ñn de: Amigo, nasūu jéē tú vāha sáha ri jíin ró. ¿A tu ní sándaā yō jeē ñn denario quiyāhu ró, chí naún? ¹⁴ Núu súcuan te quihin yāhu ró te quinhun rō. Chi cúní rī jeē tēe ni quivícoo sandihí yáha, ñnuú quiyāhu de jíin máá ró. ¹⁵ ¿Te á tu cuu sáha ri ndese

cúní rī jíin xúhun máá rí? ¿Te chí cúcuésún ni rō jeē ní chiyāhu vāha ri de jijnáhan de siquī jeē vāha ni rí? áchí de. ¹⁶ Te nájnūhun ni sáha tēe chíí ñuhun, suni súcuan sáha Yaā Dios. Chi ñayuu cácuu sandihí, nduu i nuū. Te ñayuu cácuu nuū, nduu i sandihí. Chi cuehē ñayuu cána ya jeē candíje i ya. Te jecu-ni i cándíje, te nacāji ya maá i jeē ndúu i séhe ya. Achí yá.

Jeē ni cáhān tucu Jesús jeē cúu yā

(Mr. 10.32-34; Lc. 18.31-34)

¹⁷ Yūcuán na te ná ni quihin Jesús ichi cuahān yā ñuu Jerusalén, te ni cana sñn ya ndihúxí uū tēe cáscuáha jíin yá. Te ni cahān yā jíin de:

¹⁸ Cuni sōho ró, chi je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácujuhū jíin núu tēe cástéén tutu ley. Te ndonda de siquī rī jeē cúu rī. ¹⁹ Te squivi de ruhū nuū tēe nación Roma jeē cáyūcú Jerusalén cándacu jniñu. Te tāca tēe un sácatā de nuū rī. Te cani de ruhū, te sáá te cahni de ruhū jicā cruz. Te nuū uní quiví te natecu rī. Achí yá.

Jeē ni jícān naná Jacobo jíin Juan ñn favor nuū yā

(Mr. 10.35-45)

²⁰ Yūcuán na te ni quee ñasihí Zebedeo nuū yā jíin séhe ña Jacobo jíin Juan. Te ni jecuiñí yití ña nuū yā, jícān ña ñn favor nuū yā. ²¹ Te ni cajnūhun yá ña:

¿Na vé cuní rō?

Te ni cahān ña:

Cuāha ní jnúhun jeē quiví ndácu ní jniñu te conēne ndindúú séhe ná yáha xiin ní, ñn i lado vāha ní, te inga i lado jecó ní, achí ña.

²² Yūcuán na te ni cahān Jesús jíin Jacobo jíin Juan:

Tu cájini rō na vé cúu jeē cájicān rō. ¿A cuu ndoho ró jnúndóho nájnūhun jeē quíji siquī rí? ¿Te á canda ró ndoho xeñ rō nájnūhun ndoho ri? Achí yá.

Te ni cacahān de:

Cuu sáha ná.

²³ Te ni cahān yā jíin de:

Jendaá jeē ndoho ró jnúndóho nájnūhun jeē quíji siquī rí, te ndoho xeñ rō nájnūhun ndoho ri. Te jeē cónēne ró lado vāha ri jíin lado jecó rí, nasūu rúhū cúu jeē cuáha jnūhun. Chi je íyó túhva cuu tāca tēe jeē ní nacāji Tátá rī, te tēe un níhñ. Achí yá.

²⁴ Te uxí gā tēe cáscuáha jíin yá ní cajini de jnūhun yáha. Te ni caquití ni de nuū uú ñani ún. ²⁵ Te Jesús ni cana ya de, te ni cahān yā jíin de:

Cájini rō ndese cásaha tēe cácujuhū nuū ñayuu tāca nación. Chi cándacu ñhñ de jniñu nuū i, te máá de cáhí ndese coo. ²⁶ Te máá ró jijnáhan ró, chi ma sáha ró súcuan. Chi núu ndé ñn ró cúní kujéhu, sa suhva cuajniñu ró núu jnáhan ró. ²⁷ Te núu ndé ñn ró cúní cuu nuū, sa suhva sáha ró máá ró mozo nuū jnáhan ró. ²⁸ Chi suni súcuan sáha ruhū, Yaā ní nduu tēe, chi nasūu jéé véji ri jeē cuajniñu ñayuu nuū rī, chi sa suh-

va vēji ri jeē cuajniñu ri nuū ñáyuu. Te cuāha ri maá rí cuu rí návāha jnama ri cuehē ñayuu, achí yá.

Jeē ní nasávāha ya uū tēe cuáá

(Mr. 10.46-52; Lc. 18.35-43)

²⁹ Yūcuán na te ni quenda ya jíin de ñuu Jericó. Te cuehē ndasí ñáyuu ni candiquín i ya. ³⁰ Te yuhíchi un cáyūcu úū tēe cuáá. Te ni cajini de jnūhun jeē yáha Jesús cuahān yā, te ni cacana jee de:

Máá ní jeē cúu ní Séhe yucūn David, cundáhú ni ni sáña, achí de.

³¹ Te ñayuu un ní cacahān i nuū de jeē na cásí de yuhu de. Te víhyá gā ni cacana jee de:

Máá ní jeē cúu ní Séhe yucūn David, cundáhú ni ni sáña víi, achí de.

³² Te ni jecuíñi Jesús, te ni cana ya ndíndúú tēe cuáá un, te ni cajnūhun yá de:

¿Na vé sáha ri jíin ró cácu ni rō?

³³ Te ni cacahān de jíin yá:

Jeē na ndúndijin tinūu ná cácu ni ná, achí de.

³⁴ Te ni cundáhú ni yā de. Te ni tee ya ndaha ya tinūu de. Te ni candundijin-ni tinūu de. Te ni candiquín de ya cuango de jíin yá.

Jeē ni quívi Jesús ñuu Jerusalén

(Mr. 11.1-11; Lc. 19.28-40; Jn. 12.12-19)

21 Te nuū cuácuyajni ya ñuu Jerusalén, te ni jinū yā jíin tēe cáscuáha jíin yá ñuu Betfagé, jeē íne jehē yucu Olivos. Te ni tají yá uū tēe cáscuáha jíin yá jeē quíngoo de. ² Te achí yá jíin de:

Cuáhán ñuu lulí íne ichi núu. Te yūcuan níhīn rō ñn burra, núhni tē jíin ñn burro lulí. Te ndají ró tē, quijicoo ró jíin tē nuū rī. ³ Te núu ndé ñn cahān jíin ró, te cachi rō nuū: Máá Jítoho yō jíni ñúhún yá tē, achi rō. Yūcuán na te siáá-ni i tē, quiji ró jíin tē, achí yá.

⁴ Te súcuan ni cuu táca jniñu yáha návāha squícu jnūhun ni cahān tēe ni nacani jnūhun Yaā Dios nde jehān, yósó núu tútu:

⁵ Cachi rō nuū ñáyuu ñuu Jerusalén jeē naní ñuu Sión: Yāhá condēhe ró jeē véji Rey rō.

Tu sájéhnū ya maá yá, chi máá burra-ni yósó yá, jíin burrito, sēhe quiti ndíso.

Achí tutu.

⁶ Yūcuán na te tēe cáscuáha un cuángoo de, te ni casáha de nájnūhun ni ndacu Jesús jniñu nuū de. ⁷ Te ndéca de burra jíin séhe tē, ni ndecoo de nuū yā. Te ni casoó de sahma de siquī tē, te ni jecosō yā tē. ⁸ Te cáhīn cuehē ñayuu, te ni cascáa i sahma i ini ichi. Te sava ga i ni cajehnde ndaha ñúu, te ni cachucun i ini ichi. ⁹ Te ñayuu cuango ichi núu jíin ñáyuu cuango ichi yátá, cácana jee i:

Yōhyo cújéhnū Yaā cúu Séhe yucūn rey David. Yōhyo vāha Yaā cúu Yaā jeē véji jíin jniñu máá Jítoho yō Yaā Dios. Te yōhyo cújéhnū máá Yaā Dios. Achí i.

¹⁰ Te nuū ni quívi ya ñuu Jerusalén, te ndíhi ñayuu ñuu un ní cacuvaā i, te cuehē i cájnūhun jnāhan:

¿Ndé tēe cúu tēe yáha? achí i.

¹¹ Te ni cacahān ñayuu vējicoo jíin yá:

Yāha cúu Jesús jeē nácani jnūhun Yaā Dios, jeē véji nde ñuu Nazaret ndañúu Galilea. Achí i.

Jeē ní quenehen ya ñayuu ini templo

(Mr. 11.15-19; Lc. 19.45-48; Jn. 2.13-22)

¹² Yūcuán na te ni quívi Jesús ini templo cáhnu Yaā Dios. Te ni quenehen ya táca ñáyuu cájeen quiti te cá-naxíco núu ñáyuu jeē socō i. Te ni scotúú ndeyi ya táca mesa tēe cástáyi xūhún, jíin silla tēe cáxíco paloma.

¹³ Te achí yá jíin i:

Yósó núu tútu íi jeē cahān Yaā Dios: Vehe ri chi vehe nuū cájicān tahu cúu, achí Yaā Dios. Te máá ró jijnáhan ró, chi nájnūhun yaū cava ñacuñhá ni canasáha ró. Achí yá.

¹⁴ Yūcuán na te sava ñayuu cuaá jíin ñáyuu chacuá ni quecoo i nuū yā ini templo un. Te ni nasávāha ya i.

¹⁵ Te sutū cácu jéhnū jíin tēe cástéén tutu ley Yaā Dios, ni cajito de táca jniñu jéhnū sáha ya, te ni cajini de jeē cácana jee sūchi lulí ini templo: Yōhyo cújéhnū Yaā cúu Séhe yucūn rey David, achí i. Te ni caquitē ni de. ¹⁶ Te ni cacahān de jíin yá:

¿A tu jíni ró jéé súcuan cácahān sūchi yáha? achí de.

Te ni cahān Jesús jíin de:

Jíni ri. ¿Te á ná tu cahu ró jéé yosó núu tútu íi jeē suh-va cáhán ñn tēe jíin Yaā Dios?

Sáha ní jéé táca sūchi lulí jíin sūchi cájexin, vāha ndasí cáhán i jeē Yaā cújéhnū cúu Cristo. Achí.

¹⁷ Te ni stóo ya de. Te ni quenda ya ñuu Jerusalén, cuahān yā nde ñuu Betania. Te yūcuan ní ndōo ya jecuaā ún.

Jeē ni cáhān yā nuū yújnu higo

(Mr. 11.12-14, 20-26)

¹⁸ Te jenéhen inga quívi cuanuhun yā ñuu Jerusalén, te jíi yā sōco. ¹⁹ Te ni jito ya ñn nundēhe higo, íin yuhíchi. Te ni jehēn yā jehē. Te tú na ndehē ni níhín yā, chi máá ndaha-ni íin. Te ni cahān yā jíin:

Vijna te ma cúun cuiti gā ndehē xinī rō, achí yá.

Te ni ichī-ni yujnu higo ún. ²⁰ Te tēe cáscuáha jíin yá, ni canaa ni de cájito de. Te ni cacajnūhún de ya:

¿Ndese ni sáha ní jéé yachi-ni ni ichī yujnu higo? achí de.

²¹ Te ni cahān yā jíin de:

Jendaá cahān rī jíin ró, núu candíje ró te tú cani siquí ni rō, te cuu sáha ró jniñu jéhnū nájnūhun ni sáha ri jíin yujnu higo. Te nde jniñu jéhnū ga cuu sáha ró, chi nde cuu cahān rō jeē cújiyo yucu yáha, quihīn nuū mar, te sáha nájnūhun cahān rō. ²² Te táca jéé cacán tahu rō jijnáhan ró, te núu candíje ró jéé níhín rō, te níhīn rō. Achí yá.

Siquĩ jeē ndíso jniñu Jesús

(Mr. 11.27-33; Lc. 20.1-8)

²³ Te ni quĩvi tucu ya ini templo cáhnu. Te níni stéén yā jnūhun, te sutū cácujuhnu jíin táca tée jéhu jeē cándacu jniñu nuū ñáyuu hebreo, ni quecoo de nuū yā. Te ni cacajñuhún de ya:

¿Ndé ní nihĩn jniñu ró jéē sáha ró jniñu yáha? ¿Te ndé ĩn ni tee jniñu siquĩ ró jeē sáha ró súcuan? Achí de.

²⁴ Te ni cahān Jesús:

Suni ruhū, cajñuhun rí rohó ĩn jnūhun jíjnáhan ró, te núu cuu stío cuĩñí rō, yūcuán na te cachi rī nuū rō ndé ní nihĩn jniñu ri jeē sáha ri jniñu yáha. ²⁵ ¿Ndé ĩn ni tee jniñu siquĩ Juan jeē ni scuándute de? ¿A Yaā Dios chí táca tée? áchí yá jíin de.

Yūcuán na te ni candajñuhun máá de:

Núu cahān yō jeē Yaā Dios ni tee ya jniñu un síquĩ Juan, te cahān de jíin yó: Núu súcuan ¿te najehē tu ní cácañdije ró de? ²⁶ Te núu cahān yō jeē ñáyuu ni catee jniñu un síquĩ de, te cáyūhu yó ñayuu, chí ndĩvii i cácañdije i jeē tée ni nacani jnūhun Yaā Dios ni cuu ndije Juan. Achí de cácahān máá de.

²⁷ Te ni cacahān de jíin Jesús:

Tu cájini rī, achí de.

Yūcuán na te ni cahān yā jíin de:

Ni ruhū, suni ma cáchi rī nuū rō ndé ĩn ni tee jniñu siquĩ rī sáha ri jniñu yáha, áchí yá.

Jnūhun yátá síquĩ uú sēhe yíĩ

²⁸ Te ni cahān gā yā jíin de:

Cuni nahín ró jnūhun yátá yáha: ĩn tēe ni ĩyo uū sēhe yíĩ de. Te ni cahān de jíin ĩn i: Séhē, quihĩn rō taxín ró ndehē uva rī vijna, áchí de. ²⁹ Te ni cahān i: Ma quihín na, áchí i. Te ni cunúu, te ni nacani ni i, te cuahān i nuū jniñu ún. ³⁰ Te tēe un ní jehēn de nuū ĩnga sēhe de, te suni súcuan ni cahān de jíin i. Te ni cahān i: Cuu núu súcuan, te quihĩn na, áchí i. Te tu ní jéhén i. ³¹ ¿Te ndese cájeni ni rō? Jeē ndĩndúú i, ¿ndé ĩn i ni squĩcu jniñu cúní tatá i? áchí yá.

Te ni cacahān de:

Sūchi jéē ni cáhān de jíin xihna gā, achí de.

Te ni cahān Jesús jíin de:

Súcuan cúu, te jendaá cahān rī jíin ró jeē tée cástútú xúhun renta jíin ñahan cájica jnéni, yachĩ cánacani ni i jeē stío i cuēchi i te quívicoo i ndaha Yaā Dios jeē ndacu ya jniñu nuū i, te máá ró jíjnáhan ró chí ma quĩvi ró. ³² Chí ni quiji Juan, ni steén de ndese condiquĩn rō jnūhun ndaā, te tu ní cácañdije ró jnúhun ni cahān de. Te sa suhva tēe cástútú xúhun renta jíin ñahan cájica jnéni, ni cacandije i jnūhun ni cahān de. Te máá ró, vēsú ni cajito ró jéē ní cacandije i, te tu ní cánacani cuiĩ ni rō jeē candije ró. Achí yá.

Jnūhun yátá síquĩ tēe néé cásjniñu nuū uva

(Mr. 12.1-12; Lc. 20.9-19)

³³ 'Cuni sōho inga jnūhun yátá jíjnáhan ró: Ni ĩyo ĩn tēe chí ĩnhun. Te ni nachuhun de cuehē ndehē uva. Te ni jesi de corral, te ni sáha de ĩn nuū cúhun ndehē un táxĩn. Te ni jeni de ĩn vehe súcún návāha cuu coto de nĩí cáhnu.

'Te ni stío de nuū sava tēe sájniñu nuū, te cuu sava de ndehē jíin. Te ni tee de ichi cuahān jíicá de. ³⁴ Te máá tiempo ndutútú uva, te ni tají de jecu mozo cuanuquĩhin sava uva nuū tēe cásjniñu ún. ³⁵ Te tēe un ní cajñi de mozo un. Te ĩn i ni cacani de, te inga i ni cajehni de, te inga i ni cajēhe de yuū xinĩ. ³⁶ Te tēe chí uva ni tají tucu de jecu gā mozo cuango, cuehē gā vēsú jeē xihna ñúhún. Te suni súcuan ni casáha tēe un jíin ndĩhi mozo un.

³⁷ Te jeē sándĩhĩ na te ni tají de sēhe de cuahān. Te jeni ni de: Tēe ún chí cuatáhú de jíjnáhan de nuū séhe rī. ³⁸ Te tēe cásjniñu ún, núu ní cajito de nuū séhe tēe chí uva, te ni cacahān máá: Tēe chí táhū cúu jeē yáha. Na cáhni yō de, te ndōo tahū de cuu yó, áchí. ³⁹ Te ni cajñi de i, te ni caquenehen de i inga lado, te ni cajehni de i. Achí yá.

⁴⁰ Yūcuán na te ni cajñuhun yá de:

Núu súcuan te núu na quíji tēe chí uva un, ¿te ndese sáha de jíin tēe cásjniñu ún? áchí yá.

⁴¹ Te ni cacahān de jíin yá:

Ma cundáhú cuiĩ ni de táca tēe casáha jniñu néé un, chí cahni de. Te cuāha de ñuhun cáá uva un núu inga sava tēe sájniñu nuū, cuu sava de ndehē jíin. Te quĩvĩ ndutútú ndehē, te tēe ún nacuāha de sava ndehē nuū tēe chí uva. Achí de.

⁴² Te ni cahān Jesús jíin de:

¿Te á ná tu cahu ró jnúhun yáha jeē yosó núu tútu ĩr, jeē ruhū cúu nájnūhun ĩn yuū? Chí áchí tutu:

Yuū jeē ní casquéhichĩ tēe cájeni vehe, yuū yáha nduu jeē quĩtuu vehe.

Máá Jítóho yō Yaā Dios ni sáha ya súcuan, te cánaa ni yō jító yó jniñu yáha.

Achí tutu. ⁴³ Núu súcuan te cáhān rī jíin ró jeē cujiyo-ni jeē ndácu Yaā Dios jniñu nuū rō jíjnáhan ró, te nacuāha ya jniñu un núu inga ñayuu jeē squĩcu váha i jniñu ndácu ya nájnūhun cúní yā. ⁴⁴ Te ñayuu tu cácañdije, ndoho i nájnūhun ndóho ñayuu jeē cotúú siquĩ yuú te jnáhnú i. Te quĩvĩ sándaā Yaā Dios cuēchi, te ñayuu tu cácañdije, ndoho i nájnūhun ndóho ñayuu jeē nínga yuū siquĩ i te cundihĩ i sáha. Achí yá.

⁴⁵ Te sutū cácujuhnu jíin tēe grupo fariseo ni cajini sōho de táca jnúhun yátá ní cahān yā. Te ni cajecūhun ni de jeē siquĩ máá de cúu jnūhun yátá ní cahān yā siquĩ tēe cásjniñu nuū uva jíin tēe cájeni vehe. ⁴⁶ Te ni canducú de modo jñi de ya. Te cáyūhú de jeē quĩtĩ ni ñayuu, chí cájeni ni i jeē tēe nácani jnūhun Yaā Dios cúu ya.

Jnūhun yátá síquī vico nándāha

22 Yūcuán na te ni cahān tucu Jesús inga jnūhun yátá jíin de jíināhan de:

² Súcuan cúu jeē ndácu Yaā andiví jniñu nuū ñáyuu: Cúu nájñūhun ñin rey jeē sáha de ñin vico jeē nándāha sēhe yí de. ³ Te ni tají de tāca mozo de cuacana ñayuu jeē ni cáhān de jíin jéē quíjicoo. Te ñayuu ún tu ní cácu-ni i quíjicoo i. ⁴ Te ni tají tucu de jecu gā mozo quingoo, te áchí de jíin: Cahān jíin ñáyuu ní cana ri un jéē iyó túhva ndeyu. Chi je ni jehni rī stiquī rī jíin táca gá quiti ní nduu, te ndihí je iyó túhva. Nehen jijnáhan ró vico nándāha. Achi rō jíin i. Achí de. ⁵ Te ñayuu ní cana de ún tu ní cásáha i cuenta. Chi ñin i cuahān nuū itu i, te inga i cuahān nuū jniñu sáha i. ⁶ Te sava ga i ni cajñi i tāca mozo rey, te ni casácatā i nuū, te ni cajehni i.

⁷ Yūcuán na te yōhyo ni quiti ni rey. Te ni tají de soldado de ni jengoo, ni cajehni de ñayuu ní cajehni ndīyí ún, te ni cajehmu de ñuu i. ⁸ Yūcuán na te ni cahān de jíin sava ga mozo de: Ndihi je iyó túhva jeē cóo vico nándāha. Te ñayuu ní cana ri ún, tu iyó váha jeē quíjicoo i chí nasūu ñáyuu váha cácuu i. ⁹ Núu súcuan te cuáhān jijnáhan ró táca núu náquijnáhan calle. Te cana ró núu nasaa ñayuu nihīn rō, na quíjicoo i vico nándāha. Achí de. ¹⁰ Te ni quendacoo mozo un cuángoo tācá ichi. Te ni castútú de ndihí ñayuu ní canihīn de, cúu ñayuu cunéé, cúu ñayuu váha. Te súcuan te ni chitú ñáyuu ini vehe nuū iyó vico nándāha.

¹¹ Te ni quiví rey ini vehe jeē cahán de jíin ñáyuu ni cutútú. Te ni jito de nuū ñin tēe jeē tu ñūhun sahma jeē ni jéhe de cuhun ñayuu quíjicoo vico nándāha. ¹² Te ni cahān de jíin tēe ún: Amigo, ¿ndese ni quiví ró váha jéē tu ñūhun ró sahma vico nándāha? áchí de. Te máá tēe ún tu ní cáhān cuiti de. ¹³ Yūcuán na te ni cahān rey jíin tēe cájeni cohō: Jñi de te cuhni rō ndaha de jehē de, te quenehen ró de na quihín de nuū quéhe nuū néē. Te yūcuán ndáhyū de te nacayihí yuhu de jeē ndóho xeēn de. Achí rey. ¹⁴ Chi cána Yaā Dios cuehē ñayuu jeē na cándije i. Te jecu-ni i cándije, te máá i nácāji ya jeē ndúu i sēhe ya. Achí Jesús.

Siquī xúhun renta

(Mr. 12.13-17; Lc. 20.20-26)

¹⁵ Yūcuán na te cuangoo tēe grupo fariseo. Te ni candajnūhún de núu ndese sáha de návāha cahān yā ñin jnūhun jeē nihín de cuēchi síquī yā. ¹⁶ Te ni catajé de jecu tēe cáscuáha jíin máá de jíin tēe grupo Herodes cuangoo de. Te ni cacahān de jíin yá:

Maestro, cájini na jéē tēe cáhān ndaā cúu ní, te stéén ndaā ní ndese squícu ñayuu nuū Yaā Dios. Te tu yúhú ní jeē cahán ni ñin ñayuu síquī ní, chí tu sáha ní cuenta ndese cúu ñin ñin i, chí inuú-ni sáha ní jíin i. ¹⁷ Núu súcuan te cahān ní ndese jéni ni ní: ¿A iyó váha jeē chúnaa yō renta nuū rey nación Roma jeē jñi nación yō, chí tuú? áchí de.

¹⁸ Te ni jini Jesús jeē cájito ndee de ya. Te ni cahān yā jíin de:

Tēe stáhú-ni cácuu ró. ¿Najehē cájito ndee rō ruhū?

¹⁹ Stéén xūhun jéē jéconaā renta na cóto ri, achí yá.

Te ni castéén de ñin denario nuū yā. ²⁰ Te ni jito ya, te ni cajñūhun yá de:

¿Ndé ñin nuū cúu jeē ndeé nuū xúhun yáha, te ndé síhví cúu jeē ndeé yāhá?

²¹ Te ni cacahān de jíin yá:

Nuū jíin síhví rey un cúu, áchí de.

Yūcuán na te ni cahān yā jíin de:

Núu súcuan te nacuāha ró núu rey un jéē yíhi cuenta nuū de, te nacuāha ró núu Yaā Dios tāca jéē yíhi cuenta nuū maá yá, achí yá.

²² Te nuū ní cajini de jeē ndichí ní cahān yā jnūhun yáha, te ni canaa ni de, te ni castóo de ya, te cuangoo de.

Jeē ní cacajnūhún de síquī jeē nátecu ndīyí

(Mr. 12.18-27; Lc. 20.27-40)

²³ Te suni quiví un ní quecoo jecu tēe grupo saduceo nuū yā. Te tēe un cácahān jeē tu nátecu cuiti ndīyí. Te ni cacahān de jíin yá síquī ñin jnūhun, áchí de:

²⁴ Maestro, Moisés ni cahān de jeē núu ñin tēe cuu de, te ndō ñasihí de, te núu tú sēhe de ní íyo jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuñi nuū ndīyí ñani de. Achí Moisés. ²⁵ Te ñuu na ní íyo uxā ñani. Te tēe núu ní quijnáhan de jíin ñahan. Te ni jihí de. Te jeē tú sēhe de ní íyo, te ni ndō ñasihí de nuū ñani de. ²⁶ Te tēe ún suni ni jihí de, te tú na sēhe de ní íyo tucu. Te suni súcuan tēe unī, nde jíin ndihúxá de. ²⁷ Te nuū ní ndihí de ni cajihí, te suni ni jihí ñahan ún. ²⁸ Núu súcuan te quiví nátecu ndīyí, ¿ndé ñin de cuu ña ñasihí de? Chi ndihúxá de ni condeca de ña. Achí de jíin yá.

²⁹ Yūcuán na te ni cahān yā jíin de:

Yōhyo cástivi ró jnūhun síquī jeē tu cájecūhun ni rō jeē cahán tutu íi, ni tu cájini rō jeē iyó poder Yaā Dios jeē nastécu yā ndīyí. ³⁰ Chi quiví nátecu ndīyí, te tuá na jnūhun quijnáhan tēe jíin ñahan coo. Chi coo i nájñūhun ndajéhé Yaā Dios andiví. ³¹ Te síquī jeē nátecu ndīyí, ¿á tu ní cácahu ró tutu jnūhun jeē cahán Yaā Dios jíin ró? ³² Máá rí cúu Yaā Dios Abraham jíin Isaac jíin Jacob, achí Yaā Dios. Chi vésú je ni cajihí de, te cátecu de nuū iyó máá yá, chí cúu ya Yaā sáha jeē técu ñayuu ñé cáni. Achí yá jíin de.

³³ Te ñayuu un ní canaa ni i cájini nahín i jnūhun stéén yā.

Jniñu cánuú ndasí gá jeē ní ndacu Yaā Dios

(Mr. 12.28-34)

³⁴ Yūcuán na te tēe grupo fariseo ni cajini de jeē ní cajesí tēe saduceo yuhu de ni sáha ya. Te ni candutútú de nuū yā. ³⁵ Te ñin de jeē cúu tēe stéén tutu ley Yaā Dios, ni cajñūhún de ya, chí coto ndee de ya cuní de:

³⁶ Maestro, ¿ndé ñin cúu jnūhun ndácu jniñu cánuú ndasí gá nuū tútu ley? achí de.

³⁷ Te ni cahān Jesús jíin de:

Coo manī ndasí ró jíin máá Jítóho rō Yaā Dios, nde jnāā ndasí ró sáha ró ndihí jeē cúsiñ ni yā, nde jíin ini jíin ánuá rō, jíin ñíí jeē níjnūnī rō, achí tutu. ³⁸ Yāha cúu jniñu ndácu ya jeē kujéhu ga te cánuú ndasí gá. ³⁹ Te jniñu uū jeē ní ndacu ya, suni súcuan cáhān: Cundáhú ni rō jnāhan ró nájnūhun cúndáhú ni rō maá ró. ⁴⁰ Te chíji ndíndúú jnūhun yáha ní quenda ndihí ley jeē ní tee Moisés, jíin ndihí jeē ní castéén tēe ni canacani jnūhun Yaā Dios, achí yá.

Siquī jeē cúu Cristo sēhe yucūn David

(Mr. 12.35-37; Lc. 20.41-44)

⁴¹ Te níní cáyūcu tútú gá tēe fariseo un, te Jesús ni ca-jnūhun yá de:

⁴² ¿Nde se cájeni ni rō siquī Cristo? ¿Sēhe ndé yúcūn cúu ya?

Te ni cacahān de:

Sēhe yucūn David, achí de.

⁴³ Te ni cahān yā jíin de:

Núu súcuan ¿te ndese cúu jeē David ni cahān de Jitoho de ya, ni sáha Espíritu Santo nde jenahán? Chi ni cahān de:

⁴⁴ Máá Jítóho yō Yaā Dios ni cahān yā jíin Jítóho rī, Yaā quiji:

Cucōo ró lado váha ri nuū kujéhu ró, te na sáha ri jeē quende rō poder tāca jeē cájito uhū rohó.

Achí Yaā Dios. Achí David. ⁴⁵ Te núu sēhe yucūn David cúu Cristo, ¿te ndese cúu jeē ni cáhān de jeē Jítóho de cúu ya? achí yá.

⁴⁶ Te ni ñin de tu ní cúu stió cuñíí cuiñi de jnūhun nuū yā. Te nde quivī ún tuá ni ñin de ní chūndeyí ni de ca-jnūhún de ya.

Jeē ni cáhān yā jeē iyó cuéchi de jíjnāhan de

(Mr. 12.38-40; Lc. 11.37-54; 20.45-47)

23 Yūcuán na te ni cahān Jesús jíin ñáyuu jíin tēe cáscuáha jíin yá:

² Tēe castéén tutu ley Yaā Dios jíin tēe grupo fariseo, cájeni ni de jeē ndíso jniñu de jeē steén de ley jeē ní jéhe ya nuū Moisés. ³ Núu súcuan te cuatáhú ró te squícu ró táca jéé cándacu de nuū rō. Te ma sáha ró nájnūhun cásaáha máá de. Chi cácahān-ni de, te tu cásquícu de. ⁴ Chi suni castéén de tāca ley ni catava maá de jeē yíí sáha, te cátee de siquī ñáyuu, te tu cá-cundeyí i squícu i. Te máá de jíjnāhan de, chi ni ñin xinī ndáha de tu cáscánda de jeē squícu de. ⁵ Te máni siquī jeē na cuájnuhún ñáyuu de cúu ndihí jeē casáha de. Chi cánujnahan ni de cuhni de cuehē jnūhun tutu ií jneē de jíin ndaha de. Te suni cáscáani ga de yuhvā yusáhma de jeē steén jeē cácujehu ga de vésú inga ñáyuu. ⁶ Te cánujnahan ni de cucōo de nuū silla yíñuhún gá nuū cáyeji ñáyuu vico, jíin silla yíñuhún gá

ini vehe ií sinagoga. ⁷ Te suni cánujnahan ni de jeē cahán yíñuhún ñáyuu jíin de nuū calle, jíin jéé cahán i maestro jíin de.

⁸ Te máá ró jíjnāhan ró, ma cuáha ró jnūhun jeē cahán ñáyuu maestro jíin ró. Chi ñnuú cácuu ndihí ró jéé cácuu ró hermano, te iyó ñin-ni Maestro rō jeē cúu ruhū, Cristo. ⁹ Te ma chíñuhún ró ni ñin tēe ñayiví yáha jeē cahán rō padre jíin de. Chi iyó ñin-ni Tátá rō jíjnāhan ró, Yaā ndeé andiví. ¹⁰ Te suni ma cuáha ró jnūhun jeē cahán i jitoho jíin ró. Chi iyó ñin-ni Jitoho rō, te suu cúu ruhū, Cristo. ¹¹ Te tēe mēhñu ró jíjnāhan ró jeē jejniñu nuū jnāhan, suu de cúu jeē kujéhu ga. ¹² Chi tēe jeē sajehu de máá de, sa ndululí de. Te tēe jeē sálulí de máá de, sa ndujéhu de.

¹³ Nacā xeñ ndoho rōhó tēe castéén tutu ley jíin rōhó tēe fariseo, chi tēe stáhú-ni cácuu ró. Chi cájesi rō jeē quiví ñáyuu ndaha Yaā andiví jéé ndacu ya jniñu nuū i. Chi tu quívicoo máá ró, ni tu cájēhe ro jnūhun quívicoo ñáyuu nducú quiví.

¹⁴ Nacā xeñ ndoho rōhó tēe castéén tutu ley jíin rōhó tēe fariseo, chi tēe stáhú-ni cácuu ró. Chi cáquende rō vehe ñahan ní caquendōo ndáhú. Yūcuán na te cájicān tahú nahán ró návāha cani ni ñáyuu jeē tú na cuéchi ró. Jeē yúcuan xeñ gā ndoho ró castigo.

¹⁵ Nacā xeñ ndoho rōhó tēe castéén tutu ley jíin rōhó tēe fariseo, chi tēe stáhú-ni cácuu ró. Chi ñíí ñuhun íchi jíin ñíí mar cájica cuu ró cánducú ró ñin ñáyuu scandíje ró sáhān maá ró. Te núu ni candíje i, te casáha ró jéé vihyá gā cúu cuéchi i jeē quihín i infierno vésú maá ró.

¹⁶ Nacā xeñ ndoho ró, chi cácuu ró nájnūhun tēe cuáá jéé steén ichi nuū ñáyuu. Chi cácahān rō: Núu ndé tēe jéjnūhun téyí de, te núu cahān de jeē Yaā Dios jeē ndeé ini templo na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíí oro jeē iyó ini templo, na cuáha ya castigo núu ma squícu de, yūcuán na te cánuú squícu nahín de, cácahān rō. ¹⁷ Tēe cánéé tēe cuáá cácuu ró jéé castívi ró jnūhun cácahān rō. ¿Ndeé ñin cúu jeē cu-jéhu ga, á oro un chí Yaā Dios jeē ndeé ini templo jeé sáhíi oro un? ¹⁸ Te suni cácahān rō: Núu ndé tēe jéjnūhun téyí de, te núu cahān de jeē Yaā Dios jeē chíí altar na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíí ndajniñu jeé cásocō nuū altar, na cuáha ya castigo núu ma squícu de, yūcuán na te cánuú squícu nahín de, cácahān rō. ¹⁹ Tēe cánéé tēe cuáá cácuu ró jéé castívi ró jnūhun cácahān rō. ¿Ndeé ñin cúu jeē cu-jéhu ga, á ndajniñu yúcu nuū altar, chí Yaā Dios jeé sáhíi yā ndajniñu ún? ²⁰ Núu súcuan te tēe jéjnūhun téyí, te núu ndácunehen de Yaā Dios jeé chíí altar, núu súcuan te nde jíin ndajniñu yúcu nuū altar ndácunehen de. ²¹ Te tēe jeé jéjnūhun téyí, te núu ndácunehen de templo, núu súcuan te nde jíin Yaā Dios jeé ndeé ini templo ndácunehen de. ²² Te tēe jéjnūhun téyí, te núu ndácunehen de andiví, núu súcuan te suni ndácune-

hen de mesa Yaā Dios te nde jíin máá Yaā Dios jeē ndeé nuū mesa un.

²³ 'Nacā xeēn ndoho róhó tée cástéén tutu ley jíin róhó tée fariseo, chi tēe stáhú-ni cácuu ró. Chi casáha ró úxī uxī nuhnī tamīnú jíin yucū anís jíin yucū comino, te casocō rō ñn ñn siquī tāca úxī un núu Yaā Dios. Te cástóo ró jnúhun cánuú ndasí gá nuū ley, suu jeē cáca ndaā rō, jíin jéē cundáhú ni rō jnáhan ró, jíin jéē candí-je ró. Tāca jéē yáha cánuú sáha ró núu, te suni ma stóo ró jéē socó rō tāca yúcū ún. ²⁴ Cácuu ró nájnuhun tēe cuáá jéē steén ichi nuū ñayuu. Chi cásquicu ró ñn jeē lulí gá un, te cástóo ró jéē cánuú gá. Te suu cúu nájnuhun jeē cātava rō chūcún ndíhī jeē ñúhun nuū ndúxi, te cácocó ró ñn quitī cáhnu jeē naní camello.

²⁵ 'Nacā xeēn ndoho róhó tée cástéén tutu ley jíin róhó tée fariseo, chi tēe stáhú-ni cácuu ró. Chi nájnuhun jeē cánacate ró yátā vaso jíin yátā cohó. Te ichi íni rō chi ñúhun máni máá jnúhun cuíhná jíin jnúhun ndíyo ni. ²⁶ Tēe cuáá cácuu ró, fariseo. Xíhna gā sáha ró jéē coo ndoo ini anuá rō, te yūcuán na te suni coo ndoo tāca jéē casáha ró jéē cájito ñayuu nuū.

²⁷ 'Nacā xeēn ndoho róhó tée cástéén tutu ley jíin róhó tée fariseo, chi tēe stáhú-ni cácuu ró. Chi cándāa ró nájnuhun vehe ndíyi nuū panteón jeē cáyaa. Chi ichi yátā jító luu, te ichi íni ñúhun chitú yiqui ndíyi jíin tāca jéē tehyú. ²⁸ Te súcuu cácuu máá ró, chi ichi yátā rō casáha ró jeē tēe ndaā cácuu ró núu ñayuu. Te ichi íni rō ñúhun chitú jnúhun stáhú-ni jíin jnúhun néé.

²⁹ 'Nacā xeēn ndoho róhó tée cástéén tutu ley jíin róhó tée fariseo, chi tēe stáhú-ni cácuu ró. Chi casáha ró vehe siquī nuū yéndūji ndíyi jíi rō, tēe ni canacani jnúhun Yaā Dios nde jenahán. Te casáha luu ró vehe siquī nuū yéndūji tāca tēe ni iyo ndaā. ³⁰ Te cácahān rō: Núu jeē suni yúcu yó tiempo jeē ní cotecu ndíyi jíi yō, te ma squívī nduu yō jíin de jeē cáhni yō tēe ni canacani jnúhun Yaā Dios, achí ró. ³¹ Te súcuu cácahān ndaā rō jeē máá ró cácuu yucūn ñayuu ni cajehni tēe ni canacani jnúhun ya. ³² Núu súcuu te tāca cuéchi jeē ní casquéjéé ndíyi jíi rō, máni un casáha ga máá ró.

³³ 'Va sēhe coō cácuu ró, chi xeēn rō nájnuhun coō. ¿Ndese cācu ró jéē ma jnahnú ndetū rō quingoo ró infierno? ³⁴ Núu súcuu te tají rí tāca tēe nacani jnúhun Yaā Dios nuū rō, jíin tāca tēe ndíhí jéē castéén jnúhun ya. Te sava de cahni rō, te sava de cata caa ró jicā cruz. Te sava ga de caní ró de ini tācá vehe iī sinagoga, te scúnu ró de quingoo de tācá ñuu. ³⁵ Te súcuu te condee cuéchi siquī máá ró jeē ní cajehni jíi rō tāca tēe ndaā, xíhna gā nde Abel tēe ndaā, te nde Zacarías sēhe Berequías, tēe ni cajehni de ini templo sava mēhñu cuarto iī jíin altar. ³⁶ Jendaá cahán rí jíin ró jeē tāca cuéchi yáha condee siquī ñayuu iyó vijna.

Jeē cucuíhyá ni yā jító ya ñuu Jerusalén

(Lc. 13.34-35)

³⁷ 'Róhó ñuu Jerusalén, jéhni rō tēe cánacani jnúhun Yaā Dios, te jéhe ro yúu xinī tēe tájí Yaā Dios vējicoo nuū rō. Te cuehē jínu ni cuni rí nastútú rí sēhe ró, nájnuhun ndují jéē nastútú tī sēhe tī chíi ndijēn tī, te tu ní cúní rō. ³⁸ Núu súcuu te vijna te stóo uun na rí rohó jíin sēhe ró. ³⁹ Chi cáhán rí jíin ró jéē ndé vijna te ma cóto cuitī gā rō nuū rí, chi nde quiji quivī jeē cahán sēhe ró: Yōhyo vāha Yaā cúu Yaā véndíji jíin jniñu máá jítóho yō Yaā Dios, achi i. Achí yá.

Jeē ní cachi yā jeē náā templo

(Mr. 13.1-2; Lc. 21.5-6)

24 Te ni quenda Jesús ini templo cáhnu cuahān yā. Te ni quecoo tēe cáscuáha jíin yá, te ni cacahān de jíin yá siquī tācá vehe jeē ndejnáhan jeē cúu máá templo un. ² Te ni cahān yā jíin de:

Tāca jéē cájito ró yáha, jendaá cahán rí jíin ró jeē quiji quivī jeē ma cóso jnáhan ga ni ñn yuū, chi ndíhī jnanū. Achí yá.

Na seña coo nuū cuácuyajni ndíhī ñayiví

(Mr. 13.3-23; Lc. 21.7-24; 17.22-24)

³ Te ni jehēn yā jíin tēe cáscuáha jíin yá nde yucu Olivos, te ni cucōo ya yūcuán. Te ni quecoo de nuū yā, te ni cacajnuhun sñn de ya:

Castūhun ní ndé quivī coo tāca jéē ní cachi ní jéē coo. ¿Te na seña coo núu ni cuyajni quivī ndíji ní jíin jéē jínu ñayiví? áchí de.

⁴ Te ni cahān Jesús:

Coto ró jéē ma stahú ni ñn de róhó. ⁵ Chi quijicoo cuehē tēe jeē stahú jíin síhví rí. Máá rí cúu Cristo, achi de. Te súcuu stáhú de cuehē ñayuu. ⁶ Te nihīn rō jnúhun jeē tāca lado iyó guerra, chí je yajni coo guerra. Te ma yūhu ró, chi cánuú coo súcuu. Te ni ná tu jinū quivī ndíhī ñayiví. ⁷ Chi ndonda nación siquī inga nación, te ndonda ñuu siquī inga ñuu jeē cuajnáhan. Te coo jnamā jíin cuéhyī xeēn. Te cháha chúcuu jnāa. ⁸ Te tāca jéē yáha cácuu jnúndóho quejéé xíhna ñúhún gá.

⁹ Yūcuán na te nastúu i róhó jíin náhan ró jéē stóho i róhó te cahni i róhó. Te ndíhī ñayuu quitī ni i nuū rō jeē siquí ruhū. ¹⁰ Te quivī ún chi cuehē ñayuu candíje caca yátā i, te quitī ni i nuū jnáhan i, te nastúu jnáhan i. ¹¹ Te canecoo cuehē tēe stáhú, te cahān de jeē jnúhun Yaā Dios cánacani de, te stáhú de cuehē ñayuu. ¹² Te nducuehē jniñu néé, te jeē yúcuu cuehē i ma cóo manī gā i. ¹³ Te ñayuu cuiñi nihīn jíin jnúhun rí nde quivī jínu, ñayuu ún chi cācu. ¹⁴ Te jnúhun yáha síquī ndese ndácu Yaā Dios jniñu, cuitē núu nñí cáhnu ñayiví, návāha cuni ñayuu tācá nación. Yūcuán na te jínu ñayiví.

¹⁵ Te Daniel, tēe ni nacani jnūhun Yaā Dios, ni tee de jnūhun ñn tēe néé jēé quíji. Te róhó jēé cácahu tutu ún, na jécūhun ni rō. Chi ñn quiví te cuni rō jeē sáha ndevāha de jeē stívi de tācá ndajniñu iñ ini templo, te cuiñi de ini lugar iñ. ¹⁶ Te núu cuni rō jeē súcuan cúu, te ñayuu cáyūcú región Judea, na cúnu i caa i yucu quingoo i. ¹⁷ Te ñayuu cáyūcu núu quēhe, ma ndívi i ini vehe jeē quénehen i ndajniñu i, chi cánuú cunu yachí i návāha cácu i. ¹⁸ Te ñayuu cáhīin nuū ítu, ma ndíji i vehe jeē quíhin i sahma i. ¹⁹ Te quiví ún nacā jeē ndahú ñahan cáñuhun sēhe jíin ñahan cándeca yiquín, chi ma cúnihin ña cunu yachí ña. ²⁰ Te cacān tahu rō jeē ma quíji jnūndóho un jēé cunu ró máá tiempo cúun yuhvā ni quiví ndétátú. ²¹ Chi jeē quejéé un te coo cuehē jnūndóho xeēn, jeē ná tu coo súcuan nde quiví ní jecōo ñayiví te nde vijna. Te jeē ndíhi jnūndóho ún te ni ma cóo ga jeē súcuan. ²² Te núu tú nastíyi Yaā Dios tiempo jnūndóho ún, te ni ñn ñayuu ma cácu cuiñi i. Te jeē síquí ñayuu cácañdije jeē ní nacāji ya, jeē yúcuan nastíyi ya tiempo un.

²³ Núu súcuan te núu ñn ñayuu cahān jíin ró: Yāhá condēhe ró íne Cristo, chí: Yūcuán condēhe ró íne ya, achi i, te ma candíje ró jēé cahán i. ²⁴ Chi canecoo tēe cástáhú jēé achi de jeē Cristo cúu de, chí achi de jeē tēe nácani jnūhun Yaā Dios cúu de. Te sáha de jniñu jéhuu jeē naa ni ñayuu coto i, návāha stáhú de nde maá ñayuu ní nacāji ya, te núu na cúu. ²⁵ Je ni castūhun rí nuū rō vijna nde ná tu coo. ²⁶ Núu súcuan te núu cahān ñayuu jíin ró: Cuácondēhe ró, chi nde nuū ññuhun téhé íne ya, achi i, te ma quihín rō condēhe ró. Chí núu cahān i: Nehen condēhe ró, chi ini vehe yāha íne ya, achi i, te ma candíje ró jíinahan ró. ²⁷ Chi nájnūhun jeē ndíndēe sáha taja te cúndijin nde ichi núu cáne niāndii jíin ndé ichi núu quée niāndii, suni súcuan coo quiví ndiji ruhū, Yaā ní nduu tēe, chi ndíhi ñayuu coto. ²⁸ Te nájnūhun jeē cutútú téji ndé-ni cúu nuū catú quití ní jíhi, suni súcuan coo tāca jēé ni cáhān rí ndé-ni cúu-ni nuū cáhīyo ñayuu.

Ndese coo quiví ndiji Yaā ní nduu tēe

(Mr. 13.24-37; Lc. 21.25-33; 17.26-30, 34-36)

²⁹ Yūcuán na te núu ni ndíhi tāca jnūndóho quiví ún, te cojnúu níāndii, te yoō ma ndíi gā. Te ñingoo quimí andiví. Te tāca jēé íin andiví chi quisí i. ³⁰ Yūcuán na te coto ñayuu nuū maá rí, Yaā ní nduu tēe, ndiji ri ichi ándiví. Te ndahyū ñayuu tācá nación ññ cáhnu ñayiví. Te coto i nuū ruhū, Yaā ní nduu tēe, ndiji ri jíin vícō andiví, te condiso ri cuehē poder, te yōhyo luu cujéhuu ri. ³¹ Te tají rí ndajéhé rí quingoo, te tiví ñihin ya trompeta. Te quinastútú yá ñayuu ní nacāji ri ndicúún lado ñayiví, nde ñn lado ñayiví jíin ndé inga lado.

³² Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihní. ³³ Te suni súcuan núu ni cájini rō jeē ní quejéé cúu tācá jniñu jeē ni cáhān rí, yūcuán na te na jécūhun ni rō jeē ní cuyajni quiví ndiji ri, te yachí

coo. ³⁴ Jendaá cahán rí jíin ró jeē ma cúu ndíhi ñayuu jeē cóto jnūndóho ún, chi nde squícu ndíhi jniñu ún.

³⁵ Andiví jíin ñayiví chi naa, te tāca jnūhun cáhān rí chi ma náa, chi ndíhi squícu.

³⁶ Te quiví jíin hora jeē ndíji ri, tú ni ñn ñayuu jiní, ni máá ndajéhé cáhīyo andiví, ni máá rí, Sēhe Yaā Dios. Chi máá ñn ni Tátá rí Yaā Dios cúu jeē jiní.

³⁷ Chi nájnūhun ni cuo quiví ni íyo Noé, suni súcuan coo quiví ndiji ruhū, Yaā ní nduu tēe. ³⁸ Chi quiví ún, nde ná tu cuun saū xeén, te cáyeji i cájini i, cándāha i, te cájēhe i sēhe síhí i jeē nándāha, nde ni jinū quiví jeē ni quívi Noé ini barco cáhnu jeē naní arca. ³⁹ Te tu ní cácañdije ñayuu jeē cuun saū xeén, te ni cuun, te ni ndaa ndute ni cajihí ndíhi i. Te suni súcuan coo núu na ndíji ruhū, Yaā ní nduu tēe. ⁴⁰ Te quiví ún cone uū tēe sájniñu nuū ítu. Te ñn de naquihin ri, te inga de ndōo. ⁴¹ Te coo uū ñahan jeē ndíco cáhnu, te ñn ña naquihin ri, te inga ña ndōo. Súcuan cuo jeē sava ñayuu naquihin ri te sava i quendōo, chi tu ní cácañdije i.

⁴² Núu súcuan te ndito na cóo ni rō, chi tu cájini rō na quiví ndiji Jitoho rō. ⁴³ Te na chūhun ni rō jeē cahán jnūhun yátá yáha: Tēe chíi vehe, núu jeē jiní de na hora quiji ñacuñhá, te condito de, te ma cuáha de jnūhun sácuñhá ndajniñu vehe de núu. ⁴⁴ Te róhó jíinahan ró, suni súcuan coo tūhva ró, chi máá hora jeē tú na vé cájini ni rō, te ndíji ruhū, Yaā ní nduu tēe.

Jnūhun yátá síquí mozo

(Lc. 12.41-48)

⁴⁵ Núu súcuan te coo ró nájnūhun ñn mozo jeē ndíto xiní te squícu vāha. Te máá patrón ni jeni de mozo un jēé cóto i ñayuu vehe de, návāha scáji i máá hora. ⁴⁶ Te yōhyo ndetū mozo un jēé núu ni ndee patrón, te cuni de jeē súcuan squícu vāha i. ⁴⁷ Jendaá cahán rí jíin ró jeē cani de mozo un jēé cóto i ndíhi ndajniñu de. ⁴⁸ Te núu mozo sáha néé cúu i, te jéni ni i jeē ma ndíji yachí patrón i, ⁴⁹ te quejéé i cani i jnāhan mozo i, te caji i coho i jíin tēe cáñajini, ⁵⁰ núu súcuan te ndee-ni patrón quiví jeē tu ndétu i jíin hora jeē tú na vé jéni ni i. ⁵¹ Te stóho xeēn de i, te squívi de i nuū cáhīin tēe stáhú-ni. Te yūcuan ndáhyū i te nacayihí yuhu i jeē ndoho xeēn i. Achí yá.

Jnūhun yátá síquí uxí sūchi síhí

25 Te suhva cúu jeē ndácu Yaā andiví jniñu nuū ñayuu: Cúu nájnūhun ñn vico nándāha. Te ni íyo uxí sūchi síhí jeē ní caquihin i linterna cándaha i, te ni quendacoo i cuajnahān i ñn tēe nandāha. ² Te uhūn i chí tú ndito xiní i, te uhūn i chí ndito xiní i. ³ Te sūchi tú ndito xiní, cándaha i linterna i, te tu cándaha i petróleo jeē náchuhun i. ⁴ Te sūchí ndito xiní, chí cándaha i botella petróleo jíin linterna i. ⁵ Te níni cúcuéé quiji tēe nandāha ún, te ni quee māñhá, te ni caquixí ndíhi i. ⁶ Te nuū ní cuo sava ñuú, te ni cajini i jeē cácana jee: Je vėjí tēe nandāha. Cuángoo quijnahan rō de jíinahan

ró, áchí. ⁷ Yūcuán na te tāca súchi sǎhí un ní candonda i, te ni casátūhva i linterna i. ⁸ Te sūchi tú ndito xinī, ni cacahān i jíin súchi ndito xinī: Cuāha jecu petróleo nuū rī jijnáhan ró, chi cuandahvā linterna rī, áchí i. ⁹ Te ni cacahān sūchí ndito xinī: Ma cúu, chi ma cánda jeē cúu máá rí jíin máá ró. Vāha ga quingoo ró núu cúyāhu, te cuaan ró jéē cúu máá ró. Achí i. ¹⁰ Te níni cuángoo i cuaan i, te ni quee-ni tēe nandāha. Te sūchi cáhīyo tūhva un, ní quǎvicoo i jíin de vico nándāha de. Te ni ndihyū yehyí. ¹¹ Te ni cunúu, te ni quecoo uhūn gā sūchi sǎhí un. Te ni cacahān i jíin tēe nándāha: Nune ní yéhyí na quǎvicoo ná, áchí i. ¹² Te ni cahān maá de: ¿Ndé nuū véjicoo ró? Chi tu jíin rī rohó, áchí de. Achí yá.

¹³ Yūcuán na te ni cahān yā:

Núu súcuan te ndito coo ni rō, chi tu cájini rō na quivī na hora ndiji ruhū, Yā ní nduu tēe. Achí yá.

Jñuhun yátá sǎquī tēe ní jēhe núu xūhun núu tāca mozo

¹⁴ Te suhva cúu jeē ndácu Yā andiví jniñu nuū ñayuu: Cúu nájñuhun ñn tēe jeē quihīn jicá de inga ñuu. Te nde ná tu quihīn de te ni cana de mozo de jijnáhan, te ni jēhe núu de xūhún de nuū i, jeē na sájñiñu i jíin návāha nducuehē.

¹⁵ Te nuū ñn i ni jēhe de uhūn mil xūhun cáa. Te nuū inga i ni jēhe de uū mil. Te nuū inga i ni jēhe de ñn mil. Súcuan ni jēhe de, chi jíin de nasaa canda ñn ñn i sájñiñu i jíin. Yūcuán na te ni quihin de ichi cuahān jicá de. ¹⁶ Te mozo jeē ní quihin uhūn mil xūhún, ni sájñiñu de jíin. Te ni nihīn de uhūn gā mil síquī. ¹⁷ Te mozo jeē ní quihin uū mil xūhún, suni ni nihīn de uū gā mil síquī. ¹⁸ Te mozo jeē ní quihin ñn mil xūhún, ni jehēn de ni jete de yaū, te ni chisāhí de xūhún patrón de.

¹⁹ Te ni yāha cuehē tiempo, te ni ndee patrón mozo un jijnáhan. Te ni nandacān de cuenta nuū i. ²⁰ Te ni quee mozo jeē ní quihin uhūn mil xūhún un, te ni nacuāha de xūhún un núu patrón de jíin úhūn gā mil jeē ni níhīn de síquī. Te ni cahān de: Ni jēhe ní úhūn mil nuū ná, te yāha íyó úhūn gā mil jeē ni níhīn na síquī. Achí de. ²¹ Te ni cahān patrón jíin de: Iyó váha núu súcuan. Yōhoyo váha mozo cúu ró jéē squícu váha ró. Chi váha ni squícu ró ñn jniñu lúli-ni, te vijna te cuāha ri jniñu jéhnu ndacu ró. Te quǎvī ró núu cusíñi ni rō jíin rí. Achí de. ²² Yūcuán na te ni quee mozo jeē ní quihin uū mil xūhún un. Te ni cahān de: Ni jēhe ní uū mil nuū ná, te yāha íyó uū gā mil jeē ni níhīn na síquī. Achí de. ²³ Te ni cahān patrón jíin de: Iyó váha núu súcuan. Yōhoyo váha mozo cúu ró jéē squícu váha ró. Chi váha ni squícu ró ñn jniñu lúli-ni, te vijna te cuāha ri jniñu jéhnu ndacu ró. Te quǎvī ró núu cusíñi ni rō jíin rí. Achí de. ²⁴ Te ni quee mozo jeē ní quihin ñn mil xūhún un, te ni cahān de jíin patrón: Je jíin na níhīn jéē tēe xeēn cúu ní. Chi cuehē gā cuní ni vésú jeē cúu sáha mozo ni, te cuehē gā nandacān ní vésú jeē ni jéhe ní.

²⁵ Te jeē yúcuan ní yūhu ná, te ni jehēn na ní chisāhi ná

xūhun ní chíji ñuhun. Te yāhá na nácuāha na xūhun ní. Achí de. ²⁶ Te ni cahān patrón jíin de: Mozo cuxí cúu ró te máni jniñu néé sáha ró. Chi jéni ni rō jeē cuehē gā cuní rī vésú jeē cuu sáha mozo rī, te cuehē gā nandacān rī vésú jeē ni jéhe ri. ²⁷ Núu jeē ni chūne ró xūhun rí nuū banco nuú, te jeē ní ndee rī te naquihin rí xūhun rí nde jíin séhe xūhun núu. Achí de jíin i. ²⁸ Te ni cahān de jíin táca gá mozo de: Núu súcuan te quende rō mil xūhun jíñā nuū i, te cuāha ro núu mozo névāha uxí mil. ²⁹ Chi ñayuu jeē névāha, sa quiji ga nuū i, te coneváha cuehē i. Te ñayuu jeē tu névāha, sa cujiyo-ni vésú jecu jeē névāha i. ³⁰ Te mozo yāha jéē tu sájñiñu váha, quenehen ró i na quihín i nuū quéhe nuū néé. Te yúcuan ndáhyū i te nacayǎhí yuhu i jeē ndoho xeēn i. Achí patrón un.

Síquī jeē cóo juicio tācá nación

³¹ Te ni cahān gā yā:

Ñn quivī te ndiji máá Yā ní nduu tēe, te cuu ya Rey nuū ñayuu. Te tācá ndajéhe yā cuiñi ñí xiin ya. Te cucōo ya mesa nuū ndácu ya jniñu, te yōhoyo luu cujéhnu ya. ³² Te ndutútú ñayuu tācá nación nuū yā. Te sásñn ya i jijnáhan i, nájñuhun cúsñn lanchi jíin ndixúhú sáha tēe ndíto ti. ³³ Te ñayuu váha jeē cúu nájñuhun lanchi, chucú yá i lado váha ya. Te ñayuu neé jeē cúu nájñuhun ndixúhú, chucú yá i lado jecó yá.

³⁴ Yūcuán na te cahān Rey jíin ñayuu cáhīn lado váha ya: Nacā ndetū rō jeē ni sáha Tátá rī jíin ró. Nehen quǎvicoo ró núu ndácu ró jniñu. Chi nde quivī ní jecōo ñayǎvī te je ni sátūhva ya nuū ndacu ró jniñu. ³⁵ Chi ni jíi rī sōco, te ni cajēhe ro jéē ní yeji rī. Ni jichí rī ndute, te ni cajēhe ró jéē ní jiji ri. Ni quiji ri nde ñuu jicá, te ni cajēhe núu ró vehe ni ndōo ri. ³⁶ Ni cumanī sahma ri, te ni cajēhe ró. Ni cocuhū rī, te ni jecōndēhe ró ruhū. Ni ine ri vecāa, te suni ni jecōndēhe ró ruhū. Súcuan cahān yā jíin ñayuu cáhīn lado váha ya. ³⁷ Yūcuán na te cahān ñayuu váha un jíin yá: ¿Na quivī ní cajito ná níhīn jéē jíi ni sóco, te ni cajēhe na jéē ní yeji ní, chí jéē jichí ni ndute, te ni cajēhe ná ní jiji ní? ³⁸ ¿Te na quivī ní cajito ná jéē ní quiji ní ndé ñuu jicá, te ni cajēhe núu ná vehe ni ndōo ní, chí jéē cumanī sahma ní, te ni cajēhe ná? ³⁹ ¿Te na quivī ní cajito ná jéē cuhú ni, chí jéē íne ní vecāa, te ni jecōndēhe ná níhīn? achi i. ⁴⁰ Yūcuán na te cahān Rey jíin i: Jendaá cahān rī jíin ró jéē ná ni casáha ró súcuan jíin ñn tācá hermano rī jeē cácandíje, vésú ñayuu núu ga cúu i, te nuū maá rí ni casáha ró.

⁴¹ Yūcuán na te suni cahān Rey jíin ñayuu cáhīn lado jecó yá: ñayuu jnahnū ndetū cácuu ró. Cuijiyo quingoo ró núu ñuhún jeē cayú ñí cáni, nuū iyó túhva cone jex-eén jíin táca táchí jeē cájejníñu nuū. ⁴² Chi ni jíi rī sōco, te tu ní cajēhe ro jéē cáji rī. Ni jichí rī ndute, te tu ní cajēhe ro jéē coho ri. ⁴³ Ni quiji ri nde ñuu jicá, te tu ní cajēhe núu ró vehe ndōo ri. Ni cumanī sahma ri, te tu ní cajēhe ró. Ni cocuhū rī, ni ine ri vecāa, te tu ní jecōndēhe ró ruhū. Súcuan cahān yā jíin ñayuu cáhīn la-

do jecó yá. ⁴⁴ Yūcuán na te cahān ñayuu un jíin yá: ¿Na quiv̄ ní cajito na níhín jéē jíi ni sóco, chí jéē jichí ni ndute, chí jéē ní quiiji ní ndé ñuu jicá, chí jéē cúmanī sahma ní, chí jéē cuhú ni, chí jéē íne ní vecāa, te tu ní cájēhe na jéē cúmanī nuū ní? Achi i. ⁴⁵ Yūcuán na te cahān yā jíin i: Jendaá cahán rī jíin ró, jeē tu ní cásáha ró súcuan jíin ni ñn tǎcá hermano rī jeē cácanđije, vēsū ñayuu núu ga cúu i. Núu súcuan te suni nuū maá rí cúu jeē tu ní cásáha ró, achi yā. ⁴⁶ Yūcuán na te quingoo ñayuu un núu ndóho i ñíí cáni. Te ñayuu váha un quívicoo i nuū cótecu i ñíí cáni. Achí Jesús.

Jeē ní casquijnáhan de jnūhun jeē jñi de Jesús

(Mr. 14.1-2; Lc. 22.1-2; Jn. 11.45-53)

26 Te nuū ní ndih̄i ni cahān Jesús tǎca jnūhun yáha, te ni cahān yā jíin tēe cáscuáha jíin yá:

² Je cájini rō jeē uū na quiv̄ te coo vico pascua. Te ruhū, Yāā ní nduu tēe, nastúu i ruhū jeē cúu rī jicā cruz, achí yá.

³ Yūcuán na te sutū cácujuh̄nu, jíin tēe cástéén tutu ley, jíin tǎca tēe jéhn̄u jeē cándacu jniñu nuū ñáyuu hebreo, ni candutútú de ini patio vehe palacio maá sūtú cujuh̄nu ga jeē naní Caifás. ⁴ Te ni candajnūh̄n de ndese jñi de Jesús jíin jnūhun stáhú, te cahni de ya.

⁵ Te ni cacahān de:

Ma jñi yó de máa quiv̄ víco, chi ndonda ñayuu siqūi yō, achí de.

Jnūhun ñahan jeē ní chuhun perfume xinī yā

(Mr. 14.3-9; Jn. 12.1-8)

⁶ Te íne Jesús ñuu Betania vehe Simón, tēe ni ndoho cuehȳi stehyú. ⁷ Te ni quee ñn ñahan nuū yā, ndáhá ña ñn frasco yuū luu jeē ñúhun aceite perfume jeē yóhyo yahu ndéé. Te ni chuhun ña xinī yā níni jéē yéji yā staā. ⁸ Te ni cajito tēe cáscuáha jíin yá, te ni caquit̄i ni de, te ni cacahān de:

¿Najehē cúu jeē náā saá-ni perfume jñiñá? ⁹ Chi cuu xícó yahu yó núu, te cuāha yo xúhun núu ñáyuu ndahú. Achí de.

¹⁰ Te ni jini Jesús jnūhun cácahān de. Te ni cahān yā jíin de:

¿Naun cásáha ró jéē nácani uhū ni ñahan yáha? Chi ñn jniñu váha cúu jeē ni sáha ña jíin rí. ¹¹ Chi níni coyūcu ñáyuu ndahú jíin ró, te ruhū chi tuá condee rī jíin ró. ¹² Chi jeē ní chuhun ña perfume yáha ruhū, suu cúu jeē ni sātūhva ña ruhū nde quiv̄ quíndūji ri. ¹³ Jendaá cahán rī jíin ró jeē ñí cáhnu ñayūv̄i ndé-ni cúu nuū cuité jnūhun yáha jéē jnáma ri ñayuu, suni nacani i jnūhun jeē ni sáha ñahan yáha, návāha cocuhun ni ñayuu ña, achí yá.

Jeē ní nastúu Judas yā

(Mr. 14.10-11; Lc. 22.3-6)

¹⁴ Yūcuán na te ñn jeē ndihúxi uū tēe cáscuáha ún, naní de Judas Iscariote, ni jehēn de nuū sutú cácujuh̄nu. ¹⁵ Te ni cahān de jíin:

¿Nasaa cuāha ní núu ná, te na nastúu ná de nuū ní? achí de.

Te ni cajēhe ocō ux̄i xūhun plata nuū de. ¹⁶ Yūcuán na te nde quiv̄ un ní quejéé de ndúcú de modo ndese nastúu de ya nuū sutú jijnáhan.

Jeē ní jequin yā Cena yā

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Te máa quiv̄i jeē quejéé vico jeē cáyeji ñayuu pan jeē tú na levadura ȳhi, te ni quiijicoo tēe cáscuáha un núu Jesús. Te ni cacahān de jíin yá:

¿Ndé nuū cuní ni jéē quísatūhva ná cuxíni ní vico pascua? achí de.

¹⁸ Te ni cahān yā:

Cuángoo nde ñuu, vehe tēe jeē jé ni cacahān yō, te cahān rō jíin de: Achí máa Maestro jeē ní cuyajni quiv̄i cuu yā. Te vijna te caji yā vico pascua ini vehe ní jíin tēe cáscuáha jíin yá, achi rō. Achí yá.

¹⁹ Te tēe cáscuáha jíin yá, ni casáha de nájñūhun ni ndacu Jesús jniñu nuū de, te ni casátūhva de jeē cuxíni ya vico pascua.

²⁰ Te jeē cuácuaa, te ni quee yā, te ni cucōo ya mesa jíin ndihúxi uū tēe cáscuáha jíin yá. ²¹ Te níni yéji yā jíin de te ni cahān yā:

Jendaá cahán rī jíin ró jeē ñn rōhó nastúu ruhū vijna, achí yá.

²² Te ni cacucuíhyá ndasí ni de. Te ná ñn ná ñn de ni cacajnūh̄n de ya:

¿A sáña cúu? achí de.

²³ Te ni cahān yā:

Ñn rōhó jéē cáyeji cáhnu jíin rí ñn cohō, suu rō nastúu ruhū. ²⁴ Te ruhū, Yāā ní nduu tēe, jendaá cúu jeē quihín rī cuu rī, nájñūhun yósó jnūhun ri nuū tútu i. Te nacā xeēn ndoho tēe nastúu ruhū. Vāha ga núu tu ní cácu tēe un núu, achí yá.

²⁵ Yūcuán na te ni cahān Judas, tēe nastúu ya:

¿A sáña cúu, Maestro? achí de.

Te ni cahān yā jíin de:

Suu ró cúu, achí yá.

²⁶ Te níni jéē cáyeji de jíin yá, te ni quihin ya pan, te ni nacuatáhú yá, te ni tahú cuéchí yá, te ni jēhe ya nuū tēe cáscuáha jíin yá. Te ni cahān yā:

Caji rō jijnáhan ró, chi yāha cúu yiqui cúñu rī, achí yá.

²⁷ Yūcuán na te ni quihin ya ñn copa ndūxi uva, te ni nacuatáhú yá, te ni jēhe ya nuū de. Te ni cahān yā:

Coho jijnáhan ró. ²⁸ Chi yāha cúu ñiñ̄i rī jeē cuáha ri jeē cúu contrato jeé, te cati jeē ndundoo cuéchi cuehē ñayuu, te coo jnūhun cáhnu ni nuū cuéchi i. ²⁹ Te cáhán rī jíin ró jeē ndé vijna te ma cóho ga rī ndūxi ndehē uva yāhá, chi nde quiiji quiv̄i ndacu Tátá rī jniñu

ñí ñayíví, te sáá te coho tucu ri jíin ró jijnáhan ró. Achí yá.

Jeē ní cachi yā jeē yūhu Pedro cahān de jeē jiní de ya
(Mr. 14.26-31; Lc. 22.31-34; Jn. 13.36-38)

³⁰ Te ni jita ya ñn yaa íi jíin de jijnáhan de. Te ni quenda ya cuahān yā jíin de nde yucu Olivos. ³¹ Yūcuán na te ni cahān yā:

Ndivii rō nayūhu ró jeē siquí ruhū jecuāā vijna. Chi suhva je yósó jnūhun ri nuū tútu íi, ni cahān Yaā Dios: Cuāha ri jnūhun jeē cáhni ñayuu tēe ndíto lanchi, te lanchi un cuítē núu tī jeē yūhu tī, achí. ³² Te jeē nátecu rī, te xihna ruhū cosnūu rí quihīn rī región Galilea, te sáá te najinūcoo ró, achí yá.

³³ Yūcuán na te ni cahān Pedro:

Vēsú ndihī de na náyūhú de, te máá ná chi ma náyūhú cuítē ná, achí de jíin yá.

³⁴ Te ni cahān yā jíin de:

Jendaá cahán rī jíin ró jeē jecuāā vijna, nde ná tu cana líhli, te yūhu ró jeē jññ ñayuu rohó, te unī jíinu cahān rō jeē tu jíin rō ruhū, achí yá.

³⁵ Te ni cahān Pedro jíin yá:

Vēsú núu cuu na jíin ní, te ma cahán cuítē na jēē tu jíin na níhín, achí de.

Te suni súcuan ni cacahān ndihī tēe cáscuáha jíin yá.

Jeē ni jicān tahú yā nuū huerto Getsemaní

(Mr. 14.32-42; Lc. 22.39-46)

³⁶ Yūcuán na te ni jinū Jesús jíin tēe cáscuáha jíin yá ñn lugar nuū naní Getsemaní. Te ni cahān yā jíin de:

Yāhá-ni cucōo ró, te na quíhín rī yūcuan cácan tahú rī, achí yá.

³⁷ Te ni jeca ya Pedro jíin ndīndúú séhe Zebedeo cuahān yā jíin de. Te ni quejéé yá cucuíhyá ndasí ni yā te cúxii ni yā jeē quíji jnūndóho siquí yā. ³⁸ Yūcuán na te ni cahān yā jíin de:

Yōhyo cúcuíhyá ni rī, te ndúcú sáha jeē cúu rī. Yāhá condetu ró te condito ró jíin rí.

³⁹ Te ni jica ya jecu gā, te ni jecuiñī yití yá ni jequin ya nuū yā nuū ñūhun, te ni jicān tahú yā suhva nuū Yaā Dios:

Tátá maá ná, núu cuu te tejiyo ní jnūndóho yáha jēē ma quíji siquí ná. Te nasūu jēē cuní maá ná, chi jeē cuní maá ní na cóo, achí yá.

⁴⁰ Yūcuán na te ni ndee yā nuū ndīnúní tēe cáscuáha jíin yá, te ni jito ya jeē cáquixī de. Te ni cahān yā jíin Pedro:

¿A tu ní cánda ró condito ró jíin rí vēsú ñn hora?

⁴¹ Coó ndito ni rō te cacān tahú rō jeē chindéé ñáhán yá rohó jēē ma sáha ró cuéchi jeē coto ndee jeneé rōhó. Chi cúní ndije ánuá rō squícu vāha ró, te yiquí cúñu rō chi tu fuerza, achí yá.

⁴² Te ni jehēn tucu ya vuelta uū, te suhva ni jicān tahú yā:

Tátá maá ná, te núu ma cúu cujiyo jnūndóho yáha jeē ma ndóho ná, te na cóo jeē cuní maá ní núu súcuan, achí yá.

⁴³ Te ni ndee tucu ya nuū de, te ni jito ya jeē cáquixī tucu de, chi yōhyo cájii de máhná. ⁴⁴ Te ni stóo ya de, te cuahān tucu ya cuacacān tahú yā vuelta unī. Te suni jnūhun yūcuan ní cahān yā. ⁴⁵ Yūcuán na te ni ndee tucu ya nuū de jijnáhan de, te ni cahān yā jíin de:

Vijna te cusū rō te ndetātu ró. Te je ni quee hora, te ruhū, Yaā ní nduu tēe, natūu ri te jññ tēe cáhīyo cuéchi ruhū. ⁴⁶ Ndocuiñī jijnáhan ró, chi je vēji tēe nastúu ruhū, te quihīn yō jíin de, achí yá.

Jeē ní cajññ de Jesús

(Mr. 14.43-50; Lc. 22.47-53; Jn. 18.2-11)

⁴⁷ Te sá cáhán gā yā súcuan, te ni quee-ni Judas, ñn jnáhan jeē uxí uū tēe cáscuáha jíin yá. Te vējicoo cuehē tēe jíin de, cándaha de espada jíin yujnu. Chi sutū cácujuhnu jíin táca tēe jéhu cándacu jniñu nuū ñayuu hebreo, ni catají tēe ún. ⁴⁸ Te Judas, tēe nastúu ya ún, je ni jēhe de ñn seña nuū tēe un jijnáhan, chi ni achi de:

Tēe jeē téchūhu rí un cúu. Te jññ ró jijnáhan ró, achí de.

⁴⁹ Te ni quee-ni de nuū Jesús, te ni cahān de:

Ta ni cuaa, Maestro, achí de.

Te ni techūhú de ya. ⁵⁰ Te ni cahān Jesús jíin de:

Amigo, ¿na jniñu vēji ró? achí yá.

Yūcuán na te ni jinūcoo tāca gá tēe ún, te ni cajññ de Jesús.

⁵¹ Te ñn tēe jeē cáhīn jíin Jesús, ni tava de espada de, te ni jehnde de sōho ñn mozo maá sūtū cujéhu ga.

⁵² Yūcuán na te ni cahān Jesús jíin de:

Nachuvāha espada rō, chi tāca jēē cájejnáhan jíin espada, suni jíin espada cuu. ⁵³ ¿Te á tu cájini rō jeē cuu cacān tahú rī nuū Tatá rī, te vijna ñúhún tají yá víhyá gā uxí uū mil ndajéhé andiví jeē jnama ruhū? ⁵⁴ Te núu súcuan, ¿te ndese cuu squícu jnūhun cáhán tutu íi jeē cánuú ndoho ri súcuan? achí yá.

⁵⁵ Yūcuán na te ni cahān yā jíin ñayuu cuehē ún:

¿Te va tēe cuíhná cúu ri jeē vējicoo ró jíin espada jíin yujnu jeē jññ ró rúhū jeē súcuan. Tāca quíñī ni cucōo ri jíin ró jijnáhan ró ini templo cáhnu, ni steén rī jnūhun, te tu ní cájññ ró rúhū. ⁵⁶ Te súcuan cása ha ró návāha na squícu jeē cahán tutu íi jeē ní catee tēe ni canacani jnūhun Yaā Dios, achí yá.

Yūcuán na te ndihī tēe cáscuáha jíin yá, ni castóo de ya, ni cajinu de cuangoo de.

Jeē ní indichi Jesús nuū junta tēe cácujuhnu ga

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Te tēe ni cajññ Jesús, cuangoo de jíin yá nuū Caifás, tēe cúu sutū cujéhu ga. Te yūcuan cáhīn tútú tēe cástéén tutu ley jíin táca tēe jéhu cándacu jniñu. ⁵⁸ Te Pedro chi jicá-ni ndíquin de ya, te ni jinū de patio sutū

cujéhnū ga. Te ni quívi de ini patio, te ni cucōo de jíin táca policia, návāha coto de ndese coo síquī yā.

⁵⁹ Te sutū cácujehnū jíin táca tēe jéhnū jíin ndíhi tēe casáha junta cujéhnū ga, ni canducú de tēe cahān jnūhun yáá síquī Jesús, chi cahni de ya cácu ni de. ⁶⁰ Te vēsú ni quecoo cuehē ñayuu cácahān yaá, te tu ní cánihīn de cuēchi síquī yā jeē cáhni de ya. Te jeē sándīhí te ni quecoo uū testigo jeē cahān yaá síquī yā.

⁶¹ Te áhí:

Tēe yáha ní cahān de jeē cuu canu de templo Yaā Dios, te nuū uní-ni quívi te nucondichi sáha de, áhí.

⁶² Yūcuán na te ni ndocuíñī maá sūtū cujéhnū ga, te ni cahān de jíin yá:

¿Naun tu cáhān cuiti rō? ¿A íyó ndāā jeē cácahān tēe yáha síquī rō? Achí de.

⁶³ Te Jesús tu ní cáhān cuiti yā. Te ni cahān maá sūtū cujéhnū ga:

Ndácu ri jniñu nuū rō jeē cahān ndaā rō cuni nahín maá Yaā Dios, Yaā técu. Cachi cají te núu máá rō cúu Cristo, Sēhe Yaā Dios, achí de jíin yá.

⁶⁴ Te ni cahān yā:

Suu ri cúu, nájnūhun cáhān rō. Te na cástūhun rí nuū rō jijnáhan rō jēe táca quívi jeē quíji te coto rō rúhū, Yaā ní nduu tēe, condee rī lado váha Yaā iyó poder. Te coto rō jēe ndíji ri ichi ándiví jíin vícō. Achí yá.

⁶⁵ Yūcuán na te sutū cujéhnū ga ni jehnde de sahna de jeē quití ndasí ni de, te ni cahān de:

Tēe yáha chi cáhān de jnūhun ndevāha jeē quití ni Yaā Dios, chi sáha de máá de Sēhe Yaā Dios. ¿Ndé jíni ñúhún gá yō testigo núu súcuān? Chi je ni cajini rō jnūhun ndevāha cáhān de. ⁶⁶ ¿Te ndese cájeni ni rō? achí de.

Te ni cacahān tēe cuehē ún:

Cuēchi cúu jeē cahān de súcuān, te jíni ñúhún cuu de, áhí.

⁶⁷ Yūcuán na te ni catesīhí de nuū yā, te ni cacani de ya. Te sava ga de ni cacatu de nuū yā. ⁶⁸ Te ni cacahān de:

Te núu Cristo cúu rō, te cachi rō ndé ñn cúu jeē ní cani rōhó, áhí de.

Jeē ní cachi Pedro jeē tu jíin de ya

(Mr. 14.66-72; Lc. 22.56-62; Jn. 18.15-18, 25-27)

⁶⁹ Te níni jēe súcuān cúu, te Pedro néne de nuū quéhe ini patio. Te ni quee ñn ñahan jéjníñu vehe ún, te ni cahān ña jíin de:

Róhó chi suni ni jica rō jíin Jesús tēe Galilea, achí ña.

⁷⁰ Te máá de tu ní cáchi de, chi ni cahān de ni cajini ndíhi ñayuu:

Tu jíin rī na jnūhun cáhān rō, achí de.

⁷¹ Te ni quenda de yéhyí núu quéhe, te ni jito ñnga ñahan nuū de. Te ni cahān ña jíin ñayuu cáhīn yūcuán:

Tēe yáha chi suni ni jica de jíin Jesús, tēe ñuu Nazaret, achí ña.

⁷² Te ñnga jíin tu ní cáchi tucu de, chi sa ni cahān teyí de:

Tu jíin rī tēe ún, áhí de.

⁷³ Te ni cunúu jecu gā, te ñayuu cáhīn yūcuān ní quecoo i nuū Pedro, te ni cacahān i:

Jendaá ndije jeē suni jnáhan tēe un cúu rō, chi ndijin cahān rō jeē tēe Galilea cúu rō, áhí i.

⁷⁴ Yūcuán na te ni quejé de cáhān teyí de jeē na cóndee cuēchi síquī de núu tu cáhān ndaā de:

Tu jíin cuiti rī tēe ún, áhí de.

Te ni cana-ni líhli. ⁷⁵ Te ni nucūhun ni de jnūhun ni cahān Jesús jíin de: Nde ná tu cana líhli, te yūhu rō te cahān rō uní jíin jeē tu jíin rō ruhū. Te ni quenda de cuahān de, te yōhyo ni ndahyū de jeē ní cachi de jeē tu jíin de ya.

Jeē cuángoo de jíin yá nuū Pilato

(Mr. 15.1; Lc. 23.1-2; Jn. 18.28-32)

27 Yūcuán na te ni cundijin. Te táca sūtū cácujehnū jíin táca tēe jéhnū jeē cándacu jniñu nuū ñayuu hebreo, ni casquíjnáhan de jnūhun ndese sáha de jeē cuu Jesús. ² Te ni cajihni de ya, te cuángoo de jíin yá nuū Poncio Pilato, tēe cúu gobernador.

Jeē ni jíhī Judas

³ Yūcuán na te Judas, tēe ni nastúu ya un, ní jito de jeē ní cuníhin síquī yā jeē cúu yā. Te ni jnahuhū ni de, te ni nacuāha de ocō uxī xūhun plata jeē ní níhīn de nuū sutú cácujehnū jíin núu táca tēe jéhnū. ⁴ Te ni cahān de jíin:

Cuēchi ní sáha ná jēe ní nastúu ná ñn tēe cuu de, te tú na cuēchi de.

Te máá sūtū un ní cacahān de:

¿Vé jítú ni ruhū? Cuēchi máá rō cúu. Achí de.

⁵ Te ni scāne Judas xūhún un ini templo. Te ni quenda de cuahān de, te ni scuéhne de máá de.

⁶ Te sutū cácujehnū ni canastútú de xūhún un, te ni cacahān de:

Ma cúu chuhun yó xūhun yáha ini yejnū nuū cásocō ñayuu, chi xūhun jéē ni jéconaā jeē cúu ñn tēe cúu, áhí de.

⁷ Yūcuán na te ni casándaā de jeē xūhun yūcuān cuaan de ñuhun jeē naní Lugar Ñuhun Quíxin, návāha yūcuán quindūji ñayuu ñuu jicá. ⁸ Jeē yūcuān cúu jeē ndé vijna nání ñuhun ún Lugar Ñuhun Niñī. ⁹ Te súcuān ni squícu jnūhun ni cahān Jeremías, tēe ni nacani jnūhun Yaā Dios nde jenahān: Ni caquihin de ndíhócó uxī xūhun plata, te súcuān-ni cúu ñn yāhu jeē ní casáha ñayuu Israel cuenta jeē ndeé yā nuū i. ¹⁰ Te jíin xūhun un ní cajeen de ñuhun quíxin, nájnūhun ni ndacu máá Jítóho yō Yaā Dios jniñu nuū rī. Achí Jeremías.

Jeē ní indichi Jesús nuū Pilato

(Mr. 15.2-5; Lc. 23.3-5; Jn. 18.33-38)

¹¹ Te nuū ní jinūcoo de jíin Jesús nuū gobernador, tēe cúu Pilato, te ni cajnūhún de ya:

¿A máá ró cúu Rey ñayuu hebreo? achí de.

Te ni cahān Jesús:

Suu ri cúu, nájnūhun cáhán rō.

¹² Te sutū cácujuhnu jíin tée jéhu cándacu jniñu, ni cacahān de cuēchi siquī yā. Te tú na vé ni cáhán cuiṭi yā. ¹³ Yūcuán na te ni cahān Pilato jíin yá:

¿A tu jíni ró jéē cácahān de cuehē cuēchi siquī rō? achí de.

¹⁴ Te tu ní cáhán cuiṭi yā ni ñn jnūhun jíin de. Te nahán ní naa ni gobernador jeē tú na vé ni cáhán yā jíin de.

Jeē ní cundaā jeē cúu yā

(Mr. 15.6-20; Lc. 23.13-25; Jn. 18.38-19.16)

¹⁵ Te íyó costumbre gobernador jeē quivī víco un siaá de ñn tēe íne vecāa, núu na-ni tēe cácuñi ñayuu. ¹⁶ Te suu quivī un íyó ñn tēe íne vecāa, naní de Barrabás, te je ni jite núu jnūhun jeē ni sáha de cuēchi xeēn. ¹⁷ Te nuū ní candutútú ñayuu, te ni cahān Pilato jíin i:

¿Nde tēe cácuñi rō jeē siaá rī vijna: á Barrabás, chí Jesús jeē cúu Cristo, Yaā ní tají Yaā Dios? achí de.

¹⁸ Súcuñi ni cahān de chí cúni de siaá de Jesús. Chí je ni jecūhun ni de jeē ní cacucúésún ni tāca sūtū un cájito de ya, te jeē yúcuñi ní quijicoo jíin yá nuū de.

¹⁹ Te níni jéē néne Pilato silla nuū sándaā de jniñu, te ñasiñí de ní tají ña jnūhun nuū de: Ma quivī nduu rō jíin ñáyuu siquī tēe ndaā jíñā, chí yōhyo ni siūhu jéni ruhū cuni jeē siquī de, áchí ña.

²⁰ Te sutū cácujuhnu jíin táca tēe jéhu, ni cascáhán de ñayuu jeē na cácan i jeē siaá de Barrabás, te na cúu Jesús. ²¹ Yūcuán na te ni cajnūhún tucu gobernador:

Jeē uú de, ¿nde ñn de cácuñi rō jeē siaá rī? achí de.

Te ni cacahān i:

Siaá ni Barrabás, achí i.

²² Te ni cajnūhún Pilato:

Núu súcuñi te ¿ndese cácuñi rō jeē sáha ri jíin Jesús, tēe cúu Cristo? achí de.

Te ni cacahān ndiñi i:

Cata caa ní de jicā cruz, na cúu de, áchí i.

²³ Yūcuán na te ni cahān Pilato:

¿Na cuēchi ni sáha de núu súcuñi? áchí de.

Te ñayuu un ní cacana jee ndasí i:

Cata caa ní de jicā cruz, na cúu de, áchí i.

²⁴ Te ni jini Pilato jeē tu cúndeyí de jíin ñáyuu, chí sa víhyá gā cácuvaā i. Te ni ndacu de jniñu jeē na quíji ndute, te ni nandahá de nuū ñáyuu cuehē ún. Te ni cahān de:

Jeē nandahá rí yāha cúu seña jeē tú na cuēchi condee siquī rī jeē cúu tēe vāha yāhá. Chí siquī maá ró jíin áhan ró na cóndee. Achí de.

²⁵ Te ni cacahān ndiñi ñayuu:

Suu siquī maá ná jíin siquī séhe ná na cóndee cuēchi jeē cúu de, áchí i.

²⁶ Yūcuán na te ni siaá de Barrabás. Te ni ndacu de jniñu jeē na cáni táca soldado un Jesús, jíin jéē cáta caa de ya jicā cruz.

²⁷ Yūcuán na te soldado un cuango de jíin Jesús ini palacio. Te ni cacana de ndiñi jnáhan de ni candutútú núu yā. ²⁸ Te ni caquenehen de sahma ya, te ni cachuhun de ya ñn sahma cuehé jeē cúu sahma rey.

²⁹ Te ni casáha de ñn corona iñu, ni cachuhun de xinī yā. Te ni cachihí de ndaha váha ya ñn yujnu jeē nájnūhun bastón. Te ni casácatā de nuū yā, chí ni cajecuiñí yití de, cása ha de jeē chiñúhún de ya.

Nacā jeē váha rey cúu Rey ñayuu hebreo, achí de.

³⁰ Te ni catesñí de nuū yā. Te ni caquihin de yujnu jeē ní cachihí de ndaha ya, te ni cacani de xinī yā. ³¹ Te nuū ní cuu ni casácatā de nuū yā, te ni catava de sahma cuehé un, te ni canachuhun de ya sahma máa yá. Te cuango de jíin yá jeē cata caa de ya jicā cruz.

Jeē ní cacata caa de ya jicā cruz

(Mr. 15.21-32; Lc. 23.26-43; Jn. 19.17-27)

³² Te nuū ní quendacoo soldado un jíin yá, te ni canajnáhan de jíin ñn tēe ñuu Cirene, naní de Simón. Te ni catejníñu de tēe un jéē cóndiso de cruz yā.

³³ Te ni jinūcoo de ñn lugar nuū naní Gólgota, jeē cuni cahān Lugar Yiquí Xíní. ³⁴ Te ni cajēhe de vino jeē ní sácā núu jíin ñn jeē uvuá jeē cóho ya. Te nuū ní jito ndee ya, te tu ní cúni yā coho ya.

³⁵ Te nuū ní cuu ni cacata caa de ya jicā cruz, te ni casáha de sorteo jeē siquī ndese nihñi ñn ñn de sahma ya. Te súcuñi ni squícu jnūhun ni tee tēe ni nacani jnūhun Yaā Dios jenahán: Ni casáha de sorteo siquī ndese nihñi ñn ñn de sahma ri, achí yā, achí tutu.

³⁶ Yūcuán na te ni cacucōo de yúcuñi jéē cóto de nde cuu yā. ³⁷ Te ni catee de ñn jnūhun xinī cruz yā jeē cahán na siquī ni jíñi yā: Yāha cúu Jesús, Rey ñayuu hebreo, achí.

³⁸ Te suni ni cacata caa de uū tēe cuíhná núu uū gā cruz, ñn de lado váha ya, te inga de lado jecó yá. ³⁹ Te ñayuu cáyāha yúcuñi cáscuicó i xinī i, te cacahān neé i:

⁴⁰ Róhó chí cáhán rō jeē cánu rō templo cáhnu, te nuū uní quivī te nacani ró. Núu súcuñi te jnama ró máá ró vijna. Te núu Sēhe Yaā Dios cúu ró, te nuu ró jíicā cruz víñi, achí i.

⁴¹ Te sutū cácujuhnu, jíin tēe cástéén tutu ley, jíin tēe grupo fariseo, jíin tēe jéhu jíin áhan de, suni súcuñi ni cacahān catá de, te achí de cacahān maá de:

⁴² Núu inga ñayuu ni jnama de, ¿te naun tu cúu jnama de máá de vijna? Núu Rey ñayuu Israel cúu de, te na núu de jicā cruz, návāha candíje yó de. ⁴³ Ni candíje de Yaā Dios, te na jnama ya de vijna te núu cóndahú ni yā de, chí ni cahān de jeē cúu de Sēhe ya. Achí de jíin áhan de.

⁴⁴ Te tēe cuíhná jeē cándita caa xiin ya, suni súcuñi ni cacahān neé de.

Jeē ni jīhī Jesús

(Mr. 15.33-41; Lc. 23.44-49; Jn. 19.28-30)

⁴⁵ Te nuū ní cuu cahuxī uū, te ni cunee níf cáhnu nde cahunī. ⁴⁶ Te nájnūhun cahunī, te ni cana jee Jesús:

Elí, Elí, ¿lama sabactani? achí yá. Te jnūhun un cúni cahān: Yaā Dios maá ná, Yaā Dios maá ná, ¿naun ni stóo ní sáña?

⁴⁷ Te sava ñayuu cáhiin yūcuan ní cajini i jnūhun ún, te ni cacahān i:

Tēe yáha cána de xinī Elías, tēe ni nacani jnūhun Yaā Dios jenahán, achí i.

⁴⁸ Te ni jinu-ni ñn tēe, ni jequihin de ñn cachī, te ni chundaji de nuū vinagre iyá. Te ni tee de xinī ñn yujnu, te ni tee de yuhu ya jeē coho ya. ⁴⁹ Te sava ga de ni cacahān:

Condetu ró, na cóndēhe yó núu quiji Elías jnama de chí tuú, achí de.

⁵⁰ Te Jesús ni cana jee ya ñnga jínu, te ni jihī-ni ya. ⁵¹ Te sahma ndíta caa jeē ndihyú cuarto ī ini templo cáhnu, ni ndatā-ni sava sava nde xinī te nde nuū jehé. Te ni jnāa, te ni catahū sáva toto. ⁵² Te ni cananune yaū nuū yíndūji ndīyī. Te cuehē ndīyī jeē ní cacandíje i Yaā Dios, ni canatecu i. ⁵³ Te nuū ní natecu Jesús, te ni quenda-coo i nuū yíndūji i. Te ni ndīvicoo i ini ñuu ī Jerusalén, te cuehē ñayuu ni cajito nuū i.

⁵⁴ Te ná ni jihī Jesús, te tēe cúu capitán jíin tēe cáhiin jíin de jeē cándito de nde cuu yā, ni cajini de jeē ni jnáa, jíin táca gá jniñu ní cuu. Te yōhyo ni cayūhú de, te ni cacahān de:

Jendaá ndije jeē Séhe Yaā Dios cúu tēe yáha, achí de.

⁵⁵ Te yūcuan cáhiin cuehē ñahan, cándēhe jíca ña. Te suu ñahan un ní candiquīn ña Jesús nde Galilea, vējicoo ña cájejnīñu ña nuū yā. ⁵⁶ Te unī ñahan un cácuu María ñuu Magdala, jíin María naná Jacobo jíin José, jíin naná ndíndúú séhe Zebedeo.

Jeē ní quindūji Jesús

(Mr. 15.42-47; Lc. 23.50-56; Jn. 19.38-42)

⁵⁷ Te nuū ní ini quivī ún, te ni quee ñn tēe cúca, nání de José, te tēe ñuu Arimatea cúu de. Te suni tēe ni scuáha jíin Jesús cúu de. ⁵⁸ Tēe un ní jehēn de nuū Pilato, te ni jicān de yiqui cúñu Jesús. Te ni ndacu Pilato jniñu jeē na cuáha nuū de. ⁵⁹ Te José ni quihin de yiqui cúñu yā, te ni chusúcún de ñn sahma cuitá íyó ndoo.

⁶⁰ Te névaha de ñn yaū jeē ní caan jeé jíca ñn cava, nuū ná tu quindūji ndīyī. Te yūcuan ní chindūji de ya. Te ni jesi de ñn yuū cáhnu yuhu yá un, te cuahān de. ⁶¹ Te María ñuu Magdala, jíin ñnga María, cáyucú ña ichi núu nuū yíndūji ya.

Jeē ní cacondito soldado nuū yíndūji ya

⁶² Te ni cuu táca jniñu yáha máa quivī jeē casátūhva ñayuu jeē quiji quivī ndétātú. Yūcuán na te ni cundijin

maá quivī ndétātú. Te sutū cácujeñnu jíin tēe grupo fariseo ni jengoo de nuū Pilato. ⁶³ Te ni cacahān de:

Cánucūhun ni na jeē nde na técu tēe stáhú néé un te ni cahān de jeē nátecu de nuū unī quivī. ⁶⁴ Núu súcuan te ndacu ní jniñu na cóto vāha táca soldado yuhu yá un nde núu ni yāha unī quivī. Chi núu tuú te sanaa te quijicoo tēe ni cascuáha jíin de, te tava cuíhna de ndīyī ún jecuáa, quingoo de jíin. Yūcuán na te cachi de nuū ñáyuu jeē ní natecu tēe ún. Te cáhú gá cuu jnūhun stáhú yūcuan vésú jeē xíhna ñúhún. Achí de.

⁶⁵ Te ni cahān Pilato:

Yāha cáhiyo soldado. Cuángoo jíin de, te sácutú váha ró yuhu yá un, te coto vāha ró, núu ndese vāha ga cuu sáha ró. Achí de.

⁶⁶ Te cuangoo de, te ni casácutú de yuū jeē ndihyú yuhu yá nuū yíndūji ya, te ni castīn ñihin de. Te ni castóo de táca soldado un cándito.

Jeē ní natecu Jesús

(Mr. 16.1-8; Lc. 24.1-12; Jn. 20.1-10)

28 Te ni yāha quivī ndétātú un, te ni cundijin quivī domingo. Te María ñuu Magdala jíin ñnga María un, ní jecondēhé ña nuū ní yíndūji Jesús. ² Yūcuán na te ñn sanaa-ni te ni jnāa ñihin ndasí. Chi ñn ndajéhé maá Jítoho yō Yaā Dios ni cuun ya ichi ándiví, ni quee ya nuū ní yíndūji Jesús. Te ni stáa ya yuū ndihyú yuhu yá un, te ni cucōo ya síquī. ³ Te ndíndēe núu yā nájnūhun taja, te sahma ñúhun ya yaa quiyī nájnūhun yuhvā volcán. ⁴ Te soldado cándito yūcuan ní quisi i de jeē cáyūhú de cájito de ya. Te ni cacuu ndīyī de. ⁵ Te ni cahān ndajéhé jíin ndíndúú ñahan ún:

Ma yūhu ró, chí jíinī rī jeē vécondēhe ró Jesús, Yaā ni jíhī jicā cruz. ⁶ Tuá yā yāhá, chí je ni natecu yā, nájnūhun ni cahān yā. Nehen condēhe ró nuū ní cachindūji de ya. ⁷ Te yachī quingoo ró, te cachi rō nuū tēe cáscuáha jíin yá jeē ní natecu yā. Te xíhna gā maá yá jinū Galilea, te sáa te najinūcoo de. Te yūcuán coto de nuū yā. Achi rō na cúni de. Je ni castūhun rí nuū rō, achí ndajéhé.

⁸ Te ni quendacoo ña nuū ní yíndūji ya, te yachī cuangoo ña. Te cáyūhú ña, te suni yōhyo cácusī ña. Te ni cajinu ña cuacastūhún ña nuū tēe cáscuáha jíin yá. ⁹ Te níní cuángoo ña, te ni quee-ni Jesús nuū ña, te ni cahān yā jíin ña. Te ni quecoo ña nde nuū yā, te ni canundee ña jehē yā, te ni cachiñúhún ña ya. ¹⁰ Te ni cahān yā jíin ña:

Ma yūhu ró jijnáhan ró. Cuángoo te castūhun ró nuū táca hermano rī, tēe ni cascuáha jíin rí, jeē na núngoo de nde Galilea, te yūcuán coto de nuū rī. Achí yá.

Jnūhun ní cacahān soldado

¹¹ Te níní cuángoo ña, te sava soldado jeē ní condito ún, cuánungoo de nde ñuu. Te ni cacastūhún de nuū sutú cácujeñnu táca jniñu jeē ní cuu. ¹² Te sutū cácujeñnu ni candutútú de nuū táca tēe jéñnu cándacu

jniñu, te ni casquijnáhan de jnūhun. Yūcuán na te ni cajēhe de cuehē xūhun núū soldado jijnáhan. ¹³ Te ni cacahān de jíin:

Cahān rō jijnáhan ró jēē tēe cáscuáha jíin de ni quijicoo jecuáā, te ni catava cuīhna ndíyi un níni cáquixī rō, achi rō. ¹⁴ Te núu na cúni gobernador jnūhun yáha, te máá rí quiscahán rī de, návāha tú nihīn rō castigo jijnáhan ró. Achí de.

¹⁵ Te soldado un ní caquihin de xūhún un, te ni cachi de nájnūhun ni cacahān jíin de. Te nde vijna chi súcuan cácahān ñayuu hebreo nájnūhun ni cacahān soldado un.

Jeē ní tejniñu ya de nacani de jnūhun

(Mr. 16.14-18; Lc. 24.36-49; Jn. 20.19-23)

¹⁶ Te ndihúxi ñn tēe ni cascuáha un cuánungoo de nde Galilea, nde yucu nuū ní cachi Jesús jeē quíngoo de. ¹⁷ Te nuū ní cajito de nuū yā, te ni cachiñúhún de ya. Te sava de tu cácdíje vāha de jeē maá yá cúu.

¹⁸ Te ni quee ya nde nuū de, ni cahān yā jíin de:

Je ni jēhe Tátá rī ndihī poder nuū rī jeē ndácu ri jniñu andiví jíin ñáyiví. ¹⁹ Núu súcuan te cuángoo nuū ñayuu tācá nación, te stéén rō jnūhun ri nuū i návāha na cácdíje i. Te scuándute ró i jeē ní cacandíje i máá Tátá jíin Séhe jíin Espíritu Santo. ²⁰ Te stéén rō nuū i jeē na cuátáhú i tācá jniñu ní ndacu ri nuū rō. Te cocuhun ni rō jeē maá rí íne ri jíin ró ñí cáni nde quiví jínu ñayiví. Achí yá. Te ni cuu. Amén.

SAN MARCOS

Jnūhun Juan tēe scuándute

(Mt. 3.1-12; Lc. 3.1-9, 15-17; Jn. 1.19-28)

1 Yāha quéjéé jnúhun vāha máá Jesucristo Sēhe Yaā Dios, jeē ní quiji ya jeē jnama ya yohó.
² Isaías, tēe ni nacani jnūhun Yaā Dios nde jenahán, súcuan ni tee de jnūhun Juan nuū tútu:
 Tají rí tēe nacani jnūhun ri cosnūú de ichi núú rō, návāha coo tūhva ñayuu jeē jinú rō, achí Yaā Dios jíin Cristo.
³ Te tēe ún cana jee de nde nuū ñúhun téhé: Sátūhva ró máá ró jijnáhan ró, chi quee maá Jítóho yō.
 Te sáha ró jniñu ndaā, chi vēji ya, achi de. Achí Isaías. ⁴ Te Juan ni jinū de nde nuū ñúhun téhé, scuándute de ñayuu. Te cáhán de jíin i jeē na nácani ni i jeē stóo i cuēchi i te cuandute i, návāha cone cáhnu ni Yaā Dios nuū cuēchi i. ⁵ Te tāca ñáyuu región Judea jíin ñáyuu ñuu Jerusalén, ni quiijicoo i nuū de. Te ni canacani ndaā i cuēchi i nuū Yaā Dios, te ni scuándute de i ini yūte Jordán.
⁶ Te sahma ñúhun Juan cúu ixi camello, te núhni ñn cinturón ññ chíji de. Te jeē técu de cúu tēca ndicuéhyí jíin ndúxi yocō. ⁷ Te suhva ni nacani de jnūhun: Quiji máá Yaā cujéhnu ndasí. Chi tú na vé jéhnu cuiti cúu ri nuū yā, ni jeē cuajniñu ri nuū yā vēsú ñn jniñu lúlí gá nájñūhun jeē cuíta ndeyi ri ndají rí correa ndijēn yā. ⁸ Te ruhū chi jíin ndute scuándute ri rohó jíináhan ró, te Yaā ún chi nájñūhun jeē scuándute ya rohó cúu jeē cuáha ya Espíritu Santo condee ini anuá rō, achí Juan.

Jeē ní jendute Jesús

(Mt. 3.13-17; Lc. 3.21-22)

⁹ Te ni cuu jecu quiví, te Jesús ni quenda ya ñuu Nazaret ndañúú Galilea, te Juan ni scuándute de ya ini yūte Jordán. ¹⁰ Te ná ni quenda ya nuū ndúte, te ni jito ya jeē ní nune-ni andiví, te ni cuun Espíritu Santo ni quee xiní yā, te cáa nájñūhun ñn paloma. ¹¹ Te ichi ándiví ní cahān ñn jnūhun:
 Máá ró cúu Sēhe ri jeē maní ndasí rí jíin, te yōhyo cúsiñ ni rí jíin ró, achí.

Jeē ní jito ndee jexeén Jesús

(Mt. 4.1-11; Lc. 4.1-13)

¹² Yūcuán na te ni jinū Jesús nde nuū ñúhun téhé ní sáha Espíritu Santo. ¹³ Te uū xico quiví ni condee yā

nuū ñúhun téhé un núú ñn quiti yúcú. Te ni jito ndee Satanás yā, chi cúní jeē sáha ya cuēchi. Te nuū ní cujiyo Satanás cuahān, te ni quecoo ndajéhé Yaā Dios, ni cajeniñu nuū yā.

Jeē ní quejéé Jesús nácani ya jnūhun

(Mt. 4.12-17; Lc. 4.14-15)

¹⁴ Yūcuán na te ná ni cachune de Juan vecāa, te ni jinū Jesús región Galilea, nácani ya jnūhun vāha ndese ndácu Yaā Dios jniñu. ¹⁵ Te ni cahān yā:
 Je ni jinū quiví, te je ni cuyajni jeē ndácu Yaā Dios jniñu nuū rō. Nacani ni rō jeē stóo ró cuēchi ró jíináhan ró, te candíje ró jnúhun jeē jnáma ya rohó. Achí yá.

Jeē ní cana ya cuūn tēe jññ chācá

(Mt. 4.18-22; Lc. 5.1-11)

¹⁶ Te jíca Jesús yumar Galilea cuahān yā. Te ni jito ya nuū Simón jíin ñani de Andrés. Te tēe cájniñ chācá cácuu de, te cásínga de ñunu de ini mar. ¹⁷ Te ni cahān yā jíin de:

Condiquñ ruhū na quihín yō, te nasáha ri rohó tēe nihñ cuēhē ñayuu candíje ruhū, nájñūhun cánihñ rō chācá, achí yá.

¹⁸ Yūcuán na te ni castóo-ni de ñunu de, te ni candiquñ de ya.

¹⁹ Te ni jica ya jecu gā, te ni jito ya nuū Jacobo jíin ñani de Juan, sēhe Zebedeo, suni cáyúcú de ini barco de, cánachijnñ de ñunu de. ²⁰ Te suni ni cana ya de jeē cóndiquñ de ya. Te ni castóo-ni de tátá de Zebedeo ini barco un jíin mozo de, te ni candiquñ de ya cuangoo de.

Jeē ní quenehen ya tachí ini ñn tēe

(Lc. 4.31-37)

²¹ Te ni jinū yā jíin de ñuu Capernaum. Te quiví ndétātu ní quiví ya ini vehe ñn sinagoga, te ni steén yā jnūhun. ²² Te ni canaa ni ñayuu ni cajini i jnūhun stéén yā. Chi ni steén vāha ya nuū i, chi máá yá cúu jeē ndíso jniñu siquí ndihí. Te tēe cástéén tutu ley Yaā Dios, tu súcuan cástéén de. ²³ Te ini vehe ñn sinagoga ñuu un íne ñn tēe jeē ñúhun tachí ini. Te ni cana cóhó de:

²⁴ ¿Naun vēji ní núú na jíináhan ná, Jesús ñuu Nazaret? ¿A véji ní jéé snāā ni sáña, chí naún? Je jíin na ndé ñn cúu ní, chi Sēhe ñn Yaā Dios cúu ní. Achí de.

²⁵ Te Jesús ni cahān xeēn yā jíin táchí ún:
 Casi yuhu ró te quenda ró ini de, achí yá.

²⁶ Te tachī ún xeēn ni jehni yǎhí tée ún. Te ni cana cóhó, te ni quenda ini de cuahān. ²⁷ Te ndihí ñayuu ni cayūhú i, te cácajnūhun jnáhan i:

¿Na vé cúu jeē yáha? ¿A ñn jnūhun jéé cúu jeē yáha? Chi tēe yáha cújéhnū de jeē ndácu de jniñu nde nuū tachī te quéndacoo, áchí i.

²⁸ Te yachī ni jitē núu jnūhun Jesús cuahān ní cáhnu región Galilea.

Jeē ní nasávāha ya naná chīsó Simón Pedro

(Mt. 8.14-15; Lc. 4.38-39)

²⁹ Te ni quenda ya jíin de jíinánan de ini vehe íi sinagoga. Te Jesús ni jehēn yā jíin Jacobo jíin Juan nde vehe Simón jíin Andrés. ³⁰ Te naná chīsó Simón, cátú ña yǎhí quíji ña. Te ni cacastūhún de nuū yā jeē cuhú ña.

³¹ Yūcuán na te ni quindehe ya nuū catú ña, te ni jniñ ya ndaha ña, te ni ndonehen ya ña. Te ni quenda-ni quíji ún ña, te ni sáha ña jeē ní cayejí de jíin yá.

Jeē ní nasávāha ya cuehē ñayuu

(Mt. 8.16-17; Lc. 4.40-41)

³² Te ni quēe niāndii te ni cuaa. Te ni quecoo ñayuu jíin táca ñáyuu cácuñú jíin jéé ñúhun tachī ini. ³³ Te táca ñáyuu ñuu un ní cacutútú i yéhyí un. ³⁴ Te ni nasávāha ya cuehē ñayuu cácuñú tijni nuū cuehyí, te ni quenehen ya cuehē tachī un cuángoo. Te tachī chi je cájini un yá, te tu ní jéhe ya jnūhun jeē cástūhun ndé ñn cúu ya.

Jeē ní nacani ya jnūhun región Galilea

(Lc. 4.42-44)

³⁵ Te nehen ndasí ní ndonda ya, nde yínee gā. Te ni quenda ya cuahān sñin ya yatā ñúñ nuū tú ñayuu, te yūcuán ní jicān tahu yā. ³⁶ Te Simón jíin tēe cáhīin jíin de, ni jenanducú de ya. ³⁷ Te ni cananihīn de ya, te ni cacahān de jíin yá:

Tāca ñáyuu cánanducú i níhín, áchí de.

³⁸ Te máá yá ni cahān yā:

Sa suhva na quihín yō tāca gá ñuu íne yajni, návāha suni nacani ri jnūhun nuū i, chi jeē yūcuán ní quee rī. Achí yá.

³⁹ Te súcuán te ni jica cuu ya ní región Galilea, ni nacani ya jnūhun ini vehe íi sinagoga táca ñuu, te ni quenehen ya tachī ini ñayuu.

Jeē ní nasávāha ya ñn tēe ndóho cuehyí stehyú

(Mt. 8.1-4; Lc. 5.12-16)

⁴⁰ Te ñn tēe ndóho cuehyí stehyú, ni quee de ni jecuiñí yití de nuū yā, te ni cahān de jíin yá:

Jíin na jeē cuu sáha ní jéé nduvāha ná, te núu cúní ni, áchí de.

⁴¹ Te Jesús ni cundáhú ni yā de, te ni soó yá ndaha ya siquí de, te ni cahān yā:

Cúní rī. Te na nduvāha ró, áchí yá.

⁴² Te ná ni cahān yā súcuán, te ni nduvāha-ni tēe ndóho cuehyí stehyú un. ⁴³ Yūcuán na te nátají yá de quinhun de, te ni cahān níhin ya jíin de:

⁴⁴ Ma cáchi cuítí rō nuū ní ñn. Chi quisteén rō maá ró nuū sutú, te condahá ró jeē socó rō nuū Yā Dios siquí jeē ndúndoo ró núu yā, nájnūhun ni ndacu Moisés jniñu jenahán. Te súcuán te cuni ñayuu jeē ní nduvāha ró. Achí yá.

⁴⁵ Te ni quenda de cuahān de, te ni quejéé de nácani de jnūhun nuū ndihí ñayuu ndese ni nduvāha de. Te siquí yūcuán tuá ni cúu quívi Jesús táca ñuu, chi cúchitú ndasí ñáyuu nuū yā. Te ni jica ya yatā táca ñuu nuū tu cúchitú ñáyuu. Te táca lado ni quijicoo ñayuu nuū yā.

Jeē ní nasávāha ya ñn tēe ndóho cuehyí ni íjin

(Mt. 9.1-8; Lc. 5.17-26)

2 Te ni cuu jecu quívi, te ni quívi tucu Jesús ñuu Capernaum. Te ni cajini ñayuu jeē néne ya vehe. ² Te ni cacutútú-ni cuehē ñayuu, te ni chitú vehe jeē ndé yehyí tuá núne. Te ni nacani ya jnūhun Yā Dios nuū i.

³ Yūcuán na te ni quecoo cuñ tēe nuū yā, cándiso de ñn tēe ndóho cuehyí ni íjin. ⁴ Te tu ní cúu quívicoo de nuū yā siquí jeē chitú ñáyuu. Te ni cacoo de siquí véhe, te ni canune de ndaā nuū íin ya, te yaū un ní cascúun de tēe cúhú, cátú de nuū ñn camilla. ⁵ Te ni jini Jesús jeē cácañde de jeē cúu nasávāha ya tēe cúhú un. Te ni cahān yā jíin tēe cúhú un:

Séhē, je íne cáhnu ni rī nuū táca cuéchi ró, áchí yá.

⁶ Te yūcuán cáyucú jecu tēe cástéén tutu ley Yā Dios, te tēe un ní cajeni ni de siquí yā: ⁷ ¿Naun cáhán tēe yáha súcuán? Cáhán de jnūhun ndevāha jeē quití ni Yā Dios, chi nasūu Yā Dios cúu de jeē cóne cáhnu ni de nuū cuéchi. ⁸ Te ni jini Jesús jeē súcuán cájeni ni de, te ni cahān yā jíin de:

¿Naun cájeni ni rō jeē cahán ndevāha ri? ⁹ Jeē uú jnūhun yáha, ¿ndé ñn yí gá cáa? ¿A jéé cahán rī jíin tēe cúhú: Je íne cáhnu ni rī nuū táca cuéchi ró? ¿Chí yí gá jeē cahán rī: Ndocuiñí te naquihin ró camilla rō, te ca-ca ró, achi rí? ¹⁰ Te vijna te na steén rí jeē máá rí, Yā ñnduu tēe, ndíso jniñu ri ini ñayívi yáha jéé cóne cáhnu ni rī nuū cuéchi.

Yūcuán na te ni cahān yā jíin tēe ni íjin ún:

¹¹ Cáhán rī jíin ró, ndocuiñí te naquihin ró camilla rō, te quinhun rō vehe ró, áchí yá jíin de.

¹² Yūcuán na te ni ndocuiñí-ni tēe ún, te ni naquihin de camilla de, te ni quenda de cuahān de, jito jínúñ ndihí ñayuu. Te ndiví i ni canaa ni i cájito i, te ni cacahān i jeē yóhyo vāha Yā cúu Yā Dios. Te áchí i:

Ná tu coto cuítí yō ni ñn jniñu súcuán, áchí i.

Jeē ní cana ya Leví

(Mt. 9.9-13; Lc. 5.27-32)

¹³ Te ni quenda tucu ya cuahān yā nde yumar. Te táca ñáyuu ni jinūcoo i nuū yā, te ni steén yā jnūhun nuū i.

¹⁴ Yūcuán na te ni yáha ya cuahān yā, te ni jito ya nuū

Leví sēhe Alfeo, néne de nuū cutútú xúhun renta. Te ni cahān yā jíin de:

Condiquīn ruhū na quíhín yō.

Te ni ndocuiñī de, te cuahān de jíin yá.

¹⁵ Yūcuán na te ni jehēn yā ni yeji yā staā vehe de. Te cuehē tēe cástútú xúhun renta jíin inga tēe casáha cuēchi, suni cáyūcú de cáyeji de staā jíin Jesús jíin tēe cáscuáha jíin yá, chi íyó cuēhē de jeē cándiquīn de ya.

¹⁶ Te tēe cástéén tutu ley Yaā Dios jíin tēe grupo fariseo, ni cajito de jeē yéji yā staā jíin ndihī tāca tēe ún. Te ni cacahān de jíin tēe cáscuáha jíin yá:

¿Naun yéji maestro rō jíin tēe cástútú xúhun renta jíin inga tēe casáha cuēchi? áchí de.

¹⁷ Te ni jini Jesús, te ni cahān yā jíin de:

Ñayuu cáhīyo váha, tu jíini ñúhún i tēe tájné, chi ñayuu cácuñú cúu jeē jíini ñúhún. Te ruhū nasūu jéé véji ri cana ri ñayuu tú cuēchi, jeē cúu i nájñuhun ñayuu cáhīyo váha. Chi sa suhva véji ri cana ri ñayuu cáhīyo cuēchi, jeē na nácani ni i te stóo i cuēchi i. Áchí yá.

Jeē ní cacajñuhún de ya siquī jeē cóndite ni

(Mt. 9.14-17; Lc. 5.33-39)

¹⁸ Te ni cuu ñin quivī jeē cáhīyo ndite ni tēe cáscuáha jíin Juan, jíin tēe cáscuáha jíin grupo fariseo. Te ni quecoo jecu tēe, ni cacahān de jíin Jesús:

Tēe cáscuáha jíin Juan jíin jéé cascuáha jíin grupo fariseo, tijñi jínu cáhīyo ndite ni de. Te tēe cáscuáha jíin máá ní, ¿naun tu casáha de súcuan?

¹⁹ Te ni cahān Jesús jíin de:

¿A cuu condite ni de níni jéé íyó rí jíin de? ¿A cuu condite ni ñayuu cáhīin vico nándāha, te núu níni néne tēe nándāha? Chi núu néne tēe nándāha, te ma cúu condite ni i. ²⁰ Te quee quivī jeē cújiyo tēe nándāha, te quivī ún chi condite ni i.

²¹ Te ni cahān yā uū jñuhun yátá síquī jeē tu quíjnahan jñuhun jeé jéé steén yā jíin táca jñuhun jehān. Áchí yá:

Ni ñin tu náchuhun ñin pedazo sahma jéé núu ñin sahma túhú. Chi núu súcuan te ndiyi pedazo jeé un, te tahndē gā jeé tuhú un, te nducáhnú ga nuū cástáhdé un. ²² Te suni tu cáchuhun vino jeé ini ññi túhú. Chi núu súcuan te vino jeé un ndatá ññi ún, te naa vino jíin ññi. Jeé yúcuan cánuú jéé chúhun i vino jeé ini ññi jéé.

Jeē ní cataxín de yoco trigo quivī ndétátú

(Mt. 12.1-8; Lc. 6.1-5)

²³ Te ñin quivī ndétátú ní yāha Jesús cuahān yā mēhñú nuū cáa trigo. Te tēe cáscuáha jíin yá, cájica de cuahān de, te ni quejéé de cátaxín de yoco trigo cáyeji de. ²⁴ Yūcuán na te tēe grupo fariseo ni cacahān de jíin yá:

Condēhé. ¿Najehē casáha tēe cáscuáha jíin ró súcuan? Chi áchí ley Moisés jeē ma cúu sáha yó ni ñin jñiñu quivī ndétátú. Áchí de.

²⁵ Te ni cahān máá yá jíin de:

¿A tu ní cácahu cuiti rō tutu ndese ni sáha David, ñin quivī ní cumanī jeē cáji de, te ni jíi de sóco jíin tēe cáhīin jíin de? ²⁶ Te ni quivī de ini vehe Yaā Dios. Te Abiatar ni cuu sutū cujéhnú ga. Te ni yeji de pan iī jeé yosó ndijin nuū Yaā Dios. Te tú na ley jeē cáji ni ñin tēe, chi máa-ni sutū cuu caji. Te suni ni jēhe de ni cayejí tēe cáhīin jíin de. Te tú na cuēchi ní íyo siquī de. Áchí yá.

²⁷ Te suni ni cahān yā jíin de jíjnahan de:

Tu ní jéconaa ñayuu jeē ndóho i nuū quivī ndétátú, chi ni jéconaa quivī un jéé ndétátú i. ²⁸ Núu súcuan te ruhū, Yaā ní nduu tēe, máá rí cúu jeē ndácu jñiñu siquī ndese sáha ñayuu quivī ndétátú, áchí yá.

Jeē ní nduvāha tēe ni ichī ndaha

(Mt. 12.9-14; Lc. 6.6-11)

3 Te ni quivī tucu Jesús ini vehe iī sinagoga. Te yúcuan íne ñin tēe ni ichī ñin ndaha de. ² Te tēe grupo fariseo cájito yuhu de ya núu nasávāha ya tēe un quivī ndétátú, návāha nihīn de cuēchi siquī yá.

³ Yūcuán na te ni cahān yā jíin tēe ni ichī ndaha ún:

Ndocuiñī te condichi rō mēhñu yáha, áchí yá.

⁴ Te ni cajñuhun yá de jíjnahan de:

¿Ndese cáhán ley siquī quivī ndétátú? ¿A jéé sáha váha yó, chí sáha néé yó? ¿A jéé nasávāha yó ñayuu je yajni cuu, chí sáha yó jéé cúu i? áchí yá.

Te máá de tú na vé ni cacahān de. ⁵ Te ni quitī ni yā ni jito ya nuū de jíjnahan de, te ni cucuíhyá ni yā jeé níhni ni de. Te ni cahān yā jíin tēe ni ichī ndaha:

Scáá ndaha ró.

Te ni scaá de, te ni nduvāha-ni ndaha de. ⁶ Yūcuán na te ni quendacoo tēe grupo fariseo, te ni casquíjnahan de jñuhun jíin tēe grupo Herodes siquī yá, ndese cahni de ya.

Jeē ní quecoo cuehē ñayuu nuū yá yumar

⁷ Te Jesús cuahān yā nde yumar jíin tēe cáscuáha jíin yá. Te cuehē ñayuu región Galilea ni candiquīn i ya.

⁸ Te suni ñayuu región Judea, jíin ñayuu ñuu Jerusalén, jíin ñayuu Idumea, jíin ñayuu ichi núu cáne niāndii yūte Jordán, jíin ñayuu región Tiro jíin Sidón, cuehē ndasí ñayuu ni cajini jñuhun i jñiñu jéhnú ni sáha ya, te ni quecoo i nuū yá. ⁹ Te ni cahān yā jíin tēe cáscuáha jíin yá jeé na cóo túhva ñin barco quivī ya, návāha ma chítú níhin ñayuu cuehē ún xiin ya. ¹⁰ Chi cuehē ñayuu je ni nasávāha ya, te jeé yúcuan vējicoo cuehē gā ñayuu cándoho tāca núu cuehyī, te chítú níhin i xiin ya jeé quehé i ya cáconi i. ¹¹ Te ñayuu cáñuhun tachī ini, núu ni cajito nuū yá, te cájecuiñī yití núu yá, te cácana cóhó:

Máá ní cúu Sēhe Yaā Dios, achí.

¹² Te ni ndacu níhin ya nuū tachí un jéé ma cáhán gā jeé cúu ya Sēhe Yaā Dios.

Jeē ní nacāji ya uxī uū tēe apóstol

(Mt. 10.1-4; Lc. 6.12-16)

¹³ Yūcuán na te ni caa ya cuahān yā ñn yucu. Te ni cana ya tāca tēe jeē cuní maá yá caca jíin yá, te ni quecoo de nuū yā. ¹⁴ Te ni jeni ya uxī uū de jeē cuñi de jíin yá, te tají yá de quingoo de nacani de jnūhun. ¹⁵ Te ni sáha ya jeē cóndiso jníñu de nasávāha de ñayuu cuhú te quenehen de tachī ini ñayuu. ¹⁶ Te yāha cúu ndihúxí uū tēe jeē ní nacāji ya: Simón jeē ní nasnání yá de Pedro. ¹⁷ Te Jacobo jíin ñani de Juan, sēhe Zebedeo. Te ni nasnání yá ndindúú de Boanerges, jeē cuní cahān: Tēe yñhi fuerza nacani jnūhun, nájnūhun yñhi fuerza taja. ¹⁸ Te sava ga de nání de Andrés, Felipe, Bartolomé, Mateo, Tomás, Jacobo sēhe Alfeo, Tadeo, Simón tēe grupo cananista, ¹⁹ jíin Judas Iscariote, tēe jeē ní nastúu de ya.

Jeē ní cacahān ñayuu jeē jejniñu ya fuerza Satanás

(Mt. 12.22-32; Lc. 11.14-23; 12.10)

Yūcuán na te ni quivi ya ñn vehe jíin tēe cáscuáha jíin yá un. ²⁰ Te ni ndutútu tucu cuehē ñayuu, te ni tuá ni cúu caji yā staā jíin de. ²¹ Te tāca jnāhan vehe ya ni caji ni jnūhun jeē súcuan cúu. Te ni quecoo de venūquihin de ya. Chi cacahān de jeē ní sana xinī yā.

²² Te suni tēe cástéén tutu ley Yaā Dios jeē ní quijicoo nde ñuu Jerusalén, ni cacahān de:

Tēe yáha ñūhun Satanás ini de, jeē cujéhu nuū tachí. Te jíin fuerza un quénehen de tachī, achí de.

²³ Te ni cana ya de jíināhan de, te ni cahān yā ñn jnūhun yátá jíin de:

¿Ndese cuu quenehen Satanás maá? ²⁴ Chi núu ñn nación sásñin máá te cuajnáhan máá, nación un má cúu ga coyūcu cáhnu. ²⁵ Te núu ñayuu ñn vehe sásñin máá te cuajnáhan máá, ñayuu un má cúu ga coyūcu cáhnu. ²⁶ Te suni súcuan Satanás jíin jnāhan tachī, chi núu sásñin máá te cuajnáhan máá, núu súcuan te ma cóo ga, chi sa suhva naa.

²⁷ Te ni ñn tēe ma cúu quivi de ini vehe tēe ndacuī jeē quenehen de ndajniñu de. Chi cánuu jeē xíhna gā cuhni de tēe ndacuī ún. Te suni súcuan cúu jeē jíhni rī Satanás te quénehen ri tachī.

²⁸ Te jendaá cahán rī jíin ró jeē iyó modo coo jnūhun cáhnu ni nuū tāca cuéchi cásaña ñayuu, te suni nuū tāca jnūhun néé cacahān i. ²⁹ Te núu cahān ndevāha i siquī Espíritu Santo, te ma cóne cáhnu ni Yaā Dios nuū i, chi sa suhva condee cuéchi siquī i ññ cáni, achí yá.

³⁰ Súcuan ni cahān yā, chi ni cacahān i jeē quénehen ya tachī jíin fuerza Satanás.

Náná yā jíin ñani yā

(Mt. 12.46-50; Lc. 8.19-21)

³¹ Yūcuán na te ni quee naná yā jíin táca ñani yā. Te ñn ña nuū quéhe, te ni tají ña jnūhun cuahān nuū yā

jeē cána ña ya. ³² Te ñayuu cáyūcu ññ xiin ya, ni cacahān i jíin yá:

Náná ni jíin táca ñani ni cáhñin nuū quéhe, te cácuni cahān jíin ní, achí i.

³³ Te ni cahān maá yá:

¿Ndé ñn cúu náná rī jíin ñani rī? achí yá.

³⁴ Yūcuán na te ni ndacoto ya nuū ñayuu cáyūcu xiin ya ún, te ni cahān yā:

Suni náná rī jíin ñani rī cácuu táca ñayuu yáha. ³⁵ Chi táca ñayuu casquícu jniñu cuní Yaā Dios, suu cácuu ñani rī, cuāha ri, náná rī, achí yá.

Jnūhun yátá síquī tēe jéte trigo

(Mt. 13.1-9; Lc. 8.4-8)

4 Te yumar ni quejéé tucu Jesús steén yā jnūhun.

Te ni cutútú cuehē ndasí ñayuu nuū yā, te jeē yúcuán ní quivi ya ni cucōo ya ini ñn barco nuū mar. Te táca ñayuu un cáyūcu i yumar. ² Te jíin jnūhun yátá ni steén yā cuehē jnūhun nuū i, te súcuan ni cahān yā:

³ Cuni nahín jíināhan ró: ñn tēe cate trigo, ni quenda de jeē cáte de. ⁴ Te ná ni quejéé de jéte de, te jecu trigo ni jitē yuhíchi. Te ni quecoo saa, ni cayejí tñ. ⁵ Te jecu gā trigo ni jitē nuū ñūhun yuū, nuū tú cuehē ñūhun. Te yachī-ni ni cane, chi tu cóquin ñūhun. ⁶ Te nuū ní cane niāndii, te ni ichī-ni, te ni casun, chi tu ní níhín nuū quihín yoho. ⁷ Te jecu gā trigo ni jitē nuū náne iñu. Te ni jehnu iñu ún, te ni jesí nuū, te tu ní jéhe nunī. ⁸ Te jecu ni jitē nuū ñūhun váha. Te ni cane, te ni jehnu, te ni jéhe cuehē nunī. Sava ni jéhe ocō uxī jeē ññ ñn nunī, te sava ga ni jéhe unī xico, te sava ga ni jéhe ciento. Achí yá.

⁹ Yūcuán na te ni cahān yā jíin de:

Tāca róhó jéé jíni sōho, na chúsóhó ró. Achí yá.

Najehē cahán yā máni jnūhun yátá

(Mt. 13.10-17; Lc. 8.9-10)

¹⁰ Yūcuán na te ni quendōo máá na yā, jíin ndihúxí uū tēe cáscuáha jíin yá, jíin jecu gā ñayuu cáhñin jíin de. Te ni cacajñuhún de ya na vé cuní cahān jnūhun yátá un. ¹¹ Te ni cahān yā jíin de:

Róhó, chi sáha Yaā Dios jeē cájecūhun ni rō jnūhun ni yisāhi yáha, ndese quívicoo ñayuu ndaha ya ndacu ya jniñu nuū i. Te ñayuu jeē cáhñin sñn siquī, chi máni jíin jnūhun yátá cáhán rī tāca jnūhun jíin i. ¹² Súcuan cáhán rī návāha vésú cájito i, te quendōo i nájnūhun jeē tú na vé ni cájito i. Te vésú cájini sōho i, te ma jécūhun ni i, te ma násāma ini i quívicoo i nuū rī, te ma cóo jnūhun cáhnu ni nuū cuéchi i, achí yá.

Jeē ní castūhun cájí yá jnūhun yátá tēe jéte trigo

(Mt. 13.18-23; Lc. 8.11-15)

¹³ Te ni cahān gā yā jíin de jíināhan de:

Núu tu cájecūhun ni rō jnūhun yátá yáha, ¿te ndese jecūhun ni rō táca gā jnūhun yátá núu súcuan? ¹⁴ Tēe jéte trigo cúu tēe scuité núu jnūhun Yaā Dios. ¹⁵ Te tri-

go jeē ni jítē yuhíchi cúu nájñuhun ánuá sava ñayuu. Chi cájini nahín i jñuhun ya, te ná ni cajini i, te quíji-ni Satanás te quénde-ni jñuhun ini anuá i. ¹⁶ Te trigo jeē ni jítē nuū ñuhun yuū, chi cúu nájñuhun ánuá sava ñayuu cájini nahín jñuhun, te yachī-ni cájetáhú i te cá-cusiñ ni i jíin. ¹⁷ Te tu cúcutú jñuhun ún ini anuá i, te jecu-ni quiv̄i cájetáhú i. Te núu ni quejéé jñúndóho, chí jíto xeēn ñayuu i siqūi jñuhun ún, te quéjéé nácani yátá ni i. ¹⁸ Te jeē ni jítē nuū náne iñu cúu nájñuhun jecu gā ñayuu. Chi vēsú ni cajini sōho i, ¹⁹ te cándihv̄i ni i siqūi jeē iyó ini ñayivi yáha. Te cá-cuni i cucúcá i, te stáhú un i jeē cutóo ni i siqūi táca ndajniñu. Te ndih̄i jeē yáha cá-cujnéñu i jíin, te jési nuū jñuhun ya, te tu íje i jíin jñuhun ya. ²⁰ Te trigo jeē ni jítē nuū ñuhun váha cúu nájñuhun ñayuu cájini nahín jñuhun, te cájetáhú i, te cáhije i jíin jñuhun ya. Te sava i cúu nájñuhun nunī jeē jéhe ocō uxī jeē ññ, te sava i jéhe unī xico, te sava ga i jéhe ciento. Achí yá.

Jñuhun yátá síqūi lámpara

(Lc. 8.16-18)

²¹ Suni ni cahān yā jíin de:

Núu nástñin ñayuu ññ lámpara, ¿a chúne i chíji ññ cajón chí chíji jíto? Tuú, chí jéni i nuū sucún návāha cundijin. ²² Te suni súcuan, tu iyó ni ññ jñuhun sáhi jéé ma cúni ñayuu, chí ndih̄i táca jñuhun natūu ndijin te cuni ñayuu. ²³ Táca rōhó jéé jíni sōho, na chúsóhó ró, áchí yá.

²⁴ Te suni ni cahān yā jíin i:

Cuni sōho vāha ró. Chí cūhva jeē chusóhó ró jñuhun Yaā Dios, suni cūhva un cuáha ya nuū rō, te víhyá gā cuáha ya nuū maá ró jeē chusóhó váha ró. ²⁵ Chí ñayuu je jécūhun ni, stéén gā yā nuū i. Te ñayuu tu cándije, maá jecu jeē jiní i ún, sa suhva naa. Achí yá.

Jñuhun yátá síqūi trigo jeē jéhu

²⁶ Te ni cahān gā yā:

Súcuan cúu jeē ndácu Yaā Dios jniñu nuū ñáyuu: Cúu nájñuhun trigo jeē ní jete ññ tēe. ²⁷ Yūcuán na te quíxí de te ndónnda de, te súcuan jíca quiv̄i cuahān. Te trigo un cáne te jéhu. Te maá de tu jíin de ndese cúu jeē jéhu. ²⁸ Chí maá ñuhun sáha jeē jéhu trigo, xīhna gā yucū, sáa te cáne yoco, yūcuán na te íje maá núnī. ²⁹ Te núu ni cuaan trigo un, te quéjéé ñáyuu cájehnde i, chí je ni jinū quiv̄i tahndé. Achí yá.

Jñuhun yátá síqūi ndiquin mostaza

(Mt. 13.31-32; Lc. 13.18-19)

³⁰ Te suni ni cahān yā:

Na cáhān rī ññ jñuhun yátá návāha cuni rō ndese ndúcuehē ñayuu jeē ndácu Yaā Dios jniñu nuū.

³¹ Ndúcuehē i nájñuhun jéhu ññ ndiquin mostaza jeē jéquin i nuū ñuhun. Te yūcuan cúu ññ ndiquin lúlí gá vēsú táca ndiquin jeē iyó. ³² Te ná ni jequin i, te cáne te

jéhu ga vēsú táca gá yucū, te cúnáhu ndaha. Te táca saa chí sáha tī tacā tī nuū cuándahū xinī ún. Achí yá.

Jeē máni jñuhun yátá cáhān yā jíin i

(Mt. 13.34-35)

³³ Te cuehē jñuhun yátá súcuan ni cahān yā jíin ñáyuu, núu nasaa cánda i jecūhun ni i. ³⁴ Te táca jéé ni stéén yā, máni maá jñuhun yátá ní cahān yā jíin i. Te nuū tēe cáscuáha jíin yá chí ni nacastūhun cájí yá jñuhun ún.

Jeē ní jecuiññ tachī níhin jíin mar ni sáha ya

(Mt. 8.23-27; Lc. 8.22-25)

³⁵ Te jeē cuácuaa quiv̄i ún, te ni cahān yā jíin tēe cáscuáha jíin yá:

Na yáha yó quíhñ yō inga lado mar, achí yá.

³⁶ Te ni casquéndōo de ñayuu cuehē ún, te ni quiv̄i-coo de ini barco nuū je íne Jesús, cuangoo de jíin yá. Te suni cuangoo jecu gā barco jíin de jíināhan de. ³⁷ Te ni jecuiññ ññ tachī níhin, te ni stónnda ndute mar, te ni quiv̄i ini barco. Te je yajni chitú ndute ini barco. ³⁸ Te Jesús cáttú yá yatā de ini barco, quíxí yā te yíhñ ññ sah-ma cástíhi xinī yā. Te ni castónnda de ya, te ni cacahān de:

Maestro, ¿a tu sáha ní cuenta jeē quēe yó chíji ndute te cuu yō? achí de.

³⁹ Te ni ndocuiññ yā, te ni cahān yā nuū tachí níhin un jíin núu mar:

Jecuiññ te nayúu-ni coo ró, áchí yá.

Te ni jecuiññ tachī, te ni cuu nayúu ññ-ni. ⁴⁰ Te ni cahān yā jíin de jíināhan de:

¿Naun cáyūhú ndasí ró? ¿Naun tu cá-candije ró jéé cácu ró sáha rí?

⁴¹ Te yōhyo ni cayūhú de, te ni cacahān de jíin jñāhan de:

¿Ndé ññ ga cúu tēe yáha jéé nde tachī níhin jíin mar cájetáhú jéé cahān de? áchí de.

Tēe Gadara jeē ndóho tachī

(Mt. 8.28-34; Lc. 8.26-39)

5 Te ni jinū Jesús jíin de jíināhan de inga lado mar, región Gadara. ² Te ná ni quenda ya ini barco un, te ññ tēe ñuhun tachī ini, ni quenda de nde nuū yíndūji ndīyí, te ni quee de nuū yā. ³ Tēe un ndéé de nuū yíndūji ndīyí. Te tu jéjníñu jeē jíhni ñayuu de, ni jíin cadena. ⁴ Chí cuehē jínu ni conuhñi jehē de ndaha de jíin cadena. Te táca jínu jéhnde de, te sácuéché de. Te tú ni ññ cúndeyí jíin de. ⁵ Te nduú ñuú jíca de yucu jíin núu yíndūji ndīyí, te cána cóhó de, te stújí de maá de jíin yúu. ⁶ Te náa jíca gá vēji Jesús, te ni jito de ya. Te jínu de ni quee de nuū yā, te ni jecuiññ yití de nuū yā. ⁷ Te ni cana cóhó de:

¿Naun vēji ní núu ná, Jesús Sēhe Yaā Dios, Yaā cujéhu téyí? Cáhān ndahú ná jíin ní, jíni nahín Yaā Dios, ma stóho ní sáha, áchí de.

⁸ Súcuan ni cahān de, chi je ni cahān Jesús:

Táchī, quenda ini tēe yáha quíhīn rō.

⁹ Te ni cajñūhun yá de:

¿Na vé naní rō?

Te ni cahān de:

Legión naní ná, chi cuehē tachī ñūhun ini ná, áchí de.

¹⁰ Te ni cahān ndahú ndasí de jíin yá jeē ma tájí yá tachī quendacoo región ún. ¹¹ Te yajni yucu yúcuan cáhīin cuehē quínī cájitu tī. ¹² Te tachī jeē ñūhun ini tēe un ní cacahān ndahú jíin yá:

Núu tají ní sãñá, te cuāha ní jñūhun quíñicoo ná ini quínī yūcuán, áchí.

¹³ Te Jesús ni jēhe ya jñūhun. Te ni quendacoo tachī ún ini tēe ún, te ni quíñicoo ini quínī, te íyó nájñūhun uū mil tē. Te quínī un ní cajinu tī ni ñingoo tī ñn yucáva, ni quíñicoo tī nuū mar. Te ni ndaquíñi tī ndute, ni cajihī tē.

¹⁴ Te tēe cándito tī, ni cajinu de cuangoo de jeē ní cayūhú de. Te ni jinūcoo de ni cacastūhún de nuū ñáyuu ñuu un jíin ñáyuu tāca rancho. Te cuangoo ñayuu un cuácondēhé i na vé ni cuu. ¹⁵ Te ni jinūcoo i nuū íne Jesús, te ni cajito i nuū tēe ni ñuhun cuehē tachī ini. Te néne de, te ñūhun de sahma, te je ni nducájí xíní de. Te ni cayūhú ñáyuu ún. ¹⁶ Te tēe ní cajito, ni canacani de jñūhun nuū ñáyuu, ndese ni nduvāha tēe ni ñuhun tachī ini, jíin ndese ni candoho quínī ún. ¹⁷ Yūcuán na te ni caquejéé i cacahān ndahú i jíin yá jeē na cújiyo ya región yúcuan quíhīn yā.

¹⁸ Te ni ndívi ya ini barco. Te tēe ni ñuhun tachī ini un ní cahān ndahú de jíin yá jeē na cuāha ya jñūhun quíhīn de jíin yá. ¹⁹ Te Jesús tu ní jēhe ya jñūhun, chi ni cahān yā jíin de:

Cuánuhun vehe ró núu jñáhan ró, te nacani ró jñūhun nuū i ndese yōhyo jéhnū jñíñu ni sáha máá Jítoho rō jíin ró, te ndese ni cundáhú ni yā rohó, áchí yá.

²⁰ Te ni quenda de cuahān de, te ni quejéé de nácani de jñūhun tāca ñuu Decápolis ndese yōhyo jéhnū jñíñu ni sáha Jesús jíin de. Te ndívi ñayuu un ní canaa ni i cájini nahín i.

Jñūhun sēhe síhí Jairo jíin ñahan ní quehé yusáhma ya
(Mt. 9.18-26; Lc. 8.40-56)

²¹ Te ni nayāha tucu Jesús cuanuhun yā inga lado mar jíin barco. Te ni quecoo cuehē ñayuu nuū yā, nuū íne ya yumar. ²² Te ni quee ñn tēe cújéhnū ini vehe íi sinagoga, naní de Jairo. Te ná ni jito de nuū yā, te ni jecuíñī yití de nuū jehé yā. ²³ Te ni cahān ndahú ndasí de jíin yá:

Sēhe síhí ná je yajni cuu i. Na quíhín yō vehe ná te soó ní ndaha ní síquē i návāha na ndúvāha i te cotecu i, áchí de.

²⁴ Yūcuán na te cuahān yā jíin de. Te cuehē ñayuu cándiquín i ya, te ni chitú níhin i xiin ya cuangoo i. ²⁵ Te mēhñu ñáyuu un cuáhān ñn ñahan cúhú, jeē ní cuu uxí uū cuiyā ndóho ña cuehyí ñíñí. ²⁶ Te yōhyo ni ndoho ña, chi ni jexin ña tāca jéé névāha ña jíin cuéhē tēe

tájna, te tu ní jéjníñu jeē ndúvāha ña, chi sa suhva víhyá gā sáha. ²⁷ Te ñahan yáha ná ni níhīn ña jñūhun Jesús, te ni quee ña ichi yátá yā mēhñu ñáyuu cuehē ún, te ni quehé ña yusáhma ya. ²⁸ Chi ni jeni ni ña: Vēsú maá sahma ya na níhín rī quehé rí, te nduvāha ri, jeni ni ña. ²⁹ Te ni jecuíñī-ni ñíñí ña, te ni jini ña jeē ní nduvāha ña cuehyí ún. ³⁰ Te Jesús ni jini yā jeē ní nduvāha ñn ñayuu jíin fuerza yā. Te ni ndió cóto ya nuū ñáyuu cuehē, te ni cahān yā:

¿Ndé ñn ni quehé sahma ri? Achí yá.

³¹ Te tēe cáscuáha jíin yá, ni cacahān de:

Jíto ní jéé ñáyuu cuehē yāha ní chitú níhin i xiin ní te cáquíñi i níhín ñíí cáni ichi, te cájñūhun ní ndé ñn ni quehé sahma ní.

³² Te máá yá jíto ya cháha chúcuan, cúní yā jeē na cáchi ñayuu ni sáha. ³³ Te ñahan un yúhú ña te quísi i ña, te je jíin ña jeē ní nduvāha ña. Te ni quee ña, te ni jecuíñī yití ña nuū yā, te ni cachi ña ndíñi ndese ni cuu jíin ña. ³⁴ Te ni cahān yā jíin ña:

Séhē, ni candíje ró jéé cuu nasávāha ri rohó, te jeé yúcuan ní nduvāha ró. Cuáhán te na ndúsíñi ni rō, chi je ni nduvāha ró cuehyí ní ndoho ró, áchí yá.

³⁵ Te níñi cáhán gā yā súcuan, te ni quecoo ñayuu cáyúcú vehe tēe cújéhnū ini vehe íi sinagoga, te ni cacahān i jíin de:

Je ni jihí sēhe síhí ní. Te ma sajnēñu ga ní Maestro, achí i.

³⁶ Te Jesús tu ní sáha ya cuenta jeē súcuan cacahān i, te ni cahān yā jíin tēe cújéhnū ini vehe íi sinagoga:

Ma yūhu ró, chi candíje ró jéé nastécu rī i, áchí yá.

³⁷ Te tu ní jéhe ga yā jñūhun condiquín ñayuu yā, chi máá-ni Pedro jíin Jacobo, jíin Juan ñani Jacobo. ³⁸ Te ni jinū yā vehe tēe cújéhnū ini vehe íi sinagoga, te ni jito ya ñayuu, cácuvaā i, te cándahyū i, te cácana cóhó i.

³⁹ Te ni quíñi ya, te ni cahān yā:

¿Najehē yōhyo casávaā rō te cándahyū rō? Sūchi síhí yáha, tu ní jíhí i, chi quíxi-ni i, áchí yá.

⁴⁰ Te ni cajecú catá i jeē ni cahān yā. Te ni quenehen ndíñi ya i cuahān i nuū quehé. Te ni cana ya máá-ni tátá jíin náná sūchi síhí un, jíin tēe cáhīin jíin yá, te ni quíñi ya jíin de nuū catú sūchi síhí ní jihí ún. ⁴¹ Te ni jññi ya ndaha i, te ni cahān yā jíin i:

Talita cumi, achí yá. Te jñūhun un cúní cahān: Síhí, cáhán rī jíin ró, ndocuíñí, achí yá.

⁴² Te ni ndocuíñí-ni sūchi síhí un, te ni nacaca i, chi je íyó i uxí uū cuiyā. Te yōhyo ni canaa ni ñayuu cájito i.

⁴³ Te ni ndacu níhin ya jñíñu nuū i jíinánhan i jeē ma cáchi cuítí i nuū ni ñn. Te ni cahān yā jeē na cuāha ña jeē cáji sūchi síhí.

Jeé cuánuhun yā ñuu Nazaret

(Mt. 13.53-58; Lc. 4.16-30)

6 Te ni quenda Jesús yūcuán, te cuanuhun yā ñuu yā. Te tēe cáscuáha jíin yá cuangoo de jíin yá. ² Te máá quíñi ndétātu ní steén yā jñūhun ini vehe íi sina-

goga. Te cuehē ñayuu ni canaa ni i cájini nahín i, te ni cacahān i:

¿Ndé nuū ní cutūhva tēe yáha tāca jnúhun yáha? ¿Te ndese cúu jeē cahán de jnúhun ndíchí yáha jíin jéé sáha de jniñu jéhu yáha? ³ Chi tēe yáha cúu carpintero, te sēhe María cúu de, te ñani Jacobo jíin José jíin Judas jíin Simón cúu de. Te suni cáyūcu cuáha de jíin yó yāhá. Achí i.

Te súcuan ni cacujéé ni i nuū Jesús. ⁴ Te ni cahān yā jíin i:

Tāca tēe nácani jnúhun Yaā Dios, íyó yíñúhún ñayuu jíin de, chi máni ñayuu ñuu maá de, jíin jnáhan de, jíin ñáyuu vehe de cúu jeē tu íyó yíñúhún jíin de. Achí yá.

⁵ Te tu ní cúu sáha ya cuehē jniñu jéhu yūcuán. Chi jecu-ni ñayuu cácuñu ni soó yá ndaha ya siquí i, te ni nasávaha ya i. ⁶ Te náa ni yā jíto ya jeē tu cácuñe ñayuu jijnáhan i. Yūcuán na te ni jica cuu ya tācá ñuu yajni, ni steén yā jnúhun.

Jeē ní tají yá ndihúxí uū de cuanacani de jnúhun

(Mt. 10.5-15; Lc. 9.1-6)

⁷ Te ni cana ya ndihúxí uū tēe cáscuáha jíin yá, te ni tají yá ndihuū ndihuū de quingoo de. Te ni sáha ya jeē cóndiso jniñu de quenehen de tachí ini ñayuu. ⁸ Te ni ndacu ya jeē tú na vé condiso de jeē cuajniñu de ichi, ni ñunu, ni staā, ni xuhún. Chi máa vara-ni condahá de. ⁹ Te quihí de ndijēn, te ma quihín de jíin úu sahna, achí yá. ¹⁰ Te suni ni cahān yā jíin de:

Na-ni vehe núu ni quíñicoo ró, te yūcuán coyūcu ró ndé quenda tucu ró quihín rō inga ñuu. ¹¹ Te núu ñuu tu cájetáhu i róhó, ni tu cúní i cuni nahín i jnúhun cahān rō, na quéndacoo ró yúcuán, te scóyo ró tēcachá jehē rō, te súcuan stéén rō jeē iyó cuéchi i jeē tu ní cá-jetáhu i. Jendaá cahán rí jíin ró jeē quiví coo juicio te xeēn gā coo castigo siquí ñuu casáha súcuan vēsú siquí ñuu Sodoma jíin ñuu Gomorra nuū ní casáha ndasí ñáyuu cuéchi.

¹² Te ni quendacoo de cuahān de, te ni canacani de jnúhun jeē na nácani ni ñayuu jeē stóo i cuéchi i. ¹³ Te suni ni caquenehen de cuehē tachí ini ñayuu. Te ni cachihí de aceite cuehē ñayuu cácuñu, te ni canduvāha i.

Jeē ni jíhí Juan tēe scuándute

(Mt. 14.1-12; Lc. 9.7-9)

¹⁴ Te rey Herodes ni jini jnúhun de jnúhun Jesús, chi ni jitē núu jnúhun ya ñí cáhnu. Te ni cahān de:

Tēe yúcuán cúu Juan tēe ni scuándute, te ni natecu de. Jeē yúcuán íyó poder de sáha de jniñu jéhu. Achí de.

¹⁵ Te sava ga ñayuu ni cacahān i:

Tēe un cúu Elías jeē ní nacani jnúhun jenahán.

Te sava ga i ni cacahān:

Tuú chi ñuu tēe nácani jnúhun Yaā Dios cúu de, nájnūhun tēe ni canacani jnúhun ya nde jenahán, achí i.

¹⁶ Te ná ni jini Herodes, te ni cahān de:

Tuú chi yúcuán cúu Juan jeē ní ndacu ri jniñu ni tah-ndē xiní, te ni natecu de núu súcuan, achí de.

¹⁷ Chi máa Herodes ni ndacu de jniñu jeē na quiví Juan vecāa, jíin jéé na cónuhñí de jíin cadena. Súcuan ni sáha de jeē siquí Herodías, ñasihí ñani de Felipe. Chi Herodes ni quihin de ña jeē cúu tucu ña ñasihí de. ¹⁸ Te Juan ni cahān de nuū Herodes:

Tu íyó ley jeē cóndeca ró ñasihí ñani rō, achí de.

¹⁹ Te jeē yúcuán Herodías ni jito uhū ña Juan, te cúní ña jeē na cúu de, te tu ní níhín ña modo. ²⁰ Chi Herodes yúhú de cahni de Juan, chi jíin de jeē tēe ndaā tēe ndoo cúu Juan. Te jeē yúcuán ní jesí de jeē nducú ña jeē cúu Juan. Te nújnahān ni de jíin nahín de jnúhun cáhān Juan, vēsú tu jécūhun vāha ni de. ²¹ Te ni quee ññ quiví jeē ní cundeyí Herodías. Chi ni sáha Herodes ññ vico quiví ní cacu de, te ni jēhe de jeē ní cacuxíni tēe cándiso jniñu nuū de, jíin tēe cácuu capitán, jíin tēe cácujuhū región Galilea. ²² Te ni quiví sēhe síhí máa Herodías, ni jita jéhé i nuū chitú un. Te ni cacuxí ni rey Herodes jíin tēe cácuuxíni jíin de. Te ni cahān de jíin súchi síhí un:

Cacān na vé cúní rō, te cuāha ri nuū rō, achí de.

²³ Te ni cahān teyí de jeē cuáha de núu na vé cúní i cacān i, vēsú nde sava región jeē yíhí ndaha de. ²⁴ Te ni quenda i, ni jecajnúhún i náná i:

¿Na vé cacān na núu de? achí i.

Te ni cahān ña:

Xiní Juan tēe scuándute cacān rō nuū de, achí ña.

²⁵ Yūcuán na te ni ndiví-ni i nuū rey, te ni cahān i:

Cúní na jéé vijna ñúhún-ni cuāha ní xiní Juan tēe scuándute, cone nuū ññ cohō, achí i jíin de.

²⁶ Yūcuán na te ni cucuíhyá ndasí ni rey un jeē ní cundeyí Herodías jeē cúu Juan. Te siquí jeē ní jéjnúhun téyí de, jíin jéé ní cajini sōho tēe cáyeji staā jíin de, jeē yúcuán tu ní cúní de sásáhān de jeē ní jícān i. ²⁷ Te ni tají-ni de ññ soldado jeē quíquihín de xiní Juan. ²⁸ Te ni jehēn soldado un vecāa, te ni jehnde de xiní Juan. Te ni quee de jíin xiní Juan, íne nuū ññ cohō. Te ni jēhe de nuū súchi síhí un, te máa i ni jēhe i nuū naná i.

²⁹ Te tēe cáscuáha jíin Juan ni canihín de jnúhun, te ni jengoo de, ni candonehen de yiquí cúñu Juan, te ni cachindūji de.

Jeē ni scájí yā uhūn mil tēe

(Mt. 14.13-21; Lc. 9.10-17; Jn. 6.1-14)

³⁰ Yūcuán na te tēe cácuu apóstol jeē ní tají yá cuan-goo nacani jnúhun, ni ndecoo de nuū Jesús. Te ni canacani de nuū yā tācá jniñu ni casáha de, jíin jnúhun ni castéén de. ³¹ Te ni cahān yā jíin de:

Na quíngoo yó ññ lugar nuū tú ñayuu, te ndetātu yó jecu, achí yá.

Chi cuehē ñayuu cuahān i vēji i nuū yā, te ni tu ní núne ya jeē cáji yā staā jíin de. ³² Yūcuán na te ni quiví ya ññ barco jíin táca tēe apóstol un, te cuangoo sññ ya jíin de ññ lugar nuū tú ñayuu. ³³ Te cuehē ñayuu ni caji-

to i jeē cuahán yā jíin de, te ni canacuni i jeē maá yá cúu. Te nde tācá ñuu ni quendacoo i, te yachī cuangoo i, te xīhna gā i ni jinūcoo vēsú maá yá. ³⁴ Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, chi cúu i nájñuhun lanchi jeē tú jito-ho tī. Te ni steén yā cuehē jñuhun nuū i. ³⁵ Te nuū ní ini, te tēe cáscuáha jíin yá, ni quecoo de nuū yā, te ni cacahān de:

Je ni ini, te yāhá chi tú na ñayuu yúcu. ³⁶ Núu súcuan te tají ní ñayuu na quíngoo i tāca rancho jíin ñuu yajni, te cuaan i staā caji i, chi tú na vé cándiso i caji i, áchí de.

³⁷ Te ni cahān Jesús jíin de:

Cuāha máá ró jeē cáji i, áchí yá.

Te ni cacahān de:

¿Te ndese cuu? Chi ni ma cúu vēsú núu quicuaan ná ndé uū ciento denario staā caji ñayuu, achí de.

³⁸ Te ni cahān yā jíin de:

¿Nasaa staā cánevāha ró? Cuacondēhe, áchí yá.

Te nuū ní cajini de, te ni cacahān de:

Uhūn-ni staā jíin úū chācá íyó, áchí de.

³⁹ Yūcuán na te ni cahān yā jíin ñayuu jeē na cúcōo sñin i cuenta grupo nuū íte. ⁴⁰ Te ni cacucōo sñin ciento ciento i, jíin cincuenta cincuenta i. ⁴¹ Te ni quihin ya ndihúhún staā jíin úū chācá un, te ni ndacoto ya ichi ándiví, te ni nacuatáhú yá. Te ni tahú cuéchí yá staā ún, te ni jēhe ya nuū tēe cáscuáha jíin yá, te máá de ni casaja de nuū ñayuu cuehē ún. Te suni ni jēhe ya ndindúú chācá, ni casaja de nuū i. ⁴² Te ndivii i ni cayejí, te ni candutú chíji i. ⁴³ Yūcuán na te ni canastútú de pedazo staā jíin cháca jéé ní quendōo, te ni chitú úxí uū jīca. ⁴⁴ Te tēe ni cayejí, chi uhūn mil de cúu.

Jeé ní jica jéhé yá nuū mar

(Mt. 14.22-27; Jn. 6.16-21)

⁴⁵ Yūcuán na te ni cahān-ni Jesús jíin tēe cáscuáha jíin yá jeē na quívicoo de barco, te cosnūú de yāha de inga lado mar ñuu Betsaida. Te máá yá chi natají yá ñayuu quinhun i, te sáá te suni quihīn yā. ⁴⁶ Te nuū ní cuu ni natají yá i, te ni caa ya yucu cuacacān tahú yā. ⁴⁷ Te jeē ní cuaa, te barco un je ni cuu sava nuū mar cuahān, te máñúhún-ni ya ni quendōo nuū ñuhun íchi. ⁴⁸ Te ni jito ya jeē yóhoyo jñúndóho cáscaca de barco, chi nīhin vēji tachī ichi núú de. Te jeē yínee gā ni quee ya nuū de, jíca jéhé yá nuū mar. Te yāha ya nuū de quihīn yā nuú. ⁴⁹ Te ni cajito de jeē jíca ya nuū mar, te ni cajeni ni de jeē jihná cúu, te ni cacana cóhó de. ⁵⁰ Chi ndihí de ni cajito nuū yā, te ni cayūhú ndasí de. Te ni cahān-ni ya jíin de:

Ndeyí coo ni rō, te ma yūhu ró, chi máá rí cúu, áchí yá.

⁵¹ Te ni quívi ya ini barco un, te ni jecuíñi-ni tachī. Te yóhoyo ni canaa ni de cájito de. ⁵² Chi cándāa néé gá jeē níjnūn de, chi ni jíin jniñu jéhu jeē ní nducuehē staā, tu ní cájecūhun ni de jeē maá yá cúu Yaā ní tají Yaā Dios.

Jeé ní nasávāha ya ñayuu cácuñu región Genesaret

(Mt. 14.34-36)

⁵³ Te ni quenda jíyo ya jíin de nuū mar ún, ní jinū yā región Genesaret. Te yundúte un ní cajihni de barco. ⁵⁴ Te nuū ní quenda ya jíin de ini barco, te ñayuu yúcuñu ni canacuni-ni i ya. ⁵⁵ Te yachī ni jengoo i tācá ndañúú yūcuán, te ni caquindeca i ñayuu cácuñu, cáyosó i nuū camilla, vējicoo ñayuu nuū ní jito i íne ya. ⁵⁶ Te ndé-ni cúu-ni núu ni quívi ya, núu ñuu lulí, chí ñuu cáhnu, chí rancho, te cájequin i ñayuu cácuñu yuhíchi, te cácahān ndahú i jíin yá jeē na quéhé i vēsú yusáhma ya. Te tāca ñayuu jeē ní caquehé sahma ya, ni canduvāha-ni i.

Siquí ndese cújñehén ñayuu

(Mt. 15.1-20)

7 Yūcuán na te tēe grupo fariseo jíin jecu tēe cástéén tutu ley Yaā Dios, ni quendacoo de ñuu Jerusalén, te ni quecoo de nuū Jesús. ² Te tēe un ní cajito de jeē sava tēe cáscuáha jíin Jesús, ni cayejí jnehén de staā, chi tu ní cáscuáha de costumbre jeē nándahá de nuū Yaā Dios. Te ni cacahān siquí de. ³ Chi tēe fariseo jíin ndihí ñayuu hebreo, névāha i costumbre jehán jéé ma cáji i staā núu tu nandahá váha i xīhna gā. ⁴ Te núu ni ndecoo i jeē ni jéngoo i nuū yáhu, te tu cáyeji i te núu tu nandahá i. Te íyó cuéhé gā costumbre jehán jeē casquícu i, nájñuhun jeē ndúndoo taza, tñdohō, cohō cáa, jíin jíto. ⁵ Te tēe fariseo jíin tēe cástéén tutu ley Yaā Dios, ni cacajñuhún de ya:

Tēe cáscuáha jíin ró, ¿naun tu cáscuáha de costumbre ñayuu jehán? Chi sa cáyeji jnehén de staā, achí de.

⁶ Te ni cahān yā jíin de:

Ndaā ni nacani Isaías jñuhun siquí rō jijnáhan ró jéé tēe stáhú-ni cácuu ró. Chi súcuan ni tee de jñuhun ni cahān Yaā Dios nde jehán:

Ñayuu yáha chi máá yuhu-ni i cájetáhú i ruhū, te nasūu ndé jíin ini jíin ánuá i.

⁷ Te cáchiñúhún sáa-ni i ruhū, chi jñuhun cástéén i cúu jniñu ní candacu tēe, te nasūu jéé ní ndacu máá rí cúu.

Achí Yaā Dios. Achí Isaías. ⁸ Súcuan cácuu ró, chi ni casiáá rō jniñu ní ndacu Yaā Dios nuū rō, te cáscuáha ró costumbre jeē ní cajequin ñayuu, jeē ndúndoo tñdohō jíin taza. Te cuehē gā costumbre súcuan cáscuáha ró, áchí yá.

⁹ Te suni ni cahān yā:

Cásiáá rō jniñu ní ndacu Yaā Dios, návāha squícu ró costumbre ni cajequin máá ró. ¹⁰ Chi Moisés ni cahān de: Coo yíñuhún ró jíin tátá rō jíin náná rō. Te núu ndé ññ cahān siquí tátá chí síquí naná, na cúu nahín. Achí Moisés. ¹¹ Te máá ró chi cácahān rō jeē cuu cahān ññ tēe jíin tátá de náná de: Ma cúu chindéé ñhán ná níhín cuáha na jéé cáji ni jéé cúhun ní, chi ndihí jeē névāha ná, chi Corbán cúu, áchí ró. (Te jñuhun Corbán cuní cahān jeē ni sócō nuū Yaā Dios.) ¹² Te cácahān rō

jeē núu súcuan cahān ñn tēe, te tuá cánuú chindéé ñáhán de tátá de náná de. ¹³ Te súcuan cástévi ró jniñu ní ndacu Yaā Dios, jeē siquí costumbre ni cajequin ñayuu jenahán vēji. Te cuehē gā jniñu súcuan cásáha ró, áchí yá.

¹⁴ Te ni cana tucu ya ñayuu cuehē ún, te ni cahān yā jíin i:

Cuni sōho vāha ró jíinahan ró, te chuhun ni rō: ¹⁵ Tā-ca jēé iyó, te núu ni quívi yuhu ñayuu te tu cújnéhén i sáha. Chi jeē quéndá ini anuá ñayuu, yūcuan cúu jeē cujnéhén i sáha. ¹⁶ Tāca rōhó jēé jíni sōho, na chúsóhó ró, áchí yá.

¹⁷ Te ni stóo ya ñayuu cuehē ún, te ni quívi ya ini vehe. Te tēe cáscuáha ún, ni cacajnūhún de ya siquí jnúhun yátá yáha jēé ni cáhān yā. ¹⁸ Te ni cahān yā jíin de:

¿A máá ró suni ná tu jecūhun ni rō, chí naún? ¿A tu cájini rō jeē tāca jēé quívi ini ñayuu, ma cúu cujnéhén i sáha? ¹⁹ Chi tu quívi ini anuá i, chí chíji i quívi, te quéndá-ni cuahān, achí yá.

Súcuan ni steén yā jeē tāca jēé yéji ñayuu, tu cújnéhén ánuá i sáha. ²⁰ Te ni cahān gā yá:

Jeē quéndá ini anuá ñayuu, yūcuan cúu jeē cujnéhén i sáha. ²¹ Chi nde ini anuá ñayuu quéndá jeē jéni néé ni, jeē casíquí ndéé jnāhan, jeē jíca jnéni, jeē jéhni ndíyi, ²² jeē sacuíhná, jeē ndíyo ni ndajniñu jnāhan, jeē sáha néé, jeē stahú jnāhan, jeē máni cuēchi sáha, jeē cucuésún ni, jeē cahān yāa síquí jnāhan, jeē sandúxi máá, jeē canéé xínī. ²³ Tācá jniñu néé yáha, máni ini anuá ñayuu quéndá, te cújnéhén i sáha, áchí yá.

Ñahan inga nación jeē ní candíje ñhín

(Mt. 15.21-28)

²⁴ Te ni quenda ya yūcuan cuáhān yā región Tiro jíin Sidón. Te ni quívi ya ñn vehe, te cúní yā jeē tú ni ñn ñayuu cuni jeē íne ya yūcuán. Te vēsú súcuan, te tu ní cúu cone sāhi yá. ²⁵ Te ñn ñahan íyó séhe síhí ña jeē ñúhun tachí ini i, ni ñhín-ni ña jnúhun jeē íne ya. Te ni quee ña, te ni jecuíñi yití ña nuū jehé yā. ²⁶ Te ñahan ñuu jíca cúu ña, chí nde Sirofenicia cúu nación ña. Te ni cahān ndahú ña jíin yá jeē na quénehen ya tachí ini séhe síhí ña. ²⁷ Te ni cahān Jesús jíin ña:

Nasūu núu maá ní vēji ná, chí máni nuū ñayuu cácuu séhe Israel. Chi tu íyó váha jeē quénde yō staā séhe te cuāha yó núu ína, achí yá.

²⁸ Te ni cahān ña:

Jendaá cahān ni Tátā, te chindéé ñáhán ní sáña vēsú cúu ná nájnūhun ina. Chi suni máá tē cáhīn tē chíji mesa, cániñn tē staā cuechí jēé cóyo yuhu sūchi lúlí cáyeji tē, achí ña.

²⁹ Yūcuán na te ni cahān yā jíin ña:

Vāha ni cahān ní. Cuáhán ní núu súcuan, chí je ni quenda tachí ún ini séhe síhí ní, achí yá.

³⁰ Te ni najinū ña vehe ña, te ni jito ña jeē catú séhe síhí ña nuū jíto, te je ni quenda tachí ún ini i.

Jeē ní nasávāha ya ñn tēe sóhó cástété

³¹ Te ni quenda tucu ya región Tiro, ni yāha ya Sidón jíin táca ñuu Decápolis, te ni jinū yā mar Galilea. ³² Te ni caquindeca i ñn tēe sóhó cástété nuū yā, te ni cacahān ndahú i jíin yá jeē na sóo yá ndaha ya siquí de.

³³ Te ni quenehen sñin ya de nuū ñayuu cuehē ún, te ni chune ya xinī ndáha ya sōho de, te ni tesñi yá, te ni quehé yá yaá de. ³⁴ Te ni ndacoto ya ichi ándiví, te ni jítū ni yā, te ni cahān yā:

Efata, achí yá, jeē cuní cahān: Nanune.

³⁵ Te ni nanune-ni sōho de, te ni nduvāha yáa de, te ni nacahān vāha de. ³⁶ Te ni ndacu ya jniñu nuū ñayuu un jēé ma cáchi i nuū ní ñn. Te vēsú ni cahān ñhín ya jíin i, te víhyá gā ni cajete i jnúhun. ³⁷ Te yōhyo ni canaa ní i cájito i, te ni cacahān i:

Vāha sáha ya tācá jniñu, chí nde tēe cásóhó, cánacu-ni sōho de, te tēe cándāa ñhín, cánahān vāha de sáha ya, achí i.

Jeē ni scáji yā cuūn mil ñayuu

(Mt. 15.32-39)

8 Te tiempo un ní candutútú cuehē ndasí ñayuu, te tuá na vé caji i. Te ni cana Jesús tēe cáscuáha jíin yá, te ni cahān yā:

² Cúndáhú ni rī ñayuu yāhá, chí je ni cuu unī quívi cáyūcú i jíin rí, te tuá na vé caji i. ³ Te núu natají rí i quínuhun ndite i vehe i, te cuīta íi i sava ichi, chí íyó sava i jeē jíca véjicoo i, áchí yá.

⁴ Te tēe cáscuáha un ní cacahān de:

¿Te ndé nuū ñhín yō staā caji i jíinahan i? Chi yāhá tú na ñayuu yúcu, áchí de.

⁵ Te ni cajnúhun yá de:

¿Nasaa staā cánevāha ró?

Te ni cacahān de:

Uxā-ni, áchí de.

⁶ Yūcuán na te ni cahān yā jíin ñayuu cuehē un jēé na cūcōo i. Te ni quihin ya ndíhúxá staā ún, te ni nacuatáhú yá nuū Yaā Dios. Te ni tahú cuéchí yá, te ni jēhe ya nuū tēe cáscuáha jíin yá. Te máá de ni casaja de nuū ñayuu cuehē ún. ⁷ Te suni cándiso de jecu chācá lúlí. Te ni nacuatáhú yá siquí, te ni cahān yā jeē suni saja de jíinahan de. ⁸ Te ndíhí i ni cayejí, te ni candutú chíji i. Yūcuán na te ni canastútú de pedazo jeē ní quendō, te ni chítú úxā jíca. ⁹ Te tēe ni cayejí un, íyó nájnūhun cuūn mil de. Te ni nacuatáhú yá nuū ñayuu ún, te cuanungoo i. ¹⁰ Yūcuán na te ni ndívi-ni ya ini barco jíin tēe cáscuáha jíin yá, te cuahān yā región Dalmanuta.

Jeē ní cajicān de ñn jniñu jéhu nuū yā

(Mt. 16.1-4; Lc. 12.54-56)

¹¹ Yūcuán na te ni quecoo tēe grupo fariseo, te ni caquejéé de stíchí de Jesús. Te cácu ni de coto ndee de ya, te ni cajicān de jeē sáha ya ñn jniñu jéhu jeē coo

ñin seña ichi ándiví. ¹² Te ni jitū ni yā siquī jeē tu cácan-díje de jíjnáhan de, te ni cahān yā:

¿Naun cájicān ñayuu yáha ñin jniñu jéhnū nuū rī? Jendaá cahán rī jeē ma stéén rī ni ñin jniñu jéhnū nuū ñáyuu yāhá.

¹³ Te ni squéndōo ya de jíjnáhan de, te ni ndīvi tucu ya ini barco, te cuahān yā inga lado mar.

Jnūhun levadura tēe fariseo

(Mt. 16.5-12)

¹⁴ Te tēe cáscuáha jíin yá ni canaa ni de condiso de jeē cáji de, chi ñin-ni pan cánevāha de ini barco. ¹⁵ Te ni ndacu ya jniñu nuū de:

Coto má candíje ró levadura tēe grupo fariseo jíin levadura Herodes, achí yá.

¹⁶ Te ni cacahān tēe cáscuáha un jíin táca jnáhan de: Va siquī jeē tú na staā ndiso yó, jeē yúcuan cáhán yā súcuan, áchí de.

¹⁷ Te ni jini Jesús, te ni cahān yā:

¿Najehē cándajñūhun ró jeē ni cáhān rī súcuan siquī jeē tú na staā cándiso ró? ¿A ná tu cuni rō, á ná tu jecūhun ni rō jeē tu ní cáhān rī súcuan siquī jeē tu cándiso ró stáā? ¿A yóhoyo un ni rō candíje ró? ¹⁸ Iyó tñūu ró ¿te á tu cájito ró? Iyó sóho ró ¿te á tu cájini ró? ¿Te á tu cánucūhun ni rō? ¹⁹ Chi ná ni tahú cuéchi rí uhūn staā ni cayejí uhūn mil tēe, ¿te nasaa jíca ni chitú pedazo staā jeē ní canastútú ró? Achí yá.

Te ni cacahān de:

Uxī uū jíca, áchí de.

²⁰ Te suni súcuan ná ni tahú cuéchi rí uxā staā ni cayejí cuūn mil tēe, ¿te nasaa jíca ni chitú pedazo staā jeē ní canastútú ró? Achí yá.

Te ni cacahān de:

Uxā jíca, áchí de.

²¹ Te ni cahān yā jíin de:

Te nde vijna ¿á ná tu jecūhun ni rō jíjnáhan ró?

Súcuan ni cahān yatá yá jeē ma cándíje de jñūhun stáhú cástéén tēe ún.

Jeē ní nasávāha ya tēe cuáá ñuu Betsaida

²² Yūcuán na te ni jinū yā jíin de ñuu Betsaida. Te ni caquindecā ñayuu ñin tēe cuáá núu yā, te ni cacahān ndahú i jíin yá jeē na tēe ya ndaha ya nuū de.

²³ Yūcuán na te ni jñiñ ya ndaha tēe cuáá un, te ni quenehen ya de yatā ñūū ún. Te ni tee ya tesñhi yá tñūú de, te ni tee ya ndaha ya siquī. Te ni cajñūhun yá de núu cuu coto de jecu. ²⁴ Te ni ndacoto de, te ni cahān de:

Jíto ná ñayuu jeē cájica i, te tu jíto cáji ná, chi ná cáa yujnu cáa i, áchí de.

²⁵ Yūcuán na te ni tee tucu ya ndaha ya siquī tñūú de. Te ni ndacoto vāha de, te ni nduvāha-ni tñūú de, te ni jito cáji de ndihñi-ni. ²⁶ Te ni natajé yá de quinhun de vehe de, te áchí yá:

Ma quívi ró ñuu, ni ma cáchi cuiñi rō nuū ní ñin, áchí yá.

Jeē ni cáhān Pedro jeē Jesús cúu Cristo

(Mt. 16.13-20; Lc. 9.18-21)

²⁷ Yūcuán na te Jesús jíin tēe cáscuáha jíin yá, cuahān yā táca ndañūú Cesarea Filipo. Te ichi un ní cajñūhun yá de:

Ruhū, ¿ndé ñin cúu ri cácahān ñayuu?

²⁸ Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jñūhun Yaā Dios nde jenahán. Te sava ga i cácahān jeē inga tēe ni nacani jñūhun Yaā Dios cúu ní.

²⁹ Yūcuán na te ni cajñūhun yá de:

Te máá ró, ¿ndé ñin cúu ri cácahān rō?

Te ni cahān Pedro:

Máá ní cúu Cristo, Yaā ní tají Yaā Dios, achí de.

³⁰ Te ni ndacu ya jniñu nuū de jíjnáhan de jeē ma cáchi de jñūhun yáha nuū ní ñin ñayuu.

Jeē ní castūhún Jesús jeē cúu yá

(Mt. 16.21-28; Lc. 9.22-27)

³¹ Te ni quejéé yá steén yā nuū de:

Máá rí, Yaā ní nduu tēe, cánuú ndoho xeēn rī. Te táca tēe jéhnū jíin sūtū cácujeñhū jíin tēe cástéén tutu ley, squéhichí de ruhū, te cahni de ruhū. Te nuū uní quiví te natecu rī, achí yá.

³² Te cáji ní cahān yā jñūhun yáha. Yūcuán na te Pedro, ni cana máñūhún de ya, te ni quejéé de cáhán de nuū yā jeē ma cuáha ya jñūhun coo súcuan. ³³ Te máá yá ni ndió cóto ya ni jito ya nuū tēe cáscuáha jíin yá. Te ni cahān yā nuū Pedro:

Cujiyo quihñ rō, chi cáhán rō ná cáhán Satanás. Chi tu jéni ni rō nájnūhun jéni ni Yaā Dios, chi sa suhva jéni ni rō nájnūhun cájeni ni ñayuu, achí yá.

³⁴ Te ni cana ya tēe cáscuáha jíin yá jíin ñayuu cuehē ún, te ni cahān yā:

Na-ni ñayuu núu cúní i condiquñ i ruhū, na cási i jeē cuní máá i, te na cóndiquñ i ruhū te cuāha i jñūhun ndoho i jñūndóho jeē siquí rī, vēsú na cúu i. ³⁵ Chi núu ndé ñáyuu cuní i cácu i nuū jñūndóho quiji nuū i jeē siquí ruhū, núu súcuan te jñahnū ndetū i ñíí cáni. Te núu ndé ñáyuu, vēsú na cúu i jeē siquí ruhū jíin siquí jeē scáca i jñūhun jeē jnáma ri ñayuu, núu súcuan te cotecu i ñíí cáni. ³⁶ ¿Chi ndé cuajñiñu vēsú na cúndeyí ñáyuu nihñ i ñíí ñáyiví, te núu quiví i nuū jñahnú ndetū i? ³⁷ Chi tú na jíin cuiñi chunaa ñayuu jeē cácu ánuá i.

³⁸ Te ñayuu yáha tu cácandíje cuiñi i, te máni máá cuéchi cása i. Te núu na-ni ñayuu cúcanu i nuū ñáyuu yáha jeē siquí ruhū, Yaā ní nduu tēe, jíin siquí jñūhun cáhán rī, suni súcuan cucanu rī jeē siquí máá i, quiví ndíji ri jíin táca ndajéhé ndoo ri. Te quiví ún chi yóhoyo luu cujéhnū ri nájnūhun cújéhnū Tátá rī. Achí yá.

9 Te suni ni cahān yā jíin de jíjnáhan de:

Jendaá cahán rī jíin ró jeē sava tēe cáhīin yāhá, ma cúu de chi nde cuni de jeē ndácu Yaā Dios jniñu jíin poder yā, achí yá.

Jeē tucu ni nduu ya

(Mt. 17.1-13; Lc. 9.28-36)

² Yūcuán na te nuū iñú quivī te Jesús ni jeca ya Pedro jíin Jacobo jíin Juan, cuahān sñin ya jíin de ñin yucu súcun. Te yūcuán, tucu ni nduu ya nuū de. ³ Te sahna ya ni ndindēē, te ni nducujín quiyi, nájñuhun yuhvā volcán. Te tú ni ñin ñayuu ñayivi yáha cuu nacate jeē ndúquiyi ndasí súcuan. ⁴ Te ni cajito de jeē Elías jíin Moisés cándajñuhún de jíin yá. ⁵ Yūcuán na te ni cahān Pedro jíin Jesús:

Maestro, nacā jeē váha jeē cáhīin na yáha. Te na sáha ná únī vehe ramada, ñin cuu máá ní, ñnga cuu Moisés, te ñnga cuu Elías, achí de.

⁶ Chi yōhyo ni cayūhu tēe cáscuáha ún, te Pedro tu ní sáha de cuenta na vé cúu jeē cahán de. ⁷ Te ni quiji vicō nūhun ní jesi-ni nuū de. Te nuū vicó un ní cahān ñin jñuhun:

Yáha cúu Sēhe ri jeē maní ndasí rí jíin. Te na cúni nahín ró jñuhun cáhán yā. Achí.

⁸ Te ni candacoto-ni de, te tuá tēe un ní cájito de, chi máá ñin na Jesús.

⁹ Te ni cananuu de jíin yá yucu ún. Te ni ndacu ñihin ya jniñu nuū de jeē ma cáchi de nuū ní ñin jeē súcuan ni cajito de, chi nde na nátecu maá yá, Yaā ní nduu tēe, achí yá. ¹⁰ Jeē yúcuan ní cachuvāha de tāca jēē ní cuu ún, te cácajnūhun jñáhan de na jñuhun cúu jeē nátecu yā. ¹¹ Te ni cacajnūhún de ya:

Te tēe cástéén tutu ley Yaā Dios, ¿najehe cácahān de jeē cánuú ndiji Elías xīhna gā, te sáa te quiji Yaā cúu Cristo? achí de.

¹² Te ni cahān yā:

Jendaá cúu jeē xīhna gā quiji ñin tēe cúu nájñuhun Elías, te sátūhva de ndīhi, achí tutu. ¿Te ndese cáhán tucu tutu ñi siquī ruhū, Yaā ní nduu tēe? Cáhán jeē ndo-ho xeēn rī, te sájéē ni i nuū rī. ¹³ Te cáhán rī jíin ró jeē ní quiji tēe ni cuu nájñuhun Elías, te ni casáha ndevāha ñayuu jíin de tāca jēē ní cacuu ni maá i, nájñuhun cáhán jñuhun de nuū tútu, achí yá.

Jeē ní nasávāha ya ñin sūchi ñúhun tachī ini

(Mt. 17.14-21; Lc. 9.37-43)

¹⁴ Te ni najinū yā jíin de nuū sava ga tēe cáscuáha jíin yá, te ni cajito ya ñayuu cuehē ndasí, ni cajicó ndúu i de. Te suni cáhīin tēe cástéén tutu ley Yaā Dios, cáte-jñáhan jíin de. ¹⁵ Te nuū ní cajito tāca ñayuu un jēē véji ya, te ni canaa ni i. Te cájino i cuango i nuū yā jeē cahān i jíin yá. ¹⁶ Te ni cajñuhun yá i:

¿Na siquī cátejñáhan ró jíin de jíin áhan de? achí yá.

¹⁷ Te ni cahān ñin tēe íne yūcuán:

Maestro, vendeca ná séhe ná núu ní, chi ñúhun ñin tachī ini i, te ni cuñíhín i ni sáha. ¹⁸ Te ndé-ni cúu nuū íne i, te tachī un scótúu i, te jéni yñí-ni i. Te jée tiñū

yuhu i, te squíhñi jñuhun i. Te cuacuxíi ndasí i sáha. Te ni cahān ndahú ná jíin tēe cáscuáha jíin ní jeē na quēnehen de tachī ún, te tu ní cúu sáha de, achí de.

¹⁹ Te ni cahān yā jíin de jíin áhan de:

Ñayuu tu cándije cuiti cácuu ró. ¿Nasaa ga quivī condee rī jíin ró? ¿Te nasaa ga quivī cuandeyí ni rī jíin ró? Cuáquihin sūchí un, na quíji i, achí yá.

²⁰ Te ni caquindeca de i nuū yā. Te nuū ní jito tachī un núu yā, te ni jehni yñí-ni i. Te ni cotúu i, te cónéhén cócáni i, te jée tiñū yuhu i. ²¹ Te Jesús ni cajñuhun yá tatá i:

¿Nasaa cuiyā ni cuu jeē sáha súcuan jíin i?

Te ni cahān de:

Nde lulí i. ²² Te ni cuu cuehē jínu scótúu táchī ún i nuū ñuhún nuū ndúte, jeē cáhni i cúní. Te núu cuu sáha ní, te cundáhú ni ní chindéē ñáhán ní sāña jēē ndúvāha sēhe ná, achí de.

²³ Te ni cahān Jesús jíin de:

Núu cuu candije ró jēē sáha ri, chi ñayuu candije te cuu tāca jēē cuní i, achí yá.

²⁴ Te máá tátá sūchí un ní cahān jee de:

Cándije ná, te chindéē ñáhán ní sāña jēē candije ñihin ga ná, achí de.

²⁵ Te ni jito Jesús jeē ní cutútú cuehē ñayuu nuū yā. Te ni cahān yā nuū tachí:

Tachí jeē sañíhín sásóhó, ruhū ndácu ri jniñu jeē na quénda ró ini sūchi yáha, te ma ndívi ga rō ini i, achí yá.

²⁶ Yūcuán na te ni cana cóhó táchī ún, te ni jehni yñí tucu i, te ni quenda cuahān. Te sūchí un ní cuu i nájñuhun ndívi. Te ni cacahān cuehē ñayuu jeē jé ni jñi-hí i. ²⁷ Te Jesús ni jñi ya ndaha i, te ni ndonehen ya i, te ni nucuiñí-ni i.

²⁸ Yūcuán na te ni quívi ya ini ñin vehe, te tēe cáscuáha jíin yá, ni cacajnūhun sñin de ya:

¿Najehe tu ní cúu quenehen ná tachī un jíin áhan ná? achí de.

²⁹ Te ni cahān yā:

Ñin tachí súcuan chi ma quénda cuiti te núu tú cacān tahú rō te coo ndite ni rō, achí yá.

Jeē ni cáhán tucu ya jeē cúu yā

(Mt. 17.22-23; Lc. 9.43-45)

³⁰ Te ni quenda ya yūcuán jíin de jíin áhan de, te ni yáha ya ndañúu Galilea cuahān yā. Te tu ní cúní yā jeē cúní ni ñin ñayuu. ³¹ Chi stéén yā nuū tēe cáscuáha jíin yá, te achí yá:

Máá rí, Yaā ní nduu tēe, nastúu i ruhū nuū tāca tēe xeēn. Te cahni de ruhū, te núu ni jihí rī, te nuū uní quivī te natecu rī, achí yá.

³² Te tu ní cájecūhun ni de jñuhun yáha, te cáyuhú de cajñuhún de ya siquī jñuhun ni cahān yā.

Ndé ñáyuu cúu jeē kujéhu ga

(Mt. 18.1-5; Lc. 9.46-48)

³³ Te ni jinū yā jíin de ñuu Capernaum, te nuū ni quívi ya ini vehe, te ni cajñūhun yá de:

¿Na jñūhun ni candajñūhun ró ichi véji yó? áchí yá.

³⁴ Te tu ní cacahān cuiṭi de, chi ichi un ní cacahān de siquī núu ndé ñin de cújéhu ga. ³⁵ Yūcuán na te ni cucōo ya, te ni cana ya ndihúxi uū de, te ni cahān yā:

Núu ndé ñin ró cúni kujéhu ga, na cúu ró téé núu ga nuū tāca jñáhan ró, te cuajñiñu ró núu jñáhan ró.

³⁶ Yūcuán na te ni jñi ya ndaha ñin sūchi lúli, te ni jeni ya i mēhñú de jíjñáhan de. Te ni nundee yā i, te ni cahān yā jíin de:

³⁷ Na-ni ñayuu núu jeē siquí ruhū jetáhú i ñin sūchi lúli nájnūhun sūchi yáha, te ruhū jetáhú i. Te ñayuu jetáhú rúhū, nasūu máa ñin-ni ruhū, chi suni Yaā ní tají rúhū jetáhú i, áchí yá.

Ñayuu tu cáhán siquī yā, ñin i jíin yá

(Mt. 10.42; Lc. 9.49-50)

³⁸ Yūcuán na te ni cahān Juan jíin yá:

Maestro, ni cajito ná ñin téé jeē jíin síhví ní quénehen de tachí ini ñayuu. Te ni cajesí ná jéé sáha de, chi tu jíca de jíin yó, achí de.

³⁹ Te ni cahān Jesús jíin de:

Ma cásí rō jeē sáha de. Chi ni ñin téé jeē jíin síhví rí sáha de jñiñu jéhu, ma cúu nacahān de siquī rí. ⁴⁰ Chi téé tu cáhán siquī yō, ñin de jíin yó. ⁴¹ Te na-ni ñayuu núu jeē siquí ruhū cuāha i vēsú ñin ñajin ndute coho ró, siquī jeē cácdáije ró ruhū, ndaā ndije cúu jeē nihín i tahū i. Achí yá.

Xeēn coo siquī ñáyuu quívi nuū cuéchi

(Mt. 18.6-9; Lc. 17.1-2)

⁴² Te núu ñin sūchi lúli yáha cándíje i ruhū, te núu quívi i cuéchi sáha na-ni ñayuu, te vāha ga núu ni conuhñi ñin yōso cáhnu sucūn ñayuu ún, te quēe i chñi ndute mar nuú. ⁴³ Te núu ndaha ró sáha jeē quívi ró cuéchi, vāha ga cahnde rō na quíhín, návāha tuá sáha ró cuéchi. Chi vāha ga jeē cóndee ñin-ni ndaha ró te quívi ró núu cotecu rō ñi cáni, vēsú jeē cóndee ndíndúu ndaha ró te quívi ró infierno, nuū cayú ñuhūn jeē ma ndahvá cuiṭi. ⁴⁴ Te yūcuán chi tu cájihí tñdacú, te tu ndahvá cuiṭi ñuhūn. ⁴⁵ Te núu jehē rō sáha jeē quívi ró cuéchi, suni vāha ga cahnde rō na quíhín, návāha tuá sáha ró cuéchi. Chi vāha ga jeē cóo cúhndu ró te quívi ró núu cotecu rō ñi cáni, vēsú jeē cóndee ndíndúu jehē rō te quívi ró infierno, nuū cayú ñuhūn jeē ma ndahvá cuiṭi. ⁴⁶ Te yūcuán chi tu cájihí tñdacú, te tu ndahvá cuiṭi ñuhūn. ⁴⁷ Te núu tñūu ró sáha jeē quívi ró cuéchi, vāha ga tava ró na quíhín, návāha tuá sáha ró cuéchi. Chi vāha ga jeē quívi ró ñuu nuū ndácu Yaā Dios jñiñu jíin ñin na tñūu ró, vēsú jeē cóndee

ndíndúu tñūu ró te quívi ró infierno. ⁴⁸ Te yūcuán chi tu cájihí tñdacú, te tu ndahvá cuiṭi ñuhūn.

⁴⁹ 'Chi nájnūhun quénda vāha oro sáha ñuhūn, súcuán quénda vāha ñayuu sáha jñūndóho. Te tāca cúñu jeē socó ñayuu nuū yā, cúhuhvūā sáha ñi.

⁵⁰ Vāha íyó ñi, te núu ñi ún na nāa jeē uhvuá, ¿te ndese nduu uhvuá tucu sáha ró? Núu súcuán te cuu ró ñayuu váha, nájnūhun íyó váha ñi. Te na cóyūcu váha ró jíin jñáhan ró. Achí yá jíin de.

Siquī jeē ma stóo jñáhan téé jíin ñahan

(Mt. 19.1-12; Lc. 16.18)

10 Te ni quenda ya ñuu Capernaum, te ni jinū yā región Judea, inga lado yūte Jordán, ichi nuū cáne niāndii. Te yūcuán ní cutútú tucu ñayuu nuū yā, te ni steén tucu ya jñūhun nuū i, nájnūhun sáha ya. ² Yūcuán na te jecu téé grupo fariseo ni quecoo de nuū yā, chi cácuñi de coto ndee de ya núu ndese cahān yā. Te ni cacajñūhún de ya núu íyó ley jeē cuu ndusñin ñin téé jíin ñasihí de. ³ Te ni cahān yā jíin de:

¿Na jñiñu ni ndacu Moisés nuū rō nde jenahán?

⁴ Te ni cacahān de:

Moisés ni jēhe de jñūhun jeē cúvāha ñin acta jeē ndusñin de jíin ña, te ndōo ña, áchí de.

⁵ Te ni cahān Jesús jíin de:

Siquī jeē níhni ni rō jíjñáhan ró, jeē yúcuán ní ndacu de jñiñu yáha núu rō. ⁶ Te nde xihna ñuhún, ná ni sáha Yaā Dios ndihí, chi téé jíin ñahan ni sáha ya. ⁷ Jeē yúcuán cúu jeē stóo téé tátá de náná de, te quiñáhan de jíin ñasihí de. ⁸ Te ñin na cuu ndíndúu de, áchí Yaā Dios. Núu súcuán te tuá cúu uū jñáhan de, chi ñin na cúu. ⁹ Jeē yúcuán tu íyó váha jeē stóo jñáhan, chi jeē ni squíjñáhan Yaā Dios cúu, áchí yá.

¹⁰ Te téé cáscuáha ún nuū ni quívicoo de vehe, te ni cacajñūhún tucu de ya siquī jñūhun ún. ¹¹ Te ni cahān yā jíin de:

Núu ndé téé stóo de ñasihí de te condeca de inga ñahan, núu súcuán te cáscuáha ndé de ñasihí de. ¹² Te núu ñin ñahan stóo ña yñ ña te condeca ña inga téé, suni cáscuáha ndé ña de. Achí yá.

Jeē ni jíicān tahú Jesús jehē sūchi lúli

(Mt. 19.13-15; Lc. 18.15-17)

¹³ Yūcuán na te ni quecoo ñayuu jíin sūchi lúli, jéé na sóo yá ndaha ya xiní i. Te téé cáscuáha jíin yá, ni cacahān de nuū ñayuu vejicoo jíin i. ¹⁴ Te ni jito Jesús, te ni quiṭi ni yā, te ni cahān yā jíin de:

Cuāha jñūhun na quíjicoo sūchi lúli jíñā nuū rí, te ma cásí rō jeē quíjicoo i. Chi ñayuu jeē ndió cóo ni i cani ni i nájnūhun sūchi yáha, suu i quívi ndaha Yaā andívi jeē ndacu ya jñiñu nuū i. ¹⁵ Te jendaá cahān rí jíin ró, núu ñin ñayuu tú cuatáhú i jeē ndácu Yaā Dios jñiñu nuū i, nájnūhun jétáhú ñin sūchi lúli, ma quívi cuiṭi i ndaha ya, achí yá.

¹⁶ Te ni nundee ya i, te ni soó yá ndaha ya xiní i, te ni jíicān tahú yā jehē i jíjñáhan i.

Jnūhun tēe cúcá

(Mt. 19.16-30; Lc. 18.18-30)

¹⁷ Yūcuán na te ni quihin tucu ya ichi cuahān yā. Te jínu ñn tēe ni quee de, te ni jecuíñī yití de nuū yā, ni ca-jnūhún de ya:

Tēe vāha cúu ní Maestro. Te cachi ní, ¿na jniñu váha sáha ná te nihin tahu na cotecu na ññí cáni andiví? áchí de.

¹⁸ Te ni cahān yā jíin de:

¿Naun cáhán rō jeē tēe vāha cúu ri? Tú ni ñn tēe vāha íyó, chi máá ñn-ni Yaā Dios. ¹⁹ Je jíin rō tācá jniñu ní ndacu Yaā Dios: Ma cosíquí ndéē jnáhan ró. Ma cáhni rō ndīyí. Ma sacuíhná ró. Ma sajnúhún ró. Ma stahú ró jnáhan ró. Cuatáhú ró nuū tatá rō nuū naná rō. Achí yá.

²⁰ Te ni cahān tēe un jíin yá:

Tācá jniñu yáha je ni squícu ná ndé ná lulí ná, Maestro, achí de.

²¹ Yūcuán na te ndáhú jíto ya nuū de jeē cúsiñ ni yā jíin de. Te ni cahān yā:

Ñn na jniñu cúmaní sáha ró núu súcuan. Cuáhán te xico ró ndīhi jeē névāha ró, te cuāha ró núu ñáyuu ndahú. Te nde andiví cuāha ya jeē váha ndasí núu rō. Yūcuán na te quiji ró condiquín rō ruhū, te cuāha ró jnúhun ndoho ró jnúndóho jeē síquí rī, achí yá.

²² Te ná ni jini sōho de jnūhun yáha, te ni jnahuhū ni de, te cúcuíhyá ni de cuahān de, chi cúcá ndasí de.

²³ Yūcuán na te Jesús ni ndacoto ya ññí xiin ya, te ni cahān yā jíin tēe cáscuáha jíin yá:

Tēe cúcá chi yōhyo yí quívicoo de ndaha Yaā Dios jeē ndacu ya jniñu nuū de, achí yá.

²⁴ Te tēe cáscuáha jíin yá, yōhyo ni canaa ni de jeē ní cajini de jnūhun ni cahān yā. Te ni cahān tucu ya jíin de:

Séhē, ñayuu tēnuū xūhún, yōhyo yí quívicoo i ndaha Yaā Dios jeē ndacu ya jniñu nuū i. ²⁵ Yachí gā yāha ñn camello yaū yutícuí, vésú jeē quíví ñn ñayuu cucá ndaha Yaā Dios jeē ndacu ya jniñu nuū i, achí yá.

²⁶ Te víhyá gā ni canaa ni de cájini de, te ni caca-jnūhun jnáhan de:

¿Ndé ñáyuu cúu jeē cácu núu súcuan?

²⁷ Te ni ndacoto ya nuū de, te ni cahān yā:

Ñayuu chi ma cúu squíví i máá i ndaha Yaā Dios, te máá yá chi cuu sáha ya, chi ndīhi-ni jniñu cuu sáha ya, achí yá.

²⁸ Yūcuán na te ni cahān Pedro jíin yá:

Sāña jíinánhan ná, ní castóo ná ndīhi jeē cánevāha ná, te cándiquín na níhín, achí de.

²⁹ Te ni cahān Jesús:

Jendaá cahán rī jíin ró jíinánhan ró, núu na-ni ñayuu stóo i vehe, chí ñani, chí cuáha, chí tátá, chí náná, chí ñasiñí, chí séhe, chí ñuhun, jeē síquí ruhū jíin síquí jeē scáca i jnūhun jeē jnáma ri ñayuu, ³⁰ núu súcuan te nanihín i ñn ciento gā jeē súcuan vijna, cúu vehe, cúu ñani, cúu cuāha, cúu náná, cúu séhe, cúu ñuhun, te

nde jíin jeē cóto xeñ ñayuu i. Te nde inga vida quiji te cotecu i ññí cáni. ³¹ Te cuehē ñayuu jeē vijna cáscujénu, nduu i ñayuu núu ga. Te ñayuu jeē núu ga vijna, chi ndujénu i, áchí yá.

Jeē ni cáhān tucu ya jeē cúu yā

(Mt. 20.17-19; Lc. 18.31-34)

³² Te cáñuhun de ichi jeē cáa cuahān ñuu Jerusalén. Te Jesús yósnúu yá nuū tēe cáscuáha ún. Te cánaa ni de ni cajini sōho de jnūhun ni cahān yā. Te cáyūhú de cuángoo de jíin yá. Yūcuán na te ni cana sñn tucu ya ndīhúxí uū tēe cáscuáha, te ni quejéé yá cástūhún tucu ya nuū de tāca jéé quíji síquí yā. ³³ Achí yá:

Cuni sōho ró, chi je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cáscujénu jíin núu tēe cástéén tutu ley. Te ndonda de síquí rī jeē cúu rī, te squíví de ruhū nuū tēe nación Roma jeē cáyucú Jerusalén cándacu jniñu. ³⁴ Te tāca tēe un sácatā de nuū rī, te cani de ruhū, te tesñí de nuū rī, te sáá te cahni de ruhū. Te nuū uní quíví te natecu rī, achí yá.

Jeē ni jíicān Jacobo jíin Juan ñn favor nuū yā

(Mt. 20.20-28)

³⁵ Yūcuán na te Jacobo jíin Juan, ndíndúú séhe Zebedeo, ni quecoo de nuū Jesús, te ni cacahān de:

Maestro, cácuni na jeē sáha ní ñn jeē cacán na núu ní, achí de.

³⁶ Te ni cahān yā jíin de:

¿Ndese cácuni rō jeē sáha ri jíin ró? achí yá.

³⁷ Te ni cacahān de:

Cuāha ní jnúhun jeē cónēne ná xiin ní quíví ndujénu ní, ñn ná lado váha ní, te inga ná lado jecó ní, achí de.

³⁸ Yūcuán na te ni cahān Jesús jíin de:

Tu cájini rō na vé cúu jeē cájicān rō. ¿A cuu ndoho ró jnúndóho nájnūhun jeē quíji síquí rī? ¿Te á canda ró ndoho xeñ rō nájnūhun ndoho ri? achí yá.

³⁹ Te ni cacahān de:

Cuu sáha ná.

Te ni cahān yā jíin de:

Jendaá jeē ndoho ró jnúndóho nájnūhun jeē quíji síquí rī, te ndoho xeñ rō nájnūhun ndoho ri. ⁴⁰ Te jeē cónēne ró lado váha ri jíin lado jecó rí, nasūu rúhū cúu jeē cuáha jnūhun. Chi je íyó túhva cuu tāca tēe jeē ní nacāji Tátá rī, te tēe un níhín, achí yá.

⁴¹ Te uxí gā tēe cáscuáha un, ní cajini de jnūhun yáha, te ni caquití ni de nuū Jacobo jíin Juan. ⁴² Te Jesús ni cana ya de, te ni cahān yā jíin de:

Cájini rō ndese cásaña tēe cáscujénu nuū ñáyuu tāca nación. Chi cándacu níhin de jniñu nuū i, te máá de cáchí ndese coo. ⁴³ Te máá ró jíinánhan ró, chi ma sáha ró súcuan. Chi núu ndé ñn ró cúní cújénu, sa suhva cuajníñu ró núu jnáhan ró. ⁴⁴ Te núu ndé ñn ró cúní cuu nuū, sa suhva sáha ró máá ró mozo nuū tāca jnáhan ró. ⁴⁵ Chi suni súcuan sáha ruhū, Yaā ní nduu

tēe, chi nasūu jēē vēji ri jeē cuajniñu ñayuu nuū rī, chi sa suhva vēji ri jeē cuajniñu ri nuū ñáyuu. Te cuāha ri maá rí cuu rī návāha jnama ri cuehē ñayuu, achí yá.

Jeē ní nasávāha ya Bartimeo tēe cuáá

(Mt. 20.29-34; Lc. 18.35-43)

⁴⁶ Yūcuán na te ni jinū yā ñuu Jericó jíin tēe cáscuáha jíin yá. Te sáá te ni quenda ya yūcuan jíin de jíin ñáyuu cuehē ndasí. Te Bartimeo tēe cuáá, sēhe Timeo, néne de yuhíchi, jícán de caridad. ⁴⁷ Te ni jini de jnūhun jeē Jesús ñuu Nazaret vēji ya. Te ni quejéé de cána jee de:

Jesús Sēhe yucūn David, cundáhú ni ni sáña, achí de.

⁴⁸ Te cuehē ñayuu ni cacahān i nuū de jeē na cási de yuhu de. Te máá de víhyá gā ni cana jee de:

Máá ní jeē cúu ní Sēhe yucūn David, cundáhú ni ni sáña víi, achí de.

⁴⁹ Yūcuán na te ni jecuiñí Jesús, te ni cahān yā:

Cana de na quíji de.

Te ni cacana i tēe cuáá un:

Ndeyí coo ni rō. Ndocuiñí, na quíhín yō, chi cána ya rohó, achí i jíin de.

⁵⁰ Yūcuán na te ni scáne de ticāchí de, te yachī ni ndocuiñí de, te ni jinū de nuū Jesús. ⁵¹ Te ni cahān yā jíin de:

¿Na vé cuní rō jeē sáha ri jíin ró?

Te máá de ni cahān de:

Maestro, jeē na ndúndijin tinūu ná cuní na, achí de.

⁵² Te ni cahān Jesús jíin de:

Cuáhán núu súcuan. Ni candíje ró jeē cuu nasávāha ri rohó, te jeē yūcuan ní nduvāha ró, achí yá.

Te ni ndundijin-ni tinūu de, te ni ndiquin de Jesús cuahān de jíin yá ichi ún.

Jeē ni quívi Jesús ñuu Jerusalén

(Mt. 21.1-11; Lc. 19.28-40; Jn. 12.12-19)

11 Te ni cuyajni ya ñuu Jerusalén, vēji ya ñuu Betfagé jíin ñuu Betania, jeē íne jehē yucu Olivos. Te ni tají yá uū tēe cáscuáha jíin yá jeē quíngoo de. ² Te achí yá jíin de:

Cuángoo ñuu lulí íne ichi núu. Te núu ni quívi-ni ró yūcuan, te nihīn rō ñn burro núhni tē, jeē ní ñn tēe ná tu coso de tē. Te ndají ró tē, quijicoo ró jíin tē. ³ Te núu ndé ñn cajnūhún naun cándají ró tē, te cachi rō: Máá Jítoho yō jíni níhún yá tē, te yachī natají yá tē ndiji tē, achí rō. Achí yá jíin de.

⁴ Te cuángoo de, te ni canihīn de burro un núhni tē yehyí núu quéhe nuū náquijnáhan ichi. Te ni candají de tē. ⁵ Te sava ñayuu cáhīn yūcuan ní cacahān jíin de:

¿Na vé cúu jeē casáha ró jeē cándají ró burro jíñā? achí i.

⁶ Yūcuán na te ni cacahān de nájnūhun ni cachi Jesús. Te ni casiáá i tē vējicoo de jíin tē. ⁷ Te ni ndecoo de jíin tē nuū Jesús, te ni casoó de sahma de síquī tē, te ni jecosoó yā tē. ⁸ Te cuehē ñayuu ni cascáa i sahma i ini ichi. Te sava ga i ni cajehnde i ndaha níu, te ni cachucun i ini ichi ún.

⁹ Te ñayuu cuángoo ichi núu jíin ñáyuu cuángoo ichi yátá, cácana jee i:

Yōhyo cújéhnū ya. Yōhyo vāha Yaā cúu Yaā jeē vēji jíin jniñu máá Jítoho yō Yaā Dios. ¹⁰ Te yōhyo luu coo, chi je yajni ndacu ya jniñu nájnūhun ni ndacu jíi yō rey David. Te yōhyo cújéhnū máá Yaā Dios. Achí i.

¹¹ Te ni quívi Jesús ñuu Jerusalén, jíin ini templo cáhnu. Te ni jito ya nuū tēcá ndajniñu yúcu ní yūcuan. Te ni quenda ya cuahān yā ñuu Betania jíin ndihúxí uū de, chi je ni ini.

Jeē ni cáhān yā nuū yújnu higo

(Mt. 21.18-19)

¹² Te inga quívi ún, nuū ní quenda ya ñuu Betania cuahān yā jíin de, te jíi yā sōco. ¹³ Te nde jicá ni jito ya ñn nundēhe higo jeē ñn ndaha. Te ni jecondēhe yá núu sanaa te nihīn yā ndehē caji yā. Te tú na vé ni nihín yā, chi máá ndaha-ni íin. Chi nasūu tiempo ndehē cúu.

¹⁴ Yūcuán na te ni cahān yā nuū yujnu ún:

Tuá na ndehē cuun cuiti xinī rō jeē cáji ñayuu, achí yá.

Te tēe cáscuáha jíin yá ni cajini de jeē súcuan ni cahān yā.

Jeē ní quenehen ya ñayuu ini templo

(Mt. 21.12-17; Lc. 19.45-48; Jn. 2.13-22)

¹⁵ Te ni najinū yā jíin de ñuu Jerusalén. Te ni quívi ya ini templo cáhnu, te ni quenehen ya ñayuu cájeen quiti te cánaxico núu ñáyuu jeē soco i. Te ni scotúu ndeyi ya tāca mesa tēe cástáyi xūhún, jíin silla tēe cáxíco paloma. ¹⁶ Te tu ní jéhe ya jnūhun jeē yáha ñayuu ini templo jíin ndajniñu ndíso i. ¹⁷ Te ni steén yā jnūhun nuū i, achí yá:

Yósó núu tútu íi jeē cahán Yaā Dios: Vehe ri chi vehe nuū cájicān tahu ñayuu tēcá nación cúu, achí yá. Te máá ró jijnáhan ró chi nájnūhun yaū cava ñacuñna ní canasáha ró, achí yá.

¹⁸ Te tēe cástéén tutu ley Yaā Dios jíin sūtū cácujeñnu, ni cajini de jnūhun yáha, te ni quejéé de cánducú de modo ndese cahni de ya. Chi cáyūhú de jeē ndujéñnu ga maá yá vésú maá de, chi tāca ñáyuu yōhyo cácusí ni i cájini i jnūhun stéén yā. ¹⁹ Te jeē cuácuaa, te ni quenda ya ñuu Jerusalén cuahān yā.

Jeē ni íchī nundēhe higo

(Mt. 21.20-22)

²⁰ Te jenéhen inga quívi ni nayāha ya jíin de cuahān yā. Te ni cajito de jeē nundēhe higo un je ni íchī nde yoho. ²¹ Yūcuán na te ni nucūhun ni Pedro, te ni cahān de jíin yá:

Maestro, cundēhe ní nundēhe higo jeē ni cáhān ni núu, te vijna je ni íchī caján, achí de.

²² Te ni cahān Jesús jíin de:

Candíje ró jéé sáha Yaā Dios jeē jicán rō. ²³ Chi jendaá cahán rī jíin ró, núu ndé ñáyuu cahān i jeē cújiyo yucu

yáha quihñn nde nuū mar, te núu tú nacani siquí ni i, chi sa suhva candíje i jeē cóo nájñuhun ni cahñn i, yūcuán na te cundaā jeē ni jícn̄n i. ²⁴ Jeē yúcuán cáhñn rī jínn̄n ró, táca jeē cacán tahu rō, te núu candíje ró jéē nihñn rō, te nihñn rō. ²⁵ Te jeē cájicñn tahu rō, te cone cáhñu ni rō nuū ñáyuu casáha cuēchi siquí rō, návāha máá Tátá rō jeē ndeé yá andiví, suni cone cáhñu ni yā nuū cuéchi ró. ²⁶ Chi núu tú cone cáhñu ni rō nuū jñáhan ró, te suni máá Tátá rō jeē ndeé yá andiví, ma cóne cáhñu ni yā nuū cuéchi ró, áchí yá.

Siquí jeē ndíso jñíñu Jesús

(Mt. 21.23-27; Lc. 20.1-8)

²⁷ Yūcuán na te ni najinū tucu ya ñuu Jerusalén. Te jíca cuu ya ini templo cáhñu. Te sutū cácujeññu jínn̄n tée cásténn̄n tutu ley Yaā Dios jínn̄n tée jéññu cándacu jñíñu, ni quecoo de nuū yā. ²⁸ Te ni cacajññuhñn de ya:

¿Ndé ní nihñn jñíñu ró jéē sáha ró jñíñu yáha? ¿Te ndé ññn ni tee jñíñu siquí rō jeē sáha ró súcuán? áchí de.

²⁹ Te ni cahñn Jesús:

Suni ruhū, cajññuhun rí rohó ññn jññuhun jínn̄nahan ró. Te núu cuu stíó cuíññí rō, yūcuán na te cachi rī nuū rō ndé ní nihñn jñíñu rí jeē sáha rí jñíñu yáha. ³⁰ ¿Ndé ññn ni tee jñíñu siquí Juan jeē ni scuándute de? ¿A Yaā Dios chí táca tée? Cachi nuū rī, achí yá.

³¹ Yūcuán na te ni candajññuhun máá de:

Núu cahñn yō jeē Yaā Dios ni tee ya jñíñu un síquí Juan, te cahñn de jínn̄n yó: Núu súcuán ¿te najehē tu ní cáccandíje ró de? ³² Te núu cahñn yō jeē ñáyuu ni catee jñíñu un síquí de, te quití ññn ñáyuu nuū yō, achí de cácahñn maá de.

Chi cáyūhú de jeē quití ññn ñáyuu, chi ndivii i cáccandíje i jeē tée ni nacani jññuhun Yaā Dios ni cuu ndije Juan.

³³ Jeē yúcuán ní cacahñn de jínn̄n yá:

Tu cájini rī, achí de.

Yūcuán na te ni cahñn Jesús:

Ni ruhū, suni ma cáchi rī nuū rō ndé ññn ni tee jñíñu siquí rī sáha rí jñíñu yáha, áchí yá.

Jññuhun yátá síquí tēe néé cácsájññiñu nuū uva

(Mt. 21.33-46; Lc. 20.9-19)

12 Te ni quejéé yá cahñn yā jññuhun yátá jínn̄n de jínn̄nahan de:

Ññn tēe ni nachuhun de cuehē uva, te ni jesi de corral, te ni sáha de ññn nuū cūhun ndehē un táxñn. Te ni sáha de ññn vehe súcún návāha cuu coto de ññn cáhñu.

Te ni stóo de nuū sava tēe sájññiñu nuū, te cuu sava de ndehē jínn̄n. Te ni tee de ichi cuahñn jicá de. ² Te máá tiempo ndutútú uva, te ni tají de ññn mozo de cuanuquihñn sava uva nuū tēe cácsájññiñu ún. ³ Te tēe un ní cajññi de mozo un, te ni cacani de i, te ni canatajé de i cuanuhun i súcuán-ni. ⁴ Yūcuán na te tēe chíí uva un ní tají tucu de ññn mozo cuahñn. Te tēe cácsájññiñu un ní cajēhe de yuū xinī mozo un, te ni castújí de, te ni cacahñn ndevāha de nuū. ⁵ Te tēe chíí uva ni tají tucu de ññn mozo cuahñn. Te ni cajehni de i. Te suni súcuán ni

tají de cuehē gā mozo cuahñn, te sava i ni cacani de, te sava i ni cajehni de.

⁶ Te tēe chíí uva, íyó ññn sēhe de jeē maní ndasí de jínn̄n. Te jeē sándññí na ni tají de sēhe de un cuahñn nuū tēe cácsájññiñu. Te jéni ni de: Tēe ún chi cuatáhú de jínn̄nahan de nuū sēhe ri. ⁷ Te tēe cácsájññiñu un ní cacahñn maá: Tēe chíí táhū cúu jeē yáha. Na cáhñi yō de, te ndōo tahu de cuu máá yó, achí. ⁸ Te ni cajññi de i, ni cajehni de i, te ni cascāne de i ññn lado. Achí yá.

⁹ Yūcuán na te ni cajññuhun yá de:

Núu súcuán ¿te ndese sáha tēe chíí uva un? Ndiñi de te cahñi de tēe cácsájññiñu ún, te cuāha de ññn uva un núu ññn sava tēe sájññiñu nuū.

¹⁰ ¿Te á ná tu cahu ró jññuhun yáha jéē yosó núu tútu ññn, jeē ruhū cúu nájññuhun ññn yuū? Chi áchí tutu:

Yuū jeē ní casquéhichí tēe cájini vehe,

yuū yáha nduu jeē quítuu vehe.

¹¹ Máá Jítóho yō Yaā Dios ni sáha ya súcuán, te cánaa ni yō jító yó jñíñu yáha.

Achí tutu, achí yá.

¹² Yūcuán na te ni canducú de modo jññi de ya. Chi ni cajecūhun ni de jeē siquí maá de cúu jññuhun yátá ní cahñn yā siquí tēe cácsájññiñu nuū uva jínn̄n tēe cájini vehe. Te siquí jeē cáyūhú de jeē quití ññn ñáyuu, te ni castóo de ya te cuango de.

Siquí xūhun renta

(Mt. 22.15-22; Lc. 20.20-26)

¹³ Yūcuán na te ni catajé de sava tēe grupo fariseo jínn̄n tēe grupo Herodes cuango de nuū yā, nducú de ndese sáha de návāha cahñn yā ññn jññuhun jeē nihñn de cuēchi siquí yā. ¹⁴ Te ni quecoo de, te ni cacahñn de jínn̄n yá:

Maestro, cájini na jéē tēe cáhñn ndaā cúu ní, te tu yúhú ní jeē cahñn ni ññn ñáyuu siquí ní. Chi tu sáha ní cuenta ndese cúu ññn ññn i, chi ññn-ni sáha ní jínn̄n i. Te sténn̄n ndaā ní ndese squícu ñáyuu nuū Yaā Dios. ¿Te á íyó váha jeē chúnaa yō renta nuū rey nación Roma jeē jññi nación yō, chí tuú? ¿A chúnaa yō, chí má chúnaa yō? Achí de jínn̄n yá.

¹⁵ Te máá yá jini yā jeē stahú-ni de, te ni cahñn yā jínn̄n de:

¿Najehē cájito ndee rō ruhū? Cuāha ññn xūhún na cóto ri, achí yá.

¹⁶ Te ni cajēhe de xūhún. Te ni jito ya, te ni cajññuhun yá de:

¿Ndé ññn nuū cúu jeē ndeé nuū xūhun yáha, te ndé síhví cúu jeē ndeé yāhá?

Te ni cacahñn de jínn̄n yá:

Nuū jínn̄n síhví rey un cúu, achí de.

¹⁷ Yūcuán na te ni cahñn yā jínn̄n de:

Núu súcuán te nacūha ró núu rey un jéē yíñi cuenta nuū de, te nacūha ró núu Yaā Dios táca jéē yíñi cuenta nuū maá yá, achí yá.

Te ni canaa ni de ni cajini de jeē ndichí ní cahñn yā.

Jeē ní cacajñūhún de siquī jeē nátecu ndīyi

(Mt. 22.23-33; Lc. 20.27-40)

¹⁸ Yūcuán na te jecu tēe grupo saduceo ni quecoo de nuū yā. Te tēe un cácahān jeē tu nátecu cuiti ndīyi. Te ni cacahān de jíin yá siquī ñn jñūhun, áchí de:

¹⁹ Maestro, Moisés ni tee de nuū tútu jeē cánevāha yó: Núu ñn tēe cuu de, te ndōo ñasihí de, te núu tu ní íyo sēhe de jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuiñī i nuū ndīyi ñani de, áchí tutu. ²⁰ Núu súcuan te ni íyo uxā ñani. Te tēe núu ní quijnáhan de jíin ñahan. Te ni jihī de, te tú sēhe de ní íyo. ²¹ Te tēe uū ni naquihin de ña, te suni ni jihī de, te tú sēhe de ní íyo. Te suni súcuan tēe unī. ²² Te ndihúxá de ni condeca de ña, te ni ñn de tú sēhe de ní íyo. Te jeē sándīhí te suni ni jihī ñahan ún. ²³ Núu súcuan te núu na nátecu de jíináhan de quivī nátecu ndīyi, ¿te ndé ñn de cuu ña ñasihí de? Chi ndihúxá de ni condeca de ña. Achí de jíin yá.

²⁴ Yūcuán na te ni cahān yā jíin de:

Yōhoyo cástívi ró jñūhun siquī jeē tu cájecūhun ni rō jeē cahán tutu iī, ni tu cájini rō jeē iyó poder Yaā Dios jeē nastécu yā ndīyi. ²⁵ Chi quivī nátecu ndīyi, te tuá na jñūhun quijnáhan tēe jíin ñahan coo. Chi coo i nájnūhun ndajéhé Yaā Dios andiví. ²⁶ Te siquī jeē nátecu ndīyi, ¿á tu ní cácahu ró tutu ní tee Moisés, ndese ni cahān Yaā Dios jíin de mēhñu yúcū jeē cayú yáñuhūn? Máá rí cúu Yaā Dios Abraham jíin Isaac jíin Jacob, achí yá jíin Moisés. ²⁷ Chi vēsú je ni cajihī de, te cátecu de nuū iyó máá yá, chi cúu ya Yaā sáha jeē técu ñayuu ñí cáni. Yōhoyo cástívi ró jñūhun núu súcuan. Achí yá jíin de.

Jniñu cánuú ndasí gá jeē ní ndacu Yaā Dios

(Mt. 22.34-40)

²⁸ Te ni quee ñn tēe stéén tutu ley Yaā Dios, te ni jini de jeē castíhí jñáhan tēe un jíin Jesús. Te ni jini de jeē váha ni nastíó cuíñí yā jñūhun. Te ni cajñūhún de ya:

¿Ndé ñn cúu jñūhun ndácu jniñu cánuú ndasí gá nuū tāca gá jniñu ni ndacu ya jenahán? áchí de.

²⁹ Te ni cahān Jesús jíin de:

Yāha cúu jniñu jeē cánuú ndasí gá nuū tāca gá. Achí tutu: Ñayuu Israel, cuni nahín ró. Máá Jítóho yō Yaā Dios, máá ñn-ni ya iyó. ³⁰ Núu súcuan te coo manī ndasí ró jíin máá Jítóho rō Yaā Dios, nde jñāā ndasí ró sáha ró ndīhī jeē cúsiñi ni yā, nde jíin ini jíin ánuá rō, jíin ñí jeē níjnūnī rō, jíin ñí fuerza rō. Yāha cúu jniñu ndácu ya jeē cánuú ndasí gá. ³¹ Te jniñu uū jeē ní ndacu ya, suni súcuan cáhān: Cundáhú ni rō jñáhan ró nájnūhun cundáhú ni rō máá ró. Tuá inga jñūhun ndácu jniñu cánuú gá iyó, chi suu máá jéē yáha-ni. Achí yá jíin de.

³² Yūcuán na te ni cahān tēe stéén tutu ley jíin yá:

Vāha ni cahān ní, Maestro. Chi ndaā chi íyó ñn-ni Yaā Dios, te tuá na inga yā iyó. ³³ Te cánuú jéē coo manī ndasí yó jíin yá nde jíin ini jíin ánuá yō, jíin ñí jeē

níjnūnī yō, jíin ñí fuerza yō, te cundáhú ni yō jñáhan yó nájnūhun cundáhú ni yō máá yó. Te cánuú ndasí gá jeē yáha vēsú jeē cáhmu yó quití jíin táca gá jeē socó yō nuū yā. Achí de jíin yá.

³⁴ Yūcuán na te ni jini Jesús jeē váha ni stió cuíñí de, te ni cahān yā jíin de:

Je yajni cuu quívi ró ndaha Yaā Dios jeē ndacu ya jniñu nuū rō, achí yá.

Yūcuán na te ni ñn ga de, tuá ni chundeyí ni de cajñūhún de ya.

Siquī jeē cúu Cristo sēhe yucūn David

(Mt. 22.41-46; Lc. 20.41-44)

³⁵ Te stéén Jesús jñūhun ini templo, te ni cahān yā:

¿Ndese cúu jeē cácahān tēe cástéén tutu ley Yaā Dios jeē Cristo cúu sēhe yucūn David? ³⁶ Chi máá David suhva ni cahān de jñūhun ya ni sáha Espíritu Santo nde jenahán:

Máá Jítóho yō Yaā Dios ni cahān yā jíin Jítóho rī, Yaā quiji:

Cucōo ró lado váha ri nuū cujéhu ró, te na sáha ri jeē quende rō poder tāca jéē cájito uhū rohó.

Achí Yaā Dios. Achí David. ³⁷ Te núu sēhe yucūn David cúu Cristo, ¿te ndese cúu jeē ni cáhān de jeē Jítóho de cúu ya? áchí yá.

Te ñayuu cuehē, cánujnahan ni i cájini nahín i tāca jñūhun cáhān yā.

Jeē ni cáhān yā jeē iyó cuéchi de jíináhan de

(Mt. 23.1-36; Lc. 11.37-54; 20.45-47)

³⁸ Te stéén yā jñūhun, te ni cahān yā jíin i:

Coto má candíje ró tāca tēe cástéén tutu ley. Chi cácusí ni de cáñuhun de sahma cáni jeē steén jeē cujéhu de, cájica cuu de jíin. Te cánujnahan ni de jeē cahán yíñūhún ñáyuu jíin de ini calle. ³⁹ Te cánujnahan ni de cucōo de nuū silla yíñūhún gá ini vehe iī sinagoga, jíin silla yíñūhún gá nuū víco cáyeji ñayuu. ⁴⁰ Te cáquende de vehe ñahan ní caquendōo ndáhú. Te nahán cájicān tahu de návāha cani ni ñayuu jeē tú na cuéchi de. Tēe yáha jíináhan de chi xeñ gā ndoho de castigo. Achí yá.

Jeē ni sócō ñahan viuda xūhún

(Lc. 21.1-4)

⁴¹ Te ñn quivī néne Jesús ini templo ichi núu tāca yéjñu nuū cásocō i xūhún. Te jító ya ndese cáchuhun ñayuu xūhún ini yéjñu ún. Te cuehē ñayuu cucá ní cachuhun i cuehē xūhún. ⁴² Te ni quee ñn ñahan viuda jeē ndóho ndáhú. Te ni chuhun ña uū centavo lulí ini yéjñu ún. ⁴³ Yūcuán na te ni cana ya tēe cáscuáha jíin yá, te ni cahān yā jíin de:

Jendaá cahán rī jíin ró jeē cuehē gā cúu jeē ni sócō ñahan viuda ndahú yáha, vēsú jeē ní casocō tāca ñáyuu cucá. ⁴⁴ Chi tācá i ni casocō i jeē ni ndóo siquī

xúhun cuéhē i. Te ñahan yáha, vésú ndahú ndóho ña, te ni chuhun ndíhi ña jeē cótecu ña. Achí yá jíin de.

Jeē ní cachi yā jeē náā templo

(Mt. 24.1-2; Lc. 21.5-6)

13 Te ni quenda Jesús ini templo cáhnu, te ñn tēe scuáha jíin yá ni cahān de:

Maestro, condēhe ní ná luu jíto tācá vehe yáha jéē cúu templo, jíin tāca yūú jeē ní cuvāha, áchí de.

² Te ni cahān yā jíin de:

Tācá vehe náhnu yāha jéē cájito ró, chi ma cóso jnáhan ga ni ñn yuú, chi ndíhi jnanū. Achí yá.

Na seña coo nuū cuácuyajni ndíhi ñayiví

(Mt. 24.3-28; Lc. 21.7-24; 17.22-24)

³ Te ni jehēn yā jíin de yucu Olivos jeē íne ichi núú templo cáhnu. Te ni cucōo ya yūcuán. Te Pedro jíin Jacobo jíin Juan jíin Andrés ni cacajñuhun sñin de ya:

⁴ Castūhun ní nuū ná, ¿ndé quiví coo tāca jéē ní cachi ní jéē coo? ¿Te na seña coo núu cuácuyajni squícu tāca jéē ni cáhān ní? áchí de.

⁵ Te ni cahān yā jíin de:

Coto ró jéē ma stahú ni ñn de rōhó. ⁶ Chi quijicoo cuehē tēe jeē stahú jíin síhví rí. Máá rí cúu Cristo, achi de. Te súcuan stahú de cuehē ñayuu.

⁷ Te nihīn rō jñuhun jeē tāca lado iyó guerra, chí je yajni coo guerra. Te ma yūhu ró, chi cánuú coo súcuan. Te ni ná tu jinū quiví ndíhi ñayiví. ⁸ Chi ndonda nación siquī inga nación, te ndonda ñuu siquī inga ñuu jeē cuajnáhan. Te cháha chúcuan jñāa, te coo jnamā, te ndonda ñayuu siquī jnáhan i. Te tāca jéē yáha cácuu jñūndóho quejéé xíhna ñúhún gá.

⁹ Te condito ró máá ró, chi nastúu i rōhó núú tāca tóhō, te ini tācá vehe íi sinagoga caní i rōhó. Te quin-deca i sava ró núú tācá gobernador jíin núú tāca rey, te cahān i cuēchi siquī rō siquī jeē cácuandíje ró rúhū. Te súcuan te cuu nacani ró jñuhun ri nuū de. ¹⁰ Te jíni ñúhún jéé xíhna gā cuitē núu jñuhun nuū tācá nación ndese jnáma ri i, te sáa te ndíhi quiví. ¹¹ Te núu ni cajññ de rōhó cuángoo de jíin ró nuū tāca tóhō, te ma ná-cani ni rō xíhna gā ndese stíó cuíñí rō nuū de te cācu ró. Chi máá hora un te máá Yaā Dios cuāha ya jñuhun nuū rō ndese cahān rō, te jñuhun ún cahān rō. Chi nasūu máá ró cúu jeē cahān, chí Espíritu Santo cúu jeē cahān. ¹² Te ñani jíin ñani nastúu jnáhan jeē na cúu. Te tátá nastúu sēhe jeē cúu. Te sēhe ndonda siquī tatá jíin náná jeē cahni. ¹³ Te tāca ñayuu quitē ni i nuū rō jeē siquí ruhū. Te ñayuu cuiñí ñihin jíin jñuhun ri nde quiví jínu, chí cācu i.

¹⁴ Te Daniel, tēe ni nacani jñuhun Yaā Dios, ni tee de jñuhun ñn tēe néé jéé quíji. Te rōhó jéé cácahu tutu ún, na jécūhun ni rō. Chi ñn quiví te cuni rō jeē sáha ndevāha de jeē stívi de tācá ndajñíu íi ini templo, te cuiñí de nuū tú na ley cuiñí de. Te núu cuni rō jeē súcuan cúu, te ñayuu cáyūcú región Judea, na cúnu i caa i yucu quingoo i. ¹⁵ Te ñayuu cáyūcu núú quehe, ma ndívi i

ini vehe jeē quénehen i ndajñíu i, chí cánuú cunu yachí i návāha cācu i. ¹⁶ Te ñayuu cáhīn nuū ítu, ma ndíji i vehe jeē quíhin i sahma i. ¹⁷ Te quiví ún nacā jeē ndahú ñahan cáñuhun sēhe jíin ñahan cándeca yiquín, chí ma cúnihin ña cunu yachí ña. ¹⁸ Te cacān tahú rō jeē ma quíji jñūndóho un jéē cunu ró máá tiempo cúun yuhvā. ¹⁹ Chi jeē quejéé un te coo cuehē jñūndóho xeēn, jeē ná tu coo súcuan nde quiví ní sáha Yaā Dios ñayiví te nde vijna. Te jeē ndíhi jñūndóho ún te ni ma cóo ga jeē súcuan. ²⁰ Te núu tú nastívi máá Jí-toho yō Yaā Dios tiempo jñūndóho ún, te ni ñn ñayuu ma cácu cuiti i. Te jeē siquí ñayuu cácuandíje jeē ní nacāji ya, jeē yúcuu nastívi ya tiempo un.

²¹ 'Núu súcuan te núu ñn ñayuu cahān jíin ró: Yāhá condēhe ró íne Cristo, chí: Yūcuán condēhe ró íne ya, achi i, te ma candíje ró jéé cahán i. ²² Chi canecoo tēe cástáhú te cahān de jeē Cristo cúu de, chí cáhān de jeē tēe nácani jñuhun Yaā Dios cúu de. Te sáha de jñíhu jéhu jeē naa ni ñayuu coto i, návāha stáhú de nde maá ñayuu ní nacāji ya, te núu na cúu. ²³ Te ndito na cóo ni rō, chí je ni castūhun rí nuū rō vijna nde ná tu coo.

Ndese coo quiví ndíji Yaā ní nduu tēe

(Mt. 24.29-35, 42-44; Lc. 21.25-36)

²⁴ Te quiví ún, núu je ni ndíhi jñūndóho ún, te cunjnúú níandii, te yoō ma ndíi gā. ²⁵ Te ñingoo quími íin andiví. Te tāca jéé íin andiví chí quisi i. ²⁶ Yūcuán na te coto ñayuu nuū maá rí, Yaā ní nduu tēe, ndíji rí jíin vícō, te condiso ri cuehē poder, te yōhyo luu cujéhu ri. ²⁷ Yūcuán na te tají rí ndajéhé rí quinastútú yá ñayuu ní nacāji ri ndicúún lado ñayiví, nde nuū ndíhi ñayiví te nde nuū ndíhi andiví.

²⁸ Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihní. ²⁹ Te suni súcuan núu ni cajini rō jeē ní quejéé cúu tācá jñíhu jeē ni cáhān rí, yūcuán na te na jécūhun ni rō jeē ní cuyajni quiví ndíji ri, te yachí coo. ³⁰ Jendaá cahán rí jíin ró jeē ma cúu ndíhi ñayuu jeē cóto jñūndóho ún, chí nde squícu ndíhi jñíhu ún.

³¹ Andiví jíin ñayiví chí naa, te tāca jñuhun cáhān rí chí ma náā, chí ndíhi squícu.

³² Te quiví jíin hora jeē ndíji ri, tú ni ñn ñayuu jiní, ni máá ndajéhé cáhīyo andiví, ni máá rí, Sēhe Yaā Dios. Chí máá ñn ni Tátá rí cúu jeē jiní.

³³ 'Núu súcuan te na cócuhun ni rō tāca jñuhun yáha, te ndito na cóo ni rō, te cacān tahú rō, chí tu cájini rō na quiví ndíji ri. ³⁴ Chí coo nájñuhun ñn tēe jeē quíhin jicá de, te nde ná tu quenda de vehe de, te ni ndacu de jñíhu nuū tāca mozo de ndese sáha ñn ñn de. Te ni ndacu de jñíhu nuū tēe ndíto yéhyí jéé na cóndito de.

³⁵ Te suni súcuan rōhó jñnáhan ró, ndito na cóo ni rō. Chí cúu ri nájñuhun jitohe vehe ún, te tu cájini rō na hora ndíji ri, á jéé cuácuaa, chí ñuú, chí jéé cána líhli, chí jénéhen. ³⁶ Chí ñn sanaa-ni te ndíji ri, te coto ró jéé ma nánihīn rí rohó jéé tu ndíto ró. ³⁷ Te jñuhun cáhān

rī jín ró jijnáhan ró, suni cáhán rī jín ndivii ñayuu: Ndi-to na cóo ni rō jijnáhan ró. Achí yá.

Jeē ní casquíjñahan de jñūhun jeē jñi de Jesús

(Mt. 26.1-5; Lc. 22.1-2; Jn. 11.45-53)

14 Te cúmanī uū gā quivī te quejéé vico pascua jeē cáyeji ñayuu hebreo pan jeē tú na levadura yíhi. Te sutū cácujuhnu jín tée cástéén tutu ley, ni canducú de modo ndese jñi de Jesús jín jñūhun stáhú, te cahni de ya. ² Te ni cacahān de:

Ma jñi yó de máá quivī víco, chi ndonda ñayuu siquī yō, achí de.

Jñūhun ñahan jeē ní chuhun perfume xinī yā

(Mt. 26.6-13; Jn. 12.1-8)

³ Te íne Jesús ñuu Betania vehe Simón, tēe ni ndoho cuehyī stehyú. Te níní yéji yā staā, te ni quee ñn ñahan nuū yā, ndáhá ña ñn frasco yuū luu jeē ñūhun aceite perfume, jeē máni ita nardo cúu, te yōhyo yahu ndéé. Te ni tahú ña frasco un, te ni chuhun ña xinī yā. ⁴ Te sa-va tēe cáhīn yūcuan ní caquitī ni de, te ni cacahān de:

¿Najehē cúu jeē náā saá-ni perfume jñiñā? ⁵ Chi cuu xícó yahu yó víhyá gā unī ciento denario, te cuāha yo núū ñayuu ndahú núú, achí de.

Te ni cacahān sōo de jín ña.

⁶ Te ni cahān Jesús:

Ma stáhān rō ña. ¿Naun casáha ró jéé nácani uhū ni ña? Chi ñn jniñu váha cúu jeē ni sáha ña jín rí. ⁷ Chi níní coyūcu ñayuu ndahú jín ró, te núu cácu ni rō te cuu sáha vāha ró jín i. Te ruhū chi tuá condee rī jín ró. ⁸ Chi ni sáha ña ndihī jeē cuu sáha ña jeē maní ña jín rí. Chi nde ná tu quindūji ri te je ni sátūhva ña ruhū jeē ní chuhun ña perfume ruhū. ⁹ Jendaá cahán rī jín ró jeē ñí cáhnu ñayivī ndé-ni cúu nuū cuité núu jñūhun jeē jñáma ri ñayuu, suni nacani i jñūhun jeē ni sáha ñahan yáha, návāha cocuhun ni ñayuu ña, achí yá.

Jeē ní nastúu Judas yā

(Mt. 26.14-16; Lc. 22.3-6)

¹⁰ Yūcuán na te Judas Iscariote, ñn jeē ndihúxí uū tēe cáscuáha un, ní jehēn de nuū sutú cácujuhnu, ni sán-daā de jín jéé nastúu de Jesús nuū jijnáhan. ¹¹ Te nuū ní cajini sōho sutū un jéé cahán de, te ni cacusiñ ni, te ni cajejñūhun jeē cuáha xūhun núú de. Te nde quivī un ní nducú de modo ndese nastúu de ya.

Jeē ní jequin yā Cena yā

(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹² Te ni quee máá quivī jeē quejéé vico pascua jeē cáyeji ñayuu pan jeē tú na levadura yíhi, te suni quivī un cájehni i londe nájnūhun ni ndacu Yaā Dios jniñu jeē sáha i vico pascua un. Te tēe cáscuáha un ní caca-jñūhún de ya:

¿Ndé nuū cuní ni jéé quisátūhva ná cuxíni ní vico pascua? achí de.

¹³ Te ni tají yá uū tēe cáscuáha ún quingoo de, te achí yá jín de:

Cuángoo nde ñuu, te yūcuán najnáhan ró jín ñn tēe ndíso quiyi ndute. Te condiquín rō de quihín rō jín de.

¹⁴ Te vehe jeē ndívi de, yūcuan cáhān rō jín tée chíí ve-he: Achí máá Maestro: ¿Ndé ñn cúu cuarto vehe ní cuāha núú ní núú cuxíni ya vico pascua jín tée cáscuáha jín yá? achí rō. ¹⁵ Te máá de stéén de ñn cuarto cáhnu nde xinī vehe jeē je íyó túhva. Te yūcuan sátūh-va ró jéé cuxíni yó, achí yá jín de.

¹⁶ Te cuangoo tēe cáscuáha ún, te ni jinūcoo de ñuu, te ni canihín de nájnūhun ni cahān yā jín de. Te ni casátūhva de jeē cuxíni ya vico pascua.

¹⁷ Te jeē cuácuaa, te ni quee ya jín ndihúxí uū de.

¹⁸ Te ni cacucōo de mesa cáyeji de staā, te ni cahān yā: Jendaá cahán rī jín ró jeē ñn rōhó jéé yéji jín rí, nastúu ro rúhū, achí yá.

¹⁹ Yūcuán na te ni cacucuíhyá ni de, te ná ñn ná ñn de ni cacajñūhún de ya:

¿A sáña cúu? achí ñn de.

Te suni súcuan inga de:

¿A sáña cúu? achí ñn ñn de.

²⁰ Te ni cahān yā jín de:

Ñn jeē uxí uū rō jeē cáyeji cáhnu jín rí ñn cohō, suu nastúu ruhū. ²¹ Te ruhū, Yaā ní nduu tēe, jendaá cúu jeē quihín rī cuu rī, nájnūhun yósó jñūhun ri nuū tútu iī. Te nacā xeēn ndoho tēe nastúu ruhū. Vāha ga núu tu ní cácu tēe un núú, achí yá.

²² Te níní cáyeji de jín yá, te ni quihin ya pan, te ni nacuatáhú yá, te ni tahú cuéché yá, te ni jēhe ya nuū tēe cáscuáha jín yá. Te ni cahān yā:

Caji rō jijnáhan ró, chi yāha cúu yiqui cúñu rī, achí yá.

²³ Yūcuán na te ni quihin ya ñn copa ndūxi uva, te ni nacuatáhú yá, te ni jēhe ya ni cajihī ndihī de. ²⁴ Te ni cahān yā jín de:

Yāha cúu ñiñī rī jeē cuáha ri jeē cúu contrato jeé, te cati jeē ndundoo cuéchi cuehē ñayuu. ²⁵ Te jendaá cahán rī jín ró jeē ndé vijna te ma cóho ga rī ndūxi ndehē uva yāhá, chi nde quiji quivī ndacu Yaā Dios jniñu ñí ñayivī, te sáá te coho tucu ri jín ró jijnáhan ró. Achí yá.

Jeē ní cachi yā jeē yūhu Pedro cahān de jeē jini de ya

(Mt. 26.30-35; Lc. 22.31-34; Jn. 13.36-38)

²⁶ Te ni jita ya ñn yaa iī jín de jijnáhan de. Te ni quen-da ya cuahān yā jín de nde yucu Olivos. ²⁷ Yūcuán na te ni cahān yā:

Ndivii rō nayūhu ró jeē siquí ruhū jecuáá vijna. Chi suhva je yósó jñūhun ri nuū tútu iī, ni cahān Yaā Dios: Cuāha ri jñūhun jeē cáhni ñayuu tēe ndíto lanchi, te lanchi un cuité núu tī jeē yūhu tí, achí. ²⁸ Te jeē nátecu rī, te xīhna ruhū cosnūu rí quihín rī región Galilea, te sáá te najinūcoo ró, achí yá.

²⁹ Yūcuán na te ni cahān Pedro:

Vēsú ndihī de na náyūhú de, te máá ná chi ma náyūhú cuiti ná, achí de jín yá.

³⁰ Te ni cahān yā jíin de:

Jendaá cahān rī jíin ró jeē jecuáa vijna, nde ná tu cana líhli uū jíinu, te yūhu ró jeē jññ ñayuu rohó, te unī jíinu cahān rō jeē tu jíin rō ruhū, achí yá.

³¹ Te ni cahān teyí de jíin yá:

Vēsú núu cuu na jíin ní, te ma cahān cuiti na jēe tu jíin na níhín, achí de.

Te suni súcuan ni cacahān ndihí de.

Jeē ni jíicān tahu yā nuū huerto Getsemaní

(Mt. 26.36-46; Lc. 22.39-46)

³² Yūcuán na te ni jinū Jesús jíin tēe cáscuáha jíin yá ññ lugar nuū naní Getsemaní. Te ni cahān yā jíin de:

Yāhá-ni cucōo ró, te na quíhín rī cacān tahu rī, achí yá.

³³ Te ni jeca ya Pedro jíin Jacobo jíin Juan, cuahān yā jíin de. Te ni quejéé yá cucuíhyá ndasí ni yā te cúxíí ni yā jeē quíji jññndóho siquī yā. ³⁴ Te ni cahān yā jíin de:

Yōhyo cúcuíhyá ni rī, te ndúcú sáha jeē cúu rī. Yāhá condetu ró te condito ró, achí yá.

³⁵ Te ni jica ya jecu gā, te ni jecuiññi yití yá ni jequin ya nuū yā nuū ññhun. Te ni jíicān tahu yā nuū Yaā Dios jeē núu cuu te ma ndóho ya jññndóho jeē quejéé quíji siquī yā. ³⁶ Te suhva ni cahān yā:

Tátá maá ná, ndihí-ni jñññu cuu sáha maá ní. Te tejiyo ní jññndóho yáha jēe ma quíji siquī ná. Te nasūu jēe cuní maá ná, chí jeē cuní maá ní na cóo, achí yá.

³⁷ Te ni ndee yā nuū ndinúní tēe cáscuáha jíin yá, te ni jito ya jeē cáquixí de. Te ni cahān yā jíin Pedro:

Simón, ¿á quíxí rō? ¿A tu ní cánda ró condito ró jíin rí vēsú ññ hora? ³⁸ Coó ndito ni rō te cacān tahu rō jeē chindéé ññhán yá rohó jeē ma sáha ró cuéchi jeē coto ndee jeneé rōhó. Chí cúní ndije ánuá rō squícu vāha ró, te yiquí cúñu rō chí tu fuerza, achí yá.

³⁹ Te ni jehēn tucu ya, ni jíicān tahu yā, te suni jññhun yúcuan ní cahān yā. ⁴⁰ Te ni ndee ya nuū de, te ni jito ya jeē cáquixí tucu de, chí yōhyo cájií de māhná. Te tuá ní cánihín de jññhun stíó cuíñí de nuū yā. ⁴¹ Te ni ndee yā jeē vuelta unī, te ni cahān yā jíin de:

Vijna te cusū rō te ndetātu ró. Te tuú chí je ni cuu, chí je ni quee hora, te ruhū, Yaā ní nduu tēe, natūu rí te jññ tēe cáhīyo cuéchi ruhū. ⁴² Ndocuiññi jíinánhan ró, chí je vēji tēe nastúu ruhū, te quihín yō jíin de. Achí yá.

Jeē ní cajññi de Jesús

(Mt. 26.47-56; Lc. 22.47-53; Jn. 18.2-11)

⁴³ Te sá cáhán gā yā súcuan, te ni quee-ni Judas, ññ jññhan jeē uxí uū tēe cáscuáha jíin yá. Te vējicoo cuehē tēe jíin de, cándaha de espada jíin yujnu. Chí sutū cáscujéhu jíin tēe cástéén tutu ley jíin tēe jéhu cándacu jñññu, ni cataj de tēe ún. ⁴⁴ Te Judas, tēe nastúu ya ún, je ni jēhe de ññ seña nuū tēe un jíinánhan, chí ni cachi de:

Tēe jeē téchūhu rí un cúu. Te jññ ró jíinánhan ró quihín rō jíin, te ma siaá cuiti rō, achí de.

⁴⁵ Te ni quee de nde nuū Jesús, te ni cahān de jíin yá:

Maestro, Maestro, achí de.

Te ni techūhú de ya. ⁴⁶ Te tāca gá tēe un ní cajññi de ya, te cuango de jíin yá.

⁴⁷ Te ññ tēe íne jíin yá ni tava de espada de, te ni jehnde de sōho ññ mozo maá sūtū cujéhu ga. ⁴⁸ Te ni cahān Jesús jíin ññayuu cuehē ún:

¿Te va tēe cuíhná cúu rí jeē vējicoo ró jíin espada jíin yujnu jññ ró rúhū jeē súcuan? ⁴⁹ Tāca quívī ni ine rí jíin ró jíinánhan ró ini templo cáhnu, ni steén rí jññhun, te tu ní cajññi ró rúhū. Te súcuan cásaaha ró návāha na squícu jeē cahān tutu ññ, achí yá.

⁵⁰ Yūcuán na te ndihí tēe cáscuáha jíin yá, ni castóo de ya, ni cajinu de cuango de.

Tēe suchí jeē ní jinu

⁵¹ Te ññ tēe suchí, ndíquín de ya cuahān de jíin yá. Te ndí de máá ññ sahma cuitá. Te ni cajññi tēe ún de. ⁵² Te máá sahma cuitá un ní canihín. Te ni jinu máá ññ-ni de cuahān de.

Jeē ní indichi Jesús nuū junta tēe cáscujéhu ga

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Yūcuán na te ni jinūcoo de jíin Jesús nuū sutū cujéhu ga. Te tāca sūtū cáscujéhu jíin tēe jéhu cándacu jñññu jíin tēe cástéén tutu ley, ni candutútú de.

⁵⁴ Te Pedro chí jíicā-ni ndíquín de ya, te ni jinū de nde ini patio sutū cujéhu ga. Te ni cucōo de jíin táca policía, násaā de ññhun.

⁵⁵ Te sutū cáscujéhu jíin ndihí tēe cásaaha junta cujéhu ga, ni canducú de cuéchi siquī Jesús, chí cahni de ya cáscuni de. Te tu ní cánihín de. ⁵⁶ Chí cuehē de ni cacahān yaá síquī yā, te tu ní quíjñánhan jññhun ni cacahān de. ⁵⁷ Yūcuán na te ni candocuiññi sava de, te ni catee de cuéchi siquī yā, achí de:

⁵⁸ Máá ná ni cajini ná cáhán de jeē canu de templo yáha jēe ní cuvāha ni casáha tēe, te nuū uní quívī te nacani de ññga jeē násūu jíin ndaha tēe cuvāha, achí de. Achí jíinánhan.

⁵⁹ Te ni jññhun yáha tu ní quíjñánhan tucu jeē cácahān de siquī yā.

⁶⁰ Yūcuán na te sutū cujéhu ga ni ndocuiññi de nuū ññayuu cuehē ún, te ni cajññhún de Jesús:

¿Naun tu cáhán cuiti rō? ¿A íyó ndáa jeē cácahān tēe yáha síquī rō? achí de.

⁶¹ Te máá yá tu ní cáhán cuiti yā, chí tú na vé ni stíó cuíñí yā. Te sutū cujéhu ga ni cajññhún tucu de ya:

¿A máá ró cúu Cristo, Sēhe Yaā vāha jeē cujéhu? achí de jíin yá.

⁶² Te ni cahān yā:

Suu rí cúu. Te coto ró jēe ruhū, Yaā ní nduu tēe, condee rí lado váha Yaā iyó poder, te ndiji rí ichi ándiví jíin vícō, achí yá.

⁶³ Yūcuán na te sutū cujéhu ga ni jehnde de sahma de jeē quití ndasí ni de, te ni cahān de:

¿Ndé jini ñúhún gá yō testigo núu súcuan? ⁶⁴ Chi je ni cajini ró jeē cahán de jnūhun ndevāha jeē quití ni Yaā Dios, chi sáha de máá de Sēhe Yaā Dios. ¿Te ndese cá-jeni ni rō? Achí de.

Te ndíhi de ni cacahān jeē na cúu yā.

⁶⁵ Te sava de ni catesíhí de nuū yā, te ni cajesi de sahma nuū yā, te ni cacani de ya. Te cacahān de jíin yá: Cachi ndé ñin cúu jeē ní cani rōhó, áchí de.

Te tāca tée policia ni cacani de nuū yā.

Jeē ní cachi Pedro jeē tu jíin de ya

(Mt. 26.69-75; Lc. 22.56-62; Jn. 18.15-18, 25-29)

⁶⁶ Te íne Pedro ini patio ichi chíji nuū cáhīin de jíin Jesús. Te ni quee ñin ñahan jéjníñu vehe sutū cujéhnú ga ún. ⁶⁷ Te ni jito ña nuū de jeē néne de násaā de yuñúhún. Te ni jito vāha ña nuū de, te ni cahān ña: Róhó chi suni ni jica ró jíin Jesús, tēe ñuu Nazaret, achí ña.

⁶⁸ Te máá de tu ní cáchi de, chi ni cahān de:

Tu jíin rī de, ni tu jíin rī na jnūhun cáhán rō, achí de.

Te ni quenda de yéhyí núu quéhe. Te ni cana-ni líhli.

⁶⁹ Te ñahan jéjníñu un ní jito tucu ña nuū de, te ni que-jéé ña cáhán ña jíin ñayuu cáhīin yūcuán:

Tēe yáha suni jnáhan tāca tée un cúu, áchí ña.

⁷⁰ Te máá de tu ní cáchi tucu de. Te ni cunúu jecu gā, te ñayuu cáhīin yūcuan ní cacahān tucu i jíin Pedro:

Jendaá ndije jeē suni jnáhan de cúu ró, chí tēe Galilea cúu ró, te ñuú-ni cáhán rō jíin de jíinánhan de. Achí i.

⁷¹ Yūcuán na te ni quejéé de cáhán teyí de jeē na cóndee cuēchi siquī de núu tu cáhán ndaā de:

Tu jíin rī tēe un jéé cacahān rō jnūhun de, áchí de.

⁷² Yūcuán na te ni cana-ni líhli vuelta uū. Te ni nucūhun ni de jnūhun ni cahān Jesús jíin de: Nde ná tu cana líhli uū jíinu, te yūhu ró te cahān rō uní jíinu jeē tu jíin rō ruhū. Te ni nacani ni de siquī jnúhun ún, te ni ndahyū de.

Jeē ní indichi Jesús nuū Pilato

(Mt. 27.1-2, 11-14; Lc. 23.1-5; Jn. 18.28-38)

15 Te jeē ní cundijin, te sutū cácujuhnu ni candutútú de jíin tēe jéhnú cándacu jniñu, jíin tēe cástéén tutu ley, jíin ndíhi tēe casáha junta cujéhnú ga, te ni casquíjnánhan de jnūhun. Te ni cajihni de Jesús, te cuangoo de jíin yá nuū Pilato, tēe cúu gobernador. ² Te Pilato ni cajnūhún de ya:

¿A máá ró cúu Rey ñayuu hebreo? achí de.

Te ni cahān yā:

Suu ri cúu, nájnūhun cáhán rō.

³ Te sutū cácujuhnu un ní cacahān de cuehē cuēchi siquī yā. ⁴ Te Pilato ni cajnūhún tucu de ya:

¿Naun tu cáhán cuítí rō? ¿A tu jíin ró jéé cuehē cuēchi cacahān de siquī rō? achí de.

⁵ Te tu ní cáhán cuítí yā ni ñin jnūhun jíin de. Te nahán ní naa ni Pilato ndéhé de nuū yā.

Jeē ní cundaā jeē cúu yā

(Mt. 27.15-31; Lc. 23.13-25; Jn. 18.38-19.16)

⁶ Te íyó costumbre Pilato jeē quivī víco un siáá de ñin tēe íne vecāa, núu na-ni tēe cácuñi ñayuu. ⁷ Te íyó ñin tēe nání Barrabás, íne de vecāa jíin táca jnáhan de siquī jeē ní candonda de siquī tohō te ni cajehni de ndíyi. ⁸ Te ni quecoo ñayuu cuehē, te ni cacahān i jíin Pilato jeē na sáha de nájnūhun íyó costumbre de. ⁹ Te ni cahān Pilato jíin i:

¿A tu cácuñi rō jeē siaá rī tēe cúu Rey rohó ñayuu hebreo? achí de.

¹⁰ Súcuan ni cahān de, chí cúní de siáá de Jesús. Chi je ni jecūhun ni de jeē ní cacucuésún ni tāca sūtū un cájito de ya, te jeē yūcuan ní quijicoo jíin yá nuū de.

¹¹ Te sutū cácujuhnu un ní cascáhán de ñayuu cuehē un jéé váha ga na cácan i jeē siaá Pilato Barrabás.

¹² Yūcuán na te ni cajnūhún tucu Pilato:

Núu súcuan ¿te ndese cácuñi rō jeē sáha ri jíin tēe jeē cacahān rō jeē cúu de Rey rohó ñayuu hebreo? achí de jíin i.

¹³ Te ni cacana jee i:

Cata caa ní de jicā cruz, na cúu de, áchí i.

¹⁴ Te ni cahān Pilato:

¿Na cuēchi ni sáha de núu súcuan?

Te ñayuu un ní cacana jee tucu i:

Cata caa ní de jicā cruz, na cúu de, áchí i.

¹⁵ Te Pilato cuní de jeē na cúsiñi ñayuu jíin de, te ni siaá de Barrabás. Yūcuán na te ni ndacu de jniñu jeē na cáni táca soldado Jesús, jíin jéé cata caa de ya jicā cruz.

¹⁶ Yūcuán na te soldado un cuángoo de jíin yá ini patio palacio, jeē sácatā de nuū yā. Te ni canastútú de ndíhi jnáhan de. ¹⁷ Te ni cachuhun de ya ñin sahma cuehē ndíhí jéé cúu sahma rey. Te ni casáha de ñin corona iñu, ni cachuhun de xinī yā. ¹⁸ Yūcuán na te ni cacana de:

Nacā jeē váha rey cúu Rey ñayuu hebreo, achí de.

¹⁹ Te ni cacani de yujnu xinī yā, te ni catesíhí de nuū yā, te ni cajecuíñi yití de nuū yā, casáha de jeē chíñúhún de ya. ²⁰ Te nuū ní cuu ni casácatā de nuū yā, te ni catava de sahma cuehē ndíhí un, te ni canachuhun de ya sahma máá yá. Te ni caquenehen de ya jeē cata caa de ya jicā cruz.

Jeē ní cacata caa de ya jicā cruz

(Mt. 27.32-44; Lc. 23.26-43; Jn. 19.17-27)

²¹ Te ñin tēe nání Simón ñuu Cirene, tēe cúu tátá Alejandro jíin Rufo, vendiji de jeē ni jéhn de rancho. Te ni yāha de yūcuán, te ni catejníñu soldado un de jeē cóndiso de cruz yā.

²² Te cuangoo de jíin yá ñin lugar nuū naní Gólgota, jeē cuní cahān Lugar Yiquí Xíní. ²³ Te ni cajéhe de vino jeē ni sácā núu jíin súje uvuā jeē cóho ya, te tu ní jíhi ya. ²⁴ Te ni cacata caa de ya jicā cruz. Te ni casáha de sorteo jeē siquí ndese nihīn ñin ñin de sahma ya.

²⁵ Te cahĩn ni cacata caa de ya. ²⁶ Te jnũhun ni catee de xinĩ cruz cahán na siquĩ ni jihĩ yā: Yāha cúu Rey ñayuu hebreo, achí. ²⁷ Te suni ni cacata caa de uũ tēe cuíhná núu uũ gā cruz, ĩn de lado váha ya, te inga de lado jecó yá. ²⁸ Te ni squícu jnũhun cáhán tutu ĩi: Ni casquijnáhan de ya jíin tēe cásáha neé, áchí.

²⁹ Te ñayuu cáyáha yũcuán cáscuicó i xinĩ i, te cácahān neé i:

Jājaān. Róhó chi cáhán rō jeē cánu rō templo cáhnu, te nuũ unĩ quivĩ te nucondichi sáha ró. ³⁰ Núu súcuan te jnama ró máá ró, te nuu ró jicā cruz viĩ, achí i.

³¹ Te suni súcuan ni cacahān catá sutũ cácujeñnu jíin tēe cástéén tutu ley, te áchí de cácahān maá de:

Núu inga ñayuu ni jnama de, ¿te naun tu cúu jnama de máá de vijna? ³² Núu na cúni yō jeē Cristo, Rey ñayuu Israel, nuu de jicā cruz vijna, yũcuán na te candíje yó, áchí de jíinánhan de.

Te tēe cándita caa jíin yá, suni súcuan ni cacahān neé de.

Jeē ni jihĩ Jesús

(Mt. 27.45-56; Lc. 23.44-49; Jn. 19.28-30)

³³ Te nuũ ní cuu cahuxĩ uũ, te ni cunee ñĩ cáhnu nde cahunĩ. ³⁴ Te nuũ ní cuu cahunĩ, te ni cana jee Jesús:

Eloi, Eloi, ¿lama sabactani? achí yá. Te jnũhun un cúni cahān: Yaā Dios maá ná, Yaā Dios maá ná, ¿naun ni stóo ní sáña?

³⁵ Te sava ñayuu cáhĩin yũcuan, ní cajini i jnũhun ún, te ni cacahān i:

Cuni nahín, chi cána de xinĩ Elías, tēe ni nacani jnũhun Yaā Dios jenahán, achí i.

³⁶ Te ni jinu ĩn tēe, ni jechundaji de cachĩ nuũ vinagre iyá. Te ni tee de xinĩ ĩn yujnu, te ni tee de yuhu ya jeē cóho ya. Te ni cahān de:

Na cóndēhe yó núu quiji Elías nasnúu de, áchí de.

³⁷ Te máá Jesús ni cana jee ya, te ni jihĩ-ni ya.

³⁸ Yũcuán na te sahma ndíta caa jeē ndihyú cuarto ĩi ini templo cáhnu, ni ndatā sava sava nde xinĩ te nde nuũ jehé. ³⁹ Te tēe ñuu Roma jeē cúu capitán, índichi de nuũ yā, te ni jini de jeē ní cana jee ya te ni jihĩ yā. Te ni cahān de:

Jendaá ndije jeē Séhe Yaā Dios cúu tēe yáha, áchí de.

⁴⁰ Te suni cáhĩin sava ñahan, cándēhe jicá ña. Te unĩ ña cácuu María ñuu Magdala, jíin María naná José jíin Jacobo suchí, jíin ñahan nání Salomé. ⁴¹ Te ñahan yáha ní candiquĩn ña ya, ni cajejníñu ña nuũ yā nde náa jíca ya Galilea. Te suni cáhĩin cuehē gā ñahan jeē ni jéngoo jíin yá ñuu Jerusalén.

Jeē ní quindũji Jesús

(Mt. 27.57-61; Lc. 23.50-56; Jn. 19.38-42)

⁴² Te ni ini quivĩ ún. Te quivĩ sátũhva cúu, chi sajnē cúu quivĩ ndétátú. ⁴³ Te ni quee José, tēe ñuu Arimatea. Te cúu de ĩn tēe cújehnu nuũ junta cujehnu ga. Te suni ñũhun ni de jeē quiji quivĩ jeē ndacu Yaā Dios jniñu. Te tu yúhú de chi ni quivĩ de nuũ Pilato, ni jicān

de yiquĩ cúñu Jesús. ⁴⁴ Te Pilato chi náā ni de jeē yachí ni jihĩ yā. Te ni cana de capitán, te ni cajnũhún de tēe un núu je ni jihĩ yā. ⁴⁵ Yũcuán na te ni cucáhnu ni de jeē ni cáhān capitán jíin de, te ni jēhe de jnũhun jeē quihin José yiquĩ cúñu yā. ⁴⁶ Te José ni jeen de ĩn sahma cuitá váha. Te ni snúu de yiquĩ cúñu yā, te ni chusúcún de sahma ún. Te ni chindũji de ya ini ĩn yaũ jeē quindũji ndĩyi, jeē ní caan jicā ĩn cava. Te ni jesi de ĩn yuũ yuhu yáú un. ⁴⁷ Te María ñuu Magdala, jíin María naná José, ni cajito ña nuũ ní cachindũji de ya.

Jeē ní natecu Jesús

(Mt. 28.1-10; Lc. 24.1-12; Jn. 20.1-10)

16 Te ni ini quivĩ ndétátú, te María ñuu Magdala, jíin María naná Jacobo, jíin Salomé, ni cajeen ña tēcá perfume jeē quíchuhun ña yiquĩ cúñu yā. ² Te jenéhen quivĩ domingo, jeē ní cane niāndii, te ni jinũcoo ña nuũ ní yindũji ya. ³ Te cácahān ña:

¿Ndé níhĩn yō tēe tejiyo yuũ ndihyú yuhu yáú? áchí ña.

⁴ Te ni candacoto ña, te ni cajito ña jeē jé ni cujiyo yuũ cáhnu un cuáhān. ⁵ Te ni quivĩcoo ña ini yaũ ndĩyi. Te ni cajito ña ĩn ndajéhé Yaā Dios jeē cáa nájnũhun tēe suchí, néne ya ichi lado váha, ñũhun ya ĩn sahma cuijín cáni. Te ni cayũhú ña. ⁶ Te ni cahān yā jíin ña:

Ma yũhu ró jijnánhan ró. Chi vecondēhe ró Jesús ñuu Nazaret, Yaā ni jihĩ jicā cruz. Tuá yā yāhá, chi je ni natecu yā. Yāhá condēhé ró nuũ ní cachindũji de ya. ⁷ Cuá-ningoo te cachi rō nuũ tēe cáscuáha jíin yá, jíin núu Pedro, jeē xíhna gā maá yá jinũ Galilea, te sáa te najinũcoo de. Te yũcuán coto de nuũ yā, nájnũhun ni cahān yā jíin de nde saá, áchí yá jíin ña.

⁸ Yũcuán na te ñahan un ní quendacoo ña nuũ ní yindũji ya, te cájino ña cuangoo ña. Chi quĩsi i ña jeē cáyũhú ña. Te tu ní cácachí cuiti ña nuũ ní ĩn, chi cáyũhú ña.

Jeē ní nane Jesús nuũ María ñuu Magdala

(Jn. 20. 11-18)

⁹ Te Jesús ni natecu yā jenéhen quivĩ domingo. Te xíhna gā ni nane ndijin yā nuũ María ñuu Magdala, ñahan jeē ní quenehen ya uxā tachĩ ini. ¹⁰ Te cuahān ña cuacastũhún ña nuũ tãca tēe ni cajica jíin yá jeē ní nane ya nuũ ña. Te cácuquíhyá ni de te cándañyũ de. ¹¹ Te nuũ ní cajini de jnũhun jeē ní jito ña nuũ yā jeē tēcu yā, te tu ní cácañdíje de jnũhun cáhán ña.

Jeē ní nane ya nuũ uũ tēe cáscuáha jíin yá

(Lc. 24.13-35)

¹² Yũcuán na te ni quendacoo uũ jnánhan tēe ún, cájica de cuahān de ichi rancho, te sĩn modo ni nane ndijin yā nuũ de. ¹³ Te ni canandicó de, ni cacastũhún de nuũ tãca gá jnánhan de. Te ni tu ní cácañdíje tucu jnánhan de jeē cácahān ndĩndúu de.

Jeē ní tejníñu ya de nacani de jnūhun

(Mt. 28.16-20; Lc. 24.36-49; Jn. 20.19-23)

¹⁴ Te cúcuéé gá te ni nane ndijin yā nuū ndihúxí ñn de jeē cáyūcú de mesa cáyeji de staā. Te ni cahān yā nuū de, chí nīhni ni de jeē tu cá candíje de jeē cácahān jnáhan de un, jéé ní natecu yā ni cajito de ya. ¹⁵ Te ni cahān yā jíin de:

Cuángoo jíjnáhan ró nñí ñayiví, te nacani ró jnūhun ri nuū tāca ñáyuu ndese jnáma ri i. ¹⁶ Te ñayuu candíje te cuandute i, chí cācu i. Te ñayuu tú candíje, chí jnahnū ndetū i. ¹⁷ Te ñayuu candíje, sáha i tācá jniñu jéhnū yáha jeē steén jeē iyó rí jíin i: Jíin sñhví rí quenehen i tachī ini ñayuu. Te cahān i tijni yuhu jéé. ¹⁸ Te núu ni

jññ sanaa i coō, chí núu ni jiji i veneno, te ma sáha daño jíin i. Te suni soó i ndaha i siquē ñáyuu cácuñū, te nduvāha. Achí yá jíin de.

Jeē ní ndaa ya cuanuhun yā andiví

(Lc. 24.50-53)

¹⁹ Yūcuán na te nuū ní ndihí ni cahān maá Jítóho yō jíin de jíjnáhan de, te ni ndaa ya cuanuhun yā andiví, te ni cucōo ya lado váha Yaā Dios nuū cujéhnū ya. ²⁰ Te máá de ni quendacoo de, ni canacani de jnūhun ya tāca lado ndese jnáma ya ñayuu. Te máá Jítóho yō ni chindéé ñáhán yá de. Te ni jēhe ya fuerza jeē sáha de tācá jniñu jéhnū jeē steén jeē iyó ndáā jnūhun cá-nacani de. Te ni cuu. Amén.

SAN LUCAS

1 Cuehē tēe ni cajicu de ni catee yúcún de historia Jesús, tācá jniñu jeē ni sáha ya ni cajito yó. ² Te ni catee de tāca jnúhun jeē ní cacastūhun ñáyyu nuū yō, jeē ní cajito i jniñu yúcuan nde ná ni quejéé, te ni canacani i jnúhun ya. ³ Te máá ná, suni ni nanducú yúcún ná tāca jnúhun ya, nde nuū ní quejéé. Te ni jeni ni na jéē suni íyó váha jeē tée cájí ná tāca jnúhun yáha núú ní, amigo Teófilo. ⁴ Te súcuan te cuni ni jéē iyó ndáa tāca jnúhun jeē ní cacastūhún i nuū ní.

Jeē ní cachi ndajéhé jeē cacu Juan tēe scuándute

⁵ Tiempo jeē ní cuu Herodes rey región Judea, te ni ñyo ñn sutū ñayuu hebreo, naní de Zacarías, te grupo Abías cúu de. Te ñasihí de nání ña Elisabet, te suni sēhe yucún maá sutū Aarón cúu ña. ⁶ Te ndindúú de cahíyo ndaā de nuū Yaā Dios, te ndaā váha cásquicu de jniñu ndácu ley maá Jítoho yō Yaā Dios, cájito tāca ñáyyu. ⁷ Te tú sēhe de íyó, chi ñahan nómá cúu Elisabet, te je jéhu ndindúú de.

⁸ Te ñn quivī te jéniñu Zacarías nuū jniñu jeē cúu de sutū nuū Yaā Dios, chi ni quee quivī jeē ndívi grupo de. ⁹ Te ni casáha de sorteo, nájnūhun íyó costumbre sutū. Te ni sáha tocar Zacarías jeē quívī de ini cuarto ñi templo Jítoho yō Yaā Dios, te cahmu de sūje cútú. ¹⁰ Te hora jeē cayú sūje cútú, te tāca ñáyyu cuehē cáhīn i fuera, cájicān tahú i. ¹¹ Te ni cane ñn ndajéhé maá Jítoho yō nuū de, ñn ya lado váha altar nuū jéhu de sūje cútú. ¹² Te ni cunéé ni Zacarías ni jito de nuū yā, te yōhyo ni yūhú de. ¹³ Te ni cahān ndajéhé un jíin de:

Zacarías, ma yūhu ró, chi je ni chihi Yaā Dios cuenta jeē ni jíicān tahú rō. Te ñasihí ró Elisabet, scácu ña ñn sēhe yíí, te snání ró i Juan. ¹⁴ Te yōhyo cusíí ni rō. Te cuehē ñayuu cusíí ni jeē cácu i. ¹⁵ Chi kujéhu sēhe ró sáha máá Yaā Dios. Te ma cóho i vino ni ndixi cuíí. Te cunuú máá Espíritu Santo jíin i, nde ná tu cacu i. ¹⁶ Te sáha i jeē cuehē ñayuu nación rō Israel ndéivicoo i nuū Jítoho i Yaā Dios. ¹⁷ Te xíhna gā Juan quiji nacani jnúhun Jítoho yō Jesús, te sáa te quiji ya. Te sáha i nájnūhun ni sáha Elías, tēe ni nacani jnúhun Yaā Dios jenahán, te coneváha i poder jeē nácani i jnúhun, nájnūhun ni coneváha Elías. Te sáha i jeē tāca tátá ndumaní de jíin sēhe de. Te suni sáha i jeē ñáyyu ñihni ni cuatáhú i nuū Yaā Dios, nduu i ñayuu ndaā. Súcuan sātūhva i ñayuu náváha candíje i máá Jítoho yō jeē quíji ya. Achí ndajéhé.

¹⁸ Te Zacarías ni cajnúhún de ya:

¿Ndese cucáhu ni na núu jendaá cúu? Chi tēe jéhu cúu ná, te suni jéhu ñasihí ná, áchí de.

¹⁹ Te ni cahān ndajéhé un jíin de:

Máá rí cúu Gabriel, te íne ri nuū Yaā Dios, jejniñu ri nuū yā. Te ni tají yá ruhū vēji ri cahān rī jíin ró, te nácani ri jnúhun váha yáha núú rō. ²⁰ Te jeē tu ní cándíje ró jnúhun ni cahān rī, te cuñíhín ró, te ma cúu cahān rō, chi nde na cácu sēhe ró. Te squícu nahín jnúhun cáhān rī yāhá, na quée quivī, achí ndajéhé.

²¹ Te ñayuu cáhīn ichi fuera, cándetu i Zacarías, te cájeni ni i na vé ni cuu jeē cucuéé de ini cuarto ñi templo. ²² Te nuū ní quenda de, te tuá ni cúu cahān de jíin i. Te ni cajecūhun ni i jeē ini templo ni jito ndijin de ñn jeē ni stéén yā nuū de. Te máá seña na ni sáha de nuū i, chi ni cuñíhín de.

²³ Te nuū ni jínu quivī ni jejniñu de ini templo, te cuanuhun de vehe de. ²⁴ Te ni cuu jecu quivī, te ñasihí de Elisabet ni jecūhun sēhe ña. Te ni ñyo ña vehe ña uhūn yoō jeē tuá nde ní jéhén ña. Te jéni ni ña:

²⁵ Súcuan ni sáha máá Jítoho yō jíin rí, te ni tejiyo ya jnúhun jeē cúcanu rī nuū ñáyyu jeē tú sēhe ri, jéni ni ña.

Jeē ní cachi ndajéhé jeē cacu Jesús

²⁶ Te nuū iñú yoō, te ni tají Yaā Dios ndajéhé yā Gabriel, ni jehēn yā ñn ñuu naní Nazaret, ndañúú Galilea. ²⁷ Te ni jehēn yā nuū ñn sūchi sáhí nání María. Te je ni cundaā jeē quijnáhan ña jíin ñn tēe nání José, te sēhe yucún rey David cúu de. ²⁸ Te ni quivī ndajéhé un núu ndeé ña, te ni cahān yā:

Tandii, nacā ndetū cúu ró. Chi máá Jítoho yō Yaā Dios iyó yá jíin ró, te ni sáha ya jeē yóhyo ndetū gā cúu ró núú tāca gā ñahan, áchí yá.

²⁹ Te nuū ni jíto ña nuū yā, te ni cunéé ni ña jeē súcuan cáhān yā, te jéni ni ña naun cáhān yā súcuan jíin ña. ³⁰ Te ni cahān gā ndajéhé un jíin ña:

Ma yūhu ró María, chi ni sáha Yaā Dios jeē váha jíin ró. ³¹ Te jecūhun sēhe ró te scácu ró ñn sēhe yíí, te snání ró i Jesús. ³² Te kujéhu i, te conaní i Sēhe Yaā kujéhu téyí. Te máá yá jeē cúu ya Jítoho yō Yaā Dios, sáha ya jeē cuu i rey, nájnūhun jíi i David ni cuu de rey.

³³ Te ñí cáni ndacu i jniñu nuū ñáyyu nación Israel. Te ma ndíhi cuítí jeē ndácu i jniñu. Achí ndajéhé.

³⁴ Yūcuán na te ni cajnúhún María:

¿Ndese coo jeē ni cahān ní? Chi ná tu coo yíí ná, áchí ña.

³⁵ Te ni cahān ndajéhé un:

Maá Espiritu Santo quiji siquĩ rō, te poder maá Yaā kujéhu téyí sáha ñn jniñu jéhu jíin ró. Te jeē yúcuan maá súchi ñi jeē cácu, quihi cuenta i nuū Yaā Dios, te cahān ñayuu jeē Séhe Yaā Dios cúu i. ³⁶ Te suni cástūhun rí nuū rō jeē jnáhan ró Elisabet, suni scácu ña ñn sēhe vēsú je jéhu ña. Te vijna íyó ññu yoō jeē tuá cácahān ñayuu jeē cúu ña ñahan númá. ³⁷ Chi ndihi-ni cuu sáha Yaā Dios, te tu íyó ni ñn jeē ma cúu sáha ya, achí ndajéhé un.

³⁸ Yūcuán na te ni cahān María:

Cuu núu súcuan, chi sáha ná táca jniñu ndácu Jitoho yō Yaā Dios, te na cóo jíin ná nájñūhun ni cachi ní, áchí ña.

Te maá ndajéhé un cuáhān-ni ya.

Jeē ni jécondēhé María Elisabet

³⁹ Te ni cuu jecu quivĩ, te yachĩ cuahān María, ni caa ña yucu cuahān ña ñn ñuu región Judea. ⁴⁰ Te ni jinū ña vehe Zacarías, te ni cahān ña jíin Elisabet. ⁴¹ Te nuū ní jini Elisabet jeē cahān María jíin ña, te sūchi ñūhun chíji ña ni canda-ni i. Te ni cunuú Espiritu Santo ini anuá ña. ⁴² Te ni cahān jee ña:

Ni sáha Yaā Dios jeē yóhoyo ndetū gā cúu ró núū táca gā ñahan, jíin jéē yóhoyo ndetū sēhe ró. ⁴³ ¿Te ndese cúu jeē ní quee naná maá Jitoho rí nuū rí? Chi tu cújéhu nu cuiñi rí. ⁴⁴ Chi jeē ní jini-ni ri jñūhun ni cahān rō jíin rí, te sūchi ñūhun chíji ri ni canda i jeē cúsiñi ni i. ⁴⁵ Te nacā ndetū rō jeē ní candíje ró, chi squícu nahín táca jñūhun ni cahān maá Jitoho yō jíin ró. Achí Elisabet.

⁴⁶ Yūcuán na te ni cahān María:

Cáhán rí jeē kujéhu ndasí maá Jitoho yō Yaā Dios,

⁴⁷ te cúsiñi ni rí jíin Yaā Dios, Yaā jnáma ruhū.

⁴⁸ Chi ni sáha ya cuenta ruhū, vēsú tu cújéhu ri.

Te na squícu ri jniñu ndácu ya.

Te nde vijna te táca ñayuu jeē nácacu, cahān i jeē yóhoyo ndetū rí.

⁴⁹ Chi Yaā jññ ndihi poder, ni sáha ya jniñu jéhu jíin rí.

Te Yaā ñi ndoo cúu ya.

⁵⁰ Te ññi cáni cundáhú ni yā táca ñayuu ndíso ñyo nuū yā.

⁵¹ Ni sáha ya jniñu jéhu jíin poder yā,

chi ni scúnu ya ñayuu casándúxi maá,

⁵² te ñayuu cácujeéhu, ni quende ya jeē kujéhu i.

Te ñayuu ndahú chi ni sajeéhu ya i,

⁵³ te ñayuu cájiñi sōco ni jēhe ya jeē cáji vāha i.

Te ñayuu cucá ní natajé yá i súcuan-ni.

⁵⁴ Te ni chindéé ñahán yá yohó, ñayuu nación Israel, jeē cácuu yó mozo yā,

te tu náa ni yā jeē cundáhú ni yā yohó.

⁵⁵ Chi súcuan ni jeññūhun ya nuū táca jíi yō,

nuū Abraham jíin táca yúcūn de jeē cóo ññi cáni.

Achí María.

⁵⁶ Te ni condee ña jíin Elisabet nájñūhun uní yoō. Yūcuán na te cuanuhun ña vehe ña.

Jeē ní cacu Juan tēe scuándute

⁵⁷ Te ni jinū quivĩ jeē scácu Elisabet sēhe ña, te ni scácu ña ñn sēhe yí. ⁵⁸ Te táca ñayuu ndeé yajni jíin ña jíin táca jnáhan ña, ni cajini i jeē yóhoyo ni cundáhú ni Yaā Dios ña, te ni jengoo i ni cacahān i jñūhun siñi ni jíin ña. ⁵⁹ Yūcuán na te nuū uná quivĩ jeē ní cacu i, te ni jengoo ñayuu ni sáha i circuncidar sūchi yéquiñ un. (Te yúcuan cúu ñn jññi nuū yiqui cúñu táca súchi yíñ hebreo jeē steén jeē cácuu i ñayuu Yaā Dios.) Te snání i sūchí un sēhví tátá i Zacarías nuú. ⁶⁰ Te ni cahān naná i: Ma cúu, chi Juan conaní i, áchí ña.

⁶¹ Te ni cacahān i jíin ña:

¿Te naun? Chi tú ni ñn jnáhan ró nání súcuan, áchí i.

⁶² Yūcuán na te jíin seña ni cacajññūñi i tátá sūchí un ndese cúní de jeē cónaní i. ⁶³ Te maá de ni jicān ñn tu-tu, te ni tee de: Juan conaní i. Te táca ñayuu un ní canaa ni i cájito i. ⁶⁴ Te ni nduvāha Zacarías jeē ní cuññiñi de, te ni quejéé de cáhán de jeē yóhoyo vāha Yaā cúu Yaā Dios. ⁶⁵ Te táca ñayuu ndeé yajni jíin de, yóhoyo ni canaa ni i. Te ññi yucu región Judea ni jité núu táca jñūhun yáha jeē súcuan ni cuu. ⁶⁶ Te táca ñayuu jeē ní cajini jñūhun, ni quejéé i cánacani ni i, te cáca-jñūhun jnáhan i:

¿Ndese coo na cuéhu sūchi yáha? áchí i.

Chi maá Jitoho yō yóhoyo ni sáha ya jeē váha jíin i.

Jñūhun luu jeē ní nacani Zacarías

⁶⁷ Te tátá i Zacarías ni cunuú Espiritu Santo jíin de, te ni nacani de jñūhun ni steén Yaā Dios nuú de:

⁶⁸ Yóhoyo vāha Yaā cúu maá Jitoho yō, Yaā Dios yohó ñayuu Israel,

chi ni quiji ya nuū yō jeē cácuu yó ñayuu yā, te ni jna-ma ya yohó.

⁶⁹ Te ni jeni ya ñn Yaā iyó poder jeē jnáma ya yohó, te Yaā ún cacu yucūn mozo yā rey David.

⁷⁰ Chi súcuan ni jeññūhun ya, ni cacahān táca tée ndoo ánuá jeē ní canacani de jñūhun ya jehán.

⁷¹ Chi ni cacahān de jeē jnáma ya yohó núu jeē cájito uhū yohó, jíin núu jeē cáquití ni nuū yō.

⁷² Chi ni cundáhú ni yā táca jíi yō jijnáhan, te tu ní náa ni yā contrato ñi yā.

⁷³ Chi suu un ní jeññūhun téyí yá nuū jíi yō Abraham,

⁷⁴ suu jeē jnáma ya yohó núu ñayuu cájito uhū yohó, návāha cuajññiñu yó núu yā, te ma yūhu yó i.

⁷⁵ Te coo ndaā coo ndoo ánuá yō, cuajññiñu yó núu yā táca quivĩ jeē cótecu yō.

⁷⁶ Te róhó súchi lúlí, cuu ró tée nacani jñūhun Yaā cu-jéhu téyí.

Chi cosnúu ró ichi núu maá Jitoho yō, návāha sátūhva ró ñayuu, te sáa te quiji ya.

⁷⁷ Te castūhun ró nuū ñayuu maá yá jeē jnáma ya i, jíin jéē cóne cáhnu ni yā nuū táca cuéchi i.

⁷⁸ Chi Yaā Dios maá yó, vāha ni yā te cundáhú ni yā yohó.

Jeē yúcuan tají yá maá Yaā jeē sáha jeē cúndijin ini anuá yō, quiji ya nde andiví,

⁷⁹ návāha jecūhun ni yohó jéē cáyūcu nájñūhun nuū néē nuū jé yajni cuu yō.

Te chuhun ya yohó ichi nuū cóo ndeyí coo siē ni yō. Achí Zacarías.

⁸⁰ Te sūchi lúlí un ní jehnu i te ni ije i jíin jnúhun ya. Te ni condee i nde nuū ñúhun téhé ndé quiví ní quenda ndijin i nuū ñáyuu Israel.

Jeē ní cacu Jesús

(Mt. 1.18-25)

2 Te ni cuu jecu quiví, te Augusto, tēe cúu rey, ni ndacu de jniñu jeē coo censo jeē núcosō síhví ndivii ñayuu ñí cáhnu nuū ndácu de jniñu. ² Yāha cúu censo xihna ñúhún jéē ní casáha de ná ni cuu Cirenio gobernador nación Siria. ³ Te ndivii ñayuu cuanungoo i ná ñuu ná ñuu maá i jeē nácuāha i síhví i. ⁴ Te suni José ni quenda de ñuu Nazaret, ndañúu Galilea. Te cuanuhun de región Judea, te ni najinū de ñuu Belén, jeē cúu ñuu nuū ní cacu rey David jenahán. Chi sēhe yucūn David cúu de. ⁵ Te ni jehēn de návāha nacuāha de síhví de jíin María, chi je yajni quiñáhan ña jíin de. Te ñúhun sēhe ña ni sáha Espíritu Santo. ⁶ Te níin cáhīn de yūcuán te ni jinū quiví jeē cácu sēhe ña. ⁷ Te ni scácu ña sēhe yíí núú ña, te ni chusúcún ña i sahma cuitá, te ni jequin ña i ini ñn nundōo núú yéji quití, chi tuá núne mesón condee ña.

Jeē ní canecoo ndajéhé yā nuū pastor

⁸ Te yajni ñuu Belén cáhīn tēe cácuu pastor, te cándi-to de lanchi de ñíí niñu jecuáa nde yucu ún. ⁹ Te ñn sanaa-ni te ni cane ñn ndajéhé maá Jítoho yō nuū de, te nduva máá Jítoho yō ni ndindēe ñíí núú cáhīn de. Te yōhoyo ni cayūhú de. ¹⁰ Te ni cahān ndajéhé un jíin de:

Ma yūhu ró jijnáhan ró, chi vēji ri castūhun rí jñūhun vāha nuū rō, te sáha jeē cúsiē ndasí ni tāca ñáyuu:

¹¹ Chi vijna nde ini ñuu David ni cacu ñn Yaā jnama rōhó, te máá Jítoho yō Cristo cúu ya. ¹² Te súcuan nacu-ni rō sūchi yíquín un, chi ñúsúcún i sahma cuitá te cátú i ini ñn nundōo núú yéji quití. Achí yá.

¹³ Te ñn sanaa-ni te ni canecoo cuehē gā ndajéhé andiví, cáhīn ya jíin ndajéhé un, te cácahān yā jeē yóhoyo vāha Yaā cúu Yaā Dios. Te áchí yá:

¹⁴ Yōhoyo luu cújéhnu Yaā Dios nde nuū sucún.

Te na ndúvāha ni tāca ñáyuu ñayiví, sáha ya jeē cúsiē ni yā jíin i.

Achí táca ndajéhé.

¹⁵ Yūcuán na te cuanungoo ndajéhé un andiví. Te tēe cácuu pastor ni cacahān de jíináhan de:

Na quihín yō nde ñuu Belén, te cuni yō na vé ni cuu jeē ní castūhun máá Jítoho yō nuū yō, achí de.

¹⁶ Te yachī cuangoo de, te ni nanihīn de María jíin José jíin sūchi yíquín un, cátú i ini nundōo núú yéji

quití. ¹⁷ Te nuū ní cajini de nuū i, te ni canacani de jñūhun jeē ní cachi ndajéhé yā nuū de siquī sūchi yíquín un. ¹⁸ Te ni canaa ni tāca ñáyuu cájini nahín i jñūhun cácahān tēe cácuu pastor. ¹⁹ Te María, ni quendōo tāca jnúhun yáha nuū jeē níjñuní ña, te ná-cani ni ña siquī. ²⁰ Te tēe cácuu pastor cuanungoo de, te ni cacahān de jeē yóhoyo vāha Yaā cúu Yaā Dios siquī tāca jéē ní cajini sōho de jíin jéē ní cajito de, chi ni squícu nahín nájñūhun ni cahān ndajéhé yā jíin de.

Jeē ní castéén de i nuū Yaā Dios ini templo

²¹ Te ni cuu unā quiví jeē ní cacu ya, te ni casáha de circuncidar sūchi yíquín un. Te ni casnání de i Jesús, chi síhví yúcuan ní cachi ndajéhé yā nuū María nde ná tu jecūhun i.

²² Te ni jñu quiví jeē casquícu ña costumbre jeē ndúndoo ña nuū Yaā Dios jijnáhan ña, nájñūhun cáhán ley jeē ni jéhe ya nuū Moisés. Te ni jengoo de jíin i ñuu Jerusalén jeē nácuāha de i nuū maá Jítoho yō Yaā Dios. ²³ Súcuan ni casáha de, chi yósó núú tútu ley yā: Tāca sūchi yíí núú jéē cácacu, quihí cuenta i nuū Jítoho yō Yaā Dios, achí tutu. ²⁴ Te suni cuasocō de nájñūhun cáhán ley maá Jítoho yō: Socō rō uū liví chí úu paloma, achí tutu.

²⁵ Te ni iyo ñn tēe nání Simeón, ndéé de ñuu Jerusalén tiempo un. Te tēe ndaā, tēe chíñúhún vāha nuū Yaā Dios cúu de. Te ñúhun ni de jeē quée maá Yaā jnama ñayuu nación de Israel. Te máá Espíritu Santo íyó yá jíin de. ²⁶ Te je ni castūhun yá nuū de jeē ma cúu cuítí de chi nde coto de nuū Cristo jeē tají maá Jítoho yō Yaā Dios. ²⁷ Te ni steén yā nuū de jeē quihín de templo quiví ún. Te suni tátá naná sūchi yíquín Jesús, ni quivícoo de ini templo jíin i, jeē nácuāha de i nuū Yaā Dios nájñūhun cáhán ley Moisés. ²⁸ Te Simeón ni ñu-nundee de i, te ni cahān de jeē yóhoyo vāha Yaā cúu Yaā Dios, te áchí de:

²⁹ Tátá Yaā Dios, vijna te cuu cuāha ni jnúhun jeē cuu ná, chi je ni cusíē ni ná.

Chi je ni squícu ní jnúhun ni jejnūhun ní núú sāña jéē cúu ná mozo ni.

³⁰ Chi ni jito jínúu na núú Yaā jnáma sāña jíináhan ná.

³¹ Chi ni jeni ní yá jeē jnáma ya tāca ñáyuu ñayiví.

³² Te máá yá sáha jeē cúndijin ini anuá ñayuu tāca nación,

návāha jecūhun ni i siquī ní.

Te sáha ya jeē cujéhnu ñayuu maá ní Israel.

Achí Simeón.

³³ Te José jíin náná i cánaa ni de cájini nahín de jñūhun ni cahān Simeón siquī i. ³⁴ Te ni jicān tahu Simeón jehē de jíináhan de, te ni cahān de jíin náná i María:

Sūchi yáha vēji i jeē candíje cuehē ñayuu nación yō Israel, te cācu i jíináhan i. Te sava i ma candíje i, te jnahnū ndetū i. Chi cúu i Yaā ní tají Yaā Dios, te sa squéhichí ni cuehē ñayuu i. ³⁵ Te súcuan te quenda

ndijin ndese cájeni ni tāca ñáyyu. Te máá ró chi jnahuhū ndasí ni rō coto ró jéē ndóho i. Achí Simeón.

³⁶ Te suni íne ñn ñahan nácani jnūhun Yaā Dios, naní ña Ana. Te sēhe Fanuel, yucūn Aser cúu ña. Te je jéhnū ndasí ña. Te nde ná lulí ña te ni condee ña jíin yñ ña uxā cuiyā. ³⁷ Yūcuán na te ni quendōo ndáhú ña, te ni cuu cuūn xico cuūn cuiyā ña. Te tu cújiyo ña ini vehe ñi, chi jéjnū ña nuū Jítóho yō Yaā Dios nduú ñuú, te ndite ni ña te jícán tahu ña. ³⁸ Te suni hora un ní quee ña, te ni nacuatáhú ña nuū Yaā Dios. Te ni cahān ña jnūhun sūchi yíquín un jíin táca ñáyyu Jerusalén jeē cáñuhun ni i jeē quee Yaā jnama i.

Jeē cuáungoo de ñuu Nazaret

³⁹ Te ni jínu ni casquícu de tācá jniñu ndácu ley maá Jítóho yō Yaā Dios, te cuanungoo de ñuu de Nazaret, ndañū Galilea. ⁴⁰ Te sūchi lulí un ní jehnu i, te ni ije i, te ni cundíchí gá i. Te ni sáha Yaā Dios jeē váha ndasí jíin i.

Jeē íne sūchi lulí Jesús ini templo

⁴¹ Te ndijnahan cuiyā jéngoo tátá i náná i ñuu Jerusalén, jeē cúu vico pascua. ⁴² Te nuū ní cuu uxī uū cuiyā i, te cuangoo tucu de Jerusalén, nájñuhun sáha sáha de quivī vico ún. ⁴³ Te ni yāha vico, te cuanungoo de. Te sūchi lulí Jesús, ni quendōo i Jerusalén, te tu ní cájini José jíin náná i. ⁴⁴ Te cájeni ni de jeē cuahán i mēhñu ñáyyu cájica ichi ún. Te ni cájica de ñn quivī, te sáá te ni cananducú de i mēhñu táca jnáhan de jíin ñáyyu cájini jnáhan de jíin. ⁴⁵ Te tu ní cánanihīn de i. Te ni canandicó de cuangoo de Jerusalén, cuananducú de i.

⁴⁶ Te nuū uní quivī te ni cananihīn de i ini templo, néne i mēhñu tée cástéén tutu ley Yaā Dios, te jíni nahín i jeē cácahān de te cájnūhún i de síquī jnūhun ún. ⁴⁷ Te tāca ñáyyu cájini jnūhun cáhán i, cánaa ni cájito jeē váha cájī xínī i te váha nástíó cuññí i jnūhun. ⁴⁸ Te nuū ní cajito tátá i náná i nuū i, te ni canaa ni de. Te ni cahān naná i jíin i:

Séhē, ¿naun ni sáha ró súcuan jíin rí? Chi ruhū jíin tátá rō, yōhyo ni canacani ni rí cánanducú rí rohó, achí ña.

⁴⁹ Yūcuán na te ni cahān i:

¿Naun cánanducú ní sãña? ¿A tu cájini ni jéē cánuú cocu ná jíin jniñu Tátá na Yaā Dios? Achí i.

⁵⁰ Te tu ní cájecūhun ni tátá i náná i jnūhun ni cahān i.

⁵¹ Yūcuán na te cuanuhun i jíin de jíjnáhan de ñuu Nazaret, te ni jendije i nuū de. Te náná i, ni quendōo tāca jnūhun yáha núu jeē níjnūñi ña. ⁵² Te Jesús ni jehnu ga i, te ni cundíchí gá i, te cúsiñ ni Yaā Dios jíin i, te suni súcuan tāca ñáyyu.

Jnūhun Juan tēe scuándute

(Mt. 3.1-12; Mr. 1.1-8; Jn. 1.19-28)

3 Te ni cuu xahūn cuiyā jeē ndácu Tiberio jniñu nñí nación. Te Poncio Pilato cúu de gobernador Judea, te Herodes cúu de gobernador Galilea, te ñani de Felipe cúu de gobernador Iturea jíin Traconite, te Lisnias cúu de gobernador Abilinia. ² Te sutū cujéhnū ga cácuu Anás jíin Caifás. Te ni quee jnūhun Yaā Dios nuū Juan sēhe Zacarías, jeē íne de nuū ñūhun téhé. ³ Te ni jica nuu de tācá ñuu jeē iyó yajni yūte Jordán. Te cáhán de jíin ñáyyu jeē na nácani ni i jeē stóo i cuéchi i te cuandute i, návāha cone cáhnu ni Yaā Dios nuū cuéchi i. ⁴ Te súcuan ni squícu jnūhun Juan jeē yosó nuū tútu ni tee Isaías, tēe ni nacani jnūhun Yaā Dios nde jehnahán:

Coo ñn tēe cana jee nde nuū ñūhun téhé:
Sátūhva ró máá ró jíjnáhan ró, chi quee maá Jítóho yō.

Te sáha ró jniñu ndaā, chi vēji ya.

⁵ Te tāca xéhvā na ndúndaā, te tācá yucu jíin loma na ndúnduhvā, te na ndúyóhó ichi yácuá, te na ndúliñ ichi ndáyí. Te ndihí un cúu jeē ndúvāha ndundaā anuá ñayuu nuū yā.

⁶ Te ndihí i cuni i jeē jnáma Yaā Dios i.

Súcuan cahān Juan, achí tutu.

⁷ Te ni quendacoo cuehē ñayuu, cuahān i nuū de jeē scuándute de i. Te ni cahān de nuū i:

Va sēhe coō cácuu ró, chi xeēn rō nájñuhun coō. ¿A cájeni ni rō jeē cuu cunu ró cācu ró núu castigo xeēn jeē quíji? ⁸ Núu súcuan te sáha ró jniñu váha, te súcuan stéén rō jeē ní nacani ndije ni rō jeē stóo ró cuéchi ró. Te ma cáni ni rō cahān rō jeē cuu cācu ró síquī jeē cácuu ró yúcūn Abraham. Chi cáhán rí jíin ró jeē cuu sáha Yaā Dios jeē tāca yūyá yáha nduu sēhe Abraham jeē candije váha, te núu cúní yā. ⁹ Te cácuu ró nájñuhun nundēhé jeē tu jéhe ndehē váha. Te vijna je íyó túhva Yaā Dios jeē cuáha ya castigo xeēn, nájñuhun je íyó túhva ñn cāa jeē cahnde nde yoho yujnu. Núu súcuan te sáha ya jíin ró nájñuhun jíin táca yujnu jeē tu cúun ndehē váha, jeē tahndé te cayū nuū ñuhún. Achí de.

¹⁰ Te ñayuu un ní cacajnūhún i de:

¿Te ndese sáha ná núu súcuan? Achí i.

¹¹ Te ni cahān de:

Róhó jéē cánevāha uū sahma, na cuáha ró ñn nuū jeē tu névāha. Te róhó jéē cánevāha jeē yéji, suni súcuan na sáha ró, achí de jíin i.

¹² Te suni jecu tēe cástútú xūhun renta, ni quecoo de jeē cuándute de. Te ni cacajnūhún de Juan:

Maestro, te máá ná, ¿ndese sáha ná jíjnáhan ná?

¹³ Te ni cahān Juan jíin de:

Ma scaá ró cácan rō xūhún, chi máá cúhva-ni jeē ní ndacu jniñu nuū rō, achí de.

¹⁴ Te suni ni cacajnūhún jecu soldado:

Te máá ná, ¿ndese sáha ná jíjnáhan ná? áchí de.

Te ni cahān Juan jíin de:

Ma quénde rō ndajníñu ni ñn jíin jnúhun siúhú ni jíin jnúhun stáú yáhu, te cusíñ ni rō jíin yáhu ró, áchí de.

¹⁵ Te tāca ñáyuu cándetu i jeē quíji Cristo, Yaā jeē tají Yaā Dios, te cájeni ni i jeē sanaa te suu cúu Juan. ¹⁶ Te ni cahān Juan jíin i jíjnáhan i:

Ruhū chi jíin ndute scuándute ri rohó. Te vēji ñn Yaā jeē nájnūhun scuándute ya rohó cúu jeē cuáha ya Espíritu Santo condee ini anuá rō, te poder yā cúu nájnūhun ñuhūn. Te cújéhnū ndasí yá, chi tú na vé jéhnū cuiñi cúu ri nuū yā, ni jeē cuajníñu ri nuū yā vēsú ñn jniñu lúlí gá nájnūhun jeē ndají rí vēsú correa ndijēn yā. ¹⁷ Te sáha ya nájnūhun sáha tēe scánda trigo, chi sásñn ya ñayuu vāha jíin ñáyuu cunéé, nájnūhun cundoo trigo jeē quénda sñn paja. Te nastútú yá trigo yā ndīvi ini yacā yā. Te paja chi jnaa yā nuū ñuhún jeē ma ndahvá cuiñi. Achí Juan.

¹⁸ Te súcuan te jíin cuéhē gā jnūhun ni stihví ni de ñayuu un, ní nacani de jnūhun vāha Yaā Dios nuū i.

¹⁹ Te suni ni cahān xeēn de nuū Herodes, tēe cúu gobernador, chi tēe un ní nacueca de Herodías, ñasihí ñani de Felipe. Te cuehē gā jniñu néé súcuan ni sáha Herodes. ²⁰ Te sa víhyá gā ni sáha de jeē neé gá, chi ni chune de Juan vecāa.

Jeē ní jendute Jesús

(Mt. 3.13-17; Mr. 1.9-11)

²¹ Te nde ná tu quívi Juan vecāa, ná ni ine de ni scuándute de tāca ñáyuu, te suni ni scuándute de Jesús. Te jícan tahu yā, te ni nune-ni andíví. ²² Te ni cuun Espíritu Santo ni quee xinī yā, te cáa nájnūhun ñn paloma. Te ichi andíví ní cahān ñn jnūhun:

Máá ró cúu Sēhe ri jeē maní ndasí rí jíin, te yōhyo cúsiñ ni rí jíin ró, achí.

Lista ñayuu yucūn ní quiji Jesucristo

(Mt. 1.1-17)

²³ Te ná ni quejéé Jesús steén yā jnūhun, te íyó yá nájnūhun ocō uxī cuiyā. Te cájeni ni ñayuu jeē séhe José cúu ya. Te José ni cuu séhe Elí, ²⁴ te Elí ni cuu séhe Matat, te Matat ni cuu séhe Leví, te Leví ni cuu séhe Melqui, te Melqui ni cuu séhe Jana, te Jana ni cuu séhe José, ²⁵ te José ni cuu séhe Matatías, te Matatías ni cuu séhe Amós, te Amós ni cuu séhe Nahum, te Nahum ni cuu séhe Esli, te Esli ni cuu séhe Nagai, ²⁶ te Nagai ni cuu séhe Maat, te Maat ni cuu séhe Matatías, te Matatías ni cuu séhe Semei, te Semei ni cuu séhe José te José ni cuu séhe Judá, ²⁷ te Judá ni cuu séhe Joana, te Joana ni cuu séhe Resa, te Resa ni cuu séhe Zorobabel, te Zorobabel ni cuu séhe Salatiel, te Salatiel ni cuu séhe Neri, ²⁸ te Neri ni cuu séhe Melqui, te Melqui ni cuu séhe Adi, te Adi ni cuu séhe Cosam, te Cosam ni cuu séhe Elmodam, te Elmodam ni cuu séhe Er, ²⁹ te Er ni cuu séhe Josué, te Josué ni cuu séhe Eliezer, te Eliezer ni cuu séhe Jorim, te Jorim ni cuu séhe Matat, ³⁰ te

Matat ni cuu séhe Leví, te Leví ni cuu séhe Simeón, te Simeón ni cuu séhe Judá, te Judá ni cuu séhe José, te José ni cuu séhe Jonán, te Jonán ni cuu séhe Eliaquim, ³¹ te Eliaquim ni cuu séhe Melea, te Melea ni cuu séhe Mainán, te Mainán ni cuu séhe Matata, te Matata ni cuu séhe Natán, ³² te Natán ni cuu séhe David, te David ni cuu séhe Isaí, te Isaí ni cuu séhe Obed, te Obed ni cuu séhe Booz, te Booz ni cuu séhe Salmón, te Salmón ni cuu séhe Naasón, ³³ te Naasón ni cuu séhe Aminadab, te Aminadab ni cuu séhe Aram, te Aram ni cuu séhe Esrom, te Esrom ni cuu séhe Fares, te Fares ni cuu séhe Judá, ³⁴ te Judá ni cuu séhe Jacob, te Jacob ni cuu séhe Isaac, te Isaac ni cuu séhe Abraham, te Abraham ni cuu séhe Taré, te Taré ni cuu séhe Nacor, ³⁵ te Nacor ni cuu séhe Serug, te Serug ni cuu séhe Ragau, te Ragau ni cuu séhe Peleg, te Peleg ni cuu séhe Heber, te Heber ni cuu séhe Sala, ³⁶ te Sala ni cuu séhe Cainán, te Cainán ni cuu séhe Arfaxad, te Arfaxad ni cuu séhe Sem, te Sem ni cuu séhe Noé, te Noé ni cuu séhe Lamec, ³⁷ te Lamec ni cuu séhe Matusalén, te Matusalén ni cuu séhe Enoc, te Enoc ni cuu séhe Jared, te Jared ni cuu séhe Mahalaleel, te Mahalaleel ni cuu séhe Cainán, ³⁸ te Cainán ni cuu séhe Enós, te Enós ni cuu séhe Set, te Set ni cuu séhe Adán, te Adán ni cuu séhe Yaā Dios, chi ni sáha ya de.

Jeē ní jito ndee jexeén Jesús

(Mt. 4.1-11; Mr. 1.12-13)

4 Te Jesús ni cunuú Espíritu Santo ini yā, te ni quenda ya yūte Jordán cuahān yā. Te ni jinū yā nde nuū ñúhun téhé ní sáha Espíritu Santo. ² Te ni ine ya yūcuan úu xico quiví, te ni jito ndee jexeén yā, chi cúní jeē sáha ya cuēchi. Te tāca quiví ún tu ní yéji cuiñi yā, te ná ni yāha quiví ún, te jíi yā sōco. ³ Yūcuán na te ni cahān jexeén un jíin yá:

Núu máá ró cúu Sēhe Yaā Dios, te cahān rō jeē yuū yáha na ndúu staā caji rō, achí.

⁴ Te ni cahān Jesús jíin:

Tuú chi yósó núu tútu iñ: Nasūu máni máá jíin stáa cátecu ñayuu, chi suni jíin táca jnúhun cáhán Yaā Dios, achí yá.

⁵ Yūcuán na te cuahān jexeén un jíin yá nde xinī ñn yucu súcún, te ñn núnúu-ni ni steén nuū yā tāca nación ní cáhnu ñayiví. ⁶ Te ni cahān jíin yá:

Nuū maá ró cuāha ri jeē kujéhnū ró núu ndivii nación yáha, chi yōhyo luu cáa. Chi máá rí jññ ndihí, te cuu cuāha ri nuū ndé ñn cúní rí. ⁷ Núu súcuan te núu cuiñi yítí ró chiñúhún ró ruhū, te cuāha ndihí ri nuū rō. Achí jexeén.

⁸ Te ni cahān Jesús jíin:

Satanás, cujiyo quihñ rō, chi yósó núu tútu jeē chiñúhún ñayuu maá Jítoho i Yaā Dios, te nuū maá-ni ya cuajníñu i. Achí yá.

⁹ Yūcuán na te cuahān jexeén un jíin yá nde ñuu Jerusalén. Te ni jeni ya xinī torre templo. Te ni cahān jíin yá:

Te núu Sēhe Yaā Dios cúu ró, te sǐngava ró máá ró nde nuū ñūhun, chi jnama ya rohó. ¹⁰ Chi yósó núu tútu:

Tejníñu ya ndajéhé yā quijicoo coto róhó.

¹¹ Te cunundee yā rohó jíjńáhan ya, návāha ma cáchihi ró jéhē rō nuū yuú. Achí tutu. Achí jexeén.

¹² Te ni cahān Jesús:

Tuú chi suni yósó núu tútu jeē ma cóto ndee ñayuu Jitoho i Yaā Dios, núu jnama ya i chí tuú, áchí yá.

¹³ Te tuá ni níhín jexeén modo coto ndee Jesús quivĩ ún, te ni cujiyo cuahān jecu-ni tiempo.

Jeē ní quejéé Jesús nácani ya jnūhun región Galilea

(Mt. 4.12-17; Mr. 1.14-15)

¹⁴ Te ni cunuú fuerza Espíritu Santo ini Jesús, te cuanuhun yā Galilea. Te ñí región yajni yūcuan ní jitē núu jnūhun ya. ¹⁵ Te ni steén yā jnūhun ini tǎcá vehe ĩ sinagoga, te ndihí ñayuu ni cajejnúhún i ya.

Jeē cuánuhun yā ñuu Nazaret

(Mt. 13.53-58; Mr. 6.1-6)

¹⁶ Te ni najinū yā ñuu Nazaret nuū ní jehnu ya. Te quivĩ ndétátú ni quivĩ ya ini vehe ĩ sinagoga, nájñūhun sáha sáha ya. Te ni ndocuiñĩ yā jeē cahu ya tutu ĩ. ¹⁷ Te ni cajēhe de tutu ni tee Isaías, tēe ni nacani jnūhun Yaā Dios nde jenahán. Te ni nune ya tutu ún, te ni nanihín yā nuū yosó jnúhun ni cahu ya:

¹⁸ Espíritu maá Jitoho yō Yaā Dios iyó yá jíin rí, chi ni tejníñu ya ruhū jeē nácani ri jnūhun vāha nuū ñáyuu ndahú.

Te ni tají yá ruhū vēji ri jíin jnúhun jeē ndúvāha ni ñayuu cáccuĩhyá ni.

Te castūhun rí nuū ñáyuu cáyihí ndaha jexeén jeē coo libre i.

Te sáha ri jeē ndúndijin ini anuá ñayuu tu cájecūhun ni,

te jnama ri ñayuu jeē cándoho i sáha jńáhan i.

¹⁹ Te nacani ri jnūhun jeē ní quee tiempo jeē sáha Jitoho yō Yaā Dios jeē váha ñayuu.

Achí tutu ni cahu ya.

²⁰ Te ni nacasi yā tutu ún, te ni nacuāha ya nuū tēe jéjńíñu ini sinagoga, te ni nucōo ya jeē steén yā jnūhun nuū ñáyuu cáhīin ini sinagoga. Te tǎcá i cájito vāha i nuū yā. ²¹ Te ni quejéé yá cahán yā jíin i:

Vijna te ni squícu jnūhun cáhán tutu ĩ yāha ní cajini sōho ró, áchí yá.

²² Te ndivii i ni cacahān jeē váha tēe cúu ya, te cánaa ni i jeē ní cajini i tǎca jnúhun luu ni cahān yā. Te ni cajñūhun jńáhan i:

¿A násūu séhe José cúu tēe yáha?

²³ Te ni cahān yā jíin i:

Jíní vāha ri jeē cájeni ni rō cahān rō jnūhun yátá yáha jíin rí: Tēe tájńá, sátájńá ró maá ró núu súcuan. Te jnūhun yáha cúní cahān jeē nájñūhun ni nasávāha ri cuehē ñayuu cácuñi ini ñuu Capernaum ni canihín rō

jnūhun, suni súcuan na sáha ri ñuu yō yāhá návāha candíje ró cájeni ni rō. Achí yá jíin i.

²⁴ Te ni cahān gā yā:

Jendaá cahán rí jíin ró, ni ĩn tēe nácani jnūhun Yaā Dios, tu cájetáhú ñayuu ñuu maá de nuū de. ²⁵ Te suni jendaá cahán rí jíin ró jeē ni ĩyo cuehē ñahan ní ndóo ndáhú ini nación yō Israel, tiempo ni cotecu Elías, tēe ni nacani jnūhun Yaā Dios. Te tiempo un tu ní cúun cuiñi saū uní cuiyā yosáva, te ni ĩyo ĩn jnamā xeēn ní cáhnu nación. ²⁶ Te tu ní tájı Yaā Dios Elías quihín de nuū ni ĩn ñahan viuda nación yō Israel, chi nuū máá ĩn-ni ñahan viuda jeē ndeé ñuu Sarepta ndañú Sidón, ni jehēn de ni jito de jeē ní yeji ña. ²⁷ Te ini nación yō Israel suni ni ĩyo cuehē tēe ni candoho cuehyĩ stehyú, tiempo jeē ní cotecu Eliseo, tēe ni nacani jnūhun Yaā Dios. Te ni ĩn de tu ní cándíje jeē ndúvāha de sáha Eliseo, chi sa suhva máñúhún-ni Naamán, tēe nación Siria ni nduvāha. Achí yá.

²⁸ Yūcuán na te tǎca ñáyuu cáhīin ini sinagoga, yōhyo ni caquĩñi ni i jnūhun ní cahān yā. ²⁹ Te ni candocuiñĩ i, te ni caquenehen i ya yatā ñúú ún, cuahān i jíin yá xinĩ yúcu íne ñuu ún, chí cácuñi i chundahá i ya ñinga ya cava ún. ³⁰ Te tu ní cúu sáha i, chí ni yāha-ni ya mēhñú i cuahān yā.

Jeē ní quenehen ya tachĩ ini ĩn tēe

(Mr. 1.21-28)

³¹ Yūcuán na te cuahān Jesús ñuu Capernaum región Galilea. Te quivĩ ndétātu ní steén yā jnūhun nuū ñáyuu. ³² Te ni canaa ni i cájini i jnūhun steén yā. Chi ni steén vāha ya nuū i, chí jíiní vāha máá yá.

³³ Te ini vehe sinagoga un íne ĩn tēe jeē ñúhun tachĩ xeén ini de. Te tēe un ní cana cóhó de:

³⁴ Cuijiyo ní. ¿Naun vēji ní núu na jíjńáhan ná, Jesús ñuu Nazaret? ¿A vēji ní jéē snáa ni sáña, chí naún? Je jíiní na ndé ĩn cúu ní, chí Sēhe ĩ Yaā Dios cúu ní. Achí de.

³⁵ Te Jesús ni cahān xeēn yā nuū tachĩ ún:

Casi yuhu ró te quenda ró ini tēe yáha, áchí yá.

Te ni cotúú-ni tēe un núu tǎca ñáyuu, ni sáha tachĩ ún. Te ni quenda ini de cuahān, te tú na vé ni sáha ga jíin de. ³⁶ Te ndihí ñayuu un ní cayūhú i, te ni cacahān i jíin jńáhan i:

¿Na jnūhun cúu yāha jéē ní cuu súcuan? Chi cújéhnu tēe yáha jéē ndácu níhin de jniñu nuū tachí, te quéndacoo-ni, áchí i.

³⁷ Te jnūhun ya ni jitē núu cuahān ní cáhnu región yūcuán.

Jeē ní nasávāha ya naná chíso Simón Pedro

(Mt. 8.14-15; Mr. 1.29-31)

³⁸ Yūcuán na te ni quenda Jesús ini vehe ĩ sinagoga, te cuahān yā te ni jinū yā vehe Simón. Te naná chíso Simón, yéñi xeēn quijí ña, te ni cacahān ndahú de jíin yá jehē ña. ³⁹ Te ni jíta ndeyi ya nuū ña, te ni cahān yā

jeē na ndíco quiji ún. Te ni nduvāha-ni ña. Te ni ndocuñiñi-ni ña, te ni sáha ña jeē ní yeji yā jíin de.

Jeē ní nasávāha ya cuehē ñayuu

(Mt. 8.16-17; Mr. 1.32-34)

⁴⁰ Te jeē ni quée niāndii, te tāca ñáyuu jeē iyó jnāhan i cácuñiñi ndinuū cuehyi, ni caquindeca i jnāhan i un núu yā. Te ni soó yá ndaha ya siquī ñiñ ñiñ i, te súcuan ni nasávāha ya i. ⁴¹ Te suni cuehē ñayuu ni quendacoo tachī ini i, te cácana cóhó táchī ún:

Maá ní cúu Sēhe Yaā Dios, achí.

Te ni cahān xeñ yā nuū, te tu ní jéhe ya jnūhun jeē cahán gā súcuan, chí cájini jeē maá yá cúu Cristo, Yaā ní tají Yaā Dios.

Jeē ní nacani ya jnūhun región Galilea

(Mr. 1.35-39)

⁴² Te nuū ní cundijin, te ni quenda ya cuahān sñin ya yatā ñúu nuū tú ñayuu. Te tāca ñáyuu cánanducú i ya, te ni jinūcoo i nuū íne ya. Te cástétu i ya jeē tú cujiyo ya nuū i. ⁴³ Te ni cahān yā jíin i:

Suni cánuú jéē nacani ri jnūhun vāha nuū tāca gá ñuu siquī ndese ndácu Yaā Dios jniñu, chí jeē yúcuan ní tají yá ruhū vēji ri. Achí yá.

⁴⁴ Te ni jica cuu ya ñiñ región Galilea, nácani ya jnūhun ini tāca vehe iñ sinagoga.

Jeē ní canihñiñ de cuehē chācá ni sáha ya

(Mt. 4.18-22; Mr. 1.16-20)

5 Te ñiñ quiví te íne Jesús yumar Genesaret. Te ni quecoo cuehē ñayuu, te ni chitú níhin i nuū yā, chí cácuñiñi i cuni nahín i jnūhun Yaā Dios. ² Te ni jito ya jeē yúcu uñ barco yajni yumar. Te tēe cájñi chācá, je ni quendacoo de ini barco, te cánacate de ñunu de. ³ Te ni quiví ya ini ñiñ barco jeē cúu barco Simón. Te ni cahān yā jíin de jeē na scáca yátá de quihñiñ jecu gā nuū ndúte. Te ni cucōo ya, te nde ini barco un ní steén yā jnūhun nuū ñáyuu cuehē jeē yúcu i yundúte un. ⁴ Te nuū ni jínu ni steén yā, te ni cahān yā jíin Simón:

Scáca ró barco na quihñiñ yō nde nuū iyó cúnú ndute, te sñinga ró ñunu ró jñiñ ró chāca, achí yá.

⁵ Te ni cahān Simón:

Maestro, ñiñ niñu ni casínga ná ñunu jeē jñiñ ná tí, te tu ní níhñiñ cuitiñi ná ni ñiñ tí. Te jeē cahán maá ní súcuan, te na sñinga tucu ná ñunu, achí de.

⁶ Te ni casínga de, te ni quivícuo cuehē ndasí chāca, nde nducú táhndē ñunu de. ⁷ Te ni cacaja ndahá de nuū jnāhan de cáhñiñ ini inga barco, na quijicoo chindéé ñájñāhan jíin de. Te ni quecoo de, te ni cascútú ndñiñ de tí ndindúú barco, te nde je yajni quēe barco. ⁸ Te ni jito Simón Pedro jeē súcuan ni cuu. Te ni jecuñiñiñ yití de nuū Jesús, te ni cahān de:

Cujiyo ní núu ná, chí tēe íyó cuéchi cúu ná, achí de.

⁹ Chí máá de jíin táca tēe cáhñiñ jíin de, ni cayūhú de jeē ní canihñiñ de cuehē chācá un ní sáha ya. ¹⁰ Te suni

ni cayūhú Jacobo jíin Juan, ndindúú séhe Zebedeo, chí tēe chindéé ñájñāhan jíin Simón cácuu de. Te ni cahān Jesús jíin Simón:

Ma yūhu ró, chí nde vijna te sáha ri jeē nihñiñ rō cuehē ñayuu candíje ruhū, nájñūhun ni nihñiñ rō cuehē chācá. Achí yá.

¹¹ Yūcuán na te nuū ni jinūcoo de jíin barco nuū ñūhun íchi, te ni castóo de ndihñi ndajñiñu de, te ni candíquñ de ya cuango de.

Jeē ní nasávāha ya ñiñ tēe ndóho cuehyiñ stehyú

(Mt. 8.1-4; Mr. 1.40-45)

¹² Yūcuán na te íne Jesús ini ñiñ ñuu, te ni quee ñiñ tēe ndóho cuehyiñ stehyú. Te ni jito de nuū Jesús, te ni jecuñiñiñ yití de ni jecuñiñ de nuū de nde nuū ñūhun, te ni cahān ndahú de jíin yá:

Jíniñ na jéē cuu sáha ní jéē nduvāha ná, te núu cúní ni, achí de.

¹³ Yūcuán na te ni soó yá ndaha ya siquī de, te ni cahān yā:

Cúní rí. Te na nduvāha ró, achí yá.

Te ná ni cahān yā súcuan, te ni nduvāha-ni tēe ndóho cuehyiñ stehyú un. ¹⁴ Te ni ndacu ya jniñu nuū de jeē ma cáchi cuitiñi de nuū ní ñiñ. Te achí yá:

Quisteén rō maá ró nuū sutú, te condahá ró jeē socó ró nuū Yaā Dios siquī jeē ndúndoo ró núu yā, nájñūhun ni ndacu Moisés jniñu jenahán. Te súcuan te cuni ñayuu jeē ní nduvāha ró. Achí yá.

¹⁵ Te víhyá gā ni jitē núu jnūhun ya cuahān. Te ni cataca cuehē ñayuu jeē cúní nahín i jnūhun stéén yā, jíin jéē nasávāha ya i nuū tāca cuéhyiñ cándoho i. ¹⁶ Te máá yá cuahān sñin ya nuū tú ñayuu, te ni jicān tahú yā.

Jeē ní nasávāha ya ñiñ tēe ndóho cuehyiñ ni íjin

(Mt. 9.1-8; Mr. 2.1-12)

¹⁷ Te ñiñ quiví te stéén yā jnūhun, te jecu tēe grupo fariseo jíin tēe cástéén tutu ley Yaā Dios, cáyucú de yūcuán. Te tēe un ní quecoo de nuū yā jeē véjicoo de táca ndañúú Galilea, jíin ndañúú Judea, jíin ñuu Jerusalén. Te poder maá Yaā Dios iyó jíin yá jeē nasávāha ya ñayuu cácuñiñ. ¹⁸ Yūcuán na te ni quecoo jecu tēe, cándiso de ñiñ tēe ndóho cuehyiñ ni íjin, cátu de nuū ñiñ camilla. Te cánducú de squiví de tēe ún ini vehe, te caquin de nuū íne ya. ¹⁹ Te tu ní canihñiñ de modo quivícuo de jíin tēe un, chí cáyucú chitú ñáyuu. Te ni cacoo de siquī véhe, te ni canune de teja. Te ni cascúun de tēe cúhú un jíin camilla de nde nuū íne Jesús mēhñu ñáyuu. ²⁰ Te ni jini Jesús jeē cándíje de jeē cúu nasávāha ya tēe cúhú un. Te ni cahān yā jíin tēe cúhú un:

Róhó, je íne cáhnu ni rí nuū táca cuéchi ró, achí yá.

²¹ Yūcuán na te tēe cástéén tutu ley Yaā Dios jíin tēe grupo fariseo, ni quejéé de cájeni ni de siquī yā: ¿Ndé ñiñ cúu tēe yáha jéē cahán de jnūhun ndevāha jeē quitíñiñ ni Yaā Dios? Chí nasūu Yáā Dios cúu de jeē cóne cáhnu ni de nuū cuéchi.

²² Te ni jini Jesús jeē súcuan cájeni ni de, te ni cahān yā jín de:

¿Naun cájeni ni rō jeē cahān ndevāha ri? ²³ Jeē uú jnūhun yāha, ¿ndé ñn yí gá cáa? ¿A jéē cahān rī jín tée cúhú: Je íne cáhnu ni rī nuū tāca cuéchi rō? ¿Chí yí gá jeē cahān rī: Ndocuññi te caca rō, chí je ni nduvāha rō, achi rī? ²⁴ Te vijna te na stéén rī jeē maá rí, Yaā ní nduu tēe, ndíso jniñu ri ini ñayivi yāha jéē cóne cáhnu ni rī nuū cuéchi.

Yūcuán na te ni cahān yā jín tée ni íjin ún:

Cáhān rī jín rō, ndocuññi te naquihin rō camilla rō, te quinhun rō vehe rō, áchí yá jín de.

²⁵ Te ni ndocuññi-ni tēe ún, jito jínú ñayuu. Te ni naquihin de camilla nuū ni cátu de, te cuanhun de vehe de. Te nácuatáhu de nuū Yaā Dios. ²⁶ Te yōhyo ni canaa ni tāca ñayuu cájito i, te ni cacahān i jeē yóhyo vāha Yaā cúu Yaā Dios. Te suni yōhyo cáyūhú i, te cácahān i:

Vijna te ni cajito yó jniñu jéhu téyí, áchí i.

Jeē ní cana ya Leví

(Mt. 9.9-13; Mr. 2.13-17)

²⁷ Yūcuán na te ni quenda ya cuahān yā, te ni jito ya nuū ñn tēe stútú xuhun renta, naní de Leví, néne de nuū cutútú xuhun renta. Te ni cahān yā jín de:

Condiquñ ruhū na quíhín yō.

²⁸ Te ni ndocuññi de, te ni stóo de ndíhi ndajniñu de, te cuahān de jín yá.

²⁹ Yūcuán na te ni sáha Leví ñn vico cáhnu vehe de, jeē cúsiñ ni de jín Jesús. Te cuehē tēe cástútú xuhun renta jín sava ga tēe, cáyūcú de mesa cáyeji de staā jín yá. ³⁰ Te tēe grupo fariseo jín tée cástéén tutu ley Yaā Dios, ni quejé de cácahān de siquī tēe cáscuáha jín yá, te ni cacajnūhún de:

¿Najehē cáyeji rō cájhi rō jín tée cástútú xuhun renta jín tée cása cuēchi? áchí de.

³¹ Te ni cahān Jesús:

Ñayuu cáhīyo vāha, tu jini ñúhún i tēe tájna, chí ñayuu cácuñú cúu jeē jini ñúhún. ³² Te ruhū nasūu jéē véji ri cana ri ñayuu tú cuēchi, jeē cúu i nájnūhun ñayuu cáhīyo vāha. Chí sa suhva véji ri cana ri ñayuu cáhīyo cuēchi, jeē na nácani ni i te stóo i cuēchi i. Achí yá.

Jeē ní cacajnūhún de ya siquī jeē cóndite ni

(Mt. 9.14-17; Mr. 2.18-22)

³³ Yūcuán na te ni cacahān de jín yá:

Tēe cáscuáha jín Juan, jín tée cáscuáha jín grupo fariseo, cuehē jinu cáhīyo ndite ni de te cájicān tahú de. Te tēe cáscuáha jín máá ní, ¿naun tu cása de súcuan? Chí cáyeji de cájhi de.

³⁴ Te ni cahān yā jín de:

¿A cuu condite ni de níni jéē iyó rí jín de? ¿A cuu sáha rō jéē condite ni ñayuu cáhīn vico nánda, te núu níni néne tēe nánda? ³⁵ Te quee quivī jeē cújiyo tēe ni nánda, te quivī ún chí condite ni i. Achí yá.

³⁶ Te suni ni cahān yā uū jnūhun yátá síquī jeē tu quijnáhan jnūhun jeé jéē steén yā jín táca jnūhun jehān. Achí yá:

Ni ñn ñayuu tu jénde i ñn pedazo sahma jéé i, te nachuhun i nuū ñn sahma túhú i. Chí núu súcuan te stívi i sahma jéé i, te suni tu quijnáhan jeé jeé un jín jéé tuhú. ³⁷ Te tú ni ñn chúhun vino jeé ini ññ túhú. Chí núu súcuan, te vino jeé un ndatá ññ, te naa vino jín ññ. ³⁸ Chí cánuú jéé chúhun vino jeé ini ññ jéé, te súcuan te quéndō vāha ndíndú. ³⁹ Te ñayuu cájhi vino áva, tu cúni i coho i jeé jeé, chí jeé áva cúu jeé vāha ga, achí i. Achí yá.

Jeē ní cataxín de yoco trigo quivī ndétátú

(Mt. 12.1-8; Mr. 2.23-28)

6 Te ñn quivī ndétátú ní yāha Jesús cuahān yā mēhñú nuū cáa trigo. Te tēe cáscuáha jín yá ni cataxín de yoco trigo, te ni caquñ de ini ndaha de, te ni cayejí de. ² Te sava tēe grupo fariseo ni cacajnūhún de:

¿Najehē casáha rō jniñu jeē tu iyó vāha sáha rō quivī ndétátú?

³ Te ni cahān Jesús jín de:

¿A tu ní cácahu cuítí rō tutu ndese ni sáha David, ñn quivī jeé ni jít de sōco jín tée cáhīn jín de? ⁴ Te ni quivī de ini vehe Yaā Dios, te ni quihin de pan í jeé yosó ndijín nuū Yaā Dios. Te ni yeji de, te suni ni jēhe de ni cayejí tēe cáhīn jín de. Te tú na ley jeé cáji ni ñn tēe, chí máá-ni sutū cuu caji. Te vésú súcuan te tú na cuēchi ní iyó síquī de. Achí yá.

⁵ Te ni cahān gā yā jín de:

Ruhū, Yaā ní nduu tēe, máá rí cúu jeé ndácu jniñu síquī ndese sáha ñayuu quivī ndétátú, áchí yá.

Jeē ní nduvāha tēe ni ichī ndaha

(Mt. 12.9-14; Mr. 3.1-6)

⁶ Te ñnga quivī ndétátú, suni ni quivī ya ini vehe í sinagoga, te ni steén yā jnūhun. Te yūcuan íne ñn tēe ni ichī ndaha vāha de. ⁷ Te tēe cástéén tutu ley jín tēe grupo fariseo, cájito yuhu de ya núu nasávāha ya tēe un quivī ndétátú, návāha nihīn de cuēchi síquī yā. ⁸ Te máá yá je jíní yā ndese cájeni ni de. Te ni cahān yā jín tēe ni ichī ndaha ún:

Ndocuññi, te condichi rō mēhñu yāha, áchí yá.

Te ni ndocuññi de, te ni jecondichi de mēhñú.

⁹ Yūcuán na te ni cahān yā jín de jijnáhan de:

Na cájnūhun rí rohó ñn jnūhun: ¿Ndese cáhān ley síquī quivī ndétátú? ¿A jéē sáha vāha yó, chí sáha néé yó? ¿A jéē nasávāha yó ñayuu je yajni cuu, chí sáha yó jéé cúu i? Achí yá.

¹⁰ Te ndéhé yá nuū de jeé cáyūcú de ní xiin ya. Te ni cahān yā jín tēe chúhú un:

Scáá ndaha rō.

Te ni scaá de, te ni nduvāha-ni ndaha de. ¹¹ Te yōhyo ni caquítí ni tāca tēe un, te ni quejé de cándajnūhún de síquī Jesús, ndese cahni de ya.

Jeē ní nacāji ya uxī uū tēe apóstol

(Mt. 10.1-4; Mr. 3.13-19)

¹² Te ni cuu jecu quivī, te ni quenda ya cuacacān tahú yā nde yucu. Te ní niñu ni jicān tahú yā nuū Yaā Dios. ¹³ Te nuū ní cundijin, te ni cana ya tāca tēe cáscuáha jíin yá. Te ni nacāji ya uxī uū de, te ni cahān yā jeē cuu de apóstol, condiso jniñu de nacani de jnūhun ya. ¹⁴ Te yāha cúu síhvī de jíināhan de: Simón jeē ní nasnání yá de Pedro, jíin ñani de Andrés, te suni Jacobo jíin Juan, Felipe jíin Bartolomé, ¹⁵ Mateo, Tomás, Jacobo sēhe Alfeo, Simón tēe grupo cananista, ¹⁶ Judas ñani Jacobo, jíin Judas Iscariote, tēe jeē ní nastúu de ya.

Jeē ni stéén yā nuū ñáyuu cuehē

(Mt. 4.23-25)

¹⁷ Te ni nanuu ya yucu jíin táca tēe un jēe cascuáha jíin yá, te ni jecuñī yā ñn nduhvā jíin de. Te cuehē ñáyuu ní región Judea jíin ñuu Jerusalén, jíin ñáyuu yumar ñuu Tiro jíin ñuu Sidón, ni quecoo i jeē cúni nahín i jnūhun stéén yā, jíin jēe ndúvāha i cuehyī cándoho i. ¹⁸ Te ñáyuu jeē ñūhun tachī ini i, suni ni canduvāha i ni sáha ya. ¹⁹ Te ndivii ñáyuu cáconi i quehé i ya, chi súcuan ndúvāha i sáha ya jíin poder yā.

Jnūhun ñáyuu yōhyo ndetū jíin ñáyuu jeē xeēn ndoho

(Mt. 5.1-12)

²⁰ Te ni ndacoto ya nuū tēe cáscuáha jíin yá un, te ni cahān yā:

Yōhyo ndetū rohó jēe cándoho ndáhú, chi quivī ró ñuu nuū ndácu Yaā Dios jniñu.

²¹ Yōhyo ndetū rohó jēe cájii sōco vijna, chi quiji quivī jeē ndutú chiji ró.

Yōhyo ndetū rohó jēe cándaHyū rō vijna, chi quiji quivī jeē cuecú rō.

²² Yōhyo ndetū rō te núu cáquitī ni ñáyuu nuū rō jeē síquī ruhū, Yaā ní nduu tēe, te cáscuéhichī i rohó, te cácahān neé i nuū rō, te cácahān i jeē ñáyuu casáha jniñu neé cácuu ró. ²³ Te na cóo síñ ni rō quivī sáha i súcuan, te víhyá gā na cúsiñ ni rō, chi cáhnu téyí coo tahū rō nde andiví. Chi suni súcuan ni casáha uhū tāca jíi i jíin tēe ni canacani jnūhun Yaā Dios nde jenahán.

²⁴ Te nacā jeē xeēn ndoho rohó ñáyuu cucá, chi vijna-ni cúu jeē cáhīyo síñ ni rō.

²⁵ Nacā jeē xeēn ndoho rohó ñáyuu jeē víjna cáhīyo vetū chiji ró, chi quiji quivī jeē cuu rō sōco.

Nacā jeē xeēn ndoho rohó ñáyuu jeē víjna cájecū rō, chi quiji quivī jeē nducuíhyá ni rō te ndahyū rō.

²⁶ Nacā jeē xeēn ndoho tāca ró núu cájejnūhún ñáyuu rohó, chi suni súcuan ni cajejnūhún jíi i tāca tēe ni canacani jnūhun stáhú ndé jenahán.

Jnūhun jeē cundáhú ni yō ñáyuu cájito uhū yohó

(Mt. 5.38-48; 7.12)

²⁷ Te cáhán rī jíin rohó jeē cájini sōho: Cundáhú ni rō ñáyuu cájito uhū rohó. Te sáha vāha ró jíin ñáyuu cáquitī ni nuū rō. ²⁸ Te cacān rō jeē váha coo ñáyuu cácahān ndevāha síquī rō. Te cacān tahú rō jehē ñáyuu cácahān neé núu rō. ²⁹ Te núu ndé tēe cani de ñn lado yiqui núu rō, te vāha ga suni cuāha ró inga lado cani de, vésú jeē nácuāha ró jēe ndútahū de. Te núu ndé tēe cúni de quende de ticāchi ró, suni cuāha ró jnūhun jeē na quíhín de jíin ndé camisa rō. ³⁰ Te na-ni ñáyuu jicán nuū rō, te cuāha ró núu i. Te ñáyuu quíhin ndajniñu ró, ma nándacān rō. ³¹ Te nájnūhun cáconi rō jeē sáha vāha ñáyuu jíin ró, suni súcuan na sáha vāha ró jíin i.

³² Chi núu íyó mánī rō jíin máa-ni ñáyuu jeē maní jíin ró, ¿te na vé jeē váha ga sáha ró núu súcuan? Chi nde tēe casáha cuēchi, suni maní de jíin tēe maní jíin máa de. ³³ Te núu sáha vāha ró jíin máa-ni ñáyuu jeē casáha vāha jíin ró, ¿te na vé jeē váha ga sáha ró núu súcuan? Chi nde tēe casáha cuēchi, suni súcuan casáha de.

³⁴ Te núu cuāha núu ró núu maá-ni ñáyuu jeē ñūhun ni rō nacuāha i nuū rō, ¿te na vé jeē váha ga sáha ró núu súcuan? Chi nde tēe casáha cuēchi, suni jēhe núu de nuū tāca gá tēe casáha cuēchi, návāha nanihīn tucu de. ³⁵ Núu súcuan te cundáhú ni rō ñáyuu cájito uhū rohó, te sáha vāha ró jíin i, te cuāha núu ró núu i. Te ma cuáha ró máa síquī jeē cani ni rō jeē suni nacuāha i nuū rō. Te súcuan te cáhnu coo tahū rō, te stéén rō jeē cácuu ró séhe Yaā kujéhnu téyí. Chi máa yá vāha ni yā jíin ñáyuu tu nácuatáhú núu yā jíin ñáyuu casáha neé. ³⁶ Núu súcuan te cundáhú ni rō ñáyuu, nájnūhun máa Tátá rō cundáhú ni yā i.

Ma cahán yō síquī cuéchi jnāhan yó

(Mt. 7.1-5)

³⁷ Ma cahán rō síquī cuéchi ñáyuu ndese sáha i, návāha suni ma cahán Yaā Dios cuéchi síquī rō jeē casáha ró súcuan. Ma cahán xeēn rō síquī i jeē tú vāha sáha i, návāha suni ma cahán Yaā Dios súcuan síquī rō. Cone cáhnu ni rō nuū i, te suni cone cáhnu ni yā nuū rō. ³⁸ Cuāha ró núu ñáyuu, te suni súcuan cuāha Yaā Dios nuū rō. Chi vāha ndasí cuáha ya nuū rō, nájnūhun jeē chícuāha vāha ya, quisi ya, sánīhin ya, te nde scáa ya cuāha ya nuū rō. Chi cūhva jeē cájēhe ró núu ñáyuu, suni cūhva un cuáha ya nuū rō. Achí yá.

³⁹ Te ni cahān yā ñn jnūhun yátá jíin i:

Tēe cástéén jnūhun tú ndaā, cácuu de nájnūhun tēe cuáá. Te ñn tēe cuáá, ¿á cuu stéén de ichi nuū inga tēe cuáá? ¿A tú ñingava ndindúú de ini xehvā? ⁴⁰ ñn tēe scuáha, tu cújéhnu de nuū maestro de. Te tēe scuáha ún, núu je ni cutūhva vāha de, te jinū de coo de nájnūhun maestro de.

⁴¹ Te cuéchi jnāhan ró cúu nájnūhun jeē íne ñn yāca lúlí tinúú i. ¿Te naun casáha ró cuenta jeē súcuan, te tu

cásaha ró cuenta cuēchi máá ró jeē cúu nájñuhun jeē íne ñn nduhu ññū máá ró? ⁴² ¿Te naun cácahān rō jíin jñáhan ró: Condetu, na táva rī yāca íne ññū ró, te tu cánacani ni rō jeē íne ñn nduhu ññū máá ró? Tēe stáhú-ni cácuu ró núu súcuan. Xñhna gā ññū máá ró tava rō nduhu, te yūcuán na te cuu condēhe váha ró jeē táva rō yāca ññū jñáhan ró.

Jíin jñiñu cásaħa ñayuu te nácuni yō ndese ñayuu cácuu i

(Mt. 7.17-20; 12.34-35)

⁴³ Tu íyó yujnu váha jeē jéhe ndehē neé, te ni tu íyó yujnu neé jeē jéhe ndehē váha. ⁴⁴ Chi jíin ndéhē jeē jéhe ñn ñn yujnu, te jíin yō núu yujnu váha cúu. Chi tu scóyo yó ndehē higo xinī íñu, ni tu scóyo yó ndehē uva xinī yucú zarza. ⁴⁵ Te suni súcuan tēe váha, cáhān de jñūhun váha, chi váha ánuá de. Te tēe sáħa neé cáhān de jñūhun neé, chi cánéé ánuá de. Chi modo ndese íyó ánuá ñayuu, máni jeē yúcuan cúu jeē cácahān i.

Siquī úu vehe

(Mt. 7.24-27)

⁴⁶ ¿Najehē cácahān yññuhún ró jíin rí: Jitoho ná, áchí ró, te tu cáscuicu ró jñiñu ndácu rí? ⁴⁷ Tāca ñayuu vēji nuū rī te jíin sōho jñūhun cáhān rī te squicu, na stéén rī nuū rō ndese cúu i. ⁴⁸ Cúu i nájñuhun ñn tēe jeē ní jeni de vehe de, te ni jete cúnú de nde ni nihín de toto, te ni jeni de siquī. Te nuū ní ndaa yūte, te ni chundahá vehe ún, te tu ní cánda cuiti sáħa, chi siquī toto íin. ⁴⁹ Te tāca ñayuu jíin sōho jñūhun cáhān rī, te tu squicu i, cúu i nájñuhun ñn tēe ni jeni de vehe de nuū ññuhun, te tu yññu jehē. Te nuū ní ndaa yūte, te ni chundahá vehe ún, te ni cotúú-ni, te ni naa ññi. Achí yá jíin i jíináhan i.

Jeē ní nasávāħa ya mozo capitán

(Mt. 8.5-13)

7 Te nuū ni jíin ni cahān yā ni cajini nahín ñayuu ún, te cuahān yā ññu Capernaum. ² Te ñn tēe nación Roma jeē cúu capitán, íyó ñn mozo de jeē manī ndasí de jíin. Te mozo un cūhú i te je yajni cuu i. ³ Te ni jini capitán jñūhun Jesús. Te ni tají de jecu tēe jéħnu cándacu jñiñu nuū ñayuu hebreo, cuango de nuū yā jeē cahān ndahú de jíin yá jeē na quíji ya sávāħa ya mozo de. ⁴ Te ni jinūcoo tēe un núu Jesús, te ni cacahān ndahú ndasí de jíin yá:

Chindéé ñáhán ní tēe cúu capitán, chi tēe váha cúu de. ⁵ Chi manī de jíin nación yō, te máá de ni ndacu jñiñu ni cuvāħa ñn vehe sinagoga cuu yó. Achí de.

⁶ Yūcuán na te cuahān Jesús jíin de jíináhan de. Te nuū ní cuyajni ya vehe capitán, te ni tají de jecu amigo de cuajnahān yā. Te ni cacahān de jíin yá:

Achí capitán jeē tu cúní de sájñéħu de nihín, chi tu cújéħnu de jeē quihín ni quívi ní vehe de. ⁷ Jeē yúcuan tu ní sájéħnu de máá de jeē quíji de nuū ní, áchí de. Te

máá jeē cahān-ni ní, te na ndúvāħa-ni mozo de, áchí de. ⁸ Chi máá de suni ndíso jñiñu de ni casáħa tēe cácujeħnu ga. Te cújéħnu de nuū tācá soldado de, áchí de. Te núu cáhān de jíin ñn tēe jeē na quihín de, te cuahān de. Te núu cáhān de jíin inga tēe jeē na quíji de, te quíji de. Te núu ndácu de ñn jñiñu nuū mozo de, te sáħa i, áchí de. Achí táca tēe un jíin yá.

⁹ Te jeē ní jini Jesús jñūhun yáħa, te ni naa ni yā. Te ni ndió cóto ya ni cahān yā jíin ñayuu cuehē cándiquīn yatā yā:

Jendaá cahān rī jíin ró jeē ni nación yō Israel tu ní nihín rī ni ñn ñayuu candíje nihín súcuan, nájñuhun cándíje tēe ún, vēsú tēe nación tu jíin jñūhun Yaā Dios cúu de. Achí yá.

¹⁰ Te tēe ni tají capitán nuū yā, ni najinūcoo de vehe, te ni cajito de jeē jeé ni nduvāħa mozo un.

Jeē ní nastécu yā sēhe yññahan viuda

¹¹ Yūcuán na te cuahān yā ññu naní Naín. Te tēe cáscuáħa jíin yá, jíin ñayuu cuehē, suni cuango i jíin yá. ¹² Te ná ni cuyajni ya yuñú ún, te yūcuán ní quendacoo ñayuu jeē quíchindūji i ñn tēe suchí jeé ni jíin. Te máññuhún-ni i nuū naná i, te ñahan viuda cúu ña. Te cuehē ñayuu ññu un véjicoo jíin ña. ¹³ Te ná ni jito máá Jitoho yō nuū ña, te ni cundáhú ni yā ña, te ni cahān yā jíin ña:

Ma ndahyú ni, áchí yá.

¹⁴ Yūcuán na te ni jinū yā nde nuū ndéyi ún, te ni jññ ya yejnū, te ni cajecuiññ tēe cándiso ún. Te ni cahān yā jíin súchi ní jíin:

Cáhān rī jíin ró, ndocuiññ, achí yá.

¹⁵ Yūcuán na te ni nucōo súchi ní jíin ún, te ni quejéé i nácāħān i. Te ni nacuāħa ya i nuū naná i. ¹⁶ Te ndivii ñayuu ni cayūhú i jeē ní cajito i, te ni cacahān i jeē yóħyo váħa Yaā cúu Yaā Dios. Te cácahān i:

Mēħñu yó ni quee ñn tēe cújéħnu nácāni jñūhun Yaā Dios.

Te suni cácahān i:

Máá Yaā Dios ni quejéé yá chindéé ñáhán yá ñayuu yā. Achí i.

¹⁷ Te ni jite núu jñūhun ya ññí cáħnu región Judea jíin táca región yajni yūcuán.

Jeē ní tají Juan uū tēe nuū yā

(Mt. 11.2-19)

¹⁸ Te íne Juan vecāa, te tēe cáscuáħa jíin de ni castūhun núu de jeē súcuan ni cuu tācá jñiñu yáħa.

¹⁹ Te ni cana Juan uū tēe ún, te ni tají de cuango nuū Jesús, návāħa cajññuhún de ya núu máá yá cúu ndije Cristo jeē ní cachi Yaā Dios jeē tají yá, chí núu nasūu yá cúu te condetu de inga. ²⁰ Te ni jinūcoo tēe un núu yā, te ni cacahān de:

Juan tēe scuándute ni tají de sāħa véjicoo ná cajññuhun ná nihín núu máá ní cúu Cristo jeē achí tutu jeē quíji, chí condetu yó inga tēe quíji. Achí de.

²¹ Te máá hora un ní nasávāha ya cuehē ñayuu cácuḥū, jíin ñayuu cándoho cuehyī xeēn, jíin ñayuu ñúhun tachī ini. Te suni cuehē ñayuu cuaá ní ndundijin tñūú i ni sáha ya. ²² Te ni cahān yā jíin de:

Cuángoo te castūhun ró nuū Juan tācá jniñu ni cajito ró jíin jnúhun ni cajini ró. Te cachi rō nuū de jeē ñayuu cuaá cánanune tñūú i, te ñayuu yacuá cánacaca i, te ñayuu ndóho cuehyī stehyú cánduvāha i, te ñayuu so-hó cánanune sōho i, te ñayuu jihí nátecu i sáha ri. Te suni nácani ri jnúhun nuū ñayuu ndahú jēē jnama Yaā Dios i. ²³ Te yōhyo ndetū tēē jeē ma nácani yátá ni de jeē ruhū cúu Cristo. Súcuān cachi rō nuū Juan. Achí yá jíin de.

²⁴ Te ná cuanuhun ndindúú tēē ún, te ni quejéé Jesús cahán yā jnúhun Juan jíin ñayuu:

¿Na vé ni jécondēhe ró jijnáhan ró ndé nuū ñúhun téhé? ¿A ñn tēē jéni ñn jéni uū ni, nájnūhun ite jeē cánda sáha tachí? ²⁵ Te núu tuú, ¿te na vé ni jécondēhe ró núu súcuān? ¿A ñn tēē cúni cujéñu jeē ñúhun sahma lúu? Tuú chi cájini rō jeē tēē cáñuhun sahma lúu te cánducú tāca jēē cúsiñ ni, máni ini vehe rey cáyūcú de. ²⁶ ¿Te na vé ni jécondēhe ró núu súcuān? ¿A ñn tēē nácani jnúhun Yaā Dios? Cáhan rī jíin ró jeē suu ni jécondēhe ró. Te cújéñu ga Juan yáha vēsú tāca gá tēē ni canacani jnúhun Yaā Dios. ²⁷ Chi jnúhun Juan cúu jeē ni cáhān Yaā Dios jeē yosó núú tútu iñ:

Tají rí tēē nacani jnúhun ri cosnūú de ichi núú Cristo, návāha coo tūhva ñayuu jeē jinú yā.

Achí Yaā Dios, achí tutu. ²⁸ Te cáhān rī jíin ró jeē ini ñayīvi yáha cújéñu ga Juan tēē scuándute vēsú tāca gá tēē jeē ni íyo ini ñayīví. Te vēsú súcuān te tāca tēē núu ga ini ñuu nuū ndácu Yaā Dios jniñu, cújéñu ga de vēsú Juan. Achí yá.

²⁹ Te tāca ñayuu jíin táca tēē cástútú xúhun renta, ni cajini i jnúhun cáhān yā, te ni cajetáhú i jeē Yaā ndaā cúu Yaā Dios, chi je ni cajendute i nuū Juan. ³⁰ Te tēē grupo fariseo jíin tēē cástéén tutu ley, ni casquéhichí de jnúhun jeē cuní Yaā Dios sáha ya jeē váha de, chi tu ní cájendute de nuū Juan. ³¹ Te ni cahān gā máá Jítoho yō:

Yáhá cachi rī ñn jnúhun yátá návāha na cúni rō ndese cúu ñayuu tiempo vijna. ³² Cúu i nájnūhun sūchi lúlí cáñin nuū yáhu cácasíquí i. Te cácana ndee i xinī jnáhan i: Ni cativi rī scuilí, te tu ní cájita jéhé ró. Te ni cajita ri yaa jeē cuihyá jíta, te tu ní cándaḥyū rō, achí i. Te nájnūhun cándāa sūchi lúlí un jéē tu ní núnjahan ni i ni ñn, suni súcuān cándāa ró. ³³ Chi ni quiji Juan tēē scuándute, te cuehē jínu ni íyo ndite ni de, tu ní yéji de staā ni tu ní jíhi de vino. Te tu ní cánujahan ni rō, chi ni cacahān rō jeē ñúhun tachī ini de. ³⁴ Yūcuān na te ni quee máá rí, Yaā ní nduu tēē, te yéji rī jíhi ri, te tu cánujahan ni rō, te chísoó jnúhun ró cácahān rō jeē máni máá jéē yéji rī jíhi ri vino. Te quíjnáhan ri jíin tēē cástútú xúhun renta jíin táca gá tēē cásaḥa cuēchi, áchí ró. ³⁵ Te núu cúndichí ñn tēē jíin jnúhun Yaā Dios,

te jíin jniñu sáha de te cájini tāca gá tēē ndichí jeē ndichí de. Achí yá.

Jeē íne Jesús vehe Simón tēē fariseo

³⁶ Te ñn tēē fariseo ni cana de Jesús jeē cáji yā staā jíin de. Te ni jinū yā vehe de, te ni cucōo ya mesa jeē cáji yā staā. ³⁷ Yūcuān na te ñn ñahan sáha cuēchi, ndéé ña ñuu yúcuān, te ni jini ña jeē ni jíin Jesús vehe tēē fariseo un, yéji yā staā. Te ni quee ña jíin ñn frasco yuū luu jeē ñúhun chitú aceite perfume. ³⁸ Te íin yítí ña nuū jehé yā, te ndáhyú ña. Te ni quejéé ña stáji ña jehé yā jíin ndute tñúú ña, te ni nasíchí ña jíin ixi xíní ña. Te ni techūhú ña jehé yā, te ni chuhun ña perfume un.

³⁹ Te tēē fariseo un jeē ní cana de ya, ni jito de jeē súcuān ni sáha ña, te ni jeni ni de: Núu tēē nácani jnúhun Yaā Dios cúu tēē yáha, te cuni de ndese ñahan cúu ñahan yáha jeē quehé ña de, chi ñahan sáha cuēchi cúu ña, jéni ni de. ⁴⁰ Yūcuān na te ni cahān Jesús jíin de:

Simón, cúni rī cahān rī jíin ró ñn jnúhun.

Te ni cahān máá de:

Cahān ní, Maestro.

⁴¹ Te ni cahān Jesús:

Ñn tēē jéhe núu xūhún, ni íyo uū tēē táu nuū de. ñn de ni cotaū uhūn ciento denario, te inga de ni cotaū uū xico uxī denario. ⁴² Te tú na vé cánevāha tēē un jéē náchunaa de. Te tēē jéhe núu xūhun ní ine cáhnu ni de nuū ndindúú tēē ún. Núu súcuān te cachi rō: Jeē ndindúú tēē ún, ¿ndé ñn de coo maní gā jíin de? Achí yá.

⁴³ Te ni cahān Simón:

Jéni ni na jéē tēē ni cotaū cuehē gā, achí de.

Te ni cahān yā jíin de:

Ndaā cahán rō, achí yá.

⁴⁴ Te jito ya nuū ñahan ún, te ni cahān gā yā jíin Simón:

¿A jito ró na vé sáha ñahan yáha? Jeē ní quee rī vehe ró, te tu ní jéhe ró ndute jeē ndúndoo jehé rī nájnūhun íyo costumbre. Te ñahan yáha ní stáji ña jehé rī jíin ndute tñúú ña, te ni nasíchí ña jíin ixi xíní ña. ⁴⁵ Te tu ní téchūhu ró ruhū nájnūhun íyo costumbre. Te ñahan yáha, nde jeē ni quívi ri vehe ró, tu jécuiñí ña jeē téchūhú ña jehé rī. ⁴⁶ Te tu ní chūhun ró aceite xinī rī nájnūhun íyo costumbre. Te ñahan yáha ní chuhun ña aceite perfume jehé rī. ⁴⁷ Núu súcuān te cáhān rī jíin ró jeē ni stéén ña jeē yóhyo maní ña jíin rí siquī jeē íne cáhnu ni rī nuū tāca cuēchi ña, vēsú cuehē cúu. Te núu cone cáhnu ni rī nuū ñn ñayuu iyó jecu-ni cuēchi, te jecu-ni stéén i jeē maní i jíin rí, achí yá.

⁴⁸ Te ni cahān yā jíin ña:

Je íne cáhnu ni rī nuū tāca cuēchi ró, áchí yá.

⁴⁹ Yūcuān na te ñayuu cáyeji staā jíin yá, ni quejéé i cácahān máá i:

¿Ndé ñn ga cúu tēē yáha jéē cahán jeē íne cáhnu ni nuū cuēchi? áchí i.

⁵⁰ Te Jesús ni cahān gā yā jíin ñahan ún:
Ni candíje ró rúhū, te jeē yúcuan ní jnama ri rohó.
Cuáhán te na ndúsñ ni rō. Achí yá.

Jnūhun ñahan ní cajejníñu nuū yā

8 Yūcuán na te ni cuu jecu quivī, te ni jica cuu Jesús tǎcǎ ñuu náhnu jíin ñuu lulí. Te nácani ya jnūhun vāha te cástūhun yá ndese ndácu Yaā Dios jniñu. Te ndihúxí uū tēe cácuu apóstol, cájica de jíin yá. ² Te suni íyó jecu ñahan cájica jíin yá, jeē ní quenehen ya tachī ini sava ña, te ni nasávāha ya sava ña jeē cándoho cuehyī. Te ñn ña cúu María ñuu Magdala, te ini ñahan un ní quenehen ya uxā tachī. ³ Te inga ña cúu Juana, ñasihí Chuza, tēe ndíso jniñu ini vehe Herodes. Te inga ña cúu Susana, jíin cuéhē gā ñahan jeē cáchindéé ñáhán ña, jéhe ña tǎca jéé jíini ñúhún yá jíin de jíinñahan de.

Jnūhun yátá síquī tēe jéte trigo

(Mt. 13.1-9; Mr. 4.1-9)

⁴ Te cuehē ñayuu tǎcǎ ñuu yúcuan ní jinūcoo i nuū Jesús. Te ni cacutútú cuehē ndasí ñáyuu, te ni cahān yā ñn jnūhun yátá jíin i:

⁵ ñn tēe cate trigo, ni quenda de jeē cáte de. Te ná ni quejéé de jéte de, te jecu trigo ni jítē yuhíchi. Te ni cajeñū ñayuu síquī, te ni cayejí saa. ⁶ Te jecu gā ni jítē nuū ñúhún yuū. Te ni cane, te ni ichī-ni, chí tú cuehē cajin. ⁷ Te jecu gā ni jítē nuū náne iñu. Te inuú-ni ni canecoo iñu jíin, te ni jesí nuū. ⁸ Te jecu ni jítē nuū ñúhún váha. Te nuū ní jehnu, te ni jēhe cuehē nunī, chí jeē ñn ñn ni jēhe nde ciento. Achí yá.

Yūcuán na te ni cahān jee ya:

Tǎca rǎhó jéé jíini sǎho, na chúsóhó ró, achí yá.

Najehē cahán yā mání jnūhun yátá

(Mt. 13.10-17; Mr. 10-12)

⁹ Te tēe cáscuáha jíin yá ni cacajñúhún de ya na vé cuní cahān jnūhun yátá yáha. ¹⁰ Te ni cahān yā:

Rǎhó jíinñahan ró, chí sáha Yaā Dios jeē cájecūhun ni rǎ jnūhun ni yisáhi yáha, ndese quívicoo ñayuu ndaha Yaā Dios jeē ndacu ya jniñu nuū i. Te mání jíin jnūhun yátá cáhán rǎ jíin sava ga i, návāha vésú cájito i, te quéndōo i nájnūhun jeē tú na vé ni cájito i. Te vésú cájini sǎho i, te ma jécūhun ni i.

Jeē ní castūhun cájī yá jnūhun yátá tēe jéte trigo

(Mt. 13.18-23; Mr. 4.13-20)

¹¹ Jnūhun yátá yáha cuní cahān: Trigo un cúu jnūhun Yaā Dios. ¹² Te trigo jeē ni jítē yuhíchi cúu nájnūhun ñayuu cájini sǎho jnūhun, te quíji-ni jexeén te quénde-ni jnūhun ini anuá i, návāha ma candíje i te ma jnáma ri i. ¹³ Te trigo jeē ni jítē nuū ñúhún yuū cúu nájnūhun ñayuu cájini jnūhun, te cájetáhú i te cácusñ ni i jíin. Te tu cúcutú jnūhun ún ini anuá i. Te jecu-ni quivī cáchandíje i, te núu ni quejéé jnúndóho, te cájica

yátá i. ¹⁴ Te trigo jeē ni jítē nuū náne iñu cúu nájnūhun ñayuu cájini jnūhun, te cuangoo i te cácuñnéñu i jíin jniñu i jíin jéé cuní i cucúcá i te coo sñ ni i. Te tu íje i jíin jnūhun ya. ¹⁵ Te trigo jeē ni jítē nuū ñúhún váha cúu nájnūhun ñayuu cájini nahín jnūhun ya, te cájnñ vāha i, chí íyó váha íyó ndāā anuá i. Te cáhije i jíin jnūhun ya, chí cáchandíje vāha i.

Jnūhun yátá síquī lámpara

(Mr. 4.21-25)

¹⁶ Núu nástíin ñayuu ñn lámpara, te tu jesí i ni ñn síquī, ni tu jéni i chíji jǎto. Chí sa suhva jéni i nuū sucún, návāha cundijin nuū ñáyuu quívicoo vehe. ¹⁷ Te suni súcuan tu íyó ni ñn jnūhun sáhi jéé ma cúni ñayuu, chí ndíhi tǎca jnūhun cácahān i nane ndijin te cuni ñayuu.

¹⁸ Núu súcuan te na cúni sǎho vāha ró, chí ñayuu je jécūhun ni, stéén gā yā nuū i. Te ñayuu tu cándíje, máá jecu jeé jéni ni i jeé jiní i, sa suhva naa. Achí yá.

Náná yā jíin ñani yā

(Mt. 12.46-50; Mr. 3.31-35)

¹⁹ Yūcuán na te ni quee naná yā jíin tǎca ñani yā nuū íne ya. Te tu ní cúu quívicoo ña nuū yā síquī jeé chitú ñayuu. ²⁰ Te ñn ñayuu ni castūhun núu yā:

Náná ni jíin tǎca ñani ni cáhíin nuū quéhe, te cácuni cahān jíin ní, áchí i.

²¹ Te ni cahān maá yá:

Suni náná rǎ jíin ñani rǎ cácuu ñayuu cájini sǎho jnūhun Yaā Dios te cáscuicu i, áchí yá jíin i.

Jeē ní jecuiñī tachī níhin jíin mar ni sáha ya

(Mt. 8.23-27; Mr. 4.35-41)

²² Te ñn quivī ni quiví ya ñn barco jíin tēe cáscuáha jíin yá, te ni cahān yā jíin de:

Na yáha yó quíhín yǎ inga lado mar.

Te ni cascáca de barco cuangoo de. ²³ Te níni cáscáca de barco, te ni quixí yā. Te ni jequíhi ñn tachī níhin nuū mar, te je yajni chitú ndute ini barco, te ndúcú quée barco. ²⁴ Te ni castóna de ya, te ni cacahān de:

Maestro, Maestro, vijna te quée yó chíji ndute te naa yǎ, achí de.

Te ni ndocuiñī-ni ya, te ni cahān yā nuū tachī níhin jíin núu mar. Te ni cajecuiñī-ni, te ni cuu nayúú ñi-ni.

²⁵ Te ni cahān yā jíin tēe cáscuáha jíin yá:

¿Naun tu cáchandíje ró?

Te máá de yǎhyo ni cayūhú de, te cánaa ni de, te cácahān de jíin jnáhan de:

¿Ndé ñn ga cúu tēe yáha jéé nde nuū tachí níhin jíin núu ndúte ndácu de jniñu te cájetáhú jéé cahán de?

Achí de.

Tēe Gadara jeē ndóho tachī

(Mt. 8.28-34; Mr. 5.1-20)

²⁶ Yūcuán na te ni cane ya jíin de región Galilea, te cuahān yā región Gadara jeé íne inga lado mar Galilea.

²⁷ Te nuū ní nanuu ya nuū ñúhun íchi, te ñin tēe ñuu un ní quee de nuū yā. Te je ni cuu cuehē cuiyā ñúhun cuehē tachī ini de. Te tu ñúhun cuiṭi de sahma, ni tu ndéé de vehe, chi sa suhva nuū cáyindūji ndēyi ndeé de. ²⁸ Te ná ni jito de nuū Jesús, te ni jecuiñī yití de nuū yā, te ni cana cóho de:

¿Naun vēji ní núu ná, Jesús Sēhe Yaā cujéhu téyí? Cáhán ndahú ná jíin ní jeē ma stóho ní sáña, áchí de.

²⁹ Súcuán ni cahān de, chi je ni ndacu ya jniñu nuū tachí un jeē na quéndacoo ini de. Te ni cuu cuehē jínu sáha xeēn tachí jíin de. Te cájihni ñayuu ndaha de jehé de jíin cadena, návāha tú na vé sáha de. Te ndihī-ni jéhnde de, te jínu de jéhén de nde nuū ñúhun téhé sáha tachí ún. ³⁰ Te Jesús ni cajñūhun yá de:

¿Na vé naní ró?

Te ni cahān de:

Legión naní ná.

Súcuán ni cahān de jeē naní de, chi ñúhun cuehē tachí ini de. ³¹ Te ni cacahān ndahú táchī un jíin yá jeē ma tají yá quihīn ini tūhnchi cúnú. ³² Te yucu yúcuán cáhīn cuehē quīñī cájitu ti. Te tachí jeē cáñuhun ini tēe un ní cacahān ndahú jíin yá jeē na cuáha ya jñūhun quīvícoo ini quīñī ún. Te ni jēhe ya jñūhun. ³³ Te ni quendacoo tachí ún ini tēe ún, te ni quīvícoo ini quīñī. Te quīñī un ní cajinu ti ni ñingoo ti ñin yucáva, ni quīvícoo ti nuū mar, te ni ndaquīñī ti ndute, ni cajihī tī.

³⁴ Te tēe cándito ti ni cajito de jeē súcuán ni cuu, te ni cayūhú de. Te ni cajinu de cuacastūhún de nuū ñáyuu ñuu un jíin ñáyuu tāca rancho. ³⁵ Te cuango ñayuu un cuácondēhé i na vé ni cuu. Te ni jinūcoo i nuū íne Jesús. Te ni cajito i nuū tēe ní quendacoo tachí ini, néne de nuū jehé Jesús, te ñúhun de sahma, te je ni nducájí xíní de. Te ni cayūhu ñáyuu ún. ³⁶ Te tēe ní cajito ni canacani de jñūhun nuū ñáyuu, ndese ni nduvāha tēe ni ñuhun tachí ini.

³⁷ Yūcuán na te tāca ñáyuu ñí región Gadara, ni caquejéé i cacahān ndahú i jíin yá jeē na cújiyo ya quihīn yā, chi yōhyo cáyūhú i. Te ni ndēvi ya ini barco jeē quīnuhun yā. ³⁸ Te tēe jeē ní quendacoo tachí ini, ni cahān ndahú de jíin yá jeē na cuáha ya jñūhun quihīn de jíin yá. Te Jesús ni cahān yā jeē na quéndō de, te áchí yá:

³⁹ Cuánuhun vehe ró, te nacani ró jñūhun ndese yōhyo jéhu jniñu ni sáha Yaā Dios jíin ró, achí yá jíin de.

Te cuahān de, te ni nacani de jñūhun ñí ñuu ún, ndese yōhyo jéhu jniñu ni sáha Jesús jíin de.

Jñūhun sēhe síhí Jairo jíin ñahan ní quehé yusáhma ya
(Mt. 9.18-26; Mr. 5.21-43)

⁴⁰ Te nuū ní najinū Jesús inga lado mar, te ñayuu un ní cacusiñi ni i jeē ní najinū yā, chi ndihī i cándetu i ya.

⁴¹ Te ni quee ñin tēe cújéhu ini vehe ñi sinagoga, naní de Jairo. Te ni jecuiñī yití de nuū jehé yā, te ni cahān ndahú de jíin yá jeē na quihīn yā jíin de vehe de. ⁴² Chi íyó ñin sēhe síhí de jeē mañūhún-ni i nuū de, te íyó i

nájñūhun uxī uū cuiyā. Te sūchí un je yajni cuu i. Te cuahān yā jíin de. Te cuehē ñayuu cándiquīn i ya, te ni chitú níhin i xiin ya cuango i.

⁴³ Te mēhñu ñáyuu un cuáhān ñin ñahan cúhú jeē ní cuu uxī uū cuiyā ndóho ña cuehyī ñiñī. Te ni jexin ña tāca jeē névāha ña jíin tēe tájna, te tu ní nduvāha ña sáha ni ñin de. ⁴⁴ Te ni quee ña ichi yátá yā, te ni quehé ña yusáhma ya. Te ni jecuiñī-ni ñiñī ña.

⁴⁵ Yūcuán na te ni cahān Jesús:

¿Ndé ñin ní quehé sahma ri? achí yá.

Te ndēvii i ni cacahān jeē tu ní quehé i. Te Pedro jíin tēe cáhīn jíin de, ni cacahān de:

Maestro, jito ní jeē ñáyuu cuehē yāha ní chitú níhin i xiin ní, te cáquihī i níhin, te cájñūhun ní ndé ñin ní quehé sahma ní.

⁴⁶ Te ni cahān Jesús:

Tuú chi ñin ñayuu ní quehé sahma ri, chi ni jini rī jeē jíin fuerza rī ni nduvāha ñin ñayuu, achí yá.

⁴⁷ Te ni jini ñahan un jeē tu ní cúu coo yuhu jeē ní sáha ña. Te quísi i ña ní quee ña, te ni jecuiñī yití ña nuū jehé yā. Te jito jíinú tāca ñáyuu, te ni cachi cají ña najehē ní quehé ña yusáhma ya, jíin jeē ní nduvāha-ni ña. ⁴⁸ Te ni cahān yā jíin ña:

Séhē, ni candíje ró jeē cuu nasávāha ri rohó, te jeē yúcuán ní nduvāha ró. Cuáhān te na ndúsī ñi rō, achí yá.

⁴⁹ Te níiní cáhán gā yā súcuán, te ni quee ñin tēe vēji vehe Jairo, tēe cújéhu ini sinagoga, te ni cachi nuū de:

Je ni jihī sēhe síhí ní. Te ma sájnēñu ga ní Maestro, achí de.

⁵⁰ Te ni jini Jesús jñūhun yáha, te ni cahān yā jíin Jairo: Ma yūhu ró, chi candíje-ni ró, te nastécu rī sēhe ró, achí yá.

⁵¹ Te ni jinū yā vehe, te tu ní jēhe ya jñūhun quīvi ñayuu jíin yá, chi máá-ni Pedro jíin Juan jíin Jacobo jíin tátá naná sūchi síhí un. ⁵² Te cácuuíhyá ni ndihī ñayuu cáyūcú ini vehe, te cándahyū i jehé sūchí un. Te ni cahān yā:

Ma ndahyū ró jijnáhan ró. Tu ní jíhí i, chi quíxi-ni i, achí yá.

⁵³ Te ni cajecú catá i jeē ní cahān yā, chi cájini i jeē ní jíhí sūchi síhí un. ⁵⁴ Yūcuán na te ni jñi ya ndaha i, te ni cahān jee ya jíin i:

Síhí, ndocuiñī, achí yá.

⁵⁵ Te ni natecu i, te ni ndocuiñī-ni i. Te ni ndacu ya jniñu jeē na cuáha ña jeē cáji i. ⁵⁶ Te tátá i náná i yōhyo ní canaa ni de cájito de. Te ni ndacu níhin ya jniñu nuū de jeē ma cáchi de nuū ni ñin jeē súcuán ni cuu.

Jeē ní tají yá ndihúxí uū de cuanacani de jñūhun
(Mt. 10.5-15; Mr. 6.7-13)

9 Te ni nastútú yá ndihúxí uū tēe cácuáha jíin yá, te ni sáha ya jeē cóndiso jniñu de te coo poder de jeē quénehen de tachí ini ñayuu, jíin jeē nasávāha de ñayuu cácuñu. ² Te ni tají yá de quingoo de jeē nácani

de jnūhun ndese ndácu Yaā Dios jniñu, jíin jéē nasávāha de ñayuu cácuñu. ³ Te ni cahān yā jíin de:

Ma cóndiso ró jéē cuajniñu ró ichi, ni vara, ni ñunu, ni staā, ni xūhún. Te quihīn rō jíin ñn-ni camisa, te ma cóndiso ró inga. ⁴ Te na-ni vehe núu ni quivicoo ró, te yūcuán coyūcu ró nde quenda tucu ró quihīn rō inga ñuu. ⁵ Te núu ñn ñuu tu cájetáhú i rōhó, na quéndacoo ró yúcuan, te scóyo ró tícachā jehē rō, te súcuan stéén rō jeē iyó cuéchi i jeē tu ní cájetáhú i. Achí yá.

⁶ Te ni quendacoo de cuahān de, ni cajica nuu de tēcá ñuu, ni canacani de jnūhun jnáma Yaā Dios ñayuu. Te tāca lado ni canasávāha de ñayuu cácuñu.

Jeē ni jíihī Juan tēe scuándute

(Mt. 14.1-12; Mr. 6.14-29)

⁷ Te Herodes, tēe cúu gobernador, ni jini jnūhun de tēcá jniñu sáha Jesús. Te ni cunéé ni de, chí cájeni ni sava ñayuu cácahān i jeē Juan ni natecu de. ⁸ Te sava ga i cácahān jeē ní nane Elías, tēe ni nacani jnūhun Yaā Dios nde jenahán. Te sava ga i cácahān jeē inga tēe ni nacani jnūhun ya nde jenahán, ní natecu de. ⁹ Te ni cahān Herodes:

Juan chí ni ndacu ri jniñu ni tahndē xinī. Núu súcuan ¿te ndé tēe cúu tēe yáha jeē jíini jnūhun ri jeē sáha de jniñu jéñnu? Achí de.

Te ni nducú Herodes modo coto de nuū Jesús.

Jeē ni scáji yā uhūn mil tēe

(Mt. 14.13-21; Mr. 6.30-44; Jn. 6.1-14)

¹⁰ Te ni ndecoo tēe cácuu apóstol jeē ní tají yá ni canacani jnūhun. Te ni cacachi de nuū yā tēcá jniñu ni casáha de. Te ni jeca ya de cuahān sñn ya jíin de ñn lugar nuū tú ñayuu, yajni ñuu Betsaida. ¹¹ Te ni cajini ñayuu, te suni cuango i. Te ni jetáhú yá i, te ni nacani ya jnūhun ndese ndácu Yaā Dios jniñu, te ni nasávāha ya ñayuu cácuñu.

¹² Te nuū cuáhini, te ni quecoo ndihúxí uū tēe cáscuáha jíin yá, te ni cacahān de jíin yá:

Tají ní ñayuu cuehē yāhá na quíngoo i tēcá ñuu jíin tēcá rancho yajni yāhá, te nducú i nuū ndóo i te cuaan i jeē cáji i, chí tú na vé iyó yáha, áchí de.

¹³ Te ni cahān yā jíin de:

Cuāha máá ró jeē cáji i, áchí yá.

Te ni cacahān de:

Tú na vé cánevāha ná, chí uhūn-ni staā jíin úū-ni chācá. Te vésú núu quicuaan ná stáā caji ndihī ñayuu cuehē yáha, te ni ma cúu, áchí de.

¹⁴ Chí iyó nájnūhun uhūn mil tēe. Te ni cahān yā jíin tēe cáscuáha ún:

Cahān jíin ñayuu na cúcōo sñn cincuenta cincuenta i, áchí yá.

¹⁵ Te súcuan ni casáha de, te ni cacucōo ndihī ñayuu.

¹⁶ Te ni quihin ya ndihúhún staā jíin úū chācá un, te ni ndacoto ya ichi ándiví, te ni nacuatáhú yá. Te ni tahú cuéchi yá staā ún, te ni jēhe ya nuū tēe cáscuáha jíin yá, te ni casaja de nuū ñayuu cuehē. ¹⁷ Te ndivii i ni

cayeji, te ni candutú chíji i. Te ni canastútú de pedazo staā jeē ní quendōo, te ni chitú úxí uū jíca.

Jeē ní cahān Pedro jeē Jesús cúu Cristo

(Mt. 16.13-19; Mr. 8.27-29)

¹⁸ Te ñn quivī ni cusñn Jesús, jíicán tahu yā, te máá-ni tēe cáscuáha un cáhīn de jíin yá. Te ni cajnūhun yá de: Ruhū, ¿ndé ñn cúu ri cácahān ñayuu? achí yá.

¹⁹ Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnūhun Yaā Dios nde jenahán. Te sava ga i cácahān jeē inga tēe ni nacani jnūhun ya ni natecu de.

²⁰ Yūcuán na te ni cajnūhun yá de:

Te máá ró, ¿ndé ñn cúu ri cácahān rō?

Te ni cahān Pedro:

Máá ní cúu Cristo, Yaā ní tají Yaā Dios, achí de.

Jeē ní castūhún Jesús jeē cúu yā

(Mt. 16.20-28; Mr. 8.30-9.1)

²¹ Yūcuán na te ni ndacu ñhīn ya jniñu nuū de jeē ma cáchi de jnūhun yáha núu ní ñn ñayuu. ²² Te ni cahān yā:

Máá rí, Yaā ní nduu tēe, cánuú ndoho xeēn rī. Te tāca tēe jéñnu jíin sūtú cácujeñnu jíin tēe cástéén tutu ley, squéhichī de ruhū. Te cahni de ruhū, te nuū uní quivī te natecu rī, achí yá.

²³ Yūcuán na te ni cahān yā jíin ndihī de:

Na-ni ñayuu núu cúní i condiquīn i ruhū, na cási i jeē cuní maá i, te na cóndiquīn i ruhū tāca quívī, te cuāha i jnūhun ndoho i jnūndóho jeē siquí rī, vésú na cúu i.

²⁴ Chí núu ndé ñayuu cuní i cácu i nuū jnūndóho quiji nuū i jeē siquí ruhū, núu súcuan te jnahnu ndetū i ññ cáni. Te núu ndé ñayuu, vésú na cúu i jeē siquí ruhū, te cotecu i ññ cáni. ²⁵ ¿Chí ndé cuajniñu vésú na cúndeyí ñayuu nihīn i ññ ñáyiví, te núu squíví i máá i nuū jnahnu ndetū i ññ cáni? ²⁶ Chí núu na-ni ñayuu cúcanu i jeē siquí ruhū, Yaā ní nduu tēe, jíin síquī jnūhun cáhán rī, suni súcuan cucanu rī jeē siquí máá i, quivī ndíji ri. Te quivī ún chí yōhyo luu cujéñnu ri, nájnūhun cújéñnu Tátá rī, te suni cácujeñnu ndajéhé ndoo ya sáha ya.

²⁷ Te jendaá cahán rī jíin ró jeē sava tēe cáhīn yāhá, ma cúu de chí nde cuni de jeē ndácu Yaā Dios jniñu jíin poder yā. Achí yá.

Jeē tucu ni nduu ya

(Mt. 17.1-8; Mr. 9.2-8)

²⁸ Yūcuán na te nájnūhun nuū uná quivī jeē ní cahān yā jnūhun yáha, te ni caa ya ñn yucu, cuacacān tahu yā. Te Pedro jíin Jacobo jíin Juan cuango de jíin yá.

²⁹ Te níni jíicán tahu yā, te tucu ni nduu nuū yā, te sah-ma ya ni nducujín quiyi, te ndíndé. ³⁰ Yūcuán na te ni canecoo uū tēe, cándajnūhún de jíin yá. Te cúu de Moisés jíin Elías, tēe ni cahīyo jenahán. ³¹ Te luu ndíndé de cáhīn de, te ni cacahān de jíin yá siquí jeē

ni cuyajni cuu yā ñuu Jerusalén. ³² Te Pedro jíin tée cáyūcu jíin de, yōhyo cájiī de māhná, te vēsú súcuan te tu ní cáquixī de. Te ni cajito de jeē lúu ndíndēe yá jíin ndíndúú tée cáhīin jíin yá. ³³ Te nuū ní cacujiyo tēe un núū yā, te ni cahān Pedro jíin yá:

Maestro, nacā jeē váha jeē cáhīin ná yáha. Te na sáha ná únī vehe ramada, ñn cuu máá ní, inga cuu Moisés, te inga cuu Elías, achí de.

Te tu sáha de cuenta na vé cúu jeē cahán de. ³⁴ Te níiní cáhán de súcuan, te ni quee vicō nūhun ní jesi nuū de jíin náhan de. Te ni cayūhú de jeē cáhīin de chíji vicō ún. ³⁵ Te nuū vicó un ní cahān ñn jnūhun:

Yáha cúu Sēhe ri jeē maní ndasí rí jíin. Te na cúni nahín ró jnūhun cáhán yā, achí.

³⁶ Te nuū ní jínu ni cahān jnūhun ún, te máá ñn na Jesús íin ya nuū de. Te máá de tu ní cácahān cuiṭi de, te tāca quívī ún tu ní cácachi de nuū ni ñn jeē súcuan ni cajito de.

Jeē ní nasávāha ya ñn sūchi ñúhun tachī ini

(Mt. 17.14-21; Mr. 9.14-29)

³⁷ Te inga quívī un ní nanuu ya yucu jíin de. Te cuehē ñayuu ni jejnahan i ya. ³⁸ Te mēhñu ñayuu cuehē un ní cana jee ñn tēe:

Maestro, jícan tahu na núū ni jēē condēhe ní sēhe yíí ná, chí máñúhún i nuū ná. ³⁹ Te máni jeē sáha xeēn tachī jíin i, te cána cóhó i sáha, te jéhni yīhí i, te jée tiñū yuhu i. Te yōhyo stóho i, te yōhyo uhū siaá i. ⁴⁰ Te ni cahān ndahú ná jíin tée cáscuáha jíin ní jeē na quēnehen te tachī ún, te tu ní cúu sáha de, achí de.

⁴¹ Te ni cahān yā jíin de jíin náhan de:

Ñayuu yōhyo níhni ni cácuu ró, chí tu cácañdije ró jēē cuu nduvāha i. ¿Nasaa ga quívī condee rī jíin ró jeē cuándeýí ni rī jíin ró? Cuáquihin sēhe ró na quíji i, achí yá.

⁴² Te níiní véji i nuū yā, te ni cotúú i ni sáha tachī, te ni jehni yīhí i. Te Jesús ni cahān xeēn yā nuū tachí un, te ni nasávāha ya sūchí un, te ni nacuāha ya i nuū tatá i.

⁴³ Te ndivii ñayuu nahán ní canaa ni i cájito i jeē yōhyo jéhnu jniñu sáha Yaā Dios.

Jeē ni cáhān tucu ya jeē cúu yā

(Mt. 17.22-23; Mr. 9.30-32)

Te níiní cánaa ni i cájito i tācá jniñu ni sáha Jesús, te ni cahān yā jíin tée cáscuáha jíin yá:

⁴⁴ Chuhun vāha ni rō jnūhun cáhán rī yāhá, te ma náā ni rō, chí ruhū, Yaā ní nduu tēe, nastúu i ruhū quívī ri ndaha tāca tēe xeēn, achí yá.

⁴⁵ Te tu ní cájecūhun ni de jnūhun cáhán yā, chí tu ní cúu cuiṭi jecūhun ni de. Te ni cayūhú de cajnūhún de ya siquī jnūhun ni cahān yā.

Ndé ñayuu cúu jeē cújéhnu ga

(Mt. 18.1-5; Mr. 9.33-37)

⁴⁶ Yūcuán na te tēe cáscuáha jíin yá ni caquejéē de cácahān de siquī núu ndé ñn de cújéhnu ga. ⁴⁷ Te Jesús ni jini yā jeē súcuan cájeni ni de. Te ni jniñ ya ndaha ñn sūchi lúli, te ni jeni ya i xiin ya. ⁴⁸ Te ni cahān yā jíin de:

Na-ni ñayuu núu jeē siquī ruhū jetáhú i sūchi lúli yáha, te ruhū jetáhú i. Te ñayuu jetáhú rúhū, suni jétáhú i Yaā ní tají rúhū vēji ri. Te ñayuu núu ga mēhñu ró, máá i cújéhnu ga, achí yá.

Ñayuu tu cáhán siquī yā, íin i jíin yá

(Mr. 9.38-40)

⁴⁹ Yūcuán na te ni cahān Juan:

Maestro, ni cajito ná ñn tēe jeē jíin síhví ní quēnehen de tachī ini ñayuu. Te ni cajesí na jéē sáha de, chí tu jíca de jíin yó, achí de.

⁵⁰ Te ni cahān Jesús jíin de:

Ma cási rō jeē sáha de, chí tēe tu cáhán siquī yō, íin de jíin yó, achí yá.

Jeē ni cáhān yā nuū Jacobo jíin Juan

⁵¹ Te ni cuyajni quívī jeē quínuhun yā andiví, te ni tee téyí ni yā jeē quihín yā ñuu Jerusalén. ⁵² Te ni tají yá sava tēe yósnúu de jíin jnūhun jeē jinú yā. Te cuango de ñn ñuu Samaria návāha nducú de nuū ndóo ya. ⁵³ Te ñayuu Samaria un tu ní cájēhe i vehe ndóo ya, chí ni cajini i jeē ndé Jerusalén quihín yā. ⁵⁴ Te Jacobo jíin Juan, tēe cáscuáha jíin yá, ni cajini de jeē súcuan cúu, te ni cacahān de jíin yá:

¿A cúni ni jēē ndácu yó jniñu quiiji ñuhūn nde andiví, nájnūhun ni sáha Elías, návāha naa ñayuu yáha? Achí de.

⁵⁵ Yūcuán na te ni ndió cóto Jesús nuū de, te ni cahān yā nuū de:

Tu cájini rō na nuū vēji jnūhun cácahān rō. ⁵⁶ Chí ruhū, Yaā ní nduu tēe, tú vēji ri jeē snáā rī ñayuu, chí sa suhva jeē jnáma ri ñayuu, achí yá.

Yūcuán na te cuahān yā jíin de inga ñuu.

Siquī ñayuu jeē cácuñi i condiquín i ya

(Mt. 8.19-22)

⁵⁷ Te níiní jíca ya ichi jíin de, te ni cahān ñn tēe jíin yá: Condiquín na níhín quihín yō ndé-ni cúu-ni nuū quihín ni, achí de.

⁵⁸ Te ni cahān Jesús jíin de:

Tāca ñucuii, íyó yáū cava cáñuhun ṭi. Te suni saa, iyó tácā ṭī. Te ruhū, Yaā ní nduu tēe, tú nuū cusú rī, achí yá.

⁵⁹ Te ni cahān yā jíin inga de:

Condiquín ruhū na quihín yō.

Te máá tēe un ní cahān de:

Condetu ní ndé na quíchindūji ná tátá na xíhna gā. Yūcuán na te condiquín na níhín, achí de.

⁶⁰ Te ni cahān Jesús jíin de:

Stóo tāca ndíyí na chíndūji jnáhan ndíyí, chí ndíyí cácuu ñayuu tu cácañdije. Te róhó, cuáhán te nacani ró jnúhun ndese ndácu Yaā Dios jniñu, áchí yá.

⁶¹ Yūcuán na te suni ni cahān inga de:

Cúni na condiquin na níhín, te cuāha ní jnúhun jeē xíhna gā quicahān na jíin ñayuu cáyūcú vehe ná, áchí de.

⁶² Te ni cahān Jesús jíin de:

Núu na-ni tēe quéjéé de condiquin de ruhū, te núu máni jeē nácani cuíhyá ni de siquē tāca jéé ni stóo de, núu súcuan te cúu de nájnūhun ñin tēe jítu jíin yátá, te jícó cóto de ichi vehe de. Te ma cuajniñu de condiquin de ruhū siquē jniñu ndácu Yaā Dios, achí yá.

Jeē ní tají yá unī xico uxī de

10 Te ná ni cuu tācá jniñu yáha, te máá Jítóho yō ni nacāji ya unī xico uxī gā de. Te ni tají yá ndíhuū ndíhuū de jeē cósnūú de nuū yā, quingoo de tācá ñuu jíin táca lugar nuū jé yajni quihín maá yá. ² Te ni cahān yā jíin de:

Ñayuu yáha cácuu i nájnūhun trigo jeē tahndé, te ndaā jeē cuehē cúu, te tēe cahnde chí jecu-ni de cúu. Núu súcuan te cacān tahú rō nuū maá Jítóho rō Yaā Dios jeē na tájí yá cuehē tēe na quingoo de cahnde de trigo, cúu jeē nacani de jnúhun ya nuū ñayuu. ³ Te cuángoo jíin náhan ró, te na cástūhun rí nuū rō jeē tají rí rohó quingoo ró nájnūhun londe mēhñu yíhí. ⁴ Te ma cóndiso ró ñunu, ni yijni xūhún, ni ndijēn. Te ichi ma cucuéé ró ndajnūhun ró jíin ni ñin. ⁵ Te na-ni vehe núu ni quívi ró, te xíhna gā cahān rō: Na quíji jnúhun ndeyí jnúhun síñ ni nuū rohó, ñayuu vehe yáha, achi rō. ⁶ Te núu vehe yúcuan íyó ñayuu vāha, te jnúhun ndeyí ní cahān rō jinū siquē i. Te núu tuú, te jnúhun ndeyí ní cahān rō ma jinū siquē i. ⁷ Te suni vehe yúcuan coyūcu ró, te caji rō coho ró jéé cuáha ñayuu nuū rō. Chí siquē jniñu jeē nácani ró jnúhun nuū ñayuu, te cánuú coto i róhó. Ma quéndō ró tíjni vehe, chí ñin-ni vehe. ⁸ Te na-ni ñuu núu ni quívicoo ró, te núu cuatáhu i róhó, te caji rō tāca jéé cuáha i nuū rō. ⁹ Te nasávāha ró ñayuu cácuu ñuu yūcuán. Te cachi rō nuū i: Je ni cuyajni Yaā Dios jeē ndacu ya jniñu nuū rō, achi rō. ¹⁰ Te na-ni ñuu núu ni quívicoo ró, te núu tu ní cájetáhu i róhó, te quendacoo ró ini calle yūcuán, te cahān rō: ¹¹ Nde tīcachā ñuu rō yāha jéé ni jñí jehē rī, na náscóyo ri jeē cúu seña jeē iyó cuéchi ró jéé tu ní cájetáhu ró. Te na cónahán ró jeē Yaā Dios je ni cuyajni ya jeē ndacu ya jniñu nuū rō nuú. ¹² Te cáhán rī jíin ró jeē quiví juicio te xeēn gā coo castigo siquē ñuu casáha súcuan vēsú siquē ñuu Sodoma nuū ní casáha ndasí ñayuu cuéchi.

Jeē ní cuxeēn yā nuū sava ñuu níhni ni

(Mt. 11.20-24)

¹³ Nacā jeē xeēn ndoho ró, ñayuu ñuu Corazín. Te nacā jeē xeēn ndoho ró, ñayuu ñuu Betsaida. Chí núu

ini ñuu Tiro jíin ñuu Sidón ni sáha ri jniñu jéhu jeē ni sáha ri ini ñuu maá ró, te yachí nacani ni ñayuu ñuu un jéé stóo i cuéchi i núú. Te sáha i seña jeē steén jeē nácani ni i siquē cuéchi i, chí cuhun i sahna jnúú te chuhun i yaā xinī i núú. ¹⁴ Núu súcuan te quiví coo juicio te xeēn gā coo castigo siquē rō jíin náhan ró vēsú jeē ni íyo siquē ñuu Tiro jíin ñuu Sidón. ¹⁵ Te róhó ñayuu ñuu Capernaum, zá cájeni ni rō jeē cujéhu ró nájnūhun ñin jeē cá cuahān ichi ándiví? Tuú chí sa nanuu ró ndé lugar nuū cáyūcu ánuá ndíyí. Achí yá.

¹⁶ Te ni cahān gā yā jíin tēe jeē tají yá quingoo:

Ñayuu chusóhó jnúhun cahān rō, nuū maá rí chusóhó i. Te ñayuu squéhichí rohó, suni ruhū squéhichí i. Te ñayuu squéhichí ruhū, suni squéhichí i Yaā ní tají rúhū vēji ri. Achí yá.

Jeē ní ndecoo tēe ni tají yá

¹⁷ Te ni ndecoo unī xico uxī tēe un, cácusíñ ni de te cácahān de jíin Jesús:

Nde tachí cájetáhu núu na jéé jíin síhví ní, chí quéndacoo ini ñayuu, achí de.

¹⁸ Te ni cahān yā jíin de:

Súcuan cúu, chí ni jito ri jeē nájnūhun ñin taja ni nin-gava Satanás ichi ándiví, chí ni quende rī ndíhi poder un. ¹⁹ Te vijna te je ni jēhe ri fuerza nuū rō jeē cueñū rō nájnūhun siquē tāca cóo jíin tésuhma, te cundeyí ró siquē tāca fuerza maá jéé jito uhū yohó, te tú na vé sáha ga jíin ró. ²⁰ Te ma cúsiñ ni rō maá-ni jeē cájetáhu táchí nuū rō, chí sa cusíñ gā ni rō jeē yosó síhví ró nde ándiví. Achí yá.

Jeē ní cusíñ ni Jesús

(Mt. 11.25-27; 13.16-17)

²¹ Te suni hora un ní cusíñ ni Jesús, ni sáha Espíritu Santo, te ni cahān yā:

Na cútahū na núu ni Tátā, Jítóho ándiví jíin ñáyiví. Chí ni jesi ni táca jnúhun ndíchí ní, jeē ma cúni ñayuu ndíchí jíin ñayuu tūhva cuenta ñayiví yáha. Te ni steén ni núu ñayuu cácuu nájnūhun sūchi lúlí. Chí súcuan ni nujnahan ni ni Tátā, achí yá.

²² Te ni cahān gā yā:

Ndivíi ni jēhe Tátá rī nuū rī. Te tu cájini ñayuu ndé ñin cúu ruhū, Sēhe Yaā Dios, chí máá-ni Tátá rī cúu jeē jiní yā ruhū. Ni tu cájini ñayuu ndese Yaā cúu máá Tátá, chí máá-ni Sēhe cúu jeē jiní. Te íyó ñayuu jeē cuní maá Sēhe steén yā nuū i ndese Yaā cúu Tátá yā, te máá i suni cuni i. Achí yá.

²³ Yūcuán na te jito ya nuū tēe cáscuáha ún, te ni cahān yā jíin máá-ni de:

Yōhoyo ndetū ñayuu cájito jniñu jéhu jeē cájito máá ró. ²⁴ Chí cáhán rī jíin ró jeē cuehē tēe ni canacani jnúhun Yaā Dios, jíin táca rey, ni cacuni de coto de jeē cájito máá ró, te tu ní cájito de. Te suni ni cacuni de cuni sōho de jeē cájini sōho máá ró, te tu ní cájini de. Achí yá.

Jnūhun ñn tēe vāha ni nación Samaria

²⁵ Yūcuán na te ñn tēe stéén tutu ley Yaā Dios, ni ndocuññi de ni jecahān de jíin Jesús, chi cúní de coto ndee de ya. Te ni cajnūhún de:

Maestro, ¿na vé sáha ná te nihñn tahú na cotecu na ññí cáni andiví? áchí de.

²⁶ Te ni cahān yā jíin de:

¿Ndese yósó núū tútu ley? ¿Ndese cáhán cáhu ró? Achí yá.

²⁷ Te máá tēe un ní cahān de jeē cahán nuū tútu:

Coo manī ndasí ró jíin máá Jítóho rō Yaā Dios, nde jnāā ndasí ró sáha ró ndihñi jeē cúsiñi ni yā, nde jíin ini jíin ánuá rō, jíin ññí fuerza rō, jíin ññí jéē níjnūnī rō. Te cundáhú ni rō jnāhan ró nájnūhun cundáhú ni rō maá ró, achí. Achí de.

²⁸ Te ni cahān yā jíin de:

Vāha ni cahān rō. Te núu cuu sáha ró súcuan te nihñn tahú rō cotecu rō ññí cáni, áchí yá.

²⁹ Te máá tēe un cúní de jeē quéndōo ndaā de nuū yā jíin jnūhun ni cajnūhún de, te ni cahān de:

¿Te ndé ñáyuu cácuu jnāhan ná? áchí de.

³⁰ Te ni cahān Jesús:

Ñn tēe ni quenda de ñuu Jerusalén, ni cuun de cuahān de ñuu Jericó. Te ichi un ní canecoo ñacuññna núū de, te ni caquende ndihñi ndajññi de, te nde sah-ma ñūhun de. Te ni cacani ndevāha ún de jeē jé yajni cuu de núú. Te ni castóo ún de, te cuango. ³¹ Te ni cuu jeē ichi un yáha ñn sutū quihñn de, te ni jito de nuū tēe ún, te ni síyo-ni de cuahān de. ³² Te suni súcuan ñn tēe grupo levita jeē cájeññiñi ini templo, vēji de ichi ún, te ni jito de nuū tēe ún, te ni yāha jíca-ni de cuahān de. ³³ Te ñn tēe nación Samaria, suni vēji de ichi ún, te nuū ní jito de, te ni cundáhú ni de tēe ún. ³⁴ Te ni quee de nde nuū catú tēe ún, te ni chuhun de aceite jíin vino nuū ni túji tēe ún, te ni jihni de sah-ma nuū. Te ni soó de tēe un síquñi quití de, te cuahān de jíin tēe un ndé ñn mesón, te ni condito de. ³⁵ Te ñnga quivñi ún, hora jeē quihñn de, te ni tava de uū xūhun cáa, ni jēhe de nuū tēe chíí mesón. Te ni cahān de: Coto ní tēe yáha, te núu caxñn gā ni xūhun ní jíin de, te nuū nándicó ná te nachunaa ná núū ní, áchí de. ³⁶ Núu súcuan ¿te ndese jéni ni rō? Jeē ndinúní tēe ún, ¿ndé ñn de ni chihi cuenta jeē jnāhan de cúu tēe ni canecoo ñacuññna núū? Achí yá jíin tēe stéén tutu ley.

³⁷ Te ni cahān de:

Tēe jeē ní cundáhú ni tēe ni tujñi, vēsú tēe ñuu jíca cúu de.

Yūcuán na te ni cahān Jesús jíin de:

Cuáhán núu súcuan, te suni súcuan cundáhú ni rō tāca ñáyuu, achí yá.

Jeē ni íne ya vehe Marta jíin María

³⁸ Yūcuán na te ni quihñn tucu ya ichi cuahān yā, te ni jinū yā ñn ñuu lulí. Te ñn ñahan nání Marta, ni cana ña

ya ni jehēn yā vehe ña. ³⁹ Te Marta, íyo ñn cuhū ña nání María. Te María ni cucōo ña nuū jehé Jesús, jíni nahñn ña jnūhun cáhán yā. ⁴⁰ Te Marta chi cúnéé máá ña jíin cuéhē jñiñu sáha ña. Te ni quee ña nuū yā, te ni cahān ña:

¿A tu sáha ní cuenta jeē cuhū na ní stóo máññhún ña sāña núū jñiñu? Te cahān ni jíin ña na chindéé ñhāñ ña sāñá, áchí ña.

⁴¹ Te ni cahān Jesús jíin ña:

Marta, yōhyo ndihñi ni rō jíin cuéhē jñiñu, te yōhyo stóho ró máá ró jíin. ⁴² Te íyo ñn-ni jñiñu cánuú. Te María chi ni nacāji ña jñiñu cánuú, suu jeē ndihñi ni ña síquñi jnūhun Yaā Dios, te ma quēnehen yó ña nuū ún. Achí yá.

Jeē ni stéén yā ndese cacān tahú yō

(Mt. 6.9-15; 7.7-11)

11 Te ñn quivñi íne Jesús ñn lugar jíicán tahú yā. Te nuū ní ndihñi ní jíicán tahú yā, te ñn tēe scuáha jíin yá, ni cahān de:

Stéén ni núū ná ndese cacān tahú na jíjnāhan ná, nájnūhun ni steén Juan nuū tēe ni cascuáha jíin de, áchí de.

² Te ni cahān yā jíin de:

Jeē cacān tahú rō, te suhva cahān rō: Tátá maá ná jíjnāhan ná jéē ndeé ní andiví, níni na cóo yéññhún ná nuū ní, chi Yaā ñi cúu ní. Te ñūhun ni na jéē yachñi quiji quivñi ndacu ní jñiñu ññí ñáyñi yáha.

Te na cóo tāca jñiñu nújnahan ni ní, nájnūhun íyo ini andiví, súcuan na cóo ini ñayñi. ³ Staā jeē cátecu na táca quivñi, cuāha ní núū ná vijna. ⁴ Te cone cáhnu ni ní núū tāca cuéchi casáha ná núū ní,

nájñūhun cáhine cáhnu ni na núū ñáyuu casáha cuéchi nuū ná.

Te ma cuáha ní jñiñu jeē coto ndee jexeén sāñá, chi sa suhva jnama ní sáña nuū tāca jéē neé. Achi rō jíjnāhan ró. Achí yá.

⁵ Te ni cahān gā yā:

Núu ndé ñn róhó íyo ñn amigo rō, te núu quihñn rō vehe de sava ñuú te cahān rō jíin de: Amigo, cuāha núu unñi staā nuū rñ. ⁶ Chi ñn amigo rñ jeē jíca de viaje, ni quee de vehe rñ, te tú na vé névāha rñ jeē cuáha rñ caji de. Achi rō. ⁷ Te núu cahān tēe íne ini vehe: Ma stáhān rō ruhū, chi ndihñi yehyñi rñ, te je cáquixñi sēhe rñ jíin rñ, te ma cúu ndonda rñ jeē cuáha rñ nuū rō, achi de.

⁸ Te cáhán rñ jíin ró, vēsú ma ndóna de cuāha de nuū rō síquñi jeē cúu de amigo rō, te jeē yóhyo stáhān rō de, jeē yúcuan ndonda de cuāha de ndihñi jeē jíni ñūhún ró. ⁹ Núu súcuan te cáhán rñ jíin ró jíjnāhan ró jeē suni súcuan cacān tahú rō nuū Yaā Dios, te cuāha ya nuū rō. Te nducú ró tāca jéē váha íyo núū yā, te nihñn rō sáha ya. Te cacān tahú rō nde nihñn rō, nájnūhun sáha ñáyuu cahān yehyñi ndé nune quivñi i.

¹⁰ Chi tāca ñáyuu jíicán, cuāha ya nuū i. Te ñáyuu

nducú, suni nihīn i. Te ñayuu cahán, nune ya ichi nihīn i jeē cuní i.

¹¹ ¿Te ndé ñn ró cúu tátá, te núu sēhe ró jícán i staā nuū rō, te á cuáha ró ñn yuū nuū i? Te núu jícán i chācá, ¿te á cuáha ró ñn coō nuū i? ¹² Chí núu jícán i ñn ndivī, ¿te á cuáha ró ñn tisuhma nuū i? Tú cuiñi súcuan. ¹³ Núu súcuan te máá ró jijnáhan ró, vēsú ñáyuu iyó cuéchi cácuu ró, te cájini rō cuāha ró jeē váha nuū séhe ró. Te nagā ni cuu máá Tátá rō andiví jeē ma cuáha ya Espiritu Santo nuū ñáyuu jicán nuū yā. Achí yá.

Jeē ní cacahān de jeē jejniñu ya fuerza Satanás

(Mt. 12.22-30; Mr. 3.19-27)

¹⁴ Te quénehen ya ñn tachī ini ñn tēe, jeē ní cuiñihín de ni sáha. Te nuū ní quenda tachī, te ni nacahān tēe ni cuiñihín un. Te ni canaa ni ñayuu cájito i. ¹⁵ Te sava ñayuu ún chi ni cacahān i:

Jíin fuerza Satanás jeē cujéhnú nuū tachí, quénehen tēe yáha táca táchī ini ñayuu, achí i.

¹⁶ Te sava ga i cuní i coto ndee i ya, te ni cajicān i jeē sáha ya jeē coo ñn seña ichi ándiví. ¹⁷ Te máá yá jíin yā jeē súcuan cájeni ni i, te ni cahān yā:

Tācá nación jeē sasñin máá te cuajnáhan máá, núu súcuan te snāā jeē iyó váha máá. Te núu ñayuu ñn vehe sasñin máá te cuajnáhan máá, núu súcuan te ma cúu ga coyūcu cáhnu. ¹⁸ Te suni súcuan Satanás, núu sasñin máá jíin jnáhan tachī, ¿te ndese cuiñi nihin jeē ndácu jniñu núu súcuan? Chí cacahān rō jeē jíin fuerza Satanás quénehen ri tachī ini ñayuu. ¹⁹ Te núu súcuan cúu núu, te ñayuu cascuáha jíin máá ró jijnáhan ró, ¿na jíin fuerza cáquenehen máá i tachī, cájeni ni rō? Núu súcuan te máá i jijnáhan i cachi jeē ní caství ndasí ró ni cacahān rō jeē cáquenehen ri tachī jíin fuerza Satanás. ²⁰ Te tuú chi sa suhva jíin fuerza Yaā Dios cúu jeē quénehen ri tachī. Núu súcuan te je ndéé Yaā Dios mēhñu ró jeē ndácu ya jniñu.

²¹ Te núu ñn tēe ndacuī, ndíto de vehe de jíin nújí de, núu súcuan te tú ni ñn ndajniñu de ndoñuhún. ²² Te núu quiiji ñga tēe ndacuī gā, te cundeyí jíin tēe ún, núu súcuan te quende nují de jeē ndíto de vehe de, te sáha de ndese cuní maá de jíin ndajniñu jeē quénde de. Te nájnūhun tēe ndacuī gā ún, súcuan cúu máá rí nuū Satanás.

²³ Te ñayuu tu iyó mání jíin rí, núu súcuan te jíto uhū i ruhū. Te ñayuu tu nástútú jíin rí, núu súcuan te sa jéte núu i ñayuu vējicoo nuū rí.

Tachí jeē nastútú jnáhan ndiví ini ñayuu

(Mt. 12.43-45)

²⁴ Núu ni quenda ñn tachī ini ñn tēe tu cándije, te jíca cuu nuū ñuhun téhé, ndúcú núu ndétátú, te tu níhín, yūcuán na te jéni ni maá: Na quínuhun rí vehe nuū ní quenda ri. ²⁵ Te núu ni ndee tucu, te jíto jeē tēe tu cándije un cúu de nájnūhun ñn vehe jeē ní ndundoo. ²⁶ Yūcuán na te jéquiñin uxā gā tachī xeén gā vēsú

maá. Te quívicoo ini tēe un jeē cóyūcu yúcuan. Núu súcuan te xeén gā ndoho tēe un jeē sándñhí vēsú jeē xihna ñuhún. Achí yá.

Yōhoyo ndetū ñayuu cájini nahín jnūhun ya

²⁷ Te níní cáhán yā jnūhun yáha, te ñn ñahan íne mēhñu ñáyuu cuehē un, ní cahān jee ña jíin yá:

Yōhoyo ndetū ñahan ní scácu níhín te ni scáxin ña níhín, áchí ña.

²⁸ Te ni cahān yā:

Sa suhva yōhoyo ga ndetū ñayuu cájini nahín jnūhun Yaā Dios te cásquícu i, áchí yá.

Jeē ní cajicān ñayuu tu cácdíje ñn jniñu jéhnú

(Mt. 12.38-42; Mr. 8.12)

²⁹ Te ni cataca cuehē gā ñayuu nuū Jesús, te ni quejéé yá cahán yā:

Ñayuu iyó vijna máni cásáha néé i. Te cajicān i ñn jniñu jéhnú jeē steén núu Yaā ní tají Yaā Dios cúu ri. Te tú na ñga jniñu jéhnú stéén rí nuū i, chi máá-ni jniñu jéhnú nájnūhun ni cuu jíin Jonás, tēe ni nacani jnūhun Yaā Dios nde jenahán. ³⁰ Chí nájnūhun ni cajini ñayuu ñuu Nínive jeē ní cuu ñn jniñu jéhnú jíin Jonás, suni súcuan cuni ñayuu tiempo yáha jeē coo ñn jniñu jéhnú jíin rúhū, Yaā ní nduu tēe, jeē quijnáhan jíin modo ni ndoho Jonás. ³¹ Te reina jeē ní cujéhnú nación ichi sur, natecu ña jíin ñáyuu tiempo yáha, quiví juicio jeē sándaā yā cuéchi, te cahān ña cuéchi síquī i. Chí nde jicá téyí ní quiiji ña ni jini nahín ña jnūhun ndíchí ní cahān rey Salomón. Te vijna chí cújéhnú ga ruhū, Yaā íne yáhá vēsú Salomón, te tu cácdíje ró rúhū. ³² Te tāca ñáyuu ñuu Nínive nuū ní nacani Jonás jnūhun, natecu i jíin ñáyuu tiempo yáha, quiví juicio jeē sándaā yā cuéchi, te cahān i cuéchi síquī ñáyuu yáha. Chí máá i ni canacani ni i ni castóo i cuéchi i quiví ní nacani Jonás jnūhun nuū i. Te vijna chí cújéhnú ga ruhū, Yaā íne yáhá vēsú Jonás, te tu cácdíje ró rúhū.

Jnūhun yátá síquī lámpara

(Mt. 5.15; 6.22-23)

³³ Núu nástñin ñayuu ñn lámpara, tu chísahí i, ni tu chúne i chíji ñn cajón. Chí sa suhva jéni i nuū sucún, návāha cundijin nuū ñáyuu quívicoo vehe. ³⁴ Te tinūu ró cúu nájnūhun lámpara nuū yiquí cúñu rō. Núu súcuan te núu tinūu ró iyó ndijin, te ññ-ni yiquí cúñu rō cundijin. Te núu tinūu ró tu iyó ndijin, te ññ-ni yiquí cúñu rō iyó nee. ³⁵ Te suni súcuan cúu ánuá rō, te coto ró jeē ma cáni néé ni rō, návāha tú coo nee ini anuá rō. ³⁶ Chí núu máni jniñu váha cásáha ró, te tú na jniñu néé cásáha ró, núu súcuan te luz yā cundijin vāha ini anuá rō, nájnūhun ñn lámpara jeē sáha jeē cundijin vāha. Achí yá.

Jeē ni cáhān yā jeē iyó cuēchi de jijnáhan de

(Mt. 23.1-36; Mr. 12.38-40; Lc. 20.45-47)

³⁷ Te nuū ní cuu ni cahān yā, te ñn tēe grupo fariseo ni cana de ya jeē caji yā staā vehe de. Te ni quivī ya, te ni cucōo ya mesa jeē cáji yā staā. ³⁸ Te tēe fariseo un nāā ni de jito de jeē tu squícu ya costumbre jeē nandahá yá te caji yā staā. ³⁹ Te ni cahān maá Jítoho yō jíin de:

Róhó tēe fariseo jijnáhan ró, chi nájnūhun jeē cá-nacate ró yātā vaso jíin yātā cohó cúu jeē nándahá ró. Te ichi íni rō chi ñūhun máni máá jnúhun cuíhná jíin jnúhun néé. ⁴⁰ Tēe cánéé cácuu ró. ¿A tu cájini rō jeē Yaā ni sáha yiqui cúñu rō, suni ni sáha ya anuá rō? ⁴¹ Te jeē cájēhe ró caridad nuū ñáyuu ndahú, na sáha ró síquī jeē cundáhú ndije ni rō i. Te súcuu te coo ndaā anuá rō.

⁴² 'Nacā xeēn ndoho róhó tēe fariseo, chi cásquícu ró tēcá jniñu lúlí, te tu cásquícu ró jniñu cánuú. Chi cásáha ró úxí uxí nuhnī tamīnu jíin ruda jíin táca yucū, te cásocō rō ñn ñn síquī táca úxí un núú Yaā Dios. Te tu cásáha cuítī rō jniñu ndaā, ni tu cáhīyo manī rō jíin Yaā Dios. Táca jēé yáha cánuú sáha ró núú, te suni ma stóo ró jēé socó rō táca yúcū ún.

⁴³ 'Nacā xeēn ndoho róhó tēe fariseo, chi máni cánuj-nahan ni rō cucōo ró núú silla yíñúhún gá ini vehe ñi sinagoga. Te cánuj-nahan ni rō jeē cahān yíñúhún ñáyuu jíin ró nuū calle.

⁴⁴ 'Te nacā xeēn ndoho róhó tēe cástéén tutu ley Yaā Dios, jíin róhó tēe fariseo, chi tēe stáhú-ni cácuu ró. Chi cándāa ró nájnūhun yaū ndīyī jeē tú ndijin, chi cás-nāā rō anuá ñayuu, te tu jíin i jeē súcuu cásáha ró jíin i. Achí yá jíin de.

⁴⁵ Yūcuán na te ni cahān ñn tēe stéén tutu ley:

Maestro, jeē ni cáhān ni táca jnúhun yáha, suni nde síquī maá ná jijnáhan ná ní cahān ní, áchí de jíin yá.

⁴⁶ Te ni cahān yā:

Suni nacā xeēn ndoho róhó tēe cástéén tutu ley. Chi suni cástéén rō táca ley ni catava maá ró jeē yíí sáha, te tu cácuu ñáyuu squícu i. Te máá ró, chi ni ñn xinī ndáha ró tu cáscānda ró jēé squícu ró.

⁴⁷ 'Nacā xeēn ndoho ró jijnáhan ró. Chi cásáha ró ve-he síquī nuū yíndūji ndīyī jíí rō, tēe ni canacani jnúhun Yaā Dios nde jenahán. Te suni táca jíí rō ni cajehni de tēe ún. ⁴⁸ Te jeē casáha ró súcuu cúu jeē cáquijnáhan ró jíin de síquī jniñu ní casáha de. Chi máá de ni cajehni tēe ún, te máá ró cásáha ró vehe ndīyī ún.

⁴⁹ 'Jeē yúcuu nde jenahán ní cahān Yaā Dios ñn jnúhun ndíchí: Tají rí táca tēe nacani jnúhun ri jíin táca tēe apóstol quingoo de nuū i. Te sava de cahni i, te sava ga de coto xeēn i, áchí Yaā Dios. ⁵⁰ Te súcuu te síquī ñáyuu tiempo yáha na cóndee cuēchi jeē ní cajehni jíí i tēe ni canacani jnúhun Yaā Dios, nde quivī ni jécōo ñayiví te nde vijna, ⁵¹ nde Abel xíhna gā te nde Zacarías, tēe ni cajehni de ini templo sava mēhñu

cuarto ñi jíin altar. Núu súcuu te cáhān rí jíin ró jeē síquī ñáyuu tiempo yáha condee táca cuēchi ún.

⁵² 'Nacā xeēn ndoho róhó jēé castéén tutu ley, chi cá-jesi rō ichi jeē jécūhun ni ñayuu jnúhun ya. Chi ni máá ró tu cácuu rō jecūhun ni rō, ni tu cájēhe ró jnúhun jeē jecūhun ni ñayuu cácuu. Achí yá.

⁵³ Te jeē ni cáhān yā jnúhun yáha, te tēe cástéén tutu ley Yaā Dios jíin tēe fariseo, yōhyo ni caquitī ni de nuū yā. Te ni caquejéé de cástíchí de ya síquī cuehē gā jnúhun. ⁵⁴ Chi yuhu-ni cánducú de núu sanaa te stívi yá jnúhun cahān yā, návāha nihīn de cuēchi síquī yā.

Síquī jnúhun stáhú cácahān tēe fariseo

12 Te níni súcuu cúu, te ni cacutútú cuéhē mil ñayuu, chi nde cájēñu i síquī jehé jnáhan i. Te xíhna gā ni quejéé yá cahān yā jíin tēe cáscuáha jíin yá: Coto má candíje ró levadura tēe grupo fariseo, chi suu cúu jnúhun stáhú cácahān de. Chi jíitē núu nuū ñáyuu, nájnūhun ndécava levadura nuū ñújen pan.

² Chi jnúhun stáhú un má quéndōo sáhi cuítī, chi ndīhi natūu ndijin, te cuni ñayuu. ³ Núu súcuu te suni máá ró, táca jnúhun ni cacahān rō jeē tu ní jíin ñayuu, ñn quivī te cuni vāha i. Te táca jnúhun ni cacahān sáhi ró jeē ndihyú yehyí, ñn quivī te cahān jee ñayuu yatā tēcá vehe.

Jeē ní cachi yā ndé ñn cúu jeē yūhu yó

(Mt. 10.28-31)

⁴ 'Cáhān rí jíin ró jijnáhan ró, amigo: Ma yūhu ró coto ró ñáyuu cahni yiqui cúñu rō, chi núu ni cajehni i róhó, te tuá na vé cúu sáha ga i. ⁵ Te na cáchi rí nuū rō ndé ñn yūhu ró coto ró: Jeē yūhu ró coto ró cúu Yaā Dios jeē núu sáha ya jeē cúu rō, te iyó poder yā chune ya rohó infierno. Suu máá yá cúu jeē yūhu ró jeē ma stívi ró nuū yā.

⁶ 'Te tēcá saa chi tú yahu ndéé tē, chi nde uhūn tē jeē uú centavo lúlí. Te ni ñn tī tu náā ni Yaā Dios jeē tu ndí-to ya. ⁷ Te nagā ni cuu róhó jijnáhan ró, chi nde ndīhi xini rō je ni cahu ya. Núu súcuu te ma yūhu ró jijnáhan ró, chi cánuú ndasí gá rō nuū yā vēsú cuehē tēcá saa.

Ñayuu jejnúhún Jesucristo nuū inga ñayuu

(Mt. 10.32-33; 12.32; 10.19-20)

⁸ 'Te cáhān rí jíin ró, táca ñáyuu jeē cuajnúhún rúhū nuū inga ñayuu, suni súcuu ruhū, Yaā ní nduu tēe, cuajnúhún rí i nuū tēcá ndajéhé Yaā Dios. ⁹ Te táca ñáyuu jeē ma cuajnúhún rúhū nuū inga ñayuu, suni súcuu ma cuajnúhún rí i nuū tēcá ndajéhé Yaā Dios.

¹⁰ 'Te núu ndé ñáyuu cahān i síquī ruhū, Yaā ní nduu tēe, cone cáhnu ni Yaā Dios nuū i. Te núu ndé ñáyuu cahān ndevāha i síquī Espíritu Santo, ma cóne cáhnu ni Yaā Dios nuū i.

¹¹ 'Te núu cuandeca i róhó táca vehe ñi sinagoga nuū tēe cásāndaā cuēchi, jíin núu tēe cácuu tohō, te ma ná-

cani ndasí ni rō ndese stío cuíñí rō jnūhun nuū de.
¹² Chi máá hora un te Espíritu Santo steén yā nuū rō ndese cahān rō. Achí yá.

Siquī jeē ma tēnuū yō ndajniñu cúcá

¹³ Yūcuán na te ñin tēe íne nuū ñáyuu cuehē un ní cahān de jíin Jesús:

Maestro, cahān ni jíin ñani na jēē na táhú sáva de tahū na jíin de, áchí de.

¹⁴ Te ni cahān yā jíin de:

¿Ndé ñin ni jeni ruhū jeē ndacu ri jniñu tahū sáva tahū rō? Achí yá.

¹⁵ Te ni cahān gā yā:

Condito ró máá ró jijnáhan ró jēē ma ndíyo ni rō xūhun jíin táca gá. Chi vēsú cuehē ndasí ndajniñu névāha ñin tēe, te nasūu jēē yúcuan sáva jeē quéndōo ndetū de, áchí yá.

¹⁶ Yūcuán na te ni cahān yā ñin jnūhun yátá jíin i:

Ni t̄yo ñin tēe cúcá jeē névāha ñuhun jeē cúu vāha ndasí itu. ¹⁷ Te tēe cúcá un ní nacani ni de: ¿Ndese sáva ri? Chi tuá ndé cuhun niñi ri. Achí de. ¹⁸ Te ni jeni ni de: Suhva na sáva ri. Na cánu rī táca yácā rī, te nasáva ri jeē náhnu ga. Te yūcuán chuvāha ndihī ri niñi ri jíin táca ndajniñu ri. ¹⁹ Yūcuán na te cahān rī jíin ánuá rī: Vijna te cuehē teyí névāha yó jēē canda cuehē cuiyā. Na ndétātu yó te caji yō coho yó, te na cúsiñ ni yō, ni jeni ni de. ²⁰ Te ni cahān Yaā Dios jíin de: Tēe cánéé cúu ró. Chi jecuāā vijna cuu rō, te táca jēē ní chuvāha ró, ¿ndé tēe cuu? Achí Yaā Dios jíin de. ²¹ Te súcuan ndoho táca tēe jeē sacúcá de máá de, te tu ndúcú de jeē quendōo ndetū de sáva Yaā Dios. Achí yá.

Yaā Dios ndíto ya yohó

(Mt. 6.25-34)

²² Te ni cahān yā jíin tēe cáscuáha jíin yá:

Núu súcuan te cáhán rī jíin ró: Ma nácani ndasí ni rō siquī jeē cótecu rō, núu ndese caji rō, ni siquī sahma, núu ndese cuhun ró. ²³ Chi Yaā Dios ni sáva ya jeē técu rō jíin yiqui cúñu rō, te nagā ni cuu jeē ma cuáha ya jeē caji rō jíin jēē cúhun ró. ²⁴ Condēhe ró ndese cátecu quit̄i cácuu nájnūhun cálu, chi tu cátaji t̄i, ni tu cá-nastútú t̄i jeē chūvāha t̄i, ni tú yacā t̄i. Te vēsú súcuan te máá Yaā Dios scáji yā t̄i. Te cánuú ndasí gá rō jijnáhan ró vēsú táca quit̄i ún. ²⁵ ¿Te ndé ñin ró, á cuu scuéhnu ró máá ró sava metro gā, vēsú na nácani ndasí ni rō? ²⁶ Te núu ma cúu sáva ró vēsú ñin jniñu lúli súcuan, ¿te najehē cánacani ndasí ni rō siquī jeē caji rō jíin jēē cuhun ró?

²⁷ Condēhe jijnáhan ró ndese jēe ita táca yúcū. Chi tu sájniñu, ni tu táu. Te cáhán rī jíin ró jeē ni rey Salomón, quiv̄i ní ñúhun de sahma váha ndasí, tu ní ñúhun de sahma lúu súcuan nájnūhun ita ún. ²⁸ Te núu súcuan jēhe Yaā Dios sahma lúu ita un jēē jēe vijna te sajnē cayū nuū ñuhún, te nagā ni cuu rōhó jijnáhan ró jēē

ma sáva ya jeē nihín rō sahma. ¿Te naun tu cácanđije niñin ró jēē ndíto ya rohó? ²⁹ Núu súcuan te ma nácani cuíhyá ni rō ndese caji rō ndese coho ró. ³⁰ Chi táca ñáyuu ñaȳiv̄i jēē tu cácanđije cúu jeē máni siquī jeē yáha cándihv̄i ni i. Te máá ró jijnáhan ró, chi íyó Tátá rō andiv̄i, te jíini yā jeē cájini ñúhún ró táca jēē yáha. ³¹ Te sa suhva cánuú gá jeē cóndihv̄i ni rō siquī jniñu jeē ndácu Yaā Dios nuū rō. Yūcuán na te sáva ya jeē nihín rō táca jēē yáha.

Ndese coo cúcá yó nde andiv̄i

(Mt. 6.19-21)

³² Ma yūhu ró jijnáhan ró chi cácuu ró nájnūhun lanchi ri. Chi vēsú jecu-ni cácuu ró, te máá Tátá rō cúsiñ ni yā jeē quívicoo ró ñuu nuū ndácu ya jniñu. ³³ Xīco ró jeē cánevāha ró, te cuáha ró xúhun un núu ñáyuu ndahú. Te súcuan caya rō tahū rō nde andiv̄i núu ma cútúhú, nájnūhun jeē chūvāha ró xúhun ini yijni. Chi nde andiv̄i te ma náā jeē váha coneváha ró. Chi yúcuan má quív̄i ñacuñhá, ni ma cúu st̄iv̄i tiquixin. ³⁴ Chi nde nuū nihín rō tahū váha ró, yúcuan cúu nuū cóndihv̄i ni rō siquī.

Jeē na cóo tūhva yó jēē ndēē yā

³⁵ Coo tūhva ró jijnáhan ró jēē ndēē Jitoho rō, te coo ró nájnūhun mozo jeē nast̄in i lámpara i. ³⁶ Chi íyó tūhva i te cándetu i jeē ndēē patrón i jeē cuahán de vico nándāha. Chi núu ni ndee de te cahān de, te nune-ni i yéhyí jijnáhan i. ³⁷ Te yōhyo ndetū mozo un núu ni ndee patrón i, te cuni de jeē cándito i. Jendaá cahán rī jíin ró jeē maá patrón sátūhva de máá de, te scúcōo de i mesa te cani de cohō i. ³⁸ Te vēsú cucuéé de ndee de nde sava ñuú, chí jēē néē gā, te núu cuni de jeē súcuan cándito mozo de, te yōhyo ndetū i jijnáhan i núu súcuan. ³⁹ Te na jécūhun ni rō jeē cahán jnūhun yátá yáha: Tēe chíi vehe, núu ni jini de na hora quiji ñacuñhá, te condito de, te ma cuáha de jnūhun jeē sacuíhá vehe de núu. ⁴⁰ Te suni súcuan coo tūhva ró jijnáhan ró, chí núu tuú, te máá hora jeē tú na vé cá-jeni ni rō, te ndee ruhū, Yaā ní nduu tēe. Achí yá jíin de.

Jnūhun mozo vāha jíin mozo tu squícu

(Mt. 24.45-51)

⁴¹ Yūcuán na te Pedro ni cajnūhún de ya:

¿A jíin máá-ni ná jijnáhan ná cáhán ni jnūhun yátá yáha, chí suni cáhán ni jíin ndih̄i ga ñayuu? achí de.

⁴² Te ni cahān maá Jitoho yō:

Cáhán rī jíin ndé-ni ñayuu cúu nájnūhun mozo jeē ndíto xinī te squícu vāha. Te máá patrón sáva de jeē condiso jniñu i coto i ñayuu vehe de, návāha scáji i máá hora. ⁴³ Te yōhyo ndetū mozo un jēē núu ni ndee patrón, te cuni de jeē súcuan squícu vāha i. ⁴⁴ Jendaá cahán rī jíin ró jeē cani de mozo un jēē cóto i ndih̄i ndajniñu de. ⁴⁵ Te núu jéni ni i jeē ma ndíji yachī patrón i, te quejéé i cani i tēe jíin ñahan cácuu jnāhan mozo i,

te caji i coho i te najĩni i, ⁴⁶ nũ sũcuan te ndee-ni patrón quivĩ jeẽ tu ndetu i jĩn hora jeẽ tú na vé jeni ni i. Te stóho xeẽn de i, te squĩvi de i ndoho i jĩn ñayuu tu cásquĩcu.

⁴⁷ Te mozo jeẽ jini i ndese nújnahan ni patrón i, te nũ tu sátũhva i ni tu squĩcu i jeẽ cuní de, ndoho xeẽn i jĩn yujnu xĩi. ⁴⁸ Te mozo jeẽ tu jini i ndese nújnahan ni patrón i, te nũ sáha i jniũ jeẽ cani de i, nũ sũcuan te cũhva-ni cani de i. Chi ñayuu jeẽ steén cuehẽ yã nuũ i, suni cuehẽ nandacãn yã nuũ i. Te ñayuu jeẽ cuehẽ gã jniũ téjniũ ya i, suni cuehẽ gã nandacãn yã nuũ i.

Jeẽ siquĩ Jesús te cusĩn ini ñayuu

(Mt. 10.34-36)

⁴⁹ Ni quee rĩ jeẽ nájnuhun jeẽ scuiquĩn rĩ ñuhũn ini ñayĩví, te suu cúu jeẽ cusĩn ini ñayuu jeẽ siquĩ ruhũ. Te cuní rĩ jeẽ yachĩ coo sũcuan, návãha quĩvicoo ñayuu ndaha Yaã Dios. ⁵⁰ Te íyó ñn jnũndóho cánuú ndoho ri, te cúcuíhyá ndasĩ ni rĩ chi nde jĩnu ndoho ri, te ndusĩ ni rĩ. ⁵¹ ¿A cájeni ni rĩ jeẽ véji ri jeẽ cóyũcu mánĩ ñayuu ñayĩví? Cáhán rĩ jĩn ró jeẽ tuú, chi sa suhva jeẽ cusĩn ini ñayuu jeẽ siquĩ ruhũ. ⁵² Chi nde vijna te quejéé jéẽ uhũn ñayuu ñn vehe, sásĩn máá jijnáhan, unĩ siquĩ uú, te uũ siquĩ unĩ. ⁵³ Chi tátá cusĩn ini jĩn séhe yĩ, te séhe yĩ jĩn tátá, te náná jĩn séhe síhĩ, te séhe síhĩ jĩn náná, te náná chíso jĩn séhe jẽnú, te séhe jẽnu jĩn náná chíso. Achí yá.

Jeẽ ni cáhã yã siquĩ seña andivĩ

(Mt. 16.1-4; Mr. 8.11-13)

⁵⁴ Te suni ni cáhã yã jĩn ñayuu cuehẽ ún: Nũu cájito ró jeẽ náne vicõ ichi núu cáne niãndii, te cácahã rĩ jeẽ cuun saũ, te sũcuan cúu. ⁵⁵ Te nũu quéẽ tachĩ véji ichi sur te cácahã rĩ jeẽ nandii, te sũcuan cúu. ⁵⁶ Tẽe stáhũ-ni cácuu ró. Chi cájecũhun ni rĩ ndese stéén seña andivĩ jĩn ini ñayĩví, ¿te naun tu cá-jecũhun ni rĩ ndé ñn cúu ruhũ jeẽ sáha ri táca jniũ jéhnũ tiempo yáha?

Jeẽ cóndihvĩ ni yõ jeẽ ma cóndee cuẽchi siquĩ yõ

(Mt. 5.25-26)

⁵⁷ ¿Te najehẽ tu cánacani ni maá ró ndé ñn cúu jniũ ndaã sáha ró? ⁵⁸ Te nũu ñn ñayuu quihĩn i jĩn ró nuũ tohó jeẽ cacán i cuẽchi siquĩ rĩ, nũu sũcuan te níni cuáhã rĩ jĩn i ichi te condihvĩ ni rĩ sãndaã rĩ jĩn i. Chi nũu tuú, te squĩvi i róhó núu juez, te juez síaha de róhó núu policía, te policía chune de róhó vecãa. ⁵⁹ Te jendaá cahã rĩ jĩn ró jeẽ ma quẽnda cuiti rĩ yũcuán chi nde chunaa rĩ ndihĩ cuiti xũhun cájicãn de. Te suni sũcuan condihvĩ ni rĩ cáhã ndahú ró jĩn Yaã Dios, návãha ma ndácunehen ya cuẽchi siquĩ rĩ. Achí yá jĩn de.

Jeẽ cánuú nacani ni yõ jeẽ stóo yó cuẽchi yó

13 Te ñn quivĩ yũcuan ní quecoo jecu tẽe, ni canacani de jnũhun nuũ yã ndese ni candoho jecu tẽe Galilea. Chi ná cájehni de quitĩ jeẽ socó de, te ni quecoo mozo Pilato ni cajehni tẽe ún. ² Te ni cahã Jesús:

Tẽe Galilea un, ¿á cájeni ni rĩ jeẽ sũcuan ni candoho de siquĩ jeẽ xeẽn gã ni ñyo cuẽchi de vêsú táca gã ñayuu Galilea? ³ Cáhán rĩ jĩn ró jeẽ tuú. Te róhó jijnáhan ró suni jnahnũ ndetũ rĩ nũu tú nacani ni rĩ jeẽ stóo ró cuẽchi ró. ⁴ Te xahũn unĩ tẽe jeẽ ní cotúú torre Siloẽ siquĩ de, te ni cajihĩ de, ¿á cájeni ni rĩ jeẽ ní casáha de cuẽchi xeẽn gã vêsú táca gã ñayuu ñnu Jerusalén? ⁵ Cáhán rĩ jĩn ró jeẽ tuú. Te máá ró jijnáhan ró, suni jnahnũ ndetũ rĩ nũu tú nacani ni rĩ jeẽ stóo ró cuẽchi ró.

Jnũhun yátá núndẽhe higo

⁶ Yũcuán na te ni cahã yã jnũhun yátá yáha jéẽ steén yã ndese cácuu ñayuu tu squĩcu jnũhun Yaã Dios:

Cácuu i nájnuhun ñn nundẽhe higo jeẽ ñn nuũ ñũhun ñn tẽe. Te ni jecondẽhé de núu ñn ndehẽ xinĩ, te tú na vé ñn. ⁷ Te ni cahã de jĩn mozo sájniũ nuũ ñũhun de: Vijna te je íyó únĩ cuiyã jeẽ quĩji ri nducú rĩ ndehẽ xinĩ yujnu higo yáha, te tú na vé cúun xinĩ. Nũu sũcuan te cahnde rĩ, chi máá jéẽ sajnẽũ nuũ ñũhun, áchĩ de. ⁸ Te ni cahã mozo un jĩn de: Stóo ní na cuiñĩ ñn na cuiyã, te na nástáyã ná jéhẽ te chuhun ná jéhen. ⁹ Te na cóndẽhe yó núu tú cuun ndehẽ ñnga cuiyã. Te núu tuú, te tahndẽ, achí mozo. Achí yá.

Jeẽ ní nasávãha ya ñn ñahan quivĩ ndétátú

¹⁰ Te ñn quivĩ ndétátú te stéén Jesús jnũhun ini vehe ñĩ sinagoga. ¹¹ Te íyó ñn ñahan jeẽ ní cuu xahũn unĩ cuiyã huhũ ña. Chi ñn tachĩ ni sáha jeẽ jíca tĩhĩ ña, te tuá cúu cuiti caca jnuu ña. ¹² Te ni jito Jesús nuũ ña, te ni cana ya ña, te ni cahã yã jĩn ña:

Vijna te nduvãha ní jéẽ huhũ ni.

¹³ Te ni soó yá ndaha ya siquĩ ña, te ni nucuiñĩ jnuu-ni ña, te ni nacuatáhú ña nuũ Yaã Dios. ¹⁴ Te tẽe cújẽhnu ini vehe ñĩ sinagoga, ni quitĩ ni de nuũ Jesús jeẽ ní nasávãha ya ñahan un quivĩ ndétátú. Te ni cahã de jĩn ñayuu:

Ñũ quivĩ iyó jéẽ sájniũ yó, te táca quivĩ ún quijicoo ró nduvãha ró. Te quivĩ ndétátú chi ma cúu, áchĩ de.

¹⁵ Yũcuán na te ni cahã máá Jítóho yõ jĩn de:

Tẽe stáhũ-ni cácuu ró. Quivĩ ndétátu ¿á tu cándajĩ ró stiquĩ rĩ burro ró jéẽ quíscóho ró tĩ ndute? ¹⁶ Te ñahan yáha jéẽ cúu ña ñn séhe yucũn Abraham, chi nájnuhun ni conuhñĩ ña xahũn unĩ cuiyã ni sáha Satanás. ¿Te á tu íyó váha jeẽ nájnuhun nandajĩ rĩ ña nuũ cuehyĩ ndóho ña quivĩ ndétátú? Achí yá.

¹⁷ Te jeē ni cáhān yā súcuan, te tāca tēe cájito uhū de ya, ni cacucanu de. Te ndihī ñayuu ún chi ni cacusiñ ni i jito i tācá jniñu jéhu sáha ya.

Jnūhun yátá síquī ndiquin mostaza

(Mt. 13.31-32; Mr. 4.30-32)

¹⁸ Te ni cahān yā:

Na cáhān rī ñn jnūhun yátá návāha cuni rō ndese ndúcuehē ñayuu ndácu Yaā Dios jniñu nuū. ¹⁹ Ndúcuehē i nájnūhun jéhu ñn ndiquin mostaza jeē jéquin ñn tēe nuū ñūhun de, te ndúu nájnūhun ñn yujnu. Te cúu cáhnu, te tācá saa chi cásáha tī tacā tē chīji ndaha ún. Achí yá.

Jnūhun yátá síquī levadura

(Mt. 13.33)

²⁰ Te ni cahān tucu ya:

Súcuan cúu jeē ndúcuehē ñayuu jeē ndácu Yaā Dios jniñu nuū: ²¹ Cúu nájnūhun levadura jeē ní quihin ñn ñahan, te ni saca ña jíin únī kilo harina, te ni ndaa ndihī ñujen ni sáha. Achí yá.

Síquī jeē quívī yó yéhyí túū

(Mt. 7.13-14, 21-23)

²² Te jíca Jesús jeē cuahán yā ichi ñúū Jerusalén, te yáha ya tācá ñuu náhnu jíin ñuu lulí, te steén yā jnūhun. ²³ Te ñn ñayuu ni cajnūhún i ya:

¿A jecu-ni ñayuu jnama Yaā Dios, chí naún? Achí i.

Te ni cahān yā jíin i:

²⁴ Condihvī ni rō quívīcoo ró ndaha Yaā Dios. Chi cúu nájnūhun ñn yéhyí túū. Te cáhān rī jíin ró jeē ñn quívī te cuehē ñayuu nducú i quívīcoo i, te ma cúu ga. ²⁵ Te quívī ún te sáha ri nájnūhun ñn tēe chí vehe jeē ndocuññ de te nacasi de yéhyí. Te ichi yátá vehe cuiññ ró jíjnáhan ró, te scáján ró yehyí, te cahān rō: Nune ní yéhyí na quívīcoo ná. Te cahān de jíin ró: ¿Ndé nuū véjicoo ró? Chi tu jíin rī rohó, achi de. ²⁶ Yūcuán na te quejéé ró cahān rō jíin de: Ni cayejí ná ni cajihí ná jíin ní, te ini calle ñuu na ní steén ni jnūhun, achi rō. ²⁷ Te cahān maá de: Cáhān rī jíin ró jeē tu jíin rī rohó ndé chí véjicoo ró. Cuijiyo quingoo ró, chí ñayuu casáha jniñu néé cácuu ró. Achi de. ²⁸ Te quívīcoo ró núū ndahyú rō, te nacayñhí yuhu ró jéē ndoho xeēn rō. Te coto ró núū Abraham jíin Isaac jíin Jacob jíin ndihī tēe ni canacani jnūhun Yaā Dios, cáyūcú de ñuu nuū ndácu ya jniñu. Te rohó, vésú cácuu ró yúcūn de, te quívīcoo ró núū ndoho ró. ²⁹ Te cuehē ñayuu, vésú tu cácuu i yucūn de, te quijicoo i ichi núū cáne niāndii jíin ichi núū quée niāndii, ichi norte jíin ichi sur. Te cucōo i mesa caji i staā ñuu nuū ndácu Yaā Dios jniñu. ³⁰ Te sava ñayuu jeē vijna cácuu i sandñhí, ichi yúcuan nduu i nuū. Te sava ñayuu jeē vijna cácuu i nuū, ichi yúcuan nduu i sandñhí. Achí yá.

Jeē ní cucuíhyá ni yā síquī ñayuu ñuu Jerusalén

(Mt. 23.37-39)

³¹ Te máa quívī un ní quecoo jecu tēe fariseo, te ni cacahān de jíin yá:

Cuijiyo ní quíhīn ní ñnga lado, chí cúni Herodes cahni de níhīn, áchí de.

³² Te ni cahān yā:

Cuángoo te castūhun ró nuū tēe mañoso un jéē ná tu jinū quívī cuu rī, chí vijna jíin sájnē quenehen rī tachī ini ñayuu, te nasávāha ri ñayuu cácuu. Te isá te jíin jniñu sáha ri, achi rō. ³³ Chí cánuú jéē cáca ri quíhīn rī vijna jíin sájnē jíin isá, te jinū rī Jerusalén. Chí tēe cánacani jnūhun Yaā Dios, tu cájihī de ñnga lado, chí máa-ni ini ñuu Jerusalén cájehni i de. Achí yá.

³⁴ 'Rohó ñuu Jerusalén, jéhu rō tēe cánacani jnūhun Yaā Dios, te jéhe ró yúū xinī tēe tájī Yaā Dios véjicoo nuū rō. Te cuehē jíin ni cuni rī nastútú rí sēhe ró, nájnūhun ndují jéē nastútú tē sēhe tī chīji ndijēn tē, te tu ní cúni rō. ³⁵ Núu súcuan te vijna te stóo uun na ri rohó jíin sēhe ró. Te cáhān rī jíin ró jéē ndé vijna te ma coto cuítī gā rō nuū rī, chí nde quiji quívī jeē cahān sēhe ró: Yōhyo vāha Yaā cúu Yaā véndiji jíin jniñu máa jítoho yō Yaā Dios, achi i. Achí yá.

Jeē ní nasávāha ya ñn tēe cúhú cuehyí cuiñi

14 Te ñn quívī ndétātu ní jehēn yā vehe ñn tēe fariseo cujéhu, ni jecaji yā staā jíin de. Te tāca gá tēe fariseo cájito yuhu de ya núu stívi yá. ² Te yúcuan íne ñn tēe cúhú de cuehyí cuiñi, índichi de nuū yā. ³ Te ni cajnūhun yá tēe cástéén tutu ley Yaā Dios jíin táca tēe fariseo:

¿A íyó ley jeē nasávāha ri ñayuu cácuu quívī ndétātu, chí tuú? áchí yá.

⁴ Te máa de tu ní cacahān cuítī de. Te ni jniñ ya tēe cúhú un, te ni nasávāha ya de, te ni cahān yā jeē na núhun de vehe de. ⁵ Te ni cahān yā jíin de jíjnáhan de:

¿Ndé ñn rohó núu burro ró chí stíquī rō ñngava tī ini pozo, te á tu yachī natava rō tē vésú quívī ndétātu cúu, chí naún? Achí yá.

⁶ Te tu ní cúu stío cuíñi de ni ñn jnūhun nuū yā jeē súcuan ni cahān yā.

Jnūhun síquī ñayuu jéngoo vico

⁷ Te ni jito Jesús jeē tēe ni cataca ún, cánacāji de silla yíñhún gá nuū mesa cucōo de. Te ni cahān yā jnūhun yáha jíin de:

⁸ Núu ñn tēe cana de jeē quihín rō ñn vico nándāha, te ma cucōo ró lugar nuū yíñhún gá. Chí núu súcuan te sanaa te je ni cana de ñn tēe cújéhu ga vésú rohó. ⁹ Te quee tēe ni cana rohó, te cahān de jíin ró: Ndonga, te na cucōo tēe yáha jíñā. Yūcuán na te cucanu rō jeē quihín rō cucōo ró ndé sandñhí na. ¹⁰ Chí sa suhva núu ni cana ñn tēe rohó, te cucōo ró ndé lugar sandñhí na. Te núu quee tēe ni cana rohó, te cahān de jíin ró: Ami-

go, nehen cucōo ró ñn lugar nuū yĩñúhún gá, achi de. Yūcuán na te ñayuu cáyūcu mesa jíin ró coto i jeē sajhēnu de róhó. ¹¹ Súcuan ni cahān rī jnūhun yáha návāha cuni rō jeē tāca ñáyuu jeē sajhēnu i máá i, nuu i sáha Yaā Dios. Te ñayuu jeē snūū i máá i, ndujēnu i sáha ya. Achí yá.

¹² Te suni ni cahān yā jíin tēe ni cana ya yéji yā staā:

Núu sáha ró ñn vico cúsámá chí jēē cuxíni, te ma cána ró ñáyuu cácuu amigo rō, jíin ñani rō, jíin jnāhan ró, jíin ñáyuu cucá. Chi núu súcuan te suni máá i nacana i róhó, te súcuan nanihīn rō jeē ni jéhe ró. ¹³ Chi sa suhva núu sáha ró vico, te cana ró ñáyuu ndahú, ñayuu cuhndú, ñayuu chacuá, jíin ñáyuu cuaá. ¹⁴ Te súcuan te quendōo ndetū rō, chí ma cúu nacuāha i nuū rō. Te ni hīn rō tahū rō quivī nátecu ñayuu ndaā, achí yá.

Jnūhun yátá síquī vico cúxíni

¹⁵ Te ñn tēe yéji staā jíin yá, ni jini de jnūhun yáha, te ni cahān de jíin yá:

Yōhyo ndetū ñayuu jeē cáji staā nde ñuu nuū ndácu Yaā Dios jniñu, áchí de.

¹⁶ Yūcuán na te ni cahān Jesús ñn jnūhun yátá jēē steén yā jeē cána Yaā Dios ñayuu quivīcoo i ñuu nuū ndácu ya jniñu:

Ñn tēe ni sáha de ñn vico cáhnu cuxíni, te ni tají de mozo ni cana cuehē ñayuu. ¹⁷ Te máá quivī cuxíni, te ni tají de mozo de cuacana ñayuu jeē quijicoo caji staā: Nehen ní jijnáhan ní, chí je iyó túhva ndihí, áchí mozo.

¹⁸ Te ndihí i ni cacahān i jeē na cóne cáhnu ni de chí ma quíngoo i. ñn tēe ni cahān de: Sáá ní jeen ri ñn ñuhun te cánuú quícondēhe rí, te na cóne cáhnu ni de chí ma jeé rī. Achí de. ¹⁹ Te inga de ni cahān: Ni jeen ri uhūn yunta stiquī, te quihīn rī coto ndee rī tē, te na cóne cáhnu ni de nuū rī chí ma jeé rī, achí de. ²⁰ Te inga de ni cahān de: Sáá ní quijnáhan ri, te jeē yúcuan ma cúu jeé rī, achí de. ²¹ Te cuanuhun mozo un, te ni castūhún de nuū patrón de ndese ni cacahān ñayuu. Yūcuán na te ni quitī ni patrón, te ni cahān de jíin mozo de: Yachī quihīn rō tāca calle náhnu jíin calle lulí, te cana ró ñáyuu ndahú, ñayuu cuhndú, ñayuu chacuá, jíin ñáyuu cuaá, na quijicoo i vico, áchí de. ²² Te ni jehēn mozo, te ni ndee de, te ni cahān de jíin patrón de: Je ni sáha ná jēē ni cáhān ní, te cúmanī gā ñayuu te chitú vehe ní, áchí de. ²³ Te ni cahān tucu patrón: Quihīn tucu ró táca calle jíin ichi, te cana fuerza rō ñayuu na quijicoo i, návāha chitú vehe ri. ²⁴ Chi cáhān rī jíin ró jeē ní ñn tēe ni cana ri xīhna ñúhún, ma cuáha cuiṭi rī jnūhun jeē cuxíni de vehe ri, achí de. Achí yá.

Jnūhun jeē cánuú nacani vāha ni yō te condiquīn yō Cristo

²⁵ Te cuehē ndasí ñáyuu cándiquīn i Jesús cuango o i jíin yá, te ni ndió cóto ya nuū i, te ni cahān yā jíin i:

²⁶ Núu na-ni ñayuu cuní condiquīn ruhū, te núu manī gā i jíin tátá i, náná i, ñasihí i, sēhe i, ñani i, cuāha i,

vēsú jíin rúhū, ma cúu cuu i ñayuu scuáha jíin rí. Te núu ndíhvī gā ni i síquī jeē cóo vāha máá i vēsú jeē cóndiquīn i ruhū, te suni ma cúu tucu. ²⁷ Te na-ni ñayuu núu tu jéhe i jnūhun ndoho i jnūndóho vēsú nde cuu i jeē síquī jeē cóndiquīn i ruhū, te ma cúu cuu i ñayuu scuáha jíin rí. ²⁸ Chi núu ndé ñn ró cuní rō sáha ró ñn vehe cáhnu, ¿á tu cánuú jēē xīhna gā cucōo ró te tava rō cuenta núu canda xūhun jēē sínu ró? ²⁹ Chi núu tuú, te núu je ni jequin rō cimientu, te tu cánda xūhun ró sínu ró, yūcuán na te tāca ñáyuu sácatā i coto i róhó. ³⁰ Te cahān i: Tēe yáha ní quejéé de sáha de vehe, te tu ní cánda de sínu de, achi i. ³¹ Te suni súcuan núu ñn rey quihīn de cuajnáhan de jíin inga rey jeē véji síquī de, ¿á tu cánuú jēē xīhna gā cucōo de te nacani ni de núu canda uxī mil soldado jeē cuajnáhan de jíin inga rey jeē véji síquī de jíin ócō mil soldado? ³² Chi núu tú canda de, te níni jíca gá vēji inga rey, te tají de tēe cándiso jniñu, cajnūhún de na vé cuní inga rey jeē cuáha de nuū, te jecuiñī-ni. ³³ Te máá ró jijnáhan ró, suni súcuan cánuú jēē xīhna gā nacani ni rō cahnde ni rō stóo ró ndihí jeē névāha ró, chí núu tuú te ma cúu cuu ró ñáyuu scuáha jíin rí.

Jnūhun yátá síquī ññ

(Mt. 5.13; Mr. 9.50)

³⁴ Te ñayuu cácañdije cácuu i nájñūhun ññ. Vāha iyó ññ, te núu ññ ún na náā jeē uhvuá, ¿te ndese nduu uhvuā tucu? ³⁵ Tuá cuajniñu cuiṭi, ni jeē chúhun ñayuu nuū ítu, ni jeē ndúu jēhen, chí máá cate iñi i. Tāca róhó jēē jíni sōho, na chúsohó ró. Achí yá.

Jnūhun yátá síquī lanchi ní sana

(Mt. 18.10-14)

15 Te tāca tēe cástútú xūhun renta jíin táca gá tēe cásaha cuēchi, ni quecoo de nuū Jesús jeē cuni sōho de jnūhun cáhān yā. ² Te tāca tēe grupo fariseo jíin tēe cástéén tutu ley Yaā Dios, ni cacahān de síquī yā:

Tēe yáha jétáhú de tāca tēe cásaha cuēchi te yéji de jíin, áchí de.

³ Te ni cahān yā jnūhun yátá yáha jíin de:

⁴ ¿Ndé ñn ró núu névāha ró ñn ciento lanchi, te núu scuíta ró ñn tē, te á tu stóo ró cúñ xico xahūn cuñ gā tē yucu, te quinanducú ró quitī ní sana ún ndé nanihīn rō tē? ⁵ Te núu ni nanihīn rō tē, te coso sūcun ró tē, te cusīñ ni rō. ⁶ Te núu ni ndee rō vehe ró, te nastútú ró táca amigo rō jíin ñáyuu yúcu jajni jíin ró, te cahān rō jíin i: Na cúsiñ ni yō, chí ni nanihīn rī lanchi ri jeē ní sana. Achi rō. ⁷ Te cáhān rī jíin ró jeē suni súcuan cúu nde andiví. Chi cúsiñ gā ni yā jíin ñn ñayuu iyó cuéchi núu nacani ni i jeē stóo i cuéchi i, vēsú jíin cúñ xico xahūn cuñ ñayuu iyó ndaā jeē tuá jíni ñúhún nacani ni i.

Jnūhun yátá sáquē ñahan ní scuíta xūhún

⁸Te núu ñn ñahan névāha ña uxī peso cāa, te núu scuíta ña ñn, ¿á tu nastáin ña lámpara te nastāa ña vehe, te nanducú yúcún ña nde nanihín ña? ⁹Te núu ni nanihín ña, te nastútú ña tēcá amiga ña jíin ñáyuu yúcu yajni jíin ña, te cahān ña jíin i: Na cúsiñ ni yō, chi ni nanihín rī xūhun jēē ni scuíta ri. Achí ña. ¹⁰Te cáhán rī jíin ró jeē suni súcuan cúsiñ ni tēcá ndajéhé Yaā Dios síquē ñn ñayuu iyó cuéchi núu nacani ni i jeē stóo i cuéchi i. Achí yá.

Jnūhun yátá sáquē sūchi ní jéhēn jecó

¹¹Te ni cahān gā yā: ñn tēe ni iyo uū sēhe yí de. ¹²Te tēe suchí gá ni cahān i jíin tátá i: Tátā, tahú sáva ní ndajníñu ní, te cuāha ní sava cuu tahū ná, áchí i. Te ni tahú sáva de tahū ndindúú i. ¹³Te ni cuu jecu-ni quivī, te tēe suchí gá un ní stutú ndihí i ndajníñu i. Te ni quenda i cuahān i ñn ñuu jicá. Te yūcuan ní snāa i tahū i, chi ni jexīn cāhá i. ¹⁴Te ná ni ndihí ni jexīn i, te ni quee ñn jnamā xeén ini ñuu ún, te ni quejéé cúmanī jeē caji i. ¹⁵Yūcuán na te cuanducú jníñu i nuū ñn tēe ñuu ún. Te ni tají de i cuahān i rancho de jeē cóto i quivī de. ¹⁶Te cúni i caji i vēsú soō ndúchi jeē cáyeji quivī ún, návāha ndutú chíji i. Te ni ñn ñayuu tú na vé jéhe nuū i. ¹⁷Yūcuán na te ni quejéé i nácani ni i: Tāca mozo casájniñu vehe tátá rī, íyó cuéhē staā cáyeji i. Te ruhū chi jíi rī sóco yāhá. ¹⁸Na quínuhun rī nuū tátá rī, te cahān rī jíin de: Tátā, ni sáva ná cuéchi nuū Yaā Dios jíin núu maá ní. ¹⁹Vijna te nasūu gá tēe vāha cúu ná jēē cónaní ná sēhe ní. Te cuāha ní jnúhun cuu ná nájnūhun ñn mozo ni, achi rī. ²⁰Yūcuán na te ni naquihin i ichi cuanuhun i vehe tátá i. ²¹Te níni jícá gá vēji i, te ni jito tátá i nuū i, te ni cundáhú ni de i. Te jínu de cuajnahān de i, te ni nundee de sucūn i, te ni techūhú de i. ²²Yūcuán na te ni cahān i jíin de: Tátā, ni sáva ná cuéchi nuū Yaā Dios jíin núu maá ní. Vijna te nasūu gá tēe vāha cúu ná jēē cónaní ná sēhe ní. Achí i. ²³Te máá tátá i chi sa ni cahān de jíin táca mozo de: Cuáquihin sahma váha ga te chuhun ró i. Te chuhun ró ñn xehyu ndaha i, te chihi ró ndíjēn jehē i. ²⁴Te quiquihin ró becerro xéhen, te cahni rō tē na caji yō, chi sáva yó vico. ²⁵Chi sēhe yí rí yáha, nájnūhun je ni jihí i, te ni natecu i. Chi tu ní jíin rī ndé chi ní jéhēn i, te ni ndee i, áchí de. Te ni caquejéé de casáha de vico. ²⁶Te sūchi jévāha, íne i nde rancho, te vëndiji i, te ni cuyajni i yatā véhe. Te ni jini i jeē cúu yaa te cājita jéhé ñáyuu. ²⁷Te ni cana i ñn mozo, te ni cajnūhún i na vé cúu jeē cúu. ²⁸Te ni cachi mozo un núu i: Ni ndee ñani rō, te tátá rō ni jehni de becerro xéhen, chi ni ndee vāha i nuū de, áchí mozo. ²⁹Yūcuán na te ni quitī ni sūchi jévāha, te tu ní cúni i ndívi i. Te ni quenda tátá i, te ni cahān ndahú de jíin i jeē na ndívi i. ³⁰Te ni cahān i

jíin tátá i: Níni sáva ná jniñu ndácu ní, te tu cúnihni cuítī ni na núu ní. Te tu jéhe ní vēsú ñn lítú núu ná, jeē sáva ná vico caji na jíin táca amigo na. ³¹Te ni ndee sēhe ní yáha jeē ni jéxīn cāhá i xūhun ní jíin táca ñahan. Te ni jehni ní becerro xéhen caji i, áchí i jíin tátá i. ³²Yūcuán na te ni cahān de jíin i: Séhē, róhó chi níni ndéé ró jíin rí, te ndihí jeē névāha ri chi suni cuenta maá ró cúu. ³³Te vijna chi íyó váha jeē sáva yó vico te cusíñ ni yō. Chi ñani rō yāhá, nájnūhun ni jihí i, te ni natecu i. Chi tu ní jíin yō ndé chi ní jéhēn i, te ni ndee i, áchí de. Achí yá.

Jnūhun yátá sáquē mozo jeē ni stáhú de patrón de

16 Te suni ni cahān Jesús jíin tēe cáscuáha jíin yá: ñn tēe cúca ní iyo ñn mozo de jeē ndíso jniñu nuū táca gá mozo. Te ni cacahān jíin patrón un jēē mozo un snāa cāhá ndajníñu de. ²Te ni cana de mozo un, te ni cahān de jíin: ¿Na jnūhun cúu yáha jēē nihín rī síquē rō? Nacuāha cuenta jniñu ndíso ró, chi ma cóndiso jniñu ga rō nuū mozo rī. Achí de. ³Yūcuán na te jéni ni maá de: ¿Ndese sáva ri vijna? Chi patrón rī quenehen de jniñu ri. Te tú ndacuī rī jeē cáte ri ñuhun, te jeē cacán rī caridad chi cúcanu rī. ⁴Núu súcuan te jíin rī ñn jeē sáva ri, návāha ñayuu cájeen nuū patrón rī, cuāha i vehe condee rī núu na quée quivī jeē quenehen de jniñu ri. ⁵Te ni cana de ná ñn ná ñn tēe jeē cátaū nuū patrón de. Te ni cajnūhún de ñn: ¿Nasaa táu rō nuū patrón rī? ⁶Te ni cahān tēe ún: ñn ciento barril aceite, achí de. Te ni cahān mozo un: Yāhá na cuáha ri lista rō, te cucōo yachí rō, te na sáva ró inga lista jeē uú xico uxī na, achí de. ⁷Yūcuán na te ni cajnūhún de inga tēe: Te róhó, ¿nasaa táu rō? Te tēe un ní cahān de: ñn ciento cajón trigo, achí de. Te ni cahān de jíin tēe ún: Yāhá na cuáha ri lista rō, te na sáva ró inga lista jeē cuún xico na, achí de. ⁸Yūcuán na te patrón ni cahān de: Nacā jeē ndichí ní sáva tēe cúnéé un, áchí de. Te cáhán rī jíin ró jeē ñáyuu ñayīvi yáha, ndichí gá casáha i jeē quendōo vāha i nuū jnáhan i, vēsú ñayuu cácadí-je nuū Yaā Dios. ⁹Núu súcuan te cáhán rī jíin ró jeē ndichí gá na sáva ró vēsú jeē ni sáva mozo ndichí un. Chi ini ñayīvi yáha nuū yíñi cuéchi, na sáva ró jniñu váha jíin xūhun ró, cuāha ró núu ñáyuu ndahú, návāha vēsú núu ni ndihí xūhun ró ñayīvi yáha, te quivīcoo ró andívi núu coo vehe ró ní cání. ¹⁰Tēe jeē squícu vāha jíin ñn jniñu lúli-ni, suni squícu vāha de jíin jniñu cáhnu. Te tēe jeē stáhú jíin ñn jniñu lúli-ni, suni stáhú de jíin jniñu cáhnu. ¹¹Núu súcuan te núu tu squícu vāha ró jíin xūhun jeē iyó ñayīvi yáha nuū yíñi cuéchi, te ma cuáha ya jeē váha cuu ró ní cání andívi. ¹²Te núu tu squícu vāha ró jíin ndajníñu jeē ni jéhe núu ya nuū rō ñayīvi yáha, te ma cuáha ya tahū cuu ró ní cání. ¹³Ni ñn mozo ma cúu cuajníñu de nuū uū patrón. Chi quitī ni de nuū ñn te coo manī de jíin inga, chí

squícu vāha de nuū ñin te sájéē ni de nuū inga. Te suni súcuan ma cúu cuajníñu ró núū Yaā Dios te núu máni síquī xúhun ndíhvī ni rō, achí yá.

¹⁴ Te tēe fariseo ni casácatā de nuū yā jeē ní cajini de tāca jnúhun cáhán yā, chi tēe cútóó xúhun cácuu de.

¹⁵ Te ni cahān yā jíin de:

Máá ró casáha ró jeē tēe ndaā cácuu ró núū ñáyuu. Te Yaā Dios chi jíini yā ndese cáa ini anuá rō. Chi jniñu cájeni ni ñayuu jeē jniñu jéhnú cúu, te nuū Yaā Dios chi jniñu néé cúu.

Síquī ley Yaā Dios jíin síquī jeē ndácu ya jniñu

¹⁶ Nde ná tu quiji Juan tēe scuándute, te ni ñyo ley jeē ni jéhe Yaā Dios nuū Moisés, te suni ni castéén tāca tēe cánacani jnúhun ya. Yūcuán na te ná ni quiji Juan, te ni quejéé jítē núu jnúhun vāha ndese ndácu Yaā Dios jniñu. Te tāca ñáyuu nducú ndéyí i quívicoo i ndaha ya.

¹⁷ Te yíí gá cúu jeē náá ñin letra nuū tútu ley yā vésú jeē náá andiví jíin ñáyiví, chi squícu ndíhi jnúhun cáhán.

Síquī jeē ma stóo jnáhan tēe jíin ñahan

(Mt. 19.1-12; Mr. 10.1-12)

¹⁸ Núu ñin tēe stóo de ñasihí de te quijnáhan de jíin inga ñahan, núu súcuan te casíquí ndéē de ña. Te núu ñin tēe condeca de ñahan ní ndusñin, suni casíquí ndéē de ña, achí yá.

Jnúhun tēe cúcá jíin Lázaro

¹⁹ Te ni cahān gā yā:

Ni ñyo ñin tēe cúcá, ní ñuhun de sahma lúu vāha ndasí. Te ndíquivī ni ñyo vāha ndasí jéē ní yeji de. ²⁰ Te suni ni ñyo ñin tēe ndáhú, nání de Lázaro, néne de yéhyí tēe cúcá un, te ñíí cáhnu de ñin ndíhyi. ²¹ Te máni cúní de jeē ndutú chíji de jíin stáā cuēchi jeē stíví tēe cúcá un. Te quécóo ina te cányuu tí nuū ndíhyi de. ²² Te ni jihí tēe ndáhú un, te tācá ndajéhé Yaā Dios cuangooyá jíin ánuá de nde andiví nuū néne Abraham. Te suni ni jihí tēe cúcá un, te ni quindūji de. ²³ Te tēe cúcá un xeēn ndóho de íne de lugar nuū cáyūcu ndíyí tu ní cándíje. Te ni ndacoto de, te nde jicá ní jito de nuū Abraham, te néne Lázaro jíin de. ²⁴ Yūcuán na te ni cana cóhó de: Tātā Abraham, cundáhú ni ni sáña, te tají ní Lázaro, na quíchundaji de xiní ndáha de nuū ndúte, te quiji de stáji de yáá ná. Chi xeēn ndóho ná núu yáñuhūn yāhá. Achí de. ²⁵ Te ni cahān Abraham jíin de: Séhē, nucūhun ni rō jeē ni níhīn rō ndíhi jeē vāha ná ni cotecu rō, te Lázaro chi sa suhva jnúndóho ni níhīn de. Te vijna je ni ndusí ni de yāhá, te róhó chi ndóho ró jíñā. ²⁶ Te suni íyó ñin jeē cunú téyí, íne mēhñu yó jijnáhan yó. Te ñayuu cáhīn yāhá, vésú cá-cuni i yāha i jeē i nuū rō, te ma cúu. Te ni ma cúu yāha máá ró quijicoo ró yáha. Achí Abraham. ²⁷ Yūcuán na te ni cahān tēe cúcá: Núu súcuan te cáhán ndahú ná jíin

ní, Tātā Abraham, tají ní Lázaro na quíhīn de vehe tātá na. ²⁸ Chi íyó úhūn gā ñani ná, te na quícachi de nuū i jeē na nácani ni i te stóo i cuēchi i, návāha ma quívicoo i nuū ndóho ná yáha, achí de. ²⁹ Te ni cahān Abraham jíin de: Je cánevāha i tutu jeē ní tee Moisés jíin táca tēe ni canacani jnúhun Yaā Dios. Suu yūcuán na chúhun ni i, achí Abraham. ³⁰ Te ni cahān tucu tēe cúcá: Vésú súcuan, Tātā Abraham, te núu ñin ñayuu ni jihí quihīn nuū i, yūcuán na te nacani ni i jeē stóo i cuēchi i, achí de. ³¹ Te ni cahān Abraham jíin de: Núu tu chúhun ni i jnúhun ni nacani Moisés jíin táca tēe ni canacani jnúhun Yaā Dios, suni ma candíje cuítí i núu natecu ñin ndíyí quihīn nuū i, achí de.

Xeēn coo síquī ñáyuu squíví jnáhan nuū cuéchi

(Mt. 18.6-7, 21-22; Mr. 9.42)

17 Te ni cahān Jesús jíin tēe cáscuáha jíin yá: Máni íyó jéē nducú squíví ñayuu nuū cuéchi.

Te nacā xeēn ndoho ñayuu jeē squíví jnáhan nuū cuéchi. ² Vāha ga núu ni conuhñi ñin yōso cáhnu sucūn i te quēe i chíji ndute mar, vésú jeē squíví i ñin sūchi lúlí yáha núu cuéchi. ³ Coto ma sáha ró súcuan jijnáhan ró.

⁴ Te núu jnáhan ró sáha de cuēchi síquī rō, te cahān rō nuū de. Te núu nacani ni de, te cone cáhnu ni rō nuū de. ⁵ Te núu uxā jínu jeē ñin quíví sáha de cuēchi síquī rō, te núu uxā jínu nácani ni de te cahān de jíin rō jeē cone cáhnu ni rō chi ma sáha ga de, te cánuú cone cáhnu ni rō nuū de. Achí yá.

Jeē yóhyo cújéhnú jnúhun cándíje

⁵ Te tēe cácuu apóstol ni cacahān de jíin Jítóho yō:

Sáha ní jéē níhin ga candíje ná jéē sáha Yaā Dios jeē cájicān na núu yā, achí de.

⁶ Te ni cahān maá Jítóho yō jíin de:

Núu cácandíje ró vésú ñin tíhíli-ni, nájnūhun ñin ndíquín mostaza jeē tihíli-ni cáa, te cuu cahān rō jeē nuyūhndu yáha na quénda te nucondichi nde nuū mar, te coo nájnūhun cahān rō.

Jeē cánuú squícu vāha yó núu yā

⁷ Ndé ñin ró íyó mozo rō jeē jítu de chí ndíto de quítí ndéca ró, te núu ni najinū de vehe ró, te tu cáhán rō jíin de jeē cúcōo de caji de staā. ⁸ Chi sa suhva cáhán rō: Sáha ró ndeyu cuxíni ri, te caní ró cóhō rī. Te núu ni cuu ni yeji rī ni jihí ri, yūcuán na te caji maá ró coho ró, cácahān rō. ⁹ Te cácahān rō jeē tu cánuú nacuatáhú ró nuū mozo núu ni sáha de jniñu ní ndacu ró, chi jeē cánuú sáha de cúu. ¹⁰ Te suni súcuan máá ró jijnáhan ró, cácuu ró mozo Yaā Dios. Te núu ni casquícu ró táca jniñu ní ndacu ya nuū rō, te cahān rō: Tu cánuú nacu-atáhú yá nuū rī, chi ni sáha ri máá-ni jeē cánuú sáha ri, achí rō. Achí yá.

Jeē ní nasávāha ya uxī tēe ndóho cuehyē stehyú

¹¹ Te jíca Jesús ichi cuahān yā ñuu Jerusalén, te ni yāha ya cuahān yā mēhñú región Samaria jíin Galilea.

¹² Te ni jinū yā ñn ñuu, te uxī tēe ndóho cuehyē stehyú ni quendacoo de vejnahan de ya, te jíca ní cajecuiñē de. ¹³ Te ni cacana jee de:

Jesús, Maestro, cundáhú ni ni sáña, áchí de jíjnáhan de.

¹⁴ Te ni jito Jesús nuū de, te ni cahān yā jíin de:

Cuángoo te stéén rō maá ró nuū tāca sūtū jeē ní canduvāha ró, áchí yá.

Te níni cuángoo de te ni canduvāha-ni de. ¹⁵ Yūcuán na te ñn-ni de ni nandió cóo de nuū Jesús, te cáhán jee de, nácuatáhú de nuū Yaā Dios jeē ní nduvāha de. ¹⁶ Te ni jecuiñē yitē de nuū yā, te ni jequin de nuū de nde nuū ñúhun, te ni nacuatáhú de nuū yā. Te tēe Samaria cúu de. ¹⁷ Te ni cahān Jesús:

¿A násūú ndihúxí de ni canduvāha? Te ñn gā de, ¿naun tu ní cánandicó de nacuatáhú de? ¹⁸ ¿A máñúhún-ni tēe ñuu jíca yáha cúu jeē ní nandicó de nácuatáhú de nuū Yaā Dios?

¹⁹ Te ni cahān yā jíin tēe ún:

Ndocuiñē quínuhun rō. Chi ni candíje ró jēe cuu nasávāha ri rohó, te jeē yúcuan ní nduvāha ró, áchí yá.

Ndese coo quivē jeē ndíji ya ndacu ya jniñu

(Mt. 24.23-28, 36-41)

²⁰ Te tēe fariseo ni cacajnūhún de Jesús ndé quivē quejéé jēe ndácu Yaā Dios jniñu ini ñayivē. Te ni cahān yā jíin de:

Ma quéē ndijin jeē ndácu Yaā Dios jniñu. ²¹ Ni ma cúu cahān ñayuu: Yāha íne ya ndácu ya jniñu, chí: Yūcuán íne ya, achi i. Chi je ndácu Yaā Dios jniñu mēhñu ró jíjnáhan ró. Achí yá.

²² Yūcuán na te ni cahān yā jíin tēe cáscuáha jíin yá:

Quee tiempo jeē yóhoyo cúu ni rō coto ró jēe ndíji ruhū, Yaā ní nduu tēe, te ma cóto ró jíjnáhan ró. ²³ Te cahān ñayuu jíin ró: Yāha íne ya, chí: Yūcuán íne ya, achi i. Te ma quíngoo ró condēhe ró, ni ma cóndiquin rō i. ²⁴ Chi nájnūhun sáha taja jeē ndíndéé ñn lado andivē te cúndijin nde ñnga lado, suni súcuan cuu quivē ndíji ruhū, Yaā ní nduu tēe, chi ndihí ñayuu coto. ²⁵ Te jíni ñúhún jēe xihna gā ndoho xeēn rī, te ñayuu iyó vijna, squéhichī i ruhū. ²⁶ Chi nájnūhun ni cuu quivē ni íyo Noé, suni súcuan cuu quivē ndíji ruhū, Yaā ní nduu tēe. ²⁷ Chi quivē un ní cayejí i, ni cajihí i, ni canandāha i, ni cajēhe i sēhe sñé i jeē nándāha, nde ni jinū quivē jeē ní quivē Noé ini barco cáhnu jeē naní arca. Te ni cuun saū xeēn, te ni ndaa ndute ni cajihí ndihí i. ²⁸ Te suni súcuan ni cuu quivē ni íyo Lot. Ni cayejí i, ni cajihí i, ni cajeen i, ni caxícó i, ni catajī i itu, ni cajeni i vehe. ²⁹ Te quivē jeē ní quenda Lot ini ñuu Sodoma cuahān de, te ni cuun ñuhūn jíin azufre ichi ándivē, te ni snāā ndihí

ñayuu. ³⁰ Te suni súcuan coo quivē jeē ndíji ruhū, Yaā ní nduu tēe.

³¹ Te quivē ún te ñayuu cáhīn yatā véhe, te ndajníñu i ñúhun ini vehe, cáhán rī jíin i jeē ma ndívi i naquihin i, chí cánuú cunu yachī i jeē cácu i. Te suni súcuan ñayuu casájniñu nuū itu, ma quínuhun i vehe i jeē quíhin i ndajníñu i. ³² Te nucūhun ni rō ndese ni ndoho ñasihé Lot jeē ni jíhī ña. ³³ Te núu ndé ñayuu cuní i cácu i nuū jnúndóho quiji nuū i jeē síquē ruhū, núu súcuan te jnahnū ndetū i ñé cáni. Te núu ndé ñayuu, vēsú na cúu i jeē síquē ruhū, te cotecu i ñé cáni.

³⁴ Te cáhán rī jíin ró jeē quivē ndíji ri te quixí uū tēe ñn jīto jecuáā, te ñn de naquihin ri, te ñnga de ndōo, chí tu ní cándíje de. ³⁵ Te coo uū ñahan jeē ndíco cáhnu, te ñn ña naquihin ri, te ñnga ña ndōo. ³⁶ Te uū tēe sájniñu de nuū itu, te ñn de naquihin ri, te ñnga de ndōo. Achí yá.

³⁷ Te jeē ní cajini de jnūhun yáha, te ni cacajnūhún de ya:

¿Ndé mí coo súcuan nájnūhun ni cahān ní? Achí de.

Te ni cahān yā jíin de:

Nájñūhun jeē cutútú téji ndé-ni cúu nuū catú quiti ní jíhī, suni súcuan coo tāca jēe ni cahān rī ndé-ni cúu-ni nuū cáhīyo ñayuu.

Jnūhun yátá síquē juez jíin ñahan viuda

18 Te ni cahān yā ñn jnūhun yátá jíin de jeē cánuú jeē níni cácan tahu de, te ma ndínuu ni de jíin.

² Te ni cahān yā:

Ni íyo ñn juez ini ñn ñuu. Te ni tu ndíso íyo de nuū Yaā Dios, ni tu yúhú de nuū ní ñn ñayuu. ³ Te suni ñuu un íyó ñn ñahan ní ndóo ndáhú. Te ñahan un jéhén-ni jéhén-ni ña nuū de, jícan ña jeē na sándaā de síquē ñn ñayuu jeē jíto uhū i ña. ⁴ Te cuehē quivē tu ní cúní de sándaā de, te yūcuán na te ni jeni ni de: Vēsú tu ndíso íyo ri nuū Yaā Dios, ni tu yúhú rí nuū ní ñn ñayuu, ⁵ te ñahan viuda yáha, yóhoyo stáhān ña ruhū, te jeē yúcuan na sándaā rī síquē ñayuu jeē jíto uhū i ña. Chi núu tuú, te quejéé rí jnaníní ni rī jeē quiji quíji ña. Achí de. Achí máá Jítoho yō.

⁶ Te ni cahān gā yā:

Súcuan cúu jeē ni cahān juez, tēe tú ndaā. ⁷ Te Yaā Dios, nasūu súcuan cúu ya, chí sándaā yā síquē jniñu ñayuu ní nacāji ya jeē nduú ñuú cácahān ndahú i jíin yá. Chi jnama ya i nuū tāca jēe cájito uhū i. ¿Te á cuéé jnama ya i? ⁸ Cáhán rī jíin ró jeē yachī. Te quivē ndíji ruhū, Yaā ní nduu tēe, ¿á níhīn gā rī ñayuu cácañíje níhīn ini ñayivē? Achí yá.

Jnūhun yátá síquē tēe fariseo jíin tēe stútú xúhun renta

⁹ Te suni ni cahān yā jnūhun yátá yáha jíin jecu ñayuu jeē cájeni ni i jeē ñayuu ndaā cácuu i, te cájeni ni i jeē sava ga ñayuu tu cáhīyo ndaā:

¹⁰ ñn tēe fariseo cuahān de templo jeē cácan tahu de. Te ñn tēe stútú xúhun renta suni cuacacān tahu de

templo. ¹¹ Te tēe fariseo, índichi de, te súcuan ni jicān tahu de: Tātā Yaā Dios, na cútahū na nuū ní, chi tu cúu ná nájñuhun cándāa sava ga tēe, tēe cuíhná, tēe néé, tēe cásiquí ndéē jnáhan cácuu de. Ni tu cúu ná nájñuhun cáa tēe yúcuan jéē stutú xúhun renta jeē scáa ga de jicán de nuū ñayuu. ¹² Te uū jínu jeē semana iyó ndite ni na nuū ní, te jéhe ná nuū ní ññ siquē tāca úxī ndajniñu níhín na, áchí de. ¹³ Te tēe stútú xúhun renta, ni jecuiñī jicá de nuū templo, ni tu ní chúndeyí ni de jeē ndonehen de nuū de, chi sa suhva ni cani de yīquī jicá de jeē cucuíhyá ni de. Te ni cahān de: Tātā Yaā Dios, cundáhú ni ni sáña, chi tēe iyó cuéchi cúu ná, áchí de. ¹⁴ Te cáhán rī jíin ró jeē tēe stútú xúhun renta, ni jetáhú Yaā Dios de, te cuanuhun de vehe de. Te tēe fariseo chi tu ní jétáhú yá de. Chi ñayuu jeē sajhénu i máá i, sa ndululí i. Te ñayuu jeē sálulí i máá i, sa ndujénu i. Achí yá.

Jeē ni jicān tahu Jesús jehē sūchi lúlí

(Mt. 19.13-15; Mr. 10.13-16)

¹⁵ Te ni quecoo ñayuu jíin sūchi lúlí nuū Jesús, jeē na sóo yá ndaha ya xinī i. Te tēe cáscuáha un ní cajini de jeē súcuan cúu, te ni cacahān de nuū ñayuu vējicoo jíin i. ¹⁶ Te máá Jesús ni cana ya de, te ni cahān yā:

Cuāha jñuhun na quíjicoo sūchi lúlí jíñā nuū rī, te ma cási rō jeē quíjicoo i. Chi ñayuu jeē ndió cóo ni i cani ni i nájñuhun sūchi yáha, suu i quívi ndaha Yaā Dios jeē ndacu ya jniñu nuū i. ¹⁷ Te jendaá cahán rī jíin ró, núu ññ ñayuu tú cuatáhú i jeē ndácu Yaā Dios jniñu nuū i, nájñuhun jétáhú ññ sūchi lúlí, ma quívi cuíti i ndaha ya, achí yá.

Jñuhun tēe cúcá

(Mt. 19.16-30; Mr. 10.17-31)

¹⁸ Te ññ tēe cújénu ni cajñuhún de ya:

Tēe vāha cúu ní Maestro. ¿Te na jniñu váha sáha ná te nihín tahu na cotecu na ññ cáni andiví? Achí de.

¹⁹ Te ni cahān Jesús jíin de:

¿Naun cáhán rō jeē tēe vāha cúu ri? Tú ni ññ tēe vāha iyó, chi máá ññ-ni Yaā Dios. ²⁰ Je jíin rō tācá jniñu ní ndacu Yaā Dios: Ma cosíquí ndéē jnáhan ró. Ma cáhni rō ndīyi. Ma sacuíhná ró. Ma sajnúhún ró. Cuatáhú ró nuū tatá rō nuū naná rō. Achí yá.

²¹ Te ni cahān máá de:

Tācá jniñu yáha je ni squícu ná ndé ná lulí ná, achí de.

²² Te Jesús ni jini ya jñuhun yáha, te ni cahān yā jíin de:

Ññ na jniñu cúmanī sáha ró núu súcuan. Xícó ndīhi jeē névāha ró, te cuāha ró nuū ñayuu ndahú. Te nde andiví cuāha ya jeē váha ndasí nuū rō. Yūcuán na te quiji ró condiquín rō ruhū, achí yá.

²³ Te ná ni jini sōho de jñuhun yáha, te yōhyo ni cucuíhyá ni de, chi cúcá ndasí de. ²⁴ Te jíto Jesús jeē súcuan cucuíhyá ni de, te ni cahān yā:

Tēe cúcá chi yōhyo yī quívicoo de ndaha Yaā Dios jeē ndacu ya jniñu nuū de. ²⁵ Yachī gā yāha ññ camello yaū yutícuí vésú jeē quívi ññ ñayuu cucá ndaha Yaā Dios jeē ndacu ya jniñu nuū i, áchí yá.

²⁶ Te tēe ní cajini jñuhun yáha, ní cacahān de:

¿Ndé ñayuu cúu jeē cácu núu súcuan? Achí de.

²⁷ Te ni cahān yā jíin de:

Ñayuu chi ma cúu squívi i máá i ndaha Yaā Dios, te máá yá chi cuu sáha ya, achí yá.

²⁸ Yūcuán na te ni cahān Pedro:

Sāña jíjnáhan ná ní castóo ná ndihí jeē cánevāha ná, te cándiquín na níhín, áchí de.

²⁹ Te máá yá ni cahān yā jíin de:

Jendaá cahán rī jíin ró jíjnáhan ró, núu na-ni ñayuu stóo i vehe, chí tátá, chí ñani, chí ñasihí, chí séhe, jeē siquí jeē scáca i jñuhun jeē ndácu Yaā Dios jniñu nuū ñayuu, ³⁰ núu súcuan te nanihín cuehē gā i ini ñayīvi yáha, te tiempo quiji te cotecu i ññ cáni, áchí yá.

Jeē ni cahān tucu ya jeē cúu yā

(Mt. 20.17-19; Mr. 10.32-34)

³¹ Te ni cana sññ ya ndihúxí uū tēe cáscuáha jíin yá, te ni cahān yā jíin de:

Vijna je cuángoo yó ññu Jerusalén. Te yūcuán squícu ndihí jñuhun ndese ndoho ruhū, Yaā ní nduu tēe, nájñuhun ni catee tēe ni canacani jñuhun Yaā Dios nde jenahán. ³² Chi ñayuu nastúu i ruhū nuū tēe nación Roma jeē cáyūcú Jerusalén cándacu jniñu. Te tēe un sácatā de nuū rī, te cahān neé de nuū rī, te tesīhí de nuū rī. ³³ Te cani de ruhū, te sáa te cahni de ruhū. Te nuū uní quívi te natecu rī. Achí yá.

³⁴ Te máá de tu ní cájecūhun cuíti ni de tāca jñuhun yáha. Chi jñuhun yī cúu, te tu ní cúu jecūhun ni de jeē cahán yā.

Jeē ní nasávāha ya ññ tēe cuáá ññu Jericó

(Mt. 20.29-34; Mr. 10.46-52)

³⁵ Te ni cuyajni ya cuahān yā ññu Jericó. Te ññ tēe cuáá néne de yuhíchi, jíicán de caridad. ³⁶ Te ni jini sōho de jeē yáha cuehē ñayuu cuangoo i, te ni cajñuhún de naun cuángoo i. ³⁷ Te ni cacahān i jíin de jeē Jesús, tēe ññu Nazaret, yáha ya cuahān yā. ³⁸ Yūcuán na te ni cana jee de:

Jesús Séhe yucūn David, cundáhú ni ni sáña, áchí de.

³⁹ Te ñayuu cuangoo ichi núu yā, ni cacahān i nuū de jeē na cási de yuhu de. Te máá de víhyá gā ni cana jee de:

Máá ní jeē cúu ní Séhe yucūn David, cundáhú ni ni sáña víi, achí de.

⁴⁰ Yūcuán na te ni jecuiñī Jesús, te ni cahān yā jeē na quíndeca i de. Te nuū ní cuyajni de nuū yā, te ni cajñuhun yá de:

⁴¹ ¿Na vé cuní rō jeē sáha ri jíin ró? achí yá.

Te ni cahān de:

Jeē na ndúndijin tññu ná cuní na, áchí de.

⁴² Te ni cahān Jesús jíin de:

Ndundijin tinūu ró núu súcuan. Ni candíje ró jeē cuu nasávaha ri rohó, te jeē yúcuan ní nduvāha ró, áchí yá.

⁴³ Te ni ndundijin-ni tinūu de, te ni ndiquin de ya, te nácuatáhu de nuū Yaā Dios. Te ndihí ñayuu jeē ní cajito i, suni ni cacahān i jeē yóhyo vāha Yaā cúu Yaā Dios.

Jnūhun Zaqueo

19 Te ni quiví Jesús ini ñuu Jericó, te ni yāha-ni ya cuahān yā. ² Te yūcuan íyó ñn tēe cúcá nání de Zaqueo, te cújéhu de nuū tée cástútú xúhun renta.

³ Te cúní de coto de návāha cuni de ndé ñn cúu Jesús. Te tu ní cúu, chi cuehē ñayuu cuango i jíin yá, te ndiqui-ni cáa de. ⁴ Te jínu de ni cosnū de. Te ni caa de xiní ñn nuyūhdú návāha coto de nuū yā, chi yūcuan yáha ya quihīn yā. ⁵ Te ni jinū yā yūcuán, te ni ndacoto ndaa ya nuū de. Te ni cahān yā:

Zaqueo, yachí nuu ró, chí jíni ñúhún jeē ndóo ri vehe ró vijna, áchí yá.

⁶ Yūcuán na te ni cusí ñn de, te yachí ni nanuu de, te ni jeca de ya cuahān de jíin yá vehe de. ⁷ Te ni cajito ñayuu jeē súcuan ni cuu, te ni cacahān i síquī yā jeē cuahán yā ndóo ya vehe ñn tēe sáha cuēchi. ⁸ Yūcuán na te ni ndocuñí Zaqueo, te ni cahān de jíin máá Jítoho yō:

Vijna te sava ndihí ndajniñu ná chi cuāha ná núu ñáyuu ndahú. Te núu ní scáa ga na ní jicān na xúhun nuū ñáyuu, te nacūaha ná únī gā síquī naquihin i, áchí de.

⁹ Te ni cahān Jesús:

Vijna te vehe yáha je ni cācu ñn tēe jeē ma jnahnú ndetū de, chí ni candíje de ñajnūhun ni candíje jíi de Abraham. ¹⁰ Chi ruhū, Yaā ní nduu tēe, ni quiji ri nducú ri ñayuu jeē jnahnú ndetū, te jnama ri i, áchí yá.

Jnūhun yátá síquī uxī mozo jíin xúhun

¹¹ Te nuū ñáyuu ní cajini tāca jnūhun yáha, ní cahān gā Jesús ñn jnūhun yátá jeē steén yā ndese coo quiví ndíji ya. Chi je ni cuyajni ya ñuu Jerusalén, te cájeni ni i jeē víjna ñúhún quejéé jeē ndácu ya jniñu sáha Yaā Dios. ¹² Te ni cahān yā:

Ñn tēe cújéhu cuahān jicá de inga nación, návāha nihīn jniñu de cuu de rey, te ndíji de ndacu de jniñu.

¹³ Te nde ná tu quihīn de, te ni cana de uxī mozo de, te nuū ñn ñn i ni jēhe de ñn xúhun jeē ndeé yahu ndasí. Te ni cahān de jíin i: Sájniñu ró jeē na ndúcuehē xúhun yáha jíjnahan ró níni jeē quihín rī te ndee rī, áchí de.

¹⁴ Te ñayuu nación de cáquitī ni i nuū de, te ni catajī i jecu tēe cándiso jniñu cuango yatā de jeē cahān: Tu cánujahan ni ñayuu nación na jeē cuāha ní jniñu nuū tée yáha jeē cuu de rey nuū i, áchí. ¹⁵ Te vésú súcuan te ni nihīn jniñu de cuu de rey, te vendíji de nación de. Te nuū ní ndee de, te ni ndacu de jniñu jeē na quíjicoo mozo jeē ni jēhe de xúhun núu, návāha na cúní de nasaa ni canihīn ñn ñn i síquī. ¹⁶ Te ni quee ñn mozo un núu de, te ni cahān i: ñn xúhun jeē ni jēhe ní núu ná, ni

nduu uxī, achí i. ¹⁷ Te ni cahān maá rey: Vāha mozo cúu ró, te vāha ni sáha ró. Chí ni squícu vāha ró jíin ñn jniñu lúli-ni, te vijna te sáha ri jeē cujéhu ró ndacu ró jniñu nuū uxī ñuu jniñu ri, achí de. ¹⁸ Te ni quee inga mozo, te ni cahān i: ñn xúhun jeē ni jēhe ní núu ná, ni nduu uhūn, achí i. ¹⁹ Te suni ni cahān de jíin mozo un: Róhó, cujéhu ró ndacu ró jniñu nuū uhūn ñuu jniñu ri, achí de. ²⁰ Te ni quee inga mozo, ni cahān i: Yāha nácuāha ná xúhun ní, chí ni chuvāha ná ini ñn pañuelo. ²¹ Chí ni yūhu ná nihín, chí tēe xeēn cúu ní. Chí cuehē gā nándacān ní vésú jeē ni jēhe ní, te cuehē gā cuní ni vésú jeē cúu sáha mozo ni, áchí de. ²² Yūcuán na te ni cahān rey: Mozo neé cúu ró núu súcuan, te jíin jnūhun ni cahān rō te sándaā rī jeē íyó cuēchi ró jeē tu ní sájniñu ró jíin xúhun rí. Chí jéni ni rō jeē tée xeēn cúu ri, te cuehē gā nándacān rī vésú jeē ni jēhe ri, te cuehē gā cuní rī vésú jeē cúu sáha mozo rī. ²³ Núu súcuan ¿te naun tu ní chūne ró xúhun rí vésú nuū banco? Te jeē ní ndee rī te naquihin ri xúhun rí nde jíin séhe xúhun núu. Achí de. ²⁴ Te ni cahān de jíin ñáyuu cáhīn yūcuán: Quende xúhun jíinā nuū i, te cuāha ró núu mozo jeē névāha uxī, achí de. ²⁵ Te ñayuu un ní cacahān i jíin de: Te ndese, chí je névāha de uxī, achí i. ²⁶ Te ni cahān tucu rey: Cáhan rī jíin ró jeē ñáyuu je névāha, sa quiji ga nuū i, te conevehā cuehē i. Te ñayuu jeē tu névāha, sa cujiyo-ni vésú jecu jeē névāha i. ²⁷ Te tēe jeē cájito uhū ruhū, jeē tu ní cánujahan ni de jeē cuu ri rey nuū de, cuáquihin de na quíjicoo de yāhá. Te cahni rō de coto ri, achí de. Achí Jesús.

Jeē ni quiví Jesús ñuu Jerusalén

(Mt. 21.1-11; Mr. 11.1-11; Jn. 12.12-19)

²⁸ Te nuū ní ndihí ni cahān yā jnūhun yáha, te ni jica ga yā cuahān yā ñuu Jerusalén. ²⁹ Te nuū ní cuyajni ya ñuu Betfagé jíin ñuu Betania, yajni nuū íne yucu nání yucu Olivos, te ni tají yá uū tēe cáscuáha jíin yá jeē quíngoo de. ³⁰ Te áchí yá jíin de:

Cuāhán ñuu lúli íne ichi núu. Te núu ni quiví ró, te nihīn rō ñn burro núhni tī, jeē ní ñn tēe ná tu coso de tī. Te ndají ró tī quiji ró jíin tī. ³¹ Te núu ndé ñn cajnuhūn naun cándají ró tī, te cahān rō jíin: Máá Jítoho yō jíni ñúhún yá tī, achí rō. Achí yá.

³² Te cuango tēe ni tají yá, te ni canihīn de tī ñajnūhun ni cahān yā jíin de. ³³ Te jeē cándají de tī, te ni cacahān jitoho tī jíin de:

¿Naun cándají ró burro rí? achí.

³⁴ Te ni cacahān de:

Máá Jítoho yō jíni ñúhún yá tī.

³⁵ Te ni ndecoo de jíin tī nuū Jesús. Te ni casoó de sahna de síquī tī, te ni casáha de jeē ní jecosō yā síquī tī. ³⁶ Te ná-ni cuahān yā, sáa cáscáa ñayuu sahna i ini ichi. ³⁷ Te nuū ní cuyajni ya nuū cúun ichi yucu Olivos, te ndihí ñayuu cándíje jeē cándiquin i ya, ni caquejéé i cácusí ñn i, te cácana jee i jeē yóhyo vāha Yaā cúu Yaā Dios síquī táca jniñu jéhu ni sáha ya ni cajito i. ³⁸ Te áchí i:

Yōhyo vāha Yaā cúu Rey jeē véji jíin jniñu máá Jítóho yō Yaā Dios. Te sáha ya jeē cóo manī yō jíin Yaā Dios andíví. Te yōhyo cújéhnu Yaā Dios, achí i jíináhan i.

³⁹ Yūcuán na te jecu tēe fariseo cáhiin mēhñu ñáyuu cuehē ún, ní cacahān de jíin yá:

Maestro, cahān ni núu ñáyuu cándiquin nihin jēe na cási i yuhu i, achí de.

⁴⁰ Te ni cahān Jesús:

Cáhán rī jíin ró jeē núu ñáyuu yáha na cási i yuhu i, te tāca yúu chi cana jee, achí yá.

⁴¹ Te nuū ní cuyajni ya Jerusalén, te ni jito ya ñuu ún, te ni ndahyū yā siquī. ⁴² Te ni cahān yā:

Róhó ñáyuu Jerusalén, yōhyo ni cuu ni rī jeē na jécūhun ni rō jeē cuu ndumanī rō jíin Yaā Dios sáha ri. Te siquī jeē tu cáchandije ró, te vijna chi ma cúu ga jecūhun ni rō. ⁴³ Chi quee quiví jeē coo jnūndóho, te ñáyuu cájito uhū rohó, cuicó ndúu i ñuu rō, te casi cutú i jíin yúu, te tāca lado ndonda i siquī rō. ⁴⁴ Te ndihí vehe scótúu i, te cahni i róhó jíináhan ró. Te ma stóo i ni ñn vehe jeē cóso jnāhan ga yuū. Chi ni quiji ri nde nuū Yaā Dios jeē jnáma ri rohó, te tu ní cáchandije ró. Achí yá.

Jeē ní quenehen ya ñáyuu ini templo

(Mt. 21.12-17; Mr. 11.15-19; Jn. 2.13-22)

⁴⁵ Te ni quiví ya ini templo cáhnu, te ni quejéé yá quenehen ya tāca ñáyuu cájeen quití te cánaxico núu ñáyuu jeē socó i. ⁴⁶ Te ni cahān yā jíin i:

Yósó núu tútu iī jeē cahān Yaā Dios: Vehe ri chi vehe nuū cájicān tahu cúu, achí Yaā Dios. Te máá ró jíináhan ró, chi nájñuhun yaū cava ñacuīhna ní canasáha ró, achí yá.

⁴⁷ Te ndiquiví ni steén yā jñuhun ini templo. Te sutū cácujuhnu jíin tēe cástéén tutu ley Yaā Dios jíin tēe cácujuhnu nuū ñáyuu ñuu ún, cánducú de modo ndese cahni de ya. ⁴⁸ Te tu cánihin de modo sáha de, chi ndívii ñáyuu yōhyo cájetáhu i cájini nahin i jñuhun cáhán yā.

Siquī jeē ndíso jniñu Jesús

(Mt. 21.23-27; Mr. 11.27-33)

20 Te ñn quiví steén yā jñuhun nuū ñáyuu ini templo, te nácani ya jñuhun jeē jnáma Yaā Dios ñáyuu. Te ni quecoo sutū cácujuhnu jíin tēe cástéén tutu ley Yaā Dios jíin táca tēe jéhnu cándacu jniñu. ² Te ni cacahān de:

Castūhún, ¿ndé ní nihin jniñu ró jeē sáha ró jniñu yáha? ¿Te ndé ñn ni tee jniñu siquī rō jeē sáha ró súcuan? Achí de.

³ Te ni cahān Jesús jíin de:

Suni ruhū cajñuhun rí rohó ñn jñuhun jíináhan ró. Castūhun núu rí: ⁴ ¿Nde ñn ni tee jniñu siquī Juan jeē ni scuándute de? ¿A Yaā Dios chí táca tēe? Achí yá.

⁵ Yūcuán na te ni candajñuhun máá de:

¿Ndeese cahān yō? Núu cahān yō jeē Yaā Dios ni tee ya jniñu un síquī Juan, te cahān de jíin yó: ¿Najehē tu

ní cáchandije ró de núu súcuan? ⁶ Te núu cahān yō jeē ñáyuu ni catee jniñu un síquī de, te ndívii ñáyuu cahni i yóhó jíin yúu, chi cáchandije i jeē tēe ni nacani jñuhun Yaā Dios ni cuu ndije Juan, achí de cacahān máá de.

⁷ Te ni cacahān de jeē tu cájini de ndé ñn ni tee jniñu siquī Juan jeē ni scuándute de. ⁸ Yūcuán na te ni cahān Jesús:

Ni ruhū, suni ma cáchi rī nuū rō ndé ñn ni tee jniñu siquī rī sáha ri jniñu yáha, achí yá.

Jñuhun yátá síquī tēe néé casájniñu nuū uva

(Mt. 21.33-44; Mr. 12.1-11)

⁹ Te ni quejéé Jesús cahān yā jñuhun yátá yáha jíin ñáyuu ún:

Ñn tēe ni nachuhun de cuehē uva nuū ññuhun de. Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi jeē cuahān nahán de inga ñuu. ¹⁰ Te máá tiempo ndutútu uva, te ni tají de ñn mozo cuahān nuū tēe casájniñu ún, návāha naquihin de sava ndehē uva un. Te tēe un ní cacani de mozo, te ni canatajé de i cuanuhun i súcuan-ni. ¹¹ Te tēe chíí uva ni tají tucu de inga mozo cuahān. Te tēe casájniñu ún, suni ni cacahān ndevāha de nuū i, te ni cacani de i, te ni canatajé de i cuanuhun i súcuan-ni. ¹² Te tēe chíí uva ni tají tucu de inga mozo cuahān. Te tēe casájniñu ún, suni ni castújí de mozo un, te ni cascúnu de i.

¹³ Yūcuán na te ni cahān tēe chíí uva: ¿Ndeese sáha ri? Na tají rí sēhe ri jeē maní rī jíin, chi sanaa te núu ni cajito de i te coo yñúhún de nuū i. Achí de. ¹⁴ Te tēe casájniñu ún, ná ni cajito de jeē véji i, te ni cacahān de: Tēe chíí táhū cúu jeē véji ún. Na cáhni yō de, te ndōo tahū de cuu máá yó, achí. ¹⁵ Te ni caquenehen de i inga lado, te ni cajehni de i, achí yá.

Te ni cajñuhun yá de:

Núu súcuan ¿te ndese sáha tēe chíí uva jíin tēe casájniñu ún? ¹⁶ Ndjí de te cahni de tēe un jíináhan, te cuāha de ññuhun cáá uva un núu inga sava tēe sájniñu nuū, achí yá.

Te jeē ní cajini ñáyuu jñuhun yáha, te ni cacahān i:

Aī, núu ma cóo cuítí súcuan víí, achí i.

¹⁷ Te ndéhé yá nuū i jíináhan i, te ni cahān yā:

Núu súcuan ¿te á cájecūhun ni rō jñuhun yáha jēe yosó núu tútu iī jeē cúu ri nájñuhun ñn yuū? Chi achí tutu:

Yuū jeē ní casquéhichí tēe cájeni vehe, yuū yáha nduu jeē quítuu vehe. Achí. ¹⁸ Te ñáyuu tu cáchandije, ndoho i nájñuhun ndóho ñáyuu jeē cotúu siquī yuū te jnáhnú i. Te quiví sándaā Yaā Dios cuēchi, te ñáyuu tu cáchandije, ndoho i nájñuhun ndóho ñáyuu jeē nñga yuū siquī i te cundihi i sáha. Achí yá.

Siquī xúhun renta

(Mt. 21.45-46; 22.15-22; Mr. 12.12-17)

¹⁹ Yūcuán na te sutū cácujuhnu jíin tēe cástéén tutu ley Yaā Dios, ni cacani de jñi de ya máá hora un. Chi ni

cajecūhun ni de jeē siquī maá de cúu jnūhun yátá ní cahān yā siquī tēe cásájniñu nuū uva jíin tēe cájeni vehe. Te tu ní cúu, chi cáyūhú de jeē quitē ní ñayuu.

²⁰ Yūcuán na te ni catají de jecu tēe cuacoto yuhu de ya, te tēe un cásáha-ni de jeē tēe ndaā cácuu de. Te cánducú de sáha de jeē cahán yā ñn jnūhun jeē nihín de cuēchi siquī yā, te quindecá de ya nuū tēe cúu gobernador. ²¹ Te ni cacahān de:

Maestro, cájini na jēe cahán vāha ní, te stéén ndaā ní. Te tu sáha ní cuenta ndese cúu ñn ñn ñayuu, chi ñnuú-ni sáha ní jíin i. Te stéén ndaā ní ndese squícu ñayuu nuū Yaā Dios. ²² Núu súcuan te cachi ní: ¿A íyó váha jeē chúnaa yō renta nuū rey nación Roma jeē ñn nación yō, chí tuú? áchí de.

²³ Te ni jini yā jeē cáculi de stáhú de ya, te ni cahān yā jíin de:

¿Najehē cájito ndee rō ruhū? ²⁴ Stéén ñn xūhún na cóto ri. ¿Ndé ñn nuū cúu jeē ndeé nuū xūhun yáha, te ndé síhví cúu jeē ndeé yāhá? áchí yá.

Te ni cacahān de jíin yá:

Nuū jíin síhví rey un cúu, áchí de.

²⁵ Yūcuán na te ni cahān yā jíin de:

Núu súcuan te nacūāha rō núu rey un jēe yíhi cuenta nuū de, te nacūāha rō núu Yaā Dios táca jēe yíhi cuenta nuū maá yá, áchí yá.

²⁶ Te táca tēe ún tu ní cúu nihín de cuēchi siquī yā jíin ni ñn jnūhun cáhán yā, cájito jíinú ñayuu. Chi sa ni canaa ni de jeē ndichí ní stió cuíñí yā jnūhun nuū de, te tuá na vé ni cacahān de.

Jeē ní cacajñuhún de siquī jeē nátecu ndīyi

(Mt. 22.23-33; Mr. 12.18-27)

²⁷ Yūcuán na te jecu tēe grupo saduceo ni quecoo de nuū yā. Te tēe un cacahān jeē tu nátecu cuiti ndīyi. Te ni cacahān de jíin yá:

²⁸ Maestro, Moisés ni tee de nuū tútu jeē cánevāha yó: Núu ñn tēe cuu de, te ndōo ñasihí de, te núu tu ní íyo sēhe de jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuíñí i nuū ndīyi ñani de, áchí tutu. ²⁹ Núu súcuan te ni íyo uxā ñani. Te tēe núu ní quiñáhan de jíin ñahan. Te ni jihí de, te tú sēhe de ní íyo. ³⁰ Te tēe uū ni naquihin de ña, te suni ni jihí de, te tú na sēhe de ní íyo. ³¹ Te tēe uní ni naquihin de ña. Te suni súcuan ndihúxá de ni condeca de ña, te ni cajihí ndihí de, te ni ñn de tú sēhe de ní íyo. ³² Te jeē sándēhí te suni ni jihí ñahan ún.

³³ Núu súcuan te núu na nátecu de jíináhan de quivē nátecu ndīyi, ¿te ndé ñn de cuu ña ñasihí de? Chi ndihúxá de ni condeca de ña. Achí de jíináhan de.

³⁴ Yūcuán na te ni cahān yā jíin de:

Ñayivi yáha chi cáquiñáhan tēe jíin ñahan. ³⁵ Te ñayuu vāha jeē natecu i quivícoo i andiví, ma quiñáhan ga i yūcuán, chi tuá na jnūhun quiñáhan tēe jíin ñahan coo. ³⁶ Ni ma cúu cuiti gā i, chi coo i nájnūhun ndajéhé Yaā Dios. Te sēhe Yaā Dios cuu i, chi je ni canatecu i. ³⁷ Te suni máá Moisés cáhán de jeē

nátecu ndīyi, chi ni tee de nuū tútu ndese ni cahān yā jíin de mēhñu yúcū jeē cayú yáñuhūn. Chi ni cahān de jeē cúu ya Yaā Dios Abraham jíin Isaac jíin Jacob. ³⁸ Te jeē ni cáhán de súcuan cúu jeē ní cachi de jeē cátecu táca ndīyi. Chi vēsú je ni cajihí i, te cátecu i nuū íyó máá yá, chi cúu ya Yaā sáha jeē técu ñayuu ní cáni. Achí yá jíin de.

³⁹ Te jecu tēe cástéén tutu ley Yaā Dios ni cacahān de: Vāha ni cahān ní Maestro.

⁴⁰ Te tuá ni cáchundeyí ni de cajñuhún de ya.

Siquī jeē cúu Cristo sēhe yucūn David

(Mt. 22.41-46; Mr. 12.35-37)

⁴¹ Te ni cahān yā jíin de jíináhan de:

¿Ndece cúu jeē cacahān ñayuu jeē Cristo cúu sēhe yucūn David? ⁴² Chi máá David suhva ni cahān de jnūhun ya nuū tútu Salmo:

Máá Jítóho yō Yaā Dios suhva ni cahān yā jíin Jítóho rī, Yaā quiji:

Cucōo rō lado váha ri nuū cujéhnu rō,

⁴³ te na sáha ri jeē quende rō poder táca jēe cájito uhū rohó.

Achí Yaā Dios. Achí David. ⁴⁴ Te núu sēhe yucūn David cúu Cristo, ¿te ndese cúu jeē ni cáhán de jeē Jítóho de cúu ya? áchí yá.

Jeē ni cáhán yā jeē íyó cuéchi de jíináhan de

(Mt. 23.1-36; Mr. 12.38-40; Lc. 11.37-54)

⁴⁵ Te ni cahān yā jíin tēe cáscuáha jíin yá, te suni ni cajini sōho ndihí ñayuu:

⁴⁶ Coto má cándije rō táca tēe cástéén tutu ley. Chi cácusí ni de cáñuhun de sahma cáni jeē steén jeē cucjéhnu de, cájica cuu de jíin. Te cánujnahan ni de jeē cahán yíñuhún ñayuu jíin de nuū yáhu. Te cánujnahan ni de cucōo de nuū silla yíñuhún gá ini vehe íi sinagogoga, jíin silla yíñuhún gá nuū víco cáyeji ñayuu. ⁴⁷ Te cáquende de vehe ñahan ní caquendōo ndáhú. Te nahán cájicān tahú de návāha cani ni ñayuu jeē tú na cuéchi de. Tēe yáha jíináhan de chi xeēn gā ndoho de castigo. Achí yá.

Jeē ni sócō ñahan viuda xūhún

(Mr. 12.41-44)

21 Te ná ni íyo ya ini templo, te jító ya nuū ñayuu cucá jēe cáchuhun i cuehē xūhún ini táca yéjñu nuū cásocō i. ² Te suni ni jito ya nuū ñn ñahan viuda jeē ndóho ndáhú, te ni chuhun ña uū centavo lulí ini yéjñu ún. ³ Te ni cahān yā:

Jendaá cahán rī jíin rō jeē cuehē gā cúu jeē ni sócō ñahan viuda ndahú yáha, vēsú jeē ní casocō táca gá ñayuu. ⁴ Chi táca i ni casocō i jeē ni ndóo siquī xūhun cuéhe i. Te ñahan yáha, vēsú ndahú ndóho ña, te ni chuhun ndihí ña jeē cótecu ña. Achí yá jíin de.

Jeē ní cachi yā jeē nāā templo

(Mt. 24.1-2; Mr. 13.1-2)

⁵ Te sava de ni cacahān de jeē luu cáa templo cáhnu, chi ni cuvāha jíin táca yūū luu jíin táca jeē ní casocō ñayuu. Yūcuán na te ni cahān yā:

⁶ Ndihi jeē cájito ró yáha, quee quivī jeē ma cóso jnáhan ga ni ñn yuū, chi ndihi jnanū, achí yá.

Na seña coo nuū cuácuyajni ndihi ñayiví

(Mt. 24.3-28; Mr. 13.3-23)

⁷ Te ni cacajnuhún de ya:

Maestro, ¿ndé quivī coo táca jeē ní cachi ní jeē coo? ¿Te na seña coo nuū cuácuyajni squícu táca jeē ní cahān ní? áchí de.

⁸ Te ni cahān yā:

Coto ró jeē ma stahú i róhó. Chi quijicoo cuehē tēe jeē stahú jíin síhví rí, te cahān de: Máá rí cúu Cristo. Te suni cahān de: Je ni quee quivī ndihi ñayiví, achi de. Te ma cóndiquin rō de. ⁹ Te núu nihin rō jnūhun jeē táca lado iyó guerra te cándonda ñayuu siquī tohō, te ma yūhu ró, chi cánuú jeē xíhna gā coo súcuan, te ni ma jinú yachī quivī ndihi ñayiví. Achí yá.

¹⁰ Te ni cahān gā yā:

Ndonda nación siquī inga nación, te ndonda ñuu siquī inga ñuu jeē cuajnáhan. ¹¹ Te cháha chúcuan jnāa téyí, te coo jnamā jíin cuéhyī xeēn. Te coo seña jéhu ichi ándiví jeē yūhú ndasí ñayuu coto i.

¹² Te nde ná tu coo táca jniñu yáha, te coto xeēn i róhó, te jñi i róhó. Te quindecia i sava ró táca vehe i sinagoga jeē cahán i cuēchi siquī rō. Te chune i sava ró vecāa. Te quindecia i sava ró núu táca rey jíin núu táca gobernador, te cahān i cuēchi siquī rō jeē siquí jeē cá-candije ró rúhū. ¹³ Te jeē súcuan coo, te cuitē núu ga jnūhun ri, chi nacani ndaā rō nuū de jíin náhan de.

¹⁴ Núu súcuan te cundaā ni rō jeē ma nácani ni rō xihna gā ndese stío cuñí rō nuū de te cācu ró. ¹⁵ Chi ruhū cuāha ri jnūhun ndíchí cahān rō, návāha ñayuu jeē cájito uhū rohó, ma cūndeyí i jíin ró ni ma cúu cahān i siquī rō. ¹⁶ Te nde tatá rō, naná rō, ñani rō, jnáhan ró, jíin amigo rō, nastúu i róhó núu ñayuu xeēn. Te cahni i sava ró. ¹⁷ Te táca ñayuu chi quitī ni i nuū rō jeē siquí ruhū. ¹⁸ Te ni ñn ixi xíní rō jíin náhan ró ma náā, chi coto ya rohó. ¹⁹ Te núu cuiñi ñihin ró jíin jnūhun ri, te cotecu rō ní cáni.

²⁰ Te núu ni cajito ró jeē ní cajicó ndūū soldado ñuu Jerusalén, te na jécūhun ni rō jeē jé yajni naa ñuu ún.

²¹ Yūcuán na te ñayuu cáyūcú región Judea, na cúnu i caa i yucu quingoo i. Te ñayuu cáyūcú Jerusalén, na quéndacoo i quingoo i. Te ñayuu cáhīin nde rancho, ma nándicó i ñuu ún. ²² Chi táca quivī un cuáha Yaā Dios castigo nuū ñayuu jeē siquí cuéchi i, návāha squícu táca jnūhun jeē yosó núu tútu. ²³ Te quivī ún nacā jeē ndahú ñahan cáñuhun sēhe jíin ñahan cándeca yiquín, chi ma cúnihin ña cunu yachī ña. Chi yōhyo xeēn coo jnūndóho ini ñayiví, te quiji castigo xeēn

siquī ñayuu yáha. ²⁴ Te sava i cuu nuū guerra, te sava i quingoo preso nde táca inga nación. Te ñayuu táca gá nación ndacu ñihin i jniñu nuū ñayuu ñuu Jerusalén, nde jínu tiempo jeē jéhe Yaā Dios jnūhun ndacu i jniñu.

Ndese coo quivī ndiji Yaā ní nduu tēe

(Mt. 24.29-35, 42-44; Mr. 13.24-37)

²⁵ Yūcuán na te coo seña nuū níāndii jíin núu yoó jíin núu quími. Te ini ñayiví te quiji jnūndóho xeēn siquī ñayuu táca nación. Te cunéé ni i, te yūhú i jeē ñihin xeēn mar te ndónnda xeēn ndute mar vēji nuū ñūhun.

²⁶ Te cuu sōó sava ñayuu jeē cáyūhú i cándetu i táca jnūndóho quiji siquī ñayiví. Te táca jeē iin andiví chi quisí i. ²⁷ Yūcuán na te coto ñayuu nuū maá rí, Yaā ní nduu tēe, ndiji ri jíin vícō, te condiso ri cuehē poder, te yōhyo luu cujéhu ri. ²⁸ Te núu ni quejéé táca jniñu yáha, te ndeyí coo ni rō, te cocunuū rō andiví, chi je yajni jnama ya rohó. Achí yá jíin de jíin náhan de.

²⁹ Te suni ni cahān yā jnūhun yátá yáha:

Condēhe jíin náhan ró ndese sáha nundēhe higo jíin táca gá yujnu. ³⁰ Núu cájito ró jeē ní quejéé náne numa yújnu ún, te cájini rō jeē jé yajni coo tiempo jihní. ³¹ Te suni súcuan núu ni cajito ró jeē ní quejéé cúu táca jniñu jeē ni cahān rī, yūcuán na te na jécūhun ni rō jeē ní cuyajni quivī ndacu Yaā Dios jniñu ini ñayiví.

³² Jendaá cahán rī jíin ró jeē ma cúu ndihi ñayuu tiempo un, chi nde squícu ndihi jniñu ún. ³³ Andiví jíin ñayiví chi naa, te táca jnūhun cahán rī chi ma náā, chi ndihi squícu.

³⁴ Te coto ma stíví ró maá ró jíin náhan ró jeē sáha ró táca cuéchi, jíin jeē najīni ró, jíin jeē cujnéñu ró jíin táca ndajniñu cotecu rō, návāha tú sanaa ni rō te quee quivī un siquī rō. ³⁵ Chi nájnūhun jeē núu ñn trampa, súcuan quee jnūndóho siquī ñayuu cáyūcu ní cáhnu ñayiví. ³⁶ Núu súcuan te ndito coo ni rō, te níni cácan tahú rō, návāha cuu cācu ró núu táca jnūndóho jeē quíji ún, te cuu cuiñi ró núu ruhū, Yaā ní nduu tēe. Achí yá.

³⁷ Te ndiquivī steén yā jnūhun ini templo, te ndijnahan jecuáá jéndōo ya nde yucu jeē naní Olivos. ³⁸ Te táca jénéhen quécoo ñayuu nuū yā ini templo jeē cúni sōho i jnūhun steén yā.

Jeē ní casquijnáhan de jnūhun jñi de Jesús

(Mt. 26.1-5, 14-16; Mr. 14.1-2, 10-11; Jn. 11.45-53)

22 Yūcuán na te ni cuyajni vico pascua jeē cáyeji ñayuu hebreo pan jeē tú na levadura yíhi. ² Te sutū cácujeñu jíin tēe cástéén tutu ley, ni canducú yuhu de modo cahni de Jesús, chi cáyūhú de jeē quitī ní ñayuu.

³ Te ni quiví Satanás ini anuá Judas jeē nastúu de ya. Te suni nání de Iscariote, te cúu de ñn jnáhan jeē ndihúxi uū tēe apóstol. ⁴ Te ni jehēn de ni canda-jnūhún de jíin táca sūtū cácujeñu jíin tēe cándiso jniñu ini templo, núu ndese nastúu de ya nuū tēe un

jijnáhan. ⁵ Te tēe un ní cacusiĩ ni de, te ni cajejnūhun de jeē cuáha de xūhun núū Judas. ⁶ Te ni jetáhú Judas, te ni nducú de modo ndese nastúu yuhu de ya hora jeē tú na ñayuu iyó.

Jeē ní jequin yā Cena yā

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Te ni quee maá quívī vico jeē cáyeji ñayuu pan jeē tú na levadura yíhi, te suni quívī un cájehni i londe nájñūhun ni ndacu Yaā Dios jniñu jeē sáha i vico pas-cua un. ⁸ Te Jesús ni tají yá Pedro jíin Juan quingoo de, te áchí yá jíin de:

Cuángoo te sátūhva ró jéē cuxíni yó vico pascua, achí yá.

⁹ Te ni cacajnūhún de ya:

¿Ndé nuū cuní ni jéē quísátūhva ná? áchí de.

¹⁰ Te ni cahān yā jíin de:

Cuángoo ñuu yūcuán, te núu ni quívīvicoo ró te na-jnáhan ró jíin ñin tēe ndíso quíyī ndute. Te condiquín rō de quihīn rō jíin de nde vehe nuū ndívi de. ¹¹ Te cahān rō jíin tēe chíí vehe ún: Achí maá Maestro: ¿Ndé ñin cúu cuarto vehe ní cuāha núú ní núu cuxíni ya vico pascua jíin tēe cáscuáha jíin yá, achí rō. ¹² Yūcuán na te stéén de ñin cuarto cáhnu nde xinī véhe jeē je íyó túhva, te yūcuan sátūhva ró jéē cuxíni yó, áchí yá.

¹³ Te cuangoo de, te ni canihīn de nájñūhun ni cahān yā. Te ni casátūhva de jeē cuxíni ya vico pascua.

¹⁴ Yūcuán na te ni jinū hora jeē cuxíni, te ni quee Jesús, te ni cucōo ya mesa jíin tēe cácuu apóstol. ¹⁵ Te ni cahān yā jíin de:

Yōhyo ni cuu ni rī cuxíni ri jíin ró jijnáhan ró vico pas-cua yáha, vijna nde ná tu cuu rī. ¹⁶ Chi cáhán rī jíin ró jeē ma cáji cuiṭi gā rī vico pascua, chi nde quiji quívī ndacu Yaā Dios jniñu nñí ñayīví, te sáá te caji tucu ri, achí yá.

¹⁷ Te ni quihin ya ñin copa ndūxi uva, te ni nacuatáhú yá, te ni cahān yā:

Quihin copa yáha, te coho ró jíin jnáhan ró. ¹⁸ Chi cáhán rī jíin ró jeē ndé vijna te ma cóho ga rī ndūxi uva, chi nde quiji quívī ndacu Yaā Dios jniñu nñí ñayīví, te sáá te coho tucu ri. Achí yá.

¹⁹ Te ni quihin ya pan, te ni nacuatáhú yá, te ni tahú cuéché yá, te ni jēhe ya nuū de jijnáhan de. Te ni cahān yā:

Yāha cúu yiqui cúñu rī jeē socō rī jeē chunaa rī cuéchi ró jijnáhan ró. Te níni caji rō súcuan jeē cáñuhun ni rō ruhū jeē ni jíhī rī jehē rō. Achí yá.

²⁰ Te suni súcuan ni sáha ya jíin copa ndūxi uva, ná ni cuu ni cuxíni ya. Te ni cahān yā jíin de:

Yāha cúu níñī rī jeē cuáha ri jeē cúu contrato jeé, te cati jeē ndundoo cuéchi ró jijnáhan ró.

²¹ Te vijna chi tēe nastúu ruhū, néne de jíin rī nuū mesa yáha. ²² Chi ruhū, Yaā ní nduu tēe, jendaá cúu jeē quihín rī cuu rī nájñūhun je ni sándaā Yaā Dios jeē súcuan coo. Te nacā xeēn ndoho tēe jeē nastúu ruhū, achí yá.

²³ Yūcuán na te ni caquejéé de cácajnūhun jnáhan de ndé ñin de cúu jeē nastúu de ya.

Jeē ní cacahān de siquī ndé ñin de cújéhnu ga

²⁴ Yūcuán na te yōhyo ni cacahān de siquī ndé ñin de cújéhnu ga nuū jnáhan de. ²⁵ Te ni cahān Jesús jíin de:

Rey tācá nación chí cándacu ñihin de jniñu nuū ñayuu cájni de, te cácahān i jeē tēe cásáha vāha cúu jeē cácujeñnu nuū i. ²⁶ Te rōhó jijnáhan ró, ma cóo ró súcuan. Chi núu ndé ñin ró cújéhnu ga, te sa nasáha lulí ró maá ró. Te núu ndé ñin ró ndácu jniñu, te sa nasáha ró máá ró tēe jéjníñu nuū jnáhan. ²⁷ ¿Te ndé ñin cúu jeē cujéhnu ga, á tēe yéji nuū mesa, chí tēe jéni cohō? ¿A násūu tēe jeē yéji nuū mesa cúu jeē cujéhnu ga? Te ruhū násūu súcuan cúu ri, chí ni nasáha ri maá rí nájñūhun tēe jéjníñu nuū rō, chí vēji ri sáha ri jeē níhín tahú rō.

²⁸ Te máá ró cácuu tēe jeē níni cáhīn jíin rí tāca quívī jeē ndóho ri jñūndóho. ²⁹ Núu súcuan te nájñūhun ni sáha Tátá rī jeē ndácu ri jniñu, suni súcuan sáha ri jeē ndacu ró jniñu jijnáhan ró. ³⁰ Te caji rō coho ró jíin rí ini ñuu nuū ndacu ri jniñu. Te cucōo ró ñin ñin mesa jeē sándaā rō jniñu ndíhúxí uū yucūn Israel. Achí yá.

Jeē ní cachi yā jeē yūhu Pedro cahān de jeē jíin de ya

(Mt. 26.31-35; Mr. 14.27-31; Jn. 13.36-38)

³¹ Te suni ni cahān maá Jítoho yō jíin Simón Pedro: Simón, cuni sōho ró, chí ni jicān Satanás rohó jijnáhan ró jéē coto ndee rohó nájñūhun jeē síjin trigo, te stúu ndé ñin ró cácuu nájñūhun paja jeē nayūhu ró, te ndé ñin ró cácuu nájñūhun trigo jeē candíje ñihin ró. ³² Te ni jicān tahú rī jehē rō návāha ma náyūhu ró jeē ma cándíje ga rō. Te jeē nácañíje tucu ró, te sáha ró jéē íje tāca jnáhan ró jíin jñūhun ri. Achí yá.

³³ Te ni cahān de jíin yá:

Je íyó túhva ná quihīn na jíin ní vecāa te vēsú na cuu na jíin ní, achí de.

³⁴ Te ni cahān yā:

Pedro, cáhán rī jíin ró jeē nde ná tu cana líhli vijna, te yūhu ró jeē jñí ñayuu rohó, te unī jíinu cahān rō jeē tu jíiní rō ruhū, achí yá.

Jeē ní cuyajni coto ya jñūndóho

³⁵ Yūcuán na te ni cajñūhun yá de jijnáhan de:

Ná ni tají rí rohó ní jengoo ró jéē tu ní cóndiso ró ñunu ni yijni xūhún ni ndijēn, ¿te á ní tyo ñin jeē ní cumanī nuū rō? Achí yá.

Te ni cacahān de:

Tú ni ñin ní cúmanī.

³⁶ Te ni cahān yā:

Nde vijna sa cáhán rī jeē cóndiso ró ñunu ró, te suni yijni xūhún. Te tēe jeē tu névāha espada jeē coto de máá de, na xíco de ticāchí de te na cuāan de. ³⁷ Chi cáhán rī jíin ró jeē quee quívī ndoho yó jñūndóho, chí cánuú squícu jñūhun yáha jéē cahán nuū tútu siquī rī:

Sáha ñayuu jíin yá nájñuhun cásáha i jíin téé sáha cuēchi xeēn, áchí tutu. Chi táca jñuhun un jeē yosó cáhán síquī rī, chi síquicu nahín, áchí yá.

³⁸ Yūcuán na te ni cacahān de:

Yāha íyó úū espada, achí de.

Te ni cahān yā jíin de:

Jíin jeē yáha-ni, áchí yá.

Jeē ni jícān tahú yā nuū huerto Getsemaní

(Mt. 26.36-46; Mr. 14.32-42)

³⁹ Te ni quenda ya cuahān yā yucu Olivos nájñuhun sáha sáha ya. Te tēe cáscuáha jíin yá ni candiquīn de ya cuangoo de jíin yá. ⁴⁰ Te nuū ni jínū yā yūcuán, te ni cahān yā jíin de:

Cacān tahú rō jijnáhan rō jeē chindéé ñáhán yá rohó jeē ma sáha rō cuéchi núu coto ndee jeneé róhó, achí yá.

⁴¹ Te ni jica ya jecu, cūhva jeē jicá jínū yūū jeē squiín. Te ni jecuiñī yití yá, te suhva ni jicān tahú yā:

⁴² Tātā, núu cúní ni te tejyio ní jnúndóho yáha jeē ma quíji síquī ná. Te nasūu jeē cuní maá ná, chi jeē cuní maá ní na cóo, áchí yá.

⁴³ Te ni cane ñn ndajéhé andiví núū yā, te ni jēhe fuerza nuū yā. ⁴⁴ Te cúcuíhyá ndasí ni yā jeē quiji jnúndóho síquī yā, te ni nducú ndéyí gá yā ni jicān tahú yā. Te ni cane jnañū yā, te too nuū ñuhun nájñuhun yúyú náhnu niñī.

⁴⁵ Te ná ni ndocuiñī yā jeē ni jícān tahú yā, te ni ndee yā nuū téé cáscuáha jíin yá. Te ni jito ya jeē cáquixī de, chi tuá cáhīyo ndeyí ni de cacān tahú de jeē cácu-cuíhyá ndasí ni de. ⁴⁶ Te ni cahān yā jíin de:

¿Naun cáquixī rō? Ndonga te cacān tahú rō jeē chindéé ñáhán yá rohó jeē ma sáha rō cuéchi jeē coto ndee jeneé róhó. Achí yá.

Jeē ní cajññ de Jesús

(Mt. 26.47-56; Mr. 14.43-50; Jn. 18.2-11)

⁴⁷ Te sá cáhán gā yā súcuan, te ni quecoo cuehē ñayuu. Te tēe nání Judas, ñn jnáhan jeē uxí uū tēe scuáha jíin yá, yósnúu de nuū ñáyuu un véji de. Te ni quee de nde nuū Jesús, te ni techūhú de ya, te súcuan ni nastúu de ya. ⁴⁸ Te ni cahān Jesús jíin de:

Judas, ¿á jíin jeē téchūhu rō ruhū cúu jeē nastúu rō ruhū, Yaā ní nduu tēe? Achí yá.

⁴⁹ Te tēe cáhīin jíin yá, ni cajito de jeē ní quejéé cúu, te ni cacajñuhún de ya:

¿A ndonda ná jijnáhan ná síquī de jíin espada? áchí de.

⁵⁰ Te ñn de ni stují de mozo sutū cujéhu ga, chi ni jehnde de sōho lado váha. ⁵¹ Te ni cahān Jesús:

Siáá, na jécuiñī, achí yá.

Te ni tee ya ndaha ya sōho mozo un, te ni nasávaha ya de. ⁵² Te ni cahān yā jíin sutū cácujeéhu jíin téé cándiso jñíñu ini templo jíin táca téé jéhu jeē ní quecoo de jeē jññ de ya:

¿Te va tēe cuíhná cúu ri jeē véjicoo rō jíin espada jíin yujnu jeē jññ rō ruhū jeē súcuan? ⁵³ Táca quíñ ni ine ri jíin rō jijnáhan rō ini templo cáhnu, te tu ní cájññ rō ruhū. Te vijna te ni quee hora jeē jññ rō ruhū jíin jeē sáha rō táca jniñu jeē ndácu jeneé jeē ndeé núū neé. Achí yá.

Jeē ní cachi Pedro jeē tu jíní de ya

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Te ni cajññ de ya cuangoo de jíin yá vehe sutū cu-jéhu ga. Te Pedro chi jicá-ni ndíquín de ya. ⁵⁵ Te táca policía ni cascáyú de ñuhūn ini patio, te ni condúu de yuñúhún un cáyúcú de. Te suni ni cucōo Pedro jíin de. ⁵⁶ Te ñn ñahan jéjñíñu ini vehe un, ní jito ña nuū de jeē néne de yuñúhún. Te ni jito vāha ña nuū de, te ni cahān ña:

Tēe yáha suni ni jica de jíin téé ún, áchí ña.

⁵⁷ Te máá de tu ní cáchi de, chi ni cahān de:

Tu jíní rī tēe ún, áchí de.

⁵⁸ Te ni cunúu jecu gā, te ni jito tucu inga ñayuu nuū Pedro, te ni cahān:

Róhó, suni jnáhan táca téé un cúu rō, áchí.

Te ni cahān Pedro:

Nasūu cúu ri, hombre, achí de.

⁵⁹ Te ni cuu nájñuhun ñn hora gā, te ni cahān ñhin inga de:

Jendaá ndije jeē téé yáha ní jica de jíin téé ún, chi suni tēe región Galilea cúu de, áchí de.

⁶⁰ Te ni cahān Pedro:

Hombre, tu jíní rī na jñuhun cáhán rō.

Te sá súcuan cáhán gā de, te ni cana-ni líhli.

⁶¹ Yūcuán na te ni ndió cóto máá Jítoho yō, te ni jito ya nuū Pedro. Te ni nucūhun ni de jñuhun ni cahān yā jíin de: Nde ná tu cana líhli, te yūhu rō te cahān rō uní jínu jeē tu jíní rō ruhū. ⁶² Te ni quenda de cuahān de, te yōhyo ni ndahyū de jeē ní cachi de jeē tu jíní de ya.

Jeē ní casácatā de nuū yā

(Mt. 26.67-68; Mr. 14.65)

⁶³ Te táca téé cándito Jesús, ni casácatā de nuū yā, te ni cacani de ya. ⁶⁴ Te ni cajesí de sahma nuū yā, te ni cacani de nuū yā, te ni cacahān de:

Cachi ndé ñn cúu jeē ní cani róhó, áchí de.

⁶⁵ Te cuehē gā jñuhun súcuan ni cacahān neé de jíin yá.

Jeē ní indichi Jesús nuū junta tēe cácujeéhu ga

(Mt. 26.59-66; Mr. 14.55-64; Jn. 18.19-24)

⁶⁶ Te jeē ní cundijin, te ni candutútú táca téé jéhu cándacu jniñu nuū ñayuu hebreo, jíin sutū cácujeéhu, jíin téé cástéén tutu ley Yaā Dios. Te cuangoo de jíin yá nuū junta tēe cácujeéhu ga, te yūcuan ní cacajñuhún de ya:

⁶⁷ Cachi, ¿á máá rō cúu Cristo jeē ní tají Yaā Dios? Achí de.

Te ni cahān yā jíin de:

Vēsú na cáhān rī jeē suu ri cúu, te ni ma candíje cuiti rō. ⁶⁸ Te suni núu cajñūhun máá rí rohó jíināhan ró, te suni ma stió cuíñí rō nuū rī, ni ma siaá rō ruhū. ⁶⁹ Te ruhū, Yaā ní nduu tēe, tāca quívi jeē quíji conene ri la-do váha máá Yaā iyó poder, achí yá.

⁷⁰ Yūcuán na te ndíhi de ni cacajñūhún de ya:

¿A máá ró cúu Sēhe Yaā Dios núu súcuan?

Te ni cahān yā jíin de:

Suu ri cúu, nájnūhun cácahān rō, achí yá.

⁷¹ Yūcuán na te ni cacahān de:

¿Na testigo gā jíni ñúhún yó núu súcuan? Chi ni cajini sōho yó jíin yuhu máá de jeē cahān ndevāha de jeē cúu de Sēhe Yaā Dios. Achí de jíināhan de.

Jeē ní indichi Jesús nuū Pilato

(Mt. 27.1-2, 11-14; Mr. 15.1-5; Jn. 18.28-38)

23 Yūcuán na te ni candocuíñí ndíhi de, te cuangoo de jíin yá nuū Pilato. ² Te yūcuan ní caquejé de cácahān de cuēchi siquī yā:

Ni canihīn na tēe yáha jéē stóna de ñayuu siquī tohō. Te cáhān de jeē tú váha jeē cuāha ná xúhun renta nuū rey nación Roma jeē ndácu jniñu nuū nación na. Te suni cáhān de jeē maá de cúu Cristo, Rey jeē ní tají Yaā Dios. Achí de jíināhan de.

³ Yūcuán na te Pilato ni cajñūhún de ya:

¿A máá ró cúu Rey ñayuu hebreo?

Te ni cahān yā:

Suu ri cúu, nájnūhun cáhān rō, achí yá.

⁴ Te ni cahān Pilato jíin sūtū cácujuhū jíin ñayuu cuehē ún:

Tú ni ñn jñūhun stívi cáhān tēe yáha jéē nihín rī cuēchi siquī de, achí de.

⁵ Te máá de víhyá gā ni cacahān de:

Tēe yáha stóna ndasí de ñayuu siquī tohō jíin jñūhun stéén de níí Judea. Chi ni quejé de stéén de nde Galilea, te vijna te nde yáha, achí de.

Jeē ní indichi Jesús nuū Herodes

⁶ Te nuū ní jini sōho Pilato jeē Galilea cácahān, te ni cajñūhún de ñayuu núu tēe región Galilea cúu ya. ⁷ Te nuū ní cacahān ñayuu jeē cúu ya tēe Galilea, te ni ndacu de jniñu jeē na quígo de jíin yá nuū Herodes, tēe cúu gobernador Galilea. Chi quívi ún suni íne Herodes ñuu Jerusalén. ⁸ Te nuū ní jito de nuū Jesús, te yōhyo ni cusí ni de, chi je ni cuu cuehē tiempo jeē cuní de coto de nuū yā. Chi ni nihín de jñūhun ya, te ñūhun ni de jeē sáha ya ñn jniñu jéhu coto de. ⁹ Te ni cajñūhún de ya cuehē jñūhun, te tu ní stió cuíñí yā ni ñn jñūhun nuū de. ¹⁰ Te suni cáhān tāca sūtū cácujuhū jíin tēe cástéén tutu ley, te nihín ni cacahān de cuēchi siquī yā. ¹¹ Yūcuán na te Herodes jíin táca soldado de ni cacahān neé de jíin yá, te ni casácatā de nuū yā, chi ni cachuhun de ya sahma váha luu jeē cúu sahma rey. Te Herodes ni ndacu de jniñu jeē na quíundeca de ya

nuū Pilato. ¹² Te máá quívi un ní candumaní jnāhan Pilato jíin Herodes, chi ichi yátá ni caquíñí jnāhan ni de.

Jeē ní cundaā jeē cúu yā

(Mt. 27.15-26; Mr. 15.6-15; Jn. 18.39-19.16)

¹³ Yūcuán na te ni cana Pilato tāca sūtū cácujuhū jíin táca tēe cándiso jniñu jíin táca gā ñayuu, ni candutútú.

¹⁴ Te ni cahān de:

Ni caquindeca ró tēe yáha núu rī, jeē cácahān rō jeē stóna de ñayuu siquī tohō. Te je ni stichí rī de, ni cajito jínúu rō. Te tu ní nihín rī ni ñn cuēchi siquī de nájnūhun jeē cácahān rō. ¹⁵ Te ni Herodes, tu ní nihín de, chi ni natají tucu de tēe yáha núu rī. Te tú cuiti ni ñn cuēchi ní sáha de jeē cúu de. ¹⁶ Núu súcuan te na cuáha ri castigo de, te siáá rī de quihín de, achí Pilato.

¹⁷ Te íyó costumbre jeē tāca vico pascua siaá Pilato ñn preso jeē cuní ñayuu. ¹⁸ Te ñayuu cuehē ún, inuú-ni ni cacana jee i:

Na cúu tēe jííñá, te siáá ní Barrabás, achí i.

¹⁹ Te Barrabás íne de vecāa siquī jeē ni stóna de ñayuu siquī tohō ini ñuu ún, te ni jehni de ndíyi. ²⁰ Te Pilato cuní de siáá de Jesús, te ni cahān tucu de jíin ñayuu. ²¹ Te máá i víhyá gā ni cacana jee i:

Cata caa ní de jicā cruz, na cúu de, achí i.

²² Te ni cahān tucu de jíin i vuelta uní:

¿Na cuēchi ni sáha de núu súcuan? Tu ní nihín cuiti rī ni ñn cuēchi siquī de jeē cúu de. Núu súcuan te na cuáha ri castigo de, te siáá rī de quihín de, achí Pilato.

²³ Te víhyá gā ni cacana jee ñayuu un, ní cacahān nihín i jeē na cúu yā jicā cruz. Te máá i jíin táca sūtū cácujuhū, ni cacana jee ndasí i. Te ni cacundeyí i ni cascāhān i Pilato jeē na cúu yā. ²⁴ Yūcuán na te ni ndacu Pilato jniñu jeē na cóo nájnūhun cácuñi i. ²⁵ Te ni siaá de tēe jeē ní cajicān i, tēe jeē íne vecāa jeē ni stóna de ñayuu siquī tohō te ni jehni de ndíyi. Te ni jēhe de jñūhun jeē na cúu Jesús nájnūhun cácuñi i.

Jeē ní cacata caa de ya jicā cruz

(Mt. 27.32-44; Mr. 15.21-32; Jn. 19.17-27)

²⁶ Te cuangoo tāca soldado jíin yá jeē cahni de ya jicā cruz. Te ni canihīn de ñn tēe ñuu Cirene, nání de Simón, vendiji de jeē ni jéhēn de rancho. Te ni catejñiñu de tēe un jéē cóndiso de cruz yā quihín de yatā yā.

²⁷ Te cuehē ndasí ñayuu ndíquin i yatā yā cuangoo i. Te suni cuehē ñahan cuangoo ña, te cándahyū cohó ña jeē cácuñihyá ni ña jehē yā. ²⁸ Te ni ndió cóto Jesús nuū ña, te ni cahān yā:

Róhó ñahan Jerusalén jijnāhan ró, ma ndahyú rō jehē rī, chi sa suhva ndahyú rō jehē máá ró jíin jéhē sēhe ró jíināhan i. ²⁹ Chi quee quívi jeē coo jñundóho xeēn siquī rō, te cahān rō: Yōhyo ndetū tāca ñahan númá, jíin jéē tu ní scácu sēhe, jíin jéē tu ní cóndeca yiquín, chi tú sēhe ña jeē jnahuhū ni ña jeē ndóho i, achi rō jijnāhan ró. ³⁰ Quívi ún te quejé ñayuu cahān i jíin táca yucu: Cotúu síquī rī jijnāhan ri návāha cuu rī. Te suni

jiín táca loma: Casi siquĩ rĩ jijnáhan ri, achi i. ³¹ Chi núu casáha xeēn i jiín rúhū jeē tú na cuēchi ri, te nagā ni cuu jeē ma cóo xeēn siquĩ ndĩhi ñayuu chi íyó cuēchi i. Achí yá.

³² Te suni cuangoo de jiín úū tēe ni casáha cuēchi xeēn, jeē suni cuu de jiín yá. ³³ Te ni jinūcoo de lugar nuū naní Yiqui Xíní, te yūcuan ní cacata caa de ya jicā cruz. Te suni ni cacata caa de ndindúú tēe ni casáha cuēchi xeēn un núū uū gā cruz, ñin de lado váha ya, te inga de lado jecó yá. ³⁴ Te níni jéē súcuan cúu, te ni cahān Jesús:

Tátā, cone cáhnu ni ni núū de jijnáhan de, chi tu cáji-ni de na vé casáha de, áchí yá.

Te soldado un ní casáha de sorteo jeē siquĩ ndese ni hĩn ñin ñin de sahma ya. ³⁵ Te cáhĩn ñayuu yūcuan, cájito i nuū yā. Te suni nde tēe cándiso jniñu, cácahān catá de cájito de ya:

Núu inga ñayuu ni jnama de, te na jnama de máá de vijna, te núu ndaā jeē Cristo jeē ní nacāji Yaā Dios cúu de, áchí.

³⁶ Te táca soldado suni ni casácatā de nuū yā, chi ni quecoo de nde nuū yā, te ni cajēhe de vinagre iyá coho ya. ³⁷ Te cácahān de jiín yá:

Núu máá ró cúu Rey ñayuu hebreo, te na jnama ró máá ró, achí de.

³⁸ Te suni ni iyo jnūhun jeē ndeé xinĩ cruz yā jeē cahán na siquĩ ni jihĩ yā, te suhva yósó jiín yuhu griego jiín latín jiín hebreo: Yáha cúu Rey ñayuu hebreo, achí.

³⁹ Te ñin jeē ndindúú tēe ni casáha cuēchi xeēn, jeē cándita caa, ni cahān neé de nuū yā:

Núu máá ró cúu Cristo, te na jnama ró máá ró te suni jnama ró ndindúú rí, achí de.

⁴⁰ Te inga de ni cahān de nuū jnáhan de:

¿A tu yúhú ró Yaā Dios naún? Chi ñnuú cándoho yó jiín Yaā yáha. ⁴¹ Te máá yó chi vetū-ni cándoho yó, chi yáha cánihĩn yō castigo siquĩ jniñu neé ní casáha yó. Te Yaā yáha chi tú ni ñin cuēchi ní sáha ya, achí de.

⁴² Te ni cahān de jiín yá:

Jesús, nucūhun ni ni sáña jéé quéjéé ní ndacu ní jniñu, áchí de.

⁴³ Yūcuán na te ni cahān Jesús jiín de:

Jendaá cahán rĩ jiín ró jeē víjna te condee rō jiín rí nuū jardín andiví, áchí yá.

Jeē ni jihĩ Jesús

(Mt. 27.45-56; Mr. 15.33-41; Jn. 19.28-30)

⁴⁴ Te nuū ní cuu nájñūhun cahuxĩ uū, te ni cunee ní cáhnu nde cahunĩ. ⁴⁵ Te ni cujnúú níāndii. Te sahma ndíta caa jeē ndihyú cuarto ñi ini templo cáhnu, ni ndatā-ni sava sava. ⁴⁶ Yūcuán na te ni cana jee Jesús:

Tátā, naquihin ní ánuá na, áchí yá.

Te súcuan ni cahān yā, te ni jihĩ-ni ya.

⁴⁷ Te tēe nación Roma jeē cúu capitán ni jito de jeē súcuan ni cuu, te ni cahān de jeē yóhyo cújéhu Yaā Dios, te áchí de:

Jendaá ndije jeē tēe tú na cuēchi cúu tēe yáha, áchí de.

⁴⁸ Te ndivii ñayuu cáhĩn yūcuan ní cajito i táca jéé ní cuu, te cácani i yiqui jicā i jeē cájnahuhū ni i, te ni nandió cóo i cuanungoo i. ⁴⁹ Te táca ñayuu cájini jnáhan jiín yá, jiín táca ñahan Galilea jeē ní cajica ña jiín yá, cáhĩn jicā ña cájito ña táca jéé ní cuu.

Jeē ní quindūji Jesús

(Mt. 27.57-61; Mr. 15.42-47; Jn. 19.38-42)

⁵⁰ Te ni iyo ñin tēe váha tēe ndaā, nání de José. Te tēe ñuu Arimatea ndañūū Judea cúu de. Te cúu de jnáhan táca tēe hebreo cácujuhnu ga jeē casáha junta. ⁵¹ Te ñúhun ni de jeē quiji quivĩ jeē ndacu Yaā Dios jniñu, te suni tu ní núnahan ni de jeē ní casándaā junta un jéé cúu Jesús. ⁵² Te tēe un ní jehēn de nuū Pilato, ni jicān de yiqui cúñu Jesús. ⁵³ Te ni snúu de ya jicā cruz, te ni chusúcun de ya ñin sahma cuitá. Te ni chindūji de ya ini ñin yaū jeē ní caan jicā ñin cava, nuū ná tu quindūji ndĩyĩ. ⁵⁴ Te quivĩ un cúu quivĩ casátūhva ñayuu, chi jehĩni un quéjéé quivĩ ndétātú.

⁵⁵ Te ñahan ní quiicoo jiín yá nde Galilea, ni jengoo ña jíin José, te ni cajito váha ña yaū ún, jíin ndese ni cachindūji de ya. ⁵⁶ Te cuanungoo ña vehe ña, te ni casátūhva ña táca perfume jiín aceite yucū jeēn asĩn. Te ni candetātú ña quivĩ ndétātú, nájñūhun ndacu ley Yaā Dios jniñu.

Jeē ní natecu Jesús

(Mt. 28.1-10; Mr. 16.1-8; Jn. 20.1-10)

24 Te jenéhen ndasĩ quivĩ domingo, te ni jinūcoo tucu ñahan un núū ní yindūji Jesús, te cándahá ña táca perfume jiín aceite ni casátūhva ña. Te suni cuangoo sava ga ñahan jíin ña. ² Te nuū ni jinūcoo ña, te ni cajito ña jeē ní cujiyo yuū ndihyú yuyáú ndĩyĩ. ³ Te ni quivícoo ña yaū ún, te tuá yiqui cúñu Jitoho yō Jesús ni cájito ña. ⁴ Te ni cacunéé ni ña cájito ña jeē tuá ndĩyĩ. Sáa te ni cajito ña uū ndajéhé Yaā Dios jeē cáa nájñūhun tēe, cáhĩn ya xiin ña, te cáñūhun ya sahma ndíndéé. ⁵ Te yóhyo ni cayūhú ña, te ni cajexin ña nuū ña nde nuū ñúhun. Te ni cacahān ndajéhé un jíin ña: ¿Naun sa nuū cáyindūji ndĩyĩ cánanducú ró Yaā técu? ⁶ Tuá yā yáhá, chi je ni natecu yā. Te nucūhun ni rō ndese ni cahān yā jíin ró ná íne ga yā región Galilea. ⁷ Chi ni cachi ya jeē maá yá, Yaā ní nduu tēe, cánuú natūu ya nuū táca tēe cáhĩyo cuēchi, jeē jniñ de ya cahni de ya jicā cruz, te nuū uní quivĩ te natecu yā. Achí ndajéhé un.

⁸ Yūcuán na te ni canucūhun ni ña táca jnúhun ni cahān Jesús. ⁹ Te ni quendacoo ña nuū ní yindūji ya, te cuanungoo ña. Te ni canacani ña táca jnúhun yáha núū ndihúxĩ ñin apóstol jíin núū táca gá de. ¹⁰ Te ñahan ní canacani jnúhun yáha núū tēe cácuu apóstol, cúu ña María ñuu Magdala, jíin Juana, jíin María naná Jacobo, jíin sava ga ña. ¹¹ Te táca apóstol chi cájeni ni de

jeē jnúhun cánéé cáñúú cácahān ña, te tu ní cácañdíje de.

¹² Te vēsú súcuan, te Pedro ni quenda de, te jínu de cuacondēhé de nuū ní yindūji ya. Te ni jito nihni de ini yaū, te ni jito de jeē sahma cuitá un cáyūcu máá na. Te cuanuhun de vehe de, te nahān náā ni de jeē ní jito de jeē tuá yā.

Jeē ní ndajñuhun yá jíin úū de ichi cuáhán Emaús

(Mr. 16.12-13)

¹³ Te suu quivī un cuángoo uū jnáhan de ñn ñuu naní Emaús, jeē jicá nájnūhun uxī ñn kilómetro jíin ñuu Jerusalén. ¹⁴ Te cándajñuhún de siquī tācá jniñu jeē ní cuu ún. ¹⁵ Te níiní cándajñuhún de te cácajnūhun jnáhan de, te máá Jesús ni cuyajni ya yatā de, te jíca ya cuahān yā jíin de. ¹⁶ Te ni sáha jíin de jeē tu ní canacuni de ya, vēsú cájito de nuū yā. ¹⁷ Te ni cajñuhun yá de:

¿Na jñuhun cándajñuhun ró cájica ró? ¿Te najehē cácuquíhyá ni rō? Achí yá.

¹⁸ Te ñn de jeē naní Cleofas ni cahān de jíin yá:

Ndihí cuiñi ñayuu cájini i tācá jniñu ní cuu ini ñuu Jerusalén tāca quivī yáha. ¿Te á máñuhún-ni níhín cúu jeē ní quee ní ñuu un jēē tu jíin ni na vé ni cuu? Achí de.

¹⁹ Te ni cajñuhun yá de:

¿Te na vé ni cuu? Achí yá.

Te ni cacahān de jíin yá:

Jeē ní ndoho Jesús ñuu Nazaret, Yaā ní nacani jñuhun Yaā Dios. Te jíin poder Yaā Dios ni sáha ya tācá jniñu jéhu te ni nacani ya jñuhun, jíto jíinúū Yaā Dios jíin táca ñáyuu. ²⁰ Te sutū cácujuhnu jíin tēe cándiso jniñu nuū ná, ni canastúu de ya nuū tāca tēe Roma, te tēe un ní casándaā de jeē cúu yā jicá cruz. ²¹ Te máá ná ní cañuhun ni na jēē maá yá jnama ya nación na Israel nuū ñáyuu Roma nuú. Te siquī tācá jniñu yáha, te ni cane ñga jñuhun. Chi vijna je íyó únī quivī jeē ní cuu ún. ²² Te sava ñahan cájini jnáhan ná jíin, ni canacani ña ñn jñuhun jeē yóhoyo cánaa ni na sáha, chi cacahān ña jeē ní natecu yā. Chi jenéhen ndasí ní jengoo ña yaū ndīyī ún. ²³ Te tuá ni cájito ña yiquí cúñu yā. Te ni ndecoo ña nuū na jíin náhan ná, te cacahān ña jeē ní cajito ña jeē ní canecoo ndajéhé Yaā Dios nuū ña, te ni cacahān jeē ní natecu Jesús. ²⁴ Te ni jengoo sava jnáhan ná ndé yaū ndīyī ún, te ni cajito de jeē súcuan íyó, nájnūhun ni cacahān ñahan ún, te tu ní cájito cuiñi de nuū yā.

²⁵ Yūcuán na te ni cahān maá yá jíin de:

Tēe tu cájecūhun cuiñi ni cácuu ró. Yóhoyo uhū cácañdíje ró táca jnúhun Cristo ni cacahān tēe ni canacani jñuhun Yaā Dios nde jenahán. ²⁶ ¿Te á tu súcuan ní jíiní ñuhún ndoho Cristo tāca jnúndóho yáha, te sáá te quinhun yā nuū lúu cujéhu ya? Achí yá.

²⁷ Te ni nacani cájī yá tāca jnúhun jeē yosó núū tútu íi jeē cahán siquī maá yá. Te ni quejéé yá jíin jnúhun ni tee Moisés, te ni cahān gā yā tāca jnúhun jeē ní catee tēe ni canacani jñuhun ya nde jenahán.

²⁸ Te nuū ni jíinúcoo de ñuu nuū cuángoo de ún, te Jesús ni sáha ya jeē cáca ga yā quihīn yā. ²⁹ Te máá de ni castétu de ya, ni cacahān de jíin yá:

Ndōo ní vehe ná, chi je ni ini te je yajni cuaa, áchí de.

Yūcuán na te ni quivī ya jeē quéndōo ya jíin de. ³⁰ Te nuū ní cucōo ya mesa jeē cájī yā jíin de jíin náhan de, te ni quihin ya staā, te ni jicān tahú yā, te ni tahú cuéchí yá, te ni jēhe ya nuū de. ³¹ Te jeē sáha ya súcuan, te nájnūhun ni cananune tinúú de, te ni canacuni de ya. Te ni ndoñuhún-ni ya nuū de cuahān yā. ³² Te ni cacahān maá de:

Jendaá jeē yóhoyo ni cacusiñ ni yō ná ni nacani ya jñuhun nuū yō ichi ún te ni castūhun cájī yá jñuhun cáhán tutu íi. Achí de.

³³ Yūcuán na te yachī ni canaquihin de ichi, ni canandicó de cuanungoo de ñuu Jerusalén. Te ni canajnáhan de jíin ndihúxí ñn ga apóstol, cáyūcu tútu de jíin sava ga jnáhan de. ³⁴ Te ni cacahān tēe cáyūcu tútu un:

Jendaá ndije jeē ní natecu maá Jítoho yō, te ni nane ndijin yā nuū Simón, achí de jíin náhan de.

³⁵ Yūcuán na te ndindúú tēe un ní canacani de jñuhun ndese ni najnáhan ya jíin de ichi, jíin ndese ni canacuni de ya ná ni tahú cuéchí yá staā.

Jeē ní nane ya nuū tēe cáscuáha jíin yá

(Mt. 28.16-20; Mr. 16.14-18; Jn. 20.19-23)

³⁶ Te sá cacahān gā de tāca jnúhun yáha, te ni jecuiñiñi Jesús mēhñú de jíin náhan de. Te ni cahān yā jíin de:

Ndeyí sñi coo ni rō jijnáhan ró, áchí yá.

³⁷ Te ni candacoto íyo de, ni cayūhú ndasí de, chi ni cajeni ni de jeē ñn ánuá cúu ya. ³⁸ Te ni cahān yā jíin de:

¿Naun cáyūhu ró, te naun cájini siquí ni rō súcuan?

³⁹ Condēhé ndaha ri jíin jéhē rī, te cuni rō jeē maá rí cúu. Jñi ruhū te cuni rō, chi ñn ánuá tu névāha cūñu ni yiquí nájnūhun cájito ró jēē névāha máá rí, achí yá.

⁴⁰ Te jeē ni cáhān yā súcuan, te ni steén yā ndaha ya jehē yā nuū ni yñi ndūyu cāa. ⁴¹ Te yóhoyo ni cacusiñ ni de, te cánaa ni de. Te vēsú súcuan te ná tu candíje vāha vāha de jeē maá yá cúu. Te ni cahān yā jíin de:

¿A cánevāha ró jecu jeē cájī rī yāhá? áchí yá.

⁴² Yūcuán na te ni cajēhe de ñn pedazo chācá ní tau nuū yā, jíin ñn pedazo ñahmā ndūxi yocō. ⁴³ Te ni quihin ya, te ni yeji yā nuū de jíin náhan de. ⁴⁴ Te ni cahān yā jíin de:

Tāca jēē ní cuu jíin rí cúu jeē ni cáhān rī ná ni ine ri jíin ró jíin náhan ró ndé saá, jeē cánuú squícu tāca jnúhun ri jeē yosó núū tútu ley Moisés, jíin núū tācá tu-tu tēe ni canacani jñuhun Yaā Dios, jíin núū tútu salmo, achí yá.

⁴⁵ Te ni nune ya jeē níjnūní de, návāha cuu jecūhun ni de tāca jēē cahán tutu íi. ⁴⁶ Te ni cahān yā:

Súcuan cáhán nuū tútu jeē ruhū Cristo, cánuú cuu rī, te nuū uní quivī natecu rī. ⁴⁷ Te cuiñi núu jñuhun ri jeē

cánuú nacani ni ñayuu jeē stóo i cuēchi i, te cone cáh-nu ni Yaā Dios nuū i. Te ñuu Jerusalén quejéé cuítē núu jnūhun yáha, te quihīn nuū ñáyuu tācá nación. ⁴⁸ Te máá ró cácuu tēe nacani jnūhun tācá jniñu ní cajito ró. ⁴⁹ Te tají rí Espíritu Santo quiiji ya nuū rō jijnáhan ró, nájnūhun ni jejnūhun Tátá rī. Te na quéndōo ró ñuu Jerusalén condetu ró ndé nihīn rō poder Espíritu Santo jeē quiiji nde andiví. Achí yá.

Jeē ní ndaa ya cuanuhun yā andiví

(Mr. 16.19-20)

⁵⁰ Yūcuán na te ni quenda ya ñuu Jerusalén, cuahān yā nde ñuu Betania jíin de jíjnáhan de. Te ni ndonehen ya ndindúú ndaha ya, te ni jicān tahu yā jehē de. ⁵¹ Te níiní jíicān tahu yā jehē de, te ni cujiyo-ni ya nuū de, ni ndaa ya cuanuhun yā andiví. ⁵² Te máá de ni cachiñúhún de ya. Te sáá te cuanungoo de ñuu Jerusalén, te yōhyo cácusii ni de. ⁵³ Te níiní cáhīin de ini templo cáhnu, cánacuatáhú de nuū Yaā Dios. Te ni cuu. Amén.

SAN JUAN

Yaā naní Jnúhun Yaā Dios ni nduu ya tēe

1 Nde xīhna ñúhún ná ni jecōo ndíhi jeē iyó, te je iyó Yaā naní Jnúhun Yaā Dios, chi stéén yā ndíhi jnúhun ndese Yaā cúu Yaā Dios. Te Yaā naní Jnúhun un ndéé yá jíin Yaā Dios, te Yaā Dios cúu ya. ² Máá yá ndeé yá nde jeē xīhna ñúhún jíin Yaā Dios. ³ Te ni sáha Yaā Dios jeē jíin máá yá ni jecōo ndíhi tāca jéé iyó. Te ma jécōo ni ñin jeē iyó núu tu ní sáha máá yá. ⁴ Máá yá sáha jeē técu ndíhi-ni, te máá yá cúu luz jeē steén ini anuá ñayuu, cúu jeē sáha ya jeē jécūhun ni i síquī Yaā Dios. ⁵ Te Yaā cúu luz ún ndíndēe núu ñayuu tu cájica ndaā, jeē nájnūhun cáhīyo i nuū néē. Te ñayuu cáhīyo nuū néē tu cúu ndahva i luz yā.

⁶ Te ni ñyo ñin tēe jeē ní tají Yaā Dios, naní de Juan. ⁷ Tēe un ní quiji de jeē nacani cájī de jnúhun máá Yaā cúu luz, návāha candíje tāca ñayuu jeē jíin jnúhun cáhán de. ⁸ Nasūu máá Juan cúu luz ún, chi cúu de ñin jeē ní nacani cájī jnúhun máá luz un. ⁹ Te máá Yaā cúu luz ndije jeē steén ini anuá tāca ñayuu, nde saá ní quiji ya ini ñayíví.

¹⁰ Te Yaā cúu Jnúhun Yaā Dios ni condee yā ini ñayíví, te vésú jeē jíin máá yá ni sáha Yaā Dios ñayíví, te ñayuu ñayíví tu ní cácu ni i cuatáhú i jeē maá yá cúu.

¹¹ Ni quiji ya nuū ñayuu maá yá nación hebreo, te ñayuu ún tu ní cájetáhú i ya. ¹² Te vésú súcuan te sava ñayuu chi ni cajetáhú i ya, te ni cacandíje i jeē sáha ya jehē i. Te nuū maá i ni jēhe ya jnúhun jeē ndúu i sēhe Yaā Dios. ¹³ Te jeē ndúu i sēhe Yaā Dios, nasūu jíin modo jeē cácacu ñayuu ini ñayíví, ni nasūu síquī jeē cácu ni tēe, chi máá Yaā Dios sáha ya jeē ndúu i sēhe ya.

¹⁴ Te máá Yaā cúu Jnúhun Yaā Dios ni nduu ya tēe, te ni condee yā jíin yó. Te ni cajito yó jéé yóhyo luu cújéhu ya, chi máñúhún-ni ya cúu Sēhe Tátá yā, Yaā cujéhu súcuan. Te máni máá jéé sáha ya jeē váha yóhó, te máni máá jnúhun ndaā cahán yā. ¹⁵ Te Juan ni nacani de jnúhun ya, te ni cahān de:

Yaā yáha cúu jeē ni cahān rī náa áchí rí jeē Yaā quiji chi cújéhu ga yā vésú ruhū, chi je iyó yá nde ná tu cacu rí, achí de.

¹⁶ Te ndíhi yó ní canihīn yō cuehē ndasí jeē váha iyó núu yā, chi máni jeē váha sáha sáha ya jíin yó.

¹⁷ Moisés ni steén de ley Yaā Dios nuū ñayuu jenahán, te Jesucristo chi sáha ya jeē váha yóhó te steén yā tāca jnúhun ndaā Yaā Dios nuū yō. ¹⁸ Tú ni ñin ñayuu ni jito cuiti nuū Yaā Dios. Te máñúhún-ni Sēhe ya jeē ndeé yá

jíin Tátá yā, suu ya ni steén nuū yō ndese Yaā cúu Yaā Dios.

Jnúhun Jesús jeē ni cáhān Juan tēe scuándute

(Mt. 3.11-12; Mr. 1.7-8; Lc. 3.15-17)

¹⁹ Te ñayuu hebreo ñuu Jerusalén, ni catajī i jecu sutū jíin tēe grupo levita jeē cájeñíñu ini templo, ni jengoo de nuū Juan, návāha cajnúhún de ndé ñin cúu Juan te na jniñu ndíso de. ²⁰ Te Juan cájī ní cachi de:

Nasūu ruhū cúu Cristo, achí de.

²¹ Te ni cacajnúhún tucu de:

Núu súcuan ¿te ndé ñin cúu ró? ¿A cúu ró Elías, tēe ni nacani jnúhun Yaā Dios nde jenahán, chí naún?

Te ni cahān Juan:

Nasūu de cúu rí.

Te ni cacajnúhún tucu de:

Núu súcuan ¿te á cúu ró tēe nacani jnúhun Yaā Dios jeē achí tutu ñi jeē quiji?

Tuú, áchí tucu Juan.

²² Te ni cacahān tucu jíin de:

¿Te ndé ñin cúu ró núu súcuan? Cachi nuū rī jijnáhan rí, chí jíni ñúhún castūhun rí nuū tāca tēe ni catajī ruhū vējicoo rí. Cachi na jniñu ndíso ró víi.

²³ Te ni cahān Juan:

Máá rí cúu tēe jeē ni cahān Isaías, tēe ni nacani jnúhun Yaā Dios nde jenahán, jeē quiji rí cana jee rí nde nuū ñúhún téhé. Te cáhán rī jíin ñayuu jeē na sátūhva i máá i, chi quiji máá Jítoho yō. Achí Juan.

²⁴ Te tēe grupo fariseo cácu jeē ní catajī tēe ni quiji-coo ún. ²⁵ Te ni cacajnúhún de Juan:

Núu súcuan ¿te naun scuándute ró te núu nasūu Cristo ni Elías ni máá tēe quiji nacani jnúhun Yaā Dios cúu ró?

²⁶ Te ni cahān Juan:

Ruhū chi jíin ndute scuándute rí. Te mēhñu ró jijnáhan ró íne ñin Yaā jeē tu cájini rō. ²⁷ Te Yaā un cúu jeē ni cahān rī jeē quiji ya te cújéhu ga yā vésú ruhū. Chi tú na vé jéhu cuiti cúu rí nuū yā, ni jeē cuajníñu rí nuū yā vésú ñin jniñu lúlí gá nájnūhun jeē ndají rí correa ndijēn yā. Achí de.

²⁸ Súcuan ni cuu jeē ní candajnúhún de jíin Juan nde Betábara jeē íne ichi núu cáne niāndii yūte Jordán, nuū scuándute Juan.

Siquē jeē cúu ya Londe Yaā Dios

²⁹ Te inga quivī un ní jito Juan nuū Jesús jeē véji ya nuū de. Te ni cahān de jíin ñáyuu:

Condēhe jíinahan ró, chi yāha véji Yaā cúu Londe jeē ní tají Yaā Dios, te cuu yā jeē sándoo ya cuēchi ñayuu ñayiví. ³⁰ Yaā yāha cúu jeē ni cahān rī jeē quíji ñin Yaā cujéhnun ndasí, chi je íyó yá nde ná tu cacu ri. ³¹ Te nde saá te tu ní jíin rī jeē yāha cúu Yaā ní tají Yaā Dios. Te ni quiji ri jeē scuándute ri ñayuu ñuu yō Israel jíin ndute, návāha stéén rī nuū i jeē suu ya cúu, áchí Juan.

³² Te suni ni cahān gā de jnūhun ya:

Ni jito ri Espiritu Santo, ni cuun ya ichi ándiví, cáa ya nájnūhun paloma, te ni quee ya xinī Jesús. ³³ Te nde saá te ná tu cuni rī jeē Jesús cúu. Te máá Yaā Dios jeē ní tají yá ruhū jeē scuándute ri jíin ndute, ni cahān yā jíin rí: Núu ni jito ró jéē cúun Espiritu Santo te quendōo xinī ñin tēe, yūcuan cúu Yaā jeē cuáha Espiritu Santo condee ini anuá ñayuu, achí Yaā Dios. ³⁴ Te je ni jito ri ún, te nácani cájí rí jnūhun jeē maá yá cúu Sēhe Yaā Dios. Achí Juan.

Uū tēe jeē ní cana ya xīhna gā

³⁵ Te inga quivī ún te Juan íne tucu de yūcuan jíin úū tēe cájica jíin de. ³⁶ Te ni jito de nuū Jesús jeē jíca ya yūcuán. Te ni cahān de:

Condēhe jíinahan ró, chi yūcuan cúu Yaā cúu Londe jeē ní tají Yaā Dios.

³⁷ Te ndindúú tēe cájica jíin Juan ni cajini sōho de jnūhun yāha, te ni candiquīn de Jesús. ³⁸ Te ni ndió cóto Jesús, te ni jito ya jeē cándiquīn de yatā yā. Te ni cahān yā jíin de:

¿Na vé cánanducú ró?

Te ni cacahān de jíin yá:

Maestro, ¿ndé nuū ndeé ní?

³⁹ Te ni cahān yā jíin de:

Quíngoo yó te cuni rō.

Te ni jengoo de, te ni cajito de nuū ndeé yá. Te ni caquendōo de jíin yá quivī ún, chi nájnūhun cacuñ jehíni cúu.

⁴⁰ Te Andrés, ñani Simón Pedro, cúu ñin jeē ndindúú tēe un jéē ní cajini sōho jnūhun ni cahān Juan, te ni candiquīn Jesús. ⁴¹ Te Andrés, yachí ni jenanducú de ñani de Simón, te ni cahān de jíin:

Ni caquijnahan ri jíin Mesías, achí de. Te jnūhun un cúní cahān Cristo, Yaā ní tají Yaā Dios.

⁴² Yūcuán na te cuanuhun de nuū Jesús jíin Simón. Te nuū ní jito Jesús nuū Simón, te ni cahān yā:

Máá ró cúu Simón sēhe Jonás. Te nde vijna te conaní ró Cefas, achí yá. Te jnūhun un cúní cahān Pedro, jeē cuní cahān yū.

Jeē ní cana ya Felipe jíin Natanael

⁴³ Te inga quivī un cúní Jesús quihīn yā región Galilea. Te ni nihīn jnāhan ya jíin Felipe, te ni cahān yā jíin de:

Condiquīn ruhū na quihīn yō.

⁴⁴ Te Felipe cúu tēe ñuu Betsaida, jeē cúu ñuu Andrés jíin Pedro. ⁴⁵ Te ni jenanducú de Natanael, te ni cahān de jíin:

Ni canihīn jnāhan ri jíin Yaā jeē yosó jnūhun ya nuū tútu ley jeē ní tee Moisés, jíin núu tútu ni catee tēe ni canacani jnūhun Yaā Dios nde jenahān. Te Jesús sēhe José ñuu Nazaret cúu ya. Achí de.

⁴⁶ Te ni cahān Natanael jíin de:

¿Te ndese cúu cujéhnun ñin tēe jeē ní cacu ñuu ndahú Nazaret?

Te ni cahān Felipe:

Quihīn yō de cuni rō, achí de.

⁴⁷ Te ni jito Jesús jeē véji Natanael, te ni cahān yā:

Yāha véji ñin tēe ndaā jeē cúu ndije yucūn Israel, chi tu stáhú cuiñ de, áchí yá.

⁴⁸ Te ni cahān Natanael jíin yá:

¿Ndese jíiní ni sáña?

Te ni cahān Jesús:

Je ni jito ri rohó ndé ná tu cana Felipe xinī rō, ná íne ró jéhē nundéhe higo, achí yá.

⁴⁹ Yūcuán na te ni cahān Natanael jíin yá:

Maestro, máá ní cúu Sēhe Yaā Dios, máá ní cúu Rey ñuu yō Israel, achí de.

⁵⁰ Te ni cahān Jesús:

¿A máá jéē ni cahān rī jeē ní jito ri rohó ná íne ró jéhē nundéhe higo, te jeē yūcuan cándije ró rúhū naún? Tuú chi coo jniñu jéhnun ga coto ró vésú jeē yāha, achí yá jíin de.

⁵¹ Te ni cahān gā yā:

Jendaá cahān rī jíin ró jijnahan ró jéē nde vijna te coto ró jéē núne andiví, te tēcá ndajéhé Yaā Dios cándaa cánuu nuū ruhū, Yaā ní nduu tēe, achí yá.

Jeē ni jéhēn yā ñin vico nándāha ñuu Caná

2 Te ni yāha unī quivī, te ni íyo ñin vico nándāha ñuu Caná ndañúū Galilea. Te yūcuan íne náná Jesús. ² Te suni ni cacana i Jesús jíin tēe cáscuáha jíin yá, ni jéhēn yā vico un jíin de. ³ Te ni ndoco vino. Te náná Jesús ni cahān ña jíin yá:

Ni ndoco vino i, achí ña.

⁴ Te ni cahān Jesús jíin ña:

¿Naun cáhān ní súcuan jíin ná nánā? Chi ná tu quee quivī jeē sáha ná jniñu jéhnun, achí yá.

⁵ Te náná yā chi ni cahān ña jíin ñáyuu cájeni cohō:

Sáha ró jijnahan ró táca jéē cahān yā jíin ró. Achí ña.

⁶ Te yūcuan íyó íñu tenéjā yū jeē ñúhun ndute cájichi ñayuu hebreo jeē ndúndoo i nuū Yaā Dios. Te ñin ñin tenéjā un cánda cahun cuñ xico chí ciento litro ndute. ⁷ Te ni cahān Jesús jíin ñáyuu cájeni cohō:

Scútú ndíi rō tēcá tenéjā yáha.

Te ni cascútú ndíi i. ⁸ Te ni cahān yā jíin i:

Vijna te quēen ró jecu te quindecá ró coto ndee tēe ndíto vico, achí yá.

Te ni cajendeca i nuū de. ⁹ Te ni séyūhú de ndute jeē ní nduu vino, te tu jíní de ndé ní canihīn i. Chi máni mozo un cúu jeē cájini, chi máá i ni caquēen ndute ún. Yūcuán na te tēe ndíto vico ni cana de tēe nándāha.

¹⁰ Te ni cahān de jíin:

Tāca ñáyuu chi xīhna gā vino váha cájēhe i, te núu je ni cajihí váha ñáyuu cáhīn vico, yūcuán na te jéhe de vino ndahú na. Te máá ró tucu ni sáha ró, chi nde jeē sándīhí te jéhe ró vino jeē yóhoyo váha ga jíhi, áchí de.

¹¹ Jniñu yáha jéē ni sáha Jesús ini ñuu Caná ndañū Galilea cúu jniñu jéhu xīhna ñúhún jéē ni sáha ya jeē steén yā poder yā. Te súcuan ni steén yā jeē yóhoyo cújéhu ya. Te tēe cáscuáha jíin yá ni cacandíje de ya.

¹² Te ná ni yáha jniñu yáha, te cuahān yā ñuu Capernaum jíin náná yā jíin táca ñani yā jíin tēe cáscuáha jíin yá. Te ni coyūcu yá yūcuán jecu quiví.

Jeē ní quenehen ya ñayuu ini templo

(Mt. 21.12-13; Mr. 11.15-18; Lc. 19.45-46)

¹³ Te jeē cuácuyajni vico pascua casáha jnáhan ñuu yā hebreo, te cuahān yā ñuu Jerusalén. ¹⁴ Te ini templo cáhnu ni jito ya ñayuu cáxícó stiquí jíin lanchi jíin paloma, jíin ñáyuu castáyí xūhun, cáyūcú i nuū mesa i. ¹⁵ Te jeē súcuan ni jito ya, te ni sáha ya ñuu cuarta ñí. Te ni scúnu ya tācá i ini templo, nde jíin lanchi jíin stiquí i. Te ni jete yā xūhun ñáyuu castáyí. Te ni scotúú yá tāca mesa i. ¹⁶ Te ni cahān yā jíin ñáyuu cáxícó paloma:

Tava tācá quití yáha. Te ma sáha ró yáhu ini vehe Tátá rī. Achí yá.

¹⁷ Yūcuán na te tēe cáscuáha jíin yá, ni canucūhun ni de jnūhun yósó nuū tútu i: Je yajni cuu na jéē yóhoyo ndíhví ni na síquí vehe ní, áchí yá jíin Tátá yā, achí tu-tu.

¹⁸ Te tēe ñuu yā hebreo ni cacajñuhún de ya:

¿Na jniñu jéhu sáha ró jéē steén rō poder rō, te cucáhnu ni rī jeē ndíso jniñu ró sáha ró súcuan? áchí de jíin yá.

¹⁹ Te ni cahān yatá Jesús:

Canu rō templo yáha, te nuū uní quiví te nucondichi sáha ri, achí yá.

²⁰ Yūcuán na te ni cacahān tēe hebreo un:

Uū xico iñū cuiyā te ni jīnu ni cuvāha templo yáha. Te rōhó, ¿á núu uní-ni quiví te nucondichi sáha ró naún? Achí de.

²¹ Te templo jeē cahán Jesús cúu máá yiquí cúñu yā, chi cahni ñayuu yā te natecu yā nuū uní quiví. ²² Jeē yúcuan cúu jeē ná ni natecu yā jeē ni jíhī yā, te tēe cáscuáha jíin yá ni canucūhun ni de jeē ni cahān yā jnūhun yáha. Te ni cacandíje de jnūhun jeē yosó núu tútu i, jíin jnúhun yáha jéē ni cahān Jesús.

Jeē jíin Jesús ndese cáa ini anuá ñayuu

²³ Te ná íne Jesús ñuu Jerusalén máá vico pascua, te cuehē ñayuu ni cacandíje i jeē cúu ya Cristo, chi ni cajito i tācá jniñu jéhu sáha ya jeē steén yā poder yā.

²⁴ Te máá Jesús chi tu ní jétáhú yá i, chi je jíin yā ndese cáa ini anuá i jíináhan i. ²⁵ Te tu jíin ñúhún yá jeē cáchi ni ññáyuu nuū yā ndese íyó táca ñáyuu, chi máá yá je jíin yā ndese cáa ini anuá i.

Jeē ní candajñuhún Jesús jíin Nicodemo

3 Te ni íyo ññ tēe grupo fariseo, naní de Nicodemo, te cújéhu de nuū ñáyuu ñuu de hebreo. ² Tēe yáha ní quiji de nuū Jesús ññ jecuáa, te ni cahān de jíin yá:

Maestro, je cájini na jéē maá Yaā Dios ni tají yá nihín jéē steén ni jnúhun ya nuū na jíináhan ná. Chi núu tu íyó Yaā Dios jíin ní, te ma cúu sáha ní ni ññ jniñu jéhu nájnūhun sáha máá ní jeē steén ni poder ní, áchí de.

³ Te ni cahān Jesús:

Jendaá cahán rī jíin ró jeē núu tu nacacu jeē ññ ñayuu, te ma cúu quiví i ndaha Yaā Dios jeē ndacu ya jniñu nuū i, áchí yá jíin de.

⁴ Te ni cahān Nicodemo jíin yá:

¿Te ndese cuu nacacu ññ tēe te núu je ni jehnu de? ¿A cuu nucūhun tucu de chíji náná de te nacacu tucu de? áchí de.

⁵ Te ni cahān Jesús:

Jendaá cahán rī jíin ró jeē núu tú nacacu ññ ñayuu, te ma cúu quiví i ndaha Yaā Dios jeē ndacu ya jniñu nuū i. Te jeē nácacu i cúu jeē ndúndoo cuēchi i nájnūhun jíin ndute, te condee Espíritu Santo ini anuá i. ⁶ Jeē cácu sáha ñayuu, chi sēhe ñayuu cúu. Te jeē cácu sáha Espíritu yā, chi sēhe ya cúu. ⁷ Ma náa ni rō cani ni rō ndese cúu jnūhun ni cahān rī jíin ró jeē cánuú jéē nacacu jeē ró jíináhan ró. ⁸ Te tachí chí quēe cuahān ndé-ni cúu nuū cuní maá, te jíin sōho ró jéē cáyu, te tu jíin ró ndé nuū véji ni ndé nuū quihín. Te suni súcuan cúu tāca ñáyuu jeē nácacu sáha Espíritu, chi tu jíin ró ndese sáha ya jniñu ún, áchí yá.

⁹ Te ni cahān tucu Nicodemo:

¿Ndese ga cúu núu súcuan?

¹⁰ Te ni cahān Jesús:

Máá ró cúu ññ maestro jeē cújéhu nuū ñáyuu ñuu yō Israel, te ¿á tu jécūhun ni rō jnūhun yáha naún?

¹¹ Jendaá cahán rī jíin ró jeē jnūhun cájecūhun ni rī cúu jeē cácahān rī jíin ró. Te cánacani cájí rí jnūhun jniñu ní cajito ri. Te tu cáscandíje ró jnúhun cácahān rī. ¹² Chi ni cahān rī jnūhun ndese sáha Yaā Dios ini ñayiví, te tu cáscandíje ró. Núu súcuan ¿te ndese candíje ró núu cahān rī jnūhun táca ndese sáha ya nde andiví?

¹³ 'Chi ni ññ tu ní cáa andiví jeē cúni ndese íyó yúcuan, chi máñúhún-ni ruhū, Yaā ní nduu tēe. Chi andiví ndéé rí, te ni cuun ri véji ri. ¹⁴ Te nájnūhun ni cata caa Moisés ññ coō cāa nuū ññ yujnu, ná ni cajica ñayuu nuū ñúhún téhé, suni súcuan máá rí, Yaā ní nduu tēe, cánuú jéē cóndita caa ri jicā cruz. ¹⁵ Te súcuan cánuú návāha tāca ñáyuu jeē candíje i jeē jnáma ri i, ma jnahnú ndetū i, chi sa suhva cotecu i ññ cáni andiví.

Yōhyo ni cundáhú ni yā ñayuu ñayīví

¹⁶ Chi Yaā Dios yōhyo ni cundáhú ni yā ñayuu ñayīví. Jeē yúcuan ní tají yá Séhe ya ni quiiji, vésú mañúhún-ni ya iyó, návaha tāca ñayuu jeē candíje i jeē jnáma ya i, ma jnahnú ndetū, chi sa suhva cotecu i ñí cání andíví.

¹⁷ Chi tu ní tájī Yaā Dios Séhe ya ini ñayīví jéē snahnú ndetū yā ñayuu, chi sa suhva jeē jnáma ya ñayuu.

¹⁸ Ñayuu jeē candíje i jeē jnáma ya i, ma jnahnú ndetū i. Te ñayuu tu cándíje, je ni jnahnú ndetū i, chi tu ní cándíje i máá Séhe Yaā Dios, te máá ñn-ni ya iyó.

¹⁹ Máá Yaā jeē stíndēē ini anuá ñayuu, je ni quee ya ini ñayīví. Te cánujnahan gā ni ñayuu caca i nájñuhun nuū néē vésú nuū luz yā, chi jniñu cásáha i cúu jniñu néé. Jeē yúcuan cúu jeē jnahnú ndetū ñayuu tu cándíje ún. ²⁰ Chi tāca ñayuu casáha jniñu néé, tu núnjahan cuítī ni i luz yā. Te tu jéhe i jñuhun jeē stíndēē yá ini anuá i, chi tu cúní i jeē natūu jniñu néé cásáha i.

²¹ Te ñayuu jeē cájica jíin jniñu ndaā, jéhe i jñuhun jeē stíndēē yá ini anuá i, návaha natūu ndijin jeē tāca jniñu cásáha i cúu jniñu cúní Yaā Dios. Achí yá jíin de.

Jeē ni cáhān tucu Juan jñuhun Jesús

²² Yūcuán na te Jesús jíin tée cáscuáha jíin yá, cuahān yā región Judea. Te ni condee yā yūcuán jecu tiempo jíin de, te cáscuándute de ñayuu. ²³ Te suni scuándute Juan, íne de lugar jeē naní Enón yajni ñuu Salim, chi yūcuán íyó cuéhē ndute. Te ni quiijicoo ñayuu nuū de, te ni scuándute de i. ²⁴ Súcuan ni sáha Juan nde ná tu quīví de vecāa.

²⁵ Yūcuán na te sava tēe cáscuáha jíin Juan yōhyo ni cacahān de jíin sava jnáhan de hebreo siquī núu ndé ñn cúu modo vāha ga jeē cúchi ñayuu ndundoo i nuū Yaā Dios. ²⁶ Te ni quecoo de nuū Juan, te ni cacahān de:

Maestro, tēe ní ine jíin ní yūte Jordán ichi núu cáne niāndii, jeē ní nacani ní jñuhun de nuū ná, vijna te scuándute máá de, te ndívii ñayuu cuango i nuū de.

²⁷ Te ni cahān Juan:

Ni ñn tēe ma cúu sáha de jniñu Yaā Dios te núu ma tejniñu ya de. ²⁸ Máá ró jijnáhan ró chi ni cajini sōho ró jéē ni cáhān cají rí jeē násūu máá rí cúu Cristo, chi cúu ri ñn jeē ní tají Yaā Dios jeē cósnūu nacani jñuhun jeē quiiji ya. ²⁹ Te núu cásáha vico quijnáhan, te máá yīi cúu jeē ndéca ñasihí. Te amigo yīi un íne jíin de, te jíini sōho jñuhun cáhān de. Te yōhyo cúsiñi ní jíini sōho jñuhun cáhān yīi ún. Te suni súcuan ruhū, chi cúu ri nájñuhun amigo yīi, chi ni quee máá Cristo, te yōhyo cúsiñi ní rī jíini sōho ri jñuhun cáhān yā. ³⁰ Te jíini ñúhún jéē ndujénu ga maá yá te ndululí gá maá rí, achí Juan.

Jeē ní quiiji ya nde nuū sucún

³¹ Te Yaā jeē véji nde andíví, cújénu ya nuū ndíhi. Chi tāca jéē ní cacu ini ñayīví yáha, séhe ñayīví cúu, te máni jñuhun ñayīví cáhān. Te Yaā jeē véji ichi ándíví, chi cújénu ya nuū ndíhi ñayuu. ³² Te nácani ya jñuhun

jeē ní jito ya jíin jéē ní jini sōho ya. Te ñayuu chi tu cá-candíje i jñuhun cáhān yā. ³³ Te núu ñn ñayuu candíje i jñuhun cáhān yā, suu cúu jeē jejnúhún i jeē Yaā ndaā cúu Yaā Dios. ³⁴ Chi Yaā ní tají Yaā Dios véji, máni máá jñuhun Yaā Dios cáhān yā. Chi Yaā Dios tu yícuáha jéhe ya Espíritu yā nuū Yaā ní tají yá. ³⁵ Máá yá jeē cúu ya Tatá, yōhyo maní yā jíin Séhe ya, te ndívii ni jéhe ya ndaha Séhe ya jeē ndacu ya jniñu nuū. ³⁶ Ñayuu jeē candíje máá Séhe ya jeē jnáma ya i, cotecu i ñí cání andíví. Te ñayuu tu cúní candíje Séhe ya, ma cótecu i ñí cání andíví, chi sa suhva cuāha Yaā Dios castigo jeē ndoho i ñí cání.

Jeē ni cáhān Jesús jíin ñahan ñúu Samaria

4 Te tēe grupo fariseo, ni canihīn de jñuhun jeē iyó cuéhē gā tēe cáscuáha jíin Jesús vésú jíin Juan, jíin jéē cuéhē gā ñayuu scuándute ya vésú Juan. ² Te nasūu jéē scuándute máá yá, chi tēe cáscuáha jíin yá cúu jeē cascuándute. ³ Te ná ni jini Jesús jeē súcuan ni canihīn de jñuhun, te ni quenda ya región Judea, te cuanuhun yā región Galilea.

⁴ Te ichi jeē nuhún yā chi yáha región Samaria. ⁵ Te ni jinū yā ñn ñuu región Samaria jeē naní Sicar, yajni ñuhun jeē ni jéhe Jacob nuū séhe de José nde jenahán. ⁶ Te yūcuán íne pozo jeē naní pozo Jacob. Te ni cucōo Jesús xiin pozo un, chi ni cuíta yá jeē cuahān yā ichi. Te nájñuhun cahuxī uū cúu. ⁷ Te ni quee ñn ñahan Samaria, véji ña vequihin ña ndute. Te ni cahān Jesús jíin ña:

Cuāha ní ndute coho ná, áchí yá.

⁸ Te tēe cáscuáha jíin yá, chi je cuango de nde ñuu, cuacuaan de jeē cáji de jíin yá. ⁹ Te ñahan Samaria un ní cahān ña jíin yá:

¿Ndese cúu jeē jicán ni ndute nuū ná coho ní? Chi tēe hebreo cúu ní, te ñahan Samaria cúu ná, áchí ña.

Súcuan ni cahān ña, chi ñayuu hebreo tu cacahān i jíin ñayuu Samaria. ¹⁰ Te ni cahān Jesús:

Núu jeē jiní ni ndese cúní Yaā Dios sáha ya jeē váha níhín, jíin ndé ñn cúu sáña jéē jicán na ndute nuū ní, yūcuán na te máá ní cacān ni núu ná, te cuāha ná ndute jeē cótecu ni ñí cání sáha, áchí yá.

¹¹ Te ni cahān ña jíin yá:

Tátā, yōhyo cúnú pozo yáha, te tú na vé ndahá ní jéē táva ní ndute. Núu súcuan ¿te ndé nuū níhín ni ndute jeē cótecu na sáha? ¹² ¿Te á cújénu ga maá ní vésú jíi yō Jacob, chí naún? Chi máá de ni stóo de pozo yáha nuū yō. Te yáha ní cajihí máá de ndute, jíin táca séhe de, jíin quiiti ndéca de. Achí ña.

¹³ Te ni cahān Jesús:

Tāca ñayuu jeē jíhi ndute yáha, chi jichí tucu i. ¹⁴ Te ñayuu coho ndute jeē cuāha na núu i, chi ma jichí cuíti gā i. Chi ndute jeē cuāha ná un, cane ini i nájñuhun ndute jeē cáne ñuhún, te sáha jeē cotecu i ñí cání, áchí yá jíin ña.

¹⁵ Te máá ña tu ní jécūhun ni ña, te ni cahān ña jíin yá:

Tátā, cuāha ní ndute ún coho ná, návāha ma jichí cuiṭi gā ná, ni tuá jíni ñúhun quiquihin ná ndute pozo yáha, áchí ña.

¹⁶ Te ni cahān Jesús jíin ña:

Cuácana ní yī ní te quiji ní jíin de, áchí yá.

¹⁷ Te ni cahān ña:

Tú yī ná íyó.

Te ni cahān Jesús:

Ndaā cahán ni jéē tú yī ní íyó. ¹⁸ Chi je ni cuu uhūn yī ní, te tēe ndéca ní vijna chi nasūú yī ní cúu de. Yāha cúu jeē ni cáhān ndaā ní, áchí yá.

¹⁹ Te jeē súcuan ni cahān yā, te ni cahān ña:

Tátā, ñn tēe nácani jnūhun Yaā Dios cúu ní, jéni ni ná.

²⁰ Tāca jíi na ñáyuu Samaria, yucu yáha ní cachiñúhún i Yaā Dios. Te máá ní ñáyuu hebreo, cácahān ni jéē ñuu Jerusalén cúu nuū cánuú chiñúhún yó yā, achí ña.

²¹ Te ni cahān Jesús jíin ña:

Nánā, candíje ní jnúhun cáhán na, chi quee quivī jeē ni nasūú yucu yáha ni nasūú ñuu Jerusalén cúu nuū chiñúhún ní maá Yaā cúu Tátá, chi ndihī-ni lugar te cuu chiñúhún ní yá. ²² Máá ní ñáyuu Samaria tu cájini ni ndé ñn cúu jeē cáchiñúhún ní. Te máá ná jijnáhan ná chi cájini na ndé ñn cúu jeē cáchiñúhún ná. Chi nde nuū maá ná jijnáhan ná ñáyuu hebreo cúu nuū véji Yaā jnama ñáyuu. ²³ Te je ni quee quivī jeē ñáyuu cáchiñúhún ndaā, vijna te chiñúhún ndije i Yaā cúu Tátá nde jíin ini jíin ánuá i. Chi máá Tátá cúni yā jeē súcuan chiñúhún ñáyuu yā. ²⁴ Yaā Dios cúu Espiritu, te ñáyuu jeē cuní i chiñúhún i ya, cánuú jéē chiñúhún ndije i ya jíin ini jíin ánuá i, áchí yá.

²⁵ Te ni cahān ñahan ún:

Jíní na jéē quíji Mesías jeē cúu Cristo, Yaā jeē tají Yaā Dios. Te núu ni quee maá yá, te stéén cají yá tāca jnúhun nuū yō.

²⁶ Te ni cahān Jesús:

Maá ná jeē cahán jíin ní, suu ná cúu Yaā ún.

²⁷ Te sá cáhán gā yā súcuan, te ni ndecoo-ni tēe cáscuáha jíin yá. Te ni canaa ni de cájito de jeē ndájnūhun yá jíin ñahan yúcuan. Te ni ñn de tu ní cájnūhún de ya núu na vé cájnūhun yá ña chí na vé ndájnūhun yá jíin ña. ²⁸ Yūcuán na te ñahan un ní stóo ña quīyī ña, te cuahān ña nde ñuu. Te ni cahān ña jíin ñáyuu ún:

²⁹ Nehen na quíngoo yó te coto ró ñn tēe jeē ní cachi ndihī tāca jéē ni sáha ri. Sanaa te máá yá cúu Cristo, jeē cándetu yó quiji, áchí ña.

³⁰ Yūcuán na te ni quendacoo i ñuu ún, te cuangoo i nuū íne Jesús. ³¹ Te nde ná tu jinūcoo i, te tēe cáscuáha jíin yá ni cacahān ndahú de jíin yá:

Maestro, caji ni stāā víi, achí de.

³² Te ni cahān yā jíin de:

Iyó stāā caji rī jeē tu cájini rō ndese cúu.

³³ Yūcuán na te tēe cáscuáha jíin yá, ni cacajnūhun jnáhan de:

¿A ní quindeca ñn ñayuu jeē ní yeji yā, chí naún? áchí de.

³⁴ Te ni cahān Jesús:

Jeē ní cachi rī jeē iyó jéē cáji rī cúu jeē cúsiñ ni rī sáha ri jniñu cúni Yaā ní tají rúhū vēji ri, jíin jéē sínu ri jniñu ún. ³⁵ Te cácahān rō jeē cúmanī cuūn gā yoō te tahndē trigo. Te ruhū chi cáhán rī jíin ró: Condēhe jijnáhan ró, chí ñayuu cuehē cácuu i nájnūhun trigo jeē jé ni cuaan jeē tahndé, chi je cáhīyo tūhva i candíje i ruhū. ³⁶ Te tēe scándíje ñayuu cácuu de nájnūhun tēe cájehnde trigo, te nihīn de yāhu de. Te jeē cánastútú de ñayuu cúu jeē cótecu i ñíí cáni andiví. Te tēe cáscuíté núu jnūhun ri, inuú-ni cusīñ ni de jíin tēe cástéén gā jnūhun ri. ³⁷ Chi ndaā cúu jnūhun jeē cahán: ñn tēe jéte, te inga tēe nástútú, áchí. ³⁸ Te suu cúu jeē ní tají rí rohó jijnáhan ró jéē scándíje ró ñayuu jeē jé ni canihīn jnūhun ya ni casáha inga tēe. Chi inga tēe je ni canacani de jnūhun nuū ñáyuu, te máá ró chi nájnūhun cánastútú ró i cúu jeē scándíje ró i.

³⁹ Te cuehē ñayuu Samaria jeē cáyūcú ñuu ún, ni candíje i Jesús jeē ní jini sōho i jnūhun ni cahān ñahan ún. Chi ni cahān ña: Ni cachi ya ndihī tāca jéē ni sáha ri. ⁴⁰ Te jeē yúcuan cúu jeē ñayuu Samaria un ní jinū-coo i nuū yā, te ni cacahān ndahú i jíin yá jeē na quéndōo ya ñuu i. Te ni ndōo ya yūcuan úu quivī. ⁴¹ Te cuehē gā i ni cacandíje i ya jíin jnúhun cáhán maá yá. ⁴² Te ni cacahān i jíin ñahan ún:

Tuá niní jéē cahán maá ró te candíje ri yā, chi je ni cajini sōho ri jnūhun cáhán maá yá. Te cájini yō jeē maá yá cúu ndije Cristo, Yaā jnama ñayuu ñayiví. Achí i.

Jeē ní nasávāha ya sēhe tēe ndíso jníñu nuū rey

⁴³ Te nuū ni yáha uū quivī ún, te Jesús ni quenda ya Samaria, te ni quihin tucu ya ichi cuanuhun yā región Galilea. ⁴⁴ Chi je ni cahān maá yá jeē tēe cánacani jnūhun Yaā Dios, tu cáhīyo yíñúhún ñáyuu ñuu de jíin de, te suni súcuan ni cuu jíin máá yá. ⁴⁵ Te ná ni najinū yā Galilea, te ñayuu un ní cajetáhú i ya, chi suni máá i ni jengoo i vico pascua ñuu Jerusalén, te ni cajito i tācá jniñu ní sáha ya quivī ni íyo vico ún.

⁴⁶ Yūcuán na te ni jehēn tucu ya ñuu Caná ndañúú Galilea, nuū ni sáha ya jeē ndúte ni nduu vino. Te ini ñuu Capernaum ni íyo ñn tēe cújéhu jeē ndíso jníñu nuū rey. Te cúhú sēhe de. ⁴⁷ Tēe un ní jini jnūhun de jeē ní najinū Jesús región Galilea jeē ni jéhēn yā región Judea. Te ni jecondēhé de ya, te ni cahān ndahú de jíin yá jeē na quihín yā jíin de vehe de, te nasávāha ya sēhe de, chi je yajni cuu i. ⁴⁸ Te ni cahān Jesús jíin de:

Núu tú coto ró jniñu jéhu jeē nāā ni rō sáha, te ma candíje cuiṭi rō jijnáhan ró, áchí yá.

⁴⁹ Te tēe ndíso jníñu nuū rey, ni cahān de:

Cava vāha ni ní na quihín yō, chí núu cucuée ní te cuu sēhe ná, áchí de.

⁵⁰ Yūcuán na te ni cahān Jesús:

Cuánuhun vehe ró, chi cotecu sēhe ró.

Te tēe un ní candíje de jnūhun ni cahān Jesús, te cuanuhun-ni de. ⁵¹ Te níní jíca de cuanuhun de vehe de, te ni quijicoo mozo de ni caquijnahan i de, te ni cacahān i:

Je ni nduvāha sēhe ní, áchí i.

⁵² Te ni cajnūhún de na hora ni quejéé nduvāha i. Te ni cacahān i jíin de:

Cahīn jeē ícu ni quenda quíji i.

⁵³ Yūcuán na te máá tátá i ni sáha de cuenta jeē hora un cúu jeē ni cáhān Jesús jíin de jeē cótecu sēhe de. Te ni candíje de jíin nīí vehe de jeē cúu ya Yaā ní tají Yaā Dios.

⁵⁴ Yāha cúu vuelta uū jeē ni sáha Jesús jniñu jéhu jeē ni stéén yā poder yā región Galilea, jeē ní najinū yā jeē ni jéhēn yā región Judea.

Jeē ní nasávāha ya ĩn tēe catú yuhu pila Betesda

5 Yūcuán na te cuahān tucu Jesús ñuu Jerusalén, chí íyó tucu vico cásáha jnáhan ñuu yā hebreo. ² Te Jerusalén iyó ĩn pila ndute yajni yéhyí jéé naní yéhyí lanchi. Te yuhu hebreo naní Betesda. Te nuū íne pila un íyó úhūn corredor. ³ Te ini tācá corredor un cācāa cuehē ñayuu cácuhū, jeē cuaá, jeē chacuá, jeē ni jíin. Te cāndetu i jeē canda ndute ún. ⁴ Chí íyó quívī jeē cúun ĩn ndajéhé yā ini pila un, te scānda ya ndute. Te ñayuu quívī xīhna gā ini pila un ná scānda ya ndute, te nduvāha i na-ni cuehyī ndóho i. ⁵ Te yūcuán íyó ĩn tēe jeē ní cuu ocō xahūn unī cuiyā cuhú de. ⁶ Te ni jito Jesús jeē catú de, te ni jini yā jeē ní cuu cuehē cuiyā cuhú de. Te ni cahān yā jíin de:

¿A cúní rō nduvāha rō? áchí yá.

⁷ Te ni cahān tēe cūhú un jíin yá:

Tu níhín na ni ĩn tēe squívī sāñá ini pila hora jeē cānda ndute. Chí tāca jínu jeē cuní na quívī ná, te quívī-ni inga ñayuu xīhna gā. Achí de.

⁸ Te ni cahān Jesús:

Ndocuīñī te naquihin ró camilla rō te caca ró, áchí yá.

⁹ Te tēe un ní nduvāha-ni de. Te ni naquihin de camilla de, te ni quejéé de jíca de. Te quívī ndétātu cúu quívī ún. ¹⁰ Yūcuán na te jnáhan de tēe hebreo un ní cacahān jíin de:

Quívī ndétātu cúu vijna. Te áchí ley jeē ma cúu condiso ró camilla rō.

¹¹ Te ni cahān tēe ni nduvāha ún:

Tēe ni nasávāha ruhū, ni cahān de jíin rí jeē náquihin rí camilla rí te caca rí, achí de.

¹² Yūcuán na te ni cacajnūhún un de:

¿Ndé tēe ni cahān jíin ró jeē náquihin ró camilla rō te caca ró?

¹³ Te tēe ni nduvāha ún, tu jíin de ndé ĩn cúu jeē ní nasávāha de. Chí cáhīn cuehē ñayuu yūcuán, te Jesús je cuahān yā. ¹⁴ Te cúcuéé gá te ni najnáhan Jesús jíin de ini templo cáhnu. Te ni cahān yā:

Vijna chí je ni nduvāha ró. Ma sáha ga rō cuēchi, chí núu tuú, te quiji ĩn jnūndóho xeēn gā siquī rō, achí yá.

¹⁵ Yūcuán na te cuahān tēe ún, te ni castūhún de nuū jnáhan de hebreo un jéé Jesús cúu jeē ní nasávāha ya de. ¹⁶ Te siquī jeē ní sáha Jesús jniñu yáha quívī ndétātu, jeē yūcuán cúu jeē tēe hebreo un cájito xeēn de ya, te cācuni de cahni de ya. ¹⁷ Te ni cahān Jesús jíin de:

Máá Tátá rí chí nīí cáni te nde vijna sáha ya jniñu váha, te suni sūcuán ruhū sáha rí jniñu váha.

¹⁸ Te siquī jeē ni cáhān yā sūcuán, te tēe hebreo un víhyá gā cācuni de cahni de ya. Chí nasūu máá ĩn-ni jeē tu squícu ya jeē cahān ley siquī quívī ndétātu, chí suni jeē ni cáhān yā jeē Tátá yā cúu Yaā Dios, te sūcuán sáha inuú yá máá yá jíin Yaā Dios.

Siquī jeē ndíso jniñu Sēhe Yaā Dios

¹⁹ Te ni cahān Jesús:

Jendaá cahān rí jíin ró jijnáhan ró: Ruhū jeē cúu Sēhe Yaā Dios, tú na vé cúu sáha rí jeē máá rí, chí máni sáha rí jeē jíto rí sáha Tátá rí. Chí tāca jéé sáha Tátá rí, suni sáha ruhū jeē cúu rí Sēhe ya. ²⁰ Chí máá Tátá rí, maní yā jíin ruhū jeē cúu rí Sēhe ya, te stéén yā nuū rí ndíhi jeē sáha ya. Te jéhu ga jniñu stéén yā vésú jeē ní cuu vijna, jeē naa ni rō coto ró jíináhan ró. ²¹ Te nájnūhun jeē nastécu máá Tátá rí ndíyi te cotecu tucu i, suni sūcuán ruhū jeē cúu rí Sēhe ya, nástécu rí ndé-ni cúu jeē cuní máá rí. ²² Te máá Tátá rí, tu sándaā yā siquī ni ĩn ñayuu, chí ni jēhe ya jnūhun jeē sándaā máá rí siquī tāca ñayuu, chí Sēhe ya cúu rí. ²³ Te sūcuán te coo yíñúhún ndíhi ñayuu nuū rí, nájnūhun yíñúhún i nuū Tátá rí. Te ñayuu tu íyó yíñúhún núu rí, núu sūcuán te suni tu yíñúhún i nuū máá Tátá rí jeē ní tají yá ruhū vēji rí.

²⁴ Jendaá cahān rí jíin ró: Núu ĩn ñayuu chuhun ni i jnūhun cáhān rí, te candíje i jeē Yaā ndaā cúu Yaā ní tají rúhū vēji rí, ñayuu ún cotecu i nīí cáni andívī, te ma jnahnú ndetū i. Chí ma cúu ga i nájnūhun ndíyi, chí sa suhva cotecu i nīí cáni. ²⁵ Jendaá cahān rí jíin ró jeē quiji quívī, te vijna je ni quejéé, jeē tāca ñayuu cácuu nájnūhun ndíyi, cuni nahín i jnūhun cáhān ruhū, Sēhe Yaā Dios. Te ñayuu cuatáhú, chí cotecu i nīí cáni. ²⁶ Chí nájnūhun íyó poder máá Tátá rí jeē sáha ya jeē técu ndíhi-ni, suni sūcuán ni jēhe ya poder nuū ruhū jeē sáha rí jeē cotecu ndíhi-ni. ²⁷ Te suni ni sáha ya jeē ndíso jniñu rí sándaā rí siquī ñayuu, chí cúu rí Yaā ní nduu tēe. ²⁸ Ma náā ni rō caní ni rō siquī jnūhun cáhān rí. Chí quee quívī jeē tāca ndíyi cuní sōho i jnūhun cahān rí, ²⁹ te quendacoo i nuū yíndūji i. Te ndíyi jeē ní casáha jniñu váha, natecu i jeē cótecu i nīí cáni. Te ndíyi jeē ní casáha jniñu néé, natecu i te quívicoo i nuū jnahnú ndetū i.

Ndé vé cúu jeē steén jeē ní tají Yaā Dios yā

³⁰ Tú na vé cúu sáha rí jeē máá rí. Chí nájnūhun ndácu Yaā Dios jniñu nuū rí, sūcuán sándaā rí jniñu. Te ndaā sándaā rí, chí tu sáha rí jeē cuní máá rí, chí sáha

ri jeē cuní maá Tátá rī, Yaā ní tají rúhū vēji ri. ³¹ Núu ruhū cahān rī jeē cúu ri Sēhe Yaā Dios, te cachi ñayuu jeē tu jéjníñu jnūhun cáhān rī. ³² Te iyó inga jeē cahán jeē cúu ri Sēhe ya. Te jíní rī jeē jnūhun un jéē cahán yā, chi níhín jníñu. ³³ Máá ró ni catají ró tēe ni cacajñuhún de Juan. Te Juan chi ndaā ni cahān de jnūhun ri. ³⁴ Te vēsú súcuan te nasūu rúhū cúu jeē jíní ñúhún jeē steén ñn tēe jeē Séhe Yaā Dios cúu ri. Chi máá ró cúu jeē jíní ñúhún návāha candíje ró te cācu ró jíjnáhan ró. Jeē yúcuan ní cahān rī jeē iyó ndaā jnūhun ri jeē ní nacani Juan. ³⁵ Máá Juan ni cuu de nájnūhun ñn lám-para jeē cayú te cúndijin, cúu jeē ní nacani de jnūhun ri. Te máá ró, jecu-ni quivī ni canujnahan ni rō jeē ni stéén de nuū rō. ³⁶ Te iyó jéē steén cají gá jeē kujéhnū ri vēsú jeē ni cáhān Juan. Suu jniñu sáha ri, jniñu jeē ní tejníñu Tátá rī ruhū jeē sáha ri, jniñu un stéén ndije jeē maá yá ni tají rúhū vēji ri. ³⁷ Te Tátá rī jeē ní tají yá ruhū vēji ri, suni máá yá cahán nuū tútu iī jeē kujéhnū ri, vēsú tu ní cájini sōho cuítī rō jeē cahán yā, ni tu ní cájito ró yá. ³⁸ Te tu ní cáchuhun ni rō jnūhun un jéē ni cáhān Tatá rī, chi tu cácdíje ró rúhū, Yaā ní tají yá vēji. ³⁹ Cánanducú vii rō tāca jnūhun cáhān tutu iī, chi cájeni ni rō jeē yúcuan níhín rō jnūhun jeē cótecu rō ñí cáni sáha. Te jnūhun siquī maá rí cúu jeē cahán tutu ún. ⁴⁰ Te vēsú súcuan te tu cácuni rō cuatáhú ró ruhū quivícoo ró ndaha ri návāha cotecu rō ñí cáni.

⁴¹ Tu chíhi ri cuenta jnūhun jeē cácahān ñayuu jeē kujéhnū ri. ⁴² Chi je jíní rī ndese cándāa ánuá rō jeē tu cáhiyo manī rō jíin Yaā Dios. ⁴³ Ruhū vēji ri jíin jniñu cúní Tatá rī, te tu cájetáhú ró ruhū. Te núu inga tēe quee de jíin jniñu cúní maá de, sa tēe un yáchī cuatáhú ró de. ⁴⁴ ¿Nde se cuu candíje ró jíjnáhan ró? Chi máni cácuni rō jeē kujéhnū ró sáha jnāhan ró, te tu cánducú ró jeē kujéhnū ró sáha Yaā Dios, jeē maá ñn-ni ya iyó. ⁴⁵ Ma cáni ni rō jeē cáquin rī cuēchi siquī rō nuū Tatá rī. Chi iyó ñn jeē cáquin cuēchi siquī rō, suu Moisés, tēe jeē cáñuhun ni rō jeē quendōo ndaā rō jíin ley jeē ní tee de. ⁴⁶ Chi núu ní cácdíje ró jéē ní tee Moisés, te suni candíje ró rúhū nuú, chi jnūhun máá rí ní tee de. ⁴⁷ Te núu tu cácdíje ró jnūhun ri jeē ní tee de, ¿te ndese candíje ró jnūhun cáhān maá rí núu súcuan? Achí yá jíin de.

Jeē ni scáji yā uhūn mil tēe

(Mt. 14.13-21; Mr. 6.30-44; Lc. 9.10-17)

6 Yūcuán na te cuahān Jesús inga lado mar Galilea, jeē cúu mar Tiberias. ² Te yōhyo cuehē ñayuu ni candiquīn i ya, chi ni cajito i tācá jniñu jéhnū jeē steén yā poder yā jeē ní nasávāha ya ñayuu cácuñū. ³ Te ni caa ya ñn yucu, te ni cucōo ya yúcuan jíin tēe cáscuáha jíin yá. ⁴ Te je ni cuyajni vico pascua jeē cánucūhun ni jnāhan ñuu yā hebreo jeē ní cacācu i nuū ñáyuu nación Egipto. ⁵ Te ni ndacoto ya, te ni jito ya jeē véjicoo cuehē ndasí ñáyuu. Te ni cahān yā jíin Felipe: ¿Ndé nuū cuaan yó jéē cáji ñayuu yáha jíjnáhan i?

⁶ Te súcuan ni cahān yā jeē jíto ndee yā de núu ndese cahān de. Chi je jíní maá yá ndese sáha ya. ⁷ Te ni cahān Felipe jíin yá:

Te ni ma cánda uū ciento denario staā, ni vēsú jeē cáji i jecu jecu jíjnáhan i, áchí de.

⁸ Yūcuán na te ni cahān Andrés, ñani Simón Pedro, inga tēe scuáha jíin yá un:

⁹ Yāha íne ñn sūchi yíí jéē ndiso i uhūn staā cebada jíin úū chācá. ¿Te ndé canda cuítī ún, chi ñayuu cuehē ndasí cúu?

¹⁰ Yūcuán na te ni cahān Jesús:

Cahān jíin ñáyuu na cúcōo i, áchí yá.

Te yúcuan cáa cuehē ite, te ni cacucōo i, te nájnūhun uhūn mil tēe cúu. ¹¹ Te ni quihin Jesús staā ún, te ni nacuatáhú yá nuū Yaā Dios. Te ni jēhe ya nuū tēe cáscuáha jíin yá, te máá de ni casaja de nuū ñáyuu ní cacucōo ún. Te suni súcuan ni sáha ya jíin cháca, te ni cayeji i nasaa cácuni maá i. ¹² Te nuū ní candutú chíji i, te ni cahān yā jíin tēe cáscuáha ún:

Nastútú ró tācá pedazo jeē ni ndóo, návāha tu stívi cuítī yō.

¹³ Te ni canastútú de, te ni chítú úxī uū jíca pedazo jeē ni ndóo siquī ndihúhún staā cebada un jeē tuá ni ndíhi caji ñayuu. ¹⁴ Te ñayuu un ní cajito i jniñu jéhnū ni sáha Jesús jeē ni stéén yā poder yā. Te ni cacahān i: Jendaá ndije jeē tēe yáha cúu jeē cahán tutu jeē quíji ini ñayívi jéē nácani jnūhun Yaā Dios. Achí i.

¹⁵ Te ni jini Jesús jeē cácuni i sáfuerza i ya jeē cuu ya rey i núú. Te ni cujiyo tucu máá ñn-ni ya, ni caa ya cuahān yā nuū sucún gá yucu.

Jeē ní jica jéhé yá nuū mar

(Mt. 14.22-27; Mr. 6.45-52)

¹⁶ Te nuū cuácuaa, te tēe cáscuáha jíin yá ni nanuu de cuango de nde mar. ¹⁷ Te ni ndéivicoo de ini barco, te ni cascáca de jeē quíngoo de nde inga lado mar nde ñuu Capernaum. Te je ni cunee, te ná tu ndee Jesús nuū de. ¹⁸ Yūcuán na te ni jequíhi ñn tachī níhín, te sáha jeē ndóna ndute mar un. ¹⁹ Te jeē ní cuu nájnūhun uhūn chí íñū kilómetro cájica de jíin barco, te ni cajito de jeē jíca Jesús nuū mar, te ni cuyajni ya vēji ya nuū barco. Te ni cayūhú de. ²⁰ Te máá yá ni cahān yā jíin de:

Máá rí cúu. Ma yūhu ró jíjnáhan ró.

²¹ Te ni cacusiñ ni de jeē na quívi ya ini barco. Te ni sáha ya jeē yachī-ni ni jinūcoo-ni de ñuhun íchi núú cuángoo de ún.

Jeē cánanducú ñayuu Jesús

²² Te inga quivī ún, te ñayuu jeē ní caquendōo inga lado mar, ni cajini i jeē tēe cáscuáha jíin yá cuango de jíin máñuhún-ni barco ni íne yūcuán, jíin jéē tu ní quívi Jesús quihín yā jíin de jíjnáhan de. ²³ Te sava ga barco jeē véjicoo ichi ñúu Tiberias, ni quecoo yajni lugar nuū ní cayeji i staā jeē ní nacuatáhú máá jítoho yō jehē.

24 Te jeē ní cajito ñayuu un jéē tuá Jesús íne ya yūcuán, ni tēe cáscuáha jíin yá, te ni quívicoo i tāca barco un, te cuangoo i ñuu Capernaum cuananducú i ya.

Jesús cúu staā jeē cótecu yō ñí cáni

25 Te nuū ni jíinūcoo i nde ñnga lado mar, te ni nanihīn jnāhan i jíin Jesús. Te ni cacajñuhún i ya:

Maestro, ¿na hora ni quee ni yáha?

26 Te ni cahān Jesús:

Jendaá cahán rī jíin ró jeē cánanducú ró ruhū síquī jeē ní cayejí rō nde ni candutú chíjí ró, te nasūu síquī jeē ní cajito ró táca jniñu jéhu jeē steén rī poder rī.

27 Ma cóndihvī ni rō maá síquī jeē caji rō jeē yachī nataxīn, chi sa suhva condihvī ni rō síquī jeē nihín rō jeē cótecu rō ñí cáni sáha. Te máá rí, Yaā ní nduu tēe, cuāha ri nájñuhun staā jeē cótecu rō ñí cáni sáha. Chi Tátá rī Yaā Dios ni jeni ya ruhū jeē sáha ri súcuan. Achí yá jíin i.

28 Yūcuán na te ni cacajñuhún i ya:

¿Ndese sáha ná návāha squícu ná jniñu cúní Yaā Dios?

29 Te ni cahān Jesús:

Jniñu jeē cuní Yaā Dios cúu jeē candíje ró ruhū, Yaā ní tají yá vēji.

30 Yūcuán na te ni cacahān i:

Núu súcuan ¿te na jniñu jéhu sáha ní coto ná jíināhan ná te candíje ná jéē ní tají yá nihín? ¿Na jniñu cúu jeē sáha ní? 31 Chi tāca jíí yō jenahán ni cayejí de maná jeē ní cuun ichi ándiví ndé nuū ñuhun téhé, nájñuhun yósó núu tútu: Yaā Dios ni jēhe ya staā ni cuun ichi ándiví, ni cayejí i, áchí tutu. Achí i jíin yá.

32 Te ni cahān Jesús:

Jendaá cahán rī jíin ró: Nasūú Moisés ni jéhe staā un núu de jíināhan de jeē ní cuun ichi ándiví, chi máá Tátá rī ni jēhe. Te máá yá jéhe staā ándiví jéē cótecu rō ñí cáni sáha. 33 Chi staā jéhe Yaā Dios cúu máá Yaā ní quíji ichi ándiví, te sáha ya jeē ñáyuu ñayiví cotecu i ñí cáni ándiví. Achí yá.

34 Te ni cacahān i jíin yá:

Níní cuáha ni stāá ún caji na núu súcuan.

35 Te ni cahān Jesús:

Máá rí cúu máá stāá jeē cótecu rō ñí cáni sáha. Ndé vé quívi ndaha ri, ma cúu cuiṭi gā sōco. Te ndé vé candíje ruhū, ma jichí cuiṭi gā. 36 Te nájñuhun je ni cahān rī jíin ró, tu cáncandíje ró ruhū, vēsú ni cajito ró núu rī.

37 Tāca ñáyuu jeē sáha Tátá rī jeē candíje i ruhū, máá i quívicoo ndaha ri. Te jétáhú rí tāca jéē cuní quívi ndaha ri, chi ma squéhichí cuiṭi rī quihīn. 38 Chi ní quíji rí ichi ándiví návāha sáha ri jniñu jeē cuní Yaā ní tají ruhū, te nasūu jéē sáha ri jeē cuní máá rí. 39 Te jniñu jeē cuní Tátá rī, Yaā ní tají ruhū, cúu jeē ma scuíta ri ni ññ ñayuu ni jéhe ya nuū rī, chi condito ri i te nastécu rī i quívi jínu ñayiví. 40 Te Yaā ní tají ruhū, cuní yā jeē tāca ñáyuu jeē nihín i jñuhun ruhū, Sēhe Yaā Dios, te candí-

je i ruhū, cotecu i ñí cáni ándiví. Chi nastécu rī i quívi jínu ñayiví. Achí yá.

41 Yūcuán na te ni caquejéé jnāhan ñuu yā hebreo cácahān de síquī yā, chi ni cahān yā jeē maá yá cúu staā ní quíji ichi ándiví. 42 Te ni cacahān de:

¿A násūu tēe yáha cúu Jesús, sēhe José? Te cájini yō tatá de náná de. ¿Te ndese cúu jeē cahán de jeē ní quíji de ichi ándiví núu súcuan?

43 Te ni cahān Jesús jíin de:

Ma cahán rō síquī rī jíināhan ró. 44 Ni ññ ñayuu ma cúu quívi i ndaha ri núu ma sáha Tátá rī jeē cúu ni i quívi i, chi máá yá ni tají ruhū vēji ri. Te nastécu rī i quívi jínu ñayiví. 45 Te suhva yósó núu tútu ni catee tēe ni canacani jñuhun Yaā Dios: Tāca i chi stéén Yaā Dios nuū i, áchí. Núu súcuan te tāca ñáyuu jíni sōho jñuhun cáhán Tátá rī, te jétáhú i jeē steén yā nuū i, ñayuu ún chi quívicoo i ndaha ri.

46 Te tu ní jíto ni ññ ñayuu nuū maá Tátá rī. Chi máñuhún-ni ruhū ni jito ri nuū yā, chi nde nuū maá yá vēji ri. 47 Jendaá cahán rī jíin ró jíināhan ró jéē ñayuu jeē candíje i jeē jnáma ri i, máá i cotecu i ñí cáni.

48 Máá rí cúu staā jeē cótecu rō ñí cáni sáha. 49 Tāca jíí rō jenahán, ni cayejí de staā maná jeē ní cuun ichi ándiví ndé nuū ñuhun téhé, te tu ní sáha jeē cótecu de ñí cáni ándiví. 50 Te staā jeē cahán rī jeē vēji ichi ándiví, chi na-ni ñayuu caji, te cotecu i ñí cáni ándiví.

51 Te suu máá rí cúu staā un jéē ní quíji ichi ándiví jéē sáha jeē cótecu rō ñí cáni. Te ñayuu jeē caji staā yáha, cotecu i ñí cáni ándiví. Te staā jeē cuáha ri un cúu yiquí cúñu rī, te cuāha ri návāha ñayuu ñayiví cotecu i ñí cáni ándiví. Achí yá.

52 Yūcuán na te jnāhan ñuu yā hebreo ni cacahān de jíin táca jnāhan de:

¿Ndese cuu cuāha tēe yáha yiquí cúñu de caji yō? achí de.

53 Te ni cahān Jesús jíin de:

Jendaá cahán rī jíin ró: Núu tú candíje ró jéē yiquí cúñu ruhū, Yaā ní nduu tēe, cúu nájñuhun staā, te ñíñ rī cúu nájñuhun ndute, núu súcuan te ma cótecu rō ñí cáni ándiví. 54 Chi ñayuu cáncandíje jeē yiquí cúñu rī cúu nájñuhun staā te ñíñ rī cúu nájñuhun ndute, máá i cotecu i ñí cáni. Te nastécu rī i quívi jínu ñayiví. 55 Chi yiquí cúñu rī jíin ñíñ rī cúu ndije jeē sáha jeē cótecu i ñí cáni. 56 Te ñayuu cáncandíje jeē yiquí cúñu rī jíin ñíñ rī cúu nájñuhun staā jíin ndute jeē cótecu i ñí cáni sáha, máá i níní ndúú i jíin rí, te ndúú rí jíin i. 57 Máá Tátá rī, Yaā técu, ni tají yá ruhū vēji ri, te técu rī sáha máá yá. Te suni súcuan, ñayuu cáncandíje jeē cúu ri nájñuhun staā i ndute i, suni súcuan cotecu i ñí cáni sáha ri. 58 Máá rí cúu staā ní quíji ichi ándiví. Te staā jeē cahán rī tu cúu nájñuhun staā maná jeē ní cayejí tāca jíí rō jenahán, chi tu ní sáha jeē cótecu de ñí cáni. Te staā jeē cahán rī, chi ñayuu caji, cotecu i ñí cáni sáha, áchí yá.

59 Tāca jñuhun yáha ní steén Jesús nuū ñáyuu ní candutútu ini vehe iñ sinagoga ñuu Capernaum.

Jnūhun cotecu yō nī cāni

⁶⁰ Te cuehē ñayuu cascuáha jíin yá, ni cajini sōho i jnūhun yáha jēē ni stéén yā. Te ni cacahān maá i:

Yōhoyo yí jnūhun cáhán yā yāhá. ¿Ndese cuu cuatáhú yó?

⁶¹ Te ni jini Jesús jeē cácahān i jeē yí cúu jnūhun yāhá, te ni cahān yā jíin i:

¿A yí sáha jnūhun yáha jíin ró jijnáhan ró? ⁶² ¿Te ndese sáha ró núu coto ró jēē ruhū, Yaā ní nduu tēe, ndaa ri nuhun rī nuū ni cóndee rī xīhna ñúhún? ⁶³ Máa ánuá ñayuu cúu jeē sáha jeē técu i. Chi yiqui cúñu i tu jéjníñu cuítī súcuan. Te tāca jnūhun ni cahān rī jíin ró cúu jeē quéndōo vāha ánuá rō, te cotecu rō nī cāni sáha. ⁶⁴ Te sava ró chi tu cácahān ró. Achí yá.

Chi nde xīhna ñúhún je jíin Jesús ndé-ni cúu ñayuu jeē ma cácahān, jíin ndé ñin de cúu jeē nastúu de ya.

⁶⁵ Te ni cahān gā yā:

Jeē yúcuan ní cahān rī jíin ró jeē ma cúu quiví ni ñin ñayuu ndaha ri, te núu tu sáha Tátá rī jeē cúu ni i quiví i, áchí yá.

⁶⁶ Te nde quiví ún te cuehē ñayuu cascuáha jíin yá, ni castóo i ya, te tuá ni cájica i jíin yá. ⁶⁷ Yūcuán na te ni cahān yā jíin máa ndihúxí uū tēe cáscuáha jíin yá:

¿A suni cácuñi máa ró quingoo ró, chí naún?

⁶⁸ Te ni cahān Simón Pedro:

¿Ndé núu gā quingoo ná? Chi máa ní cúu jeē nácani jnūhun jeē cótecu na nī cāni sáha. ⁶⁹ Te ni cacandíje ná te cájini na jēē maá ní cúu Cristo, Sēhe Yaā Dios, Yaā técu, achí de.

⁷⁰ Te ni cahān Jesús:

Te vésú ni nacāji ri ndihúxí uū rō, te íyó ñin ró jeē ní quiví jexeén ini. Achí yá.

⁷¹ Te súcuan ni cahān yā siquī Judas Iscariote, sēhe Simón. Chi máa de nastúu de ya, vésú ñin jnáhan jeē uxí uū tēe cáscuáha jíin yá cúu de.

Jeē tu ní cácahān ñani Jesús

7 Yūcuán na te jíca cuu Jesús región Galilea. Chi tu cúní yā caca cuu ya región Judea, chi jnáhan ñuu yā hebreo jeē cáyūcu yúcuan, cácuñi de cahni de ya.

² Te cuacuyajni vico jeē casáha ñayuu yā hebreo vehe ramadá, cáyūcú i chíji. ³ Te ñani yā ni cacahān de jíin yá:

¿Naun máa yáha-ni íne ró? ¿Naun tú quihīn rō región Judea, návāha tēe yúcuan jēē cácahān de rōhó, suni coto de jniñu jéñu sáha ró. ⁴ Chi núu cúní ñin tēe jeē cuíté núu jnūhun de, te tu sáha yuhu de jniñu. Te núu sáha nde ró táca jniñu jéñu, vāha ga na sáha ró jēē cúní ndivii ñayuu.

⁵ Súcuan ni cacahān ñani yā jíin yá, chi ni máa de tu cácahān de ya. ⁶ Yūcuán na te ni cahān Jesús:

Ná tu quee maá quiví jeē quihīn rī. Te máa ró jijnáhan ró chi na-ni quiví-ni te cuu quingoo ró. ⁷ Chi ma quítí ni ñayuu ñayiví núu rō, te máa rí chi quítí ni i jíto i

ruhū, chi cáhán rī jeē jíin rī jeē máni jniñu néé casáha i. ⁸ Cuángoo máa ró vico ún. Te máa rí chi ma quihīn rī vijna, chi ná tu quee maá quiví cánuú quihīn rī. Achí yá.

⁹ Súcuan ni cahān yā jnūhun yáha jíin de, te ni quendōo ya Galilea.

Jeē ni jéñen Jesús vico vehe ramadá

¹⁰ Te nuū ni yáha ñani yā cuangoo de vico ún, te sáa te suni cuahān maá yá. Te tú cuahān ndijin yā, chi tu ní stéén yā maá yá. ¹¹ Te jnáhan ñuu yā hebreo cácan-ducú i ya nuū vico ún, te cácahān i:

¿Ndé nuū íne tēe ún? áchí i.

¹² Te yōhoyo ni cacahān ñayuu jeē siquí yā, chi sava i cácahān: Tēe vāha cúu de. Te sava ga i cácahān: Tuú chi stáhú de ñayuu.

¹³ Te yuhu-ni ni cacahān i jnūhun ya, chi cáyūhú i jeē quítí ni jnáhan i tēe hebreo.

¹⁴ Te jeē ní cuu sava vico, te ni quee Jesús, ni quiví ya templo cáhnu, te ni quejéé yá steén yā jnūhun. ¹⁵ Te ni canaa ni jnáhan ñuu yā hebreo cájini sōho i, te ni cacahān i:

¿Ndese jíin tēe yáha cuéhē jnūhun ndíchí, chi tu ní jíca de escuela? áchí i.

¹⁶ Yūcuán na te ni cahān Jesús:

Jnūhun stéén rī chi nasūu jnūhun máa rí cúu, chi jnūhun jeē ni jéhe máa Yaā ní tají rúhū cúu. ¹⁷ Núu ñin ñayuu cuní i sáha i jniñu cúní Yaā Dios, ñayuu ún chi jecūhun ni i núu nde nuū Yaā Dios vēji jnūhun stéén rī, chí jnūhun jeē jéni ni maá-ni ri cúu. ¹⁸ Tēe cáhán jnūhun jéni ni maá de, tēe un ndúcú de jeē na sájéñu ñayuu de. Te núu ñin tēe ndúcú de jeē sajéñu de Yaā ní tají de, tēe un cúu tēe ndaā, te tú na jnūhun stáhú íyó jíin de.

¹⁹ ¿A násūu jéē ni jéhe Moisés ley yā nuū rō jeē squícu ró? Te ni ñin ró tu cásquícu. Chi sa jeē cácuñi rō cahni rō ruhū, ¿te najehē cúu? Achí yá.

²⁰ Te ni cacahān ñayuu cuehē ún:

Tachí ndóho ró. ¿Ndé ñin cúní cahni rohó?

²¹ Te ni cahān Jesús:

Ni nasávāha ri ñin tēe quiví ndétātú, te ndivii rō ni canaa ni rō ni cajito ró jēē quiví ndétātú ni sáha ri jniñu ún. ²² Te Moisés ni jéhe de ley jeē cúu circuncidar nuū rō. Te casáha ró circuncidar sūchi yíí núu uná quiví jeē ní cacu i, vésú quiví ndétātu cúu. (Te nasūu máa Moisés ní jéquin ley un, chi je ni tyo nuū tāca jí de.) ²³ Núu súcuan te núu casáha ró circuncidar vésú quiví ndétātu cúu, návāha squícu ró ley Moisés, ¿te najehē cáquítí ni rō jeē ní nasávāha ndihí ri ñin tēe quiví ndétātú? ²⁴ Ma yachí cani ni rō jeē cuéchi cúu jeē sáha ri. Chi sa cani vāha ni rō siquí táca jniñu vāha. Achí yá.

Jeē ní cachi Jesús ndé nuū véji ya

²⁵ Yūcuán na te sava ñayuu ñuu Jerusalén ni cacahān jnūhun jnáhan i:

¿A násūu tée yáha cúu jeē cánanducú tée cácujuhnu jeē cáhni de, chí naún? ²⁶ Te yáha cáhán ndijin de nuū chitú, te tú na jnūhun cacahān jíin de. ¿A sanaa te ni cacundaā ni tēe cácujuhnu jeē tēe yáha cúu Cristo jeē achí tutu jeē quiji, chí naún? ²⁷ Te tuú chi je cájini yō nuū véji tēe yáha. Te jeē quíji Cristo, chi ni ñin yó má cúni ndé chi quíji ya. Achí i.

²⁸ Yūcuán na te ni cahān jee Jesús jeē steén yā jnūhun ini templo:

Cájini rō ruhū, te cájini rō ndé ñuu véji ri. Te vēsú súcuan te máá Yaā ndaā cúu jeē ní tají rúhū véji ri, te tú véji ri jeē cuní maá rí. Te tu cájini rō ndese Yaā cúu ya. ²⁹ Te máá rí chí jíin rí yā, chí nde nuū maá yá véji ri, te máá yá ni tají rúhū, achí yá.

³⁰ Yūcuán na te ni canducú de jñi de ya. Te ni ñin de tu ní cúu jñi de ya, chí ná tu quee maá quíiv̄ jeē jñi de ya. ³¹ Te cuehē ñayuu chí ni cacandíje i ya, te ni cacahān i:

¿A násūu tēe yáha cúu Cristo, Yaā ndétu yó jēē quiji? Chí cuehē ndasí jniñu jéhu sáha ya jeē steén yā poder yā. Achí i.

Jeē ní catají de policía jeē jñi de Jesús

³² Te ni cajini tēe fariseo jeē súcuan cacahān ñayuu jnūhun ya. Te máá de jíin sūtū cácujuhnu, ni catají de policía cándito templo jeē jñi de ya. ³³ Te ni cahān Jesús:

Jecu na quiv̄ condee rí jíin ró jijnáhan ró. Yūcuán na te nuhun rí nuū Yaā ní tají rúhū véji ri. ³⁴ Te nanducú ró ruhū, te ma nánih̄n rō ruhū. Chí ma cúu jinūcoo ró núū cóndee rí. Achí yá.

³⁵ Yūcuán na te máá tēe un ní cacajnūhun jnáhan de:

¿Te ndé nuū quih̄n tēe yáha jeē ma nánih̄n yō de? ¿A quih̄n de nuū jnáhan yó hebreo jeē ní cajitē núu cáyūcu ndé nación Grecia? ¿Te á stéén de jnūhun nuū ñayuu Grecia, chí naún? ³⁶ ¿Te na jnūhun cúu jeē ni cahān de jíin yó jeē nanducú yó de te ma nánih̄n yō de, chí ma cúu jinūcoo yó núū cóndee de? Achí tēe un jíjnáhan de.

Siqū ndute jeē cótecu yō ní cáni sáha

³⁷ Te quiv̄ sándih̄i vico ún te cúu vico cáhnu ga. Te quiv̄ un ní ndocuiñ̄i Jesús, te ni cahān jee ya:

Núu ndé ñayuu jnáa ndasí i tāca jēē váha jeē sáha ri jehē i, nájnūhun jeē jichí i ndute, núu súcuan te na quíiv̄ i ndaha ri te coho i ndute, cúu jeē nih̄n i jeē váha ún. ³⁸ Te ñayuu jeē candíje jeē jnáma ri i, chí ini anuá i condee Espíritu Santo, te cuu ya nájnūhun yūte cáne ñuhún jeē sáha ya jeē cótecu i ní cáni, nájnūhun cáhán tutu i. Achí yá.

³⁹ Te súcuan ni cahān yā jeē ñayuu candíje jeē jnáma ya i, nih̄n i Espíritu Santo. Chí ná tu quee Espíritu ún, chí ná tu ndaa Jesús quinhun yā nuū ndujéhu ya.

Jeē ní cacusñ̄n ñayuu siqū yā

⁴⁰ Te sava ñayuu cuehē ún, ná ni cajini sōho i jnūhun yáha, te ni cacahān i:

Jendaá jeē tēe yáha cúu jeē achí tutu jeē quiji de nacani de jnūhun Yaā Dios, achí i.

⁴¹ Te sava ga i ni cacahān:

Tēe yáha cúu Cristo, Yaā ní tají Yaā Dios.

Te sava ga i chí ni cacahān i:

Tuú chí nasūu Galilea quiji Cristo. ⁴² Chí cáhán tutu i jeē ndé yucūn rey David cacu Cristo, te cacu ya ñuu Belén, ñuu nuū ní cacu máá David. Achí i.

⁴³ Te súcuan te ni cacusñ̄n ñayuu jeē siqū yā. ⁴⁴ Te sava i cácuni i jñi i ya, te ni ñin i tu ní jñi i ya.

Jeē tu ní cácandíje tēe cácujuhnu

⁴⁵ Yūcuán na te policía cándito templo tu ní cájñi de Jesús, te cuanungoo de nuū tāca tēe fariseo jíin núu sutú cácujuhnu. Te tēe ún ni cacajnūhún de policía:

¿Najehē tu ní quécoo ró jíin de? áchí.

⁴⁶ Te ni cacahān policía un:

Tú cuiti ni ñin tēe cáhán váha ndasí nájnūhun cáhán tēe yúcuán, áchí.

⁴⁷ Te ni cacahān tēe fariseo:

¿Te á suni nde máá ró jijnáhan ró ní stáhú de naún? ⁴⁸ Ni ñin jnáhan ruhū tēe cácujuhnu jíin tēe fariseo, tu cácandíje ri jnūhun cáhán tēe ún, ¿te naun cácandíje máá ró? ⁴⁹ Te ñayuu cuehē yáhá jēē tu cájecūhun ni i ley Moisés, chí jnahnū ndetū i jeē cácandíje i tēe ún, áchí de jíjnáhan de.

⁵⁰ Te ni cahān Nicodemo, tēe ni jéhēn nuū yā ñin jecuáā, te suni ñin tēe fariseo cúu de:

⁵¹ Cáhán ley yō jeē ma cúu tee yó cuéchi siqū ñin tēe, te núu tú x̄hna gā cuni sōho yó ndese cáhán de, návaha cucáhu ni yō na cuéchi ni sáha de. Achí de.

⁵² Te ni cacahān jíin de:

Te róhó, ¿á suni nde Galilea véji ró jēē cahán rō jehē tēe ún? Nanducú váha ró núu tútu i te cuni rō jeē ndé Galilea tu quénda cuiti ni ñin tēe nácani jnūhun Yaā Dios. Achí jíin de. ⁵³ Te cuanungoo de ná vehe ná vehe de.

Jnūhun ñahan ní casíqū ndéē jnáhan

8 Te ni caa Jesús cuahān yā yucu Olivos. ² Te jeē cuácundijin inga quiv̄, te ni ndee tucu ya templo. Te ndih̄i ñayuu ni quecoo i nuū yā. Te ni cucōo ya, te ni steén yā jnūhun nuū i. ³ Yūcuán na te tēe cástéén tutu ley Yaā Dios jíin tēe grupo fariseo, ni quecoo de jíin ñin ñahan jeē ní canih̄n de ña jeē casíqū ndéē ña. Te ni cajeni de ña mēh̄nú. ⁴ Te ni cacahān de jíin yá:

Maestro, ni canih̄n ná ñahan yáha jēē casíqū ndéē ña. ⁵ Te ley Moisés ndácu jniñu nuū yō jeē cuáha yó yúu xin̄i ñahan cásáha súcuan návaha cuu ña. Te máá ní, ¿ndese cáhán ni?

⁶ Te súcuan ni cacahān de jeē cájito ndee de ya núu cuatáhú yá jeē cahán ley un, chi núu tuú te caquin de cuēchi siquī yā. Te Jesús ni jīta ndeyi ya, te ni tee ya nuū ñúhun jíin xínī ndáha ya. ⁷ Te jeē cácajnūhun cácajnūhún de ya, te ni ndonehen ya maá yá, te ni cahān yā jíin de:

Núu ndé ñn maá ró tú na cuēchi ró, te xīhna gā maá ró cuāha yuū xínī ña núu súcuan, áchí yá.

⁸ Te ni jīta ndeyi tucu ya, te ni tee tucu ya nuū ñúhun.

⁹ Te nuū ní cajini de jeē súcuan ni cahān yā, te ni cajecūhun ni de jeē suni cáhiyo cuēchi de. Te ná ñn ná ñn de ni quendacoo de cuahān de, xīhna gā tēe jéhnú ga te nde nuū ní ndíhi na. Te ni ndōo maá ñn na Jesús jíin ñahan índichi mēhñú un. ¹⁰ Te ni ndonehen tucu ya maá yá, te tuá ni ñn tēe un ní jíto ya, chi maá na ñahan ún. Te ni cahān yā jíin ña:

¿Ndé chi cuángoo tēe cájequin cuēchi siquī rō? ¿A tú ni ñn de ní ndóna cahān gā cuēchi siquī rō?

¹¹ Te ni cahān ña:

Tú ni ñn de, áchí ña.

Yūcuán na te ni cahān Jesús jíin ña:

Ni ruhū, ma cahán rī cuēchi siquī rō. Cuáhán te ma sáha ga rō cuēchi, áchí yá.

Jesús cúu maá luz jeē steén ini anuá ñayuu

¹² Te inga jínu ni cahān Jesús jíin ñáyuu:

Maá rí cúu nájnūhun luz jeē steén ini anuá ñayuu ñayiví, jeē sáha jeē jécūhun ni i siquī Yaā Dios. Ñayuu candíje ruhū chi ma cáca i nájnūhun nuū néé, chi sa suhva coneváha i luz ini anuá i jeē sáha jeē cótecu i ñé cání.

¹³ Yūcuán na te ni cacahān tēe fariseo jíin yá:

Róhó chi cáhán rō jnūhun jehē maá ró, te tu jéjníñu jnūhun cáhán rō.

¹⁴ Te ni cahān Jesús jíin de jíjnáhan de:

Vésú cáhán rī jehē maá rí, te íyó ndáá jnūhun cáhán rī. Chi jíiní rī ndé nuū véji ri jíin ndé nuū quihín rī. Te róhó tu cájini rō ndé nuū véji ri ni ndé nuū quihín rī.

¹⁵ Maá ró chi cuenta ñayuu ñayiví casándaā rō siquī jnūhun cáhán rī. Te ruhū chi tu sándaā mañúhún rí siquī ni ñn ñayuu. ¹⁶ Te núu sándaā rī siquī i, te ndaā sáha ri, chi tu sáha máñúhún rí, chi sándaā rī nde jíin maá Tátá rī, Yaā ní tají rúhū véji ri. ¹⁷ Te yósó núu tútu ley cánevāha ró jeē núu inuú cácahān uū testigo, te jíiní ñúhún cuatáhú ró jeē cácahān, chi íyó ndáá jnūhun ún. ¹⁸ Núu súcuan te ruhū cúu ñn jeē cahán ndaā rī jehē rī. Te inga jeē cahán ndaā jehē rī cúu maá Tátá rī, Yaā ní tají rúhū. Achí yá.

¹⁹ Te ni cacahān de jíin yá:

¿Ndé nuū ndeé Tátá rō?

Te ni cahān Jesús:

Tu cájini rō ruhū ni Tátá rī. Te núu jeē cájini rō ruhū, suni cuni rō Tátá rī nuú.

²⁰ Tāca jnūhun yáha ní cahān Jesús jeē steén yā ini templo nuū cáyūcu yéjñū jeē cásocō i xūhún. Te tú ni

ñn de ní jññ de ya, chi ná tu quee maá quiví jeē jññ de ya.

Jeē ni cáhán yā jeē ma cúu jinūcoo de nuū cóndee yā

²¹ Te ni cahān tucu Jesús jíin de:

Ruhū chi quihín rī, te nanducú ró rúhū, te ma nánihín rō ruhū, chi quendōo cuēchi ró siquī rō quiví cúu rō. Te jeē yúcuan má cúu jinūcoo ró núu quihín rī, achí yá.

²² Yūcuán na te tēe hebreo un ní cacahān maá de:

¿A cahni tēe yáha maá de, te jeē yúcuan cáhán de jeē ma cúu jinūcoo yó núu quihín de, chí naún? Achí de.

²³ Te ni cahān yā:

Maá ró jíjnáhan ró chi ñayiví yáha véjicoo ró, te ruhū chi nde andiví véji ri. Maá ró cácuu ñayuu ñayiví yáha, te ruhū chi nasūu tēe ñayiví yáha cúu ri. ²⁴ Jeē yúcuan ní cahān rī jeē quendōo cuēchi ró siquī rō quiví cúu rō. Chi núu ma candíje ró jéé maá rí cúu Cristo, te quendōo nahín cuéchi ró siquī rō quiví cúu rō. Achí yá.

²⁵ Te ni cacajñūhún de ya:

Núu súcuan ¿te ndé ñn cúu ró?

Te ni cahān yā:

Je ni cachi ri nuū rō nde xīhna ñúhún ndé ñn cúu ri.

²⁶ Te íyó cuéhē gā jnūhun cuu cahān rī jíin ró te sándaā rī siquī rō. Te ma cahán rī, chi ini ñayiví yáha cáhán rī maá-ni jnūhun jeē ní jini ri ni cahān Yaā ní tají rúhū véji ri. Te máni jnūhun ndaā cahán yā. Achí yá.

²⁷ Te tu ní cájecūhun ni de jeē cahán yā jnūhun Tátá yā andiví jíin de. ²⁸ Jeē yúcuan ní cahān gā yā:

Nde na yáha jeē cáta caa ró rúhū, Yaā ní nduu tēe, jicā cruz, yūcuán na te cuni rō ndé ñn cúu ri. Te cuni rō jeē tú na vé sáha ri jeē maá rí, chi cáhán rī maá-ni jnūhun ni steén Tátá rī nuū rī. ²⁹ Chi maá Tátá rī, Yaā ní tají rúhū, ndeé yá jíin rí. Te tu stóo máñúhún yá ruhū, chi níiní sáha ri jniñu jeē núnjahan ni maá yá. Achí yá.

³⁰ Te jeē ni cáhán yā jnūhun yáha, te cuehē ñayuu ni cacandíje i ya.

Siquī ndé-ni cúu sēhe Yaā Dios jíin séhe jexeén

³¹ Yūcuán na te ni cahān Jesús jíin jnáhan ñuu yā hebreo jeē ní cacandíje i ya:

Te núu cuiñi ñihin ró jíin jnúhun stéén rī nuū rō, te cuu ndije ró ñáyuu scuáha jíin rí. ³² Te jecūhun ni rō jnūhun ndaā, te jnūhun ndaā un sáha jeē nduu libre rō nuū jeē yíhi ró ndaha.

³³ Te ni cacahān i jíin yá:

Sēhe yucūn Abraham cácuu ri, te tu cáyihí cuiñi rī ndaha ni ñn. ¿Te ndese cúu jeē cahán rō jeē nduu libre rī núu súcuan?

³⁴ Te ni cahān Jesús:

Jendaá cahán rī jíin ró jeē tāca ñáyuu casáha cuēchi, te íyó libre i, chi yíhi i chñi cuēchi jeē jejniñu cāhá i nuū. ³⁵ Te ñayuu jejniñu cāhá, chí tu cúu i ñn jnáhan ñayuu vehe nuū jejniñu i. Te ñn sēhe chí sa suhva cúu ndije i jnáhan ñayuu vehe ún. ³⁶ Núu súcuan te maá rí

jeē cúu Sēhe Yaā Dios, núu sáha ri jeē tuá cuajníñu cāhá ró nuū cuéchi, núu súcuan te nduu libre ndije ró jijnáhan ró, te cuu ró séhe ya. ³⁷ Te jíni rī jeē séhe yucūn Abraham cácuu ró, te vēsú súcuan te cácuu rō cahni rō ruhū, chi tu cájetáhu ró jñūhun cāhán rī.

³⁸ Ruhū chi cāhán rī jñūhun jeē ni stéén Tatá rī nuū rī. Te máá ró chi cásáha ró jniñu jeē ni cāhán tatá máá ró jijnáhan ró. Achí yá.

³⁹ Te ni cacahān i:

Sēhe yucūn Abraham cácuu ri.

Te ni cahān Jesús:

Núu jeē candíje ró nájñūhun ni candíje Abraham návāha cuu ndije ró yucūn de, yūcuán na te jniñu váha ni sáha de suni sáha máá ró nuú. ⁴⁰ Te vijna chi cácuu rō cahni rō ruhū, vēsú ni cahān rī jíni ró táca jñūhun ndaā ni steén Tatá rī nuū rī. Te Abraham chi tu ní sáha cuiñi de súcuan. ⁴¹ Máá ró chi inuú cásáha ró jíni tátá máá ró. Achí yá jíni i.

Yūcuán na te ni cacahān i:

Máá rí chi tu cácuu ri sēhe ndáhu jéē tu tátá. Chi íyó ñn-ni tátá rī, te Yaā Dios cúu ya.

⁴² Te ni cahān Jesús:

Núu Yaā Dios cúu ndije tátá rō, te coo manī rō jíni rí nuú. Chi nde nuū Yaā Dios ni quenda ri vēji ri. Te tú vēji ri jeē cuní máá rí, chi máá yá ni tají rúhū. ⁴³ ¿Te najehē tu cájecūhun ni rō jñūhun cāhán rī núu súcuan? Suu síquī jeē tu cácuu rō chusóhó ró jñūhun nácani ri.

⁴⁴ Máá ró jijnáhan ró chi tátá rō cúu jexeén. Te cácuu rō sáha ró máá jéē cuní tátá rō ún. Máá jexeén ni jehni ndīyī nde jeē xíhna ññhún. Te tu ní íni cuiñi jíni jñūhun ndaā, te tú cuiñi na jñūhun ndaā cāhán. Te jeē cāhán jexeén jñūhun stáhu cúu jeē súcuan cáa máá. Chi máá un cúu jeē ndíso jñūhun stáhu, te máá un cúu jeē ní squéjéé ndīhi jñūhun stáhu. ⁴⁵ Te ruhū chi cāhán rī jñūhun ndaā, te jeē yucuan cúu jeē tu cácuu ró rúhū. ⁴⁶ Te ni ñn ró ma nihín rō cuēchi síquī rī, chi tú cuiñi na cuēchi ri. Te máni jñūhun ndaā cāhán rī, ¿te naun tu cácuu ró rúhū? ⁴⁷ Ñayuu cácuu sēhe Yaā Dios, chi cáchusóhó i jñūhun Yaā Dios. Te nasūu séhe Yaā Dios cácuu ró, te jeē yucuan tu cácuu rō chusóhó ró. Achí yá jíni de.

Iyó Jesús nde ná tu coo Abraham

⁴⁸ Yūcuán na te ni cacahān jñáhan ñuu yā hebreo un: Ndaā cacahān rī jeē canéé ró nájñūhun ñayuu Samaria, te ññūhun tachī ini rō.

⁴⁹ Te ni cahān Jesús:

Tu ññūhun tachī ini rī, chi yíññūhún rí jíni Tatá rī. Te máá ró jijnáhan ró chi tu cáhīyo yíññūhún ró jíni rí.

⁵⁰ Máá rí tu ndúcú rí jeē cujéhu ri. Iyó ñn jeē sáha jeē cujéhu ri, te máá yá sándaā síquī jñūhun cacahān rō.

⁵¹ Jendaá cāhán rī jíni ró, núu ndé ñayuu squícu jñūhun cāhán rī, ma cúu cuiñi i. Achí yá.

⁵² Te tēe hebreo un tu ní cájecūhun ni de, te ni cacahān de:

Vijna te ni cacahān ni rī jeē ññūhun ndije tachī ini rō. Chi Abraham jíni táca tēe ni canacani jñūhun Yaā Dios nde jenahán, ni cajihī de. Te rōhó cāhán rō, núu ndé vé squícu jñūhun cāhán rō, te ma cúu cuiñi i, áchí ró. ⁵³ ¿Te chí jéhu ga rō vēsú jíni yō Abraham naún? Chi ni jihī de, te suni ni cajihī táca tēe ni canacani jñūhun ya. ¿Te ndé ñn ga sáha ró máá ró núu súcuan? Achí de.

⁵⁴ Te ni cahān Jesús:

Núu ruhū sajeñhu ri máá rí, te tu nihín jniñu. Máá Tátá rī cúu jeē sajeñhu ruhū. Te cacahān rō jeē máá yá cúu Yaā Dios máá ró. ⁵⁵ Te vēsú súcuan te tu cácuu rō ndese Yaā cúu ya. Te ruhū chi jíni rī yā. Te núu cahān rī jeē tu jíni rī yā, te cuu ri tēe stáhu nájñūhun máá ró jijnáhan ró. Te tuú chi jíni ndije ri yā, te squícu ri jñūhun cāhán yā. ⁵⁶ Te jíni rō Abraham ni cusíñi ni de jeē coto de quiví queé rī. Te je ni jito de, te ni jito ri jeē ní cusíñi ndasí ni de. Achí yá.

⁵⁷ Yūcuán na te ni cacahān tēe hebreo un jíni yá:

Ni ná tu coo ró uū xico uxí cuiyā, ¿te ndese cúu jeē cāhán rō jeē ní jito ró núu Abraham? achí de.

⁵⁸ Te ni cahān Jesús:

Jendaá cāhán rī jíni ró jeē nde ná tu cacu Abraham te je íyó rí, achí yá.

⁵⁹ Yūcuán na te ni caquihin de yūu jeē cuáha de xinī yā. Te Jesús chi ni quenda sáhi yá ni yāha ya mēhñú de, ni quenda ya ini templo cuahān yā.

Jeē ní nasávāha ya ñn tēe ni cacu cuáá

9 Te jeē jíca Jesús cuahān yā, te ni jito ya nuū ñn tēe ni cacu cuáá. ² Te tēe cáscuáha jíni yá ni cacu jñūhún de ya:

Maestro, ¿naun ni cacu cuáá tēe yáha? ¿A cuéchi tátá de náná de cúu, chí cuéchi máá de cúu, chí naún?

³ Te ni cahān Jesús:

Nasūu cuéchi máá de, ni nasūu cuéchi tátá de náná de cúu jeē ní cacu de súcuan, chi sa suhva návāha cuni ñayuu jniñu jéhu sáha Yaā Dios jíni de. ⁴ Níni jéē cúu nájñūhun nduú ini ñayiví, te cánuú sáha ri jniñu Yaā ní tají rúhū. Chi quee tiempo jeē coo nájñūhun jecuáá, jeē tuá cuu sájniñu ni ñn. ⁵ Níni jéē iyó rí ini ñayiví te cúu ri luz jeē cúndijin ini anuá ñayuu ñayiví, návāha jecūhun ni i síquī Yaā Dios. Achí yá.

⁶ Te ná ni cahān yā súcuan, te ni tesíhi yá nuū ññūhun, te ni sáha ya ndehyū jíni tésíhi yá un, te ni tee ya síquī tññū tēe cuáá un. ⁷ Te ni cahān yā jíni de:

Cuáhán núu pila Siloé te nacate ró tññū ró, achí yá. Te jñūhun Siloé cuní cahān, ndute ní cascáca de ni quee.

Yūcuán na te cuahān de, te ni nacate de tññū de, te ni ndundijin-ni, te ni nandicó de vēji de. ⁸ Yūcuán na te ñayuu yucu yajni jíni de, jíni ñayuu jeē ní cajito jeē cúu de tēe cuáá, ni cacajñūhun jñáhan i:

¿A násūu tēe yáha cúu jeē ndeé-ni yáhá te jícan caridad?

⁹ Te sava i ni cacahān:

Suu de cúu.

Te sava ga i ni cacahān:

Nasūú de cúu, te súcuan cúní coto de.

Te máá de chi ni cahān de:

Suu ri cúu.

¹⁰ Yūcuán na te ni cacajñuhún i de:

¿Te ndese cúu jeē ní nanune tñūu ró núu súcuan?

¹¹ Te ni cahān de:

Tēe nání Jesús ni sáha de ndehyū, te ni tee de tñūu rí, te ni cahān de jíin rí: Cuáhán núu pila Siloé te nacate ró tñūu ró. Te ni jehēn rí, te ni nacate ri, te ni nanune-ni tñūu rí, achí de.

¹² Yūcuán na te ni cacajñuhún i de:

¿Ndé nuū íne tēe ún? áchí i.

Tu jíin rí, achí de.

Jeē ní castíchí tēe fariseo tēe ni cacu cuáá

¹³ Yūcuán na te ni cajendeca i tēe ni ñyo cuáá un núu tēe grupo fariseo. ¹⁴ Te quiví ndétātu cúu jeē ni sáha Jesús ndehyū jeē ní nanune ya tñūú de. ¹⁵ Te tēe fariseo un ní cacajñuhún tucu de tēe ún ndese ni nanune tñūú de. Te ni cahān de:

Ni tee de ndehyū siquí tñūu ná, te ni nacate ná, te ni ndundijin-ni tñūu ná, achí de.

¹⁶ Yūcuán na te ni cacahān sava tēe fariseo:

Tēe ún chi nasūu ndé nuū Yaā Dios vēji de, chi tu née ñ de quiví ndétātu.

Te sava ga de chi ni cacahān:

¿Ndese cuu sáha tēe un táca jniñu jéhnu yáha te núu tēe íyó cuéchi cúu de?

Te ni cacusñ de siquí yā. ¹⁷ Te ni cacajñuhún tucu de tēe ni ñyo cuáá un:

Róhó, ¿ndese cáhán rō siquí tēe ni nanune tñūu ró núu súcuan?

Te máá de ni cahān de:

ñ tēe nácani jñuhun Yaā Dios cúu de, áchí de.

¹⁸ Te tēe hebreo un chi tu ní cácdíje de jeē ní ñyo cuáá tēe ún te ni ndundijin tñūú de. Te ni cacana xiní tatá de náná de. ¹⁹ Te ni cacajñuhún de:

¿A yáha cúu sēhe ro jéé ní cacu cuáá cácahān rō? Núu súcuan ¿te ndese ni ndundijin tñūú de vijna? áchí.

²⁰ Te ni cacahān tatá de náná de:

Suu sēhe ri cúu tēe yáha jéé ní cacu cuáá. ²¹ Te tu cájini rí ndese ni ndundijin tñūú de vijna, ni tu cájini rí ndé tēe ni nanune tñūú de. Cajñuhun ró máá de, chi je jéhnu de, te na cáchi máá de.

²² Súcuan ni cacahān tatá de náná de, chi cáyūhú de cájito de jñáhan de tēe hebreo. Chi je ni casándaā tēe un jéé núu ndé ñayuu cachi i jeē Jesús cúu Cristo, Yaā ní tají Yaā Dios, te quenehen de i jeē ma cúu ga quiví i ini vehe ñ sinagoga. ²³ Jeē yúcuan ní cacahān tatá de náná de: Cajñuhun ró máá de, chi je jéhnu de.

²⁴ Yūcuán na te tēe hebreo un ní cacana tucu de tēe ni ñyo cuáá un. Te ni cacahān de jíin:

Cachi cají ró nuū rí, jíto jíinú Yaā Dios. Chi cájini rí jeē tēe íyó cuéchi cúu tēe ni nanune tñūu ró.

²⁵ Yūcuán na te ni cahān de:

Tu jíiní na núu íyó cuéchi de, chí naún. Te íyó ñ jeē jíiní ná, cúu jeē tēe cuáá ní cuu ná, te vijna chi ni ndundijin tñūu ná. Achí de.

²⁶ Te ni cacajñuhún tucu de:

¿Ndese ni sáha de jíin ró? ¿Ndese ni nanune de tñūu ró núu súcuan?

²⁷ Te ni cahān de:

Je ni cuu ni castūhun ná nuū ní, te tu ní cácduni ní cuatáhú ní. ¿Te najehē cácduni ni jéé cáchi tucu ná núu ní? ¿Te chí suni cácduni ni jíináhan ní candíje ní yá naún?

²⁸ Yūcuán na te ni cacahān neé jíin de, te áchí:

Máá ró chi cácdíje ró tēe ún, te máá rí chi cácdíje ri Moisés. ²⁹ Te cájini rí jeē ni cáhān Yaā Dios jíin Moisés. Te tēe yúcuan, ni tu cájini rí ndé nuū vēji de.

³⁰ Te ni cahān tēe ni ñyo cuáá:

Náa ni na jéé cácahān ni jéé tu cájini ní jeē vēji de nuū Yaā Dios, vēsú ni nanune de tñūu ná. ³¹ Te cájini yō jeē Yaā Dios tu jíiní nahín yá jeē cájicān ñayuu íyó cuéchi. Chi jíiní nahín yá nuū maá-ni ñayuu jeē cáchiñuhún i ya te casáha i jeē cuní yā. ³² Te nñí vēji yó te tu ní jíiní sōho cuiñi yō jeē ñ tēe nanune de tñūú ñ ga tēe ni cacu cuáá. ³³ Te núu nasūu ndé nuū Yaā Dios vēji tēe ún, te ma cúu cuiñi sáha de ñ jniñu súcuan. Achí de.

³⁴ Te ni cacahān tēe hebreo un:

Róhó chí íyó ndasí cuéchi ró ndé quiví ní cacu ró, ¿te á máá ró steén nuū rí naún? áchí.

Te ni caquenehen tēe un yátā vehe ñ sinagoga.

Siquí ñayuu cáhiyo cuáá ánuá

³⁵ Te ni jini jñuhun Jesús jeē ní caquenehen de tēe ún. Te ni nihín jñáhan ya jíin de, te ni cahān yā jíin de:

¿A cácdíje ró Séhe Yaā Dios?

³⁶ Te ni cahān de:

¿Ndé ñ cúu ya návāha candíje ná yá?

³⁷ Te ni cahān Jesús:

Je ni jito ró núu yā, te suu cúu ruhū jeē cahán jíin ró, achí yá.

³⁸ Yūcuán na te ni jecuiñí yití de nuū yā, te ni cahān de:

Cácdíje ná jéé nihín cúu Jitoho ná.

³⁹ Te ni cahān Jesús:

Vēji ri ini ñayiví yáha jéé sándaā rí siquí ñayuu. Chi ñayuu jeē nájnūhun cácuáá ánuá, ndundijin ini anuá i jeē jécūhun ni i siquí rí. Te ñayuu jeē jéni ni i jeē cá-jecūhun ni i, nájnūhun nducuáá ánuá i. Achí yá.

⁴⁰ Te sava tēe fariseo jeē cáhiin jíin yá, ná ni cajini de jñuhun yáha, te ni cacahān de jíin yá:

¿Te chí jéni ni rō jeē suni tēe tu cájécūhun ni cácuu máá rí naún?

⁴¹ Te ni cahān Jesús:

Núu jeē cácuu ró tée tu jécūhun ni nuú, te ma cóo cuēchi ró. Te siquī jeē ní cacahān rō jeē cájecūhun ni rō, te tu cájetáhú ró, jeē yúcuu condee cuēchi siquī rō.

Jnūhun yátá síquī lanchi

10 'Jendaá cahán rī jíin ró, núu yíhi lanchi ini corral cánevāha cáhnu ñayuu, te núu ndé tée tu quívi de ichi yéhyí corral un, chi sa suhva inga lado cáa de quívi de, tēe un cúu ñacuīhná, chi vēji jeē sacuíhná. ² Te tēe quívi ichi yéhyí, chi tēe un cúu pastor ndíto lanchi. ³ Te tēe ndíto yéhyí, núne de te quívi tēe ún. Te lanchi de cánacuni tē tachī de. Te cána de síhví lanchi máá de, te táva de tí. ⁴ Te núu ni tava de ndíhi lanchi máá de, te yósnúu de nuū tē cuahān de. Te lanchi un cándiquīn tē de, chi nácuni tē tachī de. ⁵ Te ma cóndiquīn tē yatā inga tēe, chi sa suhva cunu tí coto tí de, chi nácuni tē jeē nasūu jítoho tē cúu.

⁶ Jnūhun yátá yáha ní cahān Jesús jíin ñayuu, te tu ní cájecūhun ni i na jnūhun cúu jeē ni cáhān yā.

Jesús cúu máá pastor vāha

⁷ Yūcuán na te ni cahān gā Jesús jíin i:

Jendaá cahán rī jíin ró: Máá rí cúu nájnūhun yéhyí corral nuū quívicoo ñayuu cácuu nájnūhun lanchi ri. ⁸ Tāca tēe jeē tu ní tájí Yaā Dios, jeē ní quijicoo de nde ná tu quee rī, cácuu de nájnūhun ñacuīhná, chi tu ní cástéen de jnūhun ndaā. Te ñayuu cácuu nájnūhun lanchi ri, tu ní cájetáhú i de. ⁹ Máá rí cúu nájnūhun yéhyí. Te ñayuu jeē jíin máá rí quívicoo, jnama ri i. Te cuu i nájnūhun lanchi jeē ndívicoo tí nuū yíhi vāha tí, te quéndacoo tí nuū cáji vāha tí.

¹⁰ Tēe cuíhná chi máni vēji de jeē sacuíhná de lanchi, te cahni de, te snāa de. Te ruhū chi vēji ri návāha cote-cu ñayuu cácuu lanchi ri, te nde yōhyo vāha ndetū coo i. ¹¹ Máá rí cúu máá pastor vāha. Te pastor vāha chi ndíto vāha de lanchi de, vēsú nde cuu de jeē siquí tē. ¹² Te ñn tēe yíyāhu, nasūú pastor tē cúu de, chi nasūú lanchi máá de cúu tí. Te núu jíto de jeē vēji yihī, te stóo de lanchi, te jínu de cuahān de. Te yihī chi jñí tí lanchi, te sáha tí jeē jité núu lanchi. ¹³ Te tēe yíyāhu ún chi jínu de cuahān de siquī jeē lanchi tátú cúu jeē ndíto de, te jeē yúcuu tu cúndáhú ni de tí.

¹⁴ Máá rí cúu máá pastor vāha. Te jíin rī tāca ñayuu cácuu nájnūhun lanchi ri, te máá i cájini i ruhū. ¹⁵ Te yāha cúu nájnūhun jeē Tatá rī jíin yā ruhū, te máá rí jíin rī Tatá rī. Te cuu rī jeē siquí ñayuu cácuu lanchi ri. ¹⁶ Te suni íyó gá ñayuu jeē cácuu lanchi ri, te sññ sññ ñayuu cácuu i. Te cánuú jéē suni condeca rī ñayuu ún. Te cu-atáhú i jnūhun cáhān rī. Te coyūcu cáhnu-ni ndíhi ñayuu candíje, te coo ñn-ni pastor i.

¹⁷ Te Tatá rī manī ndasí yá jíin rí siquī jeē jéhe ri máá rí jeē cúu rī jehē ñayuu, te natecu tucu ri. ¹⁸ Ni ñn ma cúu cahni ruhū, chi máá rí cúu jeē jéhe jnūhun cuu rī. Jeē cachí máá rí te cuu rī, te jeē cachí máá rí te natecu

rī, chi súcuu íyó poder rī. Súcuu ni cahān Tatá rī jeē sáha ri. Achí yá.

¹⁹ Te jeē ní cajini jnáhan ñuu yā hebreo jnūhun yáha, te ni cacusñn tucu i. ²⁰ Te cuehē i ni cacahān:

¿Naun cáchusóhó ró jeē cahán de? Chi ñūhun tachī ini de, te ni tēvi xíní de.

²¹ Te sava ga i ni cacahān:

Tu súcuu cáhān tēe ñūhun tachī ini, nájnūhun cáhān tēe yáha. Te tēe ñūhun tachī ini, ¿á cuu nanune de tinūu tēe cuáá naún? Achí.

Jeē ní casquéhichí i Jesús

²² Te tiempo míjin cúu, te ñuu Jerusalén cánasáha ñayuu vico jeē cánucūhun ni i quívi ní cuhíi templo cáhnu. ²³ Te jíca cuu Jesús ini templo, ini corredor jeē naní Salomón. ²⁴ Te jnáhan ñuu yā hebreo ni cacutútú i nuū yā, te ni cacahān i:

¿Nasaa ga quívi sáha ró jéē ma cucáhnu ni rí? Cachi cají núu rī jijnáhan ri núu máá ró cúu Cristo.

²⁵ Te ni cahān Jesús:

Je ni castūhun rí nuū rō, te tu ní cácadíje ró. Tāca jniñu jeē ní tejníñu Tatá rī ruhū sáha ri, yūcuu stéén cají jéē maá yá ni tají ruhū. ²⁶ Te tu cácadíje ró, chi nasūú lanchi ri cácuu ró, nájnūhun je ni cahān rī jíin ró. ²⁷ Ñayuu cácuu lanchi ri, chi nácuni i jeē maá rí cúu jeē cahán jíin i. Te jíin rī i, te cándiquīn i ruhū. ²⁸ Te cotecu i ññ cáni sáha ri, te ma jnahnú ndetū cuítí i. Te ni ñn ma cúu quende i ndaha ri. ²⁹ Máá Tatá rī ni squívi ya i ndaha ri. Te cújéhu ga maá yá vēsú tāca gá. Te ni ñn ma cúu quende i ndaha ya. ³⁰ Máá rí jíin Tatá rī, chi ñn-ni cúu ri, achí yá.

³¹ Yūcuán na te jnáhan ñuu yā hebreo ni caquihin tu-cu de yuū jeē cuáha de xíní yā. ³² Te ni cahān yā jíin de:

Ni steén rī cuehē jniñu vāha nuū rō jeē ni sáha ri jíin poder Tatá rī. ¿Te á síquī jeē ni sáha ri jniñu vāha cúu jeē cuáha ró yúu xíní rī núu súcuu? Achí yá.

³³ Te ni cacahān de jíin yá:

Nasūu síquī jeē ni sáha ró jniñu vāha cúu jeē cuáha ri yuū xíní rō, chi siquī jeē cahán ndevāha ró jéē achí ró jeē ñnuú cúu ró jíin Yaā Dios. Chi tēe-ni cúu ró, te sáha ró jéē ñnuú cúu ró jíin Yaā Dios. Achí de jíin yá.

³⁴ Te ni cahān Jesús:

Yósó núu tútu ley cánevāha ró jéē ni cáhān Yaā Dios: Nájnūhun yaā cácuu ró, áchí Yaā Dios, achí tutu. ³⁵ Chi ñayuu jeē ní cajetáhú jnūhun ya, ni cahān yā jeē cácuu i nájnūhun yaā. Te cájini yō jeē ma cúu cahān yō jeē tú ndaā jnūhun cáhān tutu íi. ³⁶ Núu súcuu ¿te naun cácahān rō jeē jnūhun ndevāha cúu jeē ni cáhān rī jeē Séhe Yaā Dios cúu rí? Chi máá Yaā Dios ni jeni ya ruhū siquī jniñu íi, te ni tají yá ruhū vēji ri ini ñayívi. ³⁷ Núu tu sáha ri jniñu sáha Tatá rī, núu súcuu te ma candíje ró ruhū. ³⁸ Te núu sáha ri, te vēsú tu cácadíje ró ruhū, te na cándíje ró síquī jniñu sáha ri ún. Te súcuu te cucáhnu ni rō jeē ñn-ni cúu Tatá rī jíin rí, te ñn-ni cúu ri jíin Tatá rī. Achí yá.

³⁹ Yūcuán na te cánducú tucu de jni de ya. Te ni ndoñhún-ni ya cuahān yā.

⁴⁰ Te cuanuhun yā yūte Jordán ichi núu cáne niāndii, nuū ni íne Juan ni scuándute de. Te ni condee yā yūcuán. ⁴¹ Te ni quijicoo cuehē ñayuu nuū yā, te ni cacahān i jíin táca jnáhan i:

Ndaā chi vēsú tu ní sáha Juan ni ñn jniñu jéhnú, te ni cundaā ndiñi jnūhun ni cahān de siquī ndese sáha tēe yáha. Achí i.

⁴² Te cuehē ñayuu jeē ni jéngoo nuū yā yūcuán, ni candíje i ya.

Jeē ni jíhī Lázaro

11 Te ni iyo ñn tēe cūhú, nání de Lázaro. Te máa de jíin cuáha de María jíin Marta, cácuu de ñayuu ñuu Betania. ² Te María un jēē cúu cuāha Lázaro, suu ña cúu jeē ní chihi aceite perfume jehē Jitoho yō, te ni nasíchí ña jíin xíní ña. ³ Te ndíndúú cuáha de un ní catajǐ ña jnūhun cuahān nuū Jesús:

Tēe jeē maní ni jíin, cūhú de, áchí ña, áchí mozo.

⁴ Te ná ni jini Jesús jnūhun, te ni cahān yā:

Cuehyī yáha chi nasūu cuéhyī jeē ví cuu de cúu. Chi sa suhva sáha Yaā Dios jeē cuni ñayuu ndese cújéhnú ya. Chi ruhū, Sēhe Yaā Dios, jíin cuéhyī yáha te stéén rǐ jeē suni cújéhnú máa rǐ. Achí yá.

⁵ Te maní Jesús jíin Marta jíin cūhū ña jíin Lázaro. ⁶ Te vēsú súcuan te nuū ni níhīn yā jnūhun jeē cūhú de, te ni quendōo ya uū gā quivī nuū ndeé yá un. ⁷ Yūcuán na te ni cahān yā jíin tēe cáscuáha jíin yá:

Na quíhīn tucu yó región Judea.

⁸ Te tēe cáscuáha un ní cacahān de jíin yá:

Maestro, ná tu cuu quivī jeē ní canducú jnáhan yó hebreo cuāha de yuū xiní ní. ¿Te cúní ni quíhīn tucu ní yúcuan naún? Achí de.

⁹ Te ni cahān Jesús:

Ma cúu cahni ñayuu ruhū núu ná tu quee maá quivī cuu rǐ. Chi jeē iyó rǐ ñayivī yáha cúu nájñūhun jeē iyó úxī uū hora ñn nduú. Te jeē sáha ri jeē cuní Yaā Dios, cúu ri nájñūhun tēe jeē jíca nduú, te tu cáchihi de jehē de, chi cúndijin nuū de ñayivī yáha. ¹⁰ Te tēe jeē tu sáha jeē cuní Yaā Dios, chi nájñūhun jíca de jecuāā, te nájñūhun cáchihi de jehē de, chi tu cúndijin ini anuá de. Achí yá.

¹¹ Yūcuán na te ni cahān tucu ya:

Amigo yō Lázaro quíxí de, te quihīn rǐ sáha ri jeē ná-tahū ni de. Achí yá.

¹² Yūcuán na te tēe cáscuáha un ní cacahān de:

Núu quíxí de te jíin yō jeē nduvāha de.

¹³ Te Jesús chi súcuan ni cahān yā jeē jé ni jíhī de. Te cájeni ni tēe cáscuáha jeē quixí ndije de. ¹⁴ Yūcuán na te ni cahān cají yá:

Je ni jíhī Lázaro. ¹⁵ Te cúsiñ ni rǐ jeē tu ní cóyūcu yó yūcuán, návāha vāha ga candíje ró jēē coto ró jniñu jéhnú sáha ri. Núu súcuan te na quíngoo yó núu ndíyí ún. Achí yá.

¹⁶ Yūcuán na te Tomás, tēe cúu cuatí, ni cahān de jíin jnáhan de jeē cascuáha jíin yá:

Suni na quíngoo yó návāha cuu yō jíin yá, achí de.

Jesús cúu jeē sáha jeē nátecu te cotecu ñí cáni

¹⁷ Te nuū ní quee Jesús, te jíin yā jeē ní cuu cuūn quivī yéndūji Lázaro. ¹⁸ Te yajni-ni íne ñuu Betania jíin ñuu Jerusalén, nájñūhun uū kilómetro yosáva. ¹⁹ Te Marta jíin María, ni quecoo cuehē jnáhan ña hebreo jeē cahán i jnūhun ndeyí ni jíin ña jeē siquí jeē ni jíhī cuāha ña. ²⁰ Te nuū ní jini Marta jeē véji Jesús, te ni quenda ña cuajnahān ña ya. Te María chi ni ndōo ña vehe. ²¹ Te ni cahān Marta jíin Jesús:

Núu ní iyo ní yáha, te ma cúu cuāha ná núu. ²² Te vēsú súcuan te jíin na jēē táca jēē cacán ni núu Yaā Dios, te sáha ya, achí ña.

²³ Te ni cahān Jesús jíin ña:

Natecu cuāha ró.

²⁴ Te ni cahān Marta:

Jíin na jēē nátecu de quivī nátecu táca ndíyí nde quivī jíin ñayivī.

²⁵ Te ni cahān Jesús:

Máa rǐ cúu Yaā sáha jeē nátecu jíin jēē cótecu ñí cáni. Ñayuu candíje jeē jnáma ri i, vēsú na cúu i, te natecu i. ²⁶ Te ñayuu cátecu te candíje i ruhū, cotecu i ñí cáni andiví. ¿A candíje ró jnúhun yáha? Achí yá.

²⁷ Te ni cahān ña:

Candíje ná jēē maá ní cúu Cristo, Sēhe Yaā Dios, jeē achí tutu jeē quíji ini ñayiví, áchí ña.

Jeē ni ndáhyū Jesús nuū yéndūji Lázaro

²⁸ Te ná ni cahān ña súcuan, te cuahān-ni ña, cuacana yuhu ña cuhū ña María:

Máa Maestro ni quee yā, te cána ya rohó, áchí ña.

²⁹ Te jeē ní jini María jnūhun yáha, te yachí ni ndocuiñí ña, cuahān ña nuū yā. ³⁰ Te ná tu quivī Jesús ñuu, chi ni ndōo-ni ya nuū ní jéjnahan Marta yā. ³¹ Te ñayuu hebreo un jēē cáyūcú ini vehe jíin María, jeē cácahān i jnūhun ndeyí ni jíin ña, ni cajito i jeē yachí ni ndocuiñí ña cuahān ña. Te ni candiquīn i ña cuangoo i, chi cájeni ni i jeē cuándahyū ña nde nuū yéndūji ndíyí.

³² Yūcuán na te ni jinū María nuū íne Jesús, te ni jecuiñí yití ña nuū jehé yā, te ni cahān ña:

Núu ní iyo ní yáha, te ma cúu cuāha ná núu, áchí ña.

³³ Te ni jito Jesús jeē ndahyū ña jíin jēē cándahyū ñayuu vējicoo jíin ña. Te yōhyo ni nducuíhyá ni yā, te ni jnahuhū ni yā jeē cundáhú ní yā i. ³⁴ Te ni cajñūhun yá ña:

¿Ndé mí ní cachindūji ró de?

Te ni cacahān ña jíin yá:

Quíhīn yō te cuni ní, áchí ña.

³⁵ Te ni ndahyū Jesús. ³⁶ Yūcuán na te ni cacahān ñayuu hebreo un:

Condēhe ná yōhyo maní de jíin ndíyí ún.

³⁷ Te sava i chi ni cacahān i:

Tēe yáha jéē ní nanune de t̄inūu tēe cuáá, ¿á tu ní cúu sáha de jeē ma cúu Lázaro nuú? áchí i.

Jeē ní natecu Lázaro

³⁸ Te yōhoyo ni jnahuhū ni tucu Jesús, te ni quee yā nde nuū ȳndūji nd̄iyi. Te ñin yaū cava cúu, te yuyáú un ndíhyú ñin yuū. ³⁹ Te ni cahān yā:

Tejiyo yuū un jíjnáhan ró, áchí yá.

Te Marta, cuāha nd̄iyi un, ní cahān ña:

Je jéēn xicō de, chi je ni cuu cuūn quiv̄i ȳndūji de.

⁴⁰ Te ni cahān Jesús jíin ña:

¿A násūú je ni cahān r̄i jíin ró jeē núu candíje ró te co-
to ró jéē yōhoyo cújéhnū Yaā Dios jíin poder yā? achí yá.

⁴¹ Yūcuán na te ni catejiyo i yuū jeē ndési yuyáú nd̄iyi
ún. Te ni ndacoto-ni Jesús ichi ándiv̄í, te ni cahān yā:

Tátā, na cútahū na nuū ni jéē sáha ní jéē jíicán na.

⁴² Te jíiní na jéē niní sáha ní jéē jíicán na. Te jeē váha
ñayuu cáhīin yáha cúu jeē súcuan cáhān na, návāha na
cándíje i jeē maá ní ni tají sáña.

⁴³ Te ná ni cahān yā súcuan, te ni cahān jee ya:

Lázaro, quenda quiji ró, áchí yá.

⁴⁴ Te ni quenda-ni tēe ni jihī ún, te ñúsúcún ndaha de
s̄h̄in de jíin tira sahma. Te nuū de ñúsúcún ñin sahma.
Te ni cahān Jesús jíin i:

Nandají ró sahma ñúsúcún de, návāha cuu caca de,
áchí yá. Te ni canandají i.

Jeē ní casquijnáhan de jnūhun jeē cáhni de Jesús

(Mt. 26.1-5; Mr. 14.1-2; Lc. 22.1-2)

⁴⁵ Yūcuán na te cuehē ñayuu hebreo jeē ní quijicoo
nuū María, ni cacandíje i Jesús, chi ni cajito i jniñu ni
sáha ya. ⁴⁶ Te sava i chi cuango i nuū tēe grupo
fariseo, te ni cacastūhún i ndese ni sáha Jesús.

⁴⁷ Yūcuán na te tēe fariseo un jíin sūtū cácujehnū ni
candutútú de junta jíin táca gá tēe cácujehnū. Te ni
cacahān de:

¿Ndese sáha yó? Chi tēe ún yōhoyo cuehē jniñu jéhnū
sáha de. ⁴⁸ Te núu condēhé-ni yó, te ndiv̄ii ñayuu can-
díje i de. Te quijicoo táca tēe nación Roma jeē cácujehnū,
te canu de templo cáhnu yó, te scuíté núu de
ñayuu nación yō, achí de jíjnáhan de.

⁴⁹ Te ñin jnáhan de jeē naní Caifás, jeē cúu maá sūtū
cujéhnū ga cuiyā ún, ni cahān de:

Róhó chi tu cájini cuiti rō, ⁵⁰ ni tu cájecūhun ni rō jeē
váha ga jeē cúu ñin tēe jehē ñayuu nación yō vēsú jeē
náā ndiv̄ii i, áchí de.

⁵¹ Te tu ní cáhān de jnūhun yáha jéē jéni ni maá de.
Chi siqūi jeē cúu de sūtū cujehnū ga cuiyā ún, te ni
sáha Yaā Dios jíin de jeē ní nacani de jnūhun jeē cúu
Jesús jehē ñayuu nación hebreo. ⁵² Te nasūu maá ñin-ni
jehē nación hebreo, chi suni jehē ndiv̄ii ñayuu cácuu
sēhe Yaā Dios jeē ní cajitē núu táca nación, návāha ñin
na cuu i jíjnáhan i. ⁵³ Yūcuán na te nde quiv̄i ún te táca
tēe hebreo cácujehnū un, ní casquijnáhan de jnūhun
jeē cáhni de Jesús.

⁵⁴ Jeē yúcuan tuá ní jíca ndijin yā nuū jnáhan ñuu yā
hebreo un, chi ni quenda ya región Judea, te cuahān
yā ñin ñuu naní Efraín, nuū iyó yajni ñuhun téhé. Te ni
condee yā yúcuan jíin tēe cáscuáha jíin yá.

⁵⁵ Te ni cuyajni vico pascua jeē cánasáha ñayuu he-
breo. Te cuehē ñayuu táca ñuu yūcuán cuángoo i ñuu
Jerusalén, návāha squícu i jeē cahán ley jeē cúchi i
ndundoo i nuū Yaā Dios, te sáá te quejéé vico pascua.

⁵⁶ Te cánanducú i Jesús, te cácajnūhun jnáhan i ini tem-
plo:

¿Ndese cájeni ni rō? ¿A quiji de vico, chí tuú? Achí i.

⁵⁷ Te sūtū cácujehnū jíin tēe fariseo ni candacu de
jniñu jeē núu ndé ñin ñayuu jiní ndé nuū íne ya, te na
cástūhún i, návāha jniñ de ya.

Jeē ní chuhun María perfume jehē Jesús

(Mt. 26.6-13; Mr. 14.3-9)

12 Te cúmanī iñū gā quiv̄i te coo vico pascua. Te ni
jehēn tucu Jesús ñuu Betania nuū ndeé Lázaro,
tēe ni jihī te ni nastécu yā de. ² Te ni casáha i ñin vico
xíni jeē yiñúhún i jíin yá. Te Marta ni jeni ña cohō. Te
Lázaro yéji de staā jíin yá nuū mesa jíin táca gá ñayuu.

³ Yūcuán na te María ni quee ña jíin nájnūhun sava
litro aceite perfume jeē máni ita nardo cúu, te yōhoyo
yahu ndeé. Te ni chuhun ña jehē Jesús, te ni nasíchí ña
jíin íxi ña. Te n̄í ini vehe un ní chitú xicō perfume un.

⁴ Yūcuán na te ni cahān Judas Iscariote sēhe Simón, ñin
tēe scuáha jíin yá un, te suu de cúu jeē nastúu de ya:

⁵ ¿Najehē tu ní cúyāhu perfume yáha jéē uní ciento
denario, te cuāha yó núu ñayuu ndahú núu. Achí de.

⁶ Súcuan ni cahān de, nasūu jéē cundáhú ndije ni de
ñayuu ndahú, chi sa suhva jeē cúu de tēe cuíhná. Chi
maá de ndiso yijni xūhún, te quíhin cuíhná de jeē cáje-
quin táca tēe ún. ⁷ Yūcuán na te ni cahān Jesús:

Ma stáhān rō ña. Chi jeē ní sáha ña yāhá cúu jeē ni
sátūhva ña ruhū nde quiv̄i jeē quíndūji ri. ⁸ Chi níni
cáyūcu ñayuu ndahú jíin ró, te ruhū chi tuá condee r̄i
jíin ró. Achí yá.

Jeē ní casquijnáhan de jnūhun jeē cahni de Lázaro

⁹ Te cuehē ñayuu hebreo ni cajini jnūhun i jeē néne
ya ñuu Betania. Te ni jinūcoo i, te nasūu maá ñin jeē
cuní i coto i nuū Jesús, chi suni jeē cuní i coto i nuū
Lázaro, tēe jeē ní nastécu yā. ¹⁰ Yūcuán na te sūtū
cácujehnū ni casquijnáhan de jnūhun jeē suni cahni de
Lázaro. ¹¹ Chi jeē siqūí Lázaro te ni cujiyo cuehē jnáhan
ñuu de hebreo nuū de, te cácaandíje i Jesús.

Jeē ni quiv̄i Jesús Jerusalén

(Mt. 21.1-11; Mr. 11.1-11; Lc. 19.28-40)

¹² Te inga quiv̄i ún, te ñayuu cuehē jeē ní quecoo vico
pascua un, ní cajini jnūhun i jeē véji Jesús ñuu
Jerusalén. ¹³ Te ni cajehnde i ndaha ñúú, te ni quenda-
coo i cuajnahān i ya. Te cácana jee i:

Yōhyo cújéhnū Yaā Dios. Yōhyo vāha Yaā cúu Yaā jeē véji jíin jniñu máá Jítóho yō Yaā Dios. Yōhyo vāha Yaā cúu Rey nación yō Israel. Achí i.

¹⁴ Te ni nihīn Jesús ñn burro, te ni jecosō yā tī, nájnūhun cáhán tutu iī:

¹⁵ Ñayuu ñuu Jerusalén jeē naní ñuu Sion, ma yūhu ró jijnáhan ró.

Yāhá condēhe ró jeē véji Rey rō, te yósó yá ñn burro.

Achí tutu.

¹⁶ Te quivī ún te tēe cáscuáha jíin yá, tu ní cájecūhun ni de jeē súcuan squícu tāca jēe yosó núū tútu iī. Te nde ná ni ndujéhnū Jesús jeē cuánuhun yā andiví, te sáá te ni canucūhun ni de tāca jnúhun yósó síquī yā, jíin jēe ní casáha de súcuan jíin yá.

¹⁷ Te ñayuu ní cahīin jíin yá ná ni cana ya xinī Lázaro nuū ní yindūji de, te ni nastécu yā de, ni canacani i jnúhun ndese ni sáha ya. ¹⁸ Jeē yúcuan ní quendacoo ñayuu cuehē un, ní jejnahan i ya, chi ni cajini jnúhun i jeē ni sáha ya jniñu jéhnū un jēe ni steén yā poder yā.

¹⁹ Yūcuán na te ni cacahān maá tēe fariseo:

Vijna te je ni cajito yó jēe ma cúu cuiti gā casi yō. Chi jíto yó jēe ndivii cuiti ñayuu cuangoo i jíin de. Achí de jijnáhan de.

Ñayuu nación Grecia nánducú i Jesús

²⁰ Te sava ñayuu nación Grecia, suni ni quijicoo i ñuu Jerusalén vico pascua un jēe chiñúhún i Yaā Dios. ²¹ Te ni quecoo i nuū Felipe, tēe ñuu Betsaida ndañú Galilea. Te ni cacahān i jíin de:

Tátā, cácu ni ná cahān na jíin Jesús, achí i.

²² Te ni jehēn Felipe, ni castūhún de nuū Andrés. Te ndindú de cuacastūhún de nuū Jesús. ²³ Te ni cahān Jesús jíin de:

Je ni quee quivī jeē ndujéhnū Yaā ní nduu tēe. ²⁴ Te jendaá cahān rī jíin ró, ñn nunī trigo núu tú ñingava nuū ñúhun te quindūji, núu súcuan te quendōo máá ñn-ni. Te núu quindūji, te nacayā cuehē ndasí. Te suni súcuan cánuú cuu rī quindūji ri, návāha coo cuehē ñayuu jeē ndúu i sēhe Yaā Dios. ²⁵ Te na-ni ñayuu núu tu jéhe i jnúhun ndoho i jeē síquí ruhū, te jnahnū nde-tū i. Te ñayuu jeē jéhe i jnúhun ndoho i jeē síquí ruhū ini ñayiví yáha, cotecu i ñí cáni andiví. ²⁶ Núu ndé ñáyuu cuní i cuajníñu i nuū rī, na cóndiquīn i ruhū. Te nuū cóndee rī, suni yūcuán condee ñayuu jejníñu nuū rī. Te ñayuu jejníñu nuū rī, chi sáha Tátā rī jeē cujéhnū i.

Jeē ni cáhān Jesús jeē cuu yā

²⁷ Te vijna te cúcuíhyá ndasí ni rī sáha jnúndóho quiji síquī rī. ¿Te ndese cahān rī? ¿A cáhān rī jíin Tátā rī? Jna-ma ní sáña núu jnúndóho jeē quíji síquī ná, achi rī? Ma cúu, chi jeē síquí yúcuan cúu jeē véji ri. ²⁸ Tátā, steén ni jēe cujéhnū ndasí ní jíin poder ni, achí yá.

Yūcuán na te ichi andiví ní cahān ñn jnúhun:

Je ni steén rī jeē cujéhnū ri, te sáha tucu ri inga jínu, achí yá.

²⁹ Te ni cajini ñayuu cáhīin yūcuán, te ni cacahān i jeē taja cáhán. Te sava ga i ni cacahān:

Ñn ndajéhé Yaā Dios ni cahān jíin yá.

³⁰ Te ni cahān Jesús jíin i:

Tu ní cáhān jnúhun yáha jēe síquí ruhū, chi sa suhva návāha cuni rō síquī jnúhun jeē ni cáhān yā jíin rí. ³¹ Vijna cúu jeē sándaā Yaā Dios síquí cuéchi ñayuu ñayiví yáha. Vijna cúu jeē scúnu ya jexeén jeē ndácu jniñu ini ñayiví yáha. ³² Te ruhū, núu na jínu condita caa ri cuu rī ini ñayiví, te sáha ri jeē jnāá tāca ñáyuu quivícoo i ndaha ri, achí yá.

³³ Súcuan ni cahān yā jeē steén yā ndese modo cuu yā. ³⁴ Te ni cacahān ñayuu jíin yá:

Ni cajini sōho ná jēe cahān tutu ley Yaā Dios cánevāha yó, jeē Cristo cotecu yā ñí cáni. ¿Te naun cáhān ni jēe Yaā ní nduu tēe, cánuú condita caa ya cuu yā? ¿Ndé ñn cúu máá Yāá ní nduu tēe núu súcuan? Achí i.

³⁵ Yūcuán na te ni cahān Jesús:

Máá jecu na quivī condee rī jíin ró jeē cúu ri luz cundijin ini anuá rō. Núu súcuan te vijna jeē iyó gá luz rī jíin ró, te caca ró jíin, chi sanaa ni rō te cuahān rī, te nájnūhun quendōo ró núu néē. Chi ñayuu cájica nájnūhun nuū néē, tu cájini i ndé nuū cuángoo i.

³⁶ Núu súcuan te níni ndéé gá rī jíin ró, te candíje ró rúhū jeē cúu ri luz, návāha nduu ró ñáyuu cájica jíin luz, achí yá.

Súcuan ni cahān Jesús tāca jnúhun yáha, te cuahān-ni ya, te tuá ni steén yā maá yá nuū i.

Jeē tu ní cácuandíje ñayuu hebreo jeē cúu ya Cristo

³⁷ Te vésú cuehē jniñu jéhnū ni sáha Jesús jeē steén yā poder yā nuū i, te tu ní cácuandíje i ya. ³⁸ Chi squícu nahín jnúhun ni cahān Isaías, tēe ni nacani jnúhun Yaā Dios nde jenahán:

Tátā Yaā Dios, tu ní cácuandíje ñayuu jnúhun ni canacani ná,

te tu ní cácuandíje i jniñu jéhnū jeē ni steén ni poder ni núu i.

Achí Isaías. ³⁹ Jeē yúcuan tu ní cúu candíje i, chi ni cahān tucu Isaías:

⁴⁰ Ni sáha ya jeē nájnūhun cáhīyo cuáá ánuá i, jíin jēe cácuandíje ni i, návāha coo nájnūhun jeē tu cájito i, te ni ma jécūhun ni i, ni ma násāma ini i quivícoo i nuū rī, jeē nasávāha ri anuá i nuū cuéchi i.

Achí Cristo, achí tutu. ⁴¹ Jnúhun yáha ní cahān Isaías, chi je ni jito de ndese yōhyo cújéhnū Jesús, te ni cahān de ndese coo quiví jeē quíji ya.

⁴² Te vésú súcuan te cuehē ñayuu hebreo chi ni cácuandíje i ya, te suni nde jíin sava tēe cándacu jniñu. Te tu ní cácuandíje de jeē cácuandíje de ya, chi síquí jeē

cáyūhú de tāca tée fariseo. Chi núu súcuan te quenehen ún de ini vehe iī sinagoga jeē ma cuáha ga jnūhun quivicoo de. ⁴³ Chi cácusī gā ni de jeē cujéhnū de sáha ñayuu, vēsú jeē cujéhnū de sáha Yaā Dios.

Jnūhun cáhán Jesús cúu jeē sándaā siquī ñayuu

⁴⁴ Te ni cahān jee Jesús:

Ñayuu cácadíje ruhū, nasūu máñúhún-ni ruhū cácadíje i, chi suni cácadíje i nde maá Tátá rī, Yaā ní tají rúhū. ⁴⁵ Te ñayuu cájito nuū rī, suni cájito i nuū Yaā ní tají rúhū. ⁴⁶ Máá rí jeē cúu ri luz cúndijin ini anuá ñayuu, ni quiji ri ini ñayiví návāha tāca ñayuu cácadíje ruhū, ma cáca i nájñūhun nuū néē. ⁴⁷ Te núu ñn ñayuu jínī sōho i jnūhun cáhán rī, te núu tu jétáhú i, te nasūu rúhū sándaā siquī i. Chi tú vēji ri jeē ndénehen ri cuēchi siquī ñayuu ñayiví, chi sa suhva jeē jnáma ri i. ⁴⁸ Te ñayuu jeē casquéhichī i ruhū te tu cájetáhú i jnūhun cáhán rī, iyó ñn jeē sándaā siquī i. Suu tāca jnūhun jeē ni cáhán rī, jnūhun un cúu jeē ndenehen cuēchi siquī i quiví jínu ñayiví. ⁴⁹ Chi tu cáhán rī jeē cúu ni maá rí, chi Tátá rī, Yaā ní tají rúhū, máá yá ni ndacu jniñu nuū rī ndese cahān rī jínī ndese stéén rī. ⁵⁰ Te jínī rī jeē jniñu ndácu Tátá rī sáha jeē cótecu ñayuu ññ cáni. Núu súcuan te jnūhun cáhán rī, chi máni jnūhun jeē ní cachi Tátá rī cúu, áchí yá.

Jeē ní nacate ya jehē tēe cáscuáha

13 Te jehíni inga quiví te quejéé vico pascua. Te je jínī Jesús jeē ní quee quiví jeē quénda ya ñayiví yáha quínūhun yā nuū Tátá yā. Te níni cúndáhú ni yā ñayuu maá yá jeē cáyucú ini ñayiví. Te vijna jeē jínu jeē íne ya ñayiví, te sáha ya ñn jniñu jeē steén cají yá jeē cundáhú ni yā i.

² Te jexeén je ni squívī ini anuá Judas Iscariote sēhe Simón, jeē vijna nastúu de ya. ³ Te jínī Jesús jeē vēji ya nuū Yaā Dios, te nuhūn yā nuū Yaā Dios, jínī jēē ni sáha Tátá yā jeē cujéhnū ya siquī ndīhi-ni. ⁴ Te cúxíni ya jínī tēe cáscuáha jínī yá, te ni ndocuiñī yā. Te ni stáa ya sahma ndíi ya, te ni jihni yā ñn toalla chíji ya. ⁵ Te ni chuhun ya ndute ini ñn tijehēn. Te ni quejéé yá nacate ya jehē tēe cáscuáha. Te násíchí yā jínī toalla jeē nuhní chíji ya.

⁶ Te ni jinū yā nuū Simón Pedro. Te ni cahān Pedro jínī yá:

¿Sa máá ní nacate jehē ná naún?

⁷ Te ni cahān Jesús:

Tu jécūhun ni rō jeē sáha ri vijna, te cúcuéé gá te jecūhun ni rō.

⁸ Te ni cahān Pedro jínī yá:

Ma nacate cuiti ni jehē ná.

Te ni cahān Jesús:

Núu tú nacate ri jehē rō, te ma cúu cundúú ró jínī rí.

⁹ Te ni cahān Simón Pedro:

Núu súcuan cúu te nasūu máá jehē-ni ná, chi suni nacate ní ndaha ná jínī xínī ná, áchí de.

¹⁰ Te ni cahān Jesús jínī de:

Tēe jeē sa ní jichi, tu jínī ñúhún ndundoo ññ cáhnu de, chi máá jehē-ni de, chi je iyó ndoo ññ cáhnu de. Te máá ró chi je ni candundoo ró. Te tú ndīhi ró cáhiyo ndoo.

¹¹ Chi je jínī yā ndé ñn de cúu jeē nastúu de ya, te jeē yúcuán ní cahān yā: Tú ndīhi ró cáhiyo ndoo.

¹² Te nuū ni jínu ni nacate ya jehē de jijnáhan de, te ni naquihin ya sahma ndíi ya, te ni nucōo tucu ya nuū mesa. Te ni cahān yā:

¿A cájecūhun ni rō na vé cuní cahān jeē ni sáha ri jínī ró? ¹³ Cácahān rō jeē Maestro jínī Jítóho rō cúu ri, te ndaā cácahān rō, chi suu ndije cúu ri. ¹⁴ Núu súcuan te vēsú Maestro rō jínī Jítóho rō cúu ri, te ni nacate ri jehē rō jijnáhan ró, te suni súcuan cánuú jéē nacate máá ró jehē jnáhan ró. ¹⁵ Chi jniñu yáha ni sáha ri jeē steén rī nuū rō jeē suni súcuan sa cuajniñu ró núu jnáhan ró, nájñūhun sa máá rí ni jejniñu ri nuū rō. ¹⁶ Jendaá cahān rī jínī ró jeē ñn mozo tu cújéhnū de nuū patrón de, te tēe jíca jniñu táhú nuū de, te cújéhnū de nuū tēe ni tají de. Te máá ró cácu mozo rī, te na cuajniñu ró núu jnáhan ró nájñūhun ni steén rī nuū rō. ¹⁷ Te núu ni cajecūhun ni rō jnūhun yáha, te yōhyo ndetū rō te núu squícu ró.

¹⁸ Te nasūu jéē cahān rī jeē ndīhi ró ndetū, chi je jínī rī tāca rōhó jéē ní nacāji ri. Te cánuú squícu jnūhun yáha jeē cáhán tutu iī: Tēe yéji staā jínī rí, ni ndió cuíññ de siquī rī, achí tutu. ¹⁹ Te vijna te je cástūhun rí tāca jéē yáha núu rō nde ná tu coo, návāha núu na cóo, te candíje ró jéē maá rí cúu Yaā ní tají Yaā Dios. ²⁰ Jendaá cahān rī jínī ró jeē na-ni ñayuu jeē cuatáhú i tāca jéē tají rí, te ruhū jetáhú i. Te ñayuu jetáhú rúhū, suni jetáhú i Yaā ní tají rúhū vēji ri, achí yá.

Jeē ní cachi yā jeē nastúu Judas yā

(Mt. 26.20-25; Mr. 14.17-21; Lc. 22.21-23)

²¹ Te ná ni cahān Jesús tāca jnūhun yáha, te ni cuuíhyá ndasí ni yā. Te ni cahān cají yá:

Jendaá cahān rī jínī ró jijnáhan ró jéē ñn máá ró nastúu ruhū, achí yá.

²² Yūcuán na te tēe cáscuáha jínī yá, ni candacoto de nuū jnáhan de, cájeni ni de ndé ñn de cúu jeē ni cáhán yā. ²³ Te ñn máá tēe scuáha jeē maní gā yā jínī, néne de xiin ya mesa jeē cácu xíni de jínī yá. ²⁴ Te ni sáha Simón Pedro seña nuū de jeē na cájnūhún de ya ndé ñn de cúu jeē ni cáhán yā. ²⁵ Yūcuán na te tēe un ní scáyí de máá de nuū Jesús, te ni cajñūhún de ya:

¿Ndé ñn de cúu? áchí de jínī yá.

²⁶ Te ni cahān Jesús:

Na chūndaji ri staā te cuāha ri nuū ñn de, te suu tēe un cúu, áchí yá.

Te ni chundaji ya staā, te ni jēhe ya nuū Judas Iscariote sēhe Simón. ²⁷ Te jeē ní quihin de staā ún, te ni quiví-ni Satanás ini anuá de. Yūcuán na te ni cahān Jesús jínī de:

Jniñu jeē sáha ró, na sáha yachí rō.

²⁸ Te ni ñn tēe cáyeji staā jíin yá, tu ní cájecūhun ni de naun ni cahān yā súcuan jíin de. ²⁹ Chi sava de cájeni ni de jeē ni cáhān Jesús jíin Judas jeē cuāan de jeē jíini ñúhún yá vico ún, chí jeē cuáha de jecu xūhun núū ñayuu ndahú. Chi máá de ndíso yijni xūhún. ³⁰ Te jeē ní yeji de staā ún, te ni quenda-ni de cuahān de. Te je ni cuaa.

Jeē ní ndacu ya jniñu jéé

³¹ Yūcuán na te jeē cuahán Judas te ni cahān Jesús: Vijná te ruhū, Yaā ní nduu tēe, stéén rī ndese cújéhnu ri, te suni jíin rúhū te cuni ñayuu ndese cújéhnu Yaā Dios. ³² Te núu jíin rúhū cuni ñayuu ndese cújéhnu Yaā Dios, núu súcuan te suni stéén Yaā Dios ndese cújéhnu ruhū jeē cúu ri Sēhe ya. Te yachī-ni stéén yā. ³³ Séhē, tuá nahán condee rī jíin ró jijnáhan ró. Te nanducú ró ruhū, te nájnūhun ni cahān rī jíin táca jnáhan yó hebreo, suni súcuan cáhán rī jíin ró vijná, jeē ma cúu jinūcoo ró núū quihín rī. ³⁴ Te vijná te ndácu ri ñn jniñu jéé núū rō, jeē na cúndáhú ni rō jnáhan ró. Nájnūhun cúndáhú ni rī rohó, suni súcuan na cúndáhú ni rō jnáhan ró. ³⁵ Te núu cúndáhú ni rō jnáhan ró, súcuan te cuni táca ñayuu jeē cácuu ró tēe cáscuáha jíin rí, achí yá.

Jeē ní cachi yā jeē yūhu Pedro cahān de jeē jíini de ya (Mt. 26.31-35; Mr. 14.27-31; Lc. 22.31-34)

³⁶ Te ni cahān Simón Pedro jíin yá: ¿Ndé nuū quihín ni núu súcuan? Te ni cahān Jesús: Nuū quihín rī chí ma cúu condiquīn rō ruhū vijná, te cúcuéé gá te jinū rō. ³⁷ Te ni cahān Pedro: ¿Najehē ma cúu condiquīn na níhín vijná? Tu yúhú ná cuu na jéé siquī ni. ³⁸ Te ni cahān Jesús: ¿A jéni ni rō jeē tu yúhú ró cuu rō jeē siquī rī? Jendaá cahán rī jíin ró jeē nde ná tu cana líhli, te unī jínu yūhu ró te cahān rō jeē tu jíini rō ruhū. Achí yá.

Jesús cúu ichi jeē jíinú yō nuū Tatá yā

14 Te ni cahān gā yā: Ma cucuíhyá ni rō siquī tāca jnúndóho. Na cándije ró jéé sáha Yaā Dios jehē rō, te suni na cándije ró jéé sáha ri jehē rō. ² Chi nuū ndeé Tatá rī, íyó cuéhē vehe condee rō jijnáhan ró. Te núu jeē tu súcuan íyó, te je ni castūhun rí nuū rō nuú. Núu súcuan te quihín rī quisátūhva ri nuū cóyūcu ró. ³ Te jeē quihín rī sátūhva ri nuū cóyūcu ró, te ndiji ri quinaquihin ri rohó quihín yō, návāha suni coyūcu ró nuū cóndee máá rí. ⁴ Te je cájini rō ndé nuū quihín rī, te cájini rō ndese jinū rō yūcuán. Achí yá.

⁵ Te ni cahān Tomás jíin yá: Tu cájini na ndé nuū quihín ni, ¿te ndese cuni ná ichi jíinú yūcuan núu súcuan?

⁶ Te ni cahān Jesús jíin de: Máá rí cúu ichi jinū rō andiví, te máá rí cúu jnūhun ndaā jíin jnúhun cotecu rō ñí cáni. Te ni ñn ma jinú nuū Tatá rī te núu tú ruhū. ⁷ Te núu je ni cajini rō ruhū, te suni je ni cajini rō Tatá rī núu súcuan. Te ndé vijná je cájini rō yā, chí je ni cajito ró núū rī, achí yá.

⁸ Te ni cahān Felipe jíin yá: Stéén ni Tatá ni núū ná, te na cúvāha ni na jíjnáhan ná, achí de.

⁹ Te ni cahān Jesús: Felipe, je ni cuu cuehē quiví jíca ri jíin ró jijnáhan ró, ¿te á ná tu cuni rō ndé ñn cúu ri naún? Tēe jeē jíto ruhū, suu Tatá rī jíto de. Núu súcuan ¿te najehē cahán rō jeē steén rī Tatá rī nuū rō? ¹⁰ ¿A tu cándije ró jéé ñn-ni cúu ri jíin Tatá rī, te Tatá rī ñn-ni cúu ya jíin rí? Tāca jnúhun cáhán rī jíin ró, nasūu jnúhun máá rí cúu. Chí Tatá rī jeē ñn-ni cúu ya jíin rí, máá yá sáha tācá jniñu jeē sáha ri. ¹¹ Candíje ró jijnáhan ró jéé ñn-ni cúu ri jíin máá Tatá rī, te Tatá rī ñn-ni cúu ya jíin rí. Te núu tu cájecūhun ni rō, te cándije ró rúhū siquī tācá jniñu sáha ri. ¹² Jendaá cahán rī jíin ró, núu ndé ñayuu candíje ruhū, jniñu jéhu jeē sáha ri yāhá, suni sáha i. Te jéhu ga jniñu sáha i vésú yāhá, chí quinhun rī nuū ndeé Tatá rī. ¹³ Te tācá na-ni vé cacán rō nuū Tatá rī siquī jeē cáncandíje ró jéé cúu ri Sēhe ya, te sáha ri jeē cacán rō, te súcuan stéén rī jeē yóhyo cújéhnu Tatá rī. ¹⁴ Chí tācá na-ni vé cacán rō siquī jeē cáncandíje ró rúhū, te sáha nahín rí.

Jeē ni jéjnūhun ya jeē tají yá Espíritu Santo

¹⁵ Te núu manī rō jíin rí jijnáhan ró, te na squícu ró jniñu ndácu ri nuū rō. ¹⁶ Te cacān tahu rī nuū Tatá rī, te tají yá inga Yaā chindéé ñáhán rohó, te sáha ya jeē cóo siñ rī rō jijnáhan ró. Te Yaā un cúu máá Espíritu jeē steén jnūhun ndaā, te condee yā jíin ró ñí cáni. ¹⁷ Te ñayuu ñayiví má cúu cuatáhú i ya, chí tu cúu coto i nuū yā, ni tu cúu cuni i ndese Yaā cúu ya. Te máá ró chí je cájini rō ndese Yaā cúu ya, chí ndeé yá jíin ró, te condee yā ini anuá rō ñí cáni. ¹⁸ Ma stóo uun ri rohó, chí ndiji ri nuū rō. ¹⁹ Jecu na quiví te ma cóto ga ñayuu ñayiví núū rī. Te máá ró jijnáhan ró chí coto ró núū rī, chí cotecu rī ñí cáni, te jeē yúcuun suni cotecu máá ró. ²⁰ Te quiví ún te cuni rō jeē ñn-ni cúu ri jíin Tatá rī, te máá ró ñn-ni cúu ró jíin rí jeē ndeé rí ini anuá rō jijnáhan ró. ²¹ Te na-ni ñayuu núu ñúhun ni i jniñu ní ndacu ri, te squícu i, ñayuu un cúu jeē maní ndije jíin rí. Te ñayuu jeē maní jíin rí, suni coo maní Tatá rī jíin i. Te suni ruhū coo maní rī jíin i, te stéén rī nuū i jeē nduú rí jíin i. Achí yá.

²² Te ni cahān Judas jíin yá (te nasūu tēe cúu Iscariote): Najehē cúu jeē steén ni máá ní nuū ná, te nuū ñayuu ñayiví chí tuú?

²³ Te ni cahān Jesús:

Ñayuu jeē manī jíin rí, chi cásquicu i jeē cahán rī. Te coo manī Tatá rī jíin i. Te Tátá rī jíin máá rí quijicoo ri cundúú rí jíin i. ²⁴Te ñayuu jeē tú manī jíin rí, tu cásquicu i jeē cahán rī. Te jnūhun cájini sōho ró cáhán rī, nasūu jnūhun máá rí cúu, chi jnūhun máá Tátá rī jeē ní tají rúhū cúu.

²⁵Tāca jnūhun yáha cáhán rī jíin ró níni íne ga rī jíin ró. ²⁶Te Tátá rī chi tají yá Espiritu Santo, quiji nucuiñi nuū rī. Te máá yá chindéé ñáhán yá rohó, te sáha ya jeē cóo sñi ni rō. Te stéén yā tāca jnūhun nuū rō, te nacachi tucu ya tāca jéē ni cáhán rī jíin ró.

²⁷Te jeē quihín rī, te sáha ri jeē cóo ndeyí coo sñi ni rō. Nájñūhun íyó ndeyí sñi ni maá rí, suni súcuan coo ndeyí sñi ni rō sáha ri. Te jeē sáha ri jeē cóo ndeyí sñi ni rō, tu quíjnáhan jíin jnūhun ndeyí cácahán ñayuu ñayiví. Ma cucuíhyá ni rō siquí tāca jnúndóho, te ni ma yūhu ró. ²⁸Je ni cajini sōho ró jéē ni cáhán rī jeē quihín rī, te ndiji ri cundúú rí jíin ró. Te núu cáhīyo manī vāha ró jíin rí, te cusñi ni rō jeē ni cáhán rī jeē nuhún rī nuū Tatá rī. Chi cújéhnú ga Tatá rī vijna vēsú ruhū. ²⁹Je ni castūhun rí nuū rō tāca jnúhun yáha nde ná tu coo, návāha núu je ni cuu, te candíje ró rúhū jijnáhan ró.

³⁰Ma cahán rī cuehē gā jnūhun jíin ró, chi je vēji jex-eén jeē ndácu jniñu ini ñayiví yáha. Te tú na vé cúu sáha siquí rī nuú. ³¹Te na cóo nájñūhun ni ndacu Tátá rī jniñu nuū rī, návāha cuni ñayuu ñayiví jéē manī rī jíin Tátá rī, te sáha ri jniñu ní ndacu ya. Ndocuiñi jijnáhan ró na quíngoo yó. Achí yá.

Jesús cúu nájñūhun yoyúcú uva

15 'Máá rí cúu nájñūhun yoyúcú uva váha ndaā, te Tátá rī cúu nájñūhun tēe ndító yoyúcú uva un.

²Te máá ró chi cácuu ró nájñūhun ndaha, te núu tu jéhe ró ndéhē te quende yā rohó. Te núu cácuu ró nájñūhun ndaha jeē jéhe ndehē, te nasándoo ya nacahnde yā rohó nájñūhun jeē cúu ró ndaha ún, návāha cuāha ró cuehē gā ndehē. ³Te máá ró chi je ni candundoo ánuá rō jíin jnúhun ni steén rī nuū rō, nájñūhun ndúndoo ndaha uva. ⁴Na cundúú ró jíin rí, te suni máá rí cundúú rí jíin ró. ñn ndaha uva ma cúu cuāha ndehē jeē maá, te núu tu yíjnñi jicā yóho. Te suni súcuan máá ró, ma cúu sáha ró jniñu váha te núu tu cundúú ró jíin rí.

⁵'Máá rí cúu yoyúcú un, te máá ró cácuu ndaha ri. Ñayuu jeē nduú jíin rí, te ruhū ndúú rí jíin i, máá i cúu nájñūhun ndaha jeē jéhe cuehē ndehē. Chi núu tú cundúú ró jíin rí, te tú cuiñi na jniñu váha cuu sáha ró. ⁶Ñayuu jeē tu cundúú jíin rí, quende yā i nájñūhun ñn ndaha uva, te ichí. Te ndoho i nájñūhun ndaha uva un jéē ndutútú te cayū nuū ñuhún.

⁷Núu ndúú ró jíin rí, te cáñuhun ni rō jnūhun cáhán rī, yūcuán na te cacán rō na-ni vé cácuu rō, te sáha ri jeē cácahán rō. ⁸Te núu cásáha ró cuehē jniñu váha, súcuan cástéén rō jeē cúu ndije ró ñayuu cascuáha jíin rí, te súcuan nácuu ñayuu jeē yóhyo cújéhnú Tátá rī.

⁹Nájñūhun manī Tatá rī jíin rí, suni súcuan manī rī jíin ró jijnáhan ró. Núu súcuan te ma siaá rō jnūhun manī rī jíin ró. ¹⁰Núu squícu ró jniñu ní ndacu ri nuū rō, te níni coo manī rī jíin ró, nájñūhun máá rí squícu ri jniñu ní ndacu Tátá rī nuū rī, te níni íyó manī yā jíin rí.

¹¹'Súcuan ni cahán rī jíin ró návāha coo sñi ni rō nájñūhun íyó sñi ni rī, chi nde cusñi teyí ni rō. ¹²Te yāha cúu jniñu ndácu ri nuū rō jijnáhan ró: jeē na cundáhú ni rō jnáhan ró nájñūhun cundáhú ni rī rohó. ¹³Núu ñn tēe cuu de jehē amigo de, te tuá na vé cúmanī gā sáha de jeē cundáhú ni de amigo de. ¹⁴Te máá ró cácuu amigo rī núu squícu ró jniñu ndácu ri nuū rō. ¹⁵Ma cahán gā rī mozo jíin ró, chi ñn mozo tu cástūhún patrón nuū i ndese jéni ni de sáha de. Chi sa suhva amigo cahán rī jíin ró, chi je ni castūhun rí nuū rō tāca jnúhun ni cahán Tatá rī jíin rí. ¹⁶Máá rí ni nacāji rōhó jéē jnáma ri rohó, te nasūu máá ró ni cánacani ni xíhna gā jeē cóndiquín rō ruhū. Te ni jeni ri rohó jéē caca ndaā rō te scándíje ró cuehē ñayuu jeē cuu i sēhe ri niñ cáni. Te súcuan te ndiñi jeē cacán rō nuū Tatá rī siquí jeē cácuu ró rúhū, sáha ya jeē jicán rō. ¹⁷Te yāha cúu jniñu ndácu ri nuū rō: jeē na cundáhú ni rō jnáhan ró.

Jeē cáquitē ni ñayuu ñayiví núu Jesús jíin núu ñayuu cá-candíje

¹⁸Te núu cáquitē ni ñayuu ñayiví núu rō jijnáhan ró, te je cájini rō jeē xíhna gā nuū maá rí ni caquitē ni i.

¹⁹Te núu jeē íyó gá rō jíin modo ñayuu ñayiví, te coo manī ñayuu ñayiví jíin ró nuú, nájñūhun manī i jíin jnáhan i. Te ni nacāji ri rohó jéē tuá coo ró jíin modo ñayuu ñayiví. Te jeē yúcuan cáquitē ni i nuū rō, chi tuá cácuu ró cuenta ñayiví. ²⁰Nucūhun ni rō jnūhun ni cahán rī jíin ró: Núu tu íyó yíñíhún ñayuu nuū patrón, te nagā ni cuu nuū mozo de. Núu ni cajito xeēn i ruhū, te suni súcuan coto xeēn i rōhó jéē cácuu ró mozo rī. Te núu jeē ni cájetáhú i jnūhun ni steén rī, te suni cuatáhú i jnūhun cástéén rō. ²¹Te táca jniñu yáha sáha i jíin ró jeē siquí ruhū, chi tu cájini i Yā ní tají rúhū vēji ri.

²²'Núu jeē tu ní quíji ri nacani ri jnūhun nuū i, te ma cóo cuēchi i núu. Te vijna chi ma cúu ga cahán i jeē tu jíin i jeē íyó cuēchi i. ²³Ñayuu jeē cáquitē ni nuū rī, suni nuū Tatá rī cáquitē ni i. ²⁴Núu jeē tu ní sáha ri jniñu jéhnú nuū i jeē ní ñn tēe tu ní sáha de súcuan, te ma cóo cuēchi i núu. Te vijna je ni cajito i jniñu ún, te vēsú súcuan te cáquitē ni i nuū rī jíin núu Tatá rī. ²⁵Te súcuan cásáha i návāha squícu jnūhun yósó núu tútu ley Yā Dios jeē cánevāha i: Ni caquitē ni i nuū rī, vēsú tú na cuēchi ri, achí.

²⁶Te tají rí máá Yā chindéé ñáhán rōhó te sáha ya jeē cóo sñi ni rō. Te Yā un cúu máá Espiritu jeē steén jnūhun ndaā, te quiji ya nde nuū Tatá rī, te nacani cáji yá jnūhun ri. ²⁷Te suni máá ró nacani ró jnúhun ri, chi je cáñi ro jíin rí nde ná ni quejéé rí nacani ri jnūhun.

16 'Tāca jnúhun yáha ní cahān rī jín ró návāha ma náyūhu ró jeē quíji jnúndóho. ² Chi quenehen i róhó jéē ma cuáha ga i jnúhun cone ró táca vehe i sin- agoga. Te quee quivī jeē cahni i róhó, te cani ni i jeē ñ jniñu váha ni sáha i nuū Yaā Dios. ³ Te súcuan sáha i jín ró, chi tu cájini cuitī i máá Tátá rī ni máá rí. ⁴ Te ni cahān rī jnúhun yáha jín ró návāha núu je ni quee quivī jeē súcuan coo, te nucūhun ni rō jeē jé ni cahān rī jín ró.

Jniñu sáha Espíritu Santo

'Te tu ní cahān rī jnúhun yáha jín ró nde xīhna ñúhún, chi íne máá rí jín ró jijnáhan ró. ⁵ Te vijna chi nuhūn rī condee rī jín Yaā ní tají rúhū vēji ri. Te ni ñn ró tu cájnūhun ró ndé nuū quihín rī. ⁶ Chi máá jéē cácuuíhyá ndasí ni rō jeē ni cahān rī súcuan jín ró. ⁷ Jendaá cahán rī jín ró: Jeē váha máá ró jijnáhan ró cúu jeē quihín rī. Chi núu tú quihín rī, te ma quíji Yaā chindéé ñáhán róhó te sáha ya jeē cóo sīñ ni rō. Te núu cuahān rī, te tají rí yā quiji ya nuū rō. ⁸ Te jeē quée yā, te stéén yā nuū ñáyuu ñayīví jéē iyó cuéchi i, jín ndese quivīcoo i ichi ndaā, jín jéē sándaā Yaā Dios siquī cuéchi i. ⁹ Stéén yā jeē iyó cuéchi i, chi tu cácuuíhyá i ruhū. ¹⁰ Te stéén yā siquī ichi ndaā, chi máá rí nuhūn rī nuū Tátá rī, te ma cóto ga rō nuū rī. ¹¹ Te stéén yā siquī jeē sándaā Yaā Dios cuéchi ñayuu, chi je ni cundaā jeē jahnú ndetū máá jéxeén jeē kujéhu ini ñayīví yáha.

¹² 'Te iyó cuéhē gā jnúhun cúní rī cahān rī jín ró, te ma cúu jecūhun ni rō vijna. ¹³ Te jeē quée máá Espíritu jeē steén jnúhun ndaā, te máá yá steén tāca jnúhun ndaā un núu rō. Chi ma cahán yā jeē máá yá, chi cahān yā tāca jéē jini sōho ya cahán Yaā Dios. Te stéén yā siquī tācá jniñu jeē coo. ¹⁴ Te stéén yā jeē kujéhu ri, chi nacastūhun yá nuū rō tāca jnúhun jeē jé ni cahān rī, te sáha ya jeē jécūhun ni rō. ¹⁵ Ndiñi ndese kujéhu Tátá rī, suni súcuan kujéhu máá rí. Jeē yúcuán ní cahān rī jeē Espíritu Santo nacastūhun yá nuū rō tāca jnúhun jeē jé ni cahān rī, te sáha ya jeē jécūhun ni rō jijnáhan ró.

Vēsú cácuuíhyá ni rō, te ndusiñ ni rō

¹⁶ 'Jecu na te ma cóto ga rō nuū rī. Te jecu tucu quivī te coto tucu ró núu rī, chi quinhun rī nuū ndeé Tátá rī. Achí yá.

¹⁷ Yūcuán na te sava tēe cáscuáha jín yá, ni caca- jnúhun jnáhan de:

¿Na jnúhun cúu jeē yáha jeē cahán yā jín yó? Chi áchí yá jeē jecu na te ma cóto ga yō nuū yā, te jecu tu- cu quivī te coto tucu yó núu yā, chi siquī jeē quinhun yā nuū ndeé Tátá yā. ¹⁸ ¿Na jnúhun cúu jeē yáha jeē cahán yā, jecu na? Tu cájecūhun ni yō na vé cúu jeē cahán yā. Achí de.

¹⁹ Te ni jini Jesús jeē cácuuíhyá de cajnúhún de ya. Te ni cahān yā jín de:

¿A cácajnūhun jnáhan ró na vé cúu jeē ni cahān rī jín ró jeē jecu na te ma cóto ga rō nuū rī, te jecu tucu quivī te coto tucu ró núu rī? ²⁰ Jendaá cahán rī jín ró jeē ndahyū rō jijnáhan ró te cucuíhyá ni rō, te ñayuu ñayīví chi sa cusīñ ni i. Te vēsú cucuíhyá ni rō, te sa ndusiñ ni rō jeē cóto tucu ró núu rī. ²¹ ñn ñahan núu cuacuyajni scácu ña, te jéhnde chíji ña, chi je ni quee hora jeē scácu ña. Te núu je ni scácu ña sūchi lúli, te tuá nahán ña jeē ní ndoho ña, chi cusīñ ni ña jeē ní cacu sēhe ña. ²² Te suni súcuan cúu jeē cándocho ró vij- na, chi cácuuíhyá ni rō jín rí. Te jecu-ni quivī te coto jnáhan tucu yó, te cusīñ ndasí ni rō. Te ni ñn ma cúu casi jeē cusīñ ni rō.

²³ 'Te quivī ún chi tú na vé cacān gā rō nuū rī. Chi jen- daá cahán rī jín ró jeē nuū maá Tátá rī cacān rō, te sáha ya ndiñi jeē cájicān rō, siquī jeē cácuuíhyá ró rúhū. ²⁴ Nde vijna te ná tu cacān rō nuū Tátá rī jeē jín síhví rí. Te vijna te na quéjéé ró cacān rō jín síhví rí, te nihín rō, návāha cusīñ ndasí ni rō.

Je ni quende yā poder ndiñi jeneé cáhiyo ini ñayīví

²⁵ 'Tāca jnúhun yáha ní cahān yatá rí jín ró. Te quee quivī jeē ma cahán yatá gā rī jín ró, chi sa suhva castūhun cáj rí nuū rō siquī Tátá rī. ²⁶ Te quivī ún chi cacān rō nuū Tátá rī siquī jeē cácuuíhyá ró rúhū. Te tu cáhán rī jín ró jeē cacán tahu rī jehē rō nuū Tátá rī. ²⁷ Chi máá Tátá rī je cúndáhú ni yā rohó siquī jeē cáhiyo manī rō jín rí, te ni cacandíje ró jéē ndé nuū máá yá vēji ri. ²⁸ Ni quenda ri nde nuū Tátá rī, te ni quee rī ini ñayīví. Te vijna te quenda ri ini ñayīví, te nuhūn tucu ri nuū Tátá rī. Achí yá.

²⁹ Te ni cacahān tēe cáscuáha jín yá:

Vijna te cáhán cáj ní, te tuá cahán yatá ní. ³⁰ Vijna te cájini na jéē jini ni ndivii cuitī, te tuá jini ñúhún jéē cájnūhún ni ñn ná nihín. Jeē yúcuán cácuuíhyá ná jéē véji ní ndé nuū Yaā Dios. Achí de.

³¹ Te ni cahān Jesús jín de:

¿A ndé vijna te cácuuíhyá ró naún? ³² Te quiji quivī, te je ni quee, jeē cuité núu ró quínungoo ró ná vehe ná vehe ró, te stóo máñúhún ró ruhū. Te nasūu jéē quéndōo máñúhún rí, chi Tátá rí íne ya jín rí. ³³ Tāca jnúhun yáha ní cahān rī jín ró návāha coo ndeyí coo sīñ ni rō siquī jeē cácuuíhyá ró rúhū. Ini ñayīví chi cánuú coto ró jnúndóho. Te vēsú súcuan te na cóo sīñ ni rō, chi je ni quende rī poder tāca jéneé cáhiyo ini ñayīví. Achí yá.

Jeē ni jícān tahu Jesús jehē ñayuu cácuuíhyá

17 Te ná ni cahān Jesús tāca jnúhun yáha, te ni ndacoto ya ichi ándiví, te ni cahān yā:

Tátá, je ni quee quivī jeē ndócho ná. Vijna te stéén ni jéē kujéhu máá ná jeē cúu ná Séhe ní, návāha suni máá ná steén na jéē kujéhu máá ní. ² Chi ni sáha ní jéē ndíso jniñu ná síquī tāca ñáyuu, návāha tāca ñáyuu jeē ni jéhe ní núu ná, cotecu i ñíñ cáni sáha ná. ³ Te

suhva cúu jnūhun cotecu i nñí cáni: suu jeē na cúni i níhín jēē mañūhún-ni ní cúu Yaā ndaā, jíin jēē cúni i sãñá jeē cúu ná Jesucristo, Yaā ní tají ní.

⁴Je ni steén na núū ñayuu ñayiví jēē cujéhnú ní, te je sínu ná jniñu ní ndacu ní núū ná. ⁵Te vijna, Tátā, sáha ní jēē ndujéhnú tucu ná ndé nuū néne ní, nájnūhun cújéhnú ná jíin ní nde ná tu jecōo ñayiví.

⁶Ñayuu jeē ní nacāji ní ini ñayiví, ni jēhe ní i nuū ná, te ni steén na núū i ndese Yaā cúu ní. Cuenta maá ní cúu i, te ni jēhe ní i nuū ná. Te ni cajetáhú i jnūhun ní, te ni casquícú i. ⁷Te vijna te cájini i jeē ndé nuū maá ní véji tāca jēē iyó jíin ná. ⁸Chi tāca jnūhun ni cahān ni jíin ná, ní castūhun ná núū i, te ni cajetáhú i. Te ni cajini i jeē ní quenda ndije ná ndé nuū maá ní, te ni cacandíje i jeē maá ní ni tají sãña.

⁹Te jíicán tahú na jéhē maá i jíināhan i. Tu jíicán tahú na jéhē ñayuu ñayiví jēē tu cácandíje, chi sa jehē maá ñayuu ni jēhe ni núū ná, chi cuenta maá ní cácuu i.

¹⁰Te tācá i jeē yíhi i ndaha maá ná, suni cuenta maá ní cúu. Te tācá i jeē cúu i cuenta maá ní, suni cuenta maá ná cúu i. Te cástéén i ndese cújéhnú ná.

¹¹Te tuá condee ná ini ñayiví. Te maá i chi quendōo i ini ñayiví, te maá ná chi najeē ná condee na jíin ní. Yaā ñi Yaā ndoo cúu ní, Tátā. Te jíin poder ní condito ní táca ñayuu ni jēhe ni núū ná, návāha ñnuú na cóo ni i jíināhan i, nájnūhun cúu maá yó. ¹²Te jeē ní condee na jíin i ini ñayiví, te jíin poder ni ní condito ná i. Tāca ñayuu ni jēhe ni núū ná, ni condito yúcún ná i. Te tu ní jēhe na jnūhun naa i jíināhan i, chi maá ñni-tē jeē je cúu de tēe jnahnū ndetū, návāha squícú jnūhun yósó núū tútu ñi.

¹³Te vijna te najeē na núū ní, te cáhán na táca jnūhun yáha jíin i níni jēē íne ga ná ini ñayiví, návāha na cóo sñí ndasí ni i nájnūhun cúsiñi ni maá ná. ¹⁴Ni castūhun ná jnūhun ní núū i. Te ni caquítē ni ñayuu ñayiví núū i, chi tuá cácuu i cuenta ñayiví, nájnūhun maá ná tu cúu ná cuenta ñayiví. ¹⁵Te tu jíicán tahú na jēē quénehen ní i ini ñayiví, chi sa suhva jeē cóndito ní i nuū jexeén. ¹⁶Nasūu cuenta ñayiví cácuu i, nájnūhun maá ná jēē násūu cuenta ñayiví cúu ná. ¹⁷Jíin jnūhun ndaā ní te sáha ní jēē coo ndoo coo ñi i nuū ní. Tāca jnūhun cáhán maá ní cúu jnūhun ndaā. ¹⁸Te nájnūhun ni tají ní sãña ní quiji ná ini ñayiví, suni súcuan tají ná i nacani i jnūhun ní núū ñayuu ñayiví. ¹⁹Te jehē maá i cúu jeē jēhe ná maá ná cuu ná, návāha suni maá i coo ndoo coo ñi i nuū ni jēē jíin jnūhun ndaā.

²⁰Te nasūu maá ñni-tē jehē ñayuu yáha jíicán tahú na, chi suni jehē tāca gá ñayuu jeē candíje i sãña núu na cúni sōho i jnūhun jeē nácani maá i jíināhan i. ²¹Te jíicán tahú na jēē ñnuú na cóo ni i jíināhan i. Nájnūhun ñni-tē cúu ní jíin ná, Tátā, te ñni-tē cúu ná jíin maá ní, suni súcuan na cóo ñnuú i jíin yó. Te cúni na jēē ñnuú na cóo ni i, návāha na cándíje ñayuu ñayiví jēē maá ní ni tají ní sãñá. ²²Ni sajeéhnú ná i nájnūhun ni sajeéhnú ní sãña, návāha ñnuú na cóo ni i, nájnūhun ñnuú-ni cúu yó. ²³Te ndúú ná jíin i, te ndúú ní jíin ná, te súcuan te

ñnuú cuiñi coo ni i jíināhan i. Yūcuán na te cuni ñayuu ñayiví jēē maá ní ní tají ní sãña, jíin jēē maní ndasí ní jíin i nájnūhun maní ni jíin ná.

²⁴Tátā, maá ní ni jēhe ní i nuū ná. Te cúni na jēē cóyucú i jíin ná nuū cóndee ná, návāha coto i ndese luu cújéhnú ná ni sáha ní. Chi iyó maní ndasí ní jíin ná nde ná tu jecōo ñayiví te nde vijna. ²⁵Yaā ndaā cúu ní, Tátā, te ñayuu ñayiví tu jíin i níhín, te maá ná chi jíin na níhín. Te ñayuu yáha chi cájini i jeē maá ní ni tají sãña. ²⁶Ni steén na núū i jíināhan i ndese Yaā cúu ní. Te steén gā na súcuan nuū i, návāha na cóo maní ndasí i jíin jnāhan i, nájnūhun iyó maní ndasí ní jíin ná, te návāha condee ná ini anuá i. Achí yá.

Jeē ní cajni de Jesús

(Mt. 26.47-56; Mr. 14.43-50; Lc. 22.47-53)

18 Te nuū ní cuu ni cahān Jesús tāca jnūhun yáha, te ni quenda ya jíin tēe cáscuáha jíin yá, cuahān yā inga lado yuu Cedrón. Te yūcuan iyó ñni huerto nuū ní quiví ya jíin tēe cáscuáha jíin yá. ²Te Judas, tēe jeē nastúu de ya, suni jíin de lugar un, chi cuehē jíin ni nataca Jesús yūcuan jíin tēe cáscuáha jíin yá. ³Te ni jinū de yūcuan jíin ñni grupo soldado jíin jecu policía cándito templo, jeē ní catajé sutū cácujeéhnú jíin tēe grupo fariseo. Te cándiso de machete, te cajni de linterna jíin yiti. ⁴Te Jesús je jíin yā tāca jnūndóho jeē véji siquí yā. Te ni quenda ya ichi núu de, te ni cahān yā:

¿Ndé ñni cácanducú ró?

⁵Te ni cacahān de jíin yá:

Jesús tēe ñnuu Nazaret cácanducú rí.

Te ni cahān yā:

Maá rí cúu.

Te Judas, tēe jeē nastúu de ya, suni íne de jíin tēe ún.

⁶Te jeē súcuan ni cahān yā, maá rí cúu, te ni cajica yátá de, te ni cacotúu-ni de. ⁷Yūcuán na te ni cajnūhún tucu ya de:

¿Ndé ñni cácanducú ró?

Te ni cacahān de:

Jesús tēe ñnuu Nazaret.

⁸Te ni cahān Jesús:

Je ni cachi rí jeē maá rí cúu. Te núu ruhū cácanducú ró, te maá-ni rí jni ró, te tēe yáha na quíngoo de. Achí yá.

⁹Súcuan ni cuu návāha na squícú jnūhun jeē ni cáhán yā jíin Tátá yā: Tu ní jēhe na jnūhun naa ni ñni tēe jeē ni jēhe ni núū na, áchí yá. ¹⁰Te Simón Pedro ndíso de ñni espada. Te ni tava de, te ni jehnde de sōho lado váha ñni tēe nání Malco. Te tēe un cúu de mozo maá sūtū cujéhnú. ¹¹Te ni cahān Jesús jíin Pedro:

Nachuvāha espada rō ini cubierta. ¿A tu cánuú jēe ndóho rí jnūndóho yáha jeē ni sándaā Tatá rí jeē ndóho rí? Achí yá.

Jeē ní indichi Jesús nuū sutú cujéhu

(Mt. 26.57-58; Mr. 14.53-54; Lc. 22.54)

¹² Yūcuán na te tācá soldado un, jíin capitán de, jíin táca policía tēe hebreo un, ni cajñ# de Jesús, te ni cajih-ni de ya. ¹³ Te xīhna gā vehe Anás cuango de jíin yá. Te tátá chīsó Caifás cúu Anás. Te Caifás cúu máá sūtū cujéhu ga cuiyā ún. ¹⁴ Te suu de ni cachi nuū jnáhan de hebreo jeē cánuú jéē cúu ñn tēe jehē nación de.

Jeē ní cachi Pedro jeē tu jíin de ya

(Mt. 26.69-70; Mr. 14.66-68; Lc. 22.55-57)

¹⁵ Te Simón Pedro jíin inga tēe scuáha, cándiquin de Jesús cuango de yatā yā. Te inga tēe scuáha ún chi jíin jnáhan de jíin sūtū cujéhu. Jeē yúcuan ní quívi de jíin Jesús ini patio vehe sūtū cujéhu ún. ¹⁶ Te Pedro ni quendō de yatā yehyí. Te máá tēe scuáha jéē jíin jnáhan jíin sūtū cujéhu ún, ni quenda de ni cahān de jíin ñahan ndíto yéhyí, te ni squívi de Pedro ini patio. ¹⁷ Yūcuán na te ñahan ndíto yéhyí un ní cajñuhún ña Pedro:

¿A násūú ñn tēe scuáha jíin tēe indichi nuū sutú un cúu ró?

Te ni cahān de:

Nasūu cúu ri, achí de.

¹⁸ Te tāca mozo jíin policía un ní cascáyú de ñuhūn jíin txcāyi, chi mijin sáha. Te cáhiin de cánasaā de. Te suni indichi Pedro, násaā de jíin táca tēe ún.

Jeē ni stíchí sūtū cujéhu ún Jesús

(Mt. 26.59-66; Mr. 14.55-64; Lc. 22.66-71)

¹⁹ Te sūtū cujéhu un ní stichí de Jesús ndé-ni cúu tēe cáscuáha jíin yá, jíin na jñuhun cúu jeē steén yā. ²⁰ Te ni cahān Jesús:

Níní ní cahān rī nuū chitú ñayuu, ni cajini sōho ndihí ñayuu. Te níní ní steén rī jñuhun ini tācá vehe ñi sinagoga jíin ini templo cáhnu nuū ndutútú ndívii jnáhan yó hebreo. Te tú ni ñn jñuhun ní cáhán sāhi rí. ²¹ ¿Te naun cájnūhun ró ruhū? Cajñuhun ñayuu ní cajini sōho jñuhun ni cahān rī, te máá i cachi ndese ni cahān rī. Chi cájini i ndese ni cahān rī.

²² Te jeē ni cáhán Jesús súcuan, te ñn policía ndíto templo jeē indichi de yūcuán, ní cani-ni de nuū yā. Te ni cahān de jíin yá:

¿A súcuan cáhán rō jíin sūtū cujéhu naún?

²³ Te ni cahān Jesús:

Núu ni cahān rī ñn jñuhun néé, cachi na jñuhun néé ní cahān rī. Te núu tu ní cáhán rī ñn jñuhun néé, ¿te naun cáni ró ruhū? achí yá.

²⁴ Yūcuán na te Anás, sūtū cujéhu un, ní tají de ya, núhni yā cuahān yā nuū Caifás, tēe cúu máá sūtū cujéhu ga.

Jeē ní cachi tucu Pedro jeē tu jíin de ya

(Mt. 26.71-75; Mr. 14.69-72; Lc. 22.58-62)

²⁵ Te níní jéē súcuan cúu, te indichi-ni Pedro, násaā de yuñuhún. Te ni cacahān jíin de:

¿A násūú ñn tēe scuáha jíin tēe un cúu ró, chí naún?

Te máá de tu ní cáchi de:

Nasūu cúu ri, achí de.

²⁶ Yūcuán na te ñn mozo sūtū cujéhu, jnáhan tēe jeē ní jehnde Pedro sōho, ni cahān jíin de:

¿A násūu máá ró cúu jeē ní jito ri jíin de ini huerto?

²⁷ Te Pedro tu ní cáchi tucu de. Te ni cana-ni líhli.

Jeē ní indichi Jesús nuū Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Yūcuán na te ni quendacoo de jíin Jesús vehe Caifás, cuango de jíin yá nde palacio tēe nación Roma jeē cúu gobernador. Te je cuacundijin. Te ñayuu hebreo tu ní quívicoo i ini palacio, návāha tu stívi i ley i jeē cahān jeē ma quívi i ini vehe ñn ñayuu jeē násūú hebreo cúu. Chi núu súcuan te ma cúu cuxíni i vico pascua jeē cóo inga quívi ún. ²⁹ Yūcuán na te ni quenda Pilato, tēe cúu gobernador, ni cahān de jíin i jíin náhan i:

¿Na cuēchi cájicān rō siquī tēe yáha?

³⁰ Te ni cacahān i:

Núu jeē násūu tēe cúnéé cúu tēe yáha, te ma jññí ná de jeē quíndeca ná de nuū ni núú, achí i.

³¹ Te ni cahān Pilato:

Cuángoo jíin náhan ró, te sándaā rō siquī de jíin ley cánevāha máá ró.

Te ni cacahān ñayuu hebreo un:

Máá ná jeē cácuu ná ñayuu hebreo, tú na permiso cánevāha ná jéē cáhni ná ni ñn ñayuu.

³² Súcuan ni cacahān i návāha squícu jñuhun jeē ní cachi Jesús jeē quívi ya ndaha tēe Roma te cahni de ya jicā cruz. ³³ Te ni ndívi Pilato ini palacio, te ni cana de jeē na quíji Jesús. Te ni cajñuhún de ya:

¿A máá ró cúu Rey ñayuu hebreo naún?

³⁴ Te ni cahān Jesús jíin de:

¿A cájnūhun ró ruhū jeē súcuan jéni ni máá ró, chí jéē ní cacastūhun ñayuu hebreo nuū rō?

³⁵ Te ni cahān Pilato:

¿Chí tēe hebreo cúu ri jeē cúni rī? Ñayuu nación máá ró jíin sūtū cácujehu ni cachihí rōhó ndaha ri. ¿Na vé ni sáha ró núu súcuan? Achí de.

³⁶ Te ni cahān Jesús:

Nasūu jéē ndácu ri jniñu nájnūhun cándacu tāca rey ñayívi yáha. Chi núu jeē ñayuu ñayívi ní casáha jeē cúu ri rey, yūcuán na te tēe cándiquin ruhū, cuajnáhan de návāha ma quívi ri ndaha jnáhan ri hebreo nuú. Te nasūu núu ñayívi yáha cúu jeē ndácu ri jniñu vijna. Achí yá.

³⁷ Yūcuán na te ni cahān Pilato jíin yá:

¿Te á ñn rey cúu ró jéē súcuan?

Te ni cahān Jesús:

Rey cúu ri, nájñuhun cáhán rō. Ni quiji ri ni cacu ri ini ñayāvi yáha návāha nacani ri jñuhun ndaā. Te ndíñi ñayuu cájetáhú jñuhun ndaā, cájini nahín i jñuhun cáhán rī. Achí yá.

³⁸ Te ni cahān Pilato:

¿Ndese cuni yō ndé ñn cúu máá jñuhun ndaā?

Jeē ní cundaā jeē cúu yā

(Mt. 27.15-31; Mr. 15.6-20; Lc. 23.13-25)

Te jeē ni cáhān de jñuhun yáha, te ni quenda tucu de nuū ñáyuu hebreo. Te ni cahān de jíin i:

Tú cuiñi na cuēchi níhín rī siquī de. ³⁹ Te íyó costum-bre maá ró jijnáhan ró jeē vico pascua te siaá rī ñn tēe íne vecāa nuū rō. ¿Te á tu cáconi rō jeē siaá rī Rey rō nuū rō? Achí de.

⁴⁰ Yūcuán na te ndívi i ni cacana jee tucu i:

Ma siaá ni tēe jíñá, chi Barrabás siaá ni, áchí i.

Te tēe cuiñá cúu Barrabás.

19 Yūcuán na te ni cahān Pilato jeē na jñí soldado Jesús, te caní de ya jíin cuarta ññ. ² Te ni casáha de ñn corona iñu, ni cachuhun de xinī yā. Te ni cachuhun de ya ñn sahma cuehé ndíhí jeē cúu sahma rey. ³ Te ni jecondichi de nuū yā, te ni cacahān catá de: Nacá jeē váha rey cúu Rey ñayuu hebreo.

Te ni cacani de nuū yā.

⁴ Yūcuán na te ni quenda Pilato inga jínu, te ni cahān de jíin ñáyuu:

Yāhá condēhe ró tava rī de, návāha na cúni rō jeē tú na cuēchi níhín rī siquī de.

⁵ Te ni quenda Jesús, ññuhun ya corona iñu jíin sahma cuehé ndíhí un. Te ni cahān Pilato jíin i:

Yāhá condēhe ró de jíin náhan ró.

⁶ Te nuū ní cajito sutū cácujeñhu jíin táca policía nuū yā, te ni cacana jee de:

Cata caa ní de jicā cruz, na cúu de.

Te ni cahān Pilato:

Núu súcuan te najññ máá ró de te cahni rō de. Chi ruhū, tú na cuēchi níhín rī siquī de.

⁷ Te ni cacahān ñayuu hebreo un:

Cáneváha ná ñn ley, te jeē siquí ley un cánuú jeē cúu de, chi sáha de máá de jeē Séhe Yaā Dios cúu de.

⁸ Te jeē ní jini sōho Pilato jñuhun yáha, te víhyá gā ni yūhú de. ⁹ Te ni ndívicoo tucu de ini palacio, te ni cajñuhún de Jesús:

¿Ndé nuū véji rō?

Te tu ní cáhān cuiñi Jesús jíin de. ¹⁰ Yūcuán na te ni cahān de jíin yá:

¿Naun tu cáhān rō jeē cahán rī? ¿A tu jíin rō jeē ndíso jñíñu ri jeē cáhni rī rohó jíicā cruz, te suni ndíso jñíñu ri jeē siaá rī rohó quíñhín rō?

¹¹ Te ni cahān Jesús:

Núu tu ní sáha Yaā Dios jeē ndíso jñíñu ró, te tú na vé cúu sáha ró síquī rī. Jeē yúcuán tēe jeē ní nacuañha ruhū ndaha ró, cuēchi xeñ gā condee siquī de vēsú maá ró. Achí yá.

¹² Yūcuán na te nde hora un ndúcu ndéyí Pilato ndese siaá de ya. Te ñayuu hebreo chi cácana jee i:

Núu siaá ni tēe jíñá, te tu cúu ní amigo rey Roma jeē cujeñhu ndácu jñíñu núu súcuan. Chi táca tēe jeē sáha de rey maá de, núu súcuan te cúu de enemigo siquī rey un. Achí i.

¹³ Te jeē ní jini sōho Pilato jñuhun yáha, te ni ndacu de jñíñu jeē na quenda Jesús ini vehe quiji ya. Te ni cucōo de silla nuū cundaā jñíñu, nuū máni máá yúu ni jecāva, te lugar un nání Gabata nuū yúhu hebreo. ¹⁴ Te cuacuu cahuxī uū, te jehíni quivī ún quejéé vico pascua. Te ni cahān Pilato jíin ñáyuu hebreo:

Yáha índichi maá rey rō.

¹⁵ Te ni cacana jee i:

Na cúu de. Cata caa ní de jicā cruz, achí i.

Te ni cahān Pilato jíin i:

¿A jeē cata caa rī rey rō jicā cruz naún?

Te sutū cácujeñhu un ní cacahān de:

Tuá na inga rey cánevāha ná jíin náhan ná, chi máá-ni rey Roma jeē cujeñhu ndácu jñíñu nuū ná.

¹⁶ Yūcuán na te Pilato ni nacuañha de ya nuū i jeē na cúu yā jicā cruz. Te ni cajññ i ya cuangoo i jíin yá.

Jeē ní cacata caa de ya jicā cruz

(Mt. 27.32-44; Mr. 15.21-32; Lc. 23.26-43)

¹⁷ Te ni quenda Jesús, ndíso ya cruz yā, cuangoo de jíin yá ñn lugar nuū naní Yiquí Xíní, te nuū yúhu hebreo naní Gólgota. ¹⁸ Te yúcuán ní cacata caa de ya jicā cruz. Te suni ni cacata caa de uū tēe nuū uū gā cruz, ñn ñn de ñn lado yā, te máá Jesús mēññú. ¹⁹ Te suni ni ndacu Pilato jñíñu jeē na cóndee jñuhun xinī cruz yā, jeē cahán: Tēe yáha cúu Jesús ñuu Nazaret, Rey ñayuu hebreo, achí. ²⁰ Te cuehē ñayuu hebreo ni cacahu i jñuhun yáha, chi máá yajni yuññú cúu nuū ní cacata caa de ya. Te jñuhun un yósó jíin yuhu hebreo jíin griego jíin latín. ²¹ Te táca sutū cácujeñhu nuū ñáyuu hebreo, ni cacahān de jíin Pilato:

Ma tēe ní jeē cúu de Rey ñayuu hebreo, chi sa suhva tee ní jeē maá de ni cahān jeē cúu de Rey ñayuu hebreo.

²² Te ni cahān Pilato:

Ma násama ri jeē jé ni ndacu ri jñíñu ni jecondee.

²³ Te soldado un, nuū ní cuu ni cacata caa de Jesús jicā cruz, te ni caquihin de sahma ya, te ni cajehnde de ni nduu cuñ parte, te ñn ñn parte ni cuu ñn ñn soldado un. Te suni ni caquihin de camisa yā. Te camisa un tu ní quícu, chi ni cunu ññ. ²⁴ Te ni cacahān maá de:

Ma cáhnde yō, chi vāha ga na sáha yó sorteo, te na cóndēhe yó ndé ñn yó níñhín, achí de.

Te súcuan ni squícu jñuhun yósó núu tútu iñ nde jehán jeē cahān Jesús: Ni caquihin de sahma ri cuu máá de. Te ni casáha de sorteo siquī camisa rī. Achí. Súcuan ni casáha soldado un.

²⁵ Te yajni cruz nuū ndíta caa Jesús íne náná yā, jíin cúhū ña María ñasihí Cleofas, jíin María ñuu Magdala.

²⁶ Te ni jito Jesús nuū naná yā jíin núu tēe scuáha jeē

maní gā yā jíin, suni índichi de yūcuán. Te ni cahān yā jíin náná yā:

Nánā, nde vijna te máá de nucuíñi de cuu de sēhe ní.

²⁷ Yūcuán na te ni cahān yā jíin tée scuáha ún:

Nde vijna te cuu ña nájñuhun náná rō, achí yá.

Te nde hora un ní cana de ña cuacondee ña vehe de condito de ña.

Jeē ni jíhī Jesús

(Mt. 27.45-56; Mr. 15.33-41; Lc. 23.44-49)

²⁸ Yūcuán na te ni jini Jesús jeē jé ni jīnu tācá jniñu jeē cánuú ndoho ya. Te návāha squícu jñuhun cáhán tutu iī, te ni cahān yā:

Jíchí rī ndute, achí yá.

²⁹ Te yūcuan íin ñin tñdohō ñúhun chítu vinagre iyá.

Te ni cachundaji de ñin cachī nuū vinagre un, te ni catee de xinī ñin ndaha yújnu hisopo, te ni catee de yuhu ya jeē cóho ya. ³⁰ Te ná ni jihī ya vinagre un, te ni cahān yā:

Je ni jīnu, achí yá.

Te ni cāyí-ni xinī yā, te ni jihī-ni ya.

Jeē ní cujǐ soldado lanza xiin ya

³¹ Te inga quiví ún coo vico pascua. Te tēe hebreo tu cáconi de jeē cóndita caa ndīyí ún jícā cruz quiví ndétátú un. Chi quiví ndétátú jeē cúu vico pascua, iī ndasí gá vésú tāca gá quiví ndétátú. Te ni cacahān de jíin Pilato jeē na ndácu de jniñu jeē jnahnú sñhin tēe cándita caa, te na cújiyo de jícā cruz. ³² Te ni quecoo soldado, te ni cajehnū de sñhin ñin tēe jeē ndíta caa jíin yá, te suni súcuan inga de. ³³ Te nuū ní quecoo de nuū Jesús, te ni cajito de jeē jé ni jihī yā. Jeē yúcuan tu ní cájehnū de sñhin ya.

³⁴ Te ñin soldado chi ni cujǐ de lanza xiin ya, te ni cane-ni niñí jíin ndute. ³⁵ Te máá rí jeē tée tutu yáha, ni jito rí jeē súcuan ni cuu, te nácani ndaā rí jñuhun ndese ni cuu. Te jíin rí jeē iyó ndáā jñuhun cáhán rí, návāha suni candíje máá ró jijnáhan ró. ³⁶ Chi súcuan ni cuu návāha squícu jñuhun cáhán tutu iī: Ma cahnú de ni ñin yiquí ya, achí. ³⁷ Te suni inga jñuhun cáhán tutu iī: ñin quiví te coto i nuū Yaā jeē ní cujǐ i lanza, achí.

Jeē ní quindūji Jesús

(Mt. 27.57-61; Mr. 15.42-47; Lc. 23.50-56)

³⁸ Te ni cuu tāca jéē yáha. Te íyó ñin tēe ñuu Arimatea jeē naní José, te cúu de tēe cándíje Jesús. Te yuhu-ni cándíje de, chi yúhú de jnáhan de hebreo. Te ni cahān ndahú de jíin Pilato jeē na cuáha jñuhun quihin de yiquí cúñu Jesús. Te ni jēhe Pilato jñuhun. Yūcuán na te cuahān José, ni snúu de yiquí cúñu Jesús. ³⁹ Te suni ni jinū Nicodemo, tēe ni quiiji nuū Jesús ñin jecuáā. Te ndíso de nájñuhun ocō uxī kilo sūje uvuā jeē ní saca jnáhan jíin yúcū áloe. ⁴⁰ Te ndíndúu de ni caquihin de yiquí cúñu Jesús, te ni cachusúcun de jíin tira sahma jeē ní quiví yucū jeē jeén asñin ún, nájñuhun íyó cos-

tumbre maá ñáyuu hebreo jeē cáchindūji i ndīyí. ⁴¹ Te yajni nuū ní jíhī Jesús íyó ñin huerto. Te nuū huerto un ndéé ñin yaū jeē ní caan jeé jícā ñin cava, nuū ná tu quindūji ndīyí. ⁴² Te yūcuan ní cachindūji de Jesús, chi íne yajni yaū ndīyí ún. Chi je yajni quejéé quíví ndétátú de jeē cácuu de ñayuu hebreo, te tú na ley chindūji de ndīyí núu je ni quejéé quíví ún.

Jeē ní natecu Jesús

(Mt. 28.1-10; Mr. 16.1-8; Lc. 24.1-12)

20 Te jenéhen quiví domingo ni jinū María ñuu Magdala nuū ní yindūji Jesús, te yínee gā cúu. Te ni jito ña jeē ní cujiyo yuū ndihyú yuyáú ndīyí. ² Yūcuán na te jíinu ña cuahān ña nuū Simón Pedro jíin núu inga tēe scuáha ún jeē maní gā Jesús jíin. Te ni cahān ña jíin de:

Ni catava de jito ho yō nuū ní yindūji ya, te tu cájini yō ndé nuū ní cachune de ya, achí ña.

³ Te ni quendacoo Pedro jíin inga tēe scuáha ún, cuácondéhé de yaū ndīyí. ⁴ Te cájino tayí ndíndúu de. Te inga tēe scuáha ún, nñhin ga ni jinu de vésú Pedro. Te xñhna gā de ni jinū yaū ndīyí. ⁵ Te ni scáyí de máá de, te ni jito nihni de ini yaū. Te ni jito de jeē tira sahma un cáyūcu máá na. Te tu ní quíví de. ⁶ Te sáá te ni jinū Simón Pedro jeē ndiquín jnáhan de vēji de jíin inga tēe ún. Te ni quíví de nuū ní yindūji Jesús. Te suni ni jito de jeē tira sahma cáyūcu máá na. ⁷ Te ni jito de sahma jeē ní ñúsúcun xinī Jesús, tu cátu jíin tira sahma, chi ni natuu te cátu sñin. ⁸ Yūcuán na te suni ni quíví inga tēe scuáha jeē ní jinū xñhna gā nuū ní yindūji ya. Te ni jito de ndese íyó, te ni candíje de jeē ní natecu yā. ⁹ Chi nde ná tu jinūcoo de yaū ndīyí, te tu ní jécūhun ni de jñuhun cáhán tutu iī, jeē jíin ñúhún natecu yā núu je ni jihī yā. ¹⁰ Yūcuán na te ndíndúu tēe cáscuáha ún cuanungoo de vehe de.

Jeē ní nane ya nuū María ñuu Magdala

(Mr. 16.9-11)

¹¹ Te María índichi ña ndáhyú ña nuū ní yindūji ya. Te níni ndáhyú ña, te ni scáyí ña máá ña, ni jito nihni ña ini yaū ún. ¹² Te ni jito ña uū ndajéhé andíví, cáñuhun ya sahma cujín. Te ñin ya néne ichi xiní, te inga ya néne ichi núu jehé nuū ní cátu yiquí cúñu Jesús. ¹³ Te ni cacahān yā jíin ña:

¿Najehē ndahyú rō?

Te ni cahān ña:

Ni catava de jito ho ná, te tu jíin na ndé nuū ní cachune de ya.

¹⁴ Te jeē ní cahān ña súcuan, te ni ndió cóto ña, te ni jito ña nuū Jesús jeē índichi yā yūcuán. Te tu ní nácuni ña jeē maá yá cúu. ¹⁵ Te ni cahān yā jíin ña:

¿Najehē ndahyú rō? ¿Ndé ñin nánducú ró? achí yá.

Te máá ña jéni ni ña jeē tée ndíto huerto cúu ya. Te ni cahān ña jíin yá:

Núu máá ní ni quenehen ní yá, te cachi ní ndé nuū ní jécune ní yá, te na quínuquihin ná yá, achí ña.

¹⁶ Te ni cahān Jesús jíin ña:

María, achí yá.

Te jeē ni cáhān yā súcuan, te ni nacuni ña ya, te ni ndió cóto ña, te ni cahān ña jíin yuhu hebreo:

Raboni, achí ña. Te jnūhun un cúní cahān, Maestro.

¹⁷ Te ni cahān Jesús jíin ña:

Ma quehé ró rúhū, chi ná tu ndaa ri quinuhun rī nuū Tatá rī. Te cuáhān núū tǎcá hermano rī, tēe ni cascuáha jíin rí, te cachi rō nuū de jeē ndaa ri quinuhun rī nuū Tatá rī, jeē suni Tǎtá maá ró jijnáhan ró cúu. Te cúu ya Yāā Dios maá rí jíin Yāā Dios maá ró jijnáhan ró. Achí yá.

¹⁸ Yūcuán na te María ñuu Magdala un, cuáhān ña, te ni castūhún ña nuū tēe cáscuáha un jēē ní jito ña nuū maá Jítóho yō jíin jēē ni cáhān yā jnūhun yáha jíin ña.

Jeē ní nane ya nuū tēe cáscuáha jíin yá

(Mt. 28.16-20; Mr. 16.14-18; Lc. 24.36-49)

¹⁹ Te jeē ní cuaa maá quívī domingo un, te cáhīin tútú tēe cáscuáha ún ini ñn vehe. Te cándihyū yehyí, chi cáyūhú de jnáhan de hebreo jeē coto xeēn i de. Te ni quee-ni Jesús, ni jecuiñī yā mēhñú de vēsú ndihyú yehyí, te ni cahān yā jíin de:

Ndeyí sñī coo ni rō jijnáhan ró, achí yá.

²⁰ Te ná ni cahān yā súcuan, te ni steén yā ndaha ya jíin xiin ya nuū de. Te ni cacusī ni tēe cáscuáha un jēē ní cajito de nuū maá Jítóho yō. ²¹ Yūcuán na te ni cahān tucu Jesús:

Ndeyí sñī coo ni rō jijnáhan ró. Te nájnūhun ni tají Tǎtá rī ruhū ini ñayīvé, suni súcuan tájī rí rohó nacani rō jnúhun ri nuū ñáyuu. Achí yá.

²² Yūcuán na te ni tēvi tachī yā nuū de jíin náhan de. Te ni cahān yā:

Vijna te ni canihīn rō Espíritu Santo. ²³ Te tǎca ñáyuu jeē cone cáhnu ni rō nuū cuéchi i, núu súcuan te coo jnūhun cáhnu ni nuū cuéchi i. Te núu tú cone cáhnu ni rō nuū cuéchi i, te ma cóo jnūhun cáhnu ni nuū cuéchi i. Achí yá.

Jeē ní nane ya nuū Tomás

²⁴ Te Tomás, tēe ni cacu cuátī, ñn jnáhan jeē uxí uū tēe cáscuáha jíin yá, tu ní íne de quívī jeē ní nane Jesús nuū tǎca gá tēe cáscuáha. ²⁵ Yūcuán na te sava ga tēe cáscuáha un, ní cacahān de jíin Tomás:

Ní cajito ri nuū maá Jítóho yō.

Te ni cahān Tomás:

Núu tú coto ri nuū ni tújī ndaha ya ni sáha ndūyu cāa, te núu tú chune ri xinī ndáha ri nuū ni íne ndūyu cāa, te núu tú chune ri ndaha ri xiin ya, te ma candíje cuiñī rī, achí de.

²⁶ Te nuū uná quívī, te tēe cáscuáha un cáhīin tútú tucu de ini ñn vehe. Te íne Tomás jíin de. Yūcuán na te ni quee-ni tucu Jesús, ni jecuiñī yā mēhñú de, vēsú cándihyū yehyí. Te ni cahān yā jíin de:

Ndeyí sñī coo ni rō jijnáhan ró.

²⁷ Te ni cahān-ni ya jíin Tomás:

Chune xinī ndáha ró ini ndaha ri yāhá te coto ró. Te scáá ndaha ró, te chune ró xiin ri nuū ni tújī. Te ma cáni siquí gá ni rō, chi sa suhva na cándíje ró.

²⁸ Yūcuán na te ni cahān Tomás jíin yá:

Aī, Jítóho maá ná jíin Yāā Dios maá ná cúu ní, achí de.

²⁹ Te ni cahān Jesús jíin de:

Tomás, nde ni jito ró núū rī, te ni candíje ró. Te yōhyo ndetū tǎca ñáyuu jeē candíje ruhū vēsú tu ní jito i nuū rī, achí yá.

Najehē ni tee Juan libro yáha

³⁰ Te suni ni sáha Jesús cuehē gā jniñu jénu jeē ni steén yā poder yā nuū tēe cáscuáha jíin yá, jeē tu yósó núū tútu yáha. ³¹ Te tǎcá jniñu yáha ní tee ri návāha candíje ró jijnáhan ró jēē Jesús cúu Cristo, maá Séhe Yāā Dios. Chi jeē candíje ró yá, te cotecu rō ñí cáni sáha ya.

Jeē ní nane ya nuū uxá tēe cáscuáha jíin yá

21 Te ni cuu jecu quívī, te ínga jínu ni nane Jesús nuū tēe cáscuáha jíin yá, jeē cáhīin de yumar Tiberias. Te suhva ni steén yā maá yá nuū de: ² Cáhīin tútú Simón Pedro, jíin Tomás, tēe ni cacu cuátī, jíin Natanael, tēe ñuu Caná ndañū Galilea, jíin ndindúú séhe Zebedeo, jíin úū gā tēe cáscuáha. ³ Te ni cahān Simón Pedro jíin de jíin náhan de:

Quíjnī ri chācá.

Te ni cacahān de:

Suni quingoo ri jíin ró.

Te cuangoo de, te ni quívīcoo de ñn barco. Te tu ní cánihīn cuiñī de tī jecuáā yúcuan. ⁴ Te jeē cuácundijin, te íne Jesús yumar. Te tēe cáscuáha ún, tu ní cánacuni de jeē maá yá cúu. ⁵ Yūcuán na te ni cahān yā jíin de:

Aá rō jijnáhan ró, ¿á ní canihīn rō chācá caji yō?

Te ni cacahān de:

Tú cuiñī, achí de.

⁶ Yūcuán na te ni cahān yā jíin de:

Síngava ñunu ró ichi lado váha barco, te nihīn rō tī.

Te ni casíngava de ñunu, te tuá ní cúu cuiñī natava de, jeē ni quívīcoo cuehē ndasí chāca. ⁷ Yūcuán na te tēe scuáha jeē maní gā Jesús jíin, ní cahān de jíin Pedro:

Máá Jítóho yō cúu, achí de.

Te jeē ní jini sōho Simón Pedro jeē maá Jítóho yō cúu, te ni nachuhun de sahna de, chi ni tava de jeē sájniñu de. Te ni ndava-ni de nuū mar cuahān de nuū yā. ⁸ Te tǎca gá tēe cáscuáha ún, vendicoo de jíin barco yundúte, cástáa de ñunu ñūhun chitú chāca. Chi tu jíca cáhīin de jíin ñuhun íchi, chi nájnūhun ciento-ni metro cúu. ⁹ Te nuū ní quendacoo de ini barco, te ni cajito de jeē nduhvá tīcua ñuhūn, te íne staā jíin ñn chācá chíhyó. ¹⁰ Te ni cahān Jesús jíin de:

Cuáquihin jecu chācá jēē sa ní cajñī ró, na táu yó, achí yá.

¹¹ Te ni quiv̄i Simón Pedro ini barco, te ni stáa de ñunu, ni quee de jíin ndé nuū ñúhun íchi. Te ñúhun chitú cháca náhnu, ñn ciento uū xico ux̄i un̄i t̄x̄ cúu. Te v̄esú ñn súcuan t̄i ñúhun, te tu ní táhndé ñunu. ¹² Te ni cahān Jesús jíin de:

Nehen jijnáhan ró na cási ni yō.

Te ni ñn t̄ee cáscuáha ún tu ní cúndeȳx̄ ni de cajnūhún de ya núu ndé ñn cúu ya. Chi je cájini de jeē maá Jítóho yō cúu ya. ¹³ Te ni quindēhe Jesús yuñúhún, te ni quihin ya staā ún, te ni jēhe ya nuū de, te suni súcuan chācá un.

¹⁴ Yáha cúu vuelta un̄i jeē ní nane Jesús nuū t̄ee cáscuáha jíin yá, ná ni natecu yā.

Jeē ní ndajnūhún Jesús jíin Simón Pedro

¹⁵ Te nuū ní cuu ni cajesi ni de, te Jesús ni cajnūhun yá Simón Pedro:

Simón sēhe Jonás, ¿á man̄i gā rō jíin rí v̄esú tāca gá t̄ee yáha?

Te ni cahān de:

Je jíiní ni j̄eē maní na jíin ní, achí de.

Te ni cahān yā jíin de:

Núu súcuan te stéén rō jnūhun ri nuū ñáyuu cácuu nájnūhun londe ri.

¹⁶ Te ni cajnūhun yá de vuelta uū:

Simón sēhe Jonás, ¿á man̄i rō jíin rí?

Te ni cahān de jíin yá:

Je jíiní ni j̄eē maní na jíin ní, achí de.

Te ni cahān yā:

Condito ró ñáyuu cácuu nájnūhun lanchi ri núu súcuan.

¹⁷ Te ni cajnūhún tucu ya de vuelta un̄i:

Simón sēhe Jonás, ¿á man̄i rō jíin rí?

Te ni cucuíhyá ni Pedro jeē ní cajnūhun yá de vuelta un̄i núu man̄i de jíin yá. Te ni cahān de:

Maá ní jiní ni nd̄ih̄i, te jíiní ni j̄eē maní na jíin ní.

Te ni cahān yā:

Núu súcuan te stéén rō jnūhun ri nuū ñáyuu cácuu nájnūhun lanchi ri. ¹⁸ Te jendaá cahān r̄i jíin ró jeē nde ná suchí ró, te ni quihin maá ró sahna ró, te ni jica ró ndé nuū cuní maá ró. Te núu na ȳñ ró, te nasūu j̄eē cuní maá ró, chi ñnga ñayuu quindēca i r̄ohó nuū tu cuní rō quih̄in rō. Te scáá rō nd̄indúú ndaha ró j̄eē cuu rō.

¹⁹ Jnūhun yáha ní cahān yā jeē ni stéén yā jeē cóndita caa de jicā cruz cuu de, te jeē súcuan cuatáhú de cúu jeē steén de jeē yóhyo cújéhnu Yaā Dios. Yūcuán na te ni cahān gā yā:

Condiqūin rō ruhū jeē sáha ró jniñu ní ndacu ri nuū rō, achí yá.

Jnūhun t̄ee scuáha jeē maní gā yā jíin

²⁰ Te ni ndió cóto Pedro, te ni jito de t̄ee scuáha jeē maní gā Jesús jíin, ndíquin de v̄eji de yatā. T̄ee un cúu jeē ní conene xiin Jesús ná ni cacux̄ini de jíin yá, te ni cajnūhún de ya: ¿Ndé ñn de cúu jeē nastúu níh̄in? ²¹ Te jeē ní jito Pedro nuū t̄ee ún, te ni cajnūhún de Jesús:

Te t̄ee yáha, ¿ndese coo jíin de?

²² Te ni cahān Jesús:

Núu cuní r̄i jeē cótecu de nde quiv̄i nd̄iji ri, ¿te naun nd̄ih̄v̄i ni rō? Maá ró chi condiqūin rō ruhū jeē sáha ró jniñu ní ndacu ri nuū rō, achí yá.

²³ Yūcuán na te jnūhun yáha ní jit̄e núu nuū tācá hermano, jeē t̄ee scuáha un má cúu de. Te tu ní cáhán Jesús jeē ma cúu de, chi sa suhva ni cahān yā: Núu cuní r̄i jeē cótecu de nde quiv̄i nd̄iji ri, ¿te naun nd̄ih̄v̄i ni rō?

²⁴ Te t̄ee scuáha un j̄eē maní gā Jesús jíin, suu cúu ruhū jeē nácani jnūhun tācá jniñu yáha, te suu ri t̄ee tāca jnúhun yáha. Te cájini rō jijnáhan ró j̄eē iyó ndāā jnūhun nácani ri.

²⁵ Te suni íyó cuéh̄e ndasí gá jniñu ní sáha Jesús. Te núu tee yó ná ñn ná ñn, te ma cánda n̄ñí ñáyiv̄i cuhun tutu jeē cóso jnūhun ún, j̄eni ni r̄i. Te ni cuu. Amén.

HECHOS

Jeē ni jéjnūhun ya quiji Espíritu Santo

1 Amigo Teófilo, nuū tútu jeē ní tee ná xíhna gā ni castūhun ná nuū ni táca jniñu ní sáha Jesús, jíin táca jnúhun ni steén yā nde quivī ní quejéé yá ni sáha ya ² te nde quivī ní ndaa ya cuanuhun yā andiví. Te nde ná tu ndaa ya quihīn yā, te ni sáha Espíritu Santo jeē ní ndacu ya jniñu nuū táca apóstol, tēe ni nacāji ya. ³ Te nuū ni jínu ni ndoho ya jeē ni jíhī yā, te uū xico quivī te tijnī jínu ni steén ndijin yā maá yá nuū téee un jíjnáhan de, te súcuan ni cajini de jeē iyó ndaa jeē ní natecu yā. Te ni cahān yā jíin de síquī ndese ndácu Yaā Dios jniñu.

⁴ Te ná cáhīn tútu de jíin yá, te ni cahān yā jíin ndihī de jeē ma quéndacoo de ini űuu Jerusalén, chí áchí yá:

Condetu ró ndé quee Espíritu Santo jeē ni jéjnūhun maá Tátá rī Yaā Dios. Chí je ni cachi rī nuū rō jeē ni jéjnūhun ya quiji Espíritu Santo. ⁵ Chí Juan, jendaá jeē maá ndute-ni ni scuándute de űayuu. Te róhó jíjnáhan ró, jecu na quivī te nájnūhun cuandute ró jíin Espíritu Santo, cúu jeē condee yā ini anuá rō, achí yá.

Jeē ní ndaa Jesús cuanuhun yā andiví

⁶ Yūcuán na te tēe cáhīn tútu jíin yá, ni cacajnūhún de ya:

¿A vijna te nasáha ní jéē űayuu űuu yō Israel ndujéhu ni i ndacu i jniñu nuū nación yō chí naún? áchí de.

⁷ Te ni cahān yā:

Ma cúu cuni rō quivī chí cuíyā jeē cóo jeē ni sándaā maá Tátá rī, chí maá ĩn-ni maá yá jiní yā na quivī sáha ya. ⁸ Te jeē cúni rō cúu jeē quee Espíritu Santo te condee yā ini anuá rō jíjnáhan ró. Yūcuán na te nihīn rō poder te nacani ró jnúhun ri ní ini űuu Jerusalén, ní Judea, ní Samaria, nde ní cáhnu űayiví, áchí yá jíin de.

⁹ Te ni ndihī ni cahān yā táca jnúhun yáha. Te níni cájito de nuū yā, te ni ndaa-ni ya cuanuhun yā andiví. Te ni quee vicō ni jesi-ni nuū cuahán yā, te tuá ni cájito de ya. ¹⁰ Te níni cáhīn de cájito ndaa de ichi ándiví núú ní ndaa ya cuahán yā, te uū jnáhan ndajéhé yā cáñūhun ya sahma cuijín ní cajecuiñī yā xiin de jíjnáhan de, te cájito ya nájnūhun tēe. ¹¹ Te ni cacahān yā jíin de:

Róhó téee Galilea, ¿najehē cájito ndaa ró ichi ándiví? Chí maá Yáā Dios ni naquihin ya Jesús cuanuhun yā andiví, te suni súcuan ndiji ya nájnūhun cájito ró cuahán yā andiví, áchí yá.

Jeē ní canacāji de Matías jeē nucuiñī de nuū Judas

¹² Yūcuán na te ni nanungoo de yucu jeē naní Olivos, cuanungoo de űuu Jerusalén. Te yajni-ni íne yucu un jíin űuu Jerusalén, nájnūhun ĩn kilómetro-ni, cūhva jeē ni jéhe ley permiso caca űayuu quivī ndétātú. ¹³ Te ni ndivicoo de ini űuu. Te ni ndacoo de cuarto xinī véhe nuū cáyūcu núu de. Te táca de cúu Pedro, Jacobo, Juan, Andrés, Felipe, Tomás, Bartolomé, Mateo, Jacobo sēhe Alfeo, Simón jeē cúu jnáhan grupo cananista, jíin Judas űani Jacobo. ¹⁴ Táca téee yáha, níni cándutútú inuú de cájicān tahu de jíin táca űani Jesús jíin náná yā María jíin sava ga űahan.

¹⁵ Te ĩn quivī te ni jecondichi Pedro nuū táca hermano cáandíje. Te cáhīn nájnūhun ciento ocō űayuu. Te ni cahān de:

¹⁶ Hermano jíjnáhan ní, ni squícu nahín jnúhun cáhán tutu ĩi jeē ni cáhán David nde jenahán ní sáha Espíritu Santo. Te jnúhun un ní cuu síquī Judas jeē ní yosnúu núú téee ni cajni ĩ jitoho yō Jesús. ¹⁷ Te suu tēee un ní jica de jíin yó, te ni chindéee űahán jnáhan de jíin yó síquī jniñu ní jeni ya yohó. ¹⁸ Te ni cajeen ĩn űuhun jíin xúhun ní nihīn tēee un síquī jniñu neé ní sáha de. Te ni nīnga ndeyi de, te ni ndatā sáva chíji de, te ndihī yiti de ni jité. ¹⁹ Te ni jité jnúhun yáha núú táca űayuu cáyūcú űuu Jerusalén, te jeē yúcuán cúu jeē ní casnání i űuhun ún Acéldama nuū yúhu maá i, jeē cuni cahān űuhun jeē cúu cuenta níñī. ²⁰ Chí súcuan je yósó núú tútu Salmo síquī Judas:

Vehe de na quéndōo iyú,
te ma cóndee ni ĩn ga űayuu ini vehe ún.

Te suni cáhán:

Jniñu ní condiso de na cóndiso inga tēe.
Achí.

²¹ Núu súcuan te jini űuhún jéē nucuiñī ĩn tēee lugar maá de jíin yó. Te tēee nucuiñī jíin yó un, nacāji yó de mēhū táca téee ni cajica jíin yó táca quívī jeē ní jica maá Jitoho yō Jesús jíin yó. ²² Te tēee nacāji yó un cúu tēee jeē ni íyo de jíin yó nde quivī ní jendute ya ni sáha Juan, te nde quivī ní ndaa ya cuanuhun yā andiví. Te tēee nucuiñī jíin yó na cúu de testigo jíin yó jeē jé ni natecu yā, achí de.

²³ Te ni catee nuū de uū jnáhan tēee: Matías jíin José jeē naní de Barsabás te suni nání de Justo. ²⁴ Te ni cájicān tahu de:

Tátá Yaā Dios, maá ní chí jiní ni ndese cáa ánuá táca űayuu. Núu súcuan te jeē ndindúú téee yáha, steén ni

ndé ñin de cúu jeē ní nacāji ní. ²⁵ Te condiso jniñu de cuu de apóstol. Te naquihin de jniñu ní stóo Judas, chi ní sáha de cuēchi te cuahān de lugar xeēn nuū cánuú quíhīn de, áchí de.

²⁶ Yūcuán na te ni casáha de ñin sorteo te ni jinū Matías, te ni nucuiñī de ni nduu de jnáhan ndihúxí ñin apóstol.

Jeē ní quee Espíritu Santo

2 Te máa quívī víco Pentecostés ni cahīin tútú ñáyuu cácanđije ñuu Jerusalén. ² Te sanaa-ni te ni quejéé nñhin vēji nde andiví nájnūhun tachī níhin quee, te tāca ñáyuu jeē cáyūcú ini vehe un ní cajini sōho i jeē nñhin ún. ³ Te ni cajito i nájnūhun yáñuhūn jeē ní cajitē núu te ni cacucōo xinī ná ñin ná ñin i. ⁴ Te ndihī i, ni cunuú Espíritu Santo jíin i, te ni quejéé i cácahān i sñin sñin yuhu, ndese ni steén máa Espíritu nuū ná ñin ná ñin i cahān i.

⁵ Te ñuu Jerusalén, suni cáhīin ñayuu hebreo, yíñuhún núu Yaā Dios, jeē ní quijicoo i nde tācá nación nñí cáhnu ñayiví. ⁶ Te jeē ni nñhin súcuan te ni cacutútú cuéhē ñayuu ún. Te ni cunéé ñi ni i jíjnáhan i, chi ná ñin ná ñin i ni cajini sōho i jeē téé ni canihīn Espíritu Santo cácahān de jnūhun yuhu ñūú jicá nuū véji i. ⁷ Te ni canaa ni i cájito i te ni cacahān i:

¿A násūu téé Galilea cácuu tāca téé yáha jéé cácahān de tācá yuhu ñūú nuū véjicoo yó? ⁸ ¿Na vé ni cuu yáha núu súcuan? Chi ná ñin ná ñin yó cájini sōho yó cácahān de jnūhun yuhu ñūú nuū ní cacacu yó. ⁹ Chi vējicoo yó ndé tācá ñuu jicá. Sava yó véji nde Partia jíin Media jíin Elam. Te sava ga yō vēji yó ndé Mesopotamia jíin Judea jíin Capadocia jíin Ponto jíin Asia. ¹⁰ Suni nde Frigia jíin Panfilia jíin Egipto jíin tjñi ñuu jeē íne nde yatā gā ñuu Cirene ñuhun Africa vējicoo yó. Te sava ga yō nde ñuu Roma vējicoo yó, te cáyūcu jínu-ni yó yáha. Te máa yó jeē véjicoo ñuu Roma, sava yó cácuu máa ñáyuu hebreo te sava ga yō cácuu ñayuu sñin ñuu, ni cacandije yó ndíquin yō ley ñayuu hebreo. ¹¹ Suni nde Creta jíin Arabia vējicoo sava yó. Te cájini sōho yó jéé jíin jnúhun yuhu ñūú ná ñin ná ñin máa yó cácahān de tācá jniñu jéhu ní sáha Yaā Dios, achí i.

¹² Te ndihī i chi ni canaa ñi ni i cájini nahín i. Te ni candajnūhún i jíin jnáhan i:

¿Na vé cúu jeē ní cuu núu súcuan jeē cácahān de yuhu ñūú yō? achí i.

¹³ Te sava i ni cacahān catá i:

Tuú chi jeē cánajini de, áchí i.

Jeē ní nacani Pedro jnūhun nuū ñáyuu

¹⁴ Yūcuán na te ni candocuiñī Pedro jíin ndihúxí ñin ga apóstol, te ni cahān jee Pedro jíin ñáyuu ún:

Níhín jnáhan ñuu yō hebreo, jíin ndihī níhín jéé cáyūcu ní Jerusalén, jnūhun yáha na chūhun ni ni jíjnáhan ní, chi cuni nahín ní cahān na jíin ní. ¹⁵ Chi máa ná jíjnáhan ná, nasūu jéé cájini ná nájnūhun cájeni ni

ní, chi sáa cahīn jenéhen cúu, te nasūu hora cánajini ñayuu cúu. ¹⁶ Chi sa suhva squícu jniñu yáha nájnūhun ni cahān Joel, téé ni nacani jnūhun Yaā Dios nde jenahán, chi súcuan ni cahān de:

¹⁷ Achí Yáa Dios: Quivī sándñí ná te tají rí Espíritu rí cunuú yá jíin tāca ñáyuu, te sēhe yíí ró jíin séhe sñí ró, nacani i jnūhun ri, te tāca téé lulí chi coto ndijin de jeē steén rí nuū de, te tāca téé jéhu chi sáha ri jeē scóto jēni de.

¹⁸ Te quívī ún chi tají rí Espíritu rí cunuú yá jíin tāca mozo rí, cúu téé cúu ñahan, te nacani i jnūhun ri.

¹⁹ Te ichi ándiví sáha ri jniñu jéhu jeē náa ni ñayuu coto i, te sáha ri jniñu jéhu ini ñayiví jéé steén jeē cujéhu rí,

chi coo niñī jíin ñúhūn jíin ñúhmā nájnūhun vicō. Yūcuan cúu jeē sáha ri jeē cóo jnūndóho xeēn.

²⁰ Te nduu jnúú níandii te ma cúndijin gā, te yoō coto cuéhé nájnūhun niñī.

Yūcuán na te quee quívī jeē ndíji máa Jítóho rō Jesús. Quivī ún coo cuéhē jniñu jéhu, te cuni ndihī ñayuu jeē quíví máa Jítóho rō cúu.

²¹ Te tāca ñáyuu jeē cahān ndahú i jíin yá te jnama ya i, áchí Yáa Dios.

Achí Joel ni nacani de jnūhun ya.

²² Jeē yūcuan níhín téé ñuu yō Israel, cuni nahín gā ni jnúhun yáha jíjnáhan ní. Ni steén Yaā Dios jeē ní tají yá máa Jesús, Yaā ní jéhu ñuu Nazaret, chi máa Yáa Dios ni jēhe ya jeē ni sáha Jesús jniñu jéhu mēhñu máa ní, jíin jniñu jeē steén jeē cujéhu ya, te jniñu un ní canaa ni ni ní cajito ní. Te je cájini vāha ní jéé súcuan ni cuu. ²³ Te máa ní ni cajñi ní yá, te ni cajendēca ní yá nuū téé xeēn ni cajehni de ya jicā cruz ni casáha ní. Te nde jíin tiempo je ni jini Yaā Dios jeē súcuan sáha ní jíjnáhan ní, chi súcuan je ni sándaā yā. ²⁴ Te ni nastécu Yaā Dios Jesús te tuá ni cúu ya ndíyí, chi jnūhun xeēn jeē jihí ñayuu, tuá na vé cúu ga sáha jíin yá. ²⁵ Chi nde jenahán suhva ni tee David jnūhun ndese ni cahān Jesús jíin Yáa Dios:

Jíní na núu máa ní jeē cúu ní Jítóho ná, chi nñí cáni ndéé ní jíin ná,

chi ndéé ní ichi ndáváha ná, cúu jeē chindéé ñahán ní sāña náváha coo ndeyí ni ná.

²⁶ Jeē yūcuan cúsiñi ni ná te cáhán na jnúhun siñi. Jeē yūcuan ma nácani uhū ni na síquī jnúhun cuu ná.

²⁷ Chi ma cuáha ni jnúhun quendōo ánuá na lugar nuū cáyūcu ánuá ndíyí,

ni ma cuáha ni jnúhun tehyū ná, chi jéjníñu ná núu ni te manī ni jíin ná.

²⁸ Te ni steén ni núu na jéé nátecu ná, te sáha ní jéé cusíñi teyí ni ná condee na jíin ní nñí cáni. Achí Jesús, ni achi David.

²⁹ Tāca níhín jíjnáhan ní, na cástūhun cájii ná nuū ni jnúhun jíi yō David, chi tu ní cáhán de jnūhun yáha síquī máa de. Chi ni jihí de te ni quindūji de, te jíin yō

nuū yíndūji de nde vijna. ³⁰ Chi ni cuu de tēe ni nacani jnūhun Yaā Dios nde jenahán. Te ni jini de jeē váha ni jejnūhun ya nuū de jeē chíji yucūn maá de quiji Cristo, te condee yā mesa de ndacu ya jniñu nájñūhun ni ndacu de jniñu jeē ní cuu de rey. ³¹ Te nde jíin tiempo ni jini de jeē nátecu Cristo, te ni cahān de jeē anuá yā, ma ndóo lugar nuū cáyūcu ánuá ndēyi, ni yiqui cúñu yā ma tehyú. ³² Chi Yaā Dios ni nastécu yā Jesús, te máá ná cácuu ná testigo jeē ní natecu yā. ³³ Te ni ndujéñu tucu ya ni sáha Yaā Dios jíin poder yā. Te nde nuū maá Yáa Dios, Yaā cúu Tátá yā, ni nihīn Jesús Espíritu Santo, chi súcuan ni jejnūhun ya. Te ni tají Jesús Espíritu Santo, te suu ya sáha jniñu jeē cájito ní te cájini sōho ní vijna. ³⁴ Te David, nasūu síquī maá de ní cáhán de tāca jnúhun yáha, chi tu ní ndáa yiqui cúñu de andiví. Chi síquī Cristo cúu jeē ni cáhān de suhva:

Máá Yáa Dios ni cahān yā jíin Jítóho rī Cristo:

Cucōo ró ichi ndáváha ri jeē steén jeē kujéñu ró.

³⁵ Te na sáha ri jeē quende rō poder tāca jéē cájito uhū rohó, áchí yá.

Achí David.

³⁶ Núu súcuan te ndihī ní jéē cácuu yó ñayuu Israel, na cúni váha ní jéē vésú ni cajehni ni yá jicā cruz, te Yaā Dios ni jeni ya maá Jesús jeē cúu ya Jítóho yō te suni cúu ya Cristo, Yaā jnáma yóhó, áchí Pedro jíin i.

³⁷ Te jeē súcuan ni cajini sōho i jnúhun yáha, te ni cajnahuhū ni anuá i. Te ni cacajñuhún i Pedro jíin táca gá apóstol:

¿Te ndese sáha ná jíjnáhan ná núu súcuan? áchí i.

³⁸ Te ni cahān Pedro jíin i:

Nacani ni ni jéē stóo ni cuéchi ní jíjnáhan ní, te cuandute ní jéē ní cacandíje ní Jesucristo, náváha cone cáhnu ni Yaā Dios nuū cuéchi ní, te cuāha Yaā Dios Espíritu Santo yā condee yā ini anuá ni. ³⁹ Chi súcuan ni jejnūhun máá Tátá yō Yaā Dios nuū yō jíin núu séhe yó, te suni súcuan ni jejnūhun ya nuū ñayuu tāca gá nación, tācá i jeē cána ya i candíje i.

⁴⁰ Te jíin cuéhē gā jnúhun súcuan ni cahān cají Pedro, te ni stihví ni de i:

Nducú ndéyí ní jeē na cácu ní, chi jnahnū ndetū ñayuu casáha jniñu néé, áchí de.

⁴¹ Yūcuán na te tācá i jeē ní cajetáhú jnúhun ni cahān de, ni cajendute i. Te quivī un ní nducuehē gā ñayuu cácandíje, nájñūhun unī mil gā ñayuu. ⁴² Te ni cahīn nihīn i síquī jnúhun cástéén apóstol. Te inuú-ni cándajñūhun mánī i te cájicān tahu i, te inuú-ni cáyeji i pan, nájñūhun ni steén maá Jítóho yō jeē núcūhun ni yō síquī yā.

Ndese ni coyūcu ñayuu jeē ní cacandíje jeē xihna ñuhún

⁴³ Te ndihī ñayuu ni cayūhú i ni cajito i, chi cuehē jniñu jéñu jeē steén jeē kujéñu ya ni casáha tēe apóstol. ⁴⁴ Te inuú ní cahīyo ni ñayuu cácandíje, te ni cacuu inuú i tāca jéē cánevāha i. ⁴⁵ Te ni caxícó i na-ni

na vé cánevāha i, te ni casaja i xūhún un núu tāca jnáhan i, núu ndese jíni ñuhún in in i. ⁴⁶ Te ndijnahan quivī ni candutútú i ini templo. Te manī ni cayeji cáhnu i pan tācá vehe jnáhan i nájñūhun ni steén yā, te ni cahīyo síñ ni i. ⁴⁷ Te ni cacahān i jeē yóhyo cújéñu Yaā Dios. Te ndihī ñayuu ñuu un ní cajejnúhún i ñayuu cácandíje. Te ndijnahan quivī ni jnama Jítóho yō sava ga ñayuu, te ni nduu inuú i jíin ñayuu cácandíje.

Jeē ní nduvāha tēe ríngo

3 Te in quivī te máá cáhunī jehíni ni caa Pedro jíin Juan cuangoo de templo, chi hora un cájicān tahu jnáhan de hebreo. ² Te cájendēca ñayuu in tēe cáringo nde quivī ní cacu de. Te tēe un ndéé de ndijnahan quivī yehyí templo jeē naní Hermosa, jícan de caridad nuū tāca ñayuu quivīcoo ini templo. ³ Te tēe un ní jito de nuū Pedro jíin Juan jeē véji de quivīcoo de ini templo, te ni jicān de caridad nuū Pedro jíin Juan. ⁴ Te Pedro jíin Juan ni cajito váha de nuū tēe ún. Te ni cahān Pedro jíin de:

Condēhe núu rī jíjnáhan ri, achí de.

⁵ Te máá tēe un ndétu tūhva de, ni jeni ni de jeē cuáha Pedro jíin Juan jecu xūhun núu de. ⁶ Te ni cahān Pedro:

Tú na xūhun plata ni xūhun oro cánevāha ri. Te íyó in jeē váha ga sáha ri jíin ró: jíin poder maá Jesucristo, Yaā ní jehnu ñuu Nazaret, cáhán rī jíin ró, ndocuiñī te caca ró, áchí de.

⁷ Te ni jñi de ndaváha tēe ún, te ni ndonehen de. Te jehē de jíin súcūn jehé de ni nduvāha-ni. ⁸ Te in ni scánda de máá de ni ndocuiñī de, te ni quejéé de jíca de. Te ni quivī de jíin Pedro jíin Juan ini templo, jíca de, cánda de, te nácuatáhú de nuū Yaā Dios. ⁹ Te ni cajini tāca ñayuu jeē jíca de te nácuatáhú de nuū yā. ¹⁰ Te ni canacuni i de jeē maá de cúu tēe ni condee yehyí templo jeē naní Hermosa, ni jicān de caridad. Te ni canaa ni i ni cajito i, te ni cayūhú i cájito i jeē ní nduvāha tēe ún.

Jeē ní nacani Pedro jnúhun ini corredor jeē naní Salomón

¹¹ Te tēe ni nduvāha ún, tu siáa de Pedro jíin Juan. Te ni cacutútú-ni cuehē ñayuu nuū de ini corredor jeē naní Salomón, te ni canaa ni i cájito i. ¹² Te ni jito Pedro jeē ní cutútú ñayuu ún, te ni cahān de jíin i:

Nihín tēe ñuu yō Israel jíjnáhan ní, ¿najehē cánaa ni ni cájito ní jniñu yáha? ¿Najehē cájito ní núu ná te cájeni ni ni jéē maá ná jíjnáhan ná íyó poder na jéē sáha ná jéē nácaca tēe yáha? ¿Chí ní nduvāha de síquī jeē tēe cájica ndaā cácuu ná cájeni ni ní? ¹³ Tuú chi máá Yáa Dios jíi yō Abraham jíin Isaac jíin Jacob jíin táca gá jíi yō, ni sáha ya jniñu yáha náváha cuni ñayuu jeē kujéñu Sēhe ya Jesús, Yaā jeē ní cajendēca ní núu tēe cácujeñu. Te ná ni cuni Pilato jeē siaá de ya, te tu ní cájehē ni jnúhun. ¹⁴ Te ni casquéhichī ni yá vésú cúu ya

Yaā ndaā, Yaā īi. Te sa suhva ñn tēe jéhni ndīyī ni cacahān ni jíin Pilato jeē na siáá de. ¹⁵ Te ni cacahān ni jēe na cúu Yaā jeē sáha jeē técu ndīhī-ni. Te Yaā Dios ni nastécu yā Jesús jeē ní cuu ya ndīyī, te máá ná cácuu testigo jeē ní natecu yā. ¹⁶ Te tēe yáha jēe cájito ní te cánacuni ní de, ni candíje de jíin ná jeē iyó poder Jesús nasávaha ya de, te jeē yúcuan ní nasávaha ya de. Te jeē súcuan ni cacandíje ná ní sáha ya, jeē yúcuan ní nduvāha vāha de nájñuhun cájito ndīhī ní.

¹⁷ Te na cástūhun ná nuū ni jíināhan ní, je jíiní na jēe máá ní jíināhan ní jíin tēe cácujuhnu nuū yō, tu ní cá-jecūhun ni ní, te jeē yúcuan ní cajehni ni yá. ¹⁸ Te súcuan ni squícu jñuhun ni cahān Yaā Dios nde jenahán jēe cánuú ndoho Cristo siquī cuéchi ñayuu, chi ni sáha ya jeē súcuan ni cacahān tēe ni canacani jñuhun ya nde jenahán. ¹⁹ Te na nácani ni ni jēe stóo ni cuéchi ní, te nasāma ini ní, te quivícoo ní ndaha Yaā Dios návaha ndahva yā cuéchi ní. Te quee quivī jeē ndúsī ñi ni sáha máá Jítóho yō. ²⁰ Te natajī yá Jesús ndiji ya, chi cúu ya Cristo, Yaā ní jeni Yaā Dios jeē jnāma ya yohó. ²¹ Te jíiní ñúhún jēe cóo ya andiví ndé nasájee yá táca jēe iyó, nájñuhun ni cacahān tēe ndoo ni canacani jñuhun nde jenahán ní sáha Yaā Dios. ²² Chi suhva ni nacani jíi yō Moisés jñuhun nuū táca jíi yō: Máá Jítóho yō Yaā Dios cani ya Yaā nacani jñuhun nuū rō jíināhan ró, nájñuhun ni jeni ya ruhū. Te cuu ya ñn jnāhan ñuu yō. Te na chúhun ni rō táca jñuhun jeē nácani ya ún. ²³ Te núu ndé tēe tú chuhun ni de jñuhun cahān yā, jnahnū ndetū de, te ma cúu ga de jnāhan ñayuu yā Israel, áchí Moisés.

²⁴ Te táca tēe ni canacani jñuhun nde jenahán, nde tiempo ni quiji Samuel te ñí gá nde vijna, suni ni canacani de jñuhun siquī táca jñiñu cúu quivī yáha. ²⁵ Yucūn maá tēe ni canacani jñuhun ya nde jenahán cácuu yó, te suni siquī maá yó jíināhan yó cúu jeē ni sáha Yaā Dios contrato jíin jíi yō. Chi ni cahān yā jíin Abraham: Yucūn maá ró cane Yaā sáha jeē quéndōo ndetū táca ñayuu ñí cáhnu ñayiví, áchí yá. ²⁶ Te jeē ní nastécu Yaā Dios Sēhe ya, te ni quiji ya nuū maá yó xíhna gā, návaha quéndōo ndetū yō sáha ya, chi sama ya anuá yō jeē ma sáha ga yō jñiñu neé, áchí Pedro.

Jeē ní cajendēca de Pedro jíin Juan nuū tēe cácujuhnu

4 Te Pedro jíin Juan níni cácahān gā de jíin ñayuu ún te ni quecoo táca sūtū jíin tēe grupo saduceo, jíin tēe cácujuhnu nuū tēe cándito templo. ² Te yōhyo ni caquítī ni de siquī jeē castéén Pedro jíin Juan nuū ñayuu, jíin jēe cánacani de jñuhun jeē nátecu ndīyī chi je ni natecu Jesús. ³ Te ni cajñi ún de, te ni cachuhun ún de vecāa cone de nde cundijin inga quivī, chi je ni ini. ⁴ Te cuehē ñayuu jeē ní cajini sōho jñuhun ni cacahān Pedro jíin Juan ni cacandíje i. Te ni nduu nájñuhun uhūn mil jeē máá nene tēe jeē ní cacandíje.

⁵ Te jeē ní cundijin inga quivī ún, te tēe cácujuhnu nuū ñayuu hebreo jíin tēe jéhnu cándiso jñiñu jíin tēe

cástéén jñuhun tutu ley yā, ni candutútú de ini ñuu Jerusalén. ⁶ Te suni ni candutútú de jíin Anás jeē cúu sutū cujéhu ga, jíin Caifás jíin Juan jíin Alejandro jíin táca gá jeē cácuu jnāhan sutū cujéhu ga ún. ⁷ Te ni candacu jñiñu jeē na quíjicoo Pedro jíin Juan condichi de mēhñú, te ni cacajñuhún de:

¿Ndé ñn ni tejñiñu róhó te ndese ni nihñ jñiñu ró ní sáha ró jēe nduvāha tēe yáha? áchí.

⁸ Yūcuán na te Pedro chi ni cunuú maá Espiritu Santo jíin de, te jíin poder yā ni cahān de jíin táca tēe ún:

Tāca nihín tēe cácujuhnu nuū ñúu yō Israel jíin táca nihín tēe jéhnu cándiso jñiñu, ⁹ vijna te cástíchí ni sáha síquī ñn jñiñu váha ní casáha ná jēe ní nduvāha tēe cúhú yáhá. ¹⁰ Te na cástūhun ná nuū nihín jēe cácujuhnu ní, návaha suni cuni ndīhī jnāhan ñuu yō Israel jeē jíin poder maá Jesucristo, Yaā ní jehnu ñuu Nazaret, ni nduvāha tēe índichi nuū ni yáha. Te suu ya cúu Yaā jeē ní cajehni ni jíicā cruz, te ni sáha Yaā Dios jeē ní natecu yā. ¹¹ Jesús cúu nájñuhun yuū cimientu jeē quítuu vehe. Te máá ní jíināhan ní cácuu nájñuhun tēe casáha vehe, te ni casquéhichí ni yá nájñuhun jeē cátejiyo ní yúu, chi tu ní cácaandíje ní yá. Te ni sáha Yaā Dios jeē cúu ya nájñuhun yuū cánuú gá jeē quítuu vehe. ¹² Te tú cuítī inga jeē cúu jnama yóhó, chi tuá na inga jeē cujéhu ní jeni Yaā Dios ini ñayiví yáha jēe cúu jnama yóhó, áchí Pedro.

¹³ Yūcuán na te ni cajini un jēe Pedro jíin Juan jéhnu-ni cácahān de. Te je cajini jeē tú tūhva de, chi tēe súcuan-ni cácuu de. Te ni canaa ni cájito nuū de, te ni casáha cuenta jeē ní cajica de jíin Jesús. ¹⁴ Te cándēhe núu tēe ni nduvāha un, índichi de jíin Pedro jíin Juan, te tu ní cánihñ gā modo ndese ga cahān. ¹⁵ Yūcuán na te ni candacu jñiñu jeē na quéndacoo sñn de yatā véhe juzgado te ndajñuhun máá jíināhan. ¹⁶ Te ni cacahān: ¿Ndese sáha yó jíin tēe yáha núu súcuan? Chi ni jitē jñuhun yáha núu táca ñayuu ñuu Jerusalén jeē súcuan ni casáha de ñn jñiñu jéhnu, te ma cúu cahān yō jeē tu iyó ndáa. ¹⁷ Te návaha ma cuítē ga jñuhun yáha, na cúxeen yō nuū de jeē ma cahán cuítē gā de jñuhun Jesús nuū ní ñn ñayuu, áchí.

¹⁸ Te ni cacana ún de, te ni cacahān nihñ jíin de jeē ma cahán cuítē gā de jñuhun Jesús ni ma steén gā de jñuhun un núu ní ñn ñayuu. ¹⁹ Yūcuán na te ni cacahān Pedro jíin Juan:

Cani vāha ni ní te núu nújnahan ni Yaā Dios jeē stóo ná jñiñu ní ndacu ya jeē sáha ná te cuandije ná máá na jñiñu nándacu ní. ²⁰ Chi ma cúu stóo ná jñiñu jeē nácani ná jñuhun ní cajini sōho ná jíin jñiñu ní cajito ná, áchí de.

²¹ Yūcuán na te tēe ni cacutútú un ní cacuxeen tucu de nuū Pedro jíin Juan. Te ni casiáá de cuangoo de, chi tú cuítē na modo stóho de chi cáyūhu cájito ñayuu, chi siquī jñiñu jéhnu ni cuu ún te ndīhī i cácahān i jeē yóhyo cújéhu Yaā Dios. ²² Chi tēe jeē ní sáha ya jñiñu jéhnu jíin de jeē ní nduvāha de, víhyá gā uū xico cuiyā de.

Jeē ní cajicān tahú ñayuu cácadíje

²³ Te ná ni casiáá un Pedro jíin Juan cuango de, te ni najinūcoo de nuū tāca gá jnáhan de, te ni cacachi de ndese ni cacahān sutū cácujuhnu jíin tēe jéhnū cándī-so jníñu. ²⁴ Te jeē ní cajini sōho de jnūhun yúcuān, te inuú-ni ni cajicān tahú de nuū Yaā Dios:

Tātā Yaā Dios jeē cujuhnu ní núū ndīhi, máá ní cúu Yaā Dios ni sáha andiví jíin ñáyivi jíin mar jíin táca ndīhi jeē iyó. ²⁵ Te jeē jíin Espíritu Santo te ni sáha ní jēē ni cáhān mozo ní David nde jenahán:

¿Najehē cáquiti ndevāha ni ñayuu sñin nación?

¿Te najehē cájeni sáá ni i jeē ndóna i siquī ní?

²⁶ Ni cacutútú jēē cácuu rey ñayivi jíin náhan, te tēe cácujuhnu ni cacutútú de, te inuú-ni ni candonda de siquī máá ní jeē cúu ní Jitoho ná, jíin síquī Cristo, Yaā jeē ní jeni ní. Achí David.

²⁷ Te jendaá chi Herodes jíin Poncio Pilato jíin táca tēe ñuu yō Israel jíin tēe tāca gá nación, ni cacutútú de ini ñuu yáha ní candonda de siquī Séhe iñ ní Jesús, Yaā ní jeni ní. ²⁸ Te súcuān ni cuu návāha squícu tācá jniñu jeē jíin poder ni ní cundaā ni ní ndé jenahán jēē súcuān coo. ²⁹ Te vijna, Tātā, coto ní ndese cácahān xeēn de nuū na jíin náhan ná, te cuāha ni fuerza ni núū na jēē cácuu ná mozo ni, návāha jéhnū-ni nacani ná jnúhun máá ní. ³⁰ Te jíin poder ní nasávāha ni ñáyuu cácuhū, te sáha ní jniñu jéhnū jeē steén jeē cujuhnu ní. Te tāca jēē yáha sáha ní jíin poder Séhe iñ ní Jesús, áchí i jíin náhan i.

³¹ Te nuū ní ndīhi ni cajicān tahú i, te nuū cáyūcu tútú i un ní sáha ya jeē ní jnáa. Te ndīhi i ni cunuú Espíritu Santo jíin i, te ni jēhe ya fuerza te jéhnū-ni ni canacani i jnūhun Yaā Dios.

Jeē ní canevāha cáhnu i ndajníñu

³² Te ñayuu cuehē jeē ní cacandíje chi inuú cáhiyo ni i jíin náhan i. Te tú ni ñin i ní cáhān jeē ndajníñu jeē névāha máá i cuu máá-ni i, chi tācá ndajníñu ni canevāha cáhnu i. ³³ Te ñihin cánacani apóstol jnūhun jeē ní cajito de jeē ní natecu Jitoho yō Jesús. Te yōhoyo ni chindéé ñáhān yá ñayuu cácadíje. ³⁴ Chi tú cuiti ni ñin i ní ndóho jeē cumanī nuū i, chi tāca ñáyuu cánevāha cuehē ñuhun chí vehe, ni caxīcō i sava te ni caquindeca i xūhún un. ³⁵ Te ni cajēhe i xūhún un núū tēe apóstol, te ni casaja tēe apóstol nuū ñáyuu cácadíje núu ndese jíni ñúhún ñin ñin i. ³⁶ Te iyó ñin tēe nání José jeē cúu yucūn Leví, ni cacu de Chipre, ñuhun jeē íne sñin nuū ndúte. Te tēe apóstol ni casnání de tēe ún Bernabé, jeē cuní cahān: tēe cáhān jnūhun ndeyí ni.

³⁷ Te ni xīcō de ñin ñuhun de, te ndáhá de xūhún un ní jēhe de nuū tēe apóstol.

Siquī cuēchi jeē ní casáha Ananías jíin Safira

5 Te suni inga tēe nání Ananías jíin ñasihí de Safira, ni caxīcō de ñin ñuhun de. ² Te ni chuvāha de sava xūhún un cuu máá de jíin ña, chi súcuān ni canda-jnūhún de jíin ña, te ndáhá de inga sava nájñuhun jeē ndīhi cúu, te ni jēhe de nuū tēe cácuu apóstol. ³ Te ni cahān Pedro:

Ananías, ¿naun ni jēhe ro jnúhun jeē quivi jexeén, jeē cúu Satanás, ini anuá rō te stáhú ró Espíritu Santo cuní rō? Chi jeē ní caxīcō ró ñuhun ró te cuēchi ró cúu jeē tu ní cáchi ndaā rō jeē ni squéndōo ró jecu xūhún un cua-jníñu máá ró, chi ni sáha ró nájñuhun jeē ndīhi xūhun ní jēhe ró. ⁴ ¿Te á násūu cuenta maá ró cúu ñuhun un ndé ná tu xīcō ró? Te ná ni xīcō ró ¿te á násūu cuenta maá ró cúu xūhun jēē cuajníñu ró ndé nuū cuní maá ró? ¿Te naun ni jeni ni rō jeē stahú ró súcuān? Te nasūu máni máá tēe cúu jeē jīcu ró stáhú ró, chi suni Yaā Dios, áchí Pedro.

⁵ Te ná ni jini sōho Ananías tāca jnúhun yáha, te ni cotúu-ni de ni jihí de. Te tāca ñáyuu ní canihín jnūhun ún, yōhoyo ni cayūhú i. ⁶ Te ni candocuiñí tēe suchí, te ni cachusúcun de ndīyi un cuáchindūji de.

⁷ Te ni cunúu nájñuhun unī hora. Te ni jinū ñasihí ndīyi un ní quivi ña ini vehe ún, te tú na vé jiní cuiti ña.

⁸ Te Pedro ni cajñuhún de ña:

Cachi nuū rī, ¿á ñin súcuān-ni ni caxīcō ró ñuhun ró chí tuú? áchí de.

Te ni cachi ña:

Suu súcuān-ni ni caxīcō ná, áchí ña.

⁹ Te ni cahān Pedro jíin ña:

¿Naun ni casquínáhan jnūhun ró jēē cóto ndee rō Espíritu Santo maá Jitoho yō? Chi ni nducú ró stahú ró yā. Cuni nahín jēē cáhma nanecoo tēe cuachindūji yñi ró, te suni súcuān quichindūji de rōhó, áchí de.

¹⁰ Te ni cotúu-ni ña nuū jehé Pedro te ni jihí-ni ña. Te ni ndīvicoo tēe suchí un te ni cajito de jeē jé ni jihí ña, te ni caquenehen de ña, te ni jechindūji de ña xiin yñi ña. ¹¹ Te yōhoyo ni cayūhú ndīvii ñayuu cácadíje jíin táca gá ñayuu jeē ní cajini jnūhun jeē súcuān ni cuu.

Cuehē jniñu jéhnū ni casáha apóstol

¹² Te cuehē jniñu jéhnū jeē steén jeē cujuhnu Yaā Dios ni casáha tēe apóstol nuū ñáyuu. Te tāca ñáyuu cácadíje, inuú-ni cándutútú i ini corredor jeē naní Salomón. ¹³ Te tu ní cáchundeyí ni inga ñayuu quijnáhan jíin i. Te cájehúnhún i ñayuu cácadíje. ¹⁴ Te ni nducuehē gā i, chi cúu tēe cúu ñahan ni cacandíje i máá Jitoho yō. ¹⁵ Te caquindeca ñayuu jnáhan i jeē cácuhū, te cájehūn i ini calle cáca i nuū camilla jíin núu yúu, chi cá-cuni i vēsú ste cuándahū Pedro na yáha siquī i te nduvāha i. ¹⁶ Te suni cuehē ñayuu tācá ñuu cáhiyo yajni yúcuān ní quijicoo i ñuu Jerusalén ni caquindeca i jnáhan i jeē cácuhū jíin jēē cándoho tachí, te ndīhi i ni canduvāha i.

Jeē ní cajito xeēn i tēe cácuu apóstol

¹⁷ Yūcuán na te sutū kujéhu ga jíin táca gá jnáhan jeē cácuu apóstol. ¹⁸ Te ni cajni de tēe cácuu apóstol ni cachuhun de vecāa. ¹⁹ Te ñin ndajéhé maá Jí-toho yō ni nune ya yehyí vecāa ún jecuáa, te ni quenehen ya de jíjnáhan de. Te ni cahān yā jíin de:

²⁰ Cuáhán te cuiñi ró ini templo, te yūcuán nacani cáji ró jnūhun nuū ñáyuu siquī ndese nihīn tahū i cotecu i ñíí cáni, áchí ndajéhé yā.

²¹ Te ni cajini sōho de jnūhun yáha. Te nuū ní cundijin te nehen ni quivicoo de ini templo, te cástéén de jnūhun ya nuū ñáyuu.

Te níni cástéén de te sutū kujéhu ga jíin táca jnáhan de ni canastútú de tēe junta kujéhu ga, jeē cúu ndihi tēe jéhu cándiso jniñu nuū ñáyuu nación Israel. Te ni catají de policía cuaquenehen tēe apóstol ini vecāa.

²² Te nuū ní jíinūcoo te tuá gā tēe apóstol. Te ni canandió cóo te ni cacachi:

²³ Jendaá cúu jeē ní cajito ná ndési vāha vecāa, te cáhiin tēe cándito yehyí un. Te nuū ní canune ná, te tú cuiñi gā tēe un cáhiin ini vecāa ún, áchí de.

²⁴ Te sutū kujéhu ga jíin tēe cújéhu nuū tēe cándito templo jíin sūtū cácuu apóstol, nuū ní cajini sōho de jnūhun yáha, te ni cajeni ni de ndese ga cúu un núu súcuan. ²⁵ Te ni quee-ni ñin tēe te ni cachi:

Tēe jeē ní cachuhun ní vecāa, cáhiin de ini templo, te cástéén de jnūhun nuū ñáyuu, áchí de.

²⁶ Yūcuán na te tēe cácuu apóstol nuū tēe cándito templo, jíin tēe cácuu policía de, ni jengoo de, te yúcun ní nacueca de táca tēe apóstol vendicoo de jíin, chi cáyūhú de jeē sanaa te cuāha ñáyuu yuū xinī de núu sáha xeēn de jíin táca tēe apóstol. ²⁷ Te nuū ní najinūcoo de jíin tēe apóstol, te ni cajecuiñi de nuū tēe cása ha junta. Te sutū kujéhu ga ni cahān:

²⁸ Ni cacahān nihin ri jíin ró jeē ma steén cuiñi gā ró jnūhun tēe nání Jesús. ¿Te naun ni cása ha ró jéē ní ndecāva jnūhun un ñíí ñuu Jerusalén yāhá? Te cácuu ró staú yáhu ró rúhū jíjnáhan ri siquī jeē ni jíhī tēe ún, áchí.

²⁹ Te Pedro jíin táca gá apóstol ni cacahān de:

Cánuú jéē squícu ná jniñu ní ndacu Yaā Dios nuū ná te nasū jniñu nándacu tēe. ³⁰ Máa Yáa Dios jí yō ni nastécu yā Jesús, Yaā ní cajehni maá ní jeē ní cata caa ní yá jicā cruz. ³¹ Te ni sáha Yaā Dios jeē ní ndujéhu tucu Jesús néne ya ichi ndávāha Yaā Dios, te cúu ya Yaā ndácu jniñu, Yaā jnáma ñáyuu. Te súcuan ni sáha Yaā Dios návāha yóhó, jéē cácuu yó ñáyuu Israel, na nácani ni yō jeē stóo yó cuéchi yó, te cone cáhnu ni yā nuū táca cuéchi yó. ³² Te máa ná ni cajito ná táca jniñu yáha, te suni máa Espíritu Santo steén cají yá jeē súcuan cúu, chi jéhe Yaā Dios Espíritu Santo yā condee ini anuá táca ñáyuu jeē cájendetū nuū yā, achí de.

³³ Te ná ni cajini sōho un jnūhun yáha, te yōhyo ni caquítē ni, te cahni de cácuu nuú. ³⁴ Te mēhñū un jíjnáhan néne ñin tēe grupo fariseo nání de Gamaliel, te cúu de maestro jeē steén ley yā, te táca ñáyuu cáje-jnūhún i de. Te ni ndocuiñi de, te ni ndacu de jniñu jeē na cújiyo núu tēe apóstol. ³⁵ Te ni cahān de:

Róhó jnáhan ñuu yō Israel, cani vāha ni ró núu na vé cácuu ró sáha ró jíin táca tēe yáha. ³⁶ Chi nucūhun ni ró jeē ñin cuiyā ni ndonda Teudas siquī gobierno, te ni cahān de jeē tēe téyí cúu de, te ni cacutútú nájnūhun cuūn ciento tēe jíin de. Yūcuán na te ni cajehni ñáyuu Teudas, te táca jéē ní caquijnáhan jíin de ni cajitē núu cuangoo sáa-ni, te ni jecuiñi-ni jniñu ún. ³⁷ Yūcuán na te quivī ni íyo censo te Judas, ñin tēe Galilea, ni ndonda de siquī gobierno, te ni cacutútú cuéhē tēe jíin de. Te suni ni cajehni ñáyuu Judas, te táca tēe jeē ní caquijnáhan jíin de ni cajitē núu cuangoo. ³⁸ Te vijna na cuáha ri consejo rohó. Ma stáhān gā ró tēe yáha. Siáá de na quíngoo de. Chi núu ñáyuu-ni ni squejéé jniñu yáha, te jecuiñi ñi. ³⁹ Te núu Yaā Dios ni squejéé, te ma cúu casi ró, chi sanaa te siquī Yaā Dios cándonda ró, áchí de.

⁴⁰ Te ni cachusóhó jéē ni cáhān Gamaliel. Te ni canacana tēe cácuu apóstol, te ni cacani de jíin cuarta ñi te ni cacahān xeēn jíin de jeē ma cahān gā de jnūhun Jesús, te ni casiáá de cuangoo de. ⁴¹ Te máa apóstol ni quendacoo de nuū junta cuangoo de, cá-cusiñi ni de jeē ni jéhe ya jnūhun ndoho de jeē cuáha ñáyuu jnūhun canu de siquī jeē cácuu de ya. ⁴² Te ndiquivī castéén de jnūhun vāha Jesucristo, te cá-nacani de jnūhun ún ini templo jíin táca-ni vehe.

Jeē ní cajeni de uxā tēe cuajniñu mēhñu ñáyuu cácuu apóstol

6 Te ni cucuehē ñáyuu cácuu apóstol. Te tiempo un te tēe hebreo jeē cácuu apóstol, ni quejéé de cácuu apóstol de nuū jnáhan hebreo de, áchí de jeē ñahan viuda jeē cácuu apóstol griego tu cániñi vāha ña staā jeē cácuu de táca quivī cuu ña. ² Yūcuán na te máa ndihúxi uū apóstol ni canastútú de táca ñáyuu cácuu apóstol, te ni cacahān de:

Tú vāha jeē jecuiñi jniñu jeē cácuu apóstol ri jnūhun Yaā Dios siquī jeē cácuu apóstol griego. ³ Núu súcuan te róhó, hermano, nacāji ró uxā jnáhan máa yó, te na cóndiso jniñu de saja de staā. Te nacāji ró tēe jeē cácuu apóstol griego ñáyuu de, tēe ndichí jéē ní cunuú Espíritu Santo jíin de. ⁴ Te ruhū jíjnáhan ri, máni cacān tahū rī jíin jéē nácani ri jnūhun ya, achí de.

⁵ Te ndihi ñáyuu ni canujnahan ni i jnūhun ni cacahān de. Te ni canacāji i Esteban, tēe cácuu apóstol griego vāha jeē ní cunuú Espíritu Santo jíin de. Te suni ni canacāji i Felipe jíin Prócoro jíin Nicanor jíin Timón jíin Parmenas jíin Nicolás. Te Nicolás cúu tēe ñuu Antioquía, te ni nduu de tēe cácuu apóstol griego ñáyuu hebreo nde ná tu candíje de jnūhun Cristo. ⁶ Te ni cajeni i táca tēe yáha

nuū tēe cácuu apóstol, te tēe apóstol un ní casoó de ndaha de xinī tāca tēe un ní cajicān tahú de nuū Yaā Dios siquī jniñu condiso de.

⁷ Te jnūhun Yaā Dios ni jitē gā cuahān, te ni nducuehē teyí ñáyuu cácanđije i jnūhun ya ini ñuu Jerusalén. Te suni cuehē sutū ni cacandije de jnūhun ya.

Jeē ní cajniñ de Esteban

⁸ Te ni chindéé ñáhán yá Esteban ni jēhe ya poder nuū de, te ni sáha de tācá jniñu jéhnū nuū ñáyuu, jniñu jeē steén jeē kujéhnū Yaā Dios. ⁹ Te ñayuu hebreo jeē ní cacuyāhu i te ni canduu libre i, íyó vehe ī sinagoga i. Te tēe un cácuu tēe ñuu Cirene jíin tēe ñuu Alejandría jíin tēe Cilicia jíin tēe Asia. Te sava tēe un ní caquejé de cástáhán jnáhán de jíin Esteban. ¹⁰ Te tu ní cácanđeyí jíin de, chí ndíchí ní cahān de ni sáha máá Espíritu Santo. ¹¹ Yūcuán na te ni cascáhán sava tēe jeē na cáhán jnūhun stáhú síquī Esteban. Te ni cacahān jeē ní cajini sōho cáhán ndevāha Esteban siquī Moisés jíin síquī Yaā Dios. ¹² Te jeē súcuu ni cacahān te ni caquitī ni tāca ñáyuu jíin tēe jéhnū cándiso jniñu jíin tēe cástéén jnūhun tutu ley yā. Te ndihī de ni candonda síquī Esteban, te ni cajniñ de cuango jíin de nde nuū junta kujéhnū ga. ¹³ Te ni cajeni de tēe cahān jnūhun yáá síquī Esteban, te suhva ni cacahān:

Tēe yáha tu ndé jécuiñī de jeē cahān ndevāha de síquī templo ī yáha jíin síquī ley yā. ¹⁴ Chí ni cajini sōho ná cáhán de jeē Jesús, tēe ni jehnu ñuu Nazaret, canu de templo yáha te nasama de jeē tajnúni ley yā jeē ní jēhe Moisés nuū yō, áchí.

¹⁵ Yūcuán na te ndihī tēe cáyūcu nuū junta un ní candacoto vāha nuū Esteban, te ni cajini jeē jito nuū de ná jito nuū ñn ndajéhé Yaā Dios.

Jnūhun ni nacani Esteban

7 Te máá sūtū kujéhnū ga ni cajnūhún Esteban: ¿A ndáa jeē súcuu ni sáha ró nájñūhun cácanhān de yāhá? áchí.

² Te ni cahān Esteban:

Ndihī níhín jéē cácuu ní jnáhán ñuu yō, jíin ndihī níhín jéē cácuu jéhnū ní núū ñúū yō, cuni nahín ní jnūhun cahān ná: Máá Yáa Dios jeē yóhō kujéhnū ya, ni steén yā maá yá nuū jíi yō Abraham nde na néne ga de región Mesopotamia, nde ná tu quihīn de condee de ñuu Harán. ³ Te ni cahān yā jíin de: Stóo ñuu rō jíin táca jnáhán ró te quihīn rō nuū cuáha ri condee rō, chí máá rí steén ichi nuū quihín rō, achí yá. ⁴ Yūcuán na te ni quenda de región Caldea, te ni jinū de ni condee de ñuu Harán. Te yūcuu ní jihī tatá de. Yūcuán na te ni sáha Yaā Dios jeē ní quee de ñuu yáha núū cáyūcu yó vijna. ⁵ Te tu ní jēhe ya ni ñn tíhlí ñuhun yáha cuu tahū de. Te vésú súcuu te ni jejnūhun ya jeē cuáha ya ñuhun un núū de nde jíin núū tāca séhe de, vésú ná tu coo séhe de sáá. ⁶ Te súcuu ni cahān Yaā Dios jíin de: Séhe ró coyūcu jíicá i ñga ñuu, te cuūn ciento cuiyā

sájniñu sáa-ni i te stóho ñayuu yūcuu i. ⁷ Te siquī jeē súcuu sáha i jíin séhe ró, te máá rí chí stóho ri ñayuu ñuu ún. Te sáa te quendacoo séhe ró yūcuu, te nucoyūcú i yāhá chíñhún i ruhū, achí yá. ⁸ Te ni cahān yā jíin Abraham jeē na cúu de circuncidar, jeē cúu ñn jnunī jeē ní sáha ya contrato jíin de. Te ná ni cacu séhe de Isaac te ni sáha de circuncidar i nuū uná quivī. Te suni súcuu ni sáha Isaac jíin séhe de Jacob, te Jacob jíin séhe yí de jeē cácuu ndihúxí uū yucūn ñayuu Israel.

⁹ Te tāca séhe Jacob ni cacucúesún ni de jíin ñani maá de José, te ni caxícó de i nuū tēe jeē ní cajendēca i nde nación Egipto. Te Yaā Dios chí ni ndito ya José.

¹⁰ Te ni jnama ya i nuū tāca jnúndóho ní jito i, te ni cundíchí i ni sáha ya. Te Faraón, tēe cúu rey nación Egipto, ni cusī ni de jíin i ni sáha ya, te ni tejniñu de José jeē cúu de gobernador te ndacu de jniñu nación Egipto jíin núū ñáyuu cáyūcu vehe Faraón.

¹¹ Te ni quiji quivī jeē ní íyo ñn jnamā xeēn, te ni ndoho ñayuu ñí cáhnu nación Egipto jíin ndé ñuu Canaán. Te tāca jíi yō ún, tuá ni cánihīn de jeē cáji de. ¹² Te ni nihīn Jacob jnūhun jeē iyó trigo nde nación Egipto, te ni tají de séhe de ni jengoo de ni cajeen de trigo vuelta ñn. ¹³ Te jeē cuángoo de vuelta uū te ni nastúu José jeē maá de cúu ñani de jíin de. Yūcuán na te ni jini rey Faraón ndé ñn jnáhán cúu José. ¹⁴ Te ni cahān José jíin táca ñani de jeē na cóndeca de tatá de Jacob jíin ndihī jnáhán vehe de. Te ni íyo unī xico xahūn i. ¹⁵ Te súcuu ni cuu jeē ní jínū Jacob ni condee de nación Egipto nde ni jihī de. Te suni yūcuu ní coyūcu séhe de jeē cácuu jíi yō un ndé ni cajihī maá de. ¹⁶ Te ná ni quee quivī jeē ndénehen ya tāca yūcūn de jeē cáyūcu tátú de nación Egipto, te ni cacondiso de yiqui ndihúxí uū ndīyí jíi un jéē ndīji ñuu Siquem, te ni cachindūji de ini yaū ndīyí ndeé jíicá cáva jeē ní jeen jíi yō Abraham nuū tāca séhe Hamor ñuu Siquem.

¹⁷ Te nde ná cáyūcu gá de nación Egipto, te cuacuyajni quivī jeē squícu jnūhun ni cahān Yaā Dios jíin Abraham jeē quéndacoo séhe de nucoyūcú i ñuu ní jéjnūhun ya nuū i, te ñayuu un ní tahū cuehē i ini nación Egipto. ¹⁸ Yūcuán na te ni nucuiñī ñga rey ñuu Egipto jeē tu ní jíin de jeē váha ni sáha ndīyí José. ¹⁹ Te rey un ní stahú de tāca jíi yō te ni sáha ndevāha de jíin i, chí ni sáha fuerza de i jeē ma cóto ga i séhe yiquín i te na cúu. ²⁰ Te tiempo un ní cacu Moisés, te ni cusī ni Yaā Dios jíin i. Te unī yoō ni condito sāhi náná i tatá i. ²¹ Te tuá ni cúu condito sāhí de i, te ni cachune de i nuū nanihīn séhe sáhí Faraón i, te ni naquihín séhe ña i ni scuéhnū ña i nájñūhun séhe máá ña. ²² Te ni cutūhva Moisés tāca jnúhun ndíchí ñuu Egipto, te ni kujéhnū de jíin jnúhun cáhán de jíin jniñu sáha de.

²³ Te nuū uú xico cuiyā de te ni jecondéhé de jnáhán de jeē cácuu ñayuu Israel. ²⁴ Te ni jito de nuū ñn tēe nación Egipto jeē sáha ndevāha jíin ñn tēe Israel. Te Moisés ni jnama de jnáhán de Israel ún, chí ni jehni de tēe Egipto un. Te súcuu ni ndutahū jeē ní sáha nde-

vāha jíin jnáhan de ún. ²⁵ Te máá Moisés jéni ni de jeē jécūhun ni tāca jnáhan de jeē Yáa Dios ni tají yá de jeē jnáma de jnáhan de ún ini nación Egipto nuú, te tu ní cájécūhun cuítì ni jnáhan de ún. ²⁶ Te inga quiv̄i suni ni jito de nuū uú tēe Israel jeē cájejnáhan, te cúní de jeē na jécuiñī. Te jeē yúcuan ní cahān de jíin: ¿Najehē casáha ndevāha ró jíin jnáhan ró? Chi nájnūhun ññani-ni cácuu ró, áchí de. ²⁷ Te máá tēe cáni tahū jnáhan un ní chundahá de Moisés te ni cahān de: ¿Ndé ññ ni jeni róhó jēē cujēhnu ró núū rī te sándaā rō jniñu ri jijnáhan rí? ²⁸ ¿Chí suni cúní rō cahni rō ruhū nájnūhun ni jehni rō tēe Egipto icu chí naún? áchí de jíin Moisés. ²⁹ Te nuū ní jini sōho Moisés jnūhun yáha, te ni yūhú de jeē cáhni rey de, te ni jinu de cuahān de inga nación. Te ni condee de ñuu jicá Madián, te yūcuan ní scácu ñasihí de uū sēhe yí de.

³⁰ Te ni jīnu uū xico cuiyā jeē néne de yūcuán. Yūcuán na te ññ ndajéhé Yaā Dios ni quenda ya nuū de nde nuū ññhun téhé nuū ññ yucu súcún Sinaí. Te ni quenda ya nuū de xinī ññ yucū cuíi cáhnu cándahá yáñuhūn, te tu ní cáyú yucū ún. ³¹ Yūcuán na te Moisés ni naa ni de jito de ún, te ni jehēn de nde nuū, návāha coto vāha de. Te ni jini sōho de jeē cahān máá Jítoho yō jíin de: ³² Máá rí cúu Yaā Dios tāca jíi rō jenahán, Abraham jíin Isaac jíin Jacob, achí yá. Te Moisés, quísi i de jeē yūhú de, te jeē yúcuan tuá ni cúndeyí ni de coto de nuū. ³³ Te máá Jítoho yō ni cahān yā jíin de: Quenehen ndijēn rō chi nuū ññ ró, ññhun íi cúu. ³⁴ Je ni jini rī ññayuu máá rí jeē yóhoyo cándoho i nación Egipto, te suni jíini sōho ri jeē cájnana uhū i, te ni cuun ri vēji ri jeē jnáma ri i jijnáhan i. Núu súcuan te vijna chí tají rí rohó ndicó ró quihīn rō nde nación Egipto, achí yá jíin de.

³⁵ Te nde ná tu quenda Moisés Egipto, te tāca jnáhan de ni casquéhichī i de jeē ní cacahān i jíin de: ¿Ndé ññ ni jeni róhó jēē cujēhnu ró núū rī te sándaā rō jniñu ri? ni cacahān i jíin de. Te vēsú súcuan te máá ndajéhé Yaā Dios ni quenda nuū Moisés un jēē cándahá cáyú yucū cuíi ún. Te súcuan ni cuu jeē ní natají yá de cuanuhun de nde Egipto jeē ndácu de jniñu nuū i te jnama de i. ³⁶ Te máá Moisés ni sáha de jeē ní quenda-coo jnáhan ñuu de ini nación yúcuan, te ni cayāha de Mar Rojo, te ni cajica cuu de ññhun téhé úū xico cuiyā. Te nñí tiempo un ní sáha de cuehē jniñu jéhnu jeē steén jeē cujēhnu Yaā Dios. ³⁷ Te máá Moisés cúu jeē suhva ni cahān de jnūhun yáha jíin jnáhan ñuu yō Israel: Máá Yáa Dios cani ya Yaā nacani jnūhun nuū rō jijnáhan ró nájnūhun ni jeni ya ruhū. Te cuu ya ññ jnáhan ñuu yō. Te na chúhun ni rō jnūhun cahān Yaā ún, áchí. ³⁸ Te suni nde ná ni cajica cuu jíi yō nde nuū ññhun téhé, te ni cahān ndajéhé yā jíin Moisés xinī yúcu súcún Sinaí, te ni nihīn de jnūhun jeē cahān ndese nihīn tahú yō cotecu yō, te ni nacani de jnūhun un núū tāca jíi yō, te ni quendōo jnūhun un núū yō.

³⁹ Te tāca jíi yō ún tu ní cácuu de cuandētū de nuū Moisés, chí sa suhva ni cacuni de squéhichī ni de

Moisés, te ni cacuni de nandicó de nungoo de Egipto nuú. ⁴⁰ Te ni cacahān de jíin Aarón: Sáha ní tjini yā na cósnūu núū yō. Chi Moisés, jeē ní quenehen de yóhó Egipto vējicoo yó, tu cájini yō na vé ni ndoho de jeē tú de ndéē jeē cuahān de xinī yucu Sinaí, achí. ⁴¹ Yūcuán na te ni cajēhe de oro ni cuvāha ññ becerro oro, te nuū becerro ídolo un ní casocō de quitì, te ni cacusiñ ni de jíin ídolo ni casáha de ún. ⁴² Te Yaā Dios ni cujiyo ya cuahān yā, te ni stóo ya de na chíññuhún de nuū tāca jēē jito yó ññ andiví, nájnūhun yósó núū tútu tēe ni canacani jnūhun Yaā Dios nde jenahán:

Ni cahān yā: Róhó ññayuu Israel,
 ¿á cájeni ni rō jeē nuū ruhū ni casocō rō quitì
 ná ni cajica cuu ró úū xico cuiyā nde nuū ññhun téhé?
⁴³ Tuú, chí sa suhva ni cacondiso ró nicho jeē íne ídolo
 jeē naní Moloc
 jíin figura quími jeē naní Renfán,
 ídolo jeē ní casáha máá ró ni cachiññuhún ró.
 Jeē yúcuan cúu jeē siáha ri rohó quíññ jicá ró nde
 yatā ññū Babilonia, achí yá.

⁴⁴ Te ni ndacu ya jniñu nuū Moisés jeē na sáha de vehe ññ nuū chíññuhún de ya, nájnūhun cáca jeē ní steén yā nuū de. Te tāca jíi yō, nde nuū ññhun téhé ní canevāha de vehe ññ un núū ní cachuvāha de tabla yuū jeē yósó jnūhun ley yā. ⁴⁵ Te ni castóo de vehe un núū ndihí sēhe de jeē cúu jíi yō. Te ni quívi Josué jíin jíi yō ini nación yáha, te ni sáha ya jeē ní cacundeyí de jíin táca ññayuu jeē ní cacoyūcu yáha ní cajinu i cuangoos. Te ni quívicoo de táca ññu i jíin vehe ññ ún, te ni quendōo nde quiv̄i ní cuu David rey. ⁴⁶ Te ni cusíñ ni Yaā Dios jíin rey David. Te ni jicān de nuū yā jeē sáha de ññ vehe ññ yā nuú, chí máá yá cúu Yaā Dios jíi de Jacob. ⁴⁷ Te ni cuu jeē nde sēhe yí de Salomón ni sáha vehe ññ yā. ⁴⁸ Te vēsú súcuan ni cuu te Yaā cujēhnu téyí, tu ndéé yá máá vehe jeē casáha ññayuu, nájnūhun ni cahān tēe ni nacani jnūhun ya nde jenahán:

⁴⁹ Ni cahān yā:
 Andiví cúu nájnūhun mesa nuū ndácu ri jniñu
 te ññayiv̄i cúu nájnūhun ññ nuū yíttuu jehē rī.
 Núu súcuan ¿te ndese cuu sáha ró vehe jeē cóndee rī,
 te ndese cuu sáha ró núū ndétātu rí?
⁵⁰ ¿A násūu máá rí ní sáha ndihí jeē iyó?
 áchí máá Jítoho yō Yaā Dios.

⁵¹ Te cáhān gā Esteban:
 Yóhoyo cácuññi ni ní, te tu cácuu ní chusóhó ní, te cácuu ní nájnūhun ññayuu táca nación jeē tu cájini i jnūhun ya ni tu cácandíje i ya. Chi níni cájesi ni núū Espíritu Santo, te nájnūhun ni casáha jíi yō jenahán, suni súcuan casáha ní vijna. ⁵² ¿A ní ñño tēe nacani jnūhun ya nde jenahán jeē tu ní sáha ndevāha jíi yō jíin de? Chi jíi yō ni cajehni de tēe ni canacani jnūhun jeē quíji máá Yáa ndaā. Te je ni quiji Yaā ún, te máá ní ni canastúu ni yá nuū tēe ni cajehni de ya. ⁵³ Te vēsú nde jíin táca ndajéhé yā ni jēhe ya ley yā nuū yō, te máá ní chí tu cásquícu ní, áchí Esteban.

Jeē ní cajehni de Esteban

⁵⁴ Tāca jnūhun yáha ní cajini sōho, te yōhoyo ni caquitē ni, te cánacayīhí yuhu cájito nuū Esteban. ⁵⁵ Te máá Esteban chí ni cunuú Espíritu Santo jíin de. Te ni jito de ichi ándiví, te ni jini de jeē ndíndēe núū néne Yaā Dios, te índichi Jesús ichi ndáváha ya. ⁵⁶ Te ni cahān de:

Vijna te jito ri jeē núne andiví, te jito ri nuū maá Yáā ní nduu tēe, índichi yā nuū cujéhnua ya lado váha Yaā Dios, áchí de.

⁵⁷ Yūcuán na te ni cajesi un sóho, te ni cacana cóhó, te inuú-ni ni candonda siquī Esteban. ⁵⁸ Te ni caquenehen Esteban cuango jíin de nde yatā űú. Te tēe ni cacahān yaá un jíin ndíhi jnáhan de ni cachucú de ticāchí de ndíto ĩn tēe suchí nání Saulo, te ni cacani de yuū xinī Esteban. ⁵⁹ Te níni jeē cácani tāca tēe un yúū xinī de te ni jicān tahú de nuū yā:

Tātā Jesús jeē cúu ní Jitoho ná, naquihin ní anuá na vijna, áchí de.

⁶⁰ Te ni jecuiñī yití de te ni cahān jee de:

Tātā Yaā Dios, ma quénehen ní cuéchi siquī i jeē casáha i jíin ná, áchí de.

Súcuan ni cahān de te ni jihī-ni de.

Jeē ní jito xeēn Saulo ñayuu cávandíje

8 Te Saulo, ni nujnahan ni de jeē ni jíhī Esteban.

Te quiví un ní caquejé de cájito xeēn ndasí de ñayuu cávandíje Jesús ini űuu Jerusalén, te jeē yúcuan cúu jeē ní cajitē núu ñayuu cávandíje cuango i nñí Judea jíin nñí Samaria. Te tēe apóstol chí tu ní cájitē núu de. ² Te sava tēe yíñúhún núu Yaā Dios, ni cachindūji de Esteban. Te yōhoyo ni candahyū de jeē ni jíhī Esteban. ³ Te Saulo chí jito xeēn de ñayuu cávandíje, te quiví de ndijnahan vehe te jñí de tēe, ñahan, chūhun de i vecāa.

Jeē ní canacani i jnūhun Yaā Dios ndañú Samaria

⁴ Te tācá űuu nuū cuango tāca ñayuu ní cajitē núu un ní canacani i jnūhun ndese jnáma Yaā Dios ñayuu.

⁵ Te ni jinū Felipe ĩn űuu ndañú Samaria, te nuū ñayuu yúcuan ní nacani de jnūhun Cristo, Yaā ní jeni Yaā Dios jeē jnáma ya yohó. ⁶ Te tāca ñayuu ní cacutútú un ní cajini nahín váha i tāca jnūhun ni nacani Felipe, te ni cajito i tācá jniñu jéhnua ni sáha de. ⁷ Chi cuehē ñayuu cándoho tachí ni canduváha i, te cácana cóhó táchí un ní caquendacoo. Te cuehē ñayuu ni jíin jíin ñayuu ríngo ni canduváha. ⁸ Te jeē yúcuan ní cacusí teyí ni ñayuu űuu ún.

⁹ Te ini űuu un néne ĩn tēe nání Simón, te tēe tásí cúu de. Te nde ná tu jinū Felipe űuu Samaria, te yōhoyo cánaa ni ñayuu űuu un cájito i jeē sáha Simón, te ni stahú de i ni cahān de jeē ĩn tēe cújéhnua téyí cúu máa de. ¹⁰ Te nde tēe cácujehnua jíin ndívii cuiñi ñayuu, cájetáhú ndasí i jnūhun cáhán de, te ni cajeni ni maá i te ni cacahān i:

Tēe yáha ní jēhe Yaā Dios cuehē poder nuū de, áchí i.

¹¹ Te cájetáhú váha i jnūhun cáhán de, chí cuehē tiempo ni sáha de jniñu stáhú ní canaa ni i ni cajito i.

¹² Te nuū ni jíin Felipe, ni nacani de jnūhun váha ndese ndácu Yaā Dios jniñu, jíin jnūhun Jesucristo, te ni cacandíje i te ni cajendute i, cúu tēe cúu ñahan. ¹³ Te suni máá Simón ni candíje de te ni jendute de, te ni jica cuu de jíin Felipe. Te ni naa ni de jito de tācá jniñu jéhnua jeē sáha Felipe jeē steén jeē cujéhnua Yaā Dios.

¹⁴ Te cáyucu tēe apóstol űuu Jerusalén, te ni canihīn de jnūhun jeē ñayuu Samaria ni cacandíje i jnūhun Yaā Dios. Te ni catají de Pedro jíin Juan cuango de yūcuán. ¹⁵ Te ni jinūcoo de, te ni cajicān tahú de jehē ñayuu un náváha na quiví Espíritu Santo ini anuá i jíin náhan i. ¹⁶ Chí ná tu quiví ya ini anuá ni ĩn i, chí máa-ni jeē ní cajendute i jeē ní cacandíje i Jitoho yō Jesús. ¹⁷ Yūcuán na te Pedro jíin Juan ni casoó de ndaha de xinī i jíin náhan i, te ni quiví Espíritu Santo ini anuá i.

¹⁸ Te ni jito Simón jeē súcuan casoó apóstol ndaha de xinī ñayuu ún te súcuan quiví Espíritu Santo ini anuá i, te cúni de cuáha de xūhun núu tēe apóstol náváha nihīn de poder un núu. ¹⁹ Chí ni cahān de:

Cúni na jéé cuáha ní poder yáha núu na, náváha núu ndé ñayuu soó ná ndaha ná xinī i te quiví Espíritu Santo ini anuá i, áchí de.

²⁰ Yūcuán na te ni cahān Pedro jíin de:

Na náa xūhun ró je jnahnū ndetū rō siquī jeē jéni ni rō jeē jíin xūhun te cuu cuaan ró táhū jeē véji nuū Yaā Dios. ²¹ Ma nihín tahú rō jeē sáha ró jniñu yáha, chí tu iyó ndáa anuá rō nuū Yaā Dios. ²² Núu súcuan te jíni ñúhún jéé stóo rō jnūhun jeē jéni néé ni rō súcuan te cahān ndahú ró jíin Yáa Dios, te máa yá sanaa te cone cáhnu ni yā siquī jeē jéni néé ni rō súcuan. ²³ Chí jíni rī jeē cucuésún ni rō siquī jeē sáha ri jniñu yáha. Te tāca jéé neé jéni ni rō ni cunuú un jíin ró, achí Pedro jíin de.

²⁴ Yūcuán na te ni cahān Simón jíin de:

Cacān tahú ni jéhē na jíin náhan ní núu maá Jitoho yō náváha tú jnahnū ndetū na nájnūhun ni cahān ní, áchí de.

²⁵ Te Pedro jíin Juan ni cacahān cají de ndese cávandíje de jnūhun Yaā Dios. Te jeē cuanungoo de ichi űúu Jerusalén, te tijni ndañú Samaria ni canacani de jnūhun jeē jnáma ya ñayuu.

Felipe jíin tēe nación Etiopía

²⁶ Yūcuán na te ni cahān ndajéhé maá Jitoho yō jíin Felipe:

Quihin ichi te quihīn rō ichi sur, ichi jeē quénda Jerusalén cuahān nde űuu Gaza, áchí yá.

Te ichi chúcuan chí máa űuhun téhé cúu. ²⁷ Te ni quihin Felipe ichi cuahān de. Te nde nación Etiopía ni quiji ĩn tēe eunuco jeē ndíso jniñu de cúu de tesoroero nuū ñahan cúu reina ndácu jniñu nación Etiopía, nání ña Candace. Tēe un ní quichiñúhún de Yaā Dios űuu

Jerusalén. ²⁸ Te cuanuhun de néne de nuū carreta de, te cáhu de tutu jeē ní tee Isaías, tēe ni nacani jnūhun Yaā Dios nde jenahán. ²⁹ Te máá Espíritu ni cahān yā jíin Felipe:

Cuáhán quíjnahan rō tēe cuahān jíin carreta un.

³⁰ Te ni jejnahan Felipe carreta un, te ni jini sōho de jeē cáhu tēe ún tutu jeē ní tee Isaías. Te ni cajnūhún de tēe ún:

¿A jécūhun ni ni jnūhun jeē cáhu ní chí tuú? áchí de.

³¹ Te ni cahān maá tēe un jíin Felipe:

¿Te ndese jecūhun ni ná? Chi tú na tēe castūhun núú ná ndese cúu ún, áchí de.

Te ni cahān de jíin Felipe jeē na cáa de conēne ndúú de jíin de ini carreta.

³² Te jnūhun cáhu de tutu íi un cáhán suhva:

Nájñūhun lanchi jeē cuahán tē nuū cúu tē, súcuan ni casáha ñayuu jíin yá.

Te nájñūhun ñn londe quiti sáte jéē tu ndáhyú tē, súcuan ni sáha ya,

chi tú na vé ni cáhán cuiti yā ná ni cajicān i cuēchi siquī yā.

³³ Te hora jeē ní cajēhe i jnūhun canu yā, tu ní casáha ndaā i siquī yā jíin jnūhun ndaā, te ni cajehni i ya ini ñayivi yáha.

Te coo cuehē ñayuu candíje nuū yā jeē ma cánda ni ñn ñayuu cahu i ñayuu ún.

Achí.

³⁴ Yūcuán na te ni cahān tēe Etiopía un:

Cava vāha ni ní cachi ni núú ná, ¿ndé síquī cahán tēe ni nacani jnūhun yáha? ¿A síquī maá de chí síquī ínga tēe? áchí de jíin Felipe.

³⁵ Yūcuán na te ni nacani Felipe jnūhun vāha Jesús nuū tēe ún, chi ni quejéé de ni castūhún de jnūhun jeē ní cahu tēe ún, jíin táca gá jnūhun jeē yosó núú tútu yā. ³⁶ Te níni cuángoo de ichi ún te ni jinūcoo de nuū ñūhun ndute, te ni cahān tēe Etiopía:

Yāha ñūhun ndute ¿te á tú cuu cuandute ná? áchí de.

³⁷ Te ni cahān Felipe:

Cuu te núu cándíje ñihin ni ndé jíin ini jíin ánuá ni táca jéé ni sáha Jítoho yō Jesús jehē yō, achí de.

Te ni cahān tēe Etiopía:

Cándíje ná jéē Jesucristo cúu máá Séhe Yaā Dios, achí de.

³⁸ Te ni sáha de jeē na jécuiñī carreta de, te ni nuu ndindúú de cuangoo de ichi véyí núú ñūhun ndute ún, te ni scuándute Felipe tēe Etiopía. ³⁹ Te nuū ní quenda-coo de nuū ndute, te Espíritu maá Jítoho yō ni sáha ya jeē ní ndoñūhún-ni Felipe. Te tēe Etiopía vēsú tuá ni jíto de nuū Felipe, te cúsiñi de cuahān de. ⁴⁰ Te ni nane Felipe ñuu Azoto. Te nácani de jnūhun ndese jnáma ya ñayuu, cuahān de táca ñuu nde ni jinū de Cesarea.

Jeē ní nasāma ini Saulo ni sáha Jesucristo

(Hch. 22.6-16; 26.12-18)

9 Te Saulo chi máni cáhán de jeē cáhni de táca ñayuu cándíje i máá Jítoho yō, te jeē yúcuan ní

jehēn de nuū sutú cujéhnu ga. ² Te ni jicān de carta jeē cahán jeē quihín de táca vehe íi sinagoga ñuu Damasco te cuhni de tēe ñahan jeē cándíje i Jesús, quiiji de jíin i ñuu Jerusalén nuú. ³ Te ni quihin de ichi cuahān de. Te cuacuyajni de ñuu Damasco, te sanaa-ni te ichi ándiví ní stíndéé ñn luz nuū de. ⁴ Te ni cotúú-ni de nuū ñūhun, te ni jini sōho de ñn jnūhun cáhán jíin de:

Saulo, Saulo, ¿najehē jíto xeēn rō ruhū? achí.

⁵ Te ni cahān maá de:

¿Na nihín cúu jeē cahán, Tátā?

Te ni cahān yā jíin de:

Máá rí cúu Jesús, te jeē jíto xeēn rō ñayuu cándíje i ruhū cúu jeē jíto xeēn rō ruhū. Te jeē sáha ró súcuan cúu nájñūhun siquī jeē tu jéndíje tē te jéñú yatá tē xinī pulla, te súcuan stóho tē maá tē, achí yá.

⁶ Te máá de chi quísi i de jeē yūhú de, te ni cahān de:

Tátā, ¿na vé cuní ni jéē sáha ná núu súcuan? áchí de.

Te ni cahān maá Jítoho yō jíin de:

Ndocuiñī, quivi ró ini ñuu, te yúcuan íyó ñn tēe jeē cachi nuū rō na vé cúu jeē cánuú sáha ró, achí yá.

⁷ Te tēe cuangoo jíin Saulo, ni canaa ndasí ni de cájini sōho de ndusu jeē cahán, te tu ní cájito cuiti de nuū jeē cahán un. ⁸ Yūcuán na te ni ndocuiñī Saulo. Te ni nducú de coto de, te tuá cúu coto de, te ni cajñi tēe ún ndaha de ni jinūcoo jíin de nde ini ñuu Damasco. ⁹ Te yúcuan ní condee de unī quivī. Te tu ní cúu cuiti coto de, ni tú na vé ni yéji de, ni tú na vé ni jíhi de.

¹⁰ Te ñuu Damasco néne ñn tēe cándíje, nání de Ananías. Te máá Jítoho yō ni steén ndijin ya maá yá nuū de te ni cahān yā jíin de:

Ananías, achí yá.

Te máá de ni cahān de jíin yá:

Naun ní sáña, Tátā, áchí de.

¹¹ Te ni cahān maá Jítoho yō jíin de:

Quihin ichi te quihín rō calle jeē naní Calle Derecha, te vehe Judas cajñūhun ró ñn tēe nání Saulo ñuu Tarso, chi jicān tahú de. ¹² Te nájñūhun ni jito ndijin de jeē maá ró, Ananías, ni jinū rō, te ni soó ró ndaha ró xínī de, te ni nanune tinúú de, achí yá.

¹³ Yūcuán na te ni cahān Ananías:

Tátā, cuehē ñayuu cácahān jeē tēe yúcuan yōhyo jíto xeēn de ñayuu cándíje i nihín ñuu Jerusalén. ¹⁴ Te vijna ni quee de yāhá, chi sutū cácujeñnu ni catejñíñu de véji de jñi de táca ñayuu cácahān ndahú i jíin ní, achí de.

¹⁵ Te ni cahān maá Jítoho yō jíin de:

Cuáhán, chi máá rí ni nacāji tēe un jéē quihín de nacani de jnūhun ri nuū táca ñayuu nación Israel jíin núú ñayuu táca gá nación nde jíin núú táca rey. ¹⁶ Chi stéén rí nuū de jeē cánuú ndoho de cuehē jñūndóho jeē siquí rí, achí yá.

¹⁷ Yūcuán na te cuahān Ananías. Te ni quivi de ini vehe nuū néne Saulo, te ni soó de ndaha de xinī Saulo, te ni cahān de:

Hermano Saulo, máá Jítoho yō Jesús, Yaā ní quenda ndijin nuū ní ichi jeē véji ní, ni tají yá sáña véji ná núu

ni návāha na nánune t̄inūu ní, te návāha na cúnuú Espíritu Santo yā jíin ní, áchí de.

¹⁸ Te ni nanune-ni t̄inūu Saulo, chi ni nungoo-ni nájnūhun soō chācá ní condihyū t̄inūū de ún. Te ni ndocuiñī de ni jendute de. ¹⁹ Yūcuán na te ni nacaji de staā, te ni nanihīn ni de. Te ni condee de jecu quivī jíin tēe cácanđije jeē cáyūcú ini űuu Damasco.

Jeē ní nacani Saulo jnūhun ini űuu Damasco

²⁰ Te ni quejéé-ni de nácani de jnūhun Jesús ini tācá vehe ī sinagoga, áchí de jeē Jesús cúu Sēhe Yaā Dios.

²¹ Te tāca űáyuu ni cajini sōho jnūhun cáhán de ni canaa ni i, te ni cacahān i:

¿A násūu tēe yáha cúu jeē yóhoyo jíto xeēn de tāca űáyuu Jerusalén jeē cájicān tahu nuū Jesús? Te siquī yūcuan ní quee de yáha jēé cúhni de űáyuu cácanđije, te quihīn de jíin i nuū sutú cácujuhnu núú, áchí i.

²² Te víhyá gā ni nacani Saulo jnūhun ya, te ni steén cají de jeē Jesús cúu Cristo, Yaā ní jeni Yaā Dios jeē jnáma ya yohó. Te tēe hebreo jeē cáyūcú űuu Damasco, tu ní cánihīn de modo cahān de jeē tu íyó ndāā jeē cahán Saulo.

Jeē ni cácu Saulo nuū jnáhan de hebreo

²³ Te ni yáha cuehē quivī. Te jnáhan de hebreo ni casquíjnáhan jnūhun de jeē cáhni de Saulo. ²⁴ Te ni nihīn Saulo jnūhun jeē cándito de nduú űuú tāca yéhyí pared jeē ní condúū ndihyú űuu ún. ²⁵ Yūcuán na te ĩn jecuāā te tēe cácanđije ni caquihin de Saulo, te ini ĩn jica cáhnu ni cascúun de Saulo jicā pared ún, te súcuan ni cācu de.

Jeē ní najinū Saulo űuu Jerusalén

²⁶ Te nuū ní najinū de űuu Jerusalén, te cúní de najnáhan de jíin tēe cácanđije. Te ni cayūhu tēe un ní cajito de Saulo, chi tu ní cácanđije de jeē ní nduu Saulo tēe cácanđije nuū Jesús. ²⁷ Te Bernabé cuahān de jíin Saulo nuū cáyūcu tēe apóstol, te ni nacani de jnūhun nuū tēe ún ndese ni jini Saulo nuū maá Jítóho yō ichi nuū cuahán de, jíin jēé ni cáhān yā jíin de, jíin jēé jéhnun-ni ni nacani de jnūhun Jesús ini űuu Damasco. ²⁸ Te ni condee Saulo űuu Jerusalén ni jica de jíin tāca tēe apóstol. ²⁹ Te jéhnun-ni ni nacani de jnūhun maá Jítóho yō. Te jnáhan űuu de hebreo jeē cácahān yuhu griego, ni castáhān jnáhan jíin de, te maá tēe un cácu ni de cahni de Saulo. ³⁰ Te ni cajini tācá hermano cácanđije, te ni cajendēca de Saulo nde űuu Cesarea. Te yūcuan ní canatají de Saulo cuanuhun de nde űuu de Tarso.

³¹ Te űáyuu cácanđije Jesús jeē cáyūcú Judea jíin Galilea jíin Samaria, tuá ni cájito xeēn űáyuu i. Te ni ije ga i jíin jnúhun ya, te cándiso ĩyo i nuū maá Jítóho yō. Te Espíritu Santo ni chindéé űáhán yá i te ni nducuehē gā i.

Jeē ní nduvāha Eneas

³² Te tāca lado jécondēhe Pedro űáyuu cácanđije, te suni ni jecondēhé de űáyuu cácanđije cáyūcú űuu Lida.

³³ Te yūcuan ní jini de nuū ĩn tēe nání Eneas jeē ní cuu unā cuiyā cáa de chi ni ĩjin de. ³⁴ Te ni cahān Pedro jíin de:

Eneas, Jesucristo cúu Yaā nasávāha ya rohó. Ndocuiñī te natuu rō yuu ró, áchí de.

Te ni ndocuiñī-ni tēe ún. ³⁵ Te tāca űáyuu cáyūcú űuu Lida jíin ndúhvā Sarón ni cajito i jeē ní nacaca Eneas, te ni casquéndōo i tāca jnúhun jeē tu íyó ndāā te ni cácanđije i maá Jítóho yō.

Jeē ní natecu Dorcas

³⁶ Te nde űuu Jope ni ĩyo ĩn űáhan cácanđije, nání űa Tabita, te nuū yúhu griego nání űa Dorcas. Te űáhan yáha máni jniñu váha ni sáha űa, te ni sáha űa caridad ni chindéé űáhán űa űáyuu cúmanī nuū. ³⁷ Te tiempo yūcuan ní quejéé cuéhyī jíin űa, te ni jihī űa. Te ni cascúchi i ndīyi ún, te ni cajequin i ndīyi un ndé ini cuarto xinī véhe. ³⁸ Te yajni íne űuu Lida jíin űuu Jope, te tēe cácanđije űuu Jope ni cajini jnūhun de jeē néne Pedro űuu Lida, te ni catají de uū tēe cuacana de Pedro, te ni cacahān de:

Ma cucuéé ní na quihīn yachī yō űuu Jope, achí de.

³⁹ Yūcuán na te ni quihin Pedro ichi cuahān de jíin tēe ún. Te nuū ni jínū de, te ni cacao tēe un jíin de nde xinī véhe nuū catú ndīyi ún. Te tācá űáhan viuda ni candicó ndúū űa de cándahyū űa, te cástéén űa tācá sahna jíin t̄cāchi jēé ni sáha Dorcas te ni saja űa nde na técu űa. ⁴⁰ Yūcuán na te ni ndacu Pedro jniñu jeē na quéndacoo ndihī űáyuu ún quingoo i nde yatā véhe. Te ni jecuiñī yit̄ de ni jicān tahu de, te ni nandió cóto de nuū catú ndīyi ún, te ni cahān de:

Tabita, ndocuiñī ní, áchí de.

Te maá űa ni ndacoto-ni űa te ni jito űa nuū Pedro, te ni nucōo-ni űa. ⁴¹ Te ni jn̄ de ndaha űa, te ni ndonehen de űa. Yūcuán na te ni nacana de xinī űáyuu cácanđije nde jíin űáhan viuda ni ndīvicoo i, te ni steén de űa nuū i jeē ní natecu űa. ⁴² Te ni jitē jnūhun jniñu yáha n̄ űuu Jope cuahān, te cuehē űáyuu ni cacandije i jnūhun maá Jítóho yō. ⁴³ Te cuehē quivī ni ndōo Pedro ini űuu Jope, néne de vehe ĩn tēe sáha curtir ĩñ, nání de Simón.

Pedro jíin Cornelio

10 Te ini űuu Cesarea ni ĩyo ĩn tēe nání Cornelio, ni cuu de capitán grupo soldado jeē naní Italiano.

² Te cúu de tēe ndíso ĩyo nuū Yaā Dios nde jíin ndihī űáyuu vehe de, te yóhoyo caridad ni tēe cúu de, chi jéhe de xūhun núū űáyuu hebreo cándoho ndáhú, vēsú nasūu tēe hebreo cúu de. Te níní jicān tahu de nuū Yaā Dios. ³ Te ĩn quivī ni steén ndijin yā nuū tēe yáha nájnūhun cahunī jehíni, te ni jito de jeē ĩn ndajéhe

maá Yáa Dios ni quiv̄i ya nuū néne de. Te ni cahān yā jíin de:

Cornelio, achí yá.

⁴ Te máa de ni ndacoto vāha de nuū yā, te ni yūhú de. Te ni cahān de:

¿Na vé cuní ni, Tātā? achí de.

Te ni cahān yā jíin de:

Je chíhi Yāa Dios cuenta jeē jicán tahú rō jíin jéē sáha ró caridad. ⁵ Vijna te tají ró jecu tēe na quíngoo de nde ñuu Jope, quicana de Simón jeē suni nání de Pedro, na quíji de. ⁶ Chi néne núu de vehe tocayo de Simón, tēe sáha curtir ñi, te ndéé vehe ún yajni yumar. Te máa de castūhun núu rō na vé cúu inga jeē cánuú sáhá ró, áchí ndajéhé yā.

⁷ Te ndajéhé yā jeē ni cahān jíin Cornelio, cuahān-ni ya. Te ni cana de uū mozo de jíin ñin soldado jeē yíñúhún núu Yāa Dios, chi cúcáhu ni de jeē squícu vāha tēe ún. ⁸ Te ni nacani ndihi de jnūhun nuū tāca tēe ún, te ni tají de cuangoo nde ñuu Jope.

⁹ Te inga quiv̄i un cájica de ichi cuangoo de, te cuacuyajni de ñuu Jope. Te je yajni cahuxī uū cúu, te suu hora un ní caa Pedro siqūi véhe chi cándaā, te yūcuan cácan tahú de. ¹⁰ Te ni quee sōco chíji de, te ni cuni de caji de staā. Te sáá cásáha ña ndeyu te ni steén ndijin yā nuū de. ¹¹ Te ni jito de jeē núne andiv̄í. Te ni jito de nájnūhun ñin sahma manta jité cáhu te núhni jnáhan ndicúun punta, te ni cuun véji nuū de. ¹² Te chíji un cáñūhun ndinuū quit̄i, tācá quit̄i cúun ndaha jíin táca cóo jíin táca quit̄i cándava. ¹³ Te ni jini sōho de ñin jnūhun ni cahān:

Pedro, ndocuiñ̄i te cahni rō tācá quit̄i jñā, te caji rō t̄i, áchí.

¹⁴ Te ni cahān Pedro:

Ma cáji na, Tātā, chi tu yéji cuīti na táca quit̄i jeē cahán ley ni jéé tú vāha caji na t̄i, chi nájnūhun jeē tu cáh̄yo ndoo t̄i nuū ní, áchí de.

¹⁵ Te ni cahān tucu jnūhun un jíin de:

Achí rí jeē iyó váha caji rō tācá quit̄i jñā, chi ni sándoo ri, te ma cahán maá ró jeē tu cáh̄yo ndoo t̄i, áchí. Te súcuan ni steén caji yá nuū de jeē cúu quih̄n de nuū ñáyuu vésú násūu jnáhan ñuu de hebreo cúu.

¹⁶ Te unī jíinu ni cahān súcuan jíin de. Te sahma un ní ndaa cuanhun andiv̄í. ¹⁷ Te níni nácani ndasí ni Pedro na vé cuní cahān jeē ní jito ndijin de ún, te ni jinūcoo-ni tēe ni tají Cornelio, cácajnūhún de vehe Simón nde ni jinūcoo de yéhyí tēe ún. ¹⁸ Te cácahn̄ jee de cácajnūhún de núu yūcuan ndéé Simón jeē suni nání de Pedro. ¹⁹ Te níni nácani ga ni Pedro siqūi jeē ní jito ndijin de ún, te Espíritu Santo ni cahān yā jíin de:

Ni quecoo unī tēe cánanducú róhó. ²⁰ Ndocuiñ̄i te nanuu ró, te ma cáni ni rō jeē tú vāha quih̄n rō jíin de, vésú nasūu jnáhan ñuu rō hebreo cácuu de, chi máá rí ni tají rí de vējicoo de, áchí yá.

²¹ Yūcuán na te ni nanuu Pedro nuū tēe ni tají Cornelio, te ni cahān de:

Máá ná cúu tēe cánanducú ní. ¿Te na siqūi vējicoo ní nuū na núu súcuan? áchí de.

²² Te ni cacahān mozo un:

Cornelio, tēe cúu capitán, ni tají de sãhá. Te tēe ndaā, tēe ndíso ñyo nuū Yāa Dios cúu de, te tāca ñáyuu hebreo suni cácahn̄ i jeē tēe vāha cúu de. Te ni cahān ñin ndajéhé yā jíin de jeē na cána de níh̄n jéē ní vehe de te chusóhó de jnūhun cahān ni jíin de.

²³ Yūcuán na te ni cahān Pedro jíin mozo un jéē na cúcōo de ini vehe ún, te ni candōo de yūcuán. Te nuū ní cundijin, te ni quihin Pedro ichi cuahān de jíin mozo un. Te suni cuangoo jecu hermano cácañ̄ije ñuu Jope jíin de.

²⁴ Te nde inga quiv̄i ni jinūcoo de ñuu Cesarea. Te Cornelio ndéu de jinūcoo Pedro, chi ni nastútú de tāca jnáhan de jíin táca amigo de jeē quijnáhan vāha ga de jíin. ²⁵ Te nuū ni jínū Pedro jijnáhan de, te ni quenda Cornelio ni cahān de jíin Pedro, te ni jecuiñ̄i yit̄i de jeē chiñúhún de Pedro nuú. ²⁶ Te Pedro ni ndonehen de Cornelio, te ni cahān de:

Ndocuiñ̄i ní, chi sãhá suni ñin tēe-ni cúu ná, áchí de.

²⁷ Te cándajnūhún de ni quiv̄icoo de ini vehe. Te ni jito Pedro jeē cáyūcu cuéhē ñáyuu ini vehe de. ²⁸ Te ni cahān Pedro jíin ñáyuu ún:

Je cájini vāha ni jijnáhan ní jéē ley jeē cánevāha sãhá ñáyuu hebreo, cáhán jeē tú vāha jeē quijnáhan ná jíin ní quiv̄icoo ná vehe ní s̄qūi jeē cúu ní ñáyuu s̄ñin nación. Te Yāa Dios chi ni steén yā nuū na jéē ma cujéé ni na núu ní ñin ñáyuu. ²⁹ Jeē yúcuán cúu jeē vēji-ni ná, chi ni cana ní sãhá, te tu ní sájéé ni ná. Te na cájnūhun ná nih̄n, ¿na siqūi ni cana ní sãhá? áchí Pedro.

³⁰ Yūcuán na te ni cahān Cornelio:

Vijna iyó cúun quiv̄i nájnūhun máá hora yáha jéē cúu cahunī jehíni, te ndite ni ná chi súcuan chíñúhún ná nuū yā, te jicán tahú na ini vehe ná. Te ni quiji ñin ndajéhé yā nuū ná, te ndíndéé sahma ñúhun ya. ³¹ Te ni cahān yā jíin ná: Cornelio, je ni jini sōho Yāa Dios jeē jicán tahú rō, te chíhi ya cuenta jeē sáha ró caridad.

³² Núu súcuan te tají ró mozo na quíngoo de ñuu Jope quicana de Simón jeē suni nání de Pedro, na quíji de nuū rō. Chi tēe un néne de vehe tocayo de Simón, tēe sáha curtir ñi, te yajni yumar ndéé vehe de. Te quee tēe ún te castūhún de nuū rō jnūhun cánuú, áchí yá jíin ná. ³³ Súcuan ni cuu te ni tají-ni ná mozo na cuajēcoo de cana de níh̄n, te na cútahū ná, chi vāha ni sáha ní jéē véji ní. Te vijna ni candutútú ná yāha návāha tāca ná cuni sōho ná ndihi jnūhun Jitoho yō Yāa Dios jeē ni jéhe ya cahān ní, áchí de.

Jeē ní nacani Pedro jnūhun ya vehe Cornelio

³⁴ Yūcuán na te ni cahān Pedro:

Vijna te ni jini vāha ná jéē Yāa Dios inuú-ni sáha ya jíin táca ñáyuu, cúu ñáyuu hebreo jíin ñáyuu tāca gá nación. ³⁵ Chi cúsiñ̄i ni yā jíin ñáyuu tāca-ni nación núu cándíso ñyo i nuū ya te cásáha i jñiñu ndaā. ³⁶ Chi ni

cahān yā jíin ñáyuu Israel jeē ndívicoo tāca ñáyuu nuū jnūhun manī yā jíin i sáha Jesucristo. Te máá yá cúu jítoho tāca yóhó. ³⁷ Máá ní je cájini ní ndese ni cuu. Chi ná ni jínu ni nacani Juan jnūhun jíin jeē ni scuándute de ñayuu, te ni quejéé Jesús nácani ya jnūhun nde Galilea, te ni jité jnūhun un níf cáhnu Judea. ³⁸ Te cájini ni jeē Yaā Dios ni jēhe ya Espiritu Santo jíin poder nuū Jesús, Yaā ní jehnu ñuu Nazaret. Te cájini ni jeē ní jica cuu ya ni sáha ya jniñu vāha, te ni nasávāha ya tāca ñáyuu jeē cándoho i sáha jexeén, chi Yaā Dios ni chindéé ñáhán yá Jesús. ³⁹ Chi máá ná cánacani cájini ná jnūhun tāca jniñu ní cajito ná ní sáha ya níf cáhnu Judea jíin ini ñuu Jerusalén. Yūcuán na te ni cajehni i ya, chi ni cata caa i ya jicā cruz. ⁴⁰ Te Yaā Dios ni nastécu yā maá Jesús nuū uní quivī, te ni ndiji ya nuū na ní cajito ná núu yā ni sáha Yaā Dios. ⁴¹ Te tu ní quíji ya nuū tācá inga ñayuu, chi nuū maá-ni tāca ná jeē jé ni nacāji Yaā Dios sāña jeē nácani ná jnūhun tāca jniñu jeē ní cajito ná. Chi ni cayejí na stāā ni cajihí ná ndute jíin yá ná ni nane ya jeē ní natecu yā. ⁴² Te ni ndacu ya jniñu nuū na jíjnáhan ná jeē na nácani ná jnūhun ya nuū tāca ñáyuu te cahān cají ná jeē maá Yāā Dios ni jeni ya Jesús jeē sándaā yā jniñu ñayuu cátecu jíin ñáyuu ní cajihí. ⁴³ Chi jnūhun Jesús cúu jeē ní cacahān tāca tée ni canacani jnūhun Yaā Dios nde jenahán. Chi ni cacahān de jeē tāca ñáyuu jeē candíje i Jesús, cone cáhnu ni yā nuū cuēchi i, áchí Pedro.

Jeē ni quivī Espiritu Santo ini anuá ñayuu jeē násūū hebreo cácuu

⁴⁴ Te níni cáhán gā Pedro tāca jnūhun yáha te ni quivī-ni Espiritu Santo ini anuá tāca ñáyuu cájini nahín jnūhun ya jeē cahán de. ⁴⁵ Te tēe hebreo jeē ni jíinūcoo jíin Pedro jeē suni cácandíje de Jesús, nahán ní canaa ni de ni cajito de jeē suni ni quivī Espiritu Santo ini anuá ñayuu jeē násūū hebreo cácuu. ⁴⁶ Chi ni cajini sōho de cácahān ñayuu un sīn yuhu, te cácahān i jeē yōhyo cújéhnu Yaā Dios. ⁴⁷ Yūcuán na te ni cahān Pedro:

¿Ndé ñn casi jeē ma cuándute ñayuu yáha? Chi ni quivī Espiritu Santo ini anuá maá i, nájnūhun ni quivī ya ini anuá maá yó, áchí de.

⁴⁸ Te ni cahān de jíin i jeē na cuándute i síquī jeē ní cacandíje i Jesucristo. Yūcuán na te ni cacahān ndahú i jíin Pedro jeē na quéndōo de jecu quivī jíin i.

Jeē ní nacūaha Pedro cuenta nuū ñáyuu cácandíje ini ñuu Jerusalén

11 Te tēe apóstol jíin táca hermano cáyūcú Judea, ni canihín de jnūhun jeē súni ñayuu sīn nación ni cacandíje i jnūhun Yaā Dios. ² Te cuanuhun Pedro ñuu Jerusalén. Te sava tēe hebreo jeē cácandíje de ya ni cacahān de nuū Pedro:

³ ¿Najehē ni condee ní vehe ñayuu jeē násūū ñáyuu nación yó cúu? Te ni yeji ni jíin i, áchí.

⁴ Yūcuán na te ni nacani cájini Pedro jnūhun nuū tée ún ndihí ndese ni cuu síquī tée sīn nación:

⁵ Néne ná ñuu Jope. Te níni jícan tahu na, te ni steén ndijin yā nuū ná, te ni jito ná nájnūhun ñn sahmanita jité cáhnu jeē nuhní jnáhan ndicúún punta, te nde ichi ándiví ní cuun ni quiji nuū ná. ⁶ Te ni jito vāha ná, te ni jini na jeē chíji un cáñūhun quiti cúún ndaha jíin quiti xéén jíin cóo jíin quiti cándava. ⁷ Te ni jini sōho ná ñn jnūhun ni cahān jíin ná: Pedro, ndocuiñí te cahni rō tācá quiti jíin, te caji rō tē, áchí jíni ná. ⁸ Te ni cahān ná: Ma cájini na, Tātā, chí tu yéji cuiti na tāca quiti jeē cahán ley ni jeē tu cáhīyo ndoo tí nuū ní, áchí ná. ⁹ Yūcuán na te jnūhun jeē véji nde ándiví ní cahān tucu jíin ná: Ni sándoo máá rí tē, te ma cahán gā rō jeē tu cáhīyo ndoo tí, áchí jíni ná. ¹⁰ Te uní jínu ni cahān súcuan. Yūcuán na te ni ndaa sahman un cuánuhun ándiví. ¹¹ Te hora un ní jinūcoo uní tēe vehe nuū ni cóndee ná un, cánanducú de sāñá, te ñn jnáhan ñuu de Cesarea ni tají de vējicoo de. ¹² Te máá Espiritu ni cahān yā jíin ná jeē ma cáni ni na jeē tú vāha quihín na jíin de. Te suni iñū hermano yáha ní jengoo jíin ná, te ni quivīcoo ná ini vehe tēe nání Cornelio. ¹³ Te tēe un ní nacani de jnūhun nuū na jíjnáhan ná jeē ní jito de ñn ndajehé Yaā Dios, índichi yā ini vehe de, te ni cahān yā jíin de: Tají ró jecu tēe na quíngoo de ñuu Jope, quicana de Simón jeē suni nání de Pedro, na quíji de. ¹⁴ Te tēe ún cachi de nuū rō ndese jnama Yaā Dios rohó jíin ndihí ñayuu cáyūcú vehe ró, áchí yá. Achí Cornelio jíin ná. ¹⁵ Te nuū ní quejéé ná cahán na, te ni quivī-ni Espiritu Santo ini anuá i jíjnáhan i, nájnūhun ni quivī ya ini anuá maá yó xīhna gā. ¹⁶ Yūcuán na te ni nucūhun ni na jnūhun ni cahān maá jítoho yō: Jendaá jeē maá ndute-ni ni scuándute Juan ñayuu. Te rōhó jíjnáhan ró chí nájnūhun cuandute ró jíin Espiritu Santo, cúu jeē cóndee yā ini anuá rō, achí yá. ¹⁷ Te suni ni jēhe Yaā Dios Espiritu yā nuū maá i nájnūhun ni jēhe ya nuū maá yó jeē cácandíje yó jítoho yō Jesucristo. Núu súcuan zte ndé ñn cúu ná jeē cási ná jniñu jeē sáha Yaā Dios? áchí Pedro.

¹⁸ Súcuan ni cajini sōho de jnūhun yáha, te tuá ni cácahān de nuū Pedro, chí sa suhva ni cacahān de jeē yōhyo cújéhnu Yaā Dios. Te ni cacahān de:

Suni ni jēhe Yaā Dios jnūhun jeē na nácani ni ñayuu tāca gá nación jeē stóo i cuēchi i návāha cotecu i níf cáni núu súcuan, áchí de.

Ñayuu cácandíje ini ñuu Antioquía

¹⁹ Te quivī ní cajehni de Esteban ni quejéé de cájito xeén de ñayuu cácandíje, te jeē yúcuan ní cajitē núu ñayuu un táca ñuu cuango i, te ni jinūcoo i Fenicia jíin Chipre jíin ñuu Antioquía. Te ni canacani i jnūhun vāha ya nuū máni jnáhan hebreo i jeē cáyūcu yúcuan, te tu ní cánacani i jnūhun ya nuū inga ñayuu. ²⁰ Te jecu tēe cácandíje jeē cáyūcu Chipre jíin ñuu Cirene ni jinūcoo de ñuu Antioquía, te suni nuū ñayuu tācá nación jeē tu

cájini i jnūhun ya ni canacani de jnūhun máá Jítóho yō Jesús jeē jnáma ya i. ²¹ Te máá Jítóho yō ni chindéé ñáhán yá de, te cuehē ñayuu ni castóo i jniñu jeē tu iyó ndáa te ni cacandíje i máá Jítóho yō.

²² Te ñayuu cácandíje ini ñuu Jerusalén ni cajini jnūhun i, te ni catajǐ i Bernabé cuahān de nde ñuu Antioquía. ²³ Te nuū ni jínū Bernabé yūcuán, te ni jini de jeē yóhoyo vāha ni sáha Yaā Dios jíin i, te ni cusíñ ndasí ni de. Te ni stihví ni de tāca ñayuu un jéē jíin ini jíin ánuá i na cóndihví ni i squícu vāha i nuū máá Jítóho yō, te ma náyūhú i. ²⁴ Chi tēe vāha cúu Bernabé, te ni cunuú Espírítu Santo jíin de, te cándíje ñihin de. Te ni cacandíje cuehē ñayuu nuū máá Jítóho yō ni sáha de.

²⁵ Yūcuán na te cuahān de nde ñuu Tarso cuanan-ducú de Saulo. Te ni nanihīn jnáhan de jíin Saulo, te ndéca de tēe un ní ndee de ñuu Antioquía. ²⁶ Te ñíñ ñin cuiyā ni candutútú de jíin ñayuu cácandíje yūcuán, te ni castéén de jnūhun ya nuū cuehē ñayuu. Te ñuu Antioquía cúu nuū xíhna ñíhún gá ni caconanǐ ñayuu cristiano síquǐ jeē ní cacandíje i Cristo.

²⁷ Te suni tiempo un ní quendacoo tēe cácanani jnūhun Yaā Dios ñuu Jerusalén cuango de nde ñuu Antioquía. ²⁸ Te ñin jnáhan de jeē nanǐ Agabo ni ndocuiñí nuū hermano cácandíje. Te ni steén Espírítu Santo nuū de, te ni castūhún de jeē cóo ñin jnamā xeēn ñí cáhnu. Te ni cuu jnamā ún ñin parte tiempo jeē ní ndacu Claudio jniñu jeē ní cuu de rey. ²⁹ Yūcuán na te ni candajñūhun tēe cácandíje ñuu Antioquía jeē cuáha ñin ñin de nasaa canda de cuáha de te tajǐ de quihīn cotecu hermano cáyūcú Judea. ³⁰ Te súcuan ni casáha de. Te ni catajǐ de Bernabé jíin Saulo ni cajendēca de nuū tēe jéhnu cándiso jniñu nuū ñayuu cácandíje cáyūcú Judea.

Jeē ní jehni Herodes Jacobo, te ni chune de Pedro vecāa

12 Te suu tiempo un ní quejéé rey Herodes jító xeēn de sava ñayuu cácandíje. ² Te ni ndacu de jniñu jeē jíin espada na cáhni i Jacobo ñani Juan. ³ Te ni jini de jeē ní cacusíñ ni tēe hebreo jeē ni sáha de súcuan, te jeē yúcuan suni ni jññ de Pedro. Te máá quívǐ un ní cuu vico jeē yéji ñayuu pan jeē tu yǐhi levadura. ⁴ Te nuū ní jññ de Pedro, te ni chune de vecāa, te ni jeni de cuūn grupo soldado jeē cóndito Pedro, cuūn cuūn soldado cúu jeē ñin ñin grupo. Chi cúnǐ Herodes jeē na yáha vico un jéé cúu vico pascua te quenehen de Pedro vecāa un stéén de nuū ñayuu cuehē. ⁵ Te súcuan íne Pedro vecāa, te cándito soldado un de. Te ñayuu cácandíje chi ñihin ni cajicān tahú i jehē Pedro nuū Yaā Dios jeē na cácu de.

Jeē ní quenehen Yaā Dios Pedro vecāa

⁶ Te jéni ni Herodes jeē na cundijin ñinga quívǐ te quenehen de Pedro vecāa, te stéén de nuū ñayuu un núu. Te núhni Pedro jíin úu cadena, cátu de quíxi de

mēhñu úu soldado jecuáa ún, te suni cáhīn ga soldado cándito yéhyǐ vecāa ún. ⁷ Te suu jecuáa ún te sanaa-ni te ni jinū ñin ndajéhé máá Jítóho yō, te ni ndindéé ini vecāa. Te ni squíñi ya Pedro, te ni natahū ni de. Te ni cahān yā:

Yachǐ ndocuiñí rō, achí yá.

Te cadena nuhni ndaha de un ní canandajǐ-ni. ⁸ Te ni cahān ndajéhé yā jíin de:

Nacuhni ñihin chíji ró, te nuquñi ró ndjēn rō, achí yá.

Te súcuan ni sáha de. Te ni cahān tucu ndajéhé yā jíin de:

Condii ticāchi ró, te condiquīn rō ruhū na quíhín yō, achí yá.

⁹ Te ni quenda de ndíquin de ya cuahān de jíin yá, te jéni ni de jeē násūu jéndaá cúu jeē sáha ndajéhé yā jíin de, chi jéni ni de jeē ñin jeē ni stéén yā jító ndijin de cúu. ¹⁰ Te ni yáha ya jíin de uū nuū cándito soldado. Te ni jinū yā jíin de yéhyǐ cáa nuū quénda de caca de calle, te yéhyǐ un ní nune ñi-ni máá. Te ni quenda ya jíin de, te ni yáha de ñin calle cuahān de. Yūcuán na te ni cujiyo-ni ndajéhé yā nuū de cuahān yā. ¹¹ Te ni nducájǐ ni Pedro te ni cahān máá ní cahān ñin de:

Vijna te ni jini ndaā rǐ jeē ní tajǐ máá Jítóho rǐ ndajéhé yā ni quiji, te ni jnama ya ruhū nuū Herodes jíin núu tāca ñayuu hebreo jeē cácani i sáha xeēn i jíin rǐ nuú, áchǐ de.

¹² Te nuū ní jini de jeē ni cácu ndije de, te ni quihin de ichi cuahān de vehe María naná Juan jeē suni nánǐ de Marcos. Te yūcuan cáhīn tútu cuehē ñayuu cájicān tahú i jehē Pedro. ¹³ Te cáhán Pedro ni jinū de yéhyǐ fuera, te ñin sūchi síhǐ nánǐ Rode cuahān i jeē cúnǐ i núu ndé ñin cúu jeē cahán. ¹⁴ Te ni nacuni i tachǐ Pedro, te jeē ní cusíñ ni i te tu ní nune i yéhyǐ un, chi ni nandió cóo i te jíinu i ni ndívi i ini cuarto. Te ni castūhún i jeē ní quee Pedro índichi de yéhyǐ fuera. ¹⁵ Te ni cacahān jíin i:

Jeē cahán neé ró, achí.

Te máá i ñihin cáhán i jeē máá de cúu. Yūcuán na te ni cacahān:

Ndajéhé yā jeē ndíto Pedro cúu núu súcuan, áchǐ.

¹⁶ Te víhyá gā cahán Pedro. Yūcuán na te ni canune i yéhyǐ, te ni canacuni i nuū de, te nahán ní canaa ni i cájito i. ¹⁷ Te máá de ni sáha de ndaha de jeē ma cúvaā gā i, te ni castūhún de ndese ni quenehen máá Jítóho yō de vecāa. Te ni cahān de:

Castūhun núu Jacobo jíin núu tāca gá hermano jeē ní quenehen ya ruhū vecāa, áchǐ de.

Te ni quenda de cuahān de ñinga lugar.

¹⁸ Te nuū ní cundijin, te ni cacuvaā teyǐ soldado jeē tuá Pedro. ¹⁹ Te ni ndacu Herodes jniñu jeē na nánducú váha i Pedro. Te tu ní cánanihīn i de, te nuū ní cuu ni stichí de soldado jijnáhan, te ni ndacu de jniñu jeē na cúu. Yūcuán na te ni quenda Herodes Judea cuahān de ñuu Cesarea, te ni condee de yūcuán.

Jeē ni jíhī Herodes

²⁰ Te yōhyo ni quitī ni rey Herodes nuū ñáyuu ñuu Tiro jíin ñuu Sidón. Te ñayuu un ní candajnuhún i jeē inuú-ni quivícoo ndihī i nuū rey un. Te ni casáha i amigo i jíin Blasto, tēe cújéhnū jéjníñu nuū rey un. Te ni cacahān ndahú i jíin de jeē na cáhán ndahú de jíin rey un jéē na ndéē ni de jíin i. Chi nde ñuu maá rey un cájeen i jeē cáyeji i. ²¹ Te ni jeni Herodes ñn quivī. Te ni nucūhun de sahma yíñúhún de, te ni cucōo de mesa nuū ndácu de jniñu, te ni cahān de ñn jnūhun jehū ni cajini sōho i. ²² Te ñayuu un ní caquejéé i cácahān jee i jnūhun yíñúhún jíin de:

Nasūu tēe-ni cúu ní, chi ñn yaā cúu ní, áchí i jíjnáhan i.

²³ Te máá hora un ní sáha-ni ñn ndajéhé máá Jítóho yō jeē ní jññ ñn cuehyī xeēn rey Herodes, te ni cayeji tīndācú de, te ni jíhī de, chi ni sandúxí-ni de máá de te tu ní cáhán de jeē Yaā Dios cúu jeē cújéhnū.

²⁴ Te ni jītē gā jnūhun máá Jítóho yō, te cuehē ndasí ñáyuu ni cacandíje i tācá-ni lugar.

²⁵ Te ni jínu jniñu jeē ní quindeca Bernabé jíin Saulo jeē cótecu ñayuu Judea. Te ni quendacoo de Jerusalén cuanungoo de Antioquía, te cándēca de Juan jeē suni nání de Marcos cuahān jíin de.

Jeē ní caquejéé Bernabé jíin Saulo caca cuu de nacani de jnūhun ya

13 Te mēhñu grupo ñayuu cácaandíje ini ñuu Antioquía ni cahīyo tēe cástéén jíin tēe cácanani jnūhun Yaā Dios, te cánaní de Bernabé, Simón jeē suni nání de Negro, Lucio ñuu Cirene, Saulo, jíin Manaén tēe ni jehnu jíin inga Herodes jeē ní cuu gobernador Galilea. ² Te ñn quivī jeē cáhīyo ndite ni tēe yáha cáchiñúhún de nuū maá Jítóho yō, te ni cahān maá Espiritu Santo jíin de:

Cúní rī jeē sasñín ró Bernabé jíin Saulo na quíngoo de jniñu jeē ní jeni rī de, áchí yá.

³ Yūcuán na te ni cajicān tahú ndite ni de, te ni casoó de ndaha de xinī Bernabé jíin Saulo, te súcuan ni catajī de ndíndúú tēe ún cuanacani de jnūhun nuū tāca ñáyuu.

Jeē ní canacani Bernabé jíin Saulo jnūhun ya nde Chipre

⁴ Te ni sáha Espiritu Santo jeē íchi ñúú Seleucia cuanungoo de. Te yūcuan ní quivícoo de ñn barco cuanungoo de nde Chipre, ñuhun jeē íne sñín nuū ndúte. ⁵ Te ni jinūcoo de ñuu Salamina nuū cájecuññī barco, te ni canacani de jnūhun Yaā Dios ini tācá vehe íi sinagoga jnáhan hebreo de. Te suni cuahān Juan chindéé ñáhán jíin de. ⁶ Te ni cajica nuu de ññī-ni Chipre nde ni jinūcoo de ñuu Pafos jeē suni íne nuū Chipre. Te yūcuan ní cajini de nuū ñn tēe hebreo nání Barjesús. Te tēe tásí cúu de, te cáhán stahú de jeē ñn tēe nácani jnūhun Yaā

Dios cúu de. ⁷ Te tēe tásí un jéjníñu de nuū gobernador Sergio Paulo, te tēe ndíchí cúu gobernador ún. Te ni cana de Bernabé jíin Saulo jeē cúni nahín de jnūhun Yaā Dios. ⁸ Te tēe tásí un suni nání de Elimas. Te ndúcú ndéyí de casi de jeē ma cándíje gobernador ún. ⁹ Te Saulo jeē suni nání de Pablo, ni cunuú Espiritu Santo jíin de, te ni ndacoto vāha de nuū tēe tásí un.

¹⁰ Te ni cahān de:

Tēe sáha jniñu néé stáhú ñáhán cúu ró, chi sēhe jex-eén cúu ró te jési rō nuū tācá jniñu ndaā. Te tu jécuiññī rō jeē sáca núu ró síquī jnūhun ndaā máá Jítóho yō návāha ma candíje ñayuu nuū yā. ¹¹ Te máá Jítóho yō stóho ya rohó vijna, te cucuáá ró jeē ma cóto ga rō niāndii jecu quivī, achí Pablo.

Te ni cunee-ni nuū tēe tásí un, te quéndāha quéhiyú de cuahān de ndúcú de ndé vé jññ ndaha de stéén ichi nuū de quinhun de. ¹² Yūcuán na te ni jini gobernador jeē súcuan ni cuu, te ni candíje de jnūhun máá Jítóho yō, te náā ni de jíni sōho de jnūhun ya.

Jeē ní coyūcu Pablo jíin Bernabé Antioquía ndañúú Pisidia

¹³ Yūcuán na te ni quendacoo Pablo jíin Bernabé jíin Juan ñuu Pafos, te ni quivícoo de barco te cuanungoo de ñuu Perge ndañúú Panfilia. Te yūcuan ní cusñín Juan, te cuanuhun de ñuu Jerusalén. ¹⁴ Te ni quendacoo Pablo jíin Bernabé ñuu Perge cuanungoo de, te ni jinūcoo de ñuu Antioquía ndañúú Pisidia. Te quivī ndétātu ní quivícoo de ini vehe íi sinagoga, te ni cacucōo de.

¹⁵ Te ni cahu tutu ley yā jíin tutu ní catee tēe ni canacani jnūhun ya nde jenahán. Yūcuán na te tēe cácujeñhū ini vehe íi sinagoga, vii-ni ni catajī de tēe cahān jíin Pablo jíin Bernabé:

Amigo, núu íyó jnūhun cahān ni jéē stihví ni ni ñáyuu yáha, te cahān ní na cúni nahín i núu súcuan, áchí de.

¹⁶ Yūcuán na te ni ndocuññī Pablo te ni sáha de seña jíin ndaha de jeē nahín-ni coo ñayuu ún, te ni cahān de:

Níhín jnáhan ñuu yō Israel jíin níhín tēe jeē suni cáchiñúhún ní Yaā Dios, cuni nahín ní jíjnáhan ní.

¹⁷ Máá Yáa Dios yohó ñáyuu Israel, ni nacāji ya jíí yō jíjnáhan de. Te níni jéē cáyūcu tátú de ñuu Egipto, te ni sáha ya jeē ní nducuehē de. Yūcuán na te jíin poder maá yá ni quenehen ya de nación Egipto. ¹⁸ Te uū xico cuiyā ni cajica de nuū ñúhun téhé, te ni jendeyí ni yā jíin de jeē ní caství de. ¹⁹ Te ni snāā yā uxā nación Canaán, te ni jēhe ya ñuhun un núu tāca jíí yō cúu tahú de. ²⁰ Yūcuán na te ni jeni ya tāca tēe ni candacu jniñu nuū de nájnūhun cuñn ciento uū xico uxī cuiyā, nde quivī ní cotecu Samuel, tēe ni nacani jnūhun ya.

²¹ Yūcuán na te máá ñáyuu un ní cajicān i ñn rey, te ni jeni Yaā Dios Saúl ni ndacu de jniñu nuū i uū xico cuiyā. Te yucūn Benjamín sēhe Cis ni cuu Saúl. ²² Te ni quenehen ya jniñu Saúl, te ni jeni ya David ni cuu de

rey nuū i. Te ni cahān cají yá jnūhun de: Cúsī ni rī jíin David sēhe Isaí, chi sáha de tāca jéē cuní rī, achí yá.

²³ Te cāhān gā Pablo:

Te sēhe yucūn David ni cacu Jesús, Yaā ní jeni Yaā Dios jeē jnáma ya yohó ñáyuu Israel, chi súcuan ni jejnūhun ya. ²⁴ Te nde ná tu quejéé Jesús nacani ya jnūhun nuū ñáyuu, te ni nacani Juan jnūhun nuū tāca jnáhan ñuu yō Israel jeē na nácani ni i jeē stóo i cuēchi i, te cuandute i. ²⁵ Te nuū cuácuyajni jeē cúu Juan, te ni cahān de: Cándētu ró jéē quiji Cristo, te jéni ni rō jeē ruhū cúu, te nasūu rí cúu. Chi quiji ya, te cújéhu ndasí yá jeē ni ndijēn yā tu cújéhu ri tava rī, achí de.

²⁶ Amigo jijnáhan ní, tāca níhín jéē cácuu yó sēhe yucūn Abraham jíin táca níhín jéē suni cándiso īyo ní núu Yaā Dios, chi cuní Yaā Dios jeē na cúni yō jnūhun yáha jeē cāhān ndese jnáma ya yohó. ²⁷ Chi tāca ñáyuu ñuu Jerusalén jíin táca téé cácujeéhu nuū i, tu ní cá-jecūhun ni i jeē Jesús cúu Cristo, Yaā ní jeni Yaā Dios jeē jnáma ya yohó. Te ndijnahan quivī ndétātu ní cajini sōho i jnūhun ni cacahu jeē ní catee tēe ni canacani jnūhun Yaā Dios nde jenahán. Te vēsú súcuan te tu ní cájécūhun ni i, te ni candonda i ni cacahān i jeē na cúu yā. Te súcuan ni casquícu i siquī tāca jnúhun jeē ní cacahān tēe ni canacani jnūhun ya nde jenahán. ²⁸ Vēsú tu ní cánihīn i ni ĩn cuēchi siquī yā jeē cúu yā, te ni cacahān nīhin i jíin Pilato jeē na cúu yā. ²⁹ Te ná ni jīnu ni squícu siquī yā tāca jnúhun cāhān nuū tútu ī, te ni casnúu de ya jicā cruz, te ni cachindūji de ya ĩn yaū ní jete jicā cáva. ³⁰ Te ni sáha Yaā Dios jeē ní natecu yā. ³¹ Te ñáyuu Galilea jeē ni jéngoo jíin yá nde Jerusalén nde na técu yā, nuū maá i ni steén ndijin yā maá yá cuehē quivī ná ni natecu yā, te ñáyuu un cácuu jeē cánacani cají jnúhun ya nuū táca gá jnáhan yó hebreo vijna.

³² Te maá ná jijnáhan ná cánacani ná jnúhun vāha yáha núu ni jijnáhan ní jéē súcuan ni jejnūhun ya nuū tāca jíi yō. ³³ Te jnūhun yáha ní squícu Yaā Dios nuū maá yó jeē cácuu yó sēhe yucūn de, chi ni nastécu yā Jesús. Chi suhva cāhān salmo uū jeē cāhān yā jíin Sēhe ya Jesús: Máá ró cúu Sēhe ri, te vijna ni sajeéhu ri rohó jéē cúu ri Tatá rō, achí yá. ³⁴ Te ni nastécu yā Sēhe ya Jesús návāha ma tehyú cuiti yā, chi suhva cāhān tutu ī jeē ni cāhān Yaā Dios nde jenahán: Te nihīn maá ró tāca jéē vāha ni jejnūhun ri nuū David, achí. ³⁵ Te suni súcuan cāhān inga salmo jeē ní tee David jnūhun jeē cāhān Jesús jíin Yāā Dios: Ma cuáha ni jnúhun tehyū ná, chi jéniñū ná núu ní te manī ni jíin ná, achí. ³⁶ Te David chi jíni yō jeē ní jejniñū de nuū ñáyuu ní cotecu de jíin, nájnūhun ni cuni Yaā Dios. Te ni jihī de, te ni quindūji de nájnūhun ni quindūji tāca jíi yō, te ni tehyú de. ³⁷ Te Jesús, Yaā ní nastécu Yaā Dios, chi tu ní téhyú cuiti yā. ³⁸ Jeē yúcuan jíni ñúhún jecūhun ni ní, amigo, jeē Jesús cúu Yaā cóne cāhnu ni nuū tāca cuéchi yó.

³⁹ Chi ni canducú ní ndahva ni cuéchi ní jéē squícu ní ley jeē ni jéhe ya nuū Moisés, te tu ní cúu ndahvā cuéchi ní súcuan. Te Jesús cúu Yaā ndahva ndihī cuéchi ñáyuu jeē cácdíje i tāca jéē ni sáha ya jehē i. ⁴⁰ Núu

súcuan te coto ní jijnáhan ní jéē ma ndóho ní táca castigo jeē ní cacahān tēe ni canacani jnūhun Yaā Dios nde jenahán, chi suhva ni cahān Yaā Dios:

⁴¹ Tāca róhó ñáyuu jeē casácatā, na coto ró na castigo xeēn quiji siquī rō, te naa ni rō coto ró, te cuu rō.

Chi tiempo maá ró te sáha ri jniñu xeēn jeē ma cándíje cuiti rō jeē súcuan sáha ri vēsú nacani ñáyuu jnūhun un núu rō, achí yá. Achí Pablo.

⁴² Te ni quendacoo Pablo jíin táca jnáhan de vehe ī sinagoga jnáhan hebreo de. Te ñáyuu sīn nación ni cacahān ndahú i jíin de jeē inga quivī ndétátú nacani tucu de jnūhun yáha núu i. ⁴³ Te ni jitē ñáyuu un cuángoo i. Te cuehē ñáyuu hebreo jíin ñáyuu sīn nación jeē ní cacandíje sahān hebreo te cáchiñúhún i nuū Yaā Dios, cuangoo i jíin Pablo jíin Bernabé. Te ni cacahān nīhin de jíin i jeē na cuíñi nīhin i jíin jnúhun jeē maní Yaā Dios jíin i.

⁴⁴ Te quivī ndétátú inga semana te je yajni ndihī ñáyuu ñuu un ní candutútú i jeē cúni nahín i jnūhun Yaā Dios. ⁴⁵ Te nuū ní cajini tēe hebreo jeē ní candutútú cuehē ñáyuu, te ni cacucúsún ni de, te ni cacahān de jeē násūu jnúhun vāha cúu jeē steén Pablo, te ni cacahān neé de nuū Pablo. ⁴⁶ Yūcuán na te jéhu-ni ni cacahān Pablo jíin Bernabé, achí de:

Cánuú jéē xíhna gā nuū maá ní jeē cácuu ní jnáhan ñuu yō hebreo nacani ná jnúhun Yaā Dios, te tu ní cá-jetáhú ní. Núu súcuan te cuéchi máá ní cúu jeē ma nihín tahú ni cotecu ni níí cáni. Te vijna te quinacani ná jnúhun ya nuū ñáyuu táca nación jeē tu cájini i jnūhun ya. ⁴⁷ Chi suhva ni ndacu máá Jítóho yō jniñu nuū na jijnáhan ná:

Ni jeni ri rohó jéē cúu ró nájnūhun luz jeē steén ini anuá ñáyuu táca nación,

chi níí ñayīvi steén rō jnūhun ri nuū ñáyuu jeē jnáma ri i, achí yá.

Achí de.

⁴⁸ Te ñáyuu sīn nación, nuū ní cajini sōho i jnūhun yáha te ni cacusiñ teyí ni i. Te ni cacahān i jeē yōhyo vāha jnūhun cúu jnúhun máá Jítóho yō, te tāca ñáyuu jeē ní nacāji Yaā Dios i jeē cótecu i níí cáni, ni cacandíje i. ⁴⁹ Te ni jitē jnūhun máá Jítóho yō cuahān níí región yūcuán. ⁵⁰ Te ñuu Antioquía cáyūcú ñahan cácuu nuū te cáchiñúhún ña Yaā Dios. Te tēe hebreo ni cascáhān de ña, te suni ni cascáhān de tēe cácujeéhu ñuu ún, te ni cajito xeēn i Pablo jíin Bernabé te nde ni cascúnu i de cuangoo de. ⁵¹ Te ni cascóyo de ticachā jehē de jeē steén de jeē iyó cuéchi i. Te ni jinūcoo de ñuu Iconio. ⁵² Te vēsú súcuan te ñáyuu cácdíje un ní cunuú Espíritu Santo jíin i, te cacusiñ teyí ni i.

Jeē ní coyūcu Pablo jíin Bernabé ñuu Iconio

14 Te ñuu Iconio ni quivícoo Pablo jíin Bernabé ini vehe ī sinagoga jnáhan de hebreo. Te jíin

jnūhun jeē ní canacani de te ni cacandíje cuehē jnáhan de hebreo, te suni súcuan cuehē ñayuu sñin nación ni cacandíje i. ² Te jnáhan de hebreo jeē tu ní cacandíje, ni cascáhán de ñayuu sñin nación, te ni cajeni ni i jeē násūu ñayuu váha cácuu ñayuu cacandíje. ³ Te ni caquendōo Pablo jíin Bernabé yūcuan cuéhē gā quiv̄. Te jéhnū-ni ni canacani de jnūhun Jitoho yō, chi cácuáhnu ni de ya jeē váha quih̄in jniñu un sáha ya. Te máá yá chi ni steén yā jeē iyó ndāá jnūhun jeē yóhyo váha ni yā jíin i jeē cánacani de, chi ni jēhe ya jeē sáha de jniñu jéhnū jeē steén jeē cujéhnū ya. ⁴ Te ñayuu ñuu un ní cacusñin ni i jíin náhan i, sava i jíin tée hebreo jeē tu cacandíje de Jesús, te sava ga i jíin tée apóstol. ⁵ Te ñayuu hebreo jíin ñáyuu sñin nación jíin tée cácuu tohō ni casquíjnáhan jnūhun jeē sáha xeñ jíin Pablo jíin Bernabé, jíin jéé cuáha yuū xinī de núu. ⁶ Te ni cajini de jeē súcuan cácuu sáha, te ni cajinu de cuango de nde ñuu Litra jíin ñuu Derbe ndañúu Licaonia jíin táca ñuu yajni yūcuán. ⁷ Te yūcuan ní canacani de jnūhun jeē jnáma ya yohó.

Jeē ní cajēhe i yuū xinī Pablo ini ñuu Litra

⁸ Te ñuu Litra néne ñin tēe jeē tu cúu caca, te tu jíca cuiti de chi nde quiv̄ ní cacu de cácójó de. ⁹ Tēe un ní jini sōho de jnūhun jeē cahán Pablo, te ni jito váha Pablo nuū de, te ni jini de jeē candíje váha tēe un jéé ndúvaha de. ¹⁰ Te ni cahán jee Pablo jíin de:

Ndocuiñ̄, condichi rō, achí de.

Te ni scánda tēe un máá de ni nucōndichi-ni de, te ni quejéé de caca de. ¹¹ Te ni cajini ñayuu ún jniñu jéhnū jeē ní sáha Pablo, te ni cacahán jee i jíin yuhu máá i jeē cúu yuhu Licaonia:

Ni cuun yaā ni quecoo nuū yō, te cájica nájnūhun cájica tēe, achí i.

¹² Te ni cacahán i jeē Bernabé cúu yaā Júpiter, te Pablo cúu yaā Mercurio chi Pablo cúu tēe nácani jnūhun. ¹³ Te yajni yuñúu un néne veñūhun yaā Júpiter. Te máá sūtū jejníñu ini veñūhun un ní quihin de stiqū jíjnáhan t̄i te ni scutú de t̄i ita te vēji de nde nuū quiv̄ i yuñúu, te máá de jíin ñáyuu ñuu un cácuu de cahni de stiqū un sócō de nuū Bernabé jíin Pablo nuū. ¹⁴ Te Bernabé jíin Pablo, tēe cácuu apóstol, ni cajito de jeē súcuan cácuu ñayuu un sáha i, te ni candatá de sah-ma de jeē steén de jeē castívi ndasí i jeē casáha i súcuan. Te ni quenendava de ni quiv̄icoo de mēhñu ñáyuu cuehē ún, te ni cacana jee de:

¹⁵ Tātā jíjnáhan ní, ma sáha cuiti ni súcuan, chi sãñá suni tēe-ni cácuu ná nájnūhun máá ní jíjnáhan ní. Te vējicoo ná nacani ná jnūhun váha Yaā Dios nuū ní, chi cahán na jíin ní jeē ma sáha ga ni táca jniñu yáha jéé tu ndé jéjníñu cuiti, chi sa suhva na chíñúhún ní maá Yáa Dios, Yaā técu, Yaā ni sáha andiv̄i jíin ñáyvi jíin ndute mar jíin táca gá jeē iyó ñéé cáhnu. ¹⁶ Te nde jehán ní jēhe ya jnūhun jeē na sáha táca ñáyuu modo cácuu maá i. ¹⁷ Te vēsú súcuan te níni stēén yā ndese

Yaā cúu ya, chi máni sáha ya jniñu váha jíin yó, chi scúun ya saū, te sáha ya jeē cúu váha itu yō, te jēhe ya jeē jíni ñúhún yó návaha caji yō te coo sñi ni yō, achí ndindúu de.

¹⁸ Te vēsú súcuan ni cacahán de, te yōhyo uhū ni cajesi de nuū ñáyuu un návaha tú socō i stiqū un núu de jeē chíñúhún i ndindúu de.

¹⁹ Yūcuán na te ni quecoo jecu tēe hebreo ñuu Antioquía jíin ñuu Iconio, te ni cascáhán de ñayuu cuehē ún, te ni cajēhe i yuū xinī Pablo. Te ni caquenehen i de yatā ñúu ún, chi ni cajeni ni i jeē jé ni jihī de. ²⁰ Te tēe cacandíje ni cacondúu de Pablo, te ni ndonda Pablo, te ni ndiv̄i de ini ñuu. Te inga quiv̄i ni quihin de ichi cuahán de jíin Bernabé nde ñuu Derbe.

²¹ Te ini ñuu un ní canacani de jnūhun jeē jnáma ya ñayuu, te ni cacandíje cuehē ñayuu ni casáha de. Te ni canandicó de cuanuhun de ñuu Litra jíin ñuu Iconio jíin ñuu Antioquía. ²² Te ni cahije ga ni ñayuu cacandíje yūcuan ní casáha de. Te ni castíhv̄i ni de i jeē na cuíñi n̄hin i jíin jnūhun ya, chi ni cacahán de jeē níni quiji cuehē jnūndóho siqū yō te yūcuán na te jinū yō ñuu nuū ndácu Yaā Dios jniñu. ²³ Te táca ñuu ni cajeni de tēe jéhnū cándiso jníñu condito de ñayuu cacandíje. Te ni cahīyo ndite ni Pablo jíin Bernabé nuū yā, te ni cajicān tahú de, te ni cacahán de jíin máá Jitoho yō jeē na cóto ya ñayuu ún chí cacandíje i máá yá.

Jeē cuánuhun tucu Pablo jíin Bernabé ñuu Antioquía ndañúu Siria

²⁴ Te ni cayāha de cuango de región Pisidia, te ni najinūcoo de región Panfilia. ²⁵ Te ni canacani de jnūhun ya ini ñuu Perge región Panfilia, te sáa te cuango de ñuu Atalia. ²⁶ Te yūcuan ní quiv̄icoo de barco, te ni najinūcoo de ñuu Antioquía. Te ñuu yūcuan cúu nuū ní cajicān tahú ñayuu nuū Yaā Dios jehē de jeē na chíndéé ñáhán yá de jeē quíngoo de nacani de jnūhun. Te ni jinu jniñu, te ni najinūcoo de ñuu ún. ²⁷ Te nuū ní najinūcoo de yūcuán, te ni casáha de junta jíin ñáyuu cacandíje, te ni canacani de jnūhun táca ndese cuehē jeē váha ni sáha Yaā Dios jíin de, chi ni jēhe ya jnūhun jeē suni candíje ñayuu táca nación jeē tu ní cájini i jnūhun ya. ²⁸ Te ni caquendōo de yūcuan cuéhē quiv̄i jíin ñáyuu cacandíje.

Siqū junta ñuu Jerusalén

15 Yūcuán na te jecu tēe Judea ni quijicoo de ñuu Antioquía, te ni castéén de nuū táca hermano jeē núu tu sáha i circuncidar, nájnūhun cáhán ley jeē ní jēhe ya nuū Moisés, te tú na modo cácuu i. ² Te Pablo jíin Bernabé ni catejnáhan de jíin tēe ún, te tu ní cunda. Te jeē yūcuan ní candajnūhún de jeē quíngoo Pablo jíin Bernabé jíin jecu gā tēe cacandíje un ndé ñuu Jerusalén, te yūcuán ndajnūhún de siqū jnūhun yáha jíin tēe cácuu apóstol jíin tēe jéhnū cándiso jníñu nuū ñáyuu cacandíje yūcuán.

³ Te ñayuu cácan díje un ní canachuhun íchí i de. Te ni cayāha de ichi Fenicia jíin Samaria, te cácanani de jnūhun jeē suni ñayuu tāca gá nación jeē tu ní cájini i jnūhun ya, ni castóo i jniñu jeē tu íyó ndāā te ni cacandíje i Yaā Dios. Te yōhyo ni cacusiñ ni tācá hermano jeē ní canihīn de jnūhun jeē súcuan ni cacandíje ñayuu ún.

⁴ Te ni najinūcoo de ñuu Jerusalén, te ñayuu cácan díje yūcuan jíin tée apóstol jíin tée jéhnū cándiso jniñu nuū ñayuu un, ní cacusiñ ni de jeē ní najinūcoo jnáhan de ún. Te Pablo jíin Bernabé ni canacani de tāca jnūhun ndese cuehē jeē váha ni sáha ya siquī jniñu jeē ní canacani de jnūhun ya. ⁵ Te sava tēe grupo fariseo jeē cácan díje ni candocuiñi te ni cacahān:

Ñayuu sñin nación jeē cácan díje i Jesús, jíni ñúhún jéé sáha i circuncidar nájnūhun cásáha máá yó, te cánuú ndacu yó jniñu nuū i jeē na squícu i ley jeē ni jéhe ya nuū Moisés, áchí.

⁶ Te tāca tēe apóstol jíin táca tēe jéhnū cándiso jniñu nuū ñayuu cácan díje, ni candutútú de junta návāha ndajnūhún de te sándaā de siquī jnūhun yáha. ⁷ Te tācá de ni cacahān de ndese cájeni ni de. Yūcuán na te ni ndocuiñi Pedro, te ni cahān de:

Hermano jijnáhan ní, je cájini vāha ni jéé je íyó tiempo jeē ní nacāji Yaā Dios sāña jéé quihín na núú ñayuu sñin nación te nacani ná jnūhun nuū i jeē jnáma ya i, návāha candíje i Jesucristo. ⁸ Te Yaā Dios chi jíini yā ndese cáca ánuá ndíhi ñayuu, te ni steén yā jeē jetáhú yá i, chi suni ni jéhe ya Espiritu Santo nuū i jíináhan i, nájnūhun ni jéhe ya nuū máá yó. ⁹ Te inuú-ni sáha ya jíin yó jíin máá i, chi siquī jeē suni ni cacandíje i jnūhun jeē jnáma ya i, te jeē yūcuan ní sándoo ya anuá i nuū tāca cuéchi i. ¹⁰ Te vijna znaun cácani ní ndacu ní jniñu jeē na squícu i ley un? Chi tu nújnahan ni Yaā Dios jeē súcuan. Chi cácani ní tee ní jniñu yñ yáha síquī ñayuu cácan díje ún, te ni tāca jíi yó tu ní cácan deyí de squícu de, te ni máá yó. ¹¹ Chi sa suhva cácan díje yó jéé jnáma ya yohó súcuan-ni siquī jeē yóhyo vāha ni máá Jítoho yó Jesús jíin yó, te suni súcuan-ni jnáma ya máá i, nasūu síquī jeē squícu i ley un, áchí de.

¹² Yūcuán na te tēe cuehē un ní cacuu nayúu de, te ni cajini nahín de jnūhun cacahān Bernabé jíin Pablo. Chi ni cacastūhún de jeē ni jéhe ya poder jeē ní casáha de tācá jniñu jéhnū jeē steén jeē cujéhnū ya, ni cajito ñayuu tācá nación jeē tu cájini i jnūhun ya. ¹³ Te nuū ni jíinu ni cacahān Pablo jíin Bernabé, te ni cahān Jacobo:

Hermano jijnáhan ní, cuni sōho ní na cáhan na. ¹⁴ Ni nacani Simón Pedro jnūhun ndese ni quejéé nuú jniñu jeē jnáma Yaā Dios ñayuu tācá nación jeē tu cájini i jnūhun ya, chi suni mēhñu máá i nacāji ya ñayuu jeē ndúu i ñayuu máá yá. ¹⁵ Te quíjnahan jnūhun ni cahān de yāha jíin jnūhun ni catee tēe ni canacani jnūhun Yaā Dios nde jenahán jeē yosó núú tútu i:

¹⁶ Achí Yáa Dios:

Nájnūhun ni cotúu vehe David cúu jeē tuá ndácu sēhe yucūn de jniñu, nájnūhun ni ndacu máá de jniñu nde jenahán.

Te ñin quivī te ndee rī te jeē nasáha ri vehe de cúu jeē sáha ri jeē nandacu Sēhe yucūn de jniñu.

¹⁷ Súcuan sáha ri návāha tāca gá ñayuu na nánducú i ruhū

nde jíin ñayuu tācá nación jeē tu cájini jnūhun ri, tācá i jeē cána ri i candíje i ruhū.

¹⁸ Súcuan cáhan maá Jítoho yó, te nde jenahán ní steén yā jnūhun yáha núú ñayuu. Achí tutu i.

¹⁹ Jeē yūcuan jéni ni na jéé ñayuu tāca gá nación jeē ní castóo i jniñu jeē tu íyó ndāā te ni cacandíje i máá Yáa Dios, ma stáhān yó i jeē ndácu yó jniñu jeē squícu i ley Moisés. ²⁰ Chi sa suhva na tēe yó carta quihín nuū i jeē ma cáji i ndeyu jeē ni sócō nuū ídolo, te ma cáca jnéni i, te ma cáji i cūñu quiti jeē jihí jeē tu jéti niñi tñ, te ni ma cáji i niñi. ²¹ Jnūhun yáha-ni tee yó quihín nuū i nájnūhun je cástéén nde jenahán. Chi nde jenahán je íyó tēe cástéén jnūhun ley jeē ni jéhe ya nuū Moisés, te ndijnahan quivī ndétātu cácahu de ley un ini vehe i sinagoga tācá ñuu, áchí Jacobo.

²² Yūcuán na te tēe apóstol, jíin tēe jéhnū cándiso jniñu, jíin ndivii ñayuu cácan díje, ni cacundaā ni de jeē nacāji de tēe quingoo jíin Pablo jíin Bernabé nde ñuu Antioquía. Te tēe ni canacāji de un cácuu Silas jíin Judas, te inga síhví de cúu Barsabás. Te cándiso jniñu de nuū tācá hermano cácan díje. ²³ Te ni cajendēca de carta jeē cáhan suhva:

Máá ná cácuu tēe apóstol, jíin táca tēe jéhnū cándiso jniñu nuū ñayuu cácan díje, jíin táca gá hermano yó. Te cátee ná carta yáha cuájeē nuū ni jíináhan ní, hermano, jeē cácuu ní ñayuu sñin nación jeē cáyūcu ní ñuu Antioquía jíin Siria jíin Cilicia. Cuandeyí ni ni jíináhan ní. ²⁴ Ni cajini jnūhun ná jéé ní quendacoo sava jnáhan ná yáha ní jengoo nuū ní, te jíin jnūhun jeē ní cacahān de te ni casáha jeē ní canacani ndasí ni ní, te ni cacuxí ni ní, chi cándacu de jniñu jeē sáha ní circuncidar jíin jéé squícu ní jniñu cáhan ley jenahán jéé ni jéhe ya nuū Moisés. Te nasūu sāña ní cátají tēe un jéé jeé de nuū ní. ²⁵ Jeē yūcuan ní cajeni ni ná, te inuú-ni ni cacundaā ni ná, te ni nacāji ná tēe cuajēcoo nuū ni jíin úu hermano yó jeē maní yó jíin, cúu Bernabé jíin Pablo. ²⁶ Te ndindúu de je ni catana de máá de nuū jnúndóho vésú na cúu de jeē siquí jnūhun Jítoho yó Jesucristo. ²⁷ Núu súcuan te cátají ná Judas jíin Silas jeē nuū ní, te suni nájnūhun cáhan carta yáha suni súcuan castūhún de nuū ni jíináhan ní. ²⁸ Chi máá Espiritu Santo ni steén yā ñin modo jeē ní cacundaā ni na jéé ma tēe ná táca jniñu yñ ley Moisés siquī ní, chi máá-ni jniñu yáha jéé cánuú gá: ²⁹ Ma cáji ni táca jéé ní casocō nuū ídolo, ni ma cáji ni níñi ni quiti jeē jihí jeē tu jéti niñi tñ, te ma cáca jnéni ní. Te vāha squícu ní núu tuá sáha ní táca jéé yáha. Súcuan na cóo te sánde yí ni ní, áchí carta.

³⁰ Yūcuán na te tēe quingoo un cuángoo de nde ñuu Antioquía. Te ni cacana de xiní ñayuu cácan díje ni can-

dutútú de junta, te ni cajēhe de carta un núū i. ³¹ Te ni cacahu i, te ni candusī ni i jeē ni níhīn i jnūhun ndeyí ni nuū carta ún. ³² Te suni tēe cáncani jnūhun Yaā Dios cácuu Judas jíin Silas, te jíin cuéhē jnūhun ni cacahān de te ni candundeyí ni tēcá hermano un, te ni cahije ga ni i jíin jnúhun ya. ³³ Te ni coyūcú de yūcuán jecu quivī. Yūcuán na te hermano yūcuán ní canacuatáhú i nuū de jeē quinhun de nuū tēe jeē ní catajī de. ³⁴ Te Silas ni nujnahan ni de ni quendōo de yūcuán. ³⁵ Te suni ni caquendōo Pablo jíin Bernabé űuu Antioquía, te máá de jíin sava ga tēe ni castéén de te ni canacani de jnūhun vāha máá Jítóho yō.

Jeē quihín Pablo inga jíinu nacani de jnūhun ya

³⁶ Te ni cuu ga quivī, te ni cahān Pablo jíin Bernabé: Vijna te na quícondēhe yó tēcá hermano yō ndijnahan űuu nuū ní nacani yó jnúhun máá Jítóho yō, na cóndēhe yó ndese cáhīyo i, áchí de.

³⁷ Te Juan jeē suni nání de Marcos, cúní Bernabé jeē quihín tēe un jíin de. ³⁸ Te tu ní cúní Pablo jeē quihín tēe un jíin de, chi nde Panfilia ni cusīn Marcos nuū Pablo jíin Bernabé, chi tuá ni chindéé űáhán de ndíndúú tēe un síquī níñu ya nde saá. ³⁹ Te nahán ní candajnūhun Pablo jíin Bernabé, te tu ní cácondaā ni de síquī Marcos, te ni cacusīn de. Te Bernabé ni jeca de Marcos, te ni quivīcoo de barco cuango de nde Chipre, űuhun jeē íne sīn nuū ndúte. ⁴⁰ Te Pablo ni nacāji de Silas quihín jíin de. Te tēcá hermano cácandíje ni cajicān tahú de nuū máá Jítóho yō jeē síquī jeē váha ni yā te na chindéé űáhán yá Pablo. Te cuahān Silas jíin Pablo. ⁴¹ Te ni cajica cuu de nī Siria jíin Cilicia. Te tēca grupo űayuu cácandíje ni cahije ga ni i jíin jnúhun ya ni casáha de.

Jeē cuahán Timoteo jíin Pablo jíin Silas

16 Yūcuán na te sáá te ni jinū Pablo jíin Silas űuu Derbe jíin űuu Listra. Te yūcuán néne űn tēe suchí cándíje, nání i Timoteo. Sēhe yī űn űahan hebrea cúu i, te űahan cándíje cúu űa. Te tátá i chi tēe griego cúu de. ² Te tēcá hermano űuu Listra jíin űuu Iconio cájejnúhún de Timoteo. ³ Te cúní Pablo condeca de Timoteo quihín de jíin i. Te ni cahān Pablo jeē quihín i cuu i circuncidar, chi tu cúní Pablo jeē cahān űayuu hebreo jeē tu ní squícu Timoteo costumbre un, chi ndihí űayuu cájini i jeē tēe griego cúu tátá i. ⁴ Te tēcá űuu nuū cuángoo de te ni cacastūhún de nuū űayuu cácandíje jeē na squícu i máá níñu jeē ní casándaā tēe apóstol jíin táca tēe jéhu cáyūcú űuu Jerusalén jeē cándīso jníñu nuū űayuu cácandíje. ⁵ Te űayuu cácandíje ni cahije ga ni i. Te ndijnahan quivī ni cacandíje cuehē gā űayuu.

Jeē ní jito ndijin Pablo űn tēe űuu Macedonia

⁶ Te tu ní jéhe Espíritu Santo yā jnūhun jeē nácani de jnūhun ya nī Asia. Jeē yūcuán ní cayāha de ichi Frigia

jíin Galacia cuango de. ⁷ Te ni jinūcoo de nuū quijnáhan Misia jíin Bitinia. Te cácu ni de quingoo de Bitinia, te máá Espíritu Jesús tu ní jéhe ya jnūhun quingoo de. ⁸ Te ni cayāha de űn lado Misia cuango de űuu Troas jeē íne yajni yumar. ⁹ Te űn jecuáa te nájnūhun űn jēni ni jito ndijin Pablo, te ni jito de jeē índichi űn tēe űuu Macedonia nuū de cáhán ndahú jíin de: Nehen ní űuu ná Macedonia te chindéé űáhán ní sāña jíin ná, áchí. ¹⁰ Te súcuán ni jito ndijin de. Yūcuán na te sāña, Lucas, ni quijnáhan ná jíin de. Te ni casátūhva ná jíin de jíin ná de jeē quingoo ná Macedonia, chi ni cajini cají ná jeē maá Yáa Dios tájī yá sāña jíin ná jeē castūhun ná nuū űayuu yūcuán jnúhun jnama ya i.

Jeē ní coyūcu Pablo jíin Silas űuu Filipos

¹¹ Te jíin barco ni quendacoo ná űuu Troas, te cuango ndaā-ni ná ndé Samotracia, űuhun jeē íne sīn nuū ndúte. Te inga quivī ni jinūcoo ná űuu Neápolis. ¹² Te yūcuán ní quendacoo ná, te ni jinūcoo ná űuu Filipos jeē cúu űuu cujéhu ga íne Macedonia, chi máá űayuu űuu Roma ni casáha i űuu i ún. Te ni coyūcu ná űuu Filipos jecu quivī. ¹³ Te űn quivī ndétātu ní quendacoo ná űuu ún, te ni jengoo ná űn yuyúte, chi yūcuán cúu űn lugar nuū cájicān tahú űayuu. Te ni cacucōo ná, te ni canacani ná jnúhun ya nuū tēcá űahan ní canataca yūcuán. ¹⁴ Te űn űa nání Lidia jeē véjī űa űuu Tiatira, xico űa sahma ndihí jēe yáhu ga ndeé. Te máá űa ní ní chíñúhún űa Yaā Dios. Te ni jini sōho űa jnūhun cáncani ná, te máá Jítóho yō Jesús ni sáha ya jeē ní cándíje űa jnūhun jnáma ya űa jeē ni cáhān Pablo. ¹⁵ Te ni jendute űa nde jíin űayuu cáyūcú vehe űa, te ni cahān ndahú űa jíin ná:

Núu cácuáhnu ni ní jēe cándíje ndije ná máá Jítóho yō, te cuajeē ní coyūcu ní vehe ná, áchí űa.

Te ni cana fuerza űa sāña jíin ná.

¹⁶ Te űn quivī te cuango tucu ná suu lugar nuū jéngoo űayuu cájicān tahú. Te ni canajnáhan ná jíin űn sūchi sīhí jēe űuhun tachī ini i, te máá un sáha jeē cahán i tēcá ndese coo te cúndaā jeē cahán i. Te sūchí un ní cajeen patrón i, návāha níhīn de cuehē xūhun síquī jeē cástūhún i nuū űn űayuu ndese coo ichi núu. ¹⁷ Te sūchí un ndíquin i sāña jíin ná cána jee i:

Tēe yáha cájejníñu de nuū Yaā Dios, Yaā cujéhu téyí, te cácastūhún de ndese cácu ní núu cuéchi ní jíin náhan ní, áchí i.

¹⁸ Te cuehē quivī ni cuu súcuán te nde ni jnaniní ni Pablo. Te ni ndió cóto de nuū i, te ni cahān de jíin táchī ún:

Jíin poder maá Jesucristo ndácu ri jniñu nuū rō jeē na quénda ró ini i quihín rō, achí de.

Te hora un ní quenda-ni cuahān.

¹⁹ Yūcuán na te ni cajini patrón i jeē ma níhín gā i xūhún cuu de, te jeē yūcuán ní cajni de Pablo jíin Silas

cuangoo jíin de nde vehe juzgado nuū cáyūcu tóhō.

²⁰ Te ni cajeni ún de nuū juez, tēe cásandaā jniñu, te ni cacahān:

Tēe hebreo cácuu tēe yáha, te cástóna de ñayuu ñuu yō cúvaā i. ²¹ Te cájequin de inga costumbre jeē ma cúu cuatáhú cuiti yō, ni ma cúu sáha yó, chi tu jéhe ley nación yō jñuhun, chi ñayuu nación Roma cácuu yó, áchí.

²² Te suni ni candonda ñayuu siquī Pablo jíin Silas. Te tēe cácuu juez ni candacu de jniñu jeē na quéndá sahma ndíndúú de te cani yujnu siquī de. ²³ Te nuū ni jínu ni cacani téyí un de, te ni casquíví de vecāa. Te ni candacu jniñu nuū tēe ndíto vecāa jeē na cóndito ndasí de jeē ma cácu ndíndúú tēe ún. ²⁴ Te jeē súcuan ni tahū jniñu nuū tēe ndíto vecāa te ni squíví de Pablo jíin Silas nde ichi íni gā, te ni squíví jehē de t̄s̄in yujnu ndéé yaū te ni cajihni de.

²⁵ Te nuū ní cuu sava ñuú, te cájicān tahú Pablo jíin Silas, te cájita de yaa íi nuū maá Yáa Dios. Te ñayuu cáhīn jíin de vecāa un ní cajini nahín i. ²⁶ Te sanaa-ni te ni jñāa nīhin téyí, te nde nuū cimienta vecāa un ní canda. Te ni canune-ni yéhyí vécāa ún, te ni canandajī-ni cadena jeē cánuhnī tāca ñayuu ún. ²⁷ Te ni natahū ni tēe ndíto vecāa, te ni jito de jeē núne yéhyí vécāa ún. Te ni tava de espada jeē cáhni de maá de núú, chi ni jeni ni de jeē ndívii cuiti ñayuu cáhīn vecāa un cuángoo i. ²⁸ Te ni cana jee Pablo:

Ma cáhni ni maá ní, chi cáhīn ndíhi ná, áchí de.

²⁹ Yūcuán na te maá tēe ndíto vecāa ni cana de jeē na quíndeca i ñuhūn, te yachī ni quíví de ini vecāa. Te ni jecuiñī yit̄ de nuū Pablo jíin Silas, te quísi i de jeē yūhū de. ³⁰ Te ni quenehen de Pablo jíin Silas, te ni cajñuhún de:

Tátā, ¿na vé cánuú sáha ná te jnama ya sãñá? áchí de.

³¹ Te ni cacahān de jíin tēe ún:

Candíje ní táca jēē ní sáha Jitoho yō Jesucristo jehē ni te cācu ní, te suni súcuan cācu ndíhi ñayuu cáyūcú vehe ní, áchí de.

³² Te ni canacani de jñuhun maá Jitoho yō nuū tēe un jíin núú táca ñayuu cáyūcú vehe de. ³³ Te suu maá jecuaā yúcuan ní nacate tēe ndíto vecāa un núú ní catujī Pablo jíin Silas jeē ní cacani yujnu siquī de. Yūcuán na te ni jendute de jíin ndíhi ñayuu cáyūcú vehe de. ³⁴ Te ni jeca de Pablo jíin Silas cuahān de jíin vehe de, te ni jēhe de staā ni cayejí de, te cácusī ni ndíhi de vehe de jeē ní cacandíje de Yaā Dios.

³⁵ Te nuū ní cundijin, te tēe cácuu juez ni catajī de policía cuangoo jíin jñuhun jeē na siáá tēe ndíto vecāa un Pablo jíin Silas quingoo de. ³⁶ Te tēe ndíto vecāa un ní castūhún de jñuhun yáha núú Pablo:

Tēe cácuu juez ni catajī de jñuhun vēji jeē na siáá na níhín quíngoo ní. Núu súcuan te quendacoo ní quíhīn ní, te cuandeyí ní ní, áchí de.

³⁷ Te ni cahān Pablo jíin policía:

Cuehē ñayuu ni cajito i jeē ní cacani de sãñá, te ni tu ní cásandaā de xīhna gā núu ndaā jeē iyó cuéchi ná. Te ni cachuhun de sãñá vecāa, vēsú cácuu ná séhe nación Roma, te iyó ley jeē ma cúu sáha súcuan jíin ñayuu cácuu séhe nación Roma. Te vijna ¿á quenehen sãhí de sãña cácuu de naún? Ma cúu cuiti. Na quícoo maá de quenehen de sãña jíin náhan ná, áchí Pablo.

³⁸ Te ni canandíó cóo policía ni castūhún de jñuhun yáha núú tēe cácuu juez, te ni cayūhú de jeē ní cajini sōho de jñuhun jeē séhe nación Roma cácuu Pablo jíin Silas. ³⁹ Te ni quecoo tēe cácuu juez ún, te yōhyo ni cacahān ndahú jíin Pablo jíin Silas jeē na cóne cáhnu ni de. Te ni caquenehen de vecāa ún, te ni cacahān ndahú jíin de jeē na quéndacoo de ñuu un quíngoo de. ⁴⁰ Yūcuán na te ni quendacoo de vecāa, te ni jengoo tucu de vehe Lidia, te ni cacahān de jñuhun ndeyí ni jíin táca hermano. Te ni caquihin de ichi cuangoo de.

Jeē ní cacuvaā ñayuu Tesalónica

17 Te Pablo jíin Silas ni cayāha de ñuu Anfípolis jíin ñuu Apolonia cuangoo de, te ni jinūcoo de ñuu Tesalónica nuū iyó ñin vehe íi sinagoga jnáhan de hebreo. ² Te ni coyūcú de yúcuan únī semana, te tāca quíví ndétātu jéhén Pablo vehe íi sinagoga, nájñuhun sáha sáha de, te ni nacani de jñuhun ya nuū tēe un. ³ Te jíin jñuhun cáhán tutu íi ni steén de jeē súcuan ni jini ñuhún ndoho Cristo jeē cúu yā te natecu yā. Te ni cahān de:

Jñuhun nacani ná núu ni cúu jñuhun Jesús, te maá yá cúu Cristo, Yaā ní jeni Yaā Dios jeē jnáma ya yohó, áchí de.

⁴ Te ni cacandíje sava jnáhan de hebreo jíin cuéhē ñayuu griego jeē cáchiñuhún i Yaā Dios, jíin cuéhē ñahan cácuu nuū, te ni nduu ñnuú ni i jíin Pablo jíin Silas. ⁵ Yūcuán na te yōhyo ni cacucúsún ni jnáhan de hebreo jeē tu cacandíje, te ni castútú tēe cunéé jēé cájica cúxí-ni, te ni quejéé cácana ndee cuangoo. Te súcuan ni casaca núu de xinī ñayuu ñuu ún. Te ni jengoo de vehe Jasón cánanducú de Pablo jíin Silas jeē jñí de tēe un quíndeca de nuū ñayuu cuehē. ⁶ Te tu ní cánanihīn de, te ni cañuhun de Jasón jíin sava ga hermano cuangoo de jíin núú tohó ñuu ún. Te jeē siquí Pablo jíin Silas ni cacana jee de:

Tēe jeē castíví xinī ñayuu ñí ñáyiví, je ni quecoo de nde yáha. ⁷ Te maá Jasón ni jēhe núu vehe cáyūcu tēe ún. Te tēe ún tu cájetáhú de ley maá rey yohó ñayuu Roma, chi sa suhva cacahān de jeē cájetáhú de nuū ñga rey jeē naní Jesús, áchí de jíin náhan de.

⁸ Te ñayuu jíin tēe cácuu tohó ni cajini sōho i jñuhun yáha, te ni cacuvaā i siquī. ⁹ Te Jasón jíin táca gá hermano ni castóo de xūhún de, chi ni cacahān tohó un jíin de jeē nde núu tají de Pablo jíin Silas quingoo de inga ñuu, yūcuán na te nacuaāha tohó un xūhún de. Te

súcuan te ni casiáa de Jasón jíin táca gá hermano cuango de.

Jeë ní coyūcu Pablo jíin Silas ñuu Berea

¹⁰ Yūcuán na te tǎcá hermano un, yachī-ni ni cascáca de Pablo jíin Silas jecuáa un, cuango de nde ñuu Berea. Te nuū ni jíinūcoo de yūcuán, te ni quivīcoo de vehe íi sinagoga jnáhan ñuu de hebreo. ¹¹ Te jnáhan ñuu de hebreo cáyūcu yúcuan, vāha ga ni maá de vēsú jnáhan ñuu de hebreo cáyūcú ñuu Tesalónica, chi vāha ni cacusiñ ni de jíin jnúhun ni cacahān Pablo jíin Silas. Te ndijnahan quivī cānanducú yúcún de nuū tútu íi núu súcuan cáhán chí tuú. ¹² Jeë yúcuan ní cacandíje cuehē jnáhan ñuu de hebreo te suni nde jíin cuéhē ñayuu griego, cúu tēe cúu ñahan cácuu nuū. ¹³ Te jnáhan ñuu de hebreo cáyūcú ñuu Tesalónica ni cajini jnúhun de jeë suni nde ñuu Berea nácani Pablo jnúhun Yaā Dios, te ni caquihin de ichi cuango de Berea, te suni yúcuan ní castóna de ñayuu siquī Pablo. ¹⁴ Yūcuán na te tǎcá hermano ni catajī-ni de Pablo cuahān de nde yumar. Te ni ndōo Silas jíin Timoteo ñuu Berea. ¹⁵ Te jecu hermano ni cajendēca de Pablo nde ñuu Atenas. Te ni cahān Pablo jíin de jeë cahān de jíin Silas jíin Timoteo jeë na quíngoo yachī de nuū Pablo. Te vendicoo de ñuu Berea.

Jeë ni íne Pablo ñuu Atenas

¹⁶ Te níní ndétu Pablo jeë jinūcoo Silas jíin Timoteo nuū de ñuu Atenas, te ni jini de jeë ñayuu ñuu ún yōhyo cáchiñúhún i ídolo, te ni nacani cuíhyá ni de. ¹⁷ Te ini vehe íi sinagoga ni cahān de jnúhun ya jíin jnáhan ñuu de hebreo jíin táca gá tēe cáchiñúhún Yáa Dios. Te suni tǎca quívī ni nacani de jnúhun ya nuū tǎca ñayuu cáhiin nuū yáhu. ¹⁸ Te sava tēe cácuáha jnúhun jeë castéén grupo epicúreo, jíin inga sava tēe cácuáha jnúhun jeë castéén grupo estoico, ni caquejéé cácahān jíin Pablo. Te sava ni cacahān:

¿Na jnúhun cáhán tēe tǎlólhé yāha? áchí.

Te sava ga de ni cacahān:

Tēe nácani jnúhun tǎca yáa jeë tu cánevāha yó cúu de, áchí.

Súcuan ni cacahān de, chi nácani Pablo jnúhun vāha Jesús jeë ní natecu yā mēhñu ndíyī. ¹⁹ Te ni cajeca de Pablo cuango de, te ni jinūcoo de nde lugar nuū naní Areópago nuū cándutútú ñayuu cándacu jniñu, te ni cacahān de:

Cácuuni ná cachi ni núu na jnúhun jeé jēe steén ni.

²⁰ Chi cáhán ni jnúhun jeë ná tu cuni cuítī na jíināhan ná, te jeë yúcuan cácuuni ná jecūhun ni na síquī tǎca jnúhun yáha, áchí jíin de.

²¹ Chi tǎca ñayuu ñuu Atenas jíin táca ñayuu inga ñuu jeë cáyūcu núu i yūcuán, tuá na inga jniñu cácusī gā ni i jíin chí máa-ni jeë cuni nahín i jnúhun jeé chí jēe cáhán i jnúhun jeé.

²² Te índichi Pablo mēhñu ñayuu ní candutútú núu naní Areópago, te ni cahān de:

Tēe ñuu Atenas jijnáhan ní, jíto ná jēe yóhyo cáchiñúhún ní yaā maá ní. ²³ Chi ni jica nuu ná, te ni jecōdēhe ná nuū jeë cáchiñúhún ní, te ni jito ná ñin altar jeë yosó jnúhun yáha: Yāha cúu altar yaā jeë ná tu cuni yō jnúhun ya, achí. Te máa Yáa un jēe cáchiñúhún ní, vēsú ná tu cuni ni jnúhun ya, suu jnúhun Yaā un cúu jeë nácani ná núu ní vijna.

²⁴ 'Chi Yaā un cúu Yaā jeë ni sáha ñayīví jíin táca ndihī jeë iyó, te máa yá cúu Jitoho andivī jíin ñayīví, te tu ndéé yá ini veñūhun cásáha ñayuu. ²⁵ Te ni tu cúmanī ni ñin nuū yā jeë cuáha ñayuu nuū yā, chí máa yá sáha jeë técu ñayuu, jíin jēe stáa i tachī i, jíin jēe nihín i ndihī jeë jíni ñúhún i.

²⁶ 'Te ni sáha ya jeë chíjī ñin-ni yucūn ni tahū tǎca ñayuu jeë ní nduu tǎcá nación, návāha coyūcú i ñí cáhnu ñayīví, te ni tana yā cuiyā cotecu ñayuu jíin lugar coyūcú i jíināhan i. ²⁷ Te súcuan ni sáha ya chí cúnī yā jeë nanducú yó yā, chí núu nanducú yó yā te cuni yō jeë iyó yá, chí yajni-ni cúu ya jíin ñin ñin yó. ²⁸ Chi máa yá sáha jeë iyó yó jíin jēe cátecu yō jíin jēe cáanda yō. Chí suni súcuan ni cacahān sava tēe ñuu ni jēe cátava yaa: Suni nde yucūn maá yá cácuu yó, áchí. ²⁹ Te núu yucūn Yaā Dios cácuu yó, te ma cáni ni yō jeë ídolo oro chí plata chí yúu cúu ya, chí cájeni ni ñayuu jeë súcuan cáa ya, te súcuan cásávāha i ídolo. ³⁰ Te ni jendeyí ni yā síquī jeë tu ní cájecūhun ni i ñí ndé saá, te vijna chí ndácu ya jniñu jeë ñayuu ñí cáhnu ñayīví na nácani ni i jeë stóo i cuēchi i. ³¹ Chi Yaā Dios, je ni jeni ya quivī jeë ndaā sándaā yā síquī ñayuu ñayīví, te ni jeni ya Jesús jeë maá yá sándaā. Te je ni steén cají Yaā Dios nuū tǎca ñayuu jeë maá yá ni jeni Jesús, chí ni nastécu yā Jesús, achí Pablo.

³² Te jeë ní cajini sōho i jnúhun jeë nátecu ndíyī te sava i ni cacahān catá i, te sava ga i ni cacahān i:

Vāha te núu cuu cuni sōho na jnúhun cáhán ni ndé inga jínu, áchí i.

³³ Te ni quenda Pablo mēhñu ñayuu un cuáhān de.

³⁴ Te cuahān jecu ñayuu jíin Pablo, te ni cacandíje. Te ñin de cúu Dionisio, tēe ndútútú jíin tēe cácujuhnu cásáha junta nuū naní Areópago, jíin ñin ñahan naní Dámaris, jíin jecu gā i.

Jeë ni íne Pablo ñuu Corinto

18 Yūcuán na te ni quenda Pablo ñuu Atenas, te cuahān de nde ñuu Corinto. ² Te yúcuan ní jito de nuū ñin jnáhan ñuu de hebreo, naní Aquila, te tēe región Ponto cúu de. Te sáa jecu-ni tiempo ni quee de jíin ñasihí de Priscila jeë ní quenda de Italia, chí rey Claudio ni ndacu de jniñu jeë na quéndacoo tǎca ñayuu hebreo ñuu Roma, jeë cúu capital Italia. Te ni jinū Pablo vehe Aquila jíin Priscila jeë cáyūcú de ñuu Corinto. ³ Te suni jniñu sáha tēe un sáha Pablo, chí cáquīcu de ñin cuu vehe. Te ni quendōo Pablo jíin tēe

ún, te ni casájniñu de. ⁴ Te tāca quívī ndétātu ní jehēn Pablo vehe īi sinagoga ni nacani de jnūhun ya, te ni nducú ndéyí de jeē na cándíje ñayuu jnūhun Jesús, cúu jnáhan ñuu de hebreo jíin ñáyuu tācá nación jeē tu ní cájini i jnūhun ya.

⁵ Te ni jinūcoo Silas jíin Timoteo ñuu Corinto jeē véjicoo de nde Macedonia. Yūcuán na te tuá na inga jniñu ní sáha Pablo, chi máni jnūhun ya nácani cájī de nuū ñáyuu cácuu jnáhan de hebreo, jeē maá Jesús cúu ya Cristo, Yaā jeē cáñūhun ni i quiji ya. ⁶ Te ni caquejéé i ni cacahān i síquī jnūhun ún, te ni cacahān xeēn i nuū Pablo. Te máá de ni caja de sahma de jeē cúu seña jeē stóo de i jíin cuéchi i, te ni cahān de jíin i:

Cuéchi máá ní cúu jeē jnahnū ndetū ni núu súcuan, te nasūu cuéchi máá ná cúu. Nde vijna te quihīn na núu ñáyuu tācá nación jeē tu cájini i jnūhun ya, te nacani ná jnūhun ya nuū i, áchí de.

⁷ Te ni quenda de ini vehe īi sinagoga, te ni jinū de vehe ñn tēe nání Justo ni condee de. Te chíñúhún tēe un Yāā Dios, te vehe tēe un néne yajni xiin véhe īi sinagoga. ⁸ Te Crispo, tēe cújéhnú ini vehe īi sinagoga, ni candíje de máá Jítóho yō nde jíin ndíhi ñayuu vehe de. Te cuehē ñayuu ñuu Corinto ni cajini nahín i jnūhun nácani Pablo, te ni cacandíje i, te ni cajendute i. ⁹ Te ñn jecuáā ni sáha máá Jítóho yō jeē ní jito ndijin Pablo yā ni cahān yā jíin de:

Ma yūhu ró ni ma cásī rō yuhu ró, chi níní nacani ró jnūhun ri. ¹⁰ Chi ndító ri rohó, te ma cúu sáha xeēn ni ñn ñayuu jíin ró. Nacani ró jnūhun ri, chi coo cuehē ñayuu candíje jnūhun ri ñuu yáha, áchí yá.

¹¹ Te ni condee Pablo yūcuán ñn cuiyā yosáva ni steén de jnūhun Yaā Dios nuū ñáyuu ún.

¹² Te ná cúu Galión gobernador Acaya, te ñayuu hebreo jeē cúu jnáhan ñuu Pablo, ñn cáhnu-ni ni candonda i síquī Pablo. Te ni cajeca i de cuangoo i jíin de nde vehe juzgado. ¹³ Te ni cacahān i jíin Galión:

Tēe yáha yōhyo scáhán de tāca ñáyuu jeē inga modo chíñúhún i Yaā Dios, suu ñn modo jeē cúu contra síquī ley, achí i.

¹⁴ Te quejéé Pablo cahān de núú, te ni cahān-ni Galión jíin ñáyuu hebreo un:

Ñayuu hebreo jijnáhan ró, núu ñn cuéchi xeēn cúu, te cánuú cuni nahín rí jnūhun cácahān rō núú. ¹⁵ Te tuú, chi máni síquī jnūhun-ni jíin síquī ley maá ró jíin síquī tēe cástéén cúu. Te na sándaā maá ró síquī jniñu yáha, chi tu sándaā rí síquī maá ñn jeē súcuan-ni, áchí de.

¹⁶ Te ni cahān de nuū i jeē na quíngoo i fuera.

¹⁷ Yūcuán na te ñayuu griego ni cajniñi i Sóstenes, tēe cújéhnú ini vehe īi sinagoga, te máá fuera yehyí vehe juzgado ni cacani i de, te Galión chi tu ní sáha cuiti de cuenta.

Jeē ní najinū Pablo ñuu Antioquía, te cuahān de vuelta unī jeē nacani de jnūhun ya

¹⁸ Te cuehē gā quívī ni condee Pablo ñuu Corinto. Yūcuán na te ni nacuatáhú de nuū tācá hermano yúcuan, te Aquila jíin ñasihí de Priscila cuangoo de jíin Pablo, te ni jinūcoo de ñuu Cencrea. Te yūcuan ní saté ñn Pablo xinī de, te súcuan stéén de jeē squícu de nuū Yaā Dios jeē ni jéjnūhun de. Te ni quívicoo de barco jíin Aquila jíin Priscila quihīn de región Siria. ¹⁹ Te ni jinūcoo de ñuu Efeso, te yūcuan ní caquendōo Aquila jíin Priscila. Te ni jehēn-ni Pablo vehe īi sinagoga, te ni cahān de jnūhun ya jíin jnáhan ñuu de hebreo jeē cándutútú yúcuan. ²⁰ Te ni cacahān ndahú i jíin de jeē na cónēne de jecu gā quívī jíin i, te tu ní jéhe de jnūhun. ²¹ Chi ni nacuatáhú de nuū i, te ni cahān de:

Cánuú jéē nuhūn ná ñuu Jerusalén cone ná vico. Te núu cúní Yaā Dios te ndee tucu ná núú ní, áchí de.

Te ni quenda de ñuu Efeso, te ni quívī de barco cuahān de. ²² Te ni jinū de ñuu Cesarea, te ni jehēn de ñuu Jerusalén. Te nuū ní ndíhi ni cahān de jíin grupo ñayuu cácaandíje yūcuán, te cuanuhun de ñuu Antioquía. ²³ Te ni coyúcú de yūcuán jecu quívī, te sáá te ni quenda tucu de cuahān de ni jica cuu de ñn Galacia jíin Frigia. Te ñayuu cácaandíje ni cahije ga ni i jíin jnūhun ya ni sáha de.

Jeē ní nacani Apolos jnūhun Jesús ñuu Efeso

²⁴ Te ñuu Efeso ni quee ñn tēe hebreo nání Apolos, te tēe ñuu Alejandría cúu de. Te vāha nácani de jnūhun ya, chi vāha jíin de jnūhun jeē cahán tutu īi. ²⁵ Te je ni cutūhva vāha tēe un jíin jnūhun máá Jítóho yō Jesús, vésú jiní de máni máá jnūhun ya jeē ni stéén Juan ná ni scuándute de ñayuu, te ndíhvī ni de stéén cají de jnūhun ya nuū ñáyuu. ²⁶ Te jéhnú-ni ni nacani de jnūhun ya ini vehe īi sinagoga. Te ni cajini sōho Aquila jíin Priscila jnūhun nácani de, te ni cajeca de Apolos cuangoo sñn de, te ni cacastūhun yúcún ndíndúú de jnūhun ya jeē ná tu cuni Apolos. ²⁷ Te cúní Apolos quihīn de nde región Acaya. Te je cácaandíje sava ñayuu yúcuan ní sáha Yaā Dios síquī jeē vāha ni yā. Te tācá hermano ñuu Efeso ni cachindéé ñáhán i de, chi ni catee i carta quihīn de jíin núu ñáyuu cácaandíje cáyūcú Acaya jeē na cuatáhú i Apolos. Te nuū ni jíin de yūcuán, te vāha ni chindéé ñáhán de tāca ñáyuu cácaandíje un jíin jnūhun ya. ²⁸ Te nuū tāca ñáyuu ñuu un ndé jíin jnáhan ñuu de hebreo jeē cáyūcu yúcuan, ní steén cají de ndese cástívi táca jnáhan hebreo de síquī jnūhun ya. Te tu ní cánihīn jnáhan de un jnūhun cahān síquī jeē ni stéén de, chi jíin jéē cahán tutu īi ni steén de jeē Jesús cúu Cristo, Yaā jeē cáñūhun ni de quiji ya.

Jeē ni íne Pablo ñuu Efeso

19 Te níní néne Apolos ñuu Corinto, te ni yāha Pablo ichi síquī ñuu Efeso, te ni nanuu de ni jinū

de máá ñuu ún. Te yūcuan ní nijnáhan de jíin tijní tēe cácanđije. ² Te ni cajñūhún de tēe ún:

¿A ní canihīn ní Espíritu Santo ná ni cacandíje ní, chí ná tuú? áchí de.

Te ni cacahān de jíin Pablo:

Tuú, chí ni ná tu nihīn na jñūhun jeē iyó Espíritu Santo, achí de.

³ Yūcuán na te ni cahān Pablo:

¿Na siquī ni cajendute ní núu súcuan? áchí de.

Te ni cacahān de:

Ni cajendute ná síquī jñūhun ni steén Juan, achí de.

⁴ Te ni cahān Pablo:

Jeē ní scuándute Juan ñayuu cúu jeē ni steén de jeē na nácani ni i jeē stóo i cuēchi i, te ni cahān de jeē na cándije i máá Yáa quiji jeē cúu Cristo Jesús, áchí Pablo.

⁵ Te nuū ní cajini sōho tēe un jñūhun yáha, te ni cajendute de jeē ní cacandíje de máá Jítóho yō Jesús. ⁶ Te ni soó Pablo ndindúú ndaha de xinī tāca tēe ún, te ni quīvī ni Espíritu Santo ini anuá de jíin náhan de, te ni cacahān de sīn sīn yuhu te ni canacani de jñūhun ya.

⁷ Te ni iyo nájnūhun uxī uū jnahán tēe.

⁸ Te unī yoō ni jehēn jehēn Pablo vehe ī sinagoga. Te jéhu ni nacani de jñūhun ya, te ni nducú ndéyí de jeē na cándije ñayuu jñūhun ndese ndácu Yaā Dios jniñu.

⁹ Yūcuán na te sava i ni cacunīhni ni i te tu ní cácanđije i, chí sa ni cacahān neé i siquī jñūhun vāha Yaā Dios jíin ñayuu cántaca. Jeē yūcuan ní cujiyo-ni Pablo nuū ñayuu ún, te ñayuu cácanđije cuango i jíin de. Te ndijnahan quīvī ni steén de nuū ñayuu ún ini escuela ĩn tēe nání Tiranno. ¹⁰ Te súcuan ni sáha de uū cuiyā, te tāca ñayuu cáyūcu Asia, cúu ñayuu hebreo cúu ñayuu tāca gá nación, ni cajini sōho i jñūhun máá Jítóho yō Jesús. ¹¹ Te ni jēhe Yaā Dios poder nuū Pablo jeē sáha de cuehē jniñu jéhu tēyí. ¹² Te nde pañū jíin sahma jeē ní jñi de ni cajengoo jíin núu ñayuu cácuñu, te ni canduvāha-ni i cuehyī cándoho i, te ni quendacoo tachī ini i cuango.

¹³ Te jecu tēe hebreo cájica cuu de jeē quēnehen de tachī ini ñayuu, te ni cajeni siquí ni de jeē suni jíin poder máá Jítóho yō Jesús quēnehen de tachī, te suhva ni cacahān de jíin táca táchī:

Jíin poder Jesús jeē nácani Pablo jñūhun ya, cáhán nīhin ri jíin ró jeē na quēnda ró quíhīn rō, achí de.

¹⁴ Te súcuan ni casáha uxā sēhe yí ĩn tēe hebreo nání Esceva, cúu de ĩn sutū cujéhu. ¹⁵ Te ná ni casáha de, te ni cahān-ni tachī ún:

Je jíin rī Jesús, te suni jíin rī Pablo. Te róhó jíin náhan ró žndé tēe cácuu ró jēe cuatáhu rí rohó? áchí jíin de.

¹⁶ Te tēe ndóho tachī un ní ndonda de, te ni cundeyí de siquī ndihúxá tēe ún. Te ni sáha xeē ndasí de jíin ndé ni catujī te ni cacuvichí ĩni ni quendacoo vehe un ní cajinu cuango. ¹⁷ Te jñūhun yáha ní cajini tāca ñayuu cáyūcú ini ñuu Efeso, cúu ñayuu hebreo cúu ñayuu tāca gá nación, te yōhoyo ni cayūhú i, te ni cacahān i jeē yóhoyo cújéhu máá Jítóho yō Jesús.

¹⁸ Te cuehē ñayuu jeē ní cacandíje ni quiijicoo i nuū Pablo ni nacani ndaā i jñūhun tāca jniñu neé ní casáha i. ¹⁹ Te cuehē i jeē ní casáha jniñu tásí ní jinūcoo i cándiso i tutu i, te ni cajehmu i tutu un jíto nuū tāca ñayuu. Te ni catava i cuenta nasaa ndéé tutu ni cáyū ún, te ni cajini i jeē uú xico uxī mil xūhun plata cúu.

²⁰ Te ni jité jñūhun máá Jítóho yō cuahān, te ndihī ñayuu ni cajini i jeē cujéhu ndasí jñūhun ya.

²¹ Te nuū ní ndihī tāca jniñu yáha, te jéni tēyí ni Pablo jeē quihīn de Macedonia jíin Acaya, te sáa te najinū de ñuu Jerusalén. Te ni cahān de jeē na nájinū de ñuu Jerusalén, yūcuán na te jíini ñūhún quíhīn de nde ñuu Roma. ²² Te uū tēe jeē cáchindéé ñáhán jíin Pablo cúu Timoteo jíin Erasto, te ni scándu de ndindúú tēe yāhá cuángoo de nde Macedonia, te ni quendōo máá de Asia jecu gā quīvī.

Jeē ní cacuvaā ñayuu ñuu Efeso

²³ Te suu quīvī ún yōhoyo ni candonda ñayuu siquī jñūhun ya. ²⁴ Chí ni iyo ĩn tēe sájniñu siquī plata, nání de Demetrio. Te máá de jíin ndihī tēe casájniñu jíin de, cánihīn de cuehē xūhún, chí jíin plata casáha de vehe lulí jēe modo veñūhun ídolo i jeē cúu yaā Diana. ²⁵ Te Demetrio ni nastútú de tēe casájniñu jíin de jíin táca gá tēe jeē suni jniñu yūcuan casáha, te ni cahān de:

Tátā, cájini ni jēe siquí jniñu casáha yó yáha vāha cánihīn yō xūhún. ²⁶ Te cájito ní te cájini sōho ní jēe ĩn tēe nání Pablo chí cáhán de jeē násūu yāá cácuu jeē casáha ñayuu. Te je ni scandíje de cuehē ñayuu, nasūu máá ĩn-ni ñuu Efeso yāhá chí nñí cáhnu Asia. ²⁷ Te quíyūhú ni na jēe cahān ñayuu jeē tu ndé jéjniñu jeē casáha yó. Te sanaa te suni súcuan cahān i coto i máá veñūhun yaā sihí Diana jeē cujéhu, te suni sájéē ni i nuū yaā Diana, te ma cúu ga cujéhu ya vēsú ndivii ñayuu Asia jíin ñayuu nñí cáhnu ñayiví cáchiñūhún i ya vijna, áchí de.

²⁸ Súcuan ni cajini sōho de jñūhun yáha te yōhoyo ni caquītī ni de, te ni cacana jee de:

Cújéhu tēyí Diana, yaā cúu patrona ñuu yō Efeso, achí de.

²⁹ Te ñayuu ñuu Efeso ni cacuvaā i, te ĩn cáhnu-ni ni candonda i ni cajni i Gayo jíin Aristarco cuango i jíin de nde vehe nuū cándutútú ñayuu casáha i junta. Te ndindúú tēe un cácuu tēe Macedonia, te cájica de jíin Pablo. ³⁰ Te cúní Pablo quīvī de nuū ñayuu cuehē un cáhán de jíin i, te ñayuu cácanđije tu ní cájēhe i jñūhun quihīn de. ³¹ Te suni sava tohō jeē cácuu amigo de cáyūcu Asia, ni catajī jñūhun cuahān nuū de, cácahān ndahú jíin de jeē ma quihín de nuū ní cacutútú ñayuu ún. ³² Te ñayuu ní cacutútú un, sava i ni cacana jee i ĩn jñūhun te sava ga i inga jñūhun, te súcuan ni cacuvaā tēyí i, te cuehē i ni tu cájini cuiī i na siquí cúu jeē ní cacutútú i. ³³ Te sava tēe hebreo ni cajeni de ĩn jnáhan de jeē naní Alejandro nuū ñayuu cuehē ún, te ni castūhún de nuū tēe ún na siquí cúu jeē cacuvaā i.

Yūcuán na te Alejandro ni sáha de seña jíin ndaha de jeē na cúnayúú ñáyuu, chi cúní de cahān de jíin i jeē násūu cuéchi tāca ñáyuu hebreo cúu. ³⁴ Te ni canacuni ñayuu un jéē tée hebreo cúu de, te jeē yúcuan ní cacana jee téyí gá i nájñuhun uū hora:

Cújehnu téyí Diana, yaā cúu patrona ñuu yō Efeso, achí i.

³⁵ Yūcuán na te ni cacunahín ñáyuu ni sáha tēe cúu secretario ñuu ún, te ni cahān de:

Níhín ñáyuu ñuu yō Efeso, ndihí ñayuu chi je cájini i jeē cándito vāha yó veñuhun yaā Diana jíin imagen Diana jeē ní ñinga nde andiví. ³⁶ Te ni ñin chi ma cúu cahān jeē tú ndaā jñuhun yáha. Núu súcuan te vāha ga na cásí ní yuhu ní, te ma sáha yachí ní ñin jeē tu ní nacani vāha ni ni síquī. ³⁷ Chi tēe yáha ní caquindeca ní de yāhá vēsú tu ní cásáha de ni ñin cuéchi síquī Diana yō, ni tu ní cácahān ndevāha de ni ñin jñuhun síquī.

³⁸ Te Demetrio jíin táca gá tēe jeē ñin-ni jniñu cásáha jíin de, núu cáculi de cahān de cuéchi síquī ñin tēe, te na quíngoo de nde vehe juzgado nuū cáyūcu juez, tēe cásandaā jniñu, te yūcuán cundaā síquī de jíināhan de. ³⁹ Te núu íyó jñuhun jeē ma cúu cundaā yūcuán, te jíin ñúhún cundaā nuū ñin junta nájñuhun tájñuní ley.

⁴⁰ Chi yúhú ná jeē sanaa te cahān tāca tóhō Roma jeē síquí gobierno de ni candonda yó, chi ma nihín yō jñuhun castūhun yó na síquī cúu jeē ní cacutútú yó ni cacuvaā yō vijna, achí de.

⁴¹ Te nuū ní ndihí ni cahān secretario jñuhun yáha, te ni cajitē ñayuu un cuángoo.

Jeē ni jéhēn Pablo Macedonia jíin Grecia

20 Te ná ni yāha jéē ní cacuvaā ñayuu, te ni cana Pablo ñayuu cáculíje, te ni jeni ichí de i. Te ni cañunundee jñáhan de jíin Pablo jeē ní nacuatáhú de, te cuahān de Macedonia. ² Te ni jica cuu de tācá ñuu yúcuan. Te jíin cuéhē jñuhun ni stíhví ni de tācá hermano cáculíje. Te ni jinū de Grecia. ³ Te ni condee de yúcuan úní yoō. Te je yajni quihín de jíin barco nde Siria nuú, te máá quíví ún te ni nihín de jñuhun jeē jñáhan ñuu de hebreo ni casquijnáhan jñuhun jeē ndonda síquī de ichi nuū quihín de, te jeē yúcuan ní nacani ni de te cuahān tucu de ichi Macedonia. ⁴ Te ni cahíyo sava tēe cájica jíin Pablo, te cánaní de Sópater ñuu Berea, Aristarco jíin tēe nání Segundo nde ñuu Tesalónica, Gayo ñuu Derbe, Tíquico jíin Trófimo nde Asia, jíin Timoteo. ⁵ Te ni cacandu tēe yáha, te cándētu de Pablo jíin sáña, Lucas, nde ñuu Troas. ⁶ Te nuū ni yáha vico jeē cáyeji i pan jeē tu yíhi levadura, te jíin barco ni quendacoo ná ñuu Filipos, te nde nuū uhún quíví te ni canajnáhan ná jíin de nde ñuu Troas. Te ñuu yúcuan ní coyūcu ná uxā quíví.

Jeē ni íne Pablo ñuu Troas

⁷ Te máá quíví domingo ni candutútú ñáyuu cáculíje jeē cáji i pan, nájñuhun ni steén máá Jítoho yō jeē

núcūhun ni yō síquī yā. Te ni steén Pablo jñuhun nuū ñáyuu ún. Te síquī jeē inga quíví un jíin ñúhún quenda de quihín de, te nahán ní nacani de jñuhun nde ni cuñuú. ⁸ Te vehe yósó jñáhan cúu vehe ún. Te nde cuarto xinī nuū ní candutútú ná un ní ñyo cuehē lám-para ni cundijin. ⁹ Te ñin sūchi yíí nání i Eutico, néne i yuhu ventana. Te jeē ní cunahán nacani Pablo jñuhun, te yōhyo jíi i máhná, te ni quixí-ni i. Te nde piso uní un ní ñinga i nde nuū ñúhún. Te je ni jihí i ni candonehen de i. ¹⁰ Yūcuán na te ni nuu Pablo te ni jita ndeyí de ni canehen de i ni ñunundee de i, te ni cahān de:

Ma yūhu ní jíināhan ní, chi ni natecu i, achí de.

¹¹ Te ni ndaa Pablo, te ni yeji de pan jíin i jíināhan i jeē cánucūhun ni de síquī yā. Te nahán gá ni nacani de jñuhun nde cuacundijin. Yūcuán na te ni quenda de cuahān de. ¹² Te Eutico chi íyó vāha i cuanuhun i jíin de jíināhan de, te ndiví ñayuu ún yōhyo cáculíje ni i.

Jeē ní quenda Pablo ñuu Troas cuahān de ñuu Mileto

¹³ Te ni quívicoo ná ini barco cuangoo ná. Te Pablo chi cúní de caca jéhé de, te ni cundaā jeē najnáhan ná jíin de nde ñuu Asón. ¹⁴ Te nuū ní canajnáhan ná jíin de ñuu Asón, te ni quíví de barco te cuangoo ná jíin de nde ñuu Mitilene. ¹⁵ Te yúcuan ní quendacoo tucu ná jíin barco te inga quíví ni jinūcoo ná xiin Quío, ñuhun jeē íne sñin nuū ndúte. Te quíví uní ni jinūcoo ná Samos jeē súni nuū ndúte íne, te ni caquendōo ná Trogilio. Te quíví cuún ni jinūcoo ná ñuu Mileto. ¹⁶ Te tu ní jéngoo ná ñuu Efeso, chi jéni ni Pablo jeē yáha-ni de ñuu un quihín de, návāha ma cucuéé de Asia te naa tiempo nuú, chi núu de jinū yachí de ñuu Jerusalén cone de máá quíví Pentecostés núu na cúu.

Jeē ní jeni ichí Pablo tēe jéhnu cándiso jniñu nuū ñáyuu cáculíje ñuu Efeso

¹⁷ Te ná íne ga Pablo ñuu Mileto, te ni tají de jñuhun cuahān nde ñuu Efeso jeē na quíjicoo tēe jéhnu cándiso jniñu nuū ñáyuu cáculíje yūcuán. ¹⁸ Te nuū ní quecoo tēe ún, te ni cahān de:

Je cájini vāha ní ndese ni jica ndaā na ndé ná ni quee nuú ná Asia te nde vijna. ¹⁹ Chi nñí tiempo jeē ní íne ná jíin ní te nde vijna, jéjñíñu vāha na síquī jñuhun máá Jítoho yō, te tu ní sándúxí ná maá ná. Te íyó jínu ni ndahyū na jéhé ñáyuu. Te ni ndoho ná jnúndóho ni casáha jñáhan ñuu ná hebreo, chi ni casquijnáhan jñuhun i síquī ná. ²⁰ Te cájini ni jéē tu ní táñúhún ná ni ñin, vēsú ndese ga cácahān ñayuu síquī ná, chi ni nacani ná ndihí jñuhun ya jeē quéndōo vāha ní sáha. Te ni steén na jñuhun ya nuū ni jíināhan ní, cúu nuū chítú cúu tācá vehe ní. ²¹ Te ñnuú-ni jñuhun ni nacani ná núu ndihí ní, cúu jñáhan ñuu ná hebreo cúu ñayuu tāca gá nación, chi ni cahān na jéē na nacani ni ni jéē stóo ni cuéchi ní te na cáculíje ní máá Jítoho yō Jesucristo. ²² Te vijna chi ñúhún ichí ná quihín ná ñuu Jerusalén, chi stíhví ni Espíritu Santo sáña quihín ná.

Te tu jíni ná ndese ga coo jíin ná yūcuán. ²³ Te íyó ñn jeē jíni na, cúu jeē chune i sãñá vecãa te quiji jnũndóho siquĩ ná, chi Espíritu Santo súcuan cáhãn jíin ná ndijnahan ñuu nuũ jíca ná. ²⁴ Te ni tu sãha ná cuenta vêsú na cáhni i sãñá, chi jeē cuní na cúu jeē na sínu vãha ná jniñu jeē ní tee máá Jítóho yō Jesús siquĩ ná, te súcuan cusĩ ni ná. Te jniñu un cúu jeē nácani ná jnúhun vãha ya nuũ tãca ñáyuu ndese vãha ni Yaã Dios jíin yó.

²⁵ Te je ni jica cuu ná, ní nacani ná jnúhun ya nuũ ní ndese ndácu Yaã Dios jniñu. Te vijna chi jíni na jéē ni ñn ní ma najnáhan ga yō nuũ ñáyivi yáha. ²⁶ Jeē yúcuan cástũhun cájí ná nuũ ni jíinahan ní vijna jeē násũu cuéchi ná cúu núu ndé ñn ní stávi. ²⁷ Chi ni nacani ná núu ní ndihí jnúhun Yaã Dios jeē ni sãndaã yã ndese coo, te tu ní quendõo ni ñn jnúhun. ²⁸ Núu súcuan te coto vãha ní máá ní jíin ndihí ñayuu cácañdije, chi Espíritu Santo ni jeni ya nihín jéē cóndito ní ñáyuu máá Jítóho yō, chi ni nacuaan ya i jíin níñi yã. ²⁹ Chi jeē quihín na te jíni na jéē quijicoo tēe cástáhú quívicoo mēhñu ní, te nducú de snãã de jnúhun ni cajetáhú ñáyuu cácañdije, te xeēn sãha jnúhun stáhú de nájnũhun xeēn sãha yihĩ jeē cájehni tĩ lanchi. ³⁰ Te suni nuũ grupo maá ní quejéé sava de cahãn de jnúhun stáhú, te stáhú de sava ñayuu cácañdije jeē na cóndiquĩn i jnúhun stáhú stéén de. ³¹ Jeē yúcuan condito ní jéē ma cóo súcuan. Te ma náã ni ni jéē uní cuiyã ndiquivĩ ndíñuu ni condihvĩ ndasĩ ni na ndé ndahyú na jéhē ni, ní jeni ichí ná ñn ñn ní jíinahan ní.

³² Te vijna, hermano, jícan tahú na núu Yaã Dios jeē coto ya nihín. Chi jnúhun jeē váha ni yã ndíso poder sãha jeē ije ga ni jíin, te suu sãha jeē ñn quivĩ te cuãha ya tahú jeē ndujéhu luu ní ndé jíin ndihí ñayuu ní nacãji ya jeē cóo ndoo coo iĩ i nuũ yã. ³³ Tu ní nducú ná jeē nihín na xúhun chí sahma nuũ ní ñn i. ³⁴ Chi je cájini vãha ni jéē sa suhva ni sãjniñu nihin ná návãha nihin na jéē cótecu na ndé jíin táca tēe cájica jíin ná. ³⁵ Te níni ní steén na núu ni jéē súcuan jíni níñuhún sãjniñu yó návãha nihin yō jeē cuãha yó núu ñayuu cúmanĩ nuũ. Te ma náã ni ni jnúhun jeē ni cáhãn máá Jítóho yō Jesús, chí suhva ni cahãn yã: Ndetũ gã quendõo yó jéē cuãha yó vêsú jeē nihín yō, achí yá. Achí Pablo.

³⁶ Te ni ndihí ni cahãn de tãca jnúhun yáha, te ni jecuiñĩ yitĩ de, te ni jícan tahú de jíin ndihí tēe ún. ³⁷ Yūcuán na te ndihí de ni cajecunundee jnáhan de jíin Pablo ni catechũhú de jeē cánacuatáhú de, te ni candahyũ de. ³⁸ Chi cácuuihyá ndasĩ ni de jíin jnúhun ni cahãn Pablo jeē ma ndácoto jnáhan ga de. Te cuangoo-ni de jíin Pablo nde núu iin barco.

Jeē cuánuhun Pablo ñuu Jerusalén

21 Yūcuán na te ni caquendõo tãca hermano ñuu Efeso, te ni quívicoo ná barco, te cuangoo ndaã-ni ná ndé Cos. Te inga quivĩ ni jinũcoo ná Rodas, te yúcuan ní quendacoo ná te ni jinũcoo ná ñuu Pá-

tara. ² Te ni cane ñn barco jeē quihín Fenicia, te ni quívicoo ná cuángoo ná. ³ Te nuũ ní cajito ná núu Chipre jeē íne sñn nuũ ndúte, te ni quendõo ichi lado jecó barco, chi ni cayãha ná cuángoo ná nde Siria. Te ni jinũcoo ná ñuu Tiro, chi yúcuan ndóo jeē ndíso barco ún. ⁴ Te ni jenanducú ná ñayuu cácañdije, te ni caquendõo ná jíin i uxã quivĩ. Te máá Espíritu Santo ni steén nuũ i jeē quíji jnũndóho siquĩ Pablo ñuu Jerusalén, te jeē yúcuan ní cacahãn i jíin de jeē ma quihín de. ⁵ Te ni yãha uxã quivĩ ún, te ni quendacoo ná. Te tãca tēe cácañdije jíin ñasĩhĩ de jíin séhe de ni cachuhun ichí de sãña ní jengoo de jíin ná nde yatã ñũũ, te ni cajecuiñĩ yitĩ ná jíin de yumar te ni cajicãn tahú na. ⁶ Te ni cañunundee jnáhan ná ní canacuatáhú ná yūcuán, te ni quívicoo ná barco cuangoo ná. Te ni canandió cóo de cuangoo de vehe de.

⁷ Te ni quendacoo ná ñuu Tiro cuangoo ná jíin barco, te ni jinũcoo ná ñuu Tolemaida ni quendacoo ná ini barco. Te yúcuan ní jengoo ná ní cacahãn na jíin táca hermano, te ni caquendõo ná jíin de ñn quivĩ. ⁸ Te inga quivĩ un ní cajica jéhé ná jíin Pablo, te ni jinũcoo ná ñuu Cesarea, te ni quívicoo ná vehe Felipe, tēe nacani jnúhun vãha ya. Tēe un cúu jnáhan jeē ndihúxá tēe jeē ní casaja staã nuũ ñáhan viuda. Te ni caquendõo ná jíin de. ⁹ Te tēe un íyó cúun séhe síhĩ de jeē cáhıyo máá i, te cánacani i jnúhun Yaã Dios. ¹⁰ Te ni coyũcu ná yūcuán tijni quivĩ. Te ichi Judea ni quiji ñn tēe nacani jnúhun Yaã Dios, nání de Agabo. ¹¹ Te ni quee de nuũ ná. Te ni quihin de sanchíi Pablo, te ni jihni de ndaha de jíin jéhē de, te ni cahãn de:

Suhva cáhãn Espíritu Santo. Jnáhan yó hebreo súcuan cuhni i tēe chíi sanchíi yáha ini ñuu Jerusalén, te nastúu i de nuũ ñáyuu sñn nación, áchí de.

¹² Te jeē ní cajini sõho na jnúhun yáha te máá ná jíin táca tēe cácañdije cáyucú ñuu Cesarea ni cacahãn ndahú ná jíin Pablo jeē ma quihín de ñuu Jerusalén.

¹³ Yūcuán na te ni cahãn Pablo:

¿Najehē cándahyũ ni jíinahan ní, te casáha ní jéē cu-cuíhyá ni ná? Chi sãñá je íyó túhva ná jéē násũu máá jéē cónuhni ná ini ñuu Jerusalén, chí suni jeē vêsú na cúu na jéē siquĩ máá Jítóho yō Jesús, áchí de.

¹⁴ Te jeē tu ní cúu cuiĩ casicoo ná, yūcuán na te sa suhva ni cacahãn ná:

Na cóo ndese cuní máá Jítóho yō nuu súcuan, áchí ná.

¹⁵ Yúcuan na te sáã te ni casátũhva ná, te cuangoo ná ñuu Jerusalén. ¹⁶ Te suni jecu tēe ñuu Cesarea jeē cácañdije cuangoo de jíin ná. Suni cuahãn ñn tēe Chipre nání de Mnasón, te je ni cuu cuehē cuiyã candije de. Te ná ni jinũcoo ná ñuu Jerusalén, te ni cacoyũcu ná vehe de.

Jeē ni jécondēhe Pablo Jacobo

¹⁷ Te nuũ ni jinũcoo ná ñuu Jerusalén, te hermano cáyucú ñuu ún yõhyo ni cacusiñi de jeē ni jinũcoo ná.

¹⁸ Te inga quiv̄i un ní cajengoo ná jíjnáhan ná jíin Pablo vehe Jacobo, te yūcuan ní candutútú táca tēe jéhnū cándiso jniñū nuū ñáyuu cácañdije. ¹⁹ Te Pablo ni sáha de saludar tēe ún jíjnáhan de. Yūcuán na te ni castūhún de ndih̄i jniñū ní sáha Yaā Dios ná ni nacani de jnūhun ya nuū ñáyuu tācá nación jeē tu cájini i jnūhun ya. ²⁰ Te ni cajini sōho de jnūhun yáha, te ni cacahān de jeē yóhoyo cújéhnū Yaā Dios. Te ni cacahān de jíin Pablo:

Hermano, vijna te jíní ni náa cuehē mil jnáhan ñuu yō hebreo ni cacandije i Jesús, te cácahān nīhin i jeē cánuú squícu yó ley jeē ni jéhe ya nuū Moisés. ²¹ Te ni canih̄in i jnūhun cácahān jeē stív̄i ní steén ni núú tāca jnáhan yó ñáyuu hebreo cáyūcu jíca i tāca gá nación, chi ni steén ni núú i jeē ma cuatáhú gá i nuū ley Moisés, ni ma sáha ga i circuncidar sēhe i, ni ma cuatáhú gá i tāca gá jeē tajnúni jenahán. ²² ¿Nde se sáha ní núú súcuan? Chi cuni ñayuu un jēē ní ndee ní te cutútú cuéhē i. ²³ Suhva sáha ní núú súcuan. Yáha íyó cúūn tēe jeē ní cajejnūhun de ñin jeē squícu de nuū Yaā Dios. ²⁴ Cueca ní tēe yáha quih̄in ni jíin de templo, te cuchi ní nasándoo ní máá ní jíin de nuū yā, te cuaan ní jeē socó de nuū Yaā Dios jijnáhan de. Yūcuán na te cuu sāté de xin̄i de, te suu stéén jeē ní casquícu de ndih̄i jeē ní cajejnūhun de nuū yā. Yūcuán na te cuni ndih̄i ñayuu jeē tú ndaā tāca jnūhun ni cajini sōho i siqūi ní, chi coto i jeē suni máá ní sa squícu ní ley yā. ²⁵ Te ñayuu tācá nación jeē násūu ñáyuu hebreo cácuu i te ni cacandije i ya, je ni catee ná carta cuahān nuū i jeē tu cánuú squícu i ley un, chi máá-ni jeē ma cáji i cūñu jeē ni sóco nuū ídolo ni niñ̄i ni quit̄i jeē jih̄i jeē tu jéti niñ̄i t̄i, te ni ma cáca jnéni i, áchí de.

Jeē ní cajniñ de Pablo ini templo

²⁶ Yūcuán na te ni jeca Pablo tēe ún, te inga quiv̄i un ní cajichi de ni canasándoo de máá de nuū yā. Te ni quiv̄i Pablo ini templo ni cachi de nuū sutú na quiv̄i jíinu jeē nasándoo tēe un máá de nuū yā, te quindecá de quit̄i jeē socó de nuū yā.

²⁷ Yūcuán na te cácuu de jeē sínu de ndih̄ixá quiv̄i jeē cándundoo de nuū yā, te sava jnáhan hebreo de jeē véjicoo Asia ni cajini de jeē íne Pablo ini templo, te ni cascáhán de ndih̄i ñayuu, te ni cajniñ i Pablo. ²⁸ Te ni cacana jee i:

Tēe ñuu yō Israel, cuāha núú ní ndaha jíjnáhan ní na jniñ̄i yó tēe yáha. Chi máá de cúu tēe jíca cuu n̄i cáhnu stéén de nuū tāca ñáyuu, te cáhán de siqūi nación yō jíin síqūi ley jeē ni jéhe ya nuū Moisés jíin síqūi templo yáha. Te suni je ni quiv̄icoo de jíin jecu tēe griego ini templo i yāhá, te súcuan stív̄i de jnūhun i jeē cahán jeē ma cúu quiv̄i ñayuu ini templo te núu nasūu ñáyuu hebreo cúu i, áchí.

²⁹ Chi nde na íne Pablo ini ñuu un ní cajini tēe hebreo jeē jíca de jíin Trófimo, tēe ñuu Efeso jeē násūu hebreo

cúu de, te cájeni ni de jeē ni quiv̄i tēe un jíin Pablo ini templo.

³⁰ Te ndih̄i ñayuu ñuu un ní cuvaā, te ni cacutútú-ni i, te ni cajniñ i Pablo, te ni castáa i de ni quenehen i de ini templo un, te ni canacasi-ni i yéhyí. ³¹ Te ni cacuni i cahni i de núú. Te general, tēe cújéhnū nuū ndih̄i soldado, ni nih̄in de jnūhun jeē ndih̄i ñayuu ñuu Jerusalén ni candonda i cácuvaā i. ³² Te ni jeca general tācá soldado jíin capitán, te cájino de cuango de nde nuū cáh̄in ñayuu cuehē ún. Te ná ni cajito ñayuu jeē ni jíinūcoo general jíin soldado, te ni cajecuiñ̄i i jeē cácani i Pablo. ³³ Yūcuán na te ni quiv̄i general mēh̄ñu ñáyuu, te ni jniñ̄i de Pablo, te ni ndacu de jniñu jeē conuhn̄i de jíin úū cadena. Yūcuán na te ni cajnūhún general ndé tēe cúu Pablo te na cuēchi ni sáha de. ³⁴ Te ni cacana ñayuu cuehē ún, sava i ñin jnūhun te sava ga i inga jnūhun, te tu ní cúu cuni de na cuēchi ni sáha Pablo, chi cácuvaā i. Te ni ndacu de jniñu cuahān Pablo nde cuartel. ³⁵ Te nuū ni jíinū Pablo escalera cuartel ún, te soldado ni cajniñ de Pablo cándiso de siqūi jeē cácani ñayuu ún jniñ̄i i Pablo sáha xeēn i jíin de. ³⁶ Chi ndih̄i i v̄ejicoo i ichi yátá soldado, te cácana jee i:

Cahni ni tēe jíñá, achí i.

Jeē ni cáhán Pablo jehē maá de nuū ñáyuu

³⁷ Te cásquiv̄i de Pablo ini cuartel nuú, te jíin jnūhun griego ni cahān Pablo jíin general:

¿A cuáha ni jnūhun cahān ná ñin jnūhun jíin ní? achí de.

Te ni cahān general jíin de:

Te jíin rō cahán rō yuhu griego jeē súcuan. ³⁸ Núu súcuan te nasūu rōhó cúu tēe Egipto jeē jé ni cuu quiv̄i ni ndonda siqūi gobierno te ni quenehen cuūn mil tēe jéhni ndiȳi cuango jíin de nde nuū ñūhun téhé, áchí.

³⁹ Yūcuán na te ni cahān Pablo:

Tuú, chi tēe hebreo cúu ná, te ni cacu ná ñuu Tarso, ñin ñuu jeē cújéhnū ndañū Cilicia. Te quiñūhun ni ni cuáha ní jnūhun na cáhán na jíin ñáyuu yáha jíjnáhan i, áchí de.

⁴⁰ Te general ni jēhe de jnūhun jeē cahān de. Te ni jecodichi Pablo nuū escalera, te ni sáha de seña jíin ndaha de jeē na cúu nayúú ñáyuu ún. Te nuū ní cuu nayúú-ni i, te jíin jnūhun yuhu ñūú de hebreo ni cahān de:

22 Ndiñi níhín jeē cácuu ní jnáhan ñuu yō jíin ndih̄i níhín jeē cácujeñu ní núú ñūú yō, cuni sōho ní jnūhun cahān na jéhe maá ná, achí de.

² Te ni cajini sōho i jeē cahán Pablo yuhu hebreo jeē cúu yuhu ñūú i, te víhyá gā ni cacunahín i. Te ni cahān Pablo:

³ Máá ná cúu jnáhan ñuu yō hebreo, te ni cacu ná ini ñuu Tarso ndañū Cilicia. Te ini ñuu Jerusalén yáha ní jehnu ná, te ni cutūhva ná núú Gamaliel, te ni steén de nuū ná ndih̄i siqūi ley jeē ni jéhe ya nuū jíi yō. Te nde jíin ini jíin ánuá na ní nducú ndéyí ná squícu ná súcuan

nuū Yaā Dios, nájnuhun cásáha máá ní vijna. ⁴ Te ni jito xeēn na ñáyyu cándíje i jnūhun Jesús te nde cuní na jéē na cúū ndíhi i núú. Chi cúū tēe cúū ñahan ni jñi ná ni chuhun ná vecāa. ⁵ Te sutū cujéhu ga jíin táca tēe jéhu cándiso jñíhu nuū ñúū yō, cácuu de testigo jeē súcuan ni sáha ná, te suni máá de ni cajēhe de tijní carta cuahān na jíin jéē cuáha na núū tāca jnáhan yó cáyucú ñuu Damasco. Chi cuahān ná ñuu un jéē jñi ná ñáyyu cándíje i Jesús te quindeca ná i ñuu Jerusalén yāha, návāha ndoho i núú.

Jeē ní cachi Pablo ndese ni sama ya de

(Hch. 9.1-19; 26.12-18)

⁶ Te ni quihin ná ichi cuahān ná, te cuacuyajni ná ñuu Damasco, te nájnuhun caxū cúū. Te ichi ándiví ní quiiji ñn nduva ní ndindēē ndaxín núū ná. ⁷ Te ni cotúú-ni ná núū ñúhun, te ni jini sōho ná ñn jnūhun cáhán jíin ná: Saulo, Saulo, ¿najehe jito xeēn rō ruhū? achí. ⁸ Yūcuán na te ni cahān ná: ¿Na nihín cúū jeē cahán, Tātā? achí ná. Te ni cahān yā jíin ná: Máá rí cúū Jesús jeē ní jehnu ñuu Nazaret, te jeē jíto xeēn rō ñáyyu cándíje i ruhū cúū jeē jíto xeēn rō ruhū, achí yá. ⁹ Te tēe cuango jíin ná ni cajini ndije de jeē ndíndēē, te ni cayūhú de, te tu ní cájini sōho de ndese ni cahān yā jíin ná. ¹⁰ Yūcuán na te ni cahān ná: Tātā, ¿na vé cuní ni jéē sáha ná? achí ná. Te ni cahān máá Jítóho yō jíin ná: Ndocuñí te quihín rō ñuu Damasco, te yūcuan íyó ñn tēe jeē cachi nuū rō na vé cúū jeē cánuú sáha ró, achí yá jíin ná. ¹¹ Te jeē ní ndindēē un ní sacuaá núū ná, te tēe cuango jíin ná un ní cajini de ndaha ná cuango de jíin ná ní jinūcoo ná ndé ñuu Damasco.

¹² Te yūcuan ní condee ñn tēe nání Ananías, te tāca jnáhan yó hebreo yūcuan cácahān jeē tēe vāha cúū Ananías, chi vāha squícu de ley jeē ni jéhe ya nuū Moisés. ¹³ Te ni quee tēe un núū néne ná, te ni cahān de jíin ná: Hermano Saulo, na ndúndijin tinūu ní, achí de. Te ni ndundijin-ni tinūu ná, te ni jito ná núū de. ¹⁴ Te ni cahān Ananías: Máá Yáa Dios táca jíi yō, je ni nacāji ya nihín návāha cuni ní na vé cuní yā jeē sáha ní, te coto ní núū máá Cristo, Yaā ndaā, te cuni sōho ni jnúhun jeē cahán yā. ¹⁵ Te nacani ní jnúhun ya nuū ndivii ñáyyu tāca jéē ní jito ní jíin jéē ní jini sōho ní. ¹⁶ Ma cúhuun ni ní núú súcuan. Ndocuñí ní, te cuandute ní te cahān ndahú ní jíin máá Jítóho yō, návāha nacate ya anuá ni núú cuéchi, achí de jíin ná.

Jeē ní cachi Pablo ndese ni tají Yaā Dios de nuū ñáyyu táca gá nación

¹⁷ Te ni nandió cóo na ní ndee ná ñuu Jerusalén. Te jícán tahu na ini templo, te ni sáha máá Jítóho yō jeē ní jito ndijin ná. ¹⁸ Te ni jini na núū yā ni cahān yā jíin ná: Yachí quenda ró ñuu Jerusalén yāhá, chi ma cuatáhu ñáyyu yáha jéē nacani ró jnúhun ri nuū i, achí yá. ¹⁹ Te ni cahān na jíin yá: Tuú, chi cuatáhu i, Tātā, chi je cájini

i jeē ni quívi ná ndijnahan vehe i sinagoga ni jñi ná táca ñáyyu cándíje i nihín, te ni cani ná i, te ni chuhun ná i vecāa. ²⁰ Te je cájini i jeē quívi ní cajehni i Esteban, tēe ni nacani cájini jnúhun ní, suni ni indichi na yúcuán, te ni jejnúhún ná jeē na cúū de, chi ni condito ná sahma tēe ni cajehni Esteban, áchí ná jíin yá. ²¹ Te ni cahān yā jíin ná: Cuáhán, chi máá rí tají rí rohó quíhín jicá ró nde nuū ñáyyu táca nación jeē tu cájini i jnūhun ri, achí yá jíin ná. Achí Pablo.

Jeē ni íne Pablo nuū general

²² Te tāca ñáyyu ún vāha-ni ni cajini sōho i te nde jnūhun sandíhi yáha jéē ní tají yá de nuū ñáyyu táca gá nación. Yūcuán na te ni cacuvaā i, te ni cacahān jee i:

Na cúū tēe jíiá, chi tú vāha jeē cótecu gā de, achí i.

²³ Te súcuan cácana jee i, te ni cascádoó i ticachí i, te ni cascánda i ticachā. Te súcuan cástéén i jeē cáquiti xeēn ni i. ²⁴ Te ni ndacu general jniñu jeē na quívi Pablo ini cuartel, te ni cahān de jeē na stíchí soldado Pablo nde jíin cuarta ñi, návāha cunjúní ni general na síquí cúū jeē ní candonda ñáyyu un síquí de. ²⁵ Te ni cajihni de Pablo návāha súcuan te cani de. Te ni cahān Pablo jíin capitán jeē índichi tūhva:

¿A jéhe ley jnūhun jeē cani ní cuarta tēe cúū sēhe nación Roma núu ná tu sándaá ní núu íyó cuéchi de? achí de.

²⁶ Te ni jini sōho capitán jnūhun yáha, te ni jecahān jíin general:

Coto vāha ní jéē ma stívi ní sáha ní jíin tēe yáha, chi cúū de sēhe nación Roma, achí.

²⁷ Yūcuán na te ni jinū general nuū Pablo, te ni cajnūhún de:

Cachi núu jendaá cúū jeē sēhe nación Roma cúu ró, achí.

Te ni cahān Pablo:

Suu cúū ndije ná, achí de.

²⁸ Te ni cahān general:

Ruhū chi nde jeē ni jéhe ri cuehē xūhún te ni nduu ri sēhe nación Roma, achí.

Te ni cahān Pablo:

Te sáhá chi nde quívi ní cacu ná cúū ná sēhe nación yō Roma, achí de.

²⁹ Yūcuán na te tāca tēe jeē cácuni cani Pablo nuú, ni cacujiyo-ni cuango, te suni nde general ni yūhú de, chi ni stívi de jeē ní jihni de Pablo, chi tu íyó vāha sáha súcuan jíin sēhe nación Roma.

Jeē ni índichi Pablo nuū junta cujéhu ga jnáhan ñuu de hebreo

³⁰ Te inga quívi un cúní general cundaā vāha ni de na síquí cúū jeē ní candonda tēe hebreo síquí Pablo. Te ni ndají de cadena jeē nuhni Pablo, te ni ndacu de jniñu ni cacutútú táca sūtú cácujuhnu jíin táca tēe cásáha

junta kujéhu ga, te ni quenehen de Pablo, te ni jeni de nuū tée ni candutútú un.

23 Yūcuán na te ni ndacoto Pablo nuū tée ni candutútú junta un, te ni cahān de:

Tátā jijnáhan ní, nífí ndé vijna vāha íyó ni anuá na jéé tú na cuēchi ná, jíto jínúu Yaā Dios, áchí de.

² Yūcuán na te Ananías, sutū kujéhu ga, ni cahān jíin tée cáhīn yajni nuū de jeē na cátu maá yuhu de. ³ Te ni cahān Pablo jíin sūtū kujéhu ga ún:

Yaā Dios stóho ya nihín chi tēe stáhú-ni cúu ní, chi néne ní jéé sándaā ni núu ni stívi ná ley yā, ¿te naun stívi maá ní ley jeē ndácu ní jniñu jeē cáni de sãñá? áchí de.

⁴ Te ni cacahān tēe cáhīn nuū de ún:

¿Naun cáhán rō súcuán jíin sūtū kujéhu ga? Chi nuū Yaā Dios jejníñu de, áchí jíin de.

⁵ Te ni cahān Pablo:

Tátā jijnáhan ní, tu ní jíiní na jéé sutú kujéhu ga cúu de, chi núu ní jíiní na te ma cahán na súcuán núu, chi yósó núu tútu íi jeē ni cáhán yā jeē ma cahán neé yó coto yó táca tēe cácujehu nuū yō, áchí Pablo.

⁶ Te nuū ní jini Pablo jeē sava de cácuu grupo saduceo te sava ga de cácuu grupo fariseo, te ni cahān jee de:

Tátā jijnáhan ní, maá ná cúu ñn jnáhan grupo fariseo, te suni súcuán ní ñyo tátā na. Chi suni maá ná ññuhun ni na jéé nastécu yā ndíyí, te síquí yúcuán cúu jeē cácahān ni cuéchi síquí ná, áchí de.

⁷ Te jeē súcuán ni cahān de te ni cacusíñ ni tēe junta jeē cácuu grupo fariseo jíin grupo saduceo, te ni cacahān ññin. ⁸ Chi cácahān tēe grupo saduceo jeē ma nátecu ndíyí, ni tu cáhíyo ndajéhé yā ni ánuá, te tēe grupo fariseo cájeñuhún de ndíñuní jnúhun yáha. ⁹ Te yōhyo ni cuvaā. Te sava tēe cástéén jnúhun cáhán tutu ley yā jeē cácuu jnáhan grupo fariseo, ni candocuñí de, te ni cacahān de:

Tú ni ñn cuéchi cánihīn na síquí tēe yáha. Sanaa te ni cahān ndije ñn ánuá jíin de chí ñn ndajéhé yā. Ma sánñni ni yō nuū Yaā Dios nuu súcuán, áchí.

¹⁰ Te yōhyo ni catejñáhan, te yúhú general jeē quende i chiyō Pablo, te ni ndacu de jniñu jeē na quívi soldado te quenehen de Pablo sava mēhñú i, te na ndívi de ini cuartel.

¹¹ Te jecuáā un ní quee-ni maá Jítoho yō nuū de, te ni cahān yā jíin de:

Pablo, cuandeyí ni rō, chi nájnūhun ni nacani ró jnúhun ri ini ñnuu Jerusalén yāhá, suni súcuán nacani nahín ró jnúhun ri ini ñnuu Roma, achí yá.

Jeē ní casquíjñáhan jnúhun cahni Pablo

¹² Te nuū ní cundijin te ni cacutútú sava ñayuu hebreo, te ni casquíjñáhan jnúhun, te ni cacahān teyí i jeē ma cáji cuiñi i ni ñn ni ma cóho cuiñi i nde núu tu cahni i Pablo. ¹³ Te víhyá gā uū xico tēe hebreo ni cacahān teyí jnúhun yáha. ¹⁴ Te ni jengoo nuū sutú cácu-

jéhu jíin núu tēe jéhu cándiso jniñu nuū ñayuu hebreo, te ni cacahān jíin tēe ún:

Ni cacahān teyí ná jeē ma cáji cuiñi ná ni ñn níni nde ná tu cahni na Pablo. ¹⁵ Núu súcuán te maá ní jijnáhan ní jíin táca gá tēe casáha junta kujéhu ga, cuacáhān ni jíin general jeē quenehen de Pablo na jéé de nuū junta sajnē, chi cachi ni jéé cácuñi ni stíchí vāha ga ní de. Te maá ná jijnáhan ná cotūhva ná cahni ná de nde ná tu quee de nuū cáhīn tútu ní, achí.

¹⁶ Te sēhe yíñ cuáha Pablo ni nihín i jnúhun jeē súcuán ni cacahān, te ni jehēn i cuartel, te ni castūhún i nuū Pablo. ¹⁷ Te ni cana Pablo xiní ñn jnáhan capitán, te ni cahān de:

Condeca ní súchi yáha quíhīn ni jíin i nuū general, chi íyó ñn jnúhun castūhún i nuū de, áchí de.

¹⁸ Te capitán un ní jeca de i cuahān i jíin de nuū general, te ni cahān de:

Pablo, tēe íne vecāa, ni cana de sãñá, te ni cahān de jíin ná jeē quíndeca ná súchi yáha núu ní, chi íyó ñn jnúhun cahān i jíin ní, áchí de.

¹⁹ Te ni jññ general ndaha i cuahān de jíin i ñn lado, te yuhu-ni ni cajñuhún de i:

Na jnúhun cúní rō cahān rō jíin rí, áchí de.

²⁰ Te ni cahān i:

Tēe hebreo ni casquíjñáhan jnúhun de jeē cahān ndahú de jíin ní quenehen ní Pablo sajnē quíhīn de nuū táca tēe casáha junta kujéhu ga, chi cahān-ni de jíin ní jeē cácuñi de jeē stíchí vāha ga de Pablo. ²¹ Te ma cuáha ni jnúhun, chi víhyá gā uū xico de cándētu sãhí de ichi, te ni cacahān teyí de jeē ma cáji cuiñi de ni ñn ni ma cóho cuiñi de nde núu tú cahni de Pablo, te vija je cándētu tūhva de jeē cuáha ni jnúhun quíhīn Pablo nuū junta, áchí i.

²² Te ni cahān general jíin i jeē ma cáchi i nuū ní ñn ñayuu jeē ni cáhān i jnúhun yáha jíin de, te ni tají de i cuanuhun i.

Jeē ní tají general Pablo cuahān de nuū Félix, tēe cúu gobernador

²³ Yūcuán na te ni cana general uū capitán de, te ni ndacu de jniñu jeē sátūhva de uū ciento soldado cájica jéhé jíin úní xico uxí jeē cáyósó caballo jíin úu ciento jeē cándāha lanza, chi cahññ jecuáā ún quendacoo de jíin Pablo quingoo de nde ñnuu Cesarea. ²⁴ Te suni ni ndacu de jniñu jeē coo tūhva caballo jeē cóso Pablo, te condito vāha soldado un Pablo quingoo de nde nuū Félix, tēe cúu gobernador. ²⁵ Te ni tee de ñn carta jeē cahán jnúhun yáha:

²⁶ Maá ná cúu Claudio Lisias, te tēe ná carta yáha cuájeē nuū ní, señor Félix, gobernador kujéhu. Ndese tahū cúu ní. ²⁷ Ñayuu hebreo ni cajññ i tēe yáha, te je yajni cahni i de núu, te ni jnama ná de jíin soldado, chi ni jini na jéé séhe nación Roma cúu de. ²⁸ Te ni jendeca ná de nuū junta maá i jijnáhan i jeē sándaā i núu na cuéchi ni sáha de. ²⁹ Te ni jini na jéé síquí ley maá i cúu

cuēchi cácahān i siquī de, te tu níhín na ni ñn cuēchi siquī de jeē cúu de ni jeē cóne de vecāa. ³⁰ Te ni nihín na jnúhun jeē sava tēe hebreo ni casquiñáhan jnúhun de jeē cahni de tēe yáha, te jeē yúcuan cúu jeē yachī ni tají ná de cuajeē de nuū ní. Te suni je ni cahān na jíin ñáyuu cájicān cuēchi siquī de jecoo i nuū ní, te jiñā cahān i jíin ní na cuēchi ni sáha de. Je ni cahān yō, achí carta.

³¹ Te ni cajeca ñuú-ni soldado Pablo cuango jín de nde ñuu Antípatris, nájnūhun ni tahū jniñu nuū de. ³² Te inga quivī ni canandió cóo-ni soldado cájica jéhé cuánungoo nde cuartel, te soldado cáyōsó caballo cuango de jíin Pablo. ³³ Te ni jinūcoo ñuu Cesarea, te ni cachihi carta ndaha gobernador, te suni ni cajeni Pablo nuū de. ³⁴ Te ni cahu gobernador carta un. Te ni cajnūhún de ndé ñuu cúu Pablo, te ni jini de jeē tēe ndañū Cilicia cúu Pablo. ³⁵ Te ni cahān de:

Nde na quécoo tēe cájequin cuēchi siquī rō te cuni nahín rí jnúhun cahān rō, áchí de.

Te ni cahān de jeē na quíndihyū Pablo ini palacio ndīyi Herodes.

Jeē ni cáhān Pablo jehē maá de nuū Félix

24 Te nuū uhún quivī te Ananías, sutū cujéhu ga, ni quee de ñuu ún. Te suni ni quecoo sava tēe jéhu cándiso jniñu nuū jnáhan ñuu de hebreo jíin ñn tēe cúu abogado, nání de Tértulo. Te ni quívicoo de nuū gobernador jeē cahān de cuēchi siquī Pablo. ² Te ni cana gobernador Pablo ni quee de. Te ni quejé Tértulo cahān de cuēchi siquī Pablo, chi suhva ni cahān de jíin Félix:

Tátā gobernador, siquī jeē cúu ní tóhō jeē váha ndíchí ndácu ní jniñu, te jeē yúcuan tú na jnúhun cáje-jnáhan iyó, chi cáyūcu váha yó. ³ Te na cútahū ná, chi táca quívī váha cúu táca núu ndácu ní jniñu jeē váha sáha ní, tátā Félix. ⁴ Te tu cúní na snáa na cuéhē tiempo ni, te cáhān ndahú ná jíin ní cuni nahín ní jecu-ni jnúhun cahān na jíin ní. ⁵ Chi ni cajini na tēe yáha jéē cúu de ñn tēe tíxín, te sáha de jeē cánacuajnáhan maá jnáhan ñuu ná hebreo ññ cáhnu-ni táca lado, te cúu de tēe cújéhu nuū ñáyuu cascuáha jnúhun tēe nání Jesús jeē ní jehnu ñuu Nazaret. ⁶ Te suni je ndúcu de jeē stívi de táca jniñu ini templo ñ, te ni cajñí ná de. Te cáculi na sándaā na síquī de núu, nájnūhun cáhān ley ñuu ná. ⁷ Te ni jinū-ni general Lisias, te ni quende fuerza de tēe yáha núu na jíin ná. ⁸ Te ni ndacu de jniñu jeē táca ná jeē cácahān na cuéchi siquī tēe yáha quijicoo ná ndé nuū ní. Te vijna cuu stíchí maá ní de, te jíin jnúhun cahān maá de te cuni ni jéē ni sáha de cuēchi jeē cácahān na jíin ní, áchí Tértulo.

⁹ Te suni ni cacahān tēe hebreo jeē ni jinūcoo jíin de jeē iyó ndáā jeē súcuan cúu cuēchi Pablo. ¹⁰ Yūcuán na te ni sáha gobernador seña nuū Pablo jeē na cáhān de, te ni cahān Pablo:

Je jíin na jéē cuehē cuiyā cúu ní gobernador ñuu yáha, te jeē yúcuan nújahan ni na jéē sándaā ni síquī ná. ¹¹ Chi máá ní cuu nanducú ní te cuni ni jéē sáá máá úxī uū quivī ni cuu jeē ni jéhēn ná ñuu Jerusalén jeē chiñúhún ná Yaā Dios. ¹² Te tu ní stáhān jnáhan ná jíin ni ñn ñayuu, ni tu ní stóna ná ñáyuu ini templo ni ini vehe ñ sinagoga ni ini maá ñuu. ¹³ Ni tú na jíin stéen de jeē iyó ndáā jnúhun cácahān de siquī ná. ¹⁴ Te jnúhun cáhān cají ná jíin ní cúu jeē chiñúhún ná Yaā Dios táca jíi na, te suu cúu jeē chiñúhún ná maá Jesucristo, te máá jnúhun yáha-ni cúu jeē cácahān de jeē stívi ná. Te cándíje ná táca jnúhun yósó núu tútu ley yā jíin núu tútu jeē ní catee tēe ni canacani jnúhun ya nde jenahán. ¹⁵ Te ñnuú ñúhun ni na jíin de jeē sáha Yaā Dios jeē nátecu táca ndíyi, cúu ñayuu ní casáha váha jíin ñáyuu ní casáha néé. ¹⁶ Te jeē yúcuan máni jeē váha ndíhví ni na sáha ná. Súcuan te váha iyó ni anuá na jéē tú na cuēchi ndéé siquī na núu Yaā Dios ni nuū ñáyuu.

¹⁷ Te ni jica cuu ná táca ñuu jicá jecu cuiyā, te sáá te ni ndee na jíin xúhun jéē ní cajēhe táca ñáyuu jeē chindéé ñáhán i jnáhan ñuu na cáyūcu Jerusalén. Te suni ni ndee na jéē socó na quití nuū Yaā Dios. ¹⁸ Te íne ná ini templo siquī jeē cuchi ná ndundoo ná núu Yaā Dios te socó ná. Te jecu jnáhan ñuu ná hebreo jeē véjicoo Asia ni cajito de sáñá ini templo, te tú na ñayuu cuehē ni cóyūcu jíin ná jeē sávaā í. ¹⁹ Te núu ni stívi ná zte naun tu ní quíjicoo tēe Asia un návāha suni cahān de ndese ni stívi ná? ²⁰ Chí tēe ni quecoo yāhá na cáhān maá de núu na cuēchi ni canihín de siquī na ná ni indichi na núu junta tēe cáculéhu ini ñuu ná. ²¹ ¿Te chí cájequin de cuēchi siquī na jéē ni cáhān jee ná suhva ná ni ñyo ná nuū junta naún? Chi ni achi na jéē cándíje ná jéē nátecu táca ndíyi, te jeē yúcuan cáje-quin ni cuéchi siquī ná, ni achi na jíin de. Achí Pablo.

²² Te Félix chi je jíin váha de ndese cáculéje ñayuu Cristo. Te jeē ní jini sōho de jnúhun yáha te ni stétu de un jíin náhan, te ni cahān de:

Nde na quee general Lisias te cajnūhun gá rí siquī jniñu yáha, áchí de.

²³ Te ni ndacu de jniñu nuū capitán jeē na cóne ga Pablo vecāa, te ma cási jeē sáha de jeē cuní de, te ni ma cási jeē quíjicoo jnáhan de jeē chindéé ñáhán i de.

²⁴ Te ni cuu jecu quivī, te ni quiji tucu Félix jíin ñasihí de Drusila, te ñahan hebreo cúu ña. Te ni ndacu de jniñu jeē na quíji Pablo návāha nacani de jnúhun ndese cáculéje yó Jesucristo. ²⁵ Te ni cahān Pablo jíin de jeē cánuú sáha yó jniñu ndaā, te cánuú coto yó máá yó jeē ma sáha yó jniñu stívi, chi quivī sándíhí te sándaā Yaā Dios jniñu ndívi ñayuu ndese ni casáha í. Te ni yūhu Félix te ni cahān de:

Vijna te cuáhán, te inga quivī jeē núne ri te cana ri rohó quiji ró, áchí de.

²⁶ Te ñúhun ni de jeē cuāha Pablo xúhun núu de te siáá de quenda de vecāa. Jeē yúcuan tijni jíinu ni cana de Pablo ni candajnūhún de. ²⁷ Te súcuan ni cuu uū cuiyā, te sáá te ni nucuíñí Porcio Festo nuū Félix. Te

cúní Félix jeē na cúsiñ ni ñayuu hebreo jíin de, te jeē yúcuan ní squéndōo de Pablo vecāa.

Jeē ni índichi Pablo nuū Festo

25 Te sáa únī quivī jeē ni quivī Festo cuu de gobernador Judea, te ni quenda de ñuu Cesarea cuahān de ñuu Jerusalén. ² Te tāca sūtū cácujeñnu jíin tēe cácujeñnu nuū ñáyuu hebreo ni jinūcoo nuū Festo, te ni cajicān cuēchi siquī Pablo. ³ Te ni cacahān ndahú jíin Festo jeē núu vāha ni de te na nátaǵi de Pablo ndiji ñuu Jerusalén. Súcuan ni cacahān, chi je ni casquínáhan jnūhun jeē cahni Pablo ichi. ⁴ Te ni cahān Festo jeē yíndesi vāha Pablo nde ñuu Cesarea, te je jéni ni de jeē jecu na quivī te nuhūn maá de ñuu Cesarea. ⁵ Te jeē yúcuan ní cahān de jíin táca tēe ún:

Tāca níhín jeē cándiso jniñu, na quíngoo yó nde Cesarea, te yúcuan cácan ni cuēchi siquī de te núu íyó cuēchi de, áchí de.

⁶ Te ni ine de yúcuan únā chí úxī-ni quivī, te ni ndee de ñuu Cesarea, te inga quivī ni cucōo de mesa nuū sándaā de jniñu, te ni cahān de jeē na quíji Pablo. ⁷ Te je cáhīn tēe hebreo jeē ní quijicoo nde ñuu Jerusalén. Te ni quee Pablo, te ni cajicó ndúū nuū de, te ni caquejé-ni casájnúhún téyí siquī de, te tú na jíin ní cástéén jeē íyó ndáā jnūhun cácahān. ⁸ Te ni cahān Pablo jehē maá de:

Tu ní sáha ná ni ñn cuēchi siquī ley ñuu na jéē cácuu ná ñayuu hebreo, ni siquī templo, ni siquī rey nación Roma, achí de.

⁹ Te Festo chi cúní de jeē cusīñ ni ñayuu hebreo jíin de, te ni cajnūhún de Pablo:

¿A tu cúní rō quinhun rō Jerusalén te yúcuan sándaā rī siquī rō? achí de.

¹⁰ Te ni cahān Pablo:

Je índichi na núu cúndaā jniñu jeē ndácu maá tēe cúu rey nación Roma, te yāha cúu nuū cánuú cúndaā jniñu ná. Máa ní je jíni vāha ni jéē tú na cuēchi ní sáha ná siquī tāca jnáhan ñuu ná hebreo. ¹¹ Chi núu ni sáha ná ñn cuēchi xeēn jeē jíni ñúhún cuu ná, te íyó vāha jeē cúu na núu súcuan. Te núu tu íyó ndáā jnūhun jeē casájnúhún tēe yáha siquī ná, te ni ñn tēe ma cúu chihi de sáñá ndaha tēe yáha jíjnáhan de. Núu súcuan te cúní na quíhīn na núu maá rey nación Roma sándaā de siquī na, áchí de.

¹² Te ni cajnūhun Festo ndese cájeni ni tēe cándiso jniñu jíin de. Yūcuán na te ni cahān de jíin Pablo:

Je ni cahān rō jeē cúní rō quihīn rō nuū maá rey nación Roma sándaā de siquī rō. Núu súcuan te quihīn nahín ró nuū de, áchí de.

Jeē ni índichi Pablo nuū rey Agripa

¹³ Te ni cuu jecu quivī, te rey Agripa jíin Berenice ni jecondēhé de Festo nde ñuu Cesarea. ¹⁴ Te tíjni quivī ni coyūcú de yūcuán. Te ni nacani Festo jnūhun siquī Pablo nuū rey un. Te suhva ni cahān de:

Félix jeē ní cuu de gobernador, ni stóo de ñn tēe íne vecāa yāhá. ¹⁵ Te ná ni jehēn ná ñuu Jerusalén, te sutū cácujeñnu jíin ñáyuu jéñnu cándiso jniñu nuū ñáyuu hebreo ni jinūcoo i nuū na cájequin i cuēchi siquī tēe ún, te cácuni i jeē na cúu de. ¹⁶ Te ni cahān na jíin i jeē tu íyó costumbre tāca tóhō Roma jeē cahni de ñn tēe súcuan-ni, chi jíni ñúhún condichi de jíin ñáyuu cájequin cuēchi siquī de, návāha cahān de jehē maá de te cúndaā núu íyó cuēchi de. ¹⁷ Yūcuán na te ni quecoo tútú i yāhá. Te inga quivī ún tu ní cúcuéé ná, chi ni cucōo na mesa nuū sándaā na síquī cuēchi, te ni ndacu ná jniñu jeē na quíji tēe ún. ¹⁸ Te cáhīn ñayuu cájequin cuēchi siquī de. Te ni jeni ni na jéē íyó cuēchi xeēn cahān de siquī tēe un núu, te tú cuiti. ¹⁹ Chi jeē cácahān de cúu máni siquī jnūhun cácañíje-ni máa de, jíin síquī ñn tēe nání Jesús jeē jé ni jihī de, te Pablo cahān níhin de jeē ní natecu ndije tēe ún. ²⁰ Te tu ní cújnúni cuiti ni ná ndese sándaā ná, te ni cajnūhun ná de núu cúní de quihīn de ñuu Jerusalén te yūcuán cúndaā siquī de. ²¹ Te máa Pablo ni cahān de jeē cúní de quihīn de nuū Augusto, rey yō nación Roma, te yúcuan sándaā rey cuēchi de, ni achi de. Te ni cahān na jéē na cóne de vecāa nde táji ná de quihīn de nuū rey un, áchí Festo.

²² Yūcuán na te ni cahān Agripa jíin Festo:

Suni cúní maá ná cuni sōho ná jéē cahān tēe un, áchí de.

Te ni cahān Festo:

Sajnē te cuni sōho ní jéē cahān de núu súcuan, áchí de.

²³ Te inga quivī un ní quecoo Agripa jíin Berenice. Te cáñūhun de sahma cújéñnu de, ni quivīcoo de ini vehe juzgado jíin táca general jíin tēe cácujeñnu ini ñuu ún. Te ni ndacu Festo jniñu jeē na quíji Pablo. ²⁴ Te ni cahān Festo:

Cahān na jíin ní, tátā rey Agripa, jíin ndihī níhín jéē cáyūcu jíin yó yāhá vijna. Yāha cúu tēe jeē siquī de ni candonda ndivii jnáhan de hebreo ñuu Jerusalén jíin ndé ñuu Cesarea yāhá, te máni cácahān i jeē tú vāha jeē cótecu gā de. ²⁵ Te jéni ni maá ná jéē tú na cuēchi xeēn ni sáha de jeē cúu de. Te je ni cahān de jeē cúní de quihīn de nuū rey Augusto jeē sándaā rey un siquī de, te jeē yúcuan ní cahān na jéē táji ná de quihīn de nuū rey un. ²⁶ Te tu cúcáñnu ni ná na jnūhun tee ná núu tútú quihīn jíin de nuū rey yō. Jeē yúcuan ní ndacu ná jniñu ni quee de nuū yō jijnáhan yó, te cánuú gá nuū maá ní, tátā rey Agripa. Te stíchí ni de návāha níhīn na jnūhun tee ná siquī de, te quihīn jnūhun un jíin de nuū rey. ²⁷ Chi tu jéjníñu cuiti jeē táji ná ñn preso quihīn te núu tú castūhun ná nuū tútú na cuēchi ni sáha de, áchí Festo.

Jeē ni cáhān Pablo jehē maá de nuū rey Agripa

26 Yūcuán na te ni cahān rey Agripa jíin Pablo:

Vijna te jéhe ri jnūhun cahān rō jehē maá ró, achí de. Te Pablo ni sáha de ndaha de jeē ní quejéé de cáhān de, te suhva ni cahān de:

² Tātā rey Agripa, cúsiḡ ni ná vijna jeē cúu cahān na jíin ní siquḡ ndihí jeē casájnūhún ñáyuu ñuu yō hebreo siquḡ ná. ³ Chi je jíiní vāha maá ní tāca jéé ní tajnúní ñáyuu ñuu yō hebreo jíin tāca jnūhun jeē tu cáhīin inuú i jíin. Jeē yúcuan cáhān ndahú ná jíin ní jeē coo paciencia ni cuni sōho ní jnūhun cahān na jíin ní.

Jeē ní cachi Pablo ndese ni sáha de nde ná tu sama ya ini de

⁴ Je cájini tāca jnáhan ñuu yō hebreo ndese ni sáha ná ini ñuu nuū ní cacu ná jíin ini ñuu Jerusalén nde ná lulí ná. ⁵ Te núu cáconi maá de cahān ndaā de, te je cájini de sãña jéé ndé lulí ná ni quívi ná nuū grupo fariseo, te grupo un níhin ga cánducú ndéyí de squícu de ley yā vēsú tāca gá grupo tēe nación yō. ⁶ Te ñūhun ni na jnūhun ni jejnūhun Yaā Dios nuū tāca jí yō jeē nastécu yā ndīyi, te maá síquḡ tāca jnūhun yáha-ni cúu jeē cájequin de cuēchi siquḡ ná. ⁷ Chi maá yó jeē cácuu yó jnáhan ndihúxí uū yucūn ñáyuu Israel, cáñūhun ni yō jnūhun ni jejnūhun ya jeē nastécu yā ndīyi, te jeē yúcuan nduú ñuu cáchiñúhún yó Yaā Dios te cájejnīñu yó núu yā. Te suni súcuan ñūhun ni maá ná, tātā rey Agripa, te siquḡ jeē nacani ná jnūhun jeē natecu ndīyi cúu jeē cájicān jnáhan ñuu yō hebreo cuēchi siquḡ ná. ⁸ ¿Te chí má nastécu Yaā Dios tāca ndīyi cájeni ni ní naún?

Jeē ní cachi Pablo ndese ni jito xeēn de ñáyuu cácandí-je

⁹ Te maá ná chi ni jeni ni na jéé jíiní ñúhún ndonda ná síquḡ ñáyuu cácandíje i Jesús, Yaā ní jehnu ñuu Nazaret. ¹⁰ Te súcuan ni sáha ná ini ñuu Jerusalén, chi tāca sūtū cácujeñhu ni cajēhe de jnūhun jeē cóndiso jníñu ná chuhun ná cuéhē ñáyuu vecāa siquḡ jeē cá-candíje i Jesús, te íyó váha ni na núu cájehni de i. ¹¹ Te tíjni jíinu ni sáha ndevāha na jíin i ini tācá vehe īi sinagoga jeē ni sáha fuerza na i jeē na stóo i jnūhun cácandíje i. Te xeēn ni quitḡ ni na núu i, chi nde ñuu jíicá ní jehēn ná ni sáha xeēn na jíin i.

Jeē ní cachi tucu Pablo ndese ni sama ya ini de

(Hch. 9.1-19; 22.6-16)

¹² Te sutū cácujeñhu ni cajēhe de jnūhun jeē cóndiso jníñu ná quíhīn na sáha xeēn na jíin ñáyuu cácandíje cáyucú ñuu Damasco nuú. ¹³ Te cuahān ná ichi ún, tātā rey, te caxū cúu, te ichi ándiví ní quiji ñn nduva ni ndindéé ndaxín núu na jíin núu tēe cuango jíin ná, te víhyá gā ndī vēsú niāndīi. ¹⁴ Te ndihí ná ní cacotúú ná nuū ñūhun. Te ni jini sōho ná ñn jnūhun ni cahān jíin ná jíin jnūhun yuhu yó hebreo: Saulo, Saulo, ¿najehē jíto xeēn rō ruhū? Chi jeē sáha ró súcuan cúu nájnūhun stiquḡ jeē tu jéndije tí, te jéñú yatá tí xinī pulla, te

súcuan stóho tí maá tí, áchí. ¹⁵ Yūcuán na te ni cahān ná: ¿Na nihín cúu jeē cahān, Tātā? achí ná. Te maá Jítoho na ní cahān yā jíin ná: Máa rí cúu Jesús, te jeē jíto xeēn rō ñáyuu cácandíje i ruhū cúu jeē jíto xeēn rō ruhū. ¹⁶ Ndonda condichi rō, chi vēji ri nuū rō jeē tejníñu ri rohó sáha ró jniñu cúni rī, te nacani cájī ró jnūhun tāca jéé ní jito ró vijna, jíin jéé steén gā rī nuū rō tāca quívi quíji. ¹⁷ Te jnama ri rohó núu tāca jnáhan ñuu rō jíin núu ñáyuu tāca gá nación, chi nuū ñáyuu un tájī rí rohó quíhīn rō. ¹⁸ Te tájī rí rohó quíhīn rō nuū i, chi nájnūhun nanune ró tñūú i cúu jeē steén rō jnūhun ri nuū i te jecūhun ni i. Chi ñáyuu ná tu candíje i ruhū, nájnūhun cájica i nuū néé. Te jeē candíje i ruhū, quívi i nuū luz rī, te tuá quihí i chíji jniñu jeē cuní jex-eén jeē cúu Satanás, chi sa suhva quihí i chíji jniñu cúni maá rí. Te tájī rí rohó quíhīn rō nuū i, návāha candíje i ruhū te cone cáhnu ni rī nuū cuéchi i. Yūcuán na te inuú níhīn tahú i jíin tāca gá ñáyuu jeē ni sándoo ri anuá i, áchí yá jíin ná.

Jeē ní cachi Pablo ndese ni jetáhú de jnūhun ni cahān yā

¹⁹ Jeē yúcuan tu ní sánīhni ni na núu jnūhun ni cahān yā ichi ándiví jíin ná, tātā rey Agripa. ²⁰ Chi ni jetáhú ná, te ni nacani ná jnūhun ya xīhna gā nuū ñáyuu ñuu Damasco, te sáá te ni nacani ná jnūhun ya nuū ñáyuu ñuu Jerusalén jíin ññ región Judea jíin núu ñáyuu tāca gá nación. Te jnūhun ni nacani ná núu i cúu jeē na nacani ni i jeē stóo i cuēchi i te nasāma ini i sáha Yaā Dios, te na sáha i jniñu váha jeē steén jeē ní nasāma ini i. ²¹ Te siquḡ jeē súcuan ni nacani ná jnūhun te ni cajniñ jnáhan ñuu yō hebreo sãña ini templo, te ni cacuni i cahni i sãña núu. ²² Te ni chindéé ñáhán Yáa Dios sãñá, te jeē yúcuan índichi níhin na ndé vijna nacani cájī ná jnūhun ya nuū ñáyuu cácujeñhu jíin núu táca-ni ñáyuu. Chi tu chíso gá na jnūhun siquḡ jnūhun jeē ní nacani Moisés jíin tāca gá tēe ni canacani jnūhun Yaā Dios nde jenahán. ²³ Te ni cundaā jnūhun ni canacani de un jéé cánuú ndoho Cristo nde cuu yā, te xīhna gā maá yá natecu vēsú tāca gá ndīyi, te súcuan stéén cají yá nuū ñáyuu jeē jnáma ya i, cúu ñáyuu nación yō Israel jíin ñáyuu tāca gá nación, áchí Pablo.

Jeē ní nducú ndéyí Pablo scandíje de Agripa jnūhun Jesús

²⁴ Te súcuan ni cahān Pablo jehē maá de, te ni cahān jee Festo:

Ni nduloco rō, Pablo. Siquḡ jeē ni scuáha ndasí ró te jeē yúcuan ní tívi xinī rō, áchí de.

²⁵ Te ni cahān Pablo:

Tu ní tívi xinī na, tātā Festo, chi sa suhva íyó cájī ndáa jnūhun cáhān na. ²⁶ Te maá rey Agripa je jíiní váha de táca jniñu ní íyo jeē ní nacani ná, te tu yúhú ná cahān na tāca jnūhun yáha, chi je jíiní váha na jéé jíiní de tāca jnūhun yáha, chi tú sãhi ní cúu táca jniñu yáha. ²⁷ Tātā

rey Agripa, zá cándije ní jnúhun jeē ní cacahān tēe ni canacani jnúhun ya nde jenahán? Jéni ni na jēe candíje ní, áchí Pablo.

²⁸ Yūcuán na te ni cahān Agripa jíin Pablo:

Va jéni ni rō jeē jíin jecu jnúhun ni cahān rō te sáha ró jeē candíje ri Cristo, achí de.

²⁹ Te ni cahān Pablo:

Vēsú jíin jecu-ni jnúhun chí jíin cuéhē, te jícán tahú na jēe maá ní jíin táca gá tēe cájini sōho jnúhun cáhán na vijna, na cándije ní nájnúhun cándije maá ná, te tu cúní na jēe cónuhni ní nájnúhun núhni na.

³⁰ Te ni ndihí ni cahān Pablo tāca jnúhun yáha. Te ni ndocuñí rey jíin gobernador jíin Berenice jíin táca gá tēe cácujeñu cáyūcu jíin de. ³¹ Te ni cacujijo de, te ni candajnúhun sñin maá de:

Tú ni ñin cuēchi ní sáha tēe yáha jēe cúu de ni jeē cóne ga de vecāa.

³² Te ni cahān Agripa jíin Festo:

Cuu siáá ni tēe yáha núu jeē tu ní cáhán maá de jeē quihín de nde nuū rey yō nación Roma nuú, áchí de.

Jeē ní catajé de Pablo cuahān de ñuu Roma

27 Te ni cundaā jeē quihín Pablo jíin barco nde Italia, te suni quingoo ná jíin de. Te Pablo jíin sava ga tēe cáhiin vecāa ni quivícoo de ndaha ñin capitán naní Julio jeē quíndēca de tēe un ndé Italia. Te Julio cúu ñin jnáhan grupo soldado naní Augusto. ² Te nde ñuu Adramitio nuū cájecuñí barco ni quenda ñin barco ni quee, te ni quivícoo ná, te quihín barco un táca ñuu jeē yíhi chíji Asia jeē yúcu yumar. Te suni cuahān Aristarco jíin ná, te maá de cúu tēe ñuu Tesalónica región Macedonia. ³ Te inga quiví ni jinūcoo ná ñuu Sidón nuū cájecuñí barco. Te Julio ni cundáhú ni de Pablo, te ni jēhe de jnúhun ni jecondēhe Pablo táca amigo de, te ni cachindéé ñáhán i de. ⁴ Te ñuu yúcuan ní quenda barco cuahān jíin ná. Te siquí jeē níhin yíhi tachí te tu ní cúu quihín yohó barco, te ni tee xiin barco cuahān jíin ná xiin isla Chipre, ñuhun jeē íne sñin nuū ndúte, te lado jecó barco ni quendōo Chipre. ⁵ Te ni cayāha ná yumar Cilicia jíin Panfilia cuahān ná, te ni jinūcoo ná ñuu Mira ndañú Licia.

⁶ Te ñuu yúcuan ní nihín capitán ñin barco jeē véji ñuu Alejandría te quihín ichi Italia, te ni cahān de jíin ná ni quivícoo ná barco un. ⁷ Te cuéhē quiví ni cahíin na núu ndúte jíin barco, chí cuéé ní jica, te fuerza-ni ni jinūcoo ná yuñúú Gnido. Te tuá ni jēhe tachí un jnúhun quihín yohó barco, te ni cayāha ná núu jnúhma tachí xiin ñúu Salmón jeē íne nuū isla Creta. ⁸ Te yóhyo ni canducú ndéyí tēe cáscaca barco un, ní yáha jíin ná ñé yumar xiin Creta. Te ni jinūcoo ná ñin lugar naní Buenos Puertos nuū cájecuñí barco, te yajni un íne ñuu Lasea.

⁹ Te je ni cuu cuéhē quiví ni cajica ná jíin barco. Te je yajni quejéé vico míjin, te yúcuan cúu tiempo jeē yí jíca barco te sanaa te coo jnúndóho nuū mar. Te ni cahān nihín Pablo jíin de:

¹⁰ Tātā jijnáhan ní, jíin na jēe yóhyo yí coo viaje yáha, te quiji jnúndóho siquí barco, te naa barco jíin ndañú, te nde maá yó sanaa te cuu yō, achí de.

¹¹ Te tu ní chúsóhó capitán jeē cahán Pablo, chí sa suhva jeē cahán tēe scáca barco un jíin tēe chíi barco.

¹² Te siquí jeē tu íyó váha lugar nuū ni jécuiñí barco un jēe cóyúcú de ñé vico míjin, te ni cajeni ni cuéhē gā de jeē váha ga núu quendacoo de yūcuán. Chí cajeni ni de jeē núu cuu te jinūcoo de ñuu Fenice te yūcuán coyúcú de vico míjin. Chí Fenice suni íne yundúte isla Creta nuū cájecuñí barco, te ndijin ichi noroeste jíin suroeste.

Jeē ni jécuiñi ñin tachí níhin jeē stóna ndute mar

¹³ Te ni jécuiñi víta táchí ichi sur, te ni cajeni ni de jeē jinú de Fenice nuú, te ni cascáca ga de barco jíca jíin de xiin Creta. ¹⁴ Te ni cunúu jecu gā, te ni quejéé-ni ñin tachí níhin ndasí jeē naní táchí nordeste. ¹⁵ Te tuá ni cúu ga quihín yohó barco, chí ni chundahá-ni tachí cuahān jíin, te ni casiáá-ni de jeē cascáca de, te cháha chúcuan cuahān barco jíin ndihí ná sáha tachí. ¹⁶ Te ni yáha jíin ná xiin isla lulí jēe naní Clauda, nuū jnúhma tachí. Te vēsú súcuan te yóhyo uhū ni cascáca ná barco lulí jeē ndiquín yatā barco cáhnu. ¹⁷ Te ni casquíví ná ini barco cáhnu. Te ni casucun núu de barco cáhnu jíin yoho. Te cáyūhú de jeē quihín barco nuū yaxín ndute nuū naní Sirte te jñí nuū ñíti, te jeē yúcuan ní casnúu de sahna cóquin jeē stechí te jíca barco. Te ni casiáá de jeē na quihín ndé chí chundahá táchí. ¹⁸ Te tu jécuiñí cuítí jeē yíhi tachí níhin. Te inga quiví un ní caquejéé de cájete de ndajníñu ndíso barco, návaha nduñama gā barco te ma quée chíji ndute. ¹⁹ Te quiví uní ni cajēhe núu ná ndaha ni cajete ná maá ndajníñu jéjníñu barco. ²⁰ Te cuéhē quiví tu ní cájito ná níandii ni quimí siquí jeē íin vicō, ni tu jécuiñí cuítí tachí níhin ún, te tuá cáñūhun ni na cácu ná.

²¹ Te ni cuu quiví jeē tuá cáyeji cuítí na stáa. Te ni jecondichi Pablo sava mēñu tēe ún, te ni cahān de:

Tātā jijnáhan ní, núu ní cájetáhú ní jnúhun jeē ní cahān ná te ma quéndacoo yó Creta nuú, te ni ma cóto yó jnúndóho yáha ni ma náa ndajníñu núu. ²² Te vijna cáhán nihín na jíin ní jeē cuandeyí ni ni jijnáhan ní, chí ni ñin ní má cúu ní, vēsú naa barco. ²³ Chí jeē cúni ni quiji ñin ndajéhé jeē ní tají maá Yáa Dios nuū ná. Chí maá yá cúu Jitoho ná, te jéjníñu ná núu yā. ²⁴ Te ndajéhé yā ún suhva ni cahān yā jíin ná: Pablo, ma yūhu ró, chí váha-ni jinū rō nuū rey nación Roma, te jeē siquí rohó te sáha Yáa Dios jeē cácu ndihí tēe cáhiin jíin ró ini barco yāhá, áchí yá jíin ná. ²⁵ Tātā jijnáhan ní, ma yūhu ní núu súcuan, chí maá ná cúcáhnu ni na Yáa Dios jeē coo nájnúhun ni cahān ndajéhé yā jíin ná. ²⁶ Te jinū nahín yó ñin isla, te ma jinú yachí yō nuū quingoo yó, áchí de.

²⁷ Te ni cuu uxí cuún jecuáa nde jeē ní quejéé táchí, te jíca barco nuū mar Adria, te cháha chúcuan cuahān

barco sáha tachī. Te máá jecuāá ún te jeē ní cuu sava ñuú te cájeni ni tēe cáscáca barco jeē jé cuacuyajni jinū barco ñuhun íchi. ²⁸ Te ni casínga de ñn jeē cáchicuāhá de nasaa cúnú ndute, te ni cajini de jeē iyó ócō xahūn ñn metro. Te ni jica barco jecu gā te ni casínga tucu de, te ni cajini de jeē iyó ócō uxā na metro. ²⁹ Te cáyūhú de jeē jécujnáhan barco jíin toto, te ni cajihni de cuūn cāa gancho náhnu yatā barco un, te ni cascáne de nde je-hē ndúte návāha chituu te jecuiñī barco. Te yōhyo jnāá de jeē na cúndijin yachī. ³⁰ Te tēe cáscáca barco un ní canducú de cunu de quingoo de jíin barco lulí te cācu de nuū jnúndóho quiji siquī barco cáhnu núú. Jeē yúcuán ní casnúu de barco lulí un núú ndúte, te cásáha-ni de nájñuhun jeē snúu de inga cāa gancho ichi núú barco návāha tú cuni ñayuu jeē cáculi de cunu de quingoo de. ³¹ Te ni cahān Pablo jíin capitán jíin táca soldado:

Núu tú coyūcu tēe yáha ini barco cáhnu jíin yó, te ma cácu cuiti máá ní jijnáhan ní, áchí de.

³² Yūcuán na te soldado ni cajehnde de yoho núhni barco lulí, te ni jneni-ni cuahān.

³³ Te nuū cuácundijin te ni cahān Pablo jíin táca tēe un jēe na cáji de staā. Te suhva ni cahān de:

Vijna iyó úxī cuūn quivī jeē cándito ní te tu cáyeji cuiti ni staā. ³⁴ Te cáhān ndahú ná jíin ní jeē na cáji ni staā, návāha nanihīn ni ní te cācu ní, chi ni ñn yó má cúu, ni ma tují cuiti yō, achí de.

³⁵ Te ni ndihī ni cahān de jñuhun yáha, te ni quihin de ñn staā, te mēhñu táca ñayuu un ní nacuatáhú de nuū Yaā Dios, te ni tahu sáva de staā ún, te ni quejé de yéji de. ³⁶ Yūcuán na te ni candusiñī ni ndihī de, te suni ni cayejí de staā. ³⁷ Te ndivii na jéē cáñuhun ná ini barco cúu uū ciento unī xico xahūn ñn ná. ³⁸ Te ni cayejí vāha ndihī ná. Yūcuán na te ni cajete de trigo cuahān nuū ndúte un, návāha na ndúñama gā barco.

Jeē ni quée barco chíi ndute

³⁹ Te nuū ní cundijin te ni cajito de ñuhun, te tu ní cá-nacuni de ndé nuū cúu. Te ni cajito de nuū íne cuñī ndute, te suni máá ññī cúu, te cájeni ni de jinū de yūcuán jíin barco núu na cúu núú. ⁴⁰ Te ni cajehnde de yoho núhni cāa gancho yúcuán, te ni caquendō cāa un núu mar. Te ni canandají de yujnu jeē scotú chíi barco, te ni nacata caa de sahma cóquin ichi núú návāha chundahá táchī barco, te ni quejé caca quihīn jíin de ichi núú iyó ññī. ⁴¹ Te ni jinū barco núú níhin náquijnáhan ndute. Te ni quée barco nuū ññī ñuhun chíi ndute, te ni jññī-ni ichi núú te tuá ni jíca cuiti, te yatā barco un ní cahya-ni jeē níhin ni cani suhmā ndute mar. ⁴² Yūcuán na te ni candajñuhūn soldado jeē cáhni de táca preso návāha ma súde i te cunu i quingoo i. ⁴³ Te cúní capitán un jéē cācu Pablo, te ni jesicoo de. Chi sa ni cahān de núu ndé ñayuu jiní súde te xihna gā i na núngoo i súde i nuū ndúte, te na quenda-ni i quihīn i nuū ñuhun íchi. ⁴⁴ Te suni sūcuán na quécōo

ndihī i quihīn i, sava i coso candá i jíin yujnu cúnu te sava ga i jíin pedazo yujnu barco. Te sūcuán ni cacācu ndihī ná ní jinūcōo ná ñuhun íchi.

Jeē ni íne Pablo isla Malta

28 Te nuū ní cacācu ná te ñayuu cáyūcu yúcuán ní cacachi i nuū na jéē isla un nání Malta. ² Te ñayuu un ní cacundáhú ni i sāña jijnáhan ná, te ni cascáyú i ñn ñuhūn cáhnu, te ni cacahān i jíin ná jeē nasaā ná, chi mījin sáha jeē cúun saū. ³ Te ni stutú Pablo jecu tujnu íchi. Te jeē jnāá de tujnu un núú ñuhūn te ñn coō xeén jínu tí ni quenda tí tujnu un jéē ní cujihní, te ni chiyuhú-ni tí ndaha de. ⁴ Te ñayuu cáyūcu yúcuán ní cajito i jeē ndíta caa coō un yéyuhú tí ndaha de, te ni cacahān i:

Tēe yáha vā sanaa te ni jehni de ndīyí núu sūcuán, te vēsú je ni cācu de nuū mar, te máá yāá sándañ níñu ñayuu tu jéhe ga yā jñuhun jeē cótecu de, áchí í.

⁵ Te ni caja Pablo ndaha de, te ni ñinga coō un núú ñuhūn, te tú na vé ni ndóho de. ⁶ Te cándētu táca ñayuu jeē chūhun i cuiñī de chí cotúú-ni de te cuu de. Te ni cunahān téyí cándētu i, te ni cajito i jeē tú na vé ni ndóho de. Yūcuán na te ni nasāma cájeni ni i, te ni cacahān i jeē ñn yaā cúu Pablo.

⁷ Te yajni yūcuán iyó ñuhun tēe cújēhnu ga Malta un, nání de Publio. Te ni cana tēe un sāña jijnáhan ná, te ni jéhe núu de vehe de ni coyūcu ná jíin de unī quivī, te ni jito yúcuán de sāñá. ⁸ Te tátá Publio cāa de, chi ndóho de cuehyī quiji jíin cuéhyī ññī. Te ni jecondēhe Pablo tēe ún, te ni jicān tahu de te ni soó de ndaha de siquī tēe ún, te ni nduvāha-ni de. ⁹ Yūcuán na te ni quijicoo ndihī ga ñayuu cácuñu yūcuán, te suni sūcuán ní canduvāha-ni i. ¹⁰ Te ñayuu un ní cajēhe i cuehē ndajñíñu ni cacutahū ná. Te nuū ni jínū quivī jeē quingoo tucu ná jíin barco, te ni cajēhe i táca ndajñíñu cuu ná ichi.

Jeē ni jínū Pablo ñuu Roma

¹¹ Te unī yoō ni coyūcu ná Malta. Te ñn barco jeē véji ñuu Alejandría ni ine Malta ññī vico mījin, te ichi núú barco un ndéé uū figura ídolo ñuu de nání Cástor jíin Pólux. Te ni quivícoo ná barco un cuángoo ná. ¹² Te ni jinūcōo ná ñuu Siracusa, te yūcuán ní coyūcu ná unī quivī. ¹³ Te ni quenda barco cuahān jíin ná nduu nduu yundúte, te ni jinūcōo ná ñuu Regio. Te inga quivī ún vāha ni quiji tachī ichi sur, te ni quendacoo ná ñuu Regio, te uū quivī te ni jinūcōo ná ñuu Puteoli. ¹⁴ Te yūcuán ní caquijnáhan ná jíin jecu hermano cáculi, te ni cacana de sāña ní coyūcu ná jíin de ñn semana. Yūcuán na te ni quendacoo ná jéē quihīn ná ñuu Roma. ¹⁵ Te hermano cáyūcu ini ñuu Roma, je ni canihīn de jñuhun jeē jinūcōo ná, te ni quendacoo de, te sava de ni caquijnáhan de sāña ndé ñuu Foro de Apio te sava ga de ñuu Tres Tabernas. Te ná ni jito Pablo nuū de jijnáhan de, te ni nacuatáhú de nuū Yaā Dios, te ni ndundeyí ni de. ¹⁶ Te sáa te ni jinūcōo ná ini ñuu Roma,

te capitán ni squívi de tāca preso ndaha tēe cújéhu nuū tācá soldado ñuu Roma. Te ni cajēhe de jnūhun jeē cone sñin Pablo te condito ñin soldado de.

Jeē ní nacani Pablo jnūhun ya ini ñuu Roma

¹⁷ Te nuū uní quívi te ni cana Pablo tāca tēe cácujehu nuū jnáhan ñuu de hebreo cáyucú ini ñuu Roma. Te ni cacutútú de, te ni cahān Pablo jíin de:

Tātā jijnáhan ní, tú cuiti na vé ni sáha ná síquī jnáhan yó hebreo ni síquī tācá jniñu ní catajnúní jíí yō. Te vēsú súcuan te ni cajni i sãña ndé ñuu Jerusalén ni casquívi i sãñá ndaha tēe ñuu Roma jijnáhan de. ¹⁸ Te tēe ñuu Roma jeē cácujehu cáyucú Cesarea ni castíchi de sãñá, te cácu ni de siáá de sãña núú, chi ni cajini de jeē tú na cuēchi ná jēe cúú ná. ¹⁹ Te jnáhan ñuu yō hebreo tu ní cájēhe de jnūhun. Jeē yúcuani ní cahān na jēe quiji ná núú maá rey cujéhu ga nde ñuu Roma yāhá te sãndaā maá de síquī ná. Te tú vēji ná jēe cáquin na cuēchi síquī ñayuu nación yō. ²⁰ Jeē yúcuani ní cana ná níhín jijnáhan ní, návāha cuni na táca ní te ndajñūhun yó. Chi yóhó ñayuu Israel cáñūhun ni yō jeē nátecu ndīyi, te suu jnūhun un nácani ná, te jeē yúcuani cúu jeē nuhní na jíin cadena yáha, áchí de.

²¹ Te ni cacahān tēe un jíin Pablo:

Tú ni ñin carta ni cátají ñayuu cáyucú Judea nuū na jēe cástūhún de jnūhun ní, te tāca jnáhan yó Judea jeē ní quijicoo yāhá, tú ni ñin jnūhun née ní cacahān de síquī ní. ²² Te cánujnahan ni ná cuni sōho ná ndese cúu jnūhun jeē cahán ni, chi je cájini na jēe tācá-ni lado cacahān ñayuu contra síquī jnúhun jeé jēe steén ni, áchí de.

²³ Te ni cajeni de ñin quívi, te ni quijicoo cuehē de vehe nuū néne Pablo. Te ni nacani de jnūhun ndese ndácu Yaā Dios jniñu, te ni steén cají de jnūhun nde jenēhen te nde ni ini. Te súcuani ni nducú ndéyí de

scándije de tāca tēe un jnúhun Jesús, te ni steén de jeē suni súcuani cáhán ley jeē ni jēhe ya nuū Moisés jíin jnúhun jeē ní catee tēe ni canacani jnūhun Yaā Dios nde jenahán. ²⁴ Te ni cacandije sava de jnūhun ni cahān Pablo, te sava ga de tu ní cájetáhú de. ²⁵ Chi tú inuú cáhiyo ni de. Te sáá cánducú de quingoo de te ni cahān Pablo:

Ndaā cahán jnūhun jeē ni cahān Isaías, tēe ni nacani jnūhun Yaā Dios nde jenahán, chi suhva ni cahān de jíin táca jíí yō ni sáha Espíritu Santo:

²⁶ Ni cahān Yaā Dios:

Cuáhán núú jnáhan ñuu rō yāhá te cahān rō jíin i: Vēsú cuni nahín váha ró te ma jécūhun ni rō, te vēsú coto vāha ró te ma cúni rō.

²⁷ Chi yōhyo níhni ni rō,

chi tu cácu ni rō cuatáhú ró.

Te yōhyo uhū cájini sōho ró,

chi tu cánujnahan ni rō cuni sōho ró jnúhun ri.

Te nájnūhun cájesi rō tinūu ró

cúu jeē tu cácu ni rō nanducú ró ndese cúu,

te tu cácu ni rō jeē násāma ini rō

návāha nasávāha ri anuá rō nuū cuēchi ró, ní achi Yaā Dios.

Achí tutu. ²⁸ Núu súcuani te na cástūhun ná nuū ni jēe jnúhun ní tají Yáā Dios jeē jnáma ya yohó, nde vijna te tájí yá jnūhun yáha quíhín nuū ñayuu tācá nación jeē tu cájini i jnūhun ya, te máá i chi cuni sōho i, áchí de.

²⁹ Te ni jínu ni cahān de jnūhun yáha, te cuangoo jnáhan de hebreo, te yōhyo ni cacahān de síquī jnúhun yáha jijnáhan de.

³⁰ Te ni condee Pablo uū cuiyā vehe jeē ní quihin núu de ún. Te ni cusí ni de cahān de jíin táca ñayuu ní quijicoo nuū de. ³¹ Te jéhu-ni ni nacani de jnūhun ndese ndácu Yaā Dios jniñu, te ni steén de jnūhun máá Jítoho yō Jesucristo, te tú ni ñin ní jési jeē nácani de jnūhun.

ROMANOS

1 Máá rí cúu Pablo, mozo Jesucristo, chi ni cana Yaā Dios ruhū cúu ri apóstol yā, ni jeni ya ruhū te ni tají yá ruhū jeē nácani ri jnūhun jeē jnáma ya ñayuu.

² Te jnūhun un ní jejnūhun ya nde jenahán ndasí, te yósó núū tútu īi jeē ní catee tēe ni canacani jnūhun ya. ³ Te jnūhun un cáhán síquī Jitoho yō Jesucristo, Yaā cúu Sēhe Yaā Dios. Te ni nduu ya tēe, ni cacu ya chíji yucūn rey David. ⁴ Te ni natecu yā mēhñu ndíyi ni sáha Espíritu īi, te súcuan ni steén Yaā Dios jeē cúu ya Sēhe ya jeē ndiso poder. ⁵ Te jeē jíin Jesucristo ni jēhe Yaā Dios jniñu luu yáha jeē cácuu ri apóstol, cájica ri jíin jnúhun Cristo, návāha coo ñayuu tācá nación jeē candíje i jeē sáha ya jehē i, te cuatáhú i nuū yā. ⁶ Te suni máá ró jijnáhan ró, suni ni cana ya rohó ní quívicoo ró ndaha Jesucristo.

⁷ Te tēe ri carta yáha cuajeē nuū rohó ñáyuu ñuu Roma. Chi ni cundáhú ni Yaā Dios rohó, te ni cana ya rohó jēe coo ndoo coo īi rō nuū yā. Te ñúhun ni rī jeē maá Tátá yō Yaā Dios jíin Jitoho yō Jesucristo sáha ga yā jeē váha rōhó, te sáha ya jeē coo ndeyí coo síi ni rō.

Jeē cuní Pablo quihīn de ñuu Roma

⁸ Te xīhna gā cástūhun rí nuū rō jeē nácuatáhú rí nuū Yaā Dios jeē síquí rohó jijnáhan ró, chi ni sáha Jesucristo jeē váha rōhó. Chi ñíí ñáyivi jíté núu jnūhun cuahān ndese váha cácandíje ró yá. ⁹ Te máá Yaā Dios jíin yā jeē níin jíicán tahu rī jehē rō jijnáhan ró nuū jíicán tahu rī. Chi yōhyo ndíhvī ni rī jejníñu ri nuū yā jeē nácani ri jnūhun Sēhe ya. ¹⁰ Te níin jíicán tahu rī nuū yā jeē núu cúní yā te nde vijna te cuu jecondēhe rí rohó. ¹¹ Chi cúu ni rī coto ri nuū rō jijnáhan ró, te steén gā rī jnūhun ya nuū rō, návāha quendōo váha ga anuá rō te cuiñi ñihin ga rō jíin. ¹² Súcuan cúní rī návāha sáha yó jēe inuú coo ndeyí ni yō jijnáhan yó síquī jeē inuú cácandíje yó yá.

¹³ Hermano jijnáhan ró, cúní rī jeē na jécūhun ni rō jeē tíjni jínu ni cuu ni rī jecondēhe rí rohó, te nde vijna ná tu cuu. Chi cúní rī scuité núu ga rī jnūhun ya mēhñu ró, nájñūhun ni sáha ri mēhñu ñáyuu tāca gá nación.

¹⁴ Chi cúu ri tēe táu síquī jnúhun ya, chi táu rī nacuāha ri jnūhun ya nuū ndíhi ñayuu, cúu ñayuu jíin gā síquī ndíhi jeē iyó ñáyivi jíin jēe tu jíiní cuiñi, cúu ñayuu tūhva jíin jēe tú tūhva. ¹⁵ Jeē yúcuan cúu jeē ndíhvī ni rī jeē suni nuū rohó ñáyuu ñuu Roma nacani ri jnūhun jnáma ya yohó.

Jeē ndiso jnūhun váha ya poder

¹⁶ Chi tu cúcanu rī síquī jnúhun váha ya, chi yúcuan cúu poder Yaā Dios jeē jnáma ya tāca ñáyuu cácandíje, xīhna gā ñayuu hebreo te suni tāca gá ñayuu. ¹⁷ Chi jnūhun váha ya un steén nuū yō jeē ndáhva Yaā Dios cuēchi yó síquī jeē candíje yó jēe sáha ya jehē yō, te máá jēe candíje yó ñíí cuahān yō. Chi súcuan cáhán nuū tútu īi: ñayuu jeē ní ndahva yā cuēchi i, técu i jeē candíje i jeē sáha ya jehē i, áhí.

Síquī jeē iyó ndasí cuēchi ñayuu

¹⁸ Chi jíiní váha yó jēe Yaā Dios andívi, cuāha ya castigo xeēn nuū tāca ñáyuu tu cácandíje te máni cuēchi cásáha. Chi jíin jniñu née cásáha i te cájesi i nuū jnúhun ndaā. ¹⁹ Te ma cúu cahān i jeē tu jécūhun ni i síquī ndese Yaā cúu Yaā Dios, chi máá yá ni steén nuū i. ²⁰ Chi jíin táca jeē ni sáha ya te cúu jécūhun ni ñayuu ndese Yaā cúu máá Yaā tu jíto i nuū. Chi nde ni jecōo ñáyivi jíin ndé vijna te cúu jécūhun váha ni i jeē maá yá cúu Yaā Dios te iyó poder yā ñíí cáni. Te jeē yúcuan má cúu cuiñi cahān i jeē tu jíiní i jeē iyó yá. ²¹ Chi vēsú ni cajini i ndese Yaā cúu ya, te tu ní cáchiñúhún i ya jeē cúu ya Yaā Dios, te ni tu ní nácuatáhú i nuū yā. Chi sa suhva ni nduu i ñayuu cájeni cāhá ni, chi ni candunéé īi i, te ni quendōo nee ini anuá i. ²² Cácahān i jeē ndichí i, te sa suhva cácanéé i. ²³ Chi ni castóo i Yaā Dios jeē yóhyo luu cújéhnu, jeē ma cúu cuiñi. Te ni cajetáhú i tācá imagen jeē casáha i, jeē cáa nájñūhun tēe cájihī, te suni nde imagen saa jíin cóo jíin quiñi cájica ndícuún ndaha.

²⁴ Te jeē yúcuan ní siaá Yaā Dios i jeē na sáha i tācá jniñu jnéhén jniñu née jēe cuní i. Te cásáha i jniñu née jíin jnáhan i jeē cúu máá jnúhun canu. ²⁵ Chi tu ní cácandíje i jnūhun ndaā Yaā Dios, chi sa ni cacandíje i jnūhun stáhú. Te cáhīyo yíñúhún i te cáchiñúhún i nuū tāca jēe ni sáha ya, lugar jeē chíñúhún i máá Yaā ni sáha ún, Yaā jeē cánúu cahān yō jeē cujéhnu ya ñíí cáni. Amén.

²⁶ Jeē yúcuan ní siaá Yaā Dios i jeē na sáha i tācá jniñu née jēe cándiyo ni i jeē cúu máá jnúhun canu. Chi nde ñahan ni casama ña modo síhí, te ni quiñi ña jíin modo neé. ²⁷ Te suni súcuan tēe ni casíáa de modo chíjiniñu jíin ñahan. Te nde ni nduquijí de ni casáha ndíyī de jíin jnáhan yíí de, te tēe jíin tēe ni casáha de

jniñu jnúhun canu. Te cándoho de castigo siquĩ jniñu néé ní casáha de.

²⁸ Te jeē tu ní cácu ni i cuajnúhún i Yaā Dios, jeē yúcuán ní siaá yā i jeē na cáni néé ni i, te sáha i tāca jniñu jeē tu íyó váha. ²⁹ Te máni máa na jniñu jeē tu íyó ndáa cándihvĩ ni, te cájica jnéni, casáha jniñu néé, cándiyo ni, cájito uhū jnáhan. Te máni jeē cáccuésún ni, cájehni ndĩyi, cájehnáhan, cástáhú, casáhuhū jnáhan, casájnúhún siquĩ jnáhan. ³⁰ Cácahān jnúhun néé síquĩ jnáhan, cájito uhū Yaā Dios, cáccujéē ni, casándúxí máa, casátéyĩ máa, cájequin costumbre neé, tu cájendetū nuū tatá nuū naná. ³¹ Te tu cá-jecūhun cuiṭi ni, tu squĩcu jnúhun jéjnúhun, tu íyó máni jíin jnáhan, tu íne cáhnu ni nuū jnáhan, tu cúndáhú ni jnáhan. ³² Te je cájini vāha i jeē ni sándaā Yaā Dios jeē ñayuu casáha súcuán, cánuū jnahnū ndetū i. Te vēsú súcuán cájini i, te níni casáha i jniñu néé un, te suni cánujnahān ni i jeē casáha jnáhan i súcuán.

Ndaā sándaā Yaā Dios siquĩ cuēchi

2 Núu súcuán te róhó jéē cahán cuēchi siquĩ jnáhan, núu na-ni ñayuu cúu ró, ma cúu cahān rō jeē tú na cuēchi máa ró. Chi jeē cahán rō cuēchi siquĩ jnáhan ró cúu jeē ndénehen ró cuēchi siquĩ máa ró. Chi róhó jéē cahán cuēchi, suni súcuán sáha máa ró cuēchi. ² Chi jíini yō jeē Yaā Dios, ndaā sáha ya jeē ndónnda ya siquĩ cuēchi ñayuu casáha súcuán. ³ Te róhó jéē cahán cuēchi siquĩ ñayuu casáha cuēchi, te suni súcuán sáha máa ró, ¿te á jéni ni rō jeē cácu máa ró quivĩ ndónnda Yaā Dios siquĩ cuēchi, chí naún? ⁴ ¿A cújéē ni rō nuū jnúhun jeē yóhoyo vāha ni Yaā Dios jíin ró, jíin jéē iyó paciencia yā jeē tú yachĩ cuāha ya castigo nuū rō? ¿Te á tu jécūhun ni rō jeē jnúhun jeē yóhoyo vāha ni yā sáha jeē nácani ni rō siquĩ cuēchi ró? ⁵ Chi níhni ni rō te tu nácani ni rō siquĩ cuēchi ró. Te jeē yúcuán cáyā gā rō castigo siquĩ rō quivĩ sáha Yaā Dios juicio, máa quivĩ jeē cóo ndijin jeē ndaā sándaā yā siquĩ cuēchi. ⁶ Chi chunaa yā nuū ná ñn ná ñn ñayuu núu ndese jniñu ni casáha i. ⁷ Te ñayuu jeē tu jécuiñĩ i jeē sáha i jniñu vāha, cuāha ya jnúhun jeē cótecu i ñfí cáni. Chi ndúcu i quivĩ i nuū ndujéhnu yíñúhún i, nuū nífí cáni cotecu i. ⁸ Te quitĩ ni yā te cuāha ya castigo nuū ñayuu cújéē ni nuū yā, te cúniñhi ni nuū jnúhun ndaā, chí sa nuū jnúhun yacuá yóho jetáhú i. ⁹ Te tāca ñayuu casáha jniñu néé, chí nihĩn i jnúndóho xeēn te cucuíhyá ndasĩ ni i, xĩhna gā ñayuu hebreo te suni súcuán ñayuu tāca gá nación. ¹⁰ Te sa suhva tāca ñayuu casáha jniñu vāha, chí quivĩ i nuū ndujéhnu yíñúhún i, te coo ndeyĩ coo siĩ ni i, xĩhna gā ñayuu hebreo te suni súcuán ñayuu tāca gá nación.

¹¹ Chi Yaā Dios tu sáha ya cuenta ndese cúu ñn ñn ñayuu, chí ñnuú sáha ya jíin i. ¹² Chi tāca ñayuu jeē casáha cuēchi, vēsú tu cáyihĩ i chíjĩ ley jeē ni jéhe ya nuū Moisés, te tu níni ley un te jnahnū ndetū i. Te tāca ñayuu cáyihĩ chíjĩ ley Moisés te casáha cuēchi, jíin ley

un sándaā yā cuēchi i. ¹³ Chi tu ndáhva Yaā Dios cuēchi ñayuu jeē maá jéē cúni nahĩn-ni i jnúhun cáhān ley yā. Chi sa suhva ñayuu squĩcu jeē cahán ley yā cúu jeē ndáhva yā cuēchi i. ¹⁴ Chi ñayuu tāca nación jeē tu cánevāha tutu ley jeē ni jéhe ya nuū ñayuu hebreo, te núu casquĩcu máa i ley yā, suu cúu jeē cánevāha i ley yā ini anuá i, vēsú tu cánevāha i tutu ley un. ¹⁵ Te súcuán cástéén i jeē jnúhun ndácu ley un chí ñúhun ini anuá i. Te tāca jéē cájini ni i jíin ánuá i, suu cúu jeē steén nuū i siquĩ núu ni sáha i cuēchi chí váha ni sáha i. ¹⁶ Te súcuán coo máa quivĩ jeē jíin Jesucristo sándaā Yaā Dios siquĩ tāca jéē tu íyó váha jeē ní cajeni sáhi ni tāca ñayuu. Súcuán cáhān jnúhun vāha ya jeē nácani ri.

Siquĩ jeē tu casquĩcu ñayuu hebreo ley Moisés

¹⁷ Te róhó cácahān rō jeē téē hebreo cácuu ró, te cátenuū rō maá ley Moisés, te cácutéyĩ ró jeē siquĩ Yaā Dios. ¹⁸ Te cájini ni rō jeē jíini rō ndese nújnahān ni yā, jíin jéē cúu nácāji vāha ró ndé-ni cúu jniñu vāha, chí ni cacutūhva ró ley un. ¹⁹ Te cájini ni rō jeē maá ró cácuu téē stéén ichi Yaā Dios nuū ñayuu tu cájini cuiṭi, jíin jéē cúu sáha ró jéē cúndijin ini anuá ñayuu cájica nájnúhun nuū néē. ²⁰ Te cájini ni rō jeē cúu stéén rō nuū ñayuu tú tūhva jnúhun ya, jíin jéē maá ró cácuu maestro nuū ñayuu tu jécūhun ni. Chi jíin tutu ley yā te cájini rō ndese cúu jnúhun ndíchĩ jnúhun ndaā, cájini ni rō. ²¹ Núu súcuán te máa ró jeē castéén nuū ñayuu, ¿te naun tu cástéén rō nuū maá ró? Te máa ró jeē cácahān jeē ma sácúihná i, ¿te naun casácúihná máa ró? ²² Te máa ró jeē cácahān jeē ma cósíquĩ ndéē i, ¿te naun casíquĩ ndéē máa ró? Te máa ró jeē cácahān jeē cácuquini ni rō ídolo, ¿te naun casácúihná ró ndajniñu jeē yúcu ini vehe ídolo? ²³ Te cácutéyĩ ró jíin ley Yaā Dios, te vēsú súcuán te casáha ró jéē cácahān ñayuu siquĩ yā, chí tu casquĩcu máa ró jnúhun ndácu ley yā ún. ²⁴ Chi súcuán yósó núu tútu iĩ: Ñayuu tāca gá nación, máni cácahān ndevāha i siquĩ Yaā Dios, jeē siquĩ cuēchi róhó ñayuu hebreo.

²⁵ Te núu casquĩcu ró ley Moisés, yūcuán na te níhĩn jniñu ndije jeē ní canihĩn rō jnunĩ circuncidar. Te núu tu casquĩcu ró ley un, te vēsú ni cuu ró circuncidar, te nájnúhun jeē tu ní cúu ró. ²⁶ Te téē tāca nación, núu casquĩcu de jniñu ndácu ley un, vēsú tu ní cániñi de jnunĩ circuncidar, núu súcuán te nájnúhun ni canihĩn de jnunĩ circuncidar. ²⁷ Te téē jeē tu ní cúu circuncidar yiquĩ cúñu de, te casquĩcu de ley yā, máa de cahān cuēchi siquĩ rō. Chi tu casquĩcu ró, vēsú cánevāha ró tutu ley un, te ni cuu ró circuncidar. ²⁸ Chi nasūu jéē cáca ichi síquĩ ñn téē sáha jeē cúu ndije de téē hebreo. Te ni nasūu jéē cúu circuncidar yiquĩ cúñu ñn téē sáha jeē cúu de téē ndaā. ²⁹ Chi sa suhva téē cúu hebreo ndije, cúu jeē ini anuá de ñúhun jnúhun ndaā. Te téē cúu circuncidar ndije, chí nde jíin ini jíin ánuá de sáha de jniñu ndaā te nasūu jéē ndíso de jnunĩ circuncidar

jeē cahán ley un cúu. Tēe cándāa súcuan, nasūu ñáyuu cájejnúhún i de, chi máá Yaā Dios.

3 ¿Núu súcuan te na vé iyó gá nuū ñáyuu hebreo jeē quéndōo vāha ga i? ¿Te ndé níhín jníñu jeē casáha i circuncidar? ² Vāha ndasí níhín jníñu. Xíhna gā nihín jníñu jeē ni jéhe Yaā Dios jnūhun ya nuū maá i. ³ Te vēsú sava i tu ní cácañdije, ¿te á suu sáha jeē ma squícu ga Yaā Dios jnūhun ni jejnūhun ya, chí naún? ⁴ Tú cuítì jeē súcuan, chi vēsú núu ndíhi ñayuu castáhú i, te Yaā Dios chi iyó ndāā yā. Chi suhva yósó nuū tútu ñi jeē ni cáhān ñi tēe jíñ yá:

Cahān ñayuu jeē iyó ndāā ni jíñ táca jnúhun cáhān ni,
te cuni i jeē iyó ndāā ní vēsú núu cácahān i siquī ní.
Achí tutu.

⁵ Te cácahān sava ñayuu jeē iyó váha jeē sáha yó cuéchi, chi cuéchi yó jéjníñu stéén jeē iyó ndāā Yaā Dios. Núu súcuan ¿te á cuu cahān yō jeē tú vāha sáha Yaā Dios jeē jéhe ya castigo núu jéjníñu cuéchi yó súcuan? (Va cáhān-ni nde ri nájnūhun cácahān ñayuu ñayíví.) ⁶ Tú cuítì jeē súcuan. Chi núu jeē tú vāha sáha Yaā Dios, ¿te ndese cuu sándaā yā cuéchi ñayuu ñayíví?

⁷ Te núu jnūhun stáhú cácahān ñayuu jéjníñu stéén jeē yóhoyo cújéhu Yaā Dios siquī jeē máni cáhān ndāā yā, ¿te á cuu cahān yō jeē tú vāha jeē cahān yā jeē cuéchi cúu jeē castáhú i? ⁸ Tuú, chi núu jeē súcuan cúu, te cuu cahān yō jeē vetū-ni sáha yó jéē neé návāha quee jeē váha núu. Te sava ñayuu cácahān ndevāha i siquī rí jeē súcuan cástéén rí, te tú ndāā. Ñayuu ún chi iyó váha jeē ndenehen ya cuéchi siquī i.

Ndivii yō iyó cuéchi

⁹ Núu súcuan ¿te á váha ga ñayuu cácuu yóhó ñáyuu hebreo vēsú inga ñayuu naún? Tú cuítì jeē súcuan. Chi je ni cacahān yō jeē vēsú ñayuu hebreo chí ñáyuu táca gá nación, ndivii yō yíhi chíji cuéchi. ¹⁰ Chi suhva cáhān tutu ñi:

Tú cuítì na ñayuu ndāā iyó, ni ñi i.

¹¹ Te tú cuítì ñayuu jécūhun ni iyó, te tú ni ñi i nánducú i Yaā Dios.

¹² Ndihi i ni cascuíta i jnūhun ya, te inuú-ni ni castívi ndíhi i máá i.

Te tú cuítì ñayuu sáha jniñu váha iyó, ni ñi i.

¹³ Yaū sucūn i cúu nájnūhun yaū ndíyi jeē núne, chí máni jnūhun stáhú cácahān i.

Te nájnūhun veneno coō yíhi yuhu i,

¹⁴ chí máni máá jnúhun ndevāha jnūhun uvuā cácahān i.

¹⁵ Te yóhoyo ñama jehē i jeē cáhni i ndíyi.

¹⁶ Te ndé-ni cúu-ni nuū cájica i te squívi i jnūndóho jeē jnahnú ndetū ñayuu.

¹⁷ Te tu cájica cuítì i jíñ jnúhun coyūcu máni i,

¹⁸ te ni tu canacani ni i jeē cónso ñyo i nuū Yaā Dios.
Achí tutu.

¹⁹ Te jíñi yō jeē táca jnúhun cáhān ley jenahán, chí cáhān nuū ñáyuu yíhi chíji ley un, návāha ndíhi i ma cúu cahān i jehē i. Chi ndenehen Yaā Dios cuéchi siquī i nde jíñ ñáyuu ñí ñáyíví. ²⁰ Chi tú ni ñi ñayuu quendōo ndāā i nuū yā jeē nducú i squícu i jniñu ndácu ley un. Chi ley un jéjníñu máni návāha cuni yō jeē iyó cuéchi yó.

Jeē jnáma ya yohó síquī jeē candíje yó jéē sáha ya jehē yō

²¹ Te vijna te je cájini vāha yó ndese ndáhva Yaā Dios cuéchi yó. Te nasūu ley un sáha jeē quéndōo ndāā yō, vēsú maá tutu ley jíñ tēe ni canacani jnūhun ya, ni cacahān ndese ndáhva yā cuéchi ñayuu. ²² Chi táca ñáyuu jeē cácañdije i jeē ni jíhi Jesucristo jeē chúnaa yā cuéchi i, chí ndahva Yaā Dios cuéchi i siquī jeē súcuan cácañdije i. Chi inuú-ni cúu táca ndíhi ñayuu. ²³ Chi ndíhi yó ni casáha cuéchi, te jeē yúcuan tu ní cúu quendōo ndāā yō nuū Yaā Dios. ²⁴ Te siquī jeē yóhoyo vāha ni Yaā Dios, jeē yúcuan ndáhva yā cuéchi yó súcuan-ni. Chi siquī jeē ni jíhi Cristo Jesús cúu jeē jnáma ya yohó. ²⁵ Chi Yaā Dios ni jeni ya Cristo návāha socō yā maá yá chunaa yā cuéchi yó jéē ni jíhi yā. Te jnáma ya yohó núu súcuan cácañdije yó. Te súcuan ni sáha Yaā Dios návāha stéén yā jeē Yaā ndāā cúu ya. Chi ichi yátá ni ñyo paciencia yā, te tu ní chíhi ya cuenta cuéchi ñayuu. ²⁶ Te tiempo yáha stéén yā jeē Yaā ndāā cúu ya, chí ndāā sáha ya jeē squéndōo ndāā yā ñayuu candíje vēsú iyó cuéchi i, chí cácañdije i jeē ní chunaa Jesús cuéchi i ni ndahva yā.

²⁷ Núu súcuan ¿te á cuu cutéyi gá yō siquī maá yó? Ma cúu cuítì, chí ma cúu cutéyi yó caní ni yō jeē vāha squícu yó ley yā. Chi jnáma ya yohó máá síquī jeē candíje yó jéē sáha ya jehē yō. ²⁸ Núu súcuan te je jíñi yō jeē ndáhva Yaā Dios cuéchi yó síquī jeē súcuan cácañdije yó, te nasūu jéē nducú yó squícu yó jéē ndácu ley.

²⁹ ¿Te á núu maá-ni ñayuu hebreo cúu ya Yaā Dios, chí naún? Tuú, chí suni cúu ya Yaā Dios jeē jnáma ñayuu táca gá nación. ³⁰ Chi ñi-ni Yaā Dios iyó, te ndáhva yā cuéchi ñayuu cácañdije jeē ni sáha ya jehē i, cúu ñayuu ndíso jnunī circuncidar, cúu ñayuu jeē tuú. ³¹ Te jeē candíje yó jéē jnáma ya yohó, ¿á sáha jeē tuá jíñi ñúhún squícu yó ley yā, chí naún? Tú cuítì, chí sa suhva sáha jeē váha ga cuu squícu yó ley yā.

Abraham cúu ñi ejemplo nuū yō

4 Núu súcuan ¿te ndese cahān yō siquī táca jéē ní cuu jíñ jí yō Abraham? ¿Ndesese ni ndahvā cuéchi de? ² Nasūu jéē ni sáha máá de cúu jeē ní ndahva Yaā Dios cuéchi de. Chi núu jeē súcuan cúu núu, te cuu cutéyi de jeē váha ni sáha de. Te tu ní cutéyi de, chí nasūu siquī jeē ni sáha máá de cúu jeē ní ndahva Yaā Dios cuéchi de. ³ ¿Chi ndese cáhān tutu ñi? Cáhān jeē ní candíje Abraham jeē sáha ya jeē ni jéjñūhun ya nuū de, te jeē yúcuan ní ndahva yā cuéchi de. ⁴ Te ñi ñayuu

sájniñu, te yāhu i chi nasūu jéē cútahū i cúu, chi jeē chúnaa yō nuū i cúu. ⁵ Te jeē jnáma Yaā Dios ñayuu, chi jeē cútahū i cúu. Chi vēsú tu cúu squícu i tãca jniñu vāha, te núu candíje i jeē jnáma ya i nuū cuēchi i, yūcuán na te ndahva yā cuēchi i. ⁶ Te David suni ni cahān de ndese yōhyo ndetū ñayuu jeē ndáhva Yaā Dios cuēchi i, vēsú tu cúu sáha i ni ñn jniñu jeē quéndōo ndaā i nuū yā. ⁷ Chi ni cahān de:

Nacā ndetū ñayuu jeē íne cáhnu ni yā nuū jniñu néé ni sáha i,
te tu ndénehen ya cuēchi siquī i.

⁸ Te nacā ndetū tēe jeē tuá chíhi máá Jítoho yō cuenta cuēchi de.
Achí tutu.

⁹ ¿Te á máni máá ñayuu squícu ley circuncidar cúu jeē quéndōo ndetū? ¿Chí suni quéndōo ndetū ñayuu jeē tu cúu circuncidar naún? Suni máá i quéndōo ndetū i. Chi je ni cahān yō jeē ní candíje Abraham jeē sáha ya jeē ni jéjnūhun ya, te jeē yúcuan ní ndahva yā cuēchi de. ¹⁰ Te ná ni ndahva yā cuēchi de, ¿á je ni cuu de circuncidar, chí ndé ná tuú? Nasūu jéé jé ni cuu de circuncidar, chi nde ná tuú. ¹¹ Te cuéé gá te ni nihīn de jnunī circuncidar. Te suu ni cuu ñn seña, nájñūhun ñn sello jeē ní ndahva yā cuēchi de siquī jeē súcuan ni candíje de. Te jeē yúcuan ní cahān yā jeē cuu de jíi nuū tãca ñayuu jeē candíje i jeē sáha ya jehē i, suni nuū ñayuu tu ní cúu circuncidar, chi suni ndahva yā cuēchi máá i. ¹² Te suni cúu de jíi nuū ñayuu ní cuu circuncidar, te nasūu máni jeē ní cuu i circuncidar, chi suni jeē ní jñi i ejemplo de. Chi cáncandíje i jeē sáha ya jehē i, nájñūhun ni candíje máá de nde ná tu cuu de circuncidar.

Núu candíje yó te sáha Yaā Dios jeē ni jéjnūhun ya

¹³ Chi ni jejnūhun Yaā Dios nuū Abraham jíin núu tãca yúcūn de jeē cuāha ya ññ ñáyiví cuu tahū de. Te nasūu síquī jeē ní nducú de squícu de ley yā cúu jeē ní jejnūhun ya un núu de, chi sa suhva siquī jeē ní candíje de jeē ni jéjnūhun ya, te ni ndahva yā cuēchi de.

¹⁴ Chi núu jeē máni máá ñayuu nducú squícu ley cúu jeē nihín jeē ni jéjnūhun ya, núu súcuan te cáncandíje cāha yó nuú, te ma nihín jniñu jeē ni jéjnūhun ya ún.

¹⁵ Te ley chi sáha jeē nihín ñayuu castigo siquī jeē tu cúu squícu i. Te núu jeē tu ley, te suni tú na jñūhun stévi ñayuu siquī ley coo núu.

¹⁶ Núu súcuan te ni jejnūhun ya jeē sáha ya jeē váha jíin ñayuu siquī jeē candíje i jeē súcuan sáha ya, te jeē cútahū i súcuan-ni cúu. Te jeē ni jéjnūhun ya ún, íyó cutú nuū tãca yúcūn Abraham, te nasūu núu maá-ni ñayuu jeē nducú squícu ley jenahán, chi suni nuū tãca ñayuu cáncandíje nájñūhun ni candíje Abraham. Te súcuan cúu de jíi nuū tãca yó jeē cáncandíje yó.

¹⁷ Súcuan ni sáha Yaā Dios chi ni candíje de jeē sáha ya. Chi súcuan cáhán tutu íi: Ni jeni ri rohó cuu ró jíi nuū cuehē ndasí ñayuu. Súcuan ni cahān máá Yaā jeē

nastécu ndīyi te cáhán yā ndese coo tãca jéé ná tu coo.

¹⁸ Te ni candíje de, te ni cocuhun teyí ni de jeē ni jéjnūhun ya jeē coo cuehē yucūn de, vēsú tuá na modo coo sēhe de núu. Te jeē yúcuan ní nduu de jíi nuū cuehē ndasí ñayuu, nájñūhun ni cahān Yaā Dios: Súcuan nducuehē yucūn rō, achí yá jíin de. ¹⁹ Te je yajni jinū de ciento cuiyā, te vēsú súcuan te tu ní quénda de nuū jñūhun cáncandíje de, vēsú jiní de jeē maá de jíin ñasihí de Sara je jéhnū ndasí ndíndúu de jeē ma cúu ga coo sēhe de. ²⁰ Te tu ní nácani siquí ni de jeē ma cáncandíje ga de jñūhun ní jejnūhun Yaā Dios jeē coo sēhe de. Chi sa suhva ni candíje nihin ga de, te ni nacuatáhú de nuū Yaā Dios. ²¹ Chi ni cucáhnu vāha ni de jeē cúu squícu Yaā Dios ndīhi jeē ni jéjnūhun ya. ²² Te jeē yúcuan ní ndahva yā cuēchi de siquī jeē súcuan ni candíje de.

²³ Te nasūu máá-ni siquī Abraham cúu jeē yosó núu tútu jeē ní ndahva yā cuēchi de jeē ní candíje de. ²⁴ Chi suni yósó jéé siquí yohó jíinánhan yó. Chi suni ndáhva yā cuēchi máá yó jéé candíje yó jéé cúu ya Yaā ní nastécu Jitoho yō Jesús. ²⁵ Chi ni jihī Jesús jeē chúnaa yā cuēchi yó, te ni natecu yā návāha ndahva Yaā Dios cuēchi yó.

Ndese quéndōo ñayuu jeē ndáhva yā cuēchi

5 Núu súcuan te je ni ndahva Yaā Dios cuēchi yó síquī jeē ní candíje yó jéé sáha ya jehē yō. Te jeē yúcuan ní sáha ya jeē ní ndīvi yó núu jñūhun manī yā jíin yó, siquī jeē ni jíhī Jitoho yō Jesucristo jehē yō. ² Chi máá Cristo ni sáha jeē ni quíivícoo yó núu Yaā Dios, chi ni sáha ya jeē váha yóhó síquī jeē súcuan cáncandíje yó. Te cáhīn nihin yó jíin jñūhun jeē sáha ya jeē váha yóhó. Te cúsiñ ni yō chi ñūhun ni yō jeē jinú yō nuū lúu cujéhnū yó jíin Yaā Dios. ³ Te nasūu máá yáha-ni, chi suni cúsiñ ni yō jeē ndóho yó jnúndóho. Chi jíin yō jeē maá jnúndóho sáha jeē jéndeýí ni yō. ⁴ Te jeē jéndeýí ni yō sáha jeē íje vāha yó cuu yó ñayuu ndaā. Te jeē íje vāha yó sáha jeē ñūhun ni yō tãca jéé váha jeē cóo. ⁵ Te tãca jéé ñūhun ni yō, chi nihīn nahín yó. Chi jñūhun cúndáhú ni Yaā Dios yohó, ni cunuú ini anuá yō, sáha Yaā Dios jeē jíin Espíritu Santo jeē ni jéhe ya nuū yō.

⁶ Chi náa ndóho yó jéé ma cúu cuiti jnama yó máa yó, te ni jihī Cristo jehē yohó jéé cúu yó ñayuu íyó cuēchi. Te ni jihī yā maá quíiví jeé jé ni jeni Yaā Dios. ⁷ Te yíí cúu jeē cúu ñn ñayuu jehē inga ñayuu, vēsú jehē ñn ñayuu ndaā. Chí sanaa te íyó jínu jeē chúndeýí ni ñn tēe cuu de jehē ñn tēe ndaā vāha. ⁸ Te máá Cristo chi ni jihī yā jehē yō náa máni cuēchi sáha yó, te súcuan ni steén Yaā Dios jeē cundáhú ni yā yohó. ⁹ Te vijna je ni ndahva Yaā Dios cuēchi yó síquī jeē ni jíhī Cristo jehē yō. Núu súcuan te suni jíin vāha yó jéé jnama Cristo yohó núu castigo quiiji quíiví sáha Yaā Dios juicio. ¹⁰ Chi náa cúu ga yō enemigo Yaā Dios, te siquī

jeē ni jīhī Sēhe ya jehē yō, te ni sáha ya jeē ndívi yó nūū jnúhun manī yā jíin yó. Te jeē súcuan ní ndívi yó nuū jnúhun manī yā jíin yó, te suni jíní vāha yó jéē cācu yó síquī jeē técu Cristo, nduú yá jíin yó. ¹¹ Te nasūu máá yáha-ni, chi suni cúsiñ ndasí ni yō jíin Yaā Dios síquī jeē ni sáha Jitoho yō Jesucristo jehē yō, chi máá yá ni sáha jeē ní ndívi yó nūū jnúhun manī Yaā Dios jíin yó.

Jnúhun Adán jíin jnúhun Cristo

¹² Nūū súcuan te jíní yō jeē ni quívi cuēchi ini ñayīvi ní sáha máá ñn-ni tēe Adán. Te jeē síquī cuēchi yúcuan te ni jecōo cuehyī jéñi ñayuu. Te jeē yúcuan cúu jeē jíhí ndíhi ñayuu, chi ndíhi i yíhi cuēchi. ¹³ Te nde ná tu cuāha ya ley nuū Moisés, te je íyó cuēchi ini ñayīvi. Te síquī jeē ná tu coo ley yā, te tu ní chíhi ya cuenta jeē castívi i. ¹⁴ Te vésú súcuan te nde tiempo Adán te nde tiempo Moisés ni yíhi ñayuu chíhi cuehyī jeē jéñi i síquī jeē iyó cuéchi i. Chi ni jíhí i síquī cuēchi ni casáha máá i, vésú tu ní sáha i jnáhan cuēchi jeē ni sáha Adán jeē ní cuníñni ni de nuū ñn jniñu ní ndacu ya. Te Adán ni cuu de ñn muestra máá Yaā ní quiji cuéé gá.

¹⁵ Te jnúhun jeē ni sáha Adán cuēchi, tu quíjnáhan cuítí jíin táhū jeē jnáma Yaā Dios yohó. Chi jeē ni stívi máá ñn-ni tēe ún, jeē yúcuan cúu jeē jíhí ndíhi yó. Te jnúhun jeē jnáma Yaā Dios yohó cújéñu ndasí gá, chi síquī jeē ni sáha máá ñn-ni tēe Jesucristo cúu jeē súcuan-ni jnáma ya ndíhi ñayuu candíje. ¹⁶ Te cuēchi jeē ni sáha máá ñn-ni Adán, tu quíjnáhan cuítí jíin jnúhun jeē jnáma Yaā Dios yohó. Chi síquī máá ñn-ni cuēchi ún te ni quívicoo ñayuu chíhi jnúhun jnahnū ndetū i. Te jnúhun jeē jnáma ya ñayuu, sa suhva sáha jeē súcuan-ni ndáhva yā cuēchi i, vésú yóhoyo cuehē cuēchi ni casáha i. ¹⁷ Chi síquī jeē ni sáha máá ñn-ni tēe Adán cuēchi, te ni nihīn poder cuehyī jéñi ñayuu. Te sa suhva síquī jeē ni jíhí máá ñn-ni tēe Jesucristo, te víhyá gā ni nihīn ñayuu máá yá poder jeē cótecu i caca ndaā i jíin yá. Chi ni ndáhva yā cuēchi i síquī jeē yóhoyo vāha ni yā.

¹⁸ Nūū súcuan te síquī jeē ni sáha máá ñn-ni tēe Adán cuēchi, te ni quívicoo ndíhi ñayuu chíhi jnúhun jnahnū ndetū i. Te sa suhva síquī jeē ni sáha máá ñn-ni tēe Jesucristo ñn jniñu vāha ndasí, te ndáhva Yaā Dios cuēchi ndíhi ñayuu te cotecu i ní cání. ¹⁹ Chi síquī jeē tu ní jéndije máá ñn-ni tēe, te ni quívicoo cuehē ndasí ñayuu chíhi cuēchi. Te suni súcuan síquī jeē ní jéndije máá ñn-ni tēe Jesucristo, te ndáhva Yaā Dios cuēchi cuehē ndasí ñayuu.

²⁰ Te ni jēhe ya ley yā návāha cuni yō jeē cuéhē cuēchi casáha yó. Te jeē ní nducuehē cuēchi yó, te víhyá gā cuehē cúu jnúhun jeē vāha ni yā jeē íne cáhnu ni yā nuū yō. ²¹ Nūū súcuan te nájnūhun ni nihīn poder cuehyī jéñi ñayuu síquī jeē iyó cuéchi i, suni súcuan íyó poder jnúhun jeē vāha ni yā jíin yó. Chi

ndáhva yā cuēchi yó te cotecu yō ní cání síquī jeē ni jíhí Jitoho yō Jesucristo jehē yō.

Jeē tuá yíhi yó chíhi cuēchi chi yíhi yó ndaha Cristo

6 Nūū súcuan ¿te ndese cahān yō? ¿A caca ga yō jíin cuēchi návāha víhyá gā sáha ya jeē vāha yóhó jéē cóne cáhnu ni yā nuū yō? ² Ma cúu cuítí. Chi nájnūhun je ni jíhí yō jeē tuá yíhi yó chíhi cuēchi, te ma cúu ga caca yó jíin cuēchi nūú súcuan. ³ ¿A tu cá-jecūhun ni rō jeē tāca yó jeē ní jendute yó síquī jeē ni quívi yó ndaha Cristo Jesús, suni ni jendute yó síquī jeē ni quívi yó chíhi jnúhun jeē ni jíhí yō jíin yá? ⁴ Chi jeē ní jendute yó cúu nájnūhun ni quindūji yó jéē ni jíhí yō jíin yá. Te vijna te cuu caca yó jíin vida jeé jeē ni jéhe ya nuū yō, chi nájnūhun suni ni natecu yō jíin yá. Chi ni natecu yā ni sáha Tátá yā jíin poder jeē cújéñu ndasí yá.

⁵ Chi nūú ni cundúú yó jíin yá síquī jnúhun jeē ni jíhí yō jíin yá, te suni súcuan cundúú yó jíin yá síquī jnúhun jeē ní natecu yō jíin yá. ⁶ Chi jíní yō jeē ní naa modo máá yó jeē ni jica yó jíin ichi yátá, chi ni quívi yó nūū jnúhun jeē ni jíhí yō jíin Cristo jicā cruz. Te súcuan ni naa modo yō jeē cúu yó mozo nuū cuēchi, návāha tuá cuajniñu yó nūú tācá jniñu jeē máni cuēchi cúu. ⁷ Chi ñayuu jeē jé ni cajihí, je ni quendacoo i chíhi tāca cuéchi. ⁸ Te nūú je ni jíhí yō jíin Cristo, te cándíje yó jéē suni súcuan ni natecu yō jíin yá. ⁹ Chi jíní yō jeē ní natecu Cristo, te ma cúu cuítí ga yā, chi cuehyī jéñi yóhó, tuá na vé cúu sáha jíin yá. ¹⁰ Chi jeē ni jíhí yā, te ñn jínu-ni ni jíhí yā jeē síquī cuēchi ñayuu. Te jeē técu yā vijna, chi sáha ya jeē cuní Yaā Dios. ¹¹ Te suni súcuan róhó jíjnáhan ró, sáha ró cuenta jeē nájnūhun ni cajihí rō jeē ní quendacoo ró chíhi cuēchi. Te cátecu rō návāha sáha ró jéē cuní Yaā Dios, chi ndúú ró jíin Jítoho yō Cristo Jesús.

¹² Nūū súcuan te ma cuáha ga rō jnúhun quíhi ró chíhi cuēchi jíin yíqui cúñu rō jeē cúu. Chi cuēchi ún stíhví ni rohó jéē na sáha ró táca jéē ndíyo néé ni rō. ¹³ Te ma cuáha ró máá ró cuajniñu ró nūú cuéchi jeē cócuu ró jíin jniñu néé. Chi sa suhva cuāha ró máá ró nuū Yaā Dios, te sáha ró cuenta jeē nájnūhun je ni cajihí rō te ni canatecu rō nuū yā. Te cuāha ndíhi ró máá ró nuū yā jeē cuajniñu ró nūú jniñu ndaā. ¹⁴ Chi tuá na poder cuēchi jeē cundeyí jíin ró, chi tuá cáyihí ró chíhi ley jenahán, chi sa cáyihí ró chíhi jnúhun jeē vāha ni yā jíin ró.

Jnúhun mozo jeē steén ndese quéndōo ñayuu cácadí-je

¹⁵ ¿Ndesé sáha yó nūú súcuan? ¿A caca ga yō jíin cuēchi síquī jeē tuá yíhi yó chíhi ley jenahán, chi sa yíhi yó chíhi jnúhun jeē vāha ni yā jíin yó? Ma cúu cuítí.

¹⁶ Chi cájini rō jeē nūú cuāha ró máá ró jeē cuatáhú ró sájniñu ró nūú ñn tēe, nūú súcuan te cácuu ró mozo nuū tēe ún, te cánuú cuandije ró nūú de. Te suni

súcuan núu cuāha ró máá ró jeē sāha ró cuéchi, te mozo cuēchi cácuu ró, te cuu rō. Te núu cuatáhú ró nuū maá yá, te mozo yā cácuu ró jēē cáca ndaā rō. ¹⁷ Te na cútahū yō nuū Yaā Dios, chi vēsú ni cacuu ró mozo nuū cuéchi, te vijna chi nde jíin ini jíin ánuá rō ni cajetáhú ró nuū jnúhun ya jeē ni quévicoo ró núu. ¹⁸ Te vijna te je ni nduu libre rō jeē tuá cácuu ró mozo nuū cuéchi, te cájéjníñu ró núu jníñu ndaā. ¹⁹ (Ni cahān rī ñn jnúhun ndese cúu siquī mozo ini ñayīvi yáha, chi tu cájecūhun yachī ni rō siquī jnúhun ya.) Núu súcuan te nájnūhun ni cajēhe ró máá ró nde saá jeē ní cajéjníñu ró núu tācá jniñu jnéhén jniñu neé, suni súcuan cuāha ró máá ró vijna jeē cuajniñu ró núu jníñu ndaā, návāha coo ndoo coo ī rō nuū Yaā Dios.

²⁰ Chi nde náa cácuu ró mozo nuū cuéchi, te tu ní cájéjníñu ró núu jníñu ndaā. ²¹ ¿Te na vé ni canihīn rō siquī cuéchi ni casáha ró un jēē cácuu rō vijna sāha? Tú cuiti, chi máá jēē jnahnú ndetū rō ñí cáni sāha. ²² Te vijna te je ni canduu libre rō jeē tuá cácuu ró mozo nuū cuéchi, te cájéjníñu ró núu Yaā Dios. Te suu sāha jeē quéndōo vāha ró, chi cáhīyo ndoo cáhīyo ī rō nuū yā, te nde sandīhí te cotecu rō ñí cáni. ²³ Chi yāhu jeē nihín ñayuu siquī cuéchi cúu jeē jnahnú ndetū i. Te sa tahū jeē jéhe Yaā Dios cúu jeē cótecu yō ñí cáni andiví, siquī jeē nduu yó jíin Jítoho yō Cristo Jesús.

Jnúhun ñasīhí jíin yī jeē steén ndese quéndōo ñayuu cácadíje

7 Hermano, je cájini rō ndese cáhán ley yā, te cájini rō jeē yīhí ñayuu chíji ley maá-ni núu técu i ñayīvi yáha. ² Te yāha cúu nájnūhun ñn ñahan jeē ní qui-jnáhan, chi cáhán ley jeē yīhí ña ndaha yī ña maá-ni núu técu de. Te núu ni jihī yī ña, te je ni quenda ña chíji ley jeē ní qui-jnáhan ña jíin de. ³ Núu súcuan te núu qui-jnáhan ña jíin ñga tēe níni técu gā yī ña, te cásquí ndéē ña de. Te núu je ni jihī yī ña, te je ni quenda ña chíji ley un. Te cuu qui-jnáhan ña jíin ñga tēe, chi nasūu jēē casquí ndéē ña núu súcuan.

⁴ Te suni súcuan róhó jíjnáhan ró, ñánī mánī, chi ndúú ró jíin Cristo. Chi nájnūhun ni cajihī rō jíin Cristo, te ni quendacoo ró chíji ley jenahán. Te vijna chi nájnūhun ni qui-jnáhan ró jíin ñga, cúu jeē ní quévicoo ró ndaha Cristo, Yaā ni natecu mēhñu ndīyi, návāha cuu sāha ró jniñu vāha jeē cuní Yaā Dios. ⁵ Chi ná ni cajica yó jíin modo maá yó nde saá, te ley un ní sāha jeē ní ndīyo neé ni yō tāca jēē cuní yiqui cúñu yō jeē sāha yó. Te yūcuan ní sāha jeē jnahnú ndetū yō nuú. ⁶ Te vijna te je ni quenda yó chíji ley jenahán, chi nájnūhun je ni jihī yō jeē ma nihín gā poder siquī yō. Te súcuan te íyó libre yō jeē cuajniñu yó núu Yaā Dios. Te jíca yó jíin modo jeē jēē cuní maá Espiritu, chi tuá yīhí yó chíji ley jeē ní tee Moisés jenahán.

Siquī cuéchi jeē ñúhun ini anuá yō

⁷ ¿Ndese cahān yō núu súcuan? ¿A ley ndiso cuéchi? Tú cuiti jeē súcuan. Te núu jeē tú ley yā, te ma cúní cuiti rī jeē íyó cuéchi rī. Chi ma cúní rī jeē cuéchi cúu jeē ndīyo ni rī ndajniñu jnáhan rī núu tu ní cáhán ley jeē ma ndīyo ni yō. ⁸ Te súcuan ni nihín cuéchi modo cocuu jíin rī. Chi siquī jeē ndácu ley jniñu jeē ma sāha yó cuéchi, te ni quejéé ndīyo ni rī sāha rī tāca jēē neé. Te núu jeē tu ley, te suni tú na jnúhun stāvi yó siquī ley nuú. ⁹ Chi ni ñyo tiempo jeē técu rī jeē ná tu jecūhun ni rī jeē cahán ley. Te ná ni quejéé rī jécūhun ni rī jniñu jeē ndácu ley, te ni jecūhun ni rī jeē íyó cuéchi rī, te ni nduu rī nájnūhun ndīyi. ¹⁰ Chi ni jini rī jeē ley jeē sāha jeē cótecu anuá rī nuú, te tuú chi sa ní sāha jeē jnahnú ndetū rī nuú. ¹¹ Chi jíin jēē ndácu ley un jniñu, te ni nihín cuéchi modo cocuu jíin rī, te ni stahú ruhū. Chi jíin jēē ndácu ley jniñu, te cuéchi ni sāha jeē ní quenda jnúhun jeē jnahnú ndetū rī.

¹² Núu súcuan te íyó ndáa maá ley, te tācá jniñu ndácu chi íyó ndoo íyó ndáa vāha. ¹³ Núu súcuan te ley jeē íyó vāha ún, ¿á suu sāha jeē jnahnú ndetū rī naún? Tú cuiti. Chi sa suhva maá cuéchi cúu jeē sāha jeē jnahnú ndetū rī, te súcuan stúu cuéchi ndese íyó máa. Chi jíin jniñu vāha jeē ndácu ley te ni natūu jniñu neé jēē cúu cuéchi.

¹⁴ Chi jíni yō jeē nuū maá Espiritu vēji ley. Te ruhū chi sa névāha rī ñn modo neé máa rī jeē ni squīvi ruhū jeniñu cáha rī nuū cuéchi. ¹⁵ Chi tāca jēē sāha rī, tu jécūhun ni rī najehē cúu jeē sāha rī. Chi jniñu vāha jeē cuní rī sāha rī, tu ndé níhín rī fuerza sāha rī, chi sa suhva sāha rī jniñu neé jēē tu cúvāha ni rī sāha rī. ¹⁶ Te náa sāha rī jniñu neé jēē tu cúní rī sāha rī, núu súcuan te nácuni rī jeē íyó ndáa ley. ¹⁷ Núu súcuan te nasūu rúhū cúu jeē sāha jniñu neé un, chi modo neé jēē ñúhun ini anuá rī cúu jeē sāha cuéchi. ¹⁸ Chi jíni rī jeē modo maá rī jeē névāha rī ini anuá rī, tú cuiti na vé jeē vāha íyó. Chi cúní rī sāha rī jniñu vāha, te tu ndé níhín rī fuerza sāha rī. ¹⁹ Chi jniñu vāha jeē cuní rī sāha rī, tu sāha rī. Te jniñu neé jēē tu cúní rī, sa yūcuan sāha rī. ²⁰ Te náa sāha rī jniñu jeē tu cúní rī sāha rī, te nasūu rúhū cúu jeē sāha, chi modo neé jēē ñúhun ini anuá rī cúu jeē sāha.

²¹ Núu súcuan te ni jini rī jeē súcuan cúu jíin rī: Vēsú cuní rī sāha rī jniñu vāha, te sa máni modo neé cúu jeē ñúhun ini anuá rī. ²² Chi cúsiñi ni rī jíin ley Yaā Dios nde jíin ini anuá rī. ²³ Te ni nacuni rī jeē íyó ñga modo neé máa rī jeē jésí nuū jeē cuní rī sāha rī jeē vāha. Te cúu rī nájnūhun preso nuū cuéchi jeē jícu jíin rī.

²⁴ Nacā jeē ndahú gá cúu rī núu súcuan. ¿Ndé ñn jnama ruhū nuū modo neé máa rī jeē jícu jíin rī jeē jnahnú ndetū rī? ²⁵ Na cútahū ndasí rī nuū Yaā Dios, chi máa yá cúu jeē jnáma ruhū nuū modo neé rī siquī jeē ni jihī Jitoho rī Jesucristo jehē rī. Núu súcuan te vēsú cuní yō squícu yó ley Yaā Dios, te jeē jíin fuerza maá yó

ma cúu, chi modo neé máá yó sáha jeē jejniñu cāha yó nuū cuéchi.

Siquī jeē jíca yó jíin modo cuní Espíritu Yaā Dios

8 Núu súcuan te ma ndénehen Yaā Dios cuēchi siquī ñayuu cáyihí ndaha Cristo. Chi tuá cájica i jíin modo neé máá i, chi sa suhva cájica i nájnūhun cuní máá Espíritu yā. ² Chi modo jeē sáha Espíritu cúu jeē técu yō siquī jeē yíhi yó ndaha Cristo Jesús. Te yūcuan ní sáha jeē ní nduu libre yō nuū jnúhun jeē ni yíhi yó chíji cuēchi jeē jnahnú ndetū yō nuú. ³ Chi ni sáha Yaā Dios jeē quéndō vāha ñayuu jeē tu ní cúu quendō vāha jíin ley Moisés, siquī jeē tú na fuerza i jíin modo máá i jeē squícu i ley un. Chi ni tají yá Sēhe ya ni quiji, te ni nduu ya nájnūhun ñayuu cáhīyo cuēchi, návāha socō yā máá yá siquī cuéchi, vēsú tú na cuēchi ya. Te súcuan ni ndonda Yaā Dios siquī cuéchi jeē ní casáha ñayuu jíin modo neé máá i. ⁴ Súcuan ni cuu návāha cuu squícu yó táca jniñu ndaā jeē ndácu ley, chi tuá jíca yó jíin modo neé máá yó, chi jíca yó nájnūhun cuní máá Espíritu.

⁵ Chi ñayuu jeē cájica jíin modo neé máá, chi máni ndíhví ni i siquī jeē cuní máá i. Te ñayuu jeē cájica nájnūhun cuní Espíritu, chi máni ndíhví ni i siquī jniñu cuní máá Espíritu. ⁶ Te jeē ndíhví ni yō siquī modo cuní máá yó sáha jeē jnahnú ndetū yō. Te jeē ndíhví ni yō siquī jniñu cuní máá Espíritu, sa suhva sáha jeē cotecu yō ní cāni te coo ndeyí coo síñ ni yō. ⁷ Chi ñayuu jeē ndíhví ni siquī modo neé cuní máá i, chi jíto uhū i Yaā Dios, chi tu cuní i cuatáhu i ley Yaā Dios, te ni ma cúu squícu i. ⁸ Jeē yúcuán, ñayuu jíca jíin modo cuní máá, tu cúu sáha i jeē cúsiñ ni Yaā Dios jíin i.

⁹ Te máá ró jijnáhan ró, chi tuá cájica ró jíin modo cuní máá ró, chi cájica ró nájnūhun cuní Espíritu, chi ndéé Espíritu Yaā Dios ini anuá rō. Te ñayuu jeē tu ndéé Espíritu Cristo ini i, tu cáyihí i ndaha ya. ¹⁰ Te núu ndéé Cristo ini rō, te vēsú ñn quiví te cuu yiqui cúñu rō jeē siquí cuēchi, te cotecu anuá rō siquī jeē ní ndahva Yaā Dios cuēchi ró. ¹¹ Te núu ini rō jijnáhan ró ndéé Espíritu máá Yaā jeē ní nastécu Cristo Jesús mēhñu ndíyí, yūcuán na te máá yá suni sáha ya jeē natecu yiqui cúñu rō jeē cúu. Te sáha ya súcuan jeē jíin máá Espíritu yā jeē ndeé ini rō.

¹² Núu súcuan, hermano jijnáhan ró, ndéé jniñu yó jéé caca ndaā yō, te nasūu jéé sáha yó modo neé cuní máá yó. ¹³ Chi núu caca ró jíin modo neé máá ró, te jnahnū ndetū rō. Te núu jíin fuerza máá Espíritu snāā rō táca jniñu cásáha ró jíin modo neé máá ró, te cote-cu rō ní cāni.

¹⁴ Chi táca ñayuu jeē cándiquin modo jeē steén Espíritu Yaā Dios, máá i cácuu sēhe Yaā Dios. ¹⁵ Chi Espíritu jeē ní canihin rō, tu ní sáha ya rohó jéé cuu ró nájnūhun mozo nuū yā jeē yūhú tucu ró núu yā, chi sa ni sáha ya jeē cúu yó sēhe ya. Te jeē yúcuán cúu jeē cahán jee yó: Tátá máá ná. ¹⁶ Te máá Espíritu steén yā

ini anuá yō jeē cúu ndije yó sēhe Yaā Dios. ¹⁷ Te núu sēhe ya cácuu yó, te suni nihin yō máá táhū jeē ni jéjnūhun ya, te ñn cáhnu-ni coo tahū yō jíin Cristo. Chi núu ndóho yó jíin yá vijna, suni cujéhnu yó jíin yá andiví.

¹⁸ Núu súcuan te sáha ri cuenta jeē táca jnúndóho jeē ndóho yó vijna, lúlí ndasí cúu nuū jnúhun jeē cujéhnu luu yó jíin yá cucuéé gá. ¹⁹ Chi ndíhi jeē ni jécōo, yōhyo cándētu jeē na sáha Yaā Dios jeē nduvāha, quiví quénda ndijin jeē cujéhnu sēhe Yaā Dios jijnáhan i.

²⁰ Chi táca jéé ni jécōo, chi ni quiví chíji jnúhun jeē tu quéndō vāha. Te nasūu jéé ní castíví máá, chi ñayuu ni casáha cuēchi, te jeē yúcuán ní squéndō Yaā Dios súcuan. Te máni cándētu jeē nduvāha. ²¹ Chi ñn quiví te táca jéé ni jécōo, chi quenda chíji jnúhun jeē tíví jíin jéé tehyú. Te nduluu ndasí nájnūhun coo táca sēhe Yaā Dios, chi cácu nuū jnúhun jeē tu quéndō vāha.

²² Chi jíin yō jeē táca jéé ni jécōo, chi nde vijna te nájnūhun ñnuú-ni cándoho te cájitū ni jeē na nduvāha ndíhi. ²³ Te nasūu máá-ni táca jéé ni jécōo cúu jeē ndóho, chi suni nde máá yó ndóho yó, vēsú je névāha yó Espíritu jeē cúu seña jeē ñn quiví te nihin yō ndíhi tahū yō. Chi yōhyo ndóho yó jnúndóho, te ndétu yó jéé náquihin sēhe ya yohó te jnama ya yiqui cúñu yō jeē tuá ndoho yó jíin. ²⁴ Chi ni jnama ya yohó siquī jeē ñúhun ni yō jeē súcuan coo. Te núu je ni sáha ya nájnūhun ñúhun ni yō, yūcuán na te tuá ñúhun ni yō jeē sáha ya súcuan jíin yó. Chi tuá ndétu yó te núu je ni cuu súcuan. ²⁵ Te núu ná tu coto yó jéé sáha ya jeē ñúhun ni yō, yūcuán na te jíin paciencia ndétu yó jéé sáha ya.

²⁶ Te suni súcuan máá Espíritu chindéé ñáhán yá yohó jéé tú na fuerza ini yō. Chi tu jíin yō cacān tahú yō nájnūhun cánuú. Te máá Espíritu cahán ndahú yá jíin Yaā Dios jehē yō siquī táca jéé jítu ndasí ni yō te tu níhin yō jnúhun ndese cacān tahú yō. ²⁷ Te máá Yaā Dios jeē jíto ndee anuá yō, chi jíin yā táca jéé cuní máá Espíritu cahán yā jehē yō. Chi ñayuu cáyihí ndaha Yaā Dios, cáhán ndahú Espíritu jehē i nájnūhun cuní Yaā Dios.

Vāha-ni cúndeyí yó siquī ndíhi jeneé

²⁸ Te jíin yō jeē táca-ni jeē quíji nuū ñayuu maní jíin Yaā Dios, jeē váha chí jéé uhú, chi quéndō vāha ga i nuū yā, sáha ya jíin táca jéé yúcuán. Chi cácuu i ñayuu jeē ní cana ya i ni quivícoo i ndaha ya siquī jeē súcuan ni tee ni yā nde jenahán. ²⁹ Chi nde ná tu coo i te je jíin yā i, te je ni jeni ya i jeē ndoo ndaā nduu ánuá i ndacu i máá Séhe ya, návāha na cúu Séhe ya ñani jéhnu nuū cuehē ñayuu cácuu ñani cácandíje. ³⁰ Te jeé ní jeni ya i, te suni ni cana ya i. Te jeé ní cana ya i, te suni ni ndahva yā cuēchi i. Te jeé ní ndahva yā cuēchi i, te suni ni sáha ya jeē cujéhnu i.

³¹ ¿Te ndese ga cahán yō siquī jnúhun jéhnu yáha núu súcuan? Chi núu íne Yaā Dios jíin yó, ¿te ndé ñn

cuu cahān siquī yō? Tú ni ñn. ³² Chi máá yá tu ní jnáma ya Sēhe ya jeē ma cúu yā, chi sa suhva ni jēhe ya Sēhe ya ni jihī yā jehē ndīhi yó. Te núu súcuan ni jēhe ya Sēhe ya, te nagā ni cuu jeē ma cuáha ya tāca gá jeē jíni ñúhún yó. ³³ ¿Te ndé ñn cuu cahān cuēchi siquī ñayuu jeē ní nacāji Yaā Dios? Tú ni ñn. Chi máá yá ni ndahva yā cuēchi i. ³⁴ ¿Te ndé ñn cuu ndenehen cuēchi siquī yō núu súcuan? Tú ni ñn. Chi máá Cristo cúu jeē ni jihī yā jehē yō, te suni ni natecu yā. Te vijna te ndéé yá lado váha Yaā Dios nuū cujéhu ya, te cáhán ndahú yá jíin Yaā Dios jehē yō. ³⁵ ¿Te ndé ñn cuu quenehen yóhó núu jnúhun cúndáhú ni Cristo yohó? ¿A jnúndóho, chí táca jéé yíí sáha, chí jéé cájito xeēn ñayuu yohó, chí jnámā, chí jéé cúmanī sahma, chí jnúhun yúhú, chí jéé cáhni i yóhó naún? Ni ñn tāca jéé yáha. ³⁶ Chi súcuan yósó núu tútu íi jeē cácahān ñayuu cácañdije jíin Yaā Dios:

Jeē siquí máá ní te ndīhi-ni hora cácuni i cahni i sáñá.

Te cásáha i jíin ná nájñuhun cásáha i jíin lanchi, quití cúu.

Achí tutu. ³⁷ Te tuú chi vésú cándoho yó táca jéé yáha, te váha-ni cúndeyí yó siquī ndīhi-ni, sáha máá Yaā jeē ní cundáhú ni yohó. ³⁸ Jeē yúcuan cúcáhu ni rī jeē tú ni ñn cuu quenehen yóhó núu jnúhun cúndáhú ni Yaā Dios yohó. Ni núu cuu yō, ni núu cotecu yō, ni táca ndajéhé andiví, ni táca jéé neé jéé cácujuhnu jñí poder, ni jeē iyó vijna, ni jeē cóo, ³⁹ ni jeē iyó núu sūcún, ni jeē iyó núu cúnú, ni táca gá jeē ní jecōo, ma cúu cuití quenehen yóhó núu Yaā Dios, jeē jíin Jítoho yō Cristo Jesús ni cundáhú ni yā yohó.

Siquí ndese ni nacāji ya yucūn Israel

9 Te cáhán ndaā rī chí cúu ri tēe cándije Cristo, te tu stáhú rí, te jíin rī ini anuá rī jeē cahán ndaā rī sáha Espíritu Santo. ² Yóhoyo cúcuíhyá ni rī, te níni jnáhuñu ni anuá rī ³ jeē siquí táca jnáhan ri ñayuu nación hebreo, chí ñn-ni yucūn rī jijnáhan ri. Chí jeē siquí máá i te cúu ni rī jeē núu na cúu te cujiyo ri nuū Cristo te jnahnū ndetū rī, návāha jíin yúcuan te cuu cācu ánuá máá i núu. ⁴ Chí cácuu i yucūn ñayuu Israel, te nde jenahán ni sáha Yaā Dios jeē cúu i sēhe ya, te mēhñu vícō jeē ndíndēé ní condee yā jíin i sáá. Te jíin máá i ni sáha ya táca contrato, te ni jēhe ya ley yā nuū Moisés jeē cúu máá i, te ni steén yā ndese chíñúhún i ya ini templo, te nuū máá i ni jejnūhun ya cuehē jnūhun. ⁵ Te máá i cácuu yucūn tāca jíi yō jeē ní cacu-jéhu, te suni yucūn máá i ni cacu Cristo jeē ní nduu ya tēe. Te máá yá cúu Yaā Dios jeē jñí ndīhi-ni, te ñíí cáni cahān ñayuu jeē cujéhu ya. Amén.

⁶ Te nasūu jéé tu ní quéé ndaā tāca jnúhun jeē ni jéjnūhun Yaā Dios nuū ñayuu Israel. Chí ni quee ndaā nahín núu vésú jecu-ni i, chí tú ndīhi-ni yucūn Israel cúu jeē cácañdije. ⁷ Chí nasūu ndīhi yucūn Abraham cácuu ndije sēhe de jeē ni jéjnūhun ya. Chí ni cahān Yaā Dios jíin de: Nuū máá-ni sēhe ró Isaac cúu nuū coo

yucūn ró jeē ni jéjnūhun ri nuū ró. ⁸ Te jnūhun yáha cúní cahān jeē ni ñn ñayuu tu cúu i sēhe Yaā Dios siquí jeē ní cacu i ñn yucūn jeē jéni ni i jeē váha ga cúu. Chí sa suhva máni yucūn jeē ni jéjnūhun ya cúu ndije yucūn jeē chíhi ya cuenta. ⁹ Chí yāha cúu jnūhun jeē ni jéjnūhun ya nuū Abraham: Máá tiempo jeē ní jeni ri te quiji ri, te cacu ñn sēhe yíí ñasihí ró Sara, achí yá.

¹⁰ Te nasūu máá yáha-ni, chí suni Rebeca ni cacu uū sēhe yíí ña, te ñn-ni tátá ndíndúu i, jeē ní cuu jíi yō Isaac. ¹¹ Te nde ná tu cacu ndíndúu i, te ná tu sáha i jeē váha jeē uhú, te je ni cahān yā jíin Rebeca: Sūchi ní cacu xīhna gā cuajñíñu i nuū sūchi sándñíí, áchí yá. Chí suni súcuan cáhán tutu íi: Ni jito manī rī Jacob, te Esaú chí tuú, áchí Yaā Dios. Te súcuan jíin yō jeē máá Yaā Dios cuu nacāji ya ñayuu núu ndese tēe ni máá yá, te nasūu síquí jniñu jeē sáha i, chí sa suhva siquí ndese cúní máá yá nacāji ya i.

¹⁴ ¿Ndeese cahān yō núu súcuan? ¿A jéé tu íyó ndáa Yaā Dios jeē sáha ya súcuan, chí naún? Tú cuití. ¹⁵ Chí nde jenahán ní cahān yā jíin Moisés: Ndé-ni cúu jeē cuní rī cundáhú ni rī, te cundáhú ni rī. Te ndé-ni cúu jeē cuní rī sáha ri jeē váha jíin, te sáha ri jíin, áchí yá.

¹⁶ Núu súcuan te nasūu síquí jeē cuní máá ñayuu, ni nasūu jéé nducú ndeyí máá i cúu, chí siquí ndese cúní máá yá cundáhú ni yā i. ¹⁷ Chí suni súcuan yósó núu tútu íi jeē ni cáhān yā jíin rey ñuu Egipto: Ni jeni ri rohó jéé cúu ró rey, návāha jíin róhó te stéén rī poder rī, te návāha cuitē núu sñhví rí ñíí ñáyiví, áchí yá. ¹⁸ Núu súcuan te núu ndé ñn cúní yā cundáhú ni yā, te cundáhú ni yā. Te núu ndé ñn cúní yā jeē cuníhni ni, te sáha ya jeē cuníhni ni.

¹⁹ Te sanaa te cahān ñn ró jíin rí: Núu súcuan cúu ¿te najehē cahán gā yā jeē cuēchi sáha yó? Chí ma cúu casi yō nuū yā jeē ndese cúní máá yá sáha ya. Achi ró. ²⁰ Te sa suhva cáhán rī jíin ró: Róhó, ¿ndé ñn cúu ró jéé jéni ni ró stió cuíñí ró nuū Yaā Dios? ¿A cuu cahān quísi ñuhun jíin tēe ni sáha: Najehē ni sáha ró rúhū súcuan? achi. ²¹ Chí tēe sáha quísi, cuu sáha de ndese cúní máá de, chí ñn-ni ñuhun cuu sáha de ñn quísi fino te inga quísi corriente.

²² ¿Te á tu jétáhú ró jeē suni súcuan sáha Yaā Dios jíin ñayuu? Chí cúní yā steén yā ndese sáha ya juicio siquí ñayuu, te súcuan te cuni i poder yā. Te vésú súcuan te ni íyo paciencia ni yā jeē tu ní ndóna yachí yā siquí ñayuu jeē jnahnú ndetū. ²³ Te sáha ya súcuan návāha stéén yā ndese yóhoyo luu cújéhu ya siquí jniñu sáha ya jíin yóhó ñayuu cúndáhú ni yā. Chí nde jenahán je ni sátūhva ya yohó jéé luu cujéhu yó jíin yá. ²⁴ Chí ni cana ya yohó jéé candije yó, te sava yó cúu ñayuu hebreo te sava yó cúu ñayuu tāca gá nación. ²⁵ Chí suni súcuan ni cahān yā, yósó núu tútu Oseas:

Ñayuu jeē tu ní cúu ñayuu máá rí, vijna te cahān rī jeē cácuu i ñayuu máá rí.

Te ñayuu jeē tu ní íyo manī rī jíin, vijna te cahān rī jeē cácuu i ñayuu jeē maní rī jíin.

²⁶ Te máá lugar nuū ni cáhān rī jeē násūu ñáyuu rī cácuu i, suu yūcuan cáhān ñáyuu jeē cácuu i sēhe Yaā Dios, Yaā técu ñí cáni. Achí yá. ²⁷ Te Isaías sa suhva ni cahān de jnūhun ñáyuu Israel: Vēsú ni cayā yucūn Israel nájñūhun ñīxí yumar, te jecu-ni i jnama ya. ²⁸ Chi Jitoho yō Yaā Dios, yachí sínu ya jniñu jeē sándaā yā cuēchi ñáyuu ñáyīví. Achí tutu. ²⁹ Chi nájñūhun ni cahān tucu Isaías: Máá Yāá cúu Jitoho nuū tācá ndajéhé andiví, núu tu ní jnáma ya jecu yucūn yō nuú, te je ni ndoho yó nájñūhun ñáyuu ñuu Sodoma jíin ñuu Gomorra, jeē ní naa ndihí. Achí tutu.

Jeē tu cájetáhú ñáyuu hebreo jnūhun jnama ya i

³⁰ ¿Ndese cahān yō núu sūcuan? Suu jeē ñáyuu tāca gá nación, vēsú tu ní cánducú i quendōo ndaā i nuū Yaā Dios, te ni ndahva yā cuēchi i. Chi siquī jeē ní candíje i jeē ní jíhī Cristo jehē i cúu jeē ní ndahva yā cuēchi i. ³¹ Te sa suhva ñáyuu Israel, vēsú cánducú i quendōo ndaā i nuū Yaā Dios sáha ley yā, te tu cūndeyí i quendōo ndaā i. ³² ¿Te najehē? Siquī jeē tu cánducú i jeē ndahva yā cuēchi i jeē candíje i jeē ní jíhī Cristo jehē i, chí sa jéni ni i jeē squícu máá i ley te quendōo ndaā i. Te jeē stívi i sūcuan cúu nájñūhun cácotúú i siquī máá yūú jeē cácachihí jehē, te suu cúu Cristo. ³³ Chi sūcuan cáhān nuū tútu iī: Nde ñuu rī Sion sáha ri jeē cóne máá Yaā jeē cúu nájñūhun yuū jeē cácachihí i jehē i. Te cúu ya nájñūhun toto jeē cotúú i sáha. Te sa suhva ñáyuu cácdíje Yaā ún, chí jnama nahín yá i. Achí Yaā Dios.

10 Hermano jijnáhan ró, cúu ndasí ni rī te jícan tahu rī nuū Yaā Dios jehē ñáyuu nación rī Israel, jeē na jnáma ya i jijnáhan i. ² Chi cáhān rī jeē vāha cásáha i jeē ndihví ni i cáchiñúhún i Yaā Dios. Te vēsú sūcuan te cáchiñúhún cáhá i. ³ Chi tu cájecūhun ni i ndese ndáhva Yaā Dios cuēchi ñáyuu, te ndúcú i quendōo ndaā i máá-ni jeē squícu i ley. Te tu cájetáhú i máá modo jeē ndáhva Yaā Dios cuēchi i. ⁴ Chi siquī jeē ni sáha Cristo te cuu quenda ñáyuu chíji ley Moisés. Te ndáhva Yaā Dios cuēchi tāca ñáyuu jeē candíje i jeē ní sáha Cristo jehē i.

⁵ Chi sūcuan ni tee Moisés jnūhun ñáyuu jeē cánducú quendōo ndaā jíin ley: Núu ññ ñáyuu cuu squícu i tācá jniñu ndácu ley, te cotecu i núú, áchí. ⁶ Te jnūhun jeē ndáhva Yaā Dios cuēchi ñáyuu siquī jeē candíje i jeē sáha ya jehē i, chí sa suhva cáhān: Ma cáni ni rō jeē jíni ñúhún caa ró andiví nasnúu ró Cristo jeē ndahva yā cuēchi ró. ⁷ Ni ma cáni ni rō jeē jíni ñúhún cuun ró ndé nuū cūnú ndonehen ró Cristo mēhñu ndíyi, nájñūhun jeē tu ní nátecu yā. ⁸ ¿Te ndese cáhān jnūhun un núu sūcuan? Yajni iyó jnúhun ya jíin ró, chí ñúhún ini yuhu

ró jíin ini anuá rō, achí tutu. Te suu cúu jnūhun jeē na cándíje yó jéē jnáma ya yohó. Te jnūhun yáha cúu jeē cáncani ri. ⁹ Chi núu cahān rō jeē Jítoho rō cúu Jesús, te núu candíje ró jíin ini jíin ánuá rō jeē ní natecu yā mēhñu ndíyi ni sáha Yaā Dios, yūcuán na te jnama ya rohó. ¹⁰ Chi jíin ini jíin ánuá yō cándíje yó jéē ní jíhī yā jehē yō, te sūcuan te ndáhva Yaā Dios cuēchi yó. Te jeē cahān yō jeē Jítoho yō cúu Jesucristo, te sūcuan te jnama ya yohó.

¹¹ Chi cáhān tutu iī: Tāca ñáyuu jeē candíje i ya, chí jnama nahín yá i, áchí. ¹² Chi ñnuú-ni cúu ñáyuu hebreo jíin táca gá ñáyuu, chí máá yá cúu Jitoho nuū ndihí yó, te cuehē jeē váha sáha ya jíin ñáyuu cácahān ndahú jíin yá. ¹³ Chi sūcuan cáhān jnūhun ya: Ndihi ñáyuu cácahān ndahú jíin máá Jítoho yō, chí jnama ya i, áchí. ¹⁴ ¿Te ndese cahān ndahú i jíin yá te núu tu ní cándíje i jeē jnama ya i? ¿Te ndese candíje i te núu tu ní jíni sōho i jnūhun ya? ¿Te ndese cuni sōho i te núu tú na ñáyuu nacani jnūhun nuū i? ¹⁵ ¿Te ndese nacani ñáyuu jnūhun ya te núu jeē tu tájí yá i quihīn i? Chi nájñūhun cáhān tutu iī: Yōhyo luu jniñu cásáha ñáyuu cájica jíin jnúhun ndeyí sñí ni jeē cáncani i jnūhun vāha ya, achí.

¹⁶ Te nasúú ndihí i jétáhú nuū jnúhun jnama ya i. Chi ni cahān Isaías nde jenahán: Tātā Yaā Dios, ¿ndé ñáyuu ni candíje jnūhun jeē cáncani ná ví? áchí de. ¹⁷ Núu sūcuan te núu cuni nahín ñáyuu te cuu candíje i. Te jnūhun cuni nahín i cúu jnūhun Cristo.

¹⁸ Te cájnūhun rí: ¿A tu ní cájini sōho i jnūhun un núu sūcuan? Tuú chí ni cajini sōho i, chí cáhān tutu iī: Ññ ñáyīví ní cajini sōho ñáyuu jnūhun jeē ní canacani de.

Te nde nuū jicá gá tāca lado ni jinū jnūhun ún. Achí tutu. ¹⁹ Te suni cájnūhun rí: ¿A tu ní cájecūhun ni ñáyuu Israel jnūhun ún? Tuú chí ni cajecūhun ni i, te tu ní cájetáhú i. Chi xihna gā Moisés ni cachi de jeē ní cáhān Yaā Dios:

Cucuíñí ró jijnáhan ró, chí cuāha ri jnūhun ri nuū ñnga ñáyuu jeē násúú ññ nación cúu.

Te quití ni rō coto ró jéē cuāha ri jnūhun ri nuū ññ nación jeē tu jécūhun ni.

²⁰ Te suni Isaías ni chundeyí ni de ní cachi cájí de jeē ní cáhān Yaā Dios:

Ñáyuu jeē tu ní cáncanducú rúhū, ni cajini i ruhū.

Te nuū ñáyuu jeē tu ní cácajnūhún, ni steén rī nuū i ndese Yaā cúu ri.

²¹ Te siquī ñáyuu Israel sa ni cahān de jeē ní cáhān yā: Ndiquiví ni cana ri i jeē quívicoo i nuū rī, te tu ní cáncuni i, chí ñáyuu ññni ni, ñáyuu jéē ní cácuu i. Achí yá, achí Isaías.

Jeē iyó jecu na ñáyuu Israel jeē jnáma ya

11 Núu sūcuan te cájnūhun rí: ¿A ní stóo Yaā Dios ñáyuu máá yá Israel, chí naún? Tú cuítí. Chí ruhū suni tēe Israel cúu ri, te yucūn Abraham cúu ri, te Benjamín cúu jíi rī jenahán. ² Tu ní stóo Yaā Dios ñáyuu

maá yá, chi je ni nacāji ya i nde jenahán. ¿A tu cájini rō ndese cáhán tutu i jnūhun Elías, tēe ni nacani jnūhun ya jenahán? Chi náa jícán tahu de, te ni cahān de siquī ñáyuu Israel: ³ Tātā Yaā Dios, ni cajehni i tāca tēe cá-nacani jnūhun ní, te ni cajenu i tācá altar ní. Te máñúhún na sāña ní quendōo, te vijna suni cácu ni cahni i sāña, áchí de. ⁴ Te Yaā Dios ni nastió cuñí yā: Iyó nahín úxā mil ñayuu cá candíje ruhū jeē tu ní cáje-cuiñí yití i nuū ídolo naní Baal, achí yá. ⁵ Te suni súcuan vijna, chi íyó jecu na ñayuu jeē ní nacāji ya siquī jeē váha ni yā jíin i. ⁶ Te núu ni nacāji ya i siquī jeē váha ni yā jíin i, te nasūu síquī jeē ni sáha i jniñu váha cúu. Chi núu siquī jeē ni sáha i jniñu váha cúu, yūcuán na te nasūu síquī jeē váha ni yā cúu.

⁷ ¿Te ndese cúu núu súcuan? Cúu jeē ñáyuu Israel tu ní cūndeyí i quendōo ndaā i nájnūhun ni canducú i. Te sava i jeē ní nacāji ya, chi máá i ni ndahva yā cuēchi i. Te sava ga i ni ndunihni ni i, ⁸ nájnūhun cáhán tutu i: Ni sáha Yaā Dios jeē tu jécūhun cuiñi ni i siquī yā, ni tu jíin i jíin tñūú i, ni tu jíin nahín i jnūhun ya, te súcuan cúu nde vijna. Achí tutu. ⁹ Te suni ni cahān David:

Vico jeē casáha i, na cóo nájnūhun ñn trampa chí ñn xeyū, návāha nihín i castigo xeēn siquī jeē castívi i casáha i cuēchi.

¹⁰ Te ánuá i na ndúnee, nájnūhun jeē tuá cúu coto i, te na jécostéñí jnūndóho siquī i ñíí cáni. Achí tutu.

Siquī jeē jnáma ya ñayuu tāca gá nación

¹¹ Núu súcuan te cájnūhun rí: ¿A tuá cúu cuiñi ndívi ñayuu Israel nuū Yaā Dios jeē súcuan ni castívi i? Tú cuiñi. Chi sa suhva jeē ní cacunihni ni i, te sa ñayuu tāca gá nación ni canihín tahu máá i jnūhun jeē jnáma ya i. Te yūcuan sáha tucu jeē ñáyuu Israel condíhvī ni i jeē suni candíje máá i. ¹² Chi jeē ní castívi i, te sa ñayuu ñíí cáhnu ñayívi ní canihín maá i jnūhun ya. Te jeē ní cajica yátá i, suu ni sáha jeē ní canihín ñayuu tāca nación jnūhun ya. Núu súcuan te quivī jeē ndívicoo tucu ndíhi ñayuu Israel ndaha ya, te ñayuu ñayívi víhyá gā quendōo ndetū i sáha ún.

¹³ Te vijna te cáhán rī jíin róhó ñáyuu tāca nación jeē tu ní jíin jnūhun ya. Chi ni tají Yaā Dios ruhū jeē scáca ri jnūhun nuū rohó ñáyuu tāca nación. Te ndúcú rí jeē na cuájnuhún ró jijnáhan ró jniñu sáha ri jeē nácani ri jnūhun ya. ¹⁴ Chi cúní rī jeē jíin yúcuán te nacani ni sava jnáhan ri ñayuu Israel jeē suni candíje máá i, te jnama ya i. ¹⁵ Chi jeē ni stóo ya ñayuu Israel, jeē yúcuán cúu jeē sa ñayuu ñayívi ní sáha ya jeē ndívicoo i nuū jnúhun maní yā jíin i. Núu súcuan te quivī naquihin tucu ya ñayuu Israel, quivī ún suni vāha ndasí sáha ya jíin ñáyuu ñíí cáhnu ñayívi. Chi coo nájnūhun jeē natecu i jeē cúu i nájnūhun ndíyi. ¹⁶ Te ñayuu Israel cásocō i nuū Yaā Dios pan jeē quénda xihna gā nuū ñujen, te súcuan stéén i jeē ndíhi un cúu cuenta yā. Te ñn yujnu,

núu yíhi jeē cuenta yā cúu, te suu cúu nde yoho jíin ndé ndíhi ndaha. Te suni súcuan ñayuu Israel, yíhi cuenta i nuū yā, siquī jeē jíi i xihna ñúhún, ni quívicoo de ndaha ya.

¹⁷ Chi ñayuu Israel cácuu i nájnūhun ndayújnu olivo váha, te sava ndaha un ní quendē. Te róhó ñáyuu tāca nación jeē tu jíin jnūhun ya, cácuu ró nájnūhun ndayújnu olivo yucú, te ni nachuhun ya rohó núu ni quendē ñayuu cácuu ndayújnu váha ún. Te nájnūhun inuú-ni cástáa ró ndúxi jíin cajin jeē véji nde yoho yújnu ún. ¹⁸ Núu súcuan te ma sáha téyí ró maá ró nuū ñáyuu Israel jeē cácuu nájnūhun ndayújnu jeē ni quendē. Ma cutéyí ró, chi nucūhun ni rō jeē násúú jéé yoho stáa cajin nuū maá ró, chi sa máá ró stáa cajin jeē véji nde yoho.

¹⁹ Te sanaa te cahān rō: Tú chi sava ndaha ni quendē návāha nachuhun ya ruhū nuū ni quendē ún, achí rō. ²⁰ Ndaā, te ni quendē i siquī jeē tu ní cá candíje i Cristo. Te róhó chi máni siquī jeē cá candíje ró, jeē yúcuán cúu jeē ni quívicoo ró lugar i. Te ma sándúxi ró maá ró núu súcuan, chi sa suhva conso íyo ró núu Yaā Dios. ²¹ Chi tu ní íne cáhnu ni yā nuū maá ndaha jeē chíjniñu, te suni súcuan ma cóne cáhnu ni yā nuū rō jijnáhan ró te núu stívi ró. ²² Núu súcuan te sáha vāha ro cuenta ndese vāha ni Yaā Dios jíin ndese xeēn ni yā. Chi ni nduxeēn ni yā jíin ñáyuu hebreo jeē ní castívi ún, te sa cūndáhú ni yā rohó. Te cánuú cuiñi nihín ro jíin jnúhun jeē váha ni yā jíin ró. Chi núu tuú, te suni quende yā rohó. ²³ Te máá i, núu candíje tucu i, te nucōndee tucu i, chi máá Yaā Dios cuu nachuhun tucu ya i. ²⁴ Núu súcuan te róhó ñáyuu tāca nación jeē tu ní jíin jnūhun ya, ni quendē rō xiní yújnu olivo yucú, te ni nachuhun ya rohó xiní yujnu olivo váha, vésú nasúú ndaha máá yujnu un cácuu ró. Te nagā ni cuu ñayuu hebreo jeē ma náchuhun ya i nuū ni quendē i, chi cácuu i máá ndayújnu váha ún.

Ñn quivī te jnama ya ndíhi ñayuu nación Israel

²⁵ Hermano, cúní rī jeē na jécūhun ni rō jijnáhan ró ndese íyó jnúhun yáha jéé ní yisāhí, návāha ma cutéyí ró caní ni rō jeē ndichí xiní maá ró: Chi sava ñayuu Israel ni ndunihni ni i, te súcuan coo máá-ni nde quivī jínu candíje ñayuu tāca nación jeē tu jíin jnūhun ya. ²⁶ Te sáa te jnama ya ndíhi ñayuu nación Israel, chi cáhán tutu i:

Ichi ñuu rī Sión quiji Yaā jnáma ñayuu, te sáha ya jeē tuá coo cuēchi nuū tāca yúcuán Jacob.

²⁷ Te yāha cúu contrato jeē sándaā rī jíin i, quivī jeē quénde ri cuēchi i jijnáhan i, achí Yaā Dios. Achí tutu.

²⁸ Chi ñayuu hebreo un ní nduu i nájnūhun enemigo Yaā Dios siquī jeē tu ní cá candíje i jnūhun jnáma ya i. Te jeē yúcuán te cuu cuiñi núu jnūhun un núu tāca róhó. Te vésú súcuan te siquī jeē ní nacāji ya tāca jíi i jenahán, te cūndáhú gá ni yā i jeē ma stóo ya i ñíí cáni.

²⁹ Chi tu nácani yátá ni yā jeē cána ya ñayuu jíin jéē jéhe ya tahū i. ³⁰ Te róhó jíináhan ró, suni ni cahīyo nīh-ni ni rō nuū Yaā Dios nde saá. Te vijna jeē ní cacunīhni ni maá ñáyuu hebreo, te cúndáhú ni yā rohó. ³¹ Te suni súcuan máá i, chi vēsú cācunīhni ni i vijna, te cundáhú tucu ni yā i, nájñūhun cúndáhú ni yā maá ró jíináhan ró. ³² Chi Yaā Dios ni sáha ya jeē ní quendōo ndivii ñayuu chīji jñūhun cúnīhni ni i, návāha suni cuu cundáhú ni yā ndivii i.

³³ Núu súcuan te nāhán nāā ni yō jeē yóhoyo cuehē jñūhun ndíchí íyó jíin Yaā Dios, te ndihī cuiti jiní yā. Te ni ma cúu cuiti castūhun yó ndese téē ni yā sáha ya tācā-ni, te ma cánda cuiti yō jecūhun ni yō ndese cúu tāca jéē sáha máá yá. ³⁴ Chi cāhán tutu īi: ¿Ndé ĩn ni jecūhun ni ndese jéni ni maá Jítóho yō? ¿Chí ndé ĩn ni steén nuū yā? ³⁵ ¿Ndé ĩn ni jéhe xīhna gā nuū maá yá, návāha nachunaa yā nuū i? ³⁶ Chi nde nuū maá yá vēji tāca jéē iyó, te máá yá ni sáha ndihī, te jeē cúu máá yá cúu. Te na cāhán yō jeē yóhoyo luu cújéhnu Yaā Dios níí cáni. Amén.

Jeē na cóo ndoo ánuá yō cuajníñu yó núu Yaā Dios

12 Núu súcuan te cāhán ndahú rí jíin ró jíináhan ró, hermano, jeē siquī jeē cúndáhú ni Yaā Dios yohó. Na sócō rō maá ró núu yā, coo ndoo coo īi rō cuajníñu ró núu yā, nájñūhun cúsī ni yā. Chi yāha cúu jeē chíñúhún ró yā nde jíin ini jíin ánuá rō. ² Te ma cáca ró jíin táca modo casáha ñayuu ñayvī yáha, chi sa na sáma ró modo cani ni rō, te ndujeé jéē níjnūni rō. Te súcuan te cuu nacāji ró ndé-ni cúu jeē váha jeē núnahan ni Yaā Dios, jeē cúsī ni yā, jíin jéē íje ni rō jíin jñūhun ya.

³ Te siquī jeē váha ni yā ni jéhe ya jniñu nácani ri jñūhun ya, jeē yúcuan cāhán rī jíin ndihī ró jéē ma cáni ni rō jeē váha ga ñayuu cúu ró núu cūhva jeē iyó ró. Chi ná ĩn ná ĩn ró na cáni ndaā ni rō siquī maá ró, te ma scāa ga rō cani ni rō jeē váha ga ñayuu cúu ró vēsú nuū cūhva jeē ni jéhe Yaā Dios fuerza ini rō cándíje ró. ⁴ Chi cácuu yó nájñūhun ĩn yiquī cúñu jeē iyó cuéhē parte, te sīn sīn jéjníñu ĩn ĩn. ⁵ Chi vēsú iyó cuéhē yō, te nájñūhun ĩn-ni yiquī cúñu cúu yó jéē yīhī yó ndaha Cristo, chi ĩn-ni ni nduu yó jíináhan yó.

⁶ Te sīn sīn tahū ni jéhe Yaā Dios nuū yō jeē cuajníñu yó núu yā, núu ndese ni nujnahan ni yā ni jéhe ya nuū ĩn ĩn yó. Núu súcuan te na cuajníñu vāha yó jíin táhū ún. Núu ni nihīn yō tahū jeē nácani yó jñūhun ya, te cánuú sáha yó ndé maá cūhva ni jéhe ya cándíje yó. ⁷ Te núu ni nihīn yō tahū jeē chindéé ñāhán yó jñáhan yó, te na sáha yúcún yó. Te núu ni nihīn yō tahū jeē steén yō, te na cóndihvī ni yō steén yō. ⁸ Te ñayuu jeē stihvī ni inga ñayuu, suni na sáha yúcún i. Te ñayuu jéhe nuū jñáhan, na cuáha i súcuan-ni. Te ñayuu ndíso jníñu, na ndácu vāha i jniñu. Te ñayuu jító ndáhú ñayuu ndahú, na cúsī ni i sáha i.

Ndese cánuú squícu ñayuu cácandíje

⁹ Te na cúndáhú ndije ni rō jñáhan ró, nasūu máá jéē cahán-ni ró. Te coto uhū rō jniñu néé, te condiquīn rō jniñu váha. ¹⁰ Te cánuú coo manī rō jíin jñáhan ró nájñūhun jéē manī rō jíin ñani rō. Te nducú ró jeē quéndōo yíñúhún gá jñáhan ró vēsú maá ró.

¹¹ Te ma cucúxí ró jíin jniñu cásáha ró. Chi jíin ini jíin ánuá rō condihvī ni rō cuajníñu ró núu máá Jítóho yō.

¹² Te na cúsī ni rō jeē cáñuhun ni rō tāca jéē váha jeē cóo. Te na cuándeýí ni rō núu ndóho ró jnúndóho. Te níni na cácan tahú rō.

¹³ Te coto ndáhú ró ñayuu cácandíje núu cúmanī nuū i. Te cuāha núu ró vehe nuū ñáyuu cájica.

¹⁴ Te cacān tahú rō jehē ñayuu cájito xeēn rohó. Ma cahán ndevāha ro síquī i, chi sa cacān tahú rō jehē i.

¹⁵ Te núu cúsī ni ñayuu, te suni na cúsī ni rō jíin i. Te núu cúcuíhyá ni ñayuu, te suni na cúcuíhyá ni rō jíin i.

¹⁶ Na cóo ĩnuú ni rō jíin táca jñáhan ró. Te ma cundúxí ró, chi sa quijñáhan ró jíin ñáyuu núu ga. Ma cáni ni rō jeē ndichí xínī rō.

¹⁷ Te ma nasáha ndevāha ró jíin ni ĩn ñayuu, núu ni sáha ndevāha i jíin ró. Na cóndihvī ni rō sáha ró jniñu váha, jító jínúū tāca ñáyuu. ¹⁸ Te na cóndihvī ni rō coyūcu mánī rō jíin táca ñáyuu, vēsú ndese cándāa máá i. ¹⁹ Nánī mánī jíináhan ró, ma nacūāha ró jéē ndútahū ñayuu casáha ndevāha jíin ró, chi sa cuāha ró jñūhun jeē maá Yaā Dios cuāha ya castigo i. Chi cāhán tutu īi: Máá rí cuāha castigo i, máá rí nacūāha yāhu i, áchí Jítóho yō. ²⁰ Te suni cāhán tutu: Tēe jító uhū rohó, núu jí de sóco, te cuāha ró jéē cáji de. Te núu jíchí de, te cuāha ró jéē cóho de. Chi núu sáha ró súcuan, te cucanu de te nacani uhū ni de jeē ni jító uhū de rohó.

²¹ Ma cuáha ró jñūhun jeē cúndeýí jniñu néé jíin ró, chi sa jniñu váha na sáha ró návāha ndahvā jniñu néé.

13 Táca ñáyuu na cuátáhú i nuū tohō cándiso jníñu ñuu. Chi ma cóo tēe cándiso jníñu te núu tu ní sáha máá Yaā Dios. Te tēe cándiso jníñu chi Yaā Dios ni tee jniñu siquī de. ² Te ñayuu jeē tu jétáhú núu tēe cándiso jníñu, núu súcuan te cúnīhni ni i nuū jeē ní jeni Yaā Dios. Te ñayuu jeē cúnīhni ni, chi cuēchi sáha i, te nihīn i castigo. ³ Chi tāca téē ndíso jníñu, nasūu jéē ndíso jníñu de jeē yūhú ñáyuu casáha jniñu váha, chi sa jeē yūhú ñáyuu casáha jniñu néé. Te núu cúní rō jeē ma cúxeēn tēe cándiso jníñu nuū rō, na sáha ró jniñu váha núu súcuan. Yūcuán na te cuajnúhún de rohó.

⁴ Chi jéjníñu Yaā Dios de jíináhan de, návāha coyūcu váha ró jíináhan ró. Te núu sáha ró jniñu néé, te sa yūhu ró, chi nasūu cáha-ni cúu jeē cándiso jníñu de stóho de ñayuu. Chi jéjníñu Yaā Dios de, návāha cuāha de castigo ñayuu casáha jniñu néé. ⁵ Jeē yúcuan cánuú jéē cuatáhú ró núu tēe cándiso jníñu, te nasūu mánī jeē ma níhín rō castigo, chi suni jeē tú na cuēchi coo ánuá rō. ⁶ Te jeē yúcuan cúu jeē suni cájéhe ró xūhun

nuū tēe cándiso jníñu cuu jniñu ñuu. Chi jéjníñu Yaā Dios de, te máni jniñu yúcuan cásáha de.

⁷ Te chunaa rō ndīhi jeē cátaū rō nuū tāca ñáyu. Cuāha ró xúhun ñuu nuū tēe stútú xúhun ñuu, te cuāha ró xúhun renta nuū tēe stútú renta. Te na cóo respeto rō nuū ñáyu cánuú coo respeto rō. Te na cóo yíñúhún ró nuū ñáyu cánuú coo yíñúhún ró. ⁸ Ma có-taū rō nuū ní ñn. Te íyó ñn jeē taū rō jeē ma tahndé cuiti, suu jeē ni cáhān Yaā Dios jeē cundáhú ni rō jnáhan ró. Chi ñayuu cundáhú ni jnáhan, je ni squícu i ndīhi jeē ndácu ley yā. ⁹ Chi súcuan ndácu ley jniñu: Ma cosíquí ndéē rō jnáhan ró, ma cáhni rō ndīyi, ma sacuíhná ró, ma sajnúhún ró, ma ndíyo ni rō jeē névāha jnáhan ró. Te tāca jnúhun yáha jíin táca gá jniñu ndácu ley, ndīhi-ni yíhi chíji jnúhun yáha: Cundáhú ni rō jnáhan ró nájnūhun cundáhú ni rō maá ró, áchí tutu. ¹⁰ Te núu cundáhú ni yō jnáhan yó, te tu sáha yó ni ñn jeē tu íyó váha nuū i. Núu súcuan te jeē cundáhú ni yō jnáhan yó, yúcuan cúu jeē squícu yó ññ ley yā.

¹¹ Súcuan sáha ró jíjnáhan ró, chi sáha ró cuenta jeē cuácuyajni quivī ndíji ya. Te ma cóo ga rō nájnūhun ñayuu quixí, jeē cúhuun ni rō. Chi vijna je ni cuyajni ga quivī jnáma ya yohó vésú quivī ní candíje yó jnúhun ya. ¹² Chi nájnūhun je yajni yáha jecuáā, te cuacundijin quivī jnáma ya yohó. Núu súcuan te na stóo yó jniñu jeē ni sáha yó núu néē, te na cúcutú yó jíin táca jniñu ndaā jeē caca yó jíin luz yā. ¹³ Na cáca yíñúhún yó nájnūhun cánuú caca yó jíin luz yā. Ma nájini ró, ma sáha ró táca vico néē, ma cáca jnéni ró, ma sáha ró jniñu néē, ma cuajnáhan ró, ma cucuésún ni rō. ¹⁴ Chi sa suhva cuiñi cutú ró jíin fuerza maá Jítoho yō Jesucristo, jeē ma cuáha ga rō jnúhun sáha ró jniñu cúní modo neé maá ró.

Ma cahán neé yó coto yó jnáhan yó

14 Cuatáhú ró ñayuu jeē ná tu ije jíin jnúhun ya, te ma tejnáhan ró jíin i siquī tāca jnúhun jeē sñn jéni ni i jíin maá ró. ² Chi íyó ñáyu jeē jéni ni i jeē cúu caji i ndīnuū-ni. Te íyó ñáyu jeē ná tu ije jíin jnúhun ya, te cájeni ni i jeē tú vāha caji i cūñu, chi jeē ní casocō ñayuu nuū ídolo cúu. ³ Te rōhó tēe jeē yéji ndīnuū-ni, ma cahán rō coto ró tēe jeē tu yéji ndīnuū. Te rōhó tēe jeē tu yéji ndīnuū, ma cahán rō coto ró tēe jeē yéji ndīnuū. Chi Yaā Dios ni jetáhú yá tēe ún. ⁴ Te rōhó, ¿ndé ñn cúu ró jéē cahán neé ró jíto ró mozo Yaā Dios? Chi núu vāha chí néē sáha de, te máá yá cúu jeē sándaā jíin de, nasūu maá ró. Te tuú chi cuiñi vāha de, chi mozo maá Jítoho yō cúu de, te cuu sáha ya jeē ma stívi de.

⁵ Te suni íyó ñayuu jeē jéni ni jeē íí gā ñn quivī vésú ñga quivī. Te ñga ñayuu chi jéni ni i jeē ñnuú-ni cúu tāca quivī. Te tācá i na cúndaā vāha ni maá i siquī jeē jéni ni i. ⁶ Chi tēe jeē néē íí quivī, chíñúhún de máá Jítoho yō jeē sáha de súcuan. Te tēe jeē tu néē íí quivī,

suní chíñúhún de Jítoho yō jeē sáha de súcuan. Te tēe jeē yéji ndīnuū-ni, chíñúhún de máá Jítoho yō jeē sáha de súcuan, chi nácuatáhú de nuū Yaā Dios. Te tēe jeē tu yéji ndīnuū, suni chíñúhún de Jítoho yō jeē sáha de súcuan, te suni nácuatáhú de nuū yā.

⁷ Chi ni ñn yó tu técu yō jeē váha máa-ni yó, te ni ñn yó tu jíhi yō jeē cuní maá yó. ⁸ Chi núu técu yō, te técu yō jeē cuajniñu yó núu maá Jítoho yō. Te núu cuu yō, te suni cuu yō siquī jeē cuní maá Jítoho yō. Núu súcuan te núu jeē cótecu yō chí jéē cuu yō, te yíhi yó ndaha Jítoho yō. ⁹ Chi ni jihí Cristo te ni natecu yā, návāha cuu ya Jítoho nuū ñáyu ni jíhi jíin ñáyu técu.

¹⁰ Te rōhó, ¿naun jéni néē ni rō jíto ró jnáhan ró núu súcuan? ¿Te naun cújéē ni rō jíto ró de? Chi tāca yó cuiñi yó yuhu mesa Cristo jeē sándaā yā jniñu yó. ¹¹ Chi suhva yósó núu tútu íi:

Jendaá ndije chi nuū maá rí cuiñi yíñi táca ñáyu, te ndīhi i cahán jeē maá rí cúu Yaā Dios, áchí máá Jítoho yō.

¹² Núu súcuan te ná ñn ná ñn yó nacuāha yo cuenta nuū Yaā Dios ndese jniñu ni casáha yó.

Ma sáha yó jéē quivī jnáhan yó cuéchi

¹³ Te jeē yúcuan ma cahán neé gá yō coto yó jnáhan yó. Chi sa tee ni rō jeē ma sáha ró ni ñn jniñu jeē sáha jeē stívi jnáhan ró te quivī i cuéchi. ¹⁴ Te jíni rí jeē ni ñn jeē ni sáha Yaā Dios, tu stívi ánuá yō. Chi súcuan ni cucáhnu vāha ni rí siquī jeē candíje ri Jítoho yō Jesús. Te núu ñn ñayuu jéni ni i jeē íyó jéē stívi ánuá i, yúcuan na te súcuan sáha un jíin maá i. ¹⁵ Te núu jnáhan ró tu cúvāha ni de jeē yéji rō cūñu ni casocō ñayuu nuū ídolo, chi jéni ni de jeē stívi un ánuá rō, núu súcuan te tu cundáhú ni rō de jeē sáha ró súcuan. Coto má snāā rō anuá jnáhan ró síquī jeē yéji rō ñn jeē jéni ni de jeē cuéchi cúu. Chi suni jehē maá de ni jihí Cristo. ¹⁶ Ma sáha ró jniñu jeē cahán i siquī, vésú jiní maá ró jeē íyó váha. ¹⁷ Chi jeē ndácu Yaā Dios jniñu nuū yō, nasūu síquī ndese caji yō coho yó cúu, chi sa suhva siquī jeē na sáha yó jniñu ndaā, te coyūcu mání yō jíin jnáhan yó, te cusí ni yō sáha Espíritu Santo. ¹⁸ Te ñayuu jeē súcuan jéjníñu nuū Cristo, chi cúsiñi ni Yaā Dios jíin i, te suni cájejnúhún ñáyu i.

¹⁹ Núu súcuan te na cóndihvī ni yō coyūcu mání yō, návāha jíin yúcuan chindéē nájnáhan yó ije yó jíin jnúhun ya. ²⁰ Te ma cuáha ró jnúhun jeē ndeyu yéji rō snāā jniñu ni sáha Yaā Dios jíin jnáhan ró. Chi íyó ndoo ndije ndīhi jeē yéji yō, te vésú súcuan te tú vāha jeē yéji rō ndeyu jeē sáha jíin jnáhan ró jéē caji de jeē jéni ni de jeē cuéchi cúu. ²¹ Vāha ga ma cáji rō cūñu, ni ma cóho ró vino, te ni ñn ma sáha ró jéē stívi ánuá jnáhan ró, te quivī de cuéchi, te caca yátá de nuū jnúhun cándíje de. ²² Te núu cándíje ró jéē tú na vé sáha jeē yéji rō, te súcuan na cándíje máa-ni ró núu Yaā Dios. Te nacā ndetū tēe jeē tu sáha jíin ánuá de jeē cuéchi cúu núu caji de coho de. ²³ Te tēe yéji ñn jeē jéni ni de

sanaa te stívi ánuá de, núu súcuan te sáha de cuēchi, chi tu cándíje de jeē iyó váha jeē yéji de. Chi tāca jéē sáha yó, núu tu cándíje yó jéē iyó váha, te cuēchi cúu.

Jeē na sáha yó jéē cúsiñ ni jnáhan yó

15 Te yóhó jéē ni íje yó jíin jnúhun ya, cánuú condito yó ñáyuu jeē ná tu íje jíin jnúhun ya, návāha candíje váha i. Te ma sáha yó jéē maá-ni yó cusíñ ni.
² Chi ná ñn ná ñn yó na sáha yó jéē cúsiñ ni jnáhan yó, návāha quendōo váha i te íje i jíin jnúhun cándíje i.
³ Chi ni Cristo, tu ní sáha ya jeē cúsiñ ni maá yá, chi sa suhva jeē cúsiñ ni Tatá yā. Chi suhva cáhán tutu íi: Tāca jnúhun ndevāha jeē cácahān ndevāha ñayuu siquī ní, ni ndēvi siquī maá ná, áchí Cristo jíin Tatá yā. ⁴ Chi tāca jnúhun jeē ni jécōsō nuū tútu íi nde jenahán, chi ni jécōsō návāha stéén nuū yō, te nihín yō jnúhun jeē sáha jeē cuandeyí ni yō te ndusiñ ni yō. Te súcuan te cocuhun ni yō tāca jéē váha jeē cóo. ⁵ Te maá Yaā Dios jeē jéhe jnúhun cuandeyí ni jíin jnúhun ndusiñ ni, na sáha ya jeē cóo ñnuú ni rō, nájnúhun cúní Cristo Jesús. ⁶ Te súcuan te ñn-ni coo rō te ñnuú-ni cuu cahān rō jeē yóhō váha Yaā cúu Yaā Dios, Tatá Jitoho yō Jesucristo.

Jeē ni jítē jnúhun váha ya nuū ñáyuu tācá nación

⁷ Núu súcuan te cuatáhú ró tāca jnáhan ró, nájnúhun ni jetáhú Cristo yohó, návāha cuni ñayuu jeē luu cújéhu Yaā Dios. ⁸ Chi cáhán rí jeē ní quiiji Cristo Jesús, ni sáha ya tācá jniñu jeē quéndōo váha ñayuu hebreo, návāha cundaā tāca jnúhun jeē ni jéjnúhun Yaā Dios nuū tāca jíi i. Te súcuan ni steén Cristo jeē squícu Yaā Dios tāca jéē ni jéjnúhun ya. ⁹ Te suni ni quiiji ya návāha ñayuu tācá nación jeē tu jíin jnúhun ya, cahān i jeē yóhō váha ni Yaā Dios jeē cundáhú ni yā i. Chi suhva cáhán tutu íi:

Núu súcuan te cahān na jéē yóhō váha ni ní, cuni ñayuu tācá nación,
 te cata ná yaa jeē chiñhún ná nihín.

¹⁰ Te cáhán tucu tutu íi:

Róhó ñáyuu tācá nación, ñnuú na cúsiñ ni rō jíin ñáyuu maá yá.

¹¹ Te cáhán tucu:

Róhó ñáyuu tācá nación, na cáhán rō jeē yóhō váha ni Jitoho yō Yaā Dios,
 te róhó ñáyuu tācá-ni ñuu, suni na cáhán rō jeē yóhō cújéhu ya.

¹² Te suni ni tee Isaías jnúhun yáha:

Nuū yúcūn Isaí quiiji ñn jeē cujéhu,
 te ndacu ya jniñu nuū ñáyuu tācá nación.

Te ñayuu ún chi cocuhun ni i tāca jéē sáha ya.
 Achí tutu.

¹³ Te maá Yaā Dios jeē sáha jeē cáñuhun ni yō tāca jéē váha jeē coo, na sáha ya jeē cóo siñ ndasí ni rō jíin jéē cóo ndeyí ni rō siquī jeē cácañíje nihín ró yá. Te súcuan te cocuhun teyí gá ni rō tāca jéē váha jeē coo, sáha poder maá Espíritu Santo.

¹⁴ Nání mání, cúcáñu ni rí jeē váha ndasí cándíhvī ni rō jíin jniñu váha, te váha ndasí cájécūhun ni rō, te cúu stíhvī jnáhan ni rō. ¹⁵ Te ni jeni ni rí jeē tee ri carta yáha cáhān cají rí jíin ró jijnáhan ró, návāha víhyá gā na cócuhun ni rō tāca jnúhun yáha. Chi súcuan sáha ri siquī jeē váha ni Yaā Dios te ni jéhe ya jniñu nuū rí ¹⁶ jeē jejniñu ri nuū Jesucristo, jeē nácani ri jnúhun nuū ñáyuu tācá nación jeē tu jíin jnúhun ya. Te nácani ri jnúhun váha Yaā Dios nuū i jeē jnáma ya i. Súcuan sáha ri návāha ñayuu tācá nación, cuu squívi ri i ndaha ya jeē cúu i nájnúhun ñn jeē socó rí nuū yā jeē cúsiñ ni yā jíin. Chi ni sáha Espíritu Santo jeē iyó ndoo íyó íi i nuū yā.

¹⁷ Núu súcuan te siquī jeē candíje ri Cristo Jesús, te cúsiñ ni rí jeē jejniñu váha ri nuū Yaā Dios. ¹⁸ Chi ma cúu cahān rí siquī jniñu casáha inga tēe, chi maá-ni siquī ndese ni jejniñu Cristo ruhū jeē sáha ri jeē ñáyuu tācá nación tu ní jíin jnúhun Yaā Dios, vijna jétáhú i nuū yā. Chi súcuan ni cuu jíin jnúhun ni cahān rí jíin jniñu ni sáha ri. ¹⁹ Chi ni sáha ri jniñu jéhu ndíso poder jeē steén jeē cujéhu ya, te ni íyo poder Espíritu Santo jíin rí. Te súcuan ni nacani ndíhi ri jnúhun ndese jnáma Cristo ñayuu. Te ni nacani ri nde ñuu Jerusalén, jíin ndíhi tācá ñuu, jíin nde ñí región Ilírico. ²⁰ Súcuan cúu jeē ní condíhvī ni rí ni nacani ri jnúhun jeē jnáma ya ñayuu. Te ni jehēn rí nuū ñáyuu jeē ná tu cuni jnúhun Cristo, chi tu ní cúní rí nacani ri nuū ñáyuu jeē jé ni jini i ni canacani inga tēe. ²¹ Chi sa suhva ni sáha ri nájnúhun cáhán tutu íi:

Tāca ñáyuu jeē tu ní quíji jnúhun ya nuū i, vijna chi cuni i jnúhun ya,

te tāca ñáyuu jeē tu ní jíin cuiti jnúhun ya, vijna chi jécūhun ni i.

Achí tutu.

Jeē ñúhun ni Pablo jeē quihín de Roma

²² Te jeē yúcuan cúu jeē cuehē jínu ni cujnéhu ri, te tu ní cúu jecondēhe rí rohó jijnáhan ró. ²³ Te vijna chi ni ndíhi jniñu ri ñí cáhnu tācá región ndañúu yáha. Te je ni cuu cuehē cuiyā jeē cuní rí jeē rí nuū rō. ²⁴ Núu súcuan te ñúhun ni rí jecondēhe rí rohó jijnáhan ró núu na yáha ri quihín rí España. Te ñúhun ni rí jeē núu je ni cusíñ ni rí jeē ní jito jnáhan yó, yūcuán na te chindéé ñáhán ró ruhū jeē quihín gā rí. ²⁵ Te xíhna gā na quihín rí ñuu Jerusalén quindēca ri xūhún cuu hermano cáyūcu yúcuan. ²⁶ Chi ñayuu Macedonia jíin Acaya ni cajeni ni i jeē cáquin i xūhun quihín nuū hermano cándoho ndáhú ñuu Jerusalén. ²⁷ Chi súcuan ni cacusiñ ni i ni casáha i. Te íyó váha jeē súcuan, chi maá i jeē cácuu i ñayuu tāca gá nación, táu i jeē sáha váha i nuū ñáyuu hebreo un. Chi ñayuu hebreo ni casáha jeē ní quiiji jnúhun Yaā Dios nuū i jeē quéndōo váha ánuá i sáha. Jeē yúcuan cánuú jéē chindéé ñáhán i ñayuu hebreo cácañíje jíin ndajniñu ñayivi yáha. ²⁸ Núu súcuan te jeē jínu jniñu yáha jéē quindēca ri xūhun yáha nuū i,

yūcuán na te jecondēhe rí rohó jíjnáhan ró jéē yáha ri quihīn rī España. ²⁹ Te jíni vāha ri jeē quivī jínú rī nuū rō, te vāha ndasí quendōo ró jéē nacani ga rī jnūhun vāha Cristo nuū rō.

³⁰ Hermano jijnáhan ró, cáhán ndahú rí jíin ró jeē chindéé ñáhán ró ruhū cacān tahu rō jehē rī nuū Yaā Dios siquī jníñu ndúcú ndéyí rí. Súcuan sáha ró síquī jeē candíje yó Jítóho yō Jesucristo, jíin síquī jeē cundáhú ni yō jnáhan yó sáha máá Espíritu. ³¹ Te cacān tahu rō jeē na cácu rí nuū tēe región Judea jeē tu cá-candíje, jíin jéē na cúsiñ ni tācá hermano ñuu Jerusalén jeē quíndēca ri xūhun yáha cuu de. ³² Te súcuan te núu cúní Yaā Dios te jecondēhe rí rohó jíjnáhan ró, te cusīñ ni yō, te nanihīn ni rī jeē condee rī jíin ró. ³³ Te máá Yaā Dios jeē jéhe jnūhun ndeyí sīñ ni, na cóo ya jíin ró jijnáhan ró. Amén.

Jeē cahán Pablo jeē sándeýí ni i

16 Te vijna te cáhán rī jíin ró jijnáhan ró jéē na chindéé ñáhán ró hermana Febe, chi cúu ña ñahan jéjníñu jeē síquī jnúhun ya nuū ñayuu cá-candíje ñuu Cencrea. ² Te cuatáhú ró ña nájnūhun cúní máá Jítóho yō, chi súcuan cánuú sáha hermano cá-candíje. Te chindéé ñáhán ró ña na-ni vé cúu jeē jíni ñúhún ña, chi súcuan ni chindéé ñáhán máá ña cuehē ñayuu, te suni nde ruhū.

³ Cahán rō jíin Priscila jíin Aquila jeē sándeýí ni ndindúú de, áchí rí, chi cáchindéé ñájna han de jíin rí síquī jníñu Cristo Jesús. ⁴ Chi ná ni tyo jnūndóho jeē cuu rī nuú, te ni cachundeyí ni de ni canducú de scácu de ruhū, vésú suni cuu máá de núú. Te nácuatáhú rí nuū ndindúú de, te nasūu máá-ni ruhū, chi suni taca grupo ñayuu cá-candíje taca nación. ⁵ Te suni cahán rō jíin ñayuu cá-candíje ndútútú vehe de, sándeýí ni i, áchí rí. Te cahán rō jeē sándeýí ni Epeneto, tēe manī rī jíin. Chi ñuu Acaya, máá de cúu jeē ní candíje xīhna gā nuū Cristo. ⁶ Suni cahán rō jeē sándeýí ni María, ñahan jeē ní jejníñu ndasí jeē síquī jnúhun ya mēhñu ró jijnáhan ró. ⁷ Te cahán rō jeē sándeýí ni Andrónico jíin Junias, tēe cácuu jnáhan ñuu rī jeē ní cahīin jíin rí vecāa. Te taca apóstol chi cájejnúhún de ndindúú tēe jíñá, te xīhna gā de ni cacandíje Cristo vésú máá rí.

⁸ Cahán rō jeē sándeýí ni Amplias, tēe manī rī jíin, chi cándíje de Jítóho yō. ⁹ Te cahán rō jeē sándeýí ni Urbano, tēe chindéé ñájna han jíin yó síquī jníñu Cristo Jesús, te suni súcuan Estaquis, tēe jeē manī rī jíin.

¹⁰ Suni cahán rō jeē sándeýí ni Apeles, tēe jeē ní steén jeē candíje vāha de Cristo, te suni súcuan cahán rō jíin ñayuu vehe Aristóbulo. ¹¹ Cahán rō jeē sándeýí ni Herodión, tēe cúu jnáhan ñuu rī. Te suni súcuan ñayuu vehe Narciso jeē cá-candíje máá Jítóho yō. ¹² Te suni cahán rō jeē sándeýí ni Trifena jíin Trifosa, ñahan cásájniñu síquī jnúhun máá Jítóho yō. Te suni sándeýí ni Pérsida, hermana jeē manī yō jíin, chi suni ni sájniñu

ndasí ña síquī jnúhun Jítóho yō. ¹³ Te cahán rō jeē sándeýí ni Rufo, tēe cájejnúhún ñayuu jeē vāha cándíje de máá Jítóho yō. Te suni súcuan cahán rō jíin náná de, te máá ña suni ni jito ña ruhū nájnūhun jeē naná rī cúu ña. ¹⁴ Te cahán rō jeē sándeýí ni Asíncrito jíin Fle-gonte jíin Hermas jíin Patrobas jíin Hermes jíin táca hermano jeē cáyūcu jíin de. ¹⁵ Te suni súcuan Filólogo jíin Julia jíin Nereo jíin cuáha de, jíin Olimpás jíin ndíhi hermano cá-candíje cáyūcu jíin de jíjnáhan de.

¹⁶ Te jeē cahán taca ró jíin jnáhan ró, te yíñúhún techūhu ró ndaha i. Te taca grupo ñayuu cá-candíje nuū Cristo, cáhán i jeē na sándeýí ni rō.

¹⁷ Te cáhán ndahú rí jíin ró, hermano jijnáhan ró, jéē cóto ró máá ró nuū ñayuu cútucu ni te ndúcú stévi jnáhan jíin jnúhun tu quíjnáhan jíin jéē ní cacutūhva ró. Te cujiyo ró núu i jíjnáhan i. ¹⁸ Chi ñayuu súcuan, tu jéjníñu i nuū Jítóho yō Jesucristo, chi máni ndíhví ni i síquī jeē cáji i. Te yōhyo ndúxí i jíin jnúhun cácahán i, te súcuan stáhú i ñayuu jeē tu jíni vāha. ¹⁹ Te máá ró jijnáhan ró, chi je cájini ndíhi ñayuu ndese vāha cá-jetáhú ró nuū yā, te jeē yúcuan cúsiñ ni rī. Te cúní rī jeē cóo listo vāha ró sáha ró jniñu vāha, te ma sáha ró jniñu néé. ²⁰ Te máá Yaā Dios jeē jéhe jnūhun ndeyí sīñ ni, yachí sáha ya jeē cúndeýí ró síquī jexeén jeē cúu Satanás. Te ñúhun ni rī jeē Jítóho yō Jesucristo na sáha ya jeē vāha róhó jíjnáhan ró.

²¹ Sándeýí ni rō jijnáhan ró, áchí Timoteo, tēe chindéé ñáhán jíin rí síquī jnúhun ya. Te suni súcuan cácahán jnáhan ñuu rī Lucio jíin Jasón jíin Sosípater.

²² Te ruhū jeē naní Tercio, jeē tēe ri carta yáha jéē cahán Pablo, suni cáhán rī jeē sándeýí ni rō jeē cá-candíje ró Jítóho yō.

²³ Te Gayo, tēe ni jēhe núu vehe ndéé rúhú Pablo, cáhán de jeē sándeýí ni rō jijnáhan ró. Te suni jéhe núu de vehe nuū taca ñayuu cá-candíje. Te suni súcuan cáhán Erasto, tēe cúu tesoroero ñuu yáha, te suni súcuan cáhán hermano Cuarto.

²⁴ Te ñúhun ni rī jeē máá Jítóho yō Jesucristo, na sáha ya jeē vāha róhó jíjnáhan ró. Amén.

Jnūhun sándēhi jéē cahán jeē yóhyo cújéhu ya

²⁵ Te vijna na cáhán yō jeē yóhyo cújéhu Yaā Dios. Chi máá yá cuu sáha jeē cúñi ñihin ga rō jijnáhan ró jíin jnúhun jnáma ya rohó jeē nacani ri, jíin jnúhun Jesucristo jeē steén rī. Chi súcuan ni steén Yaā Dios jnūhun sāhi yá, jeē ní yisāhi ñí cání nde ná tu jecōo ñayiví. ²⁶ Te vijna te je ni nane cáji. Chi jíin tútu i jeē ní catee tēe ni canacani jnūhun ya, ni jitē núu jnūhun sāhi yáha nuū ñayuu taca nación, návāha candíje i te cuatáhú i. Chi Yaā Dios jeē técu ñí cání, súcuan ni ndacu ya jniñu.

²⁷ Te ñí cání na cáhán yō jeē yóhyo cújéhu Yaā Dios síquī jníñu ní sáha ya jeē jíin Jesucristo. Chi máá ñn-ni ya iyó te yóhyo ndíchí yá. Súcuan na cóo. Amén.

1 CORINTIOS

1 Máá rí cúu Pablo, te ni cana Yaā Dios ruhū cúu ri apóstol Jesucristo. Chi súcuan ni nujnahan ni yā ni tají yá ruhū nacani ri jnūhun ya. Te ndindúú rí jíin hermano yō Sóstenes ² cátee ri carta yáha cuájeē nuū rohó ñáyuu ñuu Corinto jeē cácañdije ró Yaā Dios. Chi cácuu ró ñáyuu maá yá, chi cáyihí ró ndaha Cristo Jesús. Chi ni cana Yaā Dios rohó jíinahan ró jéē coo ndoo coo iī rō nuū yā. Te ni cana ya rohó ndé jíin táca gá ñáyuu jeē ndácunehen i máá Jítóho yō Jesucristo, ndé-ni cúu nuū cáhīyo i. Chi Jítóho táca yó jíin i cúu ya. ³ Te cáñuhun ni rī jeē Tatá yō Yaā Dios jíin Jítóho yō Jesucristo na sáha ga yā jeē váha róhó, te sáha ya jeē coo ndeyí coo sñi ni rō.

Cristo sáha ya táca jéē váha yóhó

⁴ Te níní nácuatáhú rí nuū Yaā Dios jeē siquí rohó jíinahan ró, chi jeē jíin Cristo Jesús ni sáha ya jeē váha róhó. ⁵ Chi cáyihí ró ndaha Cristo, te jeē yúcuan ní sáha Yaā Dios jeē cáhīyo cúca ró jíin táca jnúhun ya, chi cájecūhun váha ni rō te cúu nácani ró. ⁶ Chi súcuan cúu jeē cáhīin nīhin ró jíin jnúhun Cristo jeē ní canacani ri nuū rō. ⁷ Te súcuan te tu cúmanī ni ñn tahū jeē jéhe ya cuu ánuá rō níní jéē cándetu ró quiví jeē quénda ndijin Jítóho yō Jesucristo. ⁸ Te máá yá chi sáha ya jeē cuiñi nīhin ró nde na jínu quiví, návāha ma cóo cuēchi siquí rō quiví ndíji Jítóho yō Jesucristo. ⁹ Te squícu Yaā Dios táca jéē ni jéjnūhun ya, te ni cana ya rohó jíinahan ró návāha cuni jnahan ró jíin Séhe ya, Yaā cúu Jítóho yō Jesucristo.

Siquí jeē ma cóo sñi ni i jíin jnahan i

¹⁰ Hermano, nde jíin síhví Jítóho yō Jesucristo cahán ndahú rí jíin ró jeē ñnuú-ni na ndájnūhun ró jíinahan ró, te ma cóo sñi ni rō. Chi váha ñnuú na cóo ni rō jíin táca jéē cájeni ni rō. ¹¹ Súcuan cáhán rī, ñánī mánī, chi ni cacastūhun ñáyuu vehe Cloé nuū rī jeē cátejnahan ró. ¹² Chi táca ñn ñn ró sñi sñi cácahān rō: Ruhū chi jíin Pablo índichi rī, cácahān sava ró. Te sava ga rō: Ruhū chi jíin Apolos. Ruhū chi jíin Pedro. Ruhū chi jíin Cristo. Cácahān rō. ¹³ Te jeē cácahān rō súcuan ¿te á cájeni ni rō jeē sñi sñi Cristo iyó jéē canacani ri jnūhun? ¿Te á ruhū Pablo ni jihí jicā cruz jehē rō? ¿Chí jíin síhví ruhū ni cajendute ró, chí naún? ¹⁴ Tú cuiñi. Te na cútahú rī nuū Yaā Dios jeē tú cuehē rō ni scuándute ri, chi máá Crispo jíin Gayo-ni, ¹⁵ návāha ma cahán ni ñn ró jéē jíin síhví rí ni jendute ró. ¹⁶ Te sá núcūhun ni

rī jeē suni ni scuándute ri Estéfanos jíin ñáyuu vehe de. Te sanaa te súcuan-ni cúu ñáyuu ni scuándute ri, jéni ni rī. ¹⁷ Chi tu ní téjníñu Cristo ruhū jeē scuándute ri, chi sa suhva jeē nácani ri jnūhun jeē jnáma ya ñáyuu. Te tu ní ndúcú rí jeē steén rī nuū rō ñn modo ndichí jéē ma jécūhun ni rō, chi núu súcuan te ma cúu jecūhun váha ni rō jnūhun jeē ni jihí Cristo jicā cruz.

Jíin Cristo ni steén Yaā Dios poder yā jíin jnúhun ndichí yá

¹⁸ Te jnūhun jeē ni jihí yā jicā cruz jeē jnáma ya ñáyuu, chi jnūhun cánéé íi cúu nuū ñáyuu cuangoo nuū jnahnú ndetū. Te máá yó jeē cuahán yō nuū cácu yó, chí jíin yō jeē jnūhun Yaā Dios jeē ndiso poder cúu. ¹⁹ Chi suhva yósó núu tútu iī jeē ni cáhān Yaā Dios:

Na snáa rī jnūhun ndichí cácahān ñáyuu ndichí cuenta ñayiví yáha, te ma cuatáhú rí jnūhun cácahān ñáyuu jeē jéni ni jeē jini váha. Achí yá.

²⁰ Núu súcuan ¿te ndé cuajníñu tēe ndichí cuenta ñayiví yáha, jíin tēe cástéén tutu, jíin tēe cánanducú yúcún síquí jeē steén ñáyuu ñayiví yáha? Chi táca jnúhun ndichí cuenta ñayiví yáha, ni cahān Yaā Dios jeē jnúhun cánéé íi cúu. ²¹ Te yōhyo ndichí sáha Yaā Dios. Chi táca jnúhun ndichí cájini ñáyuu ñayiví, ni cachi ya jeē tu jéjníñu jeē cúni i ndese Yaā cúu ya. Yūcuán na te ni nujnahan ni yā jeē jíin jnúhun ya jeē canacani ri te jnama ya ñáyuu cácañdije, vésú cájeni ni ñáyuu ñayiví jéē jnúhun cánéé íi cúu.

²² Chi ñáyuu hebreo, máni cácuni i jeē sáha Yaā Dios cuehē jniñu jéñu jeē steén poder yā. Te ñáyuu griego chí máni siquí jnūhun ndichí cándihvī ni i. ²³ Te máá rí chí sa suhva canacani ri jnūhun jeē ni jihí Cristo jicā cruz jeē jnáma ya ñáyuu. Te jnūhun yáha sáha jeē jnánīni ni ñáyuu hebreo, te ñáyuu táca gá nación chí cájeni ni i jeē jnúhun cánéé íi cúu. ²⁴ Te ñáyuu jeē ní cana ya ni quivícoo ndaha ya, vésú ñáyuu hebreo chí ñáyuu griego, chí jíin i jeē jíin Cristo ni steén Yaā Dios poder yā jíin jnúhun ndichí yá. ²⁵ Chi jnūhun Yaā Dios jeē cácahān ñáyuu jeē jnúhun cánéé íi cúu, yōhyo ndichí gá vésú jnūhun ndichí ñáyuu. Te cájeni ni ñáyuu jeē tú na poder yā ná ni jihí Jesús jeē jnáma ya yohó, te tuú chí nīhin téyí gá poder yā ún vésú poder ñáyuu. ²⁶ Hermano, máá ró cácuu jeē ní cana ya ni quivícoo ró ndaha ya. Te condēhe ró jeē tú cuehē rō ndichí jíin jnúhun ñayiví, ni tú cuehē rō cándacu jniñu, ni tú cue-

hē rō cácuu sēhe ñayuu cujéhnū. ²⁷ Chi sa suhva ni nacāji Yaā Dios tāca jéē cácahān ñayuu ñayīvi jéē tu ndíchí cuiti, návāha coo jnūhun canu nuū tāca jéē ndichí. Te ni nacāji ya ñayuu tu téyí ini ñayīvi, návāha coo jnūhun canu nuū ñayuu teyí. ²⁸ Te suni ni nacāji Yaā Dios tāca jéē tu cújéhnū ini ñayīvi, jíin tāca jéē sajéē ni i nuū, nde jíin tāca jéē tú jniñu cájeni ni i, návāha snúu ya tāca jéē cujéhnū ini ñayīvi. ²⁹ Súcuan ni sáha ya návāha ni ñin ñayuu ma cúu sátéyí i máá i nuū yā. ³⁰ Te máá ró jijnáhan ró chi ni sáha Yaā Dios jeē nduú ró jíin Cristo Jesús. Chi nde nuū maá yá ni canihīn yō jnūhun ndíchí, te ni ndahva yā cuēchi yó, te ni sáha ya jeē iyó ndoo iyó ī yō nuū yā, chi ni jnama ya yohó. ³¹ Te jeē yúcuan na cóo nájnūhun cáhán tutu īi: Núu ñin ñayuu cuní i cutéyí i, te na cutéyí i síquī jeē ni sáha máá Jítóho yō jehē i, áchí.

Jeē nácani Pablo jnūhun jeē ni jíhī Cristo

2 Te ruhū, hermano, ná ni jeē rī nuū rō jijnáhan ró jéē nácani ndaā rī jnūhun Yaā Dios, te tu ní nácani ri jnūhun ndíchí jéē ma jécūhun ni rō. ² Chi ná ni ŷyo ri jíin ró te tú na inga jnūhun ní ndúcú rí castūhun rí nuū rō, chi máni máá jnúhun Jesucristo jeē ni jíhī yā jicā cruz jeē jnáma ya yohó. ³ Te ná ni jinū rī nuū rō jijnáhan ró, chi tú na fuerza rī, te yúhú rí, te quísi i ruhū. ⁴ Te ná ni nacani ri jnūhun nuū rō, chi nasūu jíin jnúhun ndíchí ñayuu ñayīvi ní scándije ri rohó, chi sa suhva jíin máá poder Espíritu yā ni steén rī nuū rō jijnáhan ró, ⁵ návāha ma cuíñi ró síquī jnúhun ndíchí cácahān ñayuu, chi cuiñi ró síquī poder Yaā Dios.

Jíin Espíritu te steén Yaā Dios ndese Yaā cúu ya

⁶ Te ndaā chi ndíchí cácahān rī jíin ñayuu jeē jé ni ije jíin jnúhun cándije i ya. Te nasūu jnúhun ndíchí jéē iyó ini ñayīvi yáha, ni nasūu jnúhun ndíchí cácahān tēe cácujuhnu ñayīvi yáha, chi tēe ún yāha-ni jeē cácujuhnu de. ⁷ Chi jnūhun cácahān rī cúu jnūhun ndíchí máá Yaā Dios jeē ní yisāhí. Chi jnūhun ndíchí un jéē ní yisāhí, ni jequin Yaā Dios nde ná tu jecōo ñayīvi, návāha cācu yó jéē cótecu yō ñí cāni sáha jnūhun ún. ⁸ Chi ni ñin tēe cújéhnū nuū ñayīvi yáha, tu ní jécūhun ni de jnūhun ndíchí un. Chi núu ni jecūhun ni de núu, te ma cáhni cuiti de máá Jítóho yō, Yaā cujéhnū luu. ⁹ Chi cúu nájnūhun cáhán tutu:

Tāca jéē ni sātūhva Yaā Dios jeē cúu ñayuu jeē maní jíin yá,

ni ñin ún tu ní jító jínúū ñayuu, ni tu ní jíni sōho i, ni tu ní quíji jeē súcuan cani ni i.

Achí tutu. ¹⁰ Te máá yó jijnáhan yó chi ni steén Yaā Dios tācá un núu yō jeē jíin Espíritu yā. Chi máá Espíritu jiní vāha ya te steén yā ndíhi, chi nde ndíhi jeē ndíchí gá máá Yaā Dios.

¹¹ Chi ni ñin ñayuu ma cúu cuni i ndese jéni ni inga ñayuu, chi máá-ni i jíin ánuá i cúu jeē jiní. Te suni súcuan ni ñin ñayuu tu jíni i ndese jéni ni Yaā Dios, chi

máá-ni Espíritu Yaā Dios cúu jeē jiní. ¹² Te máá yó chi ni nihīn yō Espíritu un jéē véji nuū Yaā Dios, te tu cájeni ni yō nájnūhun cájeni ni ñayuu ñayīvi. Te jeē yúcuan cúu jeē cájecūhun ni yō ndese ni sáha Yaā Dios jeē váha yóhó síquī jeē váha ni yā. ¹³ Te suu síquī tāca jéē yáha cúu jeē cácahān rī, te nasūu jíin jnúhun jeē castéén ñayuu ndíchí, chi jíin jnúhun jeē steén maá Espíritu. Chi cástéén rī jnūhun Espíritu nuū ñayuu cánevāha Espíritu.

¹⁴ Te ñayuu ñayīvi tu cájetáhú i tāca jnúhun jeē véji nuū Espíritu Yaā Dios, chi cájeni ni i jeē jnúhun cánéé īi cúu. Te ma cúu jecūhun ni i, chi tu cánevāha i máá Espíritu jeē sáha jeē jécūhun ni i. ¹⁵ Te ñayuu cánevāha Espíritu, chi cájecūhun ni i ndese iyó ndíhi-ni. Te ñayuu ñayīvi ma cúu jecūhun ni i ndese ñayuu cácuu ñayuu ún. ¹⁶ Chi suhva cáhán tutu īi: ¿Nde ñin cuu cuni ndese jéni ni máá Jítóho yō? ¿Te ndé ñin cuu steén nuū yā? Ni ñin ma cúu. Achí tutu. Te vēsú súcuan te máá yó chi cájeni ni yō nájnūhun jéni ni Cristo.

Jeē cáchindéé ñajnáhan de cájejniñu de nuū Yaā Dios

3 Te ruhū, hermano, tu ní cúu cahān rī jíin ró jijnáhan ró nájnūhun cáhán rī jíin ñayuu jica jíin Espíritu. Chi ni cahān rī jíin ró nájnūhun jíin ñayuu cájica jíin modo máá, chi cácuu ró nájnūhun sūchi lúlí jéē ná tu ije ró jíin jnúhun Cristo. ² Ni steén rī nuū rō jeē tú yíí, chi cácuu ró nájnūhun sūchi lúlí jéē jéxin gā. Te tu ní cáhán rī jíin ró jnūhun yíí jeē cúu nájnūhun jeē ndáva jeē yéji ñayuu ni ije, chi ná tu canda ró jíin ndé saá. Te ni vijna ná tu canda ró jíin. ³ Chi cájica ga rō jíin modo neé máá ró. Chi cáccuésún ni rō, te cácajnáhan ró, te cácusñin ni rō. Núu súcuan te cácuu ró nájnūhun ñayuu ñayīvi jéē cájica jíin modo neé máá. ⁴ Chi ñin ró cáhán: Ruhū chi jíin Pablo índichi rī. Te inga rō cáhán: Ruhū chi jíin Apolos. Te súcuan cúu jeē cájica ró jíin modo neé máá ró

⁵ ¿Te ndé ñin cúu ruhū, te ndé ñin cúu Apolos núu súcuan? Chi máá mozo-ni Yaā Dios cácuu ri, te ni jeniñu ya ruhū návāha cándije ró máá Jítóho yō. Chi ná ñin ná ñin ri ni sáha jniñu ndese ni jēhe máá Jítóho yō nuū rī. ⁶ Ruhū, nájnūhun ni taji ri jnūhun ya ini anuá rō, te Apolos, nájnūhun ni chuhun de ndute cúu jeē ní steén gā de nuū rō. Te máá Yaā Dios cúu jeē ni scuéhnu jnūhun ini anuá rō. ⁷ Núu súcuan te tú na vé cúu sáha tēe táji ni tēe chūhun ndute, chi sa suhva máá Yaā Dios cúu jeē scuéhnu. ⁸ Te tēe táji jíin tēe chūhun ndute, ñin-ni cácuu de. Te tācá de chí cuāha ya yāhu nuū de ndese jniñu ni casáha ñin ñin de. ⁹ Chi ruhū jijnáhan ri chi tēe chindéé ñajnáhan cájejniñu nuū Yaā Dios cácuu ri. Te máá ró jijnáhan ró cácuu nájnūhun itu Yaā Dios jeē jícu ya jíin.

Te suni nájnūhun ñin vehe jeē sáha Yaā Dios cácuu ró. ¹⁰ Te ruhū chi cúu ri nájnūhun ñin maestro albañil jeē ní jequin rī cimientu vehe ún, cúu jeē ni scándije ri rohó. Te inga de cásama de síquī, cúu jeē castéén gā de nuū

rō. Nuu súcuan te ná ñn ná ñn de na cóo cuidado de ndese sáma de siquĩ. ¹¹ Te Jesucristo cúu cimientu vehe ún, te ni ñn ma cúu caquin ñnga cimientu, chi máá yá cúu jeē ní ndahva cuēchi ró. ¹² Te tāca ñáyuu cácan-díje, chi sáha i vehe siquĩ cimientu un, núu jíin nda-jníñu vāha nájnūhun oro chí plata chí yūu luu, chí jíin jéē yachí naa, nájnūhun yujnu chí ite chí ndayóhō. ¹³ Te natūu jniñu un jéē ní sáha ñn ñn i, te suu cúu ndese ni condihvĩ ni i siquĩ maá yá. Chi máá quivĩ juicio jeē sán-daā yā jniñu ñayuu, quivĩ ún natūu cáji jniñu i. Chi jíin ñúhūn quiji quivĩ ún, te nájnūhun sáha ñuhūn jeē jé-hmu tāca jéē cúu cayū, súcuan coto ndee ya jniñu ñn ñn i. ¹⁴ Te núu tú cayū jniñu ní sáha i siquĩ cimientu un, te nihín i tahū i. ¹⁵ Te núu tu ní cóndihvĩ ni i jíin jniñu ya, te ma nihín i tahū i, chí nájnūhun cayū jniñu i. Te máá i chí cācu ánuá i, vēsú nájnūhun je yajni cayū i nuū yáñuhūn.

¹⁶ ¿A tu cájini rō jeē cácuu ró nájnūhun templo Yaā Dios, chi ndéé Espíritu Yaā Dios ini anuá rō? ¹⁷ Te núu ñn tēe stívi de templo Yaā Dios, te snáhnú ndetū yā tēe ún. Chi ndoo ndasí cúu templo yā, te suu cácuu máá ró.

¹⁸ Ni ñn ró ma stahú ró máá ró jíin jéē jéni ni rō. Nuu ñn ñayuu jéni ni i jeē ndichí i jíin jnúhun ñayivĩ yáha, vāha ga na siáa i ún, návāha coo ndichí ndije i jíin jnúhun máá yá. ¹⁹ Chi jnúhun ndichí jéē iyó ini ñayivĩ yáha, jnúhun cánéé ñi cúu nuū Yaā Dios. Chi cáhán nuū tútu i: Ñayuu ndichí cuenta ñayivĩ, chí nájnñi ya i siquĩ jnúhun ndichí i jeē jési i jnúhun ya, achí. ²⁰ Te cáhán tucu tutu: Máá Jítoho yō jini yā tāca jéē jéni ni ñayuu ndichí, chí máni jeē jéni cāhá ni i, achí. ²¹ Nuu súcuan te ni ñn ró má cutéyí ró jeē siquĩ ni ñn tēe ndichí. Chi cuenta maá ró cúu ndihni. ²² Cúu Pablo, cúu Apolos, cúu Pedro jeē castéén nuū rō. Cúu ndihni jeē iyó ini ñayivĩ, jeē iyó vijna jíin jéē quíji. Te vēsú núu cotecu rō chí cuu rō, te ndihni-chi cuenta maá ró cúu. ²³ Te máá ró cácuu cuenta Cristo, te Cristo cúu cuenta Yaā Dios.

Jeē casájniñu apóstol siquĩ jnúhun ya

4 Nuu súcuan te na cáni ni rō jijnáhan ró jeē mozo-ni nuū Cristo cácuu ri, jeē ní tejniñu ya ruhū jeē steén rī jnúhun Yaā Dios jeē ní yisāhi ndé jenahán. ² Te ndaā chí tēe jeē sájniñu siquĩ ún, iyó responsable ná ñn ná ñn de jeē squícu vāha de. ³ Te ruhū tu sáha ri cuenta núu cánanducú ró siquĩ rī ndese sáha ri, chí núu cánanducú ñáyuu cácujuhnu ini ñayivĩ. Te ni máá rí tu chíhi ri cuenta siquĩ maá rí. ⁴ Chi vēsú jini rī jíin ánuá rī jeē tú na cuēchi ri, te nasūu yúcuan cúu jeē quéndōo ndaā rī, chí máá Jítoho yō cúu jeē jito ndee ruhū. ⁵ Jeē yúcuan ma nánducú ró siquĩ jniñu jnáhan ró, chí nde na quēē máá quivĩ te cuni rō. Chi nde na ndíji máá Jítoho yō te nastúu ndijin yā tāca jéē jéni ni ñayuu jíin ánuá i. Yūcuán na te máá Yaā Dios cuajnúhún yá ná ñn ná ñn i ndese ni casáha i.

⁶ Hermano, tāca jnúhun yáha ní cahān rī návāha quendōo vāha ró jijnáhan ró. Te ni cachi rī jeē máá rí jíin Apolos cácuu ri mozo-ni nuū yā, te súcuan cácuu ri ñn ejemplo nuū rō. Te cáhán rī jeē súcuan cácuu ri, návāha cutūhva ró cani ni rō maá-ni nájnūhun cáhán tutu i. Chi ma sandúxí ró jeē cuajnúhún ró ñn tēe stéén, te ñnga de tuú. ⁷ ¿Te naun cácutéyí ró nuū jnáhan ró núu súcuan? ¿Te na vé cúu jeē iyó núu rō jeē tu ní cácutahū rō nuū yā? Te núu ni cacutahū rō nuū yā, ¿te naun cásatéyí ró máá ró jeē nájnūhun jeē nasūu jéē ní cacutahū rō cúu?

⁸ Va je ni cacucúca ró, chí je cánevāha ró ndihni, cájeni ni rō. Te je cándacu máá ró jniñu, te ni tuá cájini ñúhún ró ruhū, cájeni ni rō. Tú vāha jeē súcuan cácutéyí ró. Te nacā jeē vāha núu jeē cándacu ndije nde ró jniñu núu, návāha suni cuāha ró jnúhun jeē ndacu nde ri jniñu jíin ró jijnáhan ri. ⁹ Te iyó jéni ni rī jeē ruhū tēe cácuu apóstol, ni sáha Yaā Dios jeē cácuu ri nájnūhun tēe núu ga nuū ñáyuu, nájnūhun tēe jeē jé ni cundaā jeē cúu. Te ññí ñáyivĩ jíin andivĩ cándēhe vāha nuū rī, cúu ndajéhe Yaā Dios jíin ñáyuu. ¹⁰ Chi jeē siquĩ Cristo te cácahān i jeē tēe cánéé cácuu ri. Te tāca rōhó va ndichí ró jíin jnúhun Cristo, cájeni ni rō. Te tāca rúhū chí tu fuerza rī, te rōhó va iyó fuerza rō, cájeni ni rō. Te rōhó chí cáhiyo yíñúhún ñáyuu nuū rō, te nuū rī chí cásájéé ni i. ¹¹ Nñí véjicoo ri cájiti rī sōco te nde vijna. Te cájichī rī ndute, te cúmanī sahma ri, te tu cásáha vāha ñayuu jíin rí, te ni tu cánevāha ri vehe. ¹² Te nihin cásájniñu ri jíin ndaha ri. Cácahān neé i nuū rī, te cácahān vāha ri jíin i. Cájito xeēn i ruhū, te cájendeyí ni rī. ¹³ Cácahān neé i siquĩ rī, te sa cácahān manī rī jíin i. Te cácuu ri nájnūhun yācá ini ñayivĩ, te cásquéhichī i ruhū nde vijna.

¹⁴ Te nasūu jéē tēe ri yāha jéē cúcanu rō, chí sa suhva jeē stihví ni rī rohó, chí cácuu ró nájnūhun sēhe ri chí manī rī jíin ró. ¹⁵ Chi vēsú na cóo uxí mil tēe stéén jnúhun Cristo nuū rō, te ñn-ni tátá rō iyó. Te máá rí cúu nájnūhun tátá rō, chí ni scandíje ri rohó jéē ní nacani ri jnúhun vāha Cristo Jesús jeē jnáma ya yohó. ¹⁶ Nuu súcuan te cáhán ndahú rí jíin ró jeē na ndácu ró rúhū jijnáhan ró.

¹⁷ Te jeē yúcuan cúu jeē tají rí Timoteo cuajeē de nuū rō. Chí cúu de nájnūhun sēhe ri jeē manī rī jíin de, te squícu vāha de nuū máá Jítoho yō. Te máá de nacachi tucu de nuū rō ndese jíca ri jeē candíje ri Cristo, jíin ndese stéén rī nuū tāca grupo ñayuu cácan-díje tāca lado. ¹⁸ Te sava ró chí cásatéyí ró máá ró, chí cájeni ni rō jeē ma jéé cuiti gā rī nuū rō. ¹⁹ Te tuú chí yachí jeē rī nuū rō te núu súcuan cúní máá Jítoho yō. Yūcuán na te nanducú rí siquĩ tēe cácutéyí, te ma sáha ri cuenta jnúhun cácahān-ni de, chí sa coto ndee rī de núu cuu squícu nde de. ²⁰ Chi jeē ndácu Yaā Dios jniñu nuū yō, nasūu máá jéé cahán ñi-ni yó cúu, chí jini ñúhún condiso poder jnúhun cáhán yō jíin jniñu sáha yó. ²¹ Nuu súcuan ¿te ndese cácuni rō? ¿A jéē cuxeēn rī nuū rō núu na jéé rī, siquĩ jeē tu cánacani ni rō, chí

nacani ni rō te jeē rī jīin jnūhun cundáhú ni jīin jnūhun vītá ni?

Jeē sándaā Pablo siquī ñin cuēchi

5 Te ni nihīn rī jnūhun jeē jīca jnéni ñin tēe jeē ñe mēhñu ró, chi ndéca de naná uū de. Te xeēn ndasí sáha tēe ún, chi ni ñayuu jeē tu cájini jnūhun Yaā Dios, tu cásáha i súcuan. ² Te vēsú súcuan te cásátéyí ró maá ró jijnáhan ró. Vāha ga jeē na cúcuíhyá ndasí ni rō. Te cánuú jéē na quénehen ró tēe sáha cuēchi ún na quénda de mēhñu ró. ³ Te ruhū, vēsú tu íyó rī jīin ró, te nájñūhun jeē íyó rī jīin ró cúu jeē ñúhún ni rī rohó. Te je ni sándaā rī siquī tēe ni sáha cuēchi ún, chi nájñūhun jeē íyó rī jīin ró cúu. ⁴ Núu súcuan te na ndútútú ró jijnáhan ró, te máá Jítóho yō Jesucristo coo ya jīin ró. Te máá rī chi nájñūhun cone ri jīin ró, chi ñúhún ni rī rohó. Te poder maá Jítóho yō Jesús suni coo jīin ró. ⁵ Te na chíhi yó tēe ún ndaha Satanás, návāha na ndóho yiquí cúñu de, te nacani ni de te cácu ánuá de quivī ndiji Jítóho yō Jesús.

⁶ Tuú vāha jeē casátéyí ró maá ró. ¿A tu cájini rō jnūhun cáhán suhva? Vēsú jecu-ni levadura te ndáa nñí ñujen sáha, áchí. ⁷ Núu súcuan te quenehen ró tēe un nájñūhun scáne ró levadura jeē ni tēvi. Te súcuan te cuu ró nájñūhun pan jeē cúvāha jīin ñujen jéé jéé tú na levadura yíhi, jeē cáyeji i vico pascua. Te ndaā jeē súcuan cácuu ró. Chi je ni jihī Cristo jeē ni sócō yā maá yá jehē yō, chi cúu ya nájñūhun londe pascua jeē ni jíhi. ⁸ Núu súcuan te na cócūhun ni yō ndese ni cuu vico pascua un, te na cóo ndije ndaā anuá yō, te suu cúu nájñūhun pan jeē tú na levadura yíhi. Te ma sáha yó jniñu néé jīin jniñu jnéhén, jeē cúu nájñūhun levadura jeē ni tēvi.

⁹ Nuū ñga carta jeē ní tee ri nuū rō jijnáhan ró ni cahān rī jeē ma quivī nduu rō jīin ñayuu cájica jnéni. ¹⁰ Te tu ní cáchi rī jeē ma quijnáhan cuiti rō jīin ñayuu tu cándije jeē cájica jnéni, jeē ndiyo ni, jeē sácuihná, jeē chíñúhún ídolo. Chi núu súcuan te jīni ñúhún jeē quénda ró ini ñayiví núu, chi tuá na ñga modo jeē cújjiyo ró núu i chi ndéé yó ñayiví jīin i. ¹¹ Chi sa suhva ni cachi rī jeē ma quivī nduu rō jīin máá ñayuu jeē cácahān i jeē cúu i hermano, te núu jīca jnéni i, chí ndiyo ni i, chí chíñúhún i ídolo, chí chísó jnūhun i siquī jnáhan i, chí nájñi i, chí cuíhná i. Te ni ma cáji cuiti rō staā jīin ñayuu casáha súcuan. ¹² Chi nasūú jniñu ri cúu jeē sándaā rī siquī ñayuu jeē tu cáhīin jīin yó. Yaā Dios cúu jeē sándaā siquī i. Te ñayuu cáhīin jīin ró chi cánuú jéē sándaā rō siquī i. Núu súcuan te cánuú jéē quénehen ró tēe ni sáha cuēchi un jéē ñe de mēhñu ró, na quénda de.

Jeē ma cáquin i cuēchi siquī jnáhan i nuū tohó tu cá-candije

6 Te núu jnáhan ró jéē candije ni sáha cuēchi siquī rō, ¿te naun jéngoo ró jīin de nuū tohó jeē tu cá-

candije jīin yó? ¿Te naun tu cásandaā rō nuū jnáhan ró cándije Yaā Dios? ² ¿A tu cájini rō jeē ñayuu cándije Yaā Dios chi ñin quivī te sándaā i jniñu ñayuu ñayiví? Te núu ñin quivī sándaā rō jniñu ñayuu ñayiví, ¿te á má cúu sándaā rō vijna siquī tāca cuēchi lúlí cásáha jnáhan ró? ³ ¿A tu cájini rō jeē ñin quivī te sándaā yō nde jniñu tācá ndajéhé andiví? Te nagā ni cuu jniñu ñayiví yáha jeē ma cúu sándaā yō. ⁴ Núu súcuan te núu jnáhan ró sáha de ñin cuēchi siquī rō, ¿te naun jéngoo ró sa nuū tāca tēe jeē tu cúu de jnáhan ñayuu cá-candije jeē sándaā de siquī cuēchi ún? ⁵ Súcuan cáhán rī návāha na cúcanu rō jijnáhan ró. ¿A tu íyó ni ñin tēe jécūhun ni mēhñu ró jeē cuu sándaā de siquī rō? ⁶ Tú vāha jeē ñin hermano caquin cuēchi siquī ñga hermano nuū tohó jeē tu cándije.

⁷ Te jeē cájequin rō cuēchi siquī jnáhan ró, chi jeē castívi ñi rō cúu. ¿A tú vāha ga cuandeyí ni rō na sáha i cuēchi siquī rō chí quende i ndajniñu ró? ⁸ Te tuú chi sa máá ró cásáha cuēchi te cáquende ró ndajniñu, te nuū tācá hermano rō cúu jeē casáha rō.

⁹ ¿A tu cájini rō jeē ñayuu tu íyó ndáa, ma nihín tahú i quiví i ñuu nuū ndácu Yaā Dios jniñu? Ma stahú ró maá ró cani ni rō jeē nihín tahú rō, chi ni ñayuu jeē jīca jnéni, ni ñayuu chíñúhún ídolo, ni ñayuu casíquí ndéé jnáhan, ni tēe sáha ndiyí jīin jnáhan yí, ni ñayuu cuíhná, ni ñayuu ndiyo ni, ni ñayuu nájñi, ni ñayuu chísó jnūhun siquī jnáhan, ni ñayuu stahú jnáhan siquī xúhun, ma nihín tahú i quivícoo i ñuu nuū ndácu Yaā Dios jniñu. ¹¹ Te súcuan ni candāa sava ró núu, te vijna chí je ni nacate ya rohó, te cáhīyo ndoo cáhīyo ñi rō nuū yā. Chi je ni ndahva yā cuēchi ró jéé jīin máá Jítóho yō Jesús jīin Espíritu Yaā Dios.

Jeē íyó ndoo íyó ñi yiquí cúñu ñayuu cándije

¹² Te ndaā cúu jeē cácahān jeē ndihi-ni jniñu íyó váha sáha yó núu ndese cúní yō. Te vēsú súcuan te nasūú ndihi sáha jeē quéndōo vāha ánuá yō. Ndihi chí cuu sáha yó, te vēsú súcuan te tu íyó váha jeē quiví yó núu jniñu jeē stívi ánuá yō. ¹³ Te ndaā cúu jeē cácahān jeē ndeyu cúu jeē cūhun chíji, te chíji cúu jeē cūhun ndeyu. Te ñin quiví te tuá coo súcuan, chí naa ndíndúú un sáha Yaā Dios. Te nasūu síquī jeē cáca jnéni yó cúu jeē íyó yiquí cúñu yō, chí sa suhva jeē sáha yó jéé cuní maá Jítóho yō. Te Jítóho yō chí ndíto ya yiquí cúñu yō.

¹⁴ Te nájñūhun jeē ní nastécu Yaā Dios Jítóho yō, suni súcuan nastécu yā yohó jīin poder yā.

¹⁵ ¿A tu cájini rō jeē yíqui cúñu tācá ñin ñin ró cúu nájñūhun tāca parte yiquí cúñu Cristo? Núu súcuan ¿te á cuu quende yó ñin parte yiquí cúñu Cristo te squíjnanhan yó jīin ñin ñahan jīca jnéni? Ma cúu cuiti súcuan. ¹⁶ ¿A tu cájini rō jeē tēe quijnáhan jīin ñahan jíca jnéni, ñin na yiquí cúñu ni nduu de jīin ña? Chí cáhán tutu ñi: Jeē ndíndúú chí ñin na yiquí cúñu cuu, áchí. ¹⁷ Te ñayuu jeē quijnáhan jīin máá Jítóho yō, chí suni súcuan ñin na cúu i jīin yá siquī jeē candije i ya.

¹⁸ Núu súcuan te cunu ró jéē ma quívi ró núu jnúhun jíca jnéni. Chi tāca gá cuēchi jeē sāha ñayuu, chi nasūu yiqui cúñu i stívi i. Te núu jíca jnéni i, te siquī yiqui cúñu i cúu jeē sāha i cuēchi. ¹⁹ ¿A tu cájini rō jeē yiqui cúñu rō cúu templo Espíritu Santo jeē ni jéhe Yaā Dios nuū rō, te ndéé yá ini rō? Te nasūu cuenta maá ró cácuu ró. ²⁰ Chi Yaā Dios yahu ni cuu jeē ní nacuaan ya rohó jíjnáhan ró. Te jeē yúcuan cánuú jéē cáca yíñúhún ró nuū Yaā Dios jeē sāha ró jniñu váha nde jíin yiqui cúñu rō jíin ini jíin ánuá rō, chi máni cuenta Yaā Dios cúu.

Jnúhun cástūhun síquī tēe jíin ñasihí

7 Vijna te na cáchi rī siquī tāca jnúhun jeē ní caca-jnúhun ró ruhū nuū carta. Jendaá jeē vāha ga quendōo ñn tēe núu tú condeca de ñahan. ² Te siquī jeē iyó jnúhun jnéni, te vāha ga jeē tāca tēe na cóo ñasihí máá de, te suni tācá ñahan coo yñ máá ña. ³ Te yñ na squícu vāha de nuū ñasihí de jeē cúu de yñ ña. Te suni súcuan ñasihí na squícu vāha ña nuū yñ ña. ⁴ Chi ñasihí chi tu cúu sāha ña jeē cuní ña jíin yiqui cúñu ña, chi suni jeē cuní yñ ña. Te suni súcuan yñ tu cúu sāha de jeē cuní de jíin yiqui cúñu de, chi suni jeē cuní ñasihí de. ⁵ Te ma sasáhán ró maá ró nuū jnáhan ró. Te núu cácuu rō jeē vihyá gā cacān tahu rō jecu tiempo, te núu cáhīyo conforme ndíndúú ró, te cuu sásáhán ró maá ró nuū jnáhan ró. Te yūcuán na te vāha ga naquijnáhan tucu ró, návāha ma cóto ndee Satanás rohó siquī jnúhun jnéni.

⁶ Te nasūu jéē ndácu ri jniñu jeē cánuú quijnáhan ró, chi jeē jéhe ri jnúhun cúu. ⁷ Chi nújnahan ni rī jeē tāca tēe na cóo máá ñn-ni de, nájñuhun iyó máá rí. Te sñn sñn ni sāha Yaā Dios jíin ñn ñn de ndese cúu máá de, chi sava de cuu quendōo máá ñn-ni de, te inga de chi tuú chi sñn ni sāha ya jíin de.

⁸ Núu súcuan te cáhán rī jíin ñayuu cáhīyo máá ñn-ni, jíin ñahan ní caquendōo ndáhú, jeē vāha ga te núu quendōo máá ñn-ni i, nájñuhun iyó máá rí. ⁹ Te núu jíin i jeē ma cánda i quendōo máá ñn-ni i, te na quijnáhan i núu súcuan. Chi vāha ga jeē quijnáhan i vēsú jeē ndúquiji i.

¹⁰ Te nuū ñayuu jeē jé ni quijnáhan chi ndácu ri jniñu jeē ñahan ma ndusñn ña jíin yñ ña. Te nasūu rúhú cúu jeē ndácu jniñu, chi máá Jítoho yō. ¹¹ Te núu ñn ñahan ndusñn ña jíin yñ ña, te na quendōo máá ñn-ni ña, chí cuu naquijnáhan ña jíin yñ ña. Te yñ suni ma ndusñn de jíin ñasihí de.

¹² Te jíin sava ga ñayuu chi cahān rī yāha jéē jéni ni máá rí, te nasūu jéē ní cachi máá Jítoho yō cúu. Núu ñn hermano ndéca de ñahan jeē tu cándije, te núu nújnahan ni ña condee ña jíin de, te ma ndusñn de jíin ña.

¹³ Te núu ñn ñahan ndéca ña tēe jeē tu cándije, te núu nújnahan ni de condee de jíin ña, te ma ndusñn ña jíin de. ¹⁴ Chi tēe tu cándije, yíhi cuenta de nuū Yaā Dios siquī jeē ní quijnáhan de jíin ñahan cándije. Te ñahan

tu cándije, yíhi cuenta ña nuū Yaā Dios siquī jeē ní quijnáhan ña jíin tēe cúu hermano cándije. Chi núu tu súcuan te sēhe i ma quíhi cuenta i nuū Yaā Dios, te vijna chi yíhi cuenta i nuū yā. ¹⁵ Te yñ chí ñasihí tu cándije, núu fuerza cuní i ndusñn i jíin jnáhan i, te na ndusñn i. Chi núu súcuan cuní i, te hermano chí hermana cándije tu cánuú casí i jeē ndusñn jnáhan i jeē tu cándije. Chi ni cana Yaā Dios yohó jéē condee manī yō jíin jnáhan yó. ¹⁶ Te rōhó jéē cácuu ñasihí, tu cájini rō, sanaa te cándije yñ ró sāha ró, te cācu de. Te suni súcuan rōhó jéē cácuu yñ, tu cájini rō, sanaa te cándije ñasihí ró sāha ró, te cācu ña.

¹⁷ Te ná ñn ná ñn ró na quendōo ró ndese ni sāha Jítoho yō jeē cúu ró, jíin ndese iyó ró ná ni cana ya rohó ní cándije ró. Te súcuan ndácu ri nuū tāca grupo ñayuu cáncandije. ¹⁸ Núu ni cana ya ñn tēe jeē ní cuu circuncidar, te súcuan na quendōo de. Núu ni cana ya ñn tēe jeē tu ní cúu circuncidar, te ma cúu de circuncidar. ¹⁹ Chi tú na vé sāha núu cúu yó circuncidar chí tuú, chi jeē cánuú gá cúu jeē na squícu vāha yó jniñu cuní Yaā Dios. ²⁰ Ná ñn ná ñn ró na quendōo ró ndese iyó ró ná ni cana ya rohó ní cándije ró. ²¹ Núu mozo jeē ní jeen ñayuu cúu ró ná ni cana ya rohó, te ma cóndihvī ni rō jeē quénda ró. Te núu iyó modo jeē quénda ró nduu libre rō, te iyó váha jeē sāha ró. ²² Chi tēe cúu mozo jeē ní jeen ñayuu, te núu ni cana Jítoho yō de, te vijna chi ni nduu libre de nuū cuéchi de, jéjñiñu de nuū maá Jítoho yō. Te suni súcuan tēe sájniñu cuenta maá, te núu ni cana ya de, te vijna chi ni nduu de mozo jeñiñu nuū Cristo jeē ní nacuaan ya de. ²³ Chi yahu ni cuu jeē ní nacuaan Yaā Dios rohó jijnáhan ró, cúu jeē ní jíhī Sēhe ya jehē rō. Núu súcuan te ma cuajniñu ró núu jniñu cáhā-ni jeē ndácu ñayuu ñayiví. ²⁴ Núu súcuan hermano, ná ñn ná ñn ró na quendōo ró núu Yaā Dios ndese iyó ró ná ni cana ya rohó.

²⁵ Te vijna te siquī ñayuu jeē iyó máá-ni, tú na jnúhun ní ndácu Jítoho yō nuū rī. Te na cáhán rī jeē jéni ni máá rí, chi ni cundáhú ni Jítoho yō ruhū, te ni sāha ya jeē cúu cahān ndaā rī. ²⁶ Jéni ni rī jeē vāha-ni núu quendōo-ni tēe ndese cáhīyo de, jeē siquī jeē iyó jnúndóho tiempo yáha. ²⁷ Núu iyó ñasihí ró, te ma ndusñn ró jíin ña. Te núu tu iyó ñasihí ró, te ma nducú ró ña. ²⁸ Te núu quijnáhan ró, te nasūu cuéchi cúu. Te núu quijnáhan sūchi síhí, te suni nasūu cuéchi cúu. Te ñayuu quijnáhan, chi nihín i jnúndóho ñayiví yáha, te cuní rī jeē ma nihín rō jnúndóho.

²⁹ Hermano jijnáhan ró, jnúhun jeē cahān rī yāha cúu jeē yachī-ni ndíhi tiempo jeē sāha yó jniñu ya. Núu súcuan te nde vijna te tēe iyó ñasihí, na cóndihvī gā ni de siquī jniñu máá yá vēsú siquī ña. ³⁰ Te ñayuu jeē ni jíhī jnáhan vehe i, na sāha i nájñuhun jeē tu cúcuíhyá ni i. Te ñayuu cúsiñ ni, na sāha i nájñuhun jeē tu cúsiñ ni i. Te ñayuu jéen, na sāha i nájñuhun jeē nasūu ndajniñu i cúu. Ma cuáha i jnúhun jeē casí tācá un jéē ma cúu cóndihvī ni i jniñu máá yá. ³¹ Te ñayuu jeē ní ca-

condihvĩ ni siquĩ ndajniñu ñayĩvĩ yáha, ma cujnéñu ga i jíin. Chi je yajni naa tāca jéé iyó ñáyĩvĩ yáha.

³² Cúni rĩ jeē ma nácani ndasĩ ni rō siquĩ tāca jéé iyó ini ñayĩvĩ. Chi tēe cúu soltero, ndíhvĩ ni de jniñu máá Jítóho yō, ndese cusĩ ni Jítóho yō sáha de. ³³ Te tēe iyó ñasihĩ chi ndíhvĩ ni de jniñu iyó ñayĩvĩ, ndese cusĩ ni ñasihĩ de sáha de. ³⁴ Te suni súcuan sñin sñin jéni ni ñahan iyó yĩ jíin ñahan iyó máá. Chi ñahan iyó máá, ndíhvĩ ni ña jniñu máá Jítóho yō, chi cúni ña jeē coo ndoo coo iĩ anuá ña jíin yiquĩ cúñu ña cuajniñu ña nuũ yā. Te ñahan iyó yĩ chi ndíhvĩ ni ña jniñu iyó ñayĩvĩ, ndese cusĩ ni yĩ ña sáha ña.

³⁵ Jeē váha máá ró jijnáhan ró cúu jeē ni cáhān rĩ súcuan. Chi nasūu jéé nducú rĩ casĩ rĩ jeē quijnáhan ró, chi sa suhva cúni rĩ jeē caca yíñúhún ró te nune ró cuajniñu cutú ró núu máá Jítóho yō.

³⁶ Te núu ñin tēe iyó sēhe síhĩ de, te núu cuayĩ i, te núu jéni ni de jeē vāha ga jeē quijnáhan i, núu súcuan te na sáha de jeē jéni ni de, te cuāha de jnūhun quijnáhan i, chi nasūu cuēchi cúu. ³⁷ Te núu ñin tēe ni cundaā ni de jeē cóndee sēhe síhĩ de súcuan-ni, jeē ma cuáha de i vēsú fuerza jícān ñayuu i, núu súcuan te cuu quendōo i nájñuhun cúni de, chi jeē váha sáha de. ³⁸ Núu súcuan te tēe jéhe jnūhun quijnáhan i, vāha sáha de. Te tēe tu jéhe jnūhun, chi vāha ga sáha de.

³⁹ Te ñahan ní quijnáhan, chi yíhi ña ndaha yíhi ña níni jeē técu de. Te núu je ni jihĩ yĩ ña, yūcuán na te je ni cuu libre ña jeē quijnáhan tucu ña jíin na-ni tēe cúu ni ña, te núu tēe cándije nuũ Jítóho yō cúu de. ⁴⁰ Te jéni ni rĩ jeē ndetū gā coo ña te núu quendōo ña súcuan-ni. Te suni jéni ni rĩ jeē jíin Espíritu Yaā Dios cúu jeē cahán rĩ.

Siquĩ cúñu ni sócō nuũ ídolo

8 Te vijna te na cáchi rĩ siquĩ cúñu ni sócō nuũ ídolo. Ndaā chi tāca yó jéni ni yō jeē máá yó cúu jeē jiní ndese cúu. Te tāca jéé jiní yō ún, chi nducú sáha jeē cundúxí yó. Te sa suhva jeē cundáhú ni yō jnáhan yó, sáha un jéé ije i jíin jnúhun ya. ² Núu na-ni ñayuu jéni ni i jeē jiní vāha i, te tuú chi ná tu cuni cuiĩ i nájñuhun cánuú cuni i. ³ Te sa suhva ñayuu jeē maní i jíin Yaā Dios, máá i cúu jeē jetáhú yá.

⁴ Núu súcuan te na cástūhun rĩ siquĩ cúñu jeē ní casocō ñayuu nuũ ídolo. Ndaā chi jíni yō jeē tāca ídolo ñayĩvĩ, tú ndaā cuiĩ. Te tú na inga yaā iyó, chi máá ñin-ni Yaā Dios. ⁵ Te ñayuu chi cájeni ni i jeē iyó táca yáá ini andivĩ jíin ñáyĩvĩ, chi cácahān i jeē iyó ndije cuehē yaā i jíin jítóho i. ⁶ Te nuũ máá yó chi ñin-ni Yaā iyó, jeē cúu Tátá yō Yaā Dios. Te máá yá ni sáha tāca jéé iyó, te cuenta máá yá cúu yó jijnáhan yó. Te suni iyó ñin-ni Jítóho yō Jesucristo, te nde nuũ máá yá vēji tāca jéé iyó, te suni máá yá ni sáha yóhó.

⁷ Te ñayuu cácañije, chi tú ndíhi i jíni jnūhun yáha. Chi sava i ni cacāan i ni chiñúhún i ídolo nde ná tu candije i. Te nde vijna núu cáyeji i cúñu ún te sáha i cuenta

jeē ni sócō nuũ ídolo cúu. Te siquĩ jeē ná tu ije i jíin jnúhun Yaā Dios, te jéni ni i jeē cujnéhén ánuá i sáha cúñu jeē ni sócō nuũ ídolo ún. ⁸ Te ndaā chi nasūu jéé yéji yō cúu jeē sáha jeē cuatáhú Yaā Dios yohó. Chi núu yéji yō, nasūu yúcuan sáha jeē quéndōo vāha ga yō nuũ Yaā Dios. Te núu tu yéji yō, ni tu sáha jeē quéndōo ndáhú gá yō nuũ yā. ⁹ Te vēsú tú ni ñin jéni jeē ma cúu caji rō cúñu ún, te coto ró jnáhan ró jéé ná tu ije jíin jnúhun ya, te ma sáha ró jéé suni caji i jeē jéni ni i jeē cuēchi cúu. ¹⁰ Vāha ga ma cáji rō núu súcuan, chi sanaa te hermano rō jeē ná tu ije jíin jnúhun ya, coto de rōhó jéé yéji rō ini vehe ídolo, chi jíni vāha ró jéé tú na vé sáha. Te súcuan te sáha ró jéé cájni ni de jeē suni caji maá de cúñu jeē ni sócō nuũ ídolo, vēsú jéni ni de jeē cuēchi cúu. ¹¹ Te súcuan stívi ró anuá hermano rō jeē ná tu ije jíin jnúhun ya, vēsú jiní vāha máá ró jeē tú na vé sáha jeē cáji rō. Te tú vāha sáha ró, chi suni jehē maá de ni jihĩ Cristo. ¹² Te núu súcuan stívi ró anuá hermano rō jeē ná tu ije jíin jnúhun ya, núu súcuan te siquĩ Cristo cúu jeē sáha ró cuēchi. ¹³ Núu súcuan te núu cúñu un sáha jeē quívi hermano rĩ cuēchi, te ma cáji cuiĩ ga rĩ cúñu ún, návāha ma sáha ri jeē quívi de cuēchi.

Siquĩ jeē iyó derecho tēe cácuu apóstol

9 Te máá rĩ chi jíca libre rĩ, te iyó derecho rĩ siquĩ jeē cúu ri apóstol, tēe ni tají yá scáca jnūhun ya. Chi ni jito ri nuũ máá Jítóho yō Jesús, te máá ró jijnáhan ró cácuu jniñu jeē ni sáha ri jeē ni squívĩ ri rohó ndaha Jítóho yō. ² Te núu sava ga ñayuu tu jétáhú i jeē cúu ri apóstol, te nuũ máá ró chi suu cúu ndije ri. Chi siquĩ jeē ní scandije ri rohó jijnáhan ró, te jeē yúcuan cácuu ró prueba jeē steén jeē ndíso jniñu ri cúu ri apóstol nuũ máá Jítóho yō.

³ Te jnūhun yáha cáhān rĩ jehē maá rĩ nuũ ñáyuu cácahān siquĩ rĩ. ⁴ Achí rĩ: Iyó derecho rĩ caji rĩ coho ri jeē cájēhe ñayuu núu cúni rĩ. ⁵ Te suni iyó derecho rĩ núu jeē cuní rĩ condeca ri ñin hermana candije cuu ñasihĩ rĩ, caca ña jíin rĩ, nájñuhun iyó ñasihĩ Pedro jíin táca gá apóstol jíin tēe cácuu ñani máá Jítóho yō. ⁶ ¿Chí cájeni ni rō jeē máá rúhū-ni jíin Bernabé tú na derecho rĩ jeē stóo ri jniñu cásáha ri jeē cótecu rĩ, návāha nune ga rĩ nacani ri jnūhun vāha ya, chí naún? ⁷ ¿A iyó soldado jeē técu de xūhún vehe de? ¿A iyó tēe jeē jítu uva te tu yéji de ndehē ún? ¿A iyó tēe jeē ndíto lanchi te tu jíhi de leche tĩ? Tú cuiĩ. ¿Te á suni tu iyó derecho rĩ cotecu rĩ siquĩ jnúhun ya naún? ⁸ Te ma cáni ni rō jeē tāca jéé cahán rĩ yáhá, máni máá jéé cácahān ñayuu ñayĩvĩ cúu. Chi nde máá ley yā jeē ni jéhe ya nuũ Moisés, cáhān súcuan. ⁹ Chi cáhān nuũ tútu ley yā: Ma chúhun ró ñunu yuhu stíquĩ, quiĩ jéxín trigo, achí. Te ndaā chi nasūu máni siquĩ stíquĩ cúu jeē ni cáhān yā súcuan. ¹⁰ Chi suni siquĩ máá yó ní cahān yā. Chi ley un ní jéhe ya jeē váha máá yó, chi stéén jeē tēe jítu jíin tēe jéxín trigo cánuú jeē nihín de sava un quívi ndutútú. ¹¹ Te

suní súcuan ruhū jijnáhan ri jeē ní cataji ri jnūhun Espiritu ini anuá rō, zte á véyi cúu jíin ró núu nastútú rí jeē cótecu rī nuū rō? ¹² Te núu sava ga tēe cástéén nuū rō, íyó derecho de cacān de nuū rō, te nagā ni cuu ruhū jijnáhan ri jeē ma cóo derecho rī cacān rī.

Te tu ní cájicān rī derecho un, chi sa suhva ni jendeyí ni rī coto máá rí jeē cáji rī, návāha ma cási rī jeē cáca jnūhun vāha Cristo. ¹³ Te cájini rō jeē sutū ni cajejniñū ini templo, ni cacotecu de siquī jeē ní casocō ñayuu ini templo. Chi sutū ni cajejniñū nuū altar nuū ní casocō i quití, suní ni cayejí de sava quití ún. ¹⁴ Te suní súcuan ni ndacu máá Jítóho yō jniñū jeē tēe cánacani jnūhun jeē jnáma ya yohó, siquī jniñū un nihīn de jeē cótecu de. ¹⁵ Te ruhū tu ní jíicān cuiñi rī derecho rī yāhá, te suní nasūu jéē tēe ri jnūhun yáha návāha cuāha ró núu rī jijnáhan ró. Chi jéni ni rī jeē vāha ga núu na cúu rī nasūu jéē quihīn ri jeē cuáha ró, chi casi jeē cúsiñi ni rī scáca ri jnūhun ya súcuan-ni.

¹⁶ Te tú vāha núu sátéyí rí máá rí siquī jeē nácani ri jnūhun jeē jnáma ya yohó. Chi ñn jeē ní tejniñū ya ruhū cúu, te cánuú squícu ri. Chi nacā ndahú cúu ri te núu tú nacani ri jnūhun ya. ¹⁷ Te núu jeē cúu ni máá rí sáha ri nuú, yūcuán na te cuu cacān rī yāhu ri. Te tuú chi cánuú sáha ri, chi máá Yaā Dios ni tee ya jniñū siquī rī. ¹⁸ Núu súcuan te yāhu ri cúu jeē cúsiñi ni rī jeē súcuan-ni nácani ri jnūhun jeē jnáma ya yohó, te tu jíicān rī derecho rī jeē cotecu rī siquī jeē nácani ri jnūhun ya.

¹⁹ Chi vēsú tú ni ñn ñayuu ndácu jniñū nuū rī, te ni sáha ri máá rí mozo nuū tācá i jeē nácani ri jnūhun nuū i, návāha nihīn rī cuehē i candíje i Cristo. ²⁰ Núu íne ri jíin jnáhan ri hebreo te sáha ri nájnūhun casáha i, návāha cuu scándíje ri i. Chi násáha ri máá rí nájnūhun tēe cáyihī chīji ley Moisés, návāha cuu scándíje ri i jeē cáyihī i chīji ley un, vēsú tuá yíhi ri chīji ley un. ²¹ Te suní násáha ri máá rí nájnūhun ñayuu tu cáyihī chīji ley Moisés, návāha cuu scándíje ri ñayuu ún. Te vēsú súcuan te yíhi ri chīji ley Yaā Dios, chi suu cúu ley Cristo jeē squícu ri. ²² Te núu íne ri jíin ñayuu jeē ná tu ije jíin jnūhun ya, te sáha ri máá rí nájnūhun jeē ná tu ije ri jíin jnūhun ya, návāha cuu scándíje ga rī i. Núu súcuan te násáha ri máá rí núu ndese cándāa tāca ñayuu, návāha tāca-ni modo un te cuu scándíje ri sava i. ²³ Tāca yáha sáha ri jeē siquí jnūhun jeē jnáma ya yohó, návāha suní nihīn rī tahū jeē ndíso jnūhun ya.

²⁴ Je cájini rō jeē tēe cájini carrera, jendaá chi ndíhi de cájini, te ñn-ni de cundeyí nihīn premio. Te suní súcuan nducú ndéyí máá ró squícu ró, návāha nihīn rō premio nuū yā. ²⁵ Te tāca tēe cúní cundeyí síquī ñn deporte, chi cáscuáha de te cándito de máá de. Súcuan casáha de návāha nihīn de ñn premio jeē cúu corona ndaha yújnu jeē náā yachī. Te máá yó chi sa suhva cánducú ndéyí yó návāha nihīn yō ñn premio jeē ma náā cuiñi. ²⁶ Te máá rí suní nducú ndéyí rí nájnūhun tēe cájini, te tu nducú ndéyí cāha rí. Te sáha ri nájnūhun tēe cácajnáhan juego jeē tu jéhe iyú de, chi quée jniñū

sáha ri. ²⁷ Chi sa suhva stóho ri yiquí cúñu rī, te stíhví ni rī maá rí squícu ri. Chi vēsú ni stíhví ni rī inga ñayuu jeē nducú ndéyí i, te núu tu nducú ndéyí máá rí te snāā rī premio rī.

Siquī jeē ma chíñúhún i ídolo

10 Hermano jijnáhan ró, cúní rī jeē na jécūhun ni rō ndese ni cajica jí yō jenahán. Chi ndíhi de ni cajica chīji vicō jeē ni stéén ichi nuū de, te ndíhi de ni cayāha mēhñū ndute Mar Rojo jeē ní cusñn, ni nune ichi. ² Súcuan cúu jeē ní canduu ñnuú ndíhi i jíin Moisés, chi ni candiquīn i de chīji vicō jíin méhñu mar. ³ Te ndíhi i chi ñnuú-ni ni cayejí i alimento jeē ni jéhe máá Espiritu. ⁴ Te suní ndíhi i ni cajihí ndute jeē ni jéhe Espiritu. Chi ni cajihí i ndute jeē ní cane jicā cáva nuū ní cajica cuu i. Te Cristo cúu nájnūhun cava un jéē jéhe ya ndute cotecu yō ñí cáni. ⁵ Te vēsú súcuan te cuehē i ni cuníhni ni i, te tu ní cúsiñi ni Yaā Dios jíin i, te jeē yúcuan ní cajihí i nuū ñúhun téhé.

⁶ Te tāca jéē ní cuu ún, ñn ejemplo cúu nuū yō, návāha ma ndíyo ni yō tāca jéē neé, nájnūhun ni candiyo ni ñayuu ún. ⁷ Te ma chíñúhún ró ídolo, nájnūhun ni casáha sava i. Chi súcuan cáhán nuū tútu iñ: Ni cacucōo ñayuu ún, ni cayejí i ni cajihí i vico ídolo, te ni ndocuiñi i ni cajita jéhé i, áchí. ⁸ Te ni ma cáca jnéni ró nájnūhun ni casáha sava i, te ni cajihí ocō uní mil i jeē ñn quivī-ni. ⁹ Te ni ma sáha ró jniñū jeē squití ni rō Jítóho yō, nájnūhun ni casáha sava i, te ni cajihí i jeē ní catuu coō i, ni sáha ya. ¹⁰ Te ni ma cahán sōó ró siquī Yaā Dios, nájnūhun ni cacahān sōó sava i, te ni cajihí i jeē ní jehni ndajéhé yā i.

¹¹ Te tāca jéē ní cuu ún, chi ñn ejemplo cúu nuū yō. Te súcuan yósó núu tútu návāha na chūhun vāha ni máá yó. Chi cácuu yó ñayuu cátecu quivī cuándíhi ñayiví. ¹² Núu súcuan te róhó jéē cájeni ni rō jeē cáhīn nihīn ró jéē ma sáha ró cuéchi, coto má quiví ró cuéchi. ¹³ Chi máni íyó jéē nducú squíví róhó cuéchi, te ñnuú-ni cándoho ró súcuan nde jíin táca gá ñayuu. Te cuu cucáhnu ni rō Yaā Dios jeē ma cuáha ya jnūhun jeē vihyá gā coto ndee jexeén róhó vēsú jeē cúu cundeyí ró jíin. Chi sa suhva núu vēji jeē nducú squíví róhó cuéchi, te chindéé ñáhán yá rohó quenda ró te cundeyí ró siquī.

¹⁴ Ñání mání, ma chíñúhún cuiñi rō ídolo núu súcuan. ¹⁵ Cáhán rī jíin ró jéē cúu ró ñayuu cájecūhun ni, te na sáha ró cuenta núu ndaā jnūhun cáhán rī. ¹⁶ Máá copa iñ jeē cájicān tahú yō jehē, suu cájihí cáhnu yó jéē steén yō jeē ñnuú cúu ndíhi yó, chi ni jetí niñi Cristo jeē siquí yó ná ni jihí yā jicā cruz. Te pan jeē sacuéchí yó cáyiji cáhnu yó, stéén jeē ñnuú cúu ndíhi yó síquī jeē ni jéhe Cristo yiquí cúñu yā ni jihí yā jehē yō. ¹⁷ Te vēsú cuehē yō iyó, te ñn-ni ñayuu cácuu yó, chi ñn-ni pan un cáyiji cáhnu yó síquī jeē cácañdíje yó.

¹⁸ Condēhe ró ndese casáha ñayuu Israel. Tāca tēe jeē yéji quití jeē ní sócō nuū yā, chi ñnuú-ni cúu ndíhi

de siquĩ jeē cáyeji de jeē ni sócō ún. ¹⁹ Núu súcuan te cáhán rĩ jeē tu ndé jéjníñu ídolo, ni tu jéjníñu cūñu jeē ni sócō nuū ídolo, chi ñnuú cúu jíin táca gá cūñu. ²⁰ Te suni cáhán rĩ jeē ñáyuu tu cájini jnūhun Yaā Dios, núu cásocō i, te nuū tachĩ cásocō i, nasūu núu Yaā Dios. Te tu cúní rĩ jeē cuajníñu ró núu tachĩ. ²¹ Ma cúu coho ró copa máá Jítóho yō te núu cájihu ró jéē ni sócō nuū tachĩ. Te ma cúu caji rō nuū mesa Jítóho yō te núu cáyeji rō jeē ni sócō nuū tachĩ. ²² Ma quívi nduu yō súcuan jíin táchĩ, návāha ma cucuíñĩ Jítóho yō jíin yó. ¿Chí téyĩ gá máá yó vésú máá yá jeē ma cúu stóho ya yohó, cájeni ni rō, chí naún?

Ndĩhi chi sáha yó jíin jnúhun cúndáhú ni

²³ Te ndaā cúu jeē cácahān jeē ndĩhi-ni jniñu íyó váha sáha yó núu ndese cúní yō. Te tuú chi nasūú ndĩhi sáha jeē quéndōo vāha ánuá yō. Ndĩhi chi cuu sáha yó, te vésú súcuan te nasūú ndĩhi sáha jeē ije jnáhan yó jíin jnúhun ya. ²⁴ Chi cánuú sáha yó jéē váha jnáhan yó, nasūu máni máá jéē váha máá yó.

²⁵ Cuu caji rō ndĩhi-ni cūñu cúyāhu nuū yáhu, te ma cájnūhun ró ni ma cáni ni rō núu jeē ni sócō nuū ídolo cúu. ²⁶ Chi cuenta máá Jítóho yō cúu ñayĩvi jíin ndĩvii jeē íyó ini, te cuu cuajníñu yó.

²⁷ Te núu ñn tēe tu cándĩje, cana de rōhó caji rō jíin de, te núu cáconi rō quihĩn rō, núu súcuan te caji rō tāca jéē cáni de nuū rō. Te ma cájnūhun ró ni ma cáni ni rō núu jeē ni sócō nuū ídolo cúu. ²⁸ Te núu cachi ñn i nuū rō jeē cūñu ni sócō nuū ídolo cúu, yūcuán na te ma cáji rō, chi siquĩ jeē jéni ni i jeē cuēchi cúu, te tu cúní rō sáha ró jéē quívi i cuēchi. ²⁹ Te súcuan cáhán rĩ siquĩ jeē inga i cájeni ni i jeē cuēchi cúu, te nasūu jéē súcuan cájeni ni máá ró.

Te sanaa te cahān ñn ró: ¿A tu íyó libre rĩ caji rĩ jeē cuní máá rí, vésú cájeni ni inga i jeē cuēchi cúu? ³⁰ ¿Te núu nácuatáhú rí nuū Yaā Dios te yéji rĩ, te najehē cácahān i siquĩ rĩ jeē yéji rĩ? achi rō. ³¹ Tuú chi ndĩhi jeē sáha ró, vésú jeē caji rō chí jéē coho ró, chí na-ni jniñu sáha ró, ndĩhi na sáha yíñúhún ró jíin Yaā Dios, návāha cuni ñayuu jeē luu cújéhu ya. ³² Te ma sáha ró jniñu jeē squívi ró ñáyuu nuū cuēchi, cúu ñayuu hebreo, cúu ñayuu tācá nación jeē tu jíin jnūhun ya, cúu ñayuu cá-candĩje Yaā Dios. ³³ Te ruhū chi ndúcú rí jeē na cúsiñ ni tāca ñáyuu jíin táca jniñu sáha rí. Tu ndúcú rí jeē váha máá-ni rí, chí sa ndúcú rí sáha rí jeē váha cuehē ñayuu, návāha cācu i.

11 Te na ndácu ró ruhū jijnáhan ró, nájñūhun ndácu máá rí Cristo.

Siquĩ ndese cánuú sáha ñahan cándutútú

² Vāha casáha ró, hermano, jeē niní cánucūhun ni rō ruhū, te cándĩhvĩ ni rō jíin táca jniñu jeē ni steén rĩ nuū rō. ³ Te cúní rĩ jeē na jécūhun ni rō jeē Cristo cúnuú yá nuū tāca tēe. Te tēe cúnuú de nuū ñasihĩ de. Te Yaā Dios cúnuú yá nuū Cristo. ⁴ Núu ñn tēe ñúhun de lélú

te jícán tahú de chí nácani de jnūhun nuū ndutútú ñáyuu cá-candĩje, núu súcuan te jéhe de jnūhun canu máá de. ⁵ Te sa núu ñn ñahan tu ndési xinĩ ña te jícán tahú ña chí nácani ña jnūhun, núu súcuan te jéhe ña jnūhun canu máá ña, chí ñn-ni cúu un núu ní sáte xinĩ ña. ⁶ Chi núu tú casi ña xinĩ ña, vāha ga na sáte ña ixi ña núu súcuan. Te núu cúcanu ña jeē sáte ña ixi ña chí jéē sáte ña ña, te na cási ña núu súcuan. ⁷ Te tēe chi ma cási de xinĩ de, chí máá de cúu muestra jeē steén ndese cúu Yaā Dios jeē cújéhu ya. Te ñahan chí steén ña jeē cújéhu tēe. ⁸ Chi ná ni sáha ya tēe, te nasūu jíin yiquĩ ñahan ni sáha ya, chí sa suhva jíin yiquĩ tēe ni sáha ya ñahan. ⁹ Te ñahan chí ni cuvāha ña jeē siquĩ tēe, nasūu tēe jeē siquĩ ñahan. ¹⁰ Te jeē yúcuan cánuú jéē cóndesi xinĩ ñahan, te suu steén jeē cújéhu tēe, chí suni cándēhé ndajéhe yā ndese sáha ña. ¹¹ Te vésú súcuan te yóhó jéē candĩje yó, chí jíin yō jeē tu íyó tēe núu jeē tu íyó ñahan, te tu íyó ñahan núu jeē tu íyó tēe. ¹² Chi vésú ni sáha ya ñahan jíin yiquĩ tēe, te vijna cácu tēe chíjĩ ñahan, te máá Yaā Dios cúu jeē sáha tācá-ni.

¹³ Na sáha máá ró cuenta ¿a íyó váha núu tu ndési xinĩ ñahan te jícán tahú ña nuū Yaā Dios? ¹⁴ Chi sáha yó cuenta jeē ini ñayĩvi yáha, núu cáni ixi tēe te cúcanu de sáha. ¹⁵ Te ñahan chí sa váha jító ña te núu cáni ixi ña, chí suu ni jéhe ya jeē cóndesi xinĩ ña. ¹⁶ Te núu ndé ñn ñayuu cuní i cahān i siquĩ jnúhun yáha, te ruhū jíin táca grupo ñayuu cá-candĩje nuū Yaā Dios, tú na inga costumbre jejnúhún rí siquĩ jnúhun yáha.

Jeē castívi i siquĩ Cena Jítóho yō

¹⁷ Te íyó inga jnūhun cánuú cahān rĩ jíin ró, chí tu cúu cahān rĩ jeē vāha casáha ró. Chí nuū cándutútú ró te tu sáha jeē quéndōo vāha ga rō, chí sa jeē castívi ró.

¹⁸ Xĩhna jnūhun yáha cáhán rĩ, jeē nihín rĩ jnūhun jeē nuū cándutútú ró te cácusñn ni rō. Te jéni ni rĩ jeē ndaā cúu. ¹⁹ Chí níní coo sava ró jéē cusñn ni, návāha natūu ndé-ni cúu jeē cá-candĩje vāha mēñhu ró. ²⁰ Te jeē cácusñn ró súcuan nuū cándutútú ró, te nasūu ce-na máá Jítóho yō cúu jeē cáyeji rō núu súcuan. ²¹ Chí núu cáyeji rō, te tācá ñn ñn ró cúní caji xĩhna gā vésú jnáhan ró. Te súcuan te sava ró tu cániñn, te cájiñ sōco, te sava ró cánañini jeē cájihu cuehē. ²² ¿A tu cánevāha ró vehe nuū cáji rō coho ró, chí naún? Chí jeē casáha ró súcuan cúu jeē tu íyó yíñúhún ró ini vehe nuū cándutútú ñáyuu cá-candĩje Yaā Dios, chí casáha ró jéē cá-cucanu ñayuu jeē tú na vé névāha. ¿Ndesse cahān rĩ jíin ró núu súcuan? ¿A cáhán rĩ jeē vāha casáha ró? Tuú chí nasūu jéē váha cúu jeē casáha ró súcuan.

Siquĩ jeē ní jequin Jítóho yō Cena yā

(Mt. 26.26-29; Mr. 14.22-25; Lc. 22.14-20)

²³ Chí jnūhun yáha jéē ní nastéén rĩ nuū rō, chí nuū máá Jítóho yō ni nihín rĩ: Jeē máá jecuāā jeē ní nastúu de Jítóho yō Jesús, te ni quihin ya pan. ²⁴ Te ni nacu-

atáhú yá, te ni tahú cuéchi yá, te ni cahān yā jíin tée cáscuáha jíin yá: Quihin te caji rō jijnáhan rō, chi yāha cúu yiqui cúñu rī jeē ni sócō rī jeē síquī rō. Te níní caji rō súcuan jeē cáñuhun ni rō ruhū jeē ni jíihī rī jehē rō. Achí yá. ²⁵ Te suni súcuan ni quihin ya copa ná ni cuu ni cuxíni ya jíin de, te ni cahān yā: Jeē ñúhun copa yáha cúu ñíñī rī jeē sácútu contrato jeé jeē jnáma ri ñayuu. Te tāca jínu jeē cájihī rō, te nucūhun ni rō ruhū. Achí yá. ²⁶ Chi tāca jínu jeē cáyeji rō pan un te cájihī rō copa un, súcuan cástéén rō jeē ni jíihī Jitoho yō jehē yō. Te súcuan na sáha rō ndé quivī ndíji ya.

Ndese caji yíñúhún i Cena yā

²⁷ Te núu na-ni ñayuu caji i pan un chí coho i copa Jitoho yō ún, te núu tu sáha yíñúhún i nuū Yā Dios, núu súcuan te sáha i cuēchi jeē tu iyó yíñúhún i síquī yiqui cúñu maá Jitoho yō jíin síquī ñíñī yā. ²⁸ Núu súcuan te coto ndee rō maá rō núu iyó ndoo ánuá rō jeē tú cuēchi rō. Te sáa te cuu caji rō pan un te coho rō copa un. ²⁹ Chi núu ññ ñayuu tu yéji tu jíhi yíñúhún i te tu nucūhun ni i jeē yiqui cúñu yā cúu, ñayuu ún chi ñíhī i castigo núu na cáji i coho i. ³⁰ Jeē yúcuan cúu jeē iyó cuéhē ñayuu cácuñu jíin jéē ní cacuxíí, cáhīyo mēhñu rō. Te sava i je ni cajihī. ³¹ Te núu coto ndee yō maá yó nde ná tu caji yō, te Jitoho yō ma cuáha ya castigo yohó. ³² Te núu Jitoho yō jéhe ya castigo yohó, te súcuan stóho ya yohó návāha ma jnahnú ndetū yō jíin ñayuu ñayiví.

³³ Ñānī mánī, núu súcuan te jeē cándutútú rō jeē cáji rō Cena yā, te condetu rō te caji inuú rō. ³⁴ Te núu ññ ñayuu jíi i sóco, te xíhna gā na cáji i vehe i návāha ma stívi i nuū cándutútú rō. Te súcuan te ma cuáha ya castigo i. Te quivī jécondēhe rí rohó te cachi rī ndese coo sava ga jniñu.

Síquī tāca táhū jeē jéhe Espírítu

12 Hermano, cúní rī jeē na jécūhun ni rō síquī tāca táhū jeē jéhe Espírítu nuū yō, suu tāca modo jeniñu ññ ññ yó núu Yā Dios.

² Te cájini rō jeē ná ni cuu rō ñayuu ná tu candíje, te ni cacondihvī ni rō ni cachiñúhún rō ídolo ñíhín. ³ Te vija te na jécūhun ni rō jeē núu ndé ñayuu cahán ndevāha i síquī Jesús, te nasūu jíin poder Espírítu Yā Dios cúu jeē cahán i súcuan. Te ni ññ i ma cúu cahán i jeē Jitoho i cúu Jesús, te núu tu ndéé poder Espírítu Santo ini i.

⁴ Te sññ sññ tahū jéhe ya jeē cuajniñu ññ ññ yó núu yā, te ññ-ni maá Espírítu cúu jeē jéhe. ⁵ Te sññ sññ jéjiniñu yó, te nuū maá ññ-ni Jitoho yō jeniñu yó. ⁶ Te sññ sññ modo sáha yó jniñu ya, te ññ-ni Yā Dios cúu jeē sáha jniñu un jíin yó. ⁷ Te nuū ná ññ ná ññ yó ní jéhe Yā Dios tahū jeē sáha Espírítu yā jíin yó, návāha na sáha yó jéē ije jnáhan yó jíin jnúhun ya. ⁸ Chi sava yó ní canihñn tahū jeē ndichí cáhán yō jnúhun ya, sáha maá Espírítu. Te sava ga yō ni canihñn yō jeē cúu

jécūhun vāha ni yō te castūhun yó, te suni maá Espírítu sáha. ⁹ Te nuū sava ga yō ni jéhe ya tahū jeē cúu cándíje ñíhin yó jéē sáha ya jeē jicán yō, te sava ga yō cúu sáha yó jéē ndúvāha ñayuu cácuñu, te suni maá Espírítu sáha. ¹⁰ Te sava ga yō cúu sáha jniñu jénu jíin fuerza Yā Dios. Te sava ga yō cúu nácani jnúhun ya. Te sava ga yō ni sáha ya jeē nácuni yō tāca jnúhun, núu vēji nuū Espírítu yā chí tuú. Te sava ga yō ni ñíhñ tahū jeē cahán yō tijni yuhu jeē tu jécūhun ni yō. Te sava ga yō cúu nacastūhun yó jnúhun ni cahán jnáhan yó jíin inga yuhu ún. ¹¹ Te tāca táhū yáha, chi ññ-ni maá Espírítu sája, te sññ sññ jéhe ya nuū ññ ññ yó, ndese nújnahan ni maá yá.

Ndihī yó cúu nájnūhun ññ na yiqui cúñu

¹² Chi nájnūhun ññ yiqui cúñu iyó cuéhē parte, súcuan cúu yó jíin Cristo jeē cúu yó nájnūhun yiqui cúñu yā, chi ññ na cúu yó jíin yá. Te vēsú cuehē parte cácuu yó te ññ-ni cúu yó, nájnūhun ññ yiqui cúñu jeē iyó cuéhē parte. ¹³ Chi ññ na ni canduu yó jíin yá ni sáha ññ-ni maá Espírítu ná ni cajendute yó. Súcuan cúu vēsú cúu yó ñayuu hebreo chí ñayuu griego, vēsú mozo jeē ní jeen ñayuu chí tée sájniñu cuenta maá. Te ndihī yó chí ññ-ni Espírítu ni canihñn yō.

¹⁴ Te ññ yiqui cúñu chí nasūu ññ-ni parte cúu, chí sa cuehē parte cúu. ¹⁵ Te núu jehē cahán: Nasūu cuenta yiqui cúñu cúu ri, chí nasūu ndaha cúu ri, te tuú chí parte yiqui cúñu cúu nahín. ¹⁶ Te núu sōho cahán: Nasūu cuenta yiqui cúñu cúu ri, chí nasūu tññu cúu ri, te tuú chí parte yiqui cúñu cúu nahín. ¹⁷ Núu ññ yiqui cúñu yō cúu tññú, ¿te ndese cuni sōho yó núu súcuan? Te núu ññ yiqui cúñu yō cúu sōho, ¿te ndese cuaan yó xícō núu súcuan? ¹⁸ Te Yā Dios ni chujnáhan ya ññ ññ parte yiqui cúñu, nájnūhun cúní yā jeē coo. ¹⁹ Chi núu ññ-ni parte cúu ndihī, te nasūu ññ ññ yiqui cúñu cúu núu súcuan. ²⁰ Te tuú chí cuehē parte iyó, te ññ-ni yiqui cúñu cúu.

²¹ Te ni ma cúu cahán tññu jíin ndaha: Tu jíni ñúhún rí rohó. Te ni xinī ma cúu cahán jíin jéhē: Tu jíni ñúhún rí rohó. ²² Chi sa suhva tāca parte yiqui cúñu jeē jéni ni yō jeē núu ga fuerza, suu cúu jeē cánuú gá. ²³ Te tāca parte yiqui cúñu jeē jéni ni yō jeē tu cáa vāha, suu cúu jeē yucún gá chúhun yó sahma. Te parte jeē tú-ni luu cáa, sa vāha ga jési yō. ²⁴ Chi parte jeē lúu cáa, tu cánuú jéē condihyū. Chi súcuan ni chujnáhan Yā Dios yiqui cúñu, jeē yucún gá ndító yó jéē tu cáa luu.

²⁵ Súcuan ni sáha ya návāha ma cusññ tāca parte yiqui cúñu, chí sa chindéé ñájñahan vāha jíin jnáhan. ²⁶ Te núu jétú ññ parte yiqui cúñu, te suni ññ cáhnu-ni jétú. Te núu ññ parte ndító yucún yó, te suni ndihī-ni parte quéndō vāha.

²⁷ Te rōhó jíjnahan rō chí nájnūhun yiqui cúñu Cristo cácuu rō, chí ññ na cúu yó jíin yá. Te ná ññ ná ññ rō cúu ññ ññ parte yā. ²⁸ Núu súcuan te sññ sññ jniñu ni jéhe Yā Dios nuū tāca ñayuu cácuñu jeē cácuu i

nájnūhun ñn ñn parte yā: Te suu ñn parte yā cúu tāca apóstol jeē ní jeni ya xīhna gā jeē scáca de jnūhun ya. Yūcuán na te jeē uú, tēe cáncani jnūhun ya, te jeē uní, tēe cástéén. Yūcuán na te ñayuu casáha jniñu jéhu jíin fuerza yā, jíin ñáyuu casáha jeē ndúvāha ñayuu cácuu, jíin ñáyuu cachíndéé ñájnāhan, jíin ñáyuu cándiso jniñu, jíin ñáyuu cácahān sñn sñn yuhu jeē tu cájécūhun ni. ²⁹ ¿A ndihí yó cácuu apóstol, chí naún? ¿A ndihí yó cáncani jnūhun? ¿A ndihí yó cástéén? ¿A ndihí yó cuu sáha jniñu jéhu? ³⁰ ¿A ndihí yó cuu sáha jeē ndúvāha ñayuu cácuu? ¿A ndihí yó cuu cahān sñn sñn yuhu? ¿A ndihí yó cuu nacastūhún yuhu ún, chí naún? Tuú chí sñn sñn tahū ni canihīn yō. ³¹ Núu súcuan te na cóndihvī ni rō cacān rō jeē cuáha Yaā Dios tahū cánuú gá nuū rō. Te vijna te na stéén rī nuū rō ñn jeē váha ga nuū tāca gá tahū ún, suu jnūhun cúndáhú ni jnāhan.

Jnūhun jeē cúndáhú ni jnāhan

13 Vēsú núu cuu cahān yō tijni yuhu jeē cácahān ñayuu chí jéé cácahān ndajéhé Yaā Dios, te núu tu cúndáhú ni yō jnāhan yó, te jnūhun cahān yō un cúu nájnūhun ñn tambor jeē ndaxín cáján chí ñn platillo jeē ndaxín cáxín sánee sōho ñayuu. ² Te vēsú cuu nacani vāha yó jnúhun ya, te cuu jecūhun ni yō tāca jnúhun sāhi yá jíin tāca jnúhun ndíchí, te núu tu cúndáhú ni yō jnāhan yó, te tu ndé jéjníñu cuiñi yō núu súcuan. Te vēsú cuu candíje téyí yó jeē nde cuu cahān yō jeē cújiyo yucu, te núu tu cúndáhú ni yō jnāhan yó, te tu ndé jéjníñu cuiñi. ³ Te vēsú na sája yó ndihí jeē névāha yó cuu ñayuu ndahú, te vēsú núu cuāha yó jnúhun cahmu ñayuu yohó jéé siquí jnúhun ya, te núu tu cúndáhú ni yō jnāhan yó, te tu ndé jéjníñu cuiñi.

⁴ Ñayuu cúndáhú ni chí íyó paciencia jíin jnāhan, te íyó mánī ni, te tu cúcuésún ni. Te tu sándúxí, te tu sátéyí máá. ⁵ Tu sájéé ni, te ndúcú jéé cúu máá-ni, te quítí ni, te ñúhun ni jnūhun quítí ni. ⁶ Tu cúsiñ ni jito jniñu néé casáha jnāhan, chí sa cúsiñ ni jíin jniñu váha. ⁷ Ñayuu cúndáhú ni chí ndihí jénde ni ndoho jehé jnāhan, te tu jécuiñí jeē candíje jnāhan, jíin jéé ñúhun ni jeē squícu jnāhan, jíin jéé jénde yó jíin jnāhan.

⁸ Jnūhun cúndáhú ni chí ma náā cuiñi. Te quiji quivī jeē tuá nacani i jnūhun, ni tuá cahān i tijni yuhu, ni tuá jíni ñúhún jnūhun ndíchí. ⁹ Chí tu jíni vāha vāha yó vijna, te jnūhun cáncani yó suni jecu-ni cúu. ¹⁰ Te núu na quíji quivī jeē cúni yō ndihí, yūcuán na te tuá coo jeē jíni yō jecu-ni.

¹¹ Ná ni cuu yó súchi lúlí te ni cahān yō, ni jeni ni yō, ni jecūhun ni yō nájnūhun súchi lúlí. Te ná ni jehnu yó te ni stóo yó modo súchi lúlí. ¹² Te suni súcuan, jecu-ni jecūhun ni yō vijna, nájnūhun jeē jito yó núu ñn espejo jeē tú ndijin vāha. Te cúcuéé gá te jecūhun cáji ni yō ndihí. Te vijna chí jecu-ni jíni yō, te cúcuéé gá te cuni vāha yó ndese Yaā cúu ya, nájnūhun jíni vāha ya yohó ndese ñayuu cúu yó. ¹³ Núu súcuan te íyó únī jnūhun

jeē quéndōo cutú ñíí cáni: Jeē candíje ñihin yó jéé squícu ya jeē ni jéjnūhun ya, jeē cócuhun ni yō tāca jéé váha coo, jíin jéé cúndáhú ni yō jnāhan yó. Te jnūhun cúndáhú ni chí jéhu ndasí gá cúu nuū tāca jéé yáha.

Siquí jeē cácahān i tijni yuhu

14 Na cóndihvī ni rō cúndáhú ni rō jnāhan rō, te suni cóndihvī ni rō cacān rō tāca táhu jeē jéhe Espíritu. Te tahū jeē cánuú gá cúu jeē nacani rō jnúhun ya. ² Chí tēe névāha tahū jeē cahān de tijni yuhu jeē tu jécūhun ni de, chí máá-ni Yaā Dios jíni jeē cahān de, nasūu ñayuu. Chí ni ñn i ma jécūhun ni jeē cahān de. Chí sáha Espíritu jeē cahān de tāca jnúhun yísahí. ³ Te sa suhva tēe nacani jnūhun ya, chí jíin ñáyuu cahān de návāha ije i jíin jnúhun ya, te stíhví ni de i, te cahān ndeyí ni de jíin i. ⁴ Te tēe jeē cahān tijni yuhu, chí máá-ni de íje jíin jnúhun ya. Te tēe jeē nacani jnūhun ya, chí sa suhva sáha de jeē ñáyuu cácahān íje i jíin jnúhun ya.

⁵ Nújnahan ni rī jeē ndihí rō cuu cahān rō tijni yuhu jeē tu jécūhun ni rō, te jeē cánuú ndasí gá cúu jeē nacani rō jnúhun ya. Chí jéhu ga jniñu sáha tēe nacani jnūhun ya vēsú tēe cahān tijni yuhu. Chí núu tú tēe castūhun jnúhun cahān de, te ma cuajníñu jeē íje ñayuu cácahān. ⁶ Jeē yúcuan hermano jijnāhan rō, núu na jéé rī nuū rō, te núu cahān rī tijni yuhu jeē tu jécūhun ni rō, ¿te ndé cuajníñu ún? Te núu na cahān rī ñn jeē ni stéén yā, chí ñn jeē cúñhva rō jnúhun ndaā, chí ñn jeē nacani rī jnūhun ya, chí ñn jeē steén rī nuū rō, yúcuan cúu jeē cuajníñu.

⁷ Sáha yó cuenta jeē nájnūhun instrumento música, vēsú tu técu, te cuu cata, nájnūhun flauta jíin arpa. Te núu tu jíta sñn sñn nota, ¿te ndese cuni yō na yaa jíta? ⁸ Te núu corneta tu jécú cáji, te ni ñn tēe ma sātūhva de quihīn de guerra. ⁹ Te suni súcuan rōhó jijnāhan rō, núu tu cahān cáji rō jnūhun jecūhun ni ñayuu, ¿te ndese cuni i na vé cahān rō? Chí jnūhun cahān rō ndí-so tachī cuahān jíin. ¹⁰ Te ndaā chí íyó cuéhē yuhu ini ñayiví, te tāca yuhu chí íyó ñáyuu jécūhun ni. ¹¹ Te núu tu jécūhun ni yō yuhu cahān ñn tēe, te cúu yó nájnūhun tēe ñuu jicá núu tēe cahān, te suni nájnūhun tēe ñuu jicá cúu de nuū maá yó. ¹² Jeē yúcuan rōhó jéé cácuu ndasí rō nihīn rō tahū jeē jéhe Espíritu, na cácahān rō tahū jeē sáha jeē íje ñayuu cácahān jíin jnúhun ya.

¹³ Núu súcuan te ñayuu jeē cahān ñga yuhu jeē tu jécūhun ni i, na cácahān táhu i jeē cuu nacastūhún i yuhu ún. ¹⁴ Chí núu jicán táhu yō jíin ñga yuhu, te máá ánuá-ni yó cúu jeē jicán táhu, te tu ndé jéjníñu nuū jeē níjnūní yō. ¹⁵ ¿Ndese sáha yó núu súcuan? Na cácahān táhu yō jíin ánuá yō, te suni jíin jéé níjnūní yō. Na cáta yó yaa íi jíin ánuá yō, te suni jíin jéé níjnūní yō. ¹⁶ Chí núu nácuatáhú rō máni jnūhun jeē ní quiji nuū ánuá rō te tu jécūhun ni rō, núu súcuan te tēe jíni sōho te tu jécūhun ni, ma cúu nacuatáhú de jíin rō. Chí tu jíni cuiñi

de na jnūhun cáhán rō. ¹⁷ Ndaā chi vāha nácuatáhú máá rō, te inga de chi tú na vé nihín de jeē íje de jíin jnúhun ya. ¹⁸ Na cútahū rī nuū Yaā Dios jeē cahán gā rī jíin tíjni yuhu vēsú maá rō jijnáhan rō. ¹⁹ Te vēsú súcuan te núu íne ri nuū cáyūcu tútú ñayuu cácadíje, te núnahan gā ni rī cahān rī uhūn-ni jnūhun jeē jécūhun ni i te stéén nuū i, vēsú jeē cahán rī uxī mil jnūhun jíin inga yuhu jeē tu jíni cuīti i.

²⁰ Hermano jijnáhan rō, ma cáni ni rō nájnuhun sūchi lúli, chi sa suhva na íje rō jéē jécūhun vāha ni rō. Te coo rō nájnuhun sūchi lúli jéē tu jíni i jniñu néé. ²¹ Te yósó núu tútu ley yā jenahán: Jíin jnúhun cácahān tēe inga yuhu, jíin jnúhun cácahān tēe ñuu jicá, sáha ri jeē cúni sōho ñayuu yáha jnúhun ri. Te ni jíin súcuan ma sáha i cuenta jnūhun cahān rī, achí máá Jítoho yō.

²² Núu súcuan te tahū jeē cahán yō tíjni yuhu, yūcuan cúu ñn jeē steén poder Yaā Dios nuū ñayuu tu cácadíje, nasūu núu ñayuu cácadíje. Te jeē nácani yó jnúhun ya, yūcuan cúu jeē steén nuū ñayuu cácadíje, nasūu núu ñayuu tu cácadíje. ²³ Núu súcuan te núu ndihī rō ñayuu cácadíje cáhīyo tútú, te tāca rō cácahān sñin sñin yuhu, te quīvicoo ñayuu tu jécūhun ni jíin ñayuu tu cácadíje, ¿te á má cahán i jeē ní candu lo-co rō? ²⁴ Te núu tāca rō cánacani jnūhun ya, te núu quīvi ñn tēe tu cácadíje chí ñn tēe tu jécūhun ni, yūcuán na te nacuni de jeē tēe íyó cuéchi cúu de, te coto ndee de máá de jíin jnúhun cánacani rō. ²⁵ Te nucūhun ni de tāca jéē ní jeni yuhu ni de jíin ánuá de. Yūcuán na te jecuiñī yití de te chiñúhún de Yaā Dios. Te cahān de jeē íne ndije Yaā Dios jíin rō jijnáhan rō.

Siquī jeē yucún yíñúhún na cóo nuū ndutútú yó

²⁶ Núu súcuan hermano jijnáhan rō: Nuū cándutútú rō te tāca rō coo ñn yaa íi cata rō, chí ñn jnūhun stéén rō, chí ñn jnūhun jeē ni sáha Yaā Dios jeē jécūhun ni rō, chí inga yuhu jeē cahán rō, chí jéē nácastūhun rō jnūhun inga yuhu ún. Te ndihī ún na sáha rō návāha ije ñayuu cácadíje jíin jnúhun ya. ²⁷ Te núu cáhīyo tēe cahān inga yuhu, te na cáhán uū de chí únī-ni de, te ná ñn ná ñn de na cáhán. Te suni jíni ñúhún jéē nacastūhún ñn tēe jnūhun ún. ²⁸ Te núu tu íyó tēe jeē cúu nacastūhun jnúhun ún, te tēe cácahān inga yuhu, vāha ga ma cahán de nuū cándutútú rō, te na cáhán maá-ni de jíin Yaā Dios. ²⁹ Te suni súcuan tēe cánacani jnūhun, na cáhán uū de chí únī de, te sava ga rō nacani ni rō núu íyó ndāā jeē cácahān tēe ún. ³⁰ Te núu inga tēe néne ni nihín de ñn jnūhun jeē ni stéén yā nuū de, núu súcuan te tēe cáhán na jécuiñī jeē cahán de, návāha cahān inga tēe ún. ³¹ Te súcuan te ná ñn ná ñn rō cuu nacani rō jnúhun jeē steén yā nuū rō, návāha cutūhva rō te coo ndeyí ni rō. ³² Te tēe cá-nacani jnūhun, jíni ñúhún cuatáhú de jeē nácani inga tēe jnūhun te jecuiñī jeē cahán maá de. ³³ Chi Yaā Dios cuní yā jeē coo nayúú méhñu rō, násūu jéē sacā núu cuvaā rō.

Te nájnuhun casáha tāca grupo hermano cácadíje, ³⁴ suni súcuan tāca ñahan cándutútú jíin ñayuu cácadíje, na cóo nayúú ña. Chi tú vāha jeē cahán ña, chi sa cuatáhú ña nájnuhun cáhán tutu ley yā. ³⁵ Te núu cúni ña cucáhu ni ña ñn jnūhun, te nde vehe na cájnuhún ña yñ ña. Chi jnūhun canu cúu jeē cahán ñn ñahan méhñu núu cándutútú rō.

³⁶ Te na sáha rō cuenta jeē tu ní quēnda jnūhun Yaā Dios nuū maá rō jijnáhan rō, te nasūu máá ñn máá rō ní cánihín jnūhun ya. ³⁷ Núu ñn tēe jéni ni de jeē tēe nácani jnūhun ya jíin tēe névāha Espíritu cúu de, núu súcuan te na cuájnuhún de jeē jniñu ní ndacu Jítoho yō cúu jeē tēe ri yāhá. ³⁸ Te núu tu jétáhú de jnūhun yáha, suni ma cuatáhú yó de.

³⁹ Núu súcuan, ñánī mánī jijnáhan rō, na cóndihvī ni rō nacani rō jnúhun ya, te ma cási rō nuū tēe cácahān sñin sñin yuhu. ⁴⁰ Te yúcún yíñúhún na sáha rō táca jniñu.

Jnūhun jeē ní natecu Cristo

15 Hermano jijnáhan rō, vijna te nucūhun ni rō jnūhun jnáma ya yohó jeē ní nacani ri nuū rō. Te jnūhun ún chi je ni cajetáhú rō, te suni cáhīin níhin rō jíin. ² Te suni jíin jnúhun ún te ni jnama ya rohó, te núu cáhīin níhin rō jíin jnúhun ni nacani ri nuū rō, te núu tu ní cácadíje cāha rō.

³ Chi jnūhun cánuú gá jeē ni níhín maá rí ni nastéén rī nuū rō: Jeē ni jíhī Cristo siquī cuéchi yó, nájnuhun je cáhán tutu íi nde jenahán. ⁴ Te ni quindūji ya, te ni natecu yā nuū uní quivī, nájnuhun cáhán tutu íi. ⁵ Te ni nane ya nuū Pedro. Te sáá te ni nane ya nuū ndihúxí gā apóstol. ⁶ Te sáá te ni nane ya nuū vihyá gā uhūn ciento hermano jeē cáyūcu tútú. Te sava i tēcu gā nde vijna, te sava i je ni jihī. ⁷ Te sáá te ni nane ya nuū Jacobo, yūcuán na te nuū ndihī ga apóstol.

⁸ Te jeē sándihí na te ni nane ya nuū maá rí. Te nájnuhun ñn jeē ní cacu yúte, súcuan cúu jeē ñn sanaa-ni te ni nduu ri apóstol. ⁹ Chi tēe núu ga nuū tāca gā apóstol cúu ri, te ni nasūu tēe vāha cúu ri jeē cónaní rí apóstol, chí ni jito xeēn rī ñayuu cácadíje nuū Yaā Dios. ¹⁰ Te siquī jeē ni sáha Yaā Dios jeē váha ruhū, jeē yúcuan cúu ri apóstol vijna. Te jeē ni sáha ya jeē váha ruhū, chí tú cāha ní cúu, chí sa ni scáca ga rī jnūhun ya vēsú tāca gá tēe apóstol. Te nasūu máá rí ni sáha, chí Yaā Dios ni sáha ya jeē váha un jíin rí. ¹¹ Núu súcuan te vēsú ruhū chí táca gá tēe ún, súcuan cá-nacani ri jnūhun, te súcuan ni cacandíje rō.

Jnūhun jeē natecu ndīyi

¹² Te jeē cánacani ri jnūhun Cristo jeē ní natecu yā méhñu ndīyi, ¿te naun cácahān sava rō jéē ma nátecu ndīyi? ¹³ Chi núu jeē tú natecu ndīyi, te suni tu ní nátecu Cristo nuú. ¹⁴ Te núu jeē tu ní nátecu Cristo, te cá-nacani cāha rí jnūhun ya nuú, te suni cácadíje cāha rō núu. ¹⁵ Chi núu jeē súcuan cúu núu, te cácuu ri tēe jeē

tu cácahān ndaā jnūhun Yaā Dios, chi ni cacachi rī jeē ní nastécu Yaā Dios Cristo. Te núu jeē tú natecu ndije ndīyī, núu súcuān te tú ndaā jeē ní nastécu Yaā Dios Cristo. ¹⁶ Chi núu tú natecu ndīyī, te ni Cristo suni tu ní nátecu yā nuú. ¹⁷ Te núu tu ní nátecu Cristo, te cácan-dije cāha ró te cándiso īī gā rō cuēchi ró núu. ¹⁸ Te núu jeē súcuān cúu núu, te suni je ni cajnahmū ndetū ñayuu ni cacandije Cristo. ¹⁹ Chi núu tú natecu ndīyī, te núu máá ñn-ni siquī vida yáha ñūhun ni yō jeē sáha Cristo jeē váha yóhó, núu súcuān te ndahú ndasí gá cácuu yó vēsú tāca gá ñayuu, chi cácan-dije cāha yó nuú.

²⁰ Te tuú chi íyó ndāā jeē ní natecu Cristo mēhñu ndīyī. Te máá yá cúu jeē xihna gā ni natecu nuū tāca gá ndīyī jeē natecu. ²¹ Chi siquī jeē ni stívi ñn-ni tēe Adán, te ni quejéé jíhí ñayuu. Te suni súcuān siquī jeē ni sáha ñn-ni tēe Cristo, te natecu ñayuu. ²² Chi nájnūhun cájihī ndīhi yó síquī jeē cácuu yó yúcūn Adán, suni súcuān natecu ndīhi yó síquī jeē yíhi yó ndaha Cristo. ²³ Te ná ñn ná ñn ndese ndíquín jnáhan máá: Xīhna gā Cristo ni natecu yā, te sáá te quivī ndiji ya te natecu tāca ñayuu yíhi ndaha ya. ²⁴ Yūcuán na te jīnu tiempo, te snāā yā poder tāca enemigo jeē cujéhu jín jéé ndácu jniñu jín jéé iyó poder. Te ndīhi jeē ndácu ya jniñu nuū, nacuāha ya nuū Tatá yā Yaā Dios. ²⁵ Chi cánuú jéé ndacu Cristo jniñu nde quiiji quivī jeē quénde Yaā Dios poder tāca jéé jíto uhū nuū Cristo, te stóho ya. ²⁶ Te jeē sándīhí na te snāā yā cuehyi jéhni ñayuu. ²⁷ Chi cáhán tutu īī jeē sáha Yaā Dios jeē cujéhu Cristo siquī ndīhi, te cuatáhu núu yā. Te jeē cáhán jeē cujéhu ya nuū ndīhi-ni, te jíní váha yó jéé máá Yaā Dios ma quíhi ya ndaha Cristo, chi Yaā Dios cúu jeē ni chíhi tāca un ndaha Cristo. ²⁸ Te ná ni quivī ndīhi ún ndaha Cristo, yūcuán na te suni máá Cristo jeē cúu ya Sēhe, quivī ya ndaha Tatá yā, Yaā jeē ní chíhi tāca un ndaha ya. Te súcuān te máá Yaā Dios jñi ya ndīhi-ni.

²⁹ Te íyó ñayuu cájendute jehē ndīyī. Te núu tú natecu cuiti ndīyī, ¿te najehē cájendute i jehē ndīyī núu súcuān?

³⁰ Te ruhū jijnáhan ri, ¿najehē cúu jeē ndiquivī cájendeyí ni rī jíto ri jnūndóho cuu rī, te núu tú natecu ndīyī? ³¹ Hermano, nájnūhun íyó ndāā jeē cúsiñi ni rī siquī jeē cácan-dije ró jítoho yō Jesucristo, suni súcuān íyó ndāā jeē ndiquivī nducú ñayuu cahni ruhū siquī jniñu ya. ³² Te jeē ní ndoho ri ni casáha tēe xeēn ñuu Efeso, jeē cácuu de nájnūhun quitī xéén, ¿te na vé nihín rī siquī un núu súcuān? Chi núu tú natecu ndīyī, te cuu cahān yō nájnūhun áchí ñn jnūhun: Na cúsiñi ni yō caji yō coho yó, chi sanaa te sajnē te cuu yō, achi yō nuú.

³³ Ma cuáha ró jnūhun stáhu ñayuu rohó. Chi áchí ñn jnūhun: Núu cájica ró jín ñayuu neé, te stívi i róhó jéé tuá caca ndaā rō. ³⁴ Nachuhun ni rō jijnáhan ró, te sáha ró jniñu ndaā, te ma sáha ga rō cuēchi. Chi sava ró tu cájini cuiti rō ndese Yaā cúu Yaā Dios. Súcuān cáhán rī návāha na cúcanu rō.

Ndese natecu ndīyī

³⁵ Te sanaa te cahān ñn ró: ¿Ndese natecu ndīyī? ¿Ndese coo yiqui cúñu i? achi rō. ³⁶ Tu jécūhun cuiti ni rō núu súcuān. Chi cúu nájnūhun jeē cátají ró táca tata chíhi ñuhun návāha nane yucū i. ³⁷ Te tata jeē quivī chíhi ñuhun, núu trigo chí inga tata, chi nasūu yúcū cúu, chí máá núnī-ni cúu. ³⁸ Te cuéé gá te cane, chí Yaā Dios ni jēhe ya yucū tata ún, ndese ni nujnahan ni máá yá, te ná ñn ná ñn tata chí sñn sñn cáa yucū ni sáha ya. ³⁹ Te suni súcuān tāca yiqui cúñu, chí tú inuú cándāa. Chí sñn cáa ñayuu, te sñn cáa quitī, te sñn cáa saa, te sñn cáa chācá. ⁴⁰ Te suni súcuān cúu tāca jéé íin andiví jíin táca jéé iyó ñayiví. Te sñn luu cáa jeē íin andiví, te sñn luu cáa jeé iyó ñayiví. ⁴¹ Te sñn ndíndēe níndii, te sñn ndíndēe yóó, te sñn ndíndēe táca quími. Te tāca ñn ñn quími chí suni sñn sñn ndíndēe. ⁴² Te suni súcuān coo jíin ndīyī jeē natecu. Ndīyī jeé chíndūji yó chí téhyū, te jeē nastécu yā chí ma cúu gā. ⁴³ Jeé chíndūji yó chí ndáhú cáa, te jeē nastécu yā chí luu cujéhu. Jeé chíndūji yó chí tú na fuerza, te jeē nastécu yā chí coo fuerza. ⁴⁴ Jeé chíndūji yó chí ñn yiqui cúñu cuenta ñayiví cúu, te jeē nastécu yā chí ñn yiqui cúñu cuenta Espíritu yā cúu. Chí íyó yiqui cúñu cuenta ñayiví, te suni íyó yiqui cúñu cuenta Espíritu.

⁴⁵ Chí súcuān yósó núu tútu īī: Adán, tēe xīhna ñūhún, ni cuvāha de jíin vida cuenta ñayiví, áchí. Te Cristo cúu nájnūhun inga Adán uū, te máá yá cúu Espíritu jeé jēhe vida. ⁴⁶ Te nasūu yiqui cúñu cuenta Espíritu cúu jeé ní cuvāha xīhna gā, chí sa suhva yiqui cúñu cuenta ñayiví, te sáá te nduu cuenta Espíritu. ⁴⁷ Te cuenta ñayiví cúu tēe xīhna ñūhún, chí ni cuvāha de jíin tēcachā ñuhun. Te Adán uū jeé cúu máá jítoho yō, chí nde andiví ní quiiji ya. ⁴⁸ Te ñayuu ñayiví yáha, chí cúu i jnáhan Adán jeé ní cuvāha jíin tēcachā ñuhun. Te ñayuu jeé quívicoo andiví, chí ndúu i nájnūhun máá Yaā ní quiiji nde andiví. ⁴⁹ Chí jeé cáa yó nájnūhun tēe ni cuvāha jíin tēcachā ñuhun, suni súcuān coo yó nájnūhun cáa máá Yaā ní quiiji nde andiví.

⁵⁰ Jnūhun yáha cástūhun rí nuū rō jijnáhan ró, hermano, jeé yiqui cúñu yō cuenta ñayiví yáha, ma cúu quivī ñuu nuū ndácu Yaā Dios jniñu. Chí jeé jíhí cúu, te ma cúu quivī nuū cótecu ní cáni. ⁵¹ Te cúní rī jeé na jécūhun ni rō jnūhun yáha jeé ní yisāhí: Nasūu ndīhi yó cuu, te ndīhi yó chí nasāma yiqui cúñu yō. ⁵² Chí quivī jeé cuécu sandīhí na trompeta, te ñn yachī-ni, nájnūhun ñn jeé nácuēñi-ni yó, te nasama ya yohó. Chí cuecu trompeta un, te natecu tāca ndīyī jeé ma cúu gā i. Te tāca yó jeé cátecu yō quiví ún, chí nasama ya yiqui cúñu yō. ⁵³ Chí jeé tehyú yāhá, cánuú nucūhun jeé ma téhyú gā. Te jeé jíhí cánuú nucūhun jeé ma cúu cuiti gā. ⁵⁴ Chí jeé jíhí jeé tehyú, chí quiiji quiví jeé nucūhun jeé ma cúu gā ma tehyú gā. Yūcuán na te cundaā jnūhun yósó núu tútu īī: Jíin poder yā ni snāā yā cuehyi jéhni ñayuu. ⁵⁵ Cuehyi jéhni yóhó ¿ndese ga cuu sáha

xeēn jíin yó? Chi natecu yō. ¿Te ndese ga cundeyí jíin yó? Chi snáa yā. Achí tutu. ⁵⁶ Chi cuēchi cúu jeē sáha jeē cundeyí cuehyī jéhni ñayuu. Te ley yā jenahán sáha jeē náne cuēchi siquī yō. ⁵⁷ Te na cútahū yō nuū Yaa Dios, chi jíin máá Jítoho yō Jesucristo sáha ya jeē cundeyí yó siquī cuēchi jíin síquī jnūhun cuu yō.

⁵⁸ Jeē yúcuan, ñánī mánī, cuiñi nīhin ró te ma cáca yátá ró jijnáhan ró. Te níní na sájniñu vāha ró jíin jniñu máá Jítoho yō. Chi je cájini ró jeē tu cásájniñu cāha ró jíin máá Jítoho yō.

Siquī jeē cáquin i xūhún cuu tācá hermano

16 Te vijna te cahān rī siquī xūhun jéē cáquin ró cuu hermano cácondíje cándoho ndáhú. Suni na sáha máá ró jijnáhan ró nájñūhun ni ndacu ri nuū tāca grupo ñayuu cácondíje ichi Galacia. ² Tācá domingo te ná ñn ná ñn ró chuvāha sñn ró jecu xūhún, núu ndese ni nihñn maá ró, návāha quivī jeē jinú rī nuū ró te je iyó túhva. ³ Te jeē jeé rī, te cuāha ri carta nuū tāca téee jeē nácāji ró, te tají rí de quingoo de nuū tācá hermano cáyūcú Jerusalén, quisiáha de xūhun jéē ní casocō ró. ⁴ Te núu iyó váha jeē quihín rī, te suni quihñn rī jíin de jijnáhan de.

Jeē cahán Pablo siquī jeē quícondéhé de ñayuu cácondíje

⁵ Te jeē jeé rī nuū ró jijnáhan ró, te jíni ñúhún jeē xíhna gā jeē rī región Macedonia, yūcuán na te jeē rī ñuu ró Corinto. ⁶ Te sanaa te quendōo ri jíin ró jijnáhan ró jecu tiempo, chí sanaa te coyūcu yó ññ tiempo mījin. Yūcuán na te cuu chindéé ñáhán ró ruhū, núu ndé chi quihín tucu ri. ⁷ Chi tu cúní rī jeē rī nuū ró vijna te yāha yachī rī quihñn rī, chí ñúhún ni rī jeē quendōo ri jíin ró jecu tiempo, te núu cuāha Jitoho yō jnūhun. ⁸ Te cone ri ñuu Efeso yāhá nde na yāha quivī Pentecostés. ⁹ Chi coo cuehē ñayuu scandíje ri, te vāha quihñn jniñu Jitoho yō. Te suni iyó cuéhē ñayuu cácuu contra.

¹⁰ Te núu na jéé Timoteo, te sáha ró jéé coo siñ ni de mēhñu ró, te ni ñn ma cáni ni de siquī. Chi suni jniñu máá Jítoho yō sáha de, nájñūhun máá rí. ¹¹ Núu

súcuan te ni ñn ró má sajéé ni ró nuū de. Chi sa suhva chindéé ñájñáhan ró jíin de jeē na quihín gā de, te coo ndeyí coo siñ ni de, návāha ndiji de coto jnáhan ri jíin de. Chi ruhū jíin sava ga hermano cándetu ri de.

¹² Te hermano Apolos chi ni cahān ndahú rí jíin de jeē na jéé de jíin sava ga hermano, condéhé de rōhó. Te ni jeni ni de jeē ma cúu jeē de vijna. Te núu na núne de te jeē de.

Saludo jeē sándihí

¹³ Ndito coo ni ró jijnáhan ró, te cuiñi nīhin ro jíin jnūhun cácondíje ró. Te téyí na cóo ni ró, te na cóo fuerza ini ró. ¹⁴ Te tāca jéé casáha ró, na sáha ró jíin jnūhun cundáhú ni jnáhan.

¹⁵ Hermano, cájini ró jeē xíhna gā ñayuu vehe Estéfanos ni cacandíje ichi Acaya. Te ni cajéhe i máá i nuū jniñu jeē chindéé ñáhán i tācá hermano cácondíje.

¹⁶ Te cúní rī jeē suni máá ró jijnáhan ró, cuatáhú váha ró ñáyuu casáha súcuan, jíin táca ñáyuu cachindéé ñájñáhan te cásájniñu siquī jniñu ya. ¹⁷ Cúsiñ ni rī jeē ní quijicoo Estéfanos jíin Fortunato jíin Acaico, chí tēe yáha ni cajejniñu de nuū rī jehē ró jeē tu ní cáhiyo ró jíin rí. ¹⁸ Chi ni ndundeyí ni rī, te suni súcuan máá ró jijnáhan ró, ni casáha de. Te cánuu cuajnúhún ró tāca téee cándāa súcuan.

¹⁹ Sándeyí ni ró jijnáhan ró, áchí táca grupo ñayuu cácondíje cáyūcu Asia. Aquila jíin Priscila jíin ñáyuu cácondíje jeē cándutútú vehe de, cácahān i jeē sándeyí ndasí ni ró jíin jnūhun máá Jítoho yō. ²⁰ Te tācá hermano cácahān i jeē sándeyí ni ró. Te jeē cahán ró jíin táca jnáhan ró, te yíñúhún techūhu ró ndaha i.

²¹ Ruhū Pablo, jíin ndaha máá rí téee ri jnūhun yáha jeē na sándeyí ni ró jijnáhan ró.

²² Te núu ndé ñn tu iyó mánī jíin Jítoho yō Jesucristo, te na jnáhnú ndetū i núu súcuan. Te na cáhán yō: Jitoho ná, cúní na jéé yachī ndiji ní.

²³ Te ñúhún ni rī jeē máá Jítoho yō Jesucristo na sáha ga yā jeē váha rōhó jijnáhan ró. ²⁴ Te manī rī jíin ró jijnáhan ró jéé cácondíje ró Cristo Jesús. Súcuan na cóo. Amén.

2 CORINTIOS

1 Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū nacani ri jnūhun ya. Te ndindúú rí jíin hermano yō Timoteo cátee ri carta yáha cuájeē nuū rohó hermano ñuu Corinto jeē cávandíje ró Yaā Dios, jíin núū ndihí rohó jéē cáyihí ndaha Yaā Dios jeē cáyūcu ñí cáhnu Acaya. ² Te cáñuhun ni rí jeē Tatá yō Yaā Dios jíin Jítoho yō Jesucristo na sáha ga yā jeē váha rohó te sáha ya jeē coo ndeyí coo síñ ni rō.

Siquí jeē ní ndoho Pablo jnūndóho

³ Na cáhán yō jeē yóhoyo cújéhnu Yaā Dios, Yaā cúu Tatá maá Jítoho yō Jesucristo. Chi máá yá cúu Tatá yō jeē cundáhu ni yohó, te níní sáha ya jeē ndúsíñ ni yō. ⁴ Chi sáha ya jeē ndúsíñ ni yō siquí tāca jnūndóho ndóho yó, návāha suni cuu sáha máá yó jeē ndúsíñ ni jnáhan yó jéē cándoho jnūndóho. Chi nájnūhun ni sáha ya jeē ndúsíñ ni maá yó, suni súcuan sáha yó jéē ndúsíñ ni i. ⁵ Chi jeē ndóho yó cuehē jnūndóho nájnūhun ni ndoho Cristo, suni súcuan nihīn yō cuehē jnūhun ndusíñ ni, sáha Cristo. ⁶ Jeē yúcuan núu cándoho ri jnūndóho te súcuan te cuu sáha ri jeē ndúsíñ ni rō te quendōo vāha ga anuá rō. Te jeē sáha Yaā Dios jeē ndúsíñ ni rī, suu sáha tucu jeē ndúsíñ ni maá ró, te quéndōo vāha ga anuá rō. Te súcuan te nihīn rō fuerza jeē cuándeyí ni rō jíin tāca jnūndóho nájnūhun cándoho ri. ⁷ Te cáñuhun ndasí ni rī jeē cúu rohó, chi cájini rī jeē nájnūhun cándoho ró jnūndóho jíin rí, suni súcuan ndusíñ ni rō jíin rí sáha máá Yaā Dios.

⁸ Hermano, cáconi rī jeē na cúni rō jijnáhan ró ndese ni candoho ri ichi Asia. Chi yóhoyo xeēn jnūndóho ni cajito ri, nde je yajni tuá canda ri, te ni jeni ni rī jeē cuu rī nuú. ⁹ Te siquí jeē ní cajehnde ni rī cuu rī, te yúcuan ní sáha jeē ní cajecūhun ni rī jeē ma ténuū rī maá rí chi tú jniñu ri, chi sa suhva Yaā Dios jeē nastécu ndēyí tenuū rī. ¹⁰ Chi máá yá ni scácu ruhū jijnáhan ri nuū jnūndóho xeēn jeē jé yajni cuu rī nuú, te suni súcuan scácu ya ruhū vijna. Te ñúhun ni rī jeē suni scácu tucu ya ruhū ichi núú gā. ¹¹ Te suni na chindéé ñáhán ró rúhū jijnáhan ri jeē cacān tahu rō jehē rī. Chi núu cuehē ñayuu cacān tahu jehē rī, te suni cuehē i cuu nacuatáhu jehē rī jeē ni sáha ya jeē váha ruhū.

Jeē ní cucuéé Pablo quihīn de ñuu Corinto

¹² Iyó ñn jeē sáha jeē cácusíñ ni rī: Chi vāha íyó ni anuá rī jeē váha ndoo te ndaā ni cajica ri nuū ñayuu

ñayívi, te víhyá gā nuū maá ró jijnáhan ró. Chi siquí jeē váha ni Yaā Dios, te ni chindéé ñáhán yá ruhū, te nasūu siquí jéē ndichí máá rí cúu jeē ní cajica ri súcuan. ¹³ Te jnūhun cátee ri nuū tāca carta rī, chi máni jeē cúu cahu ró te jecūhun ni rō cúu. Te ñúhun ni rī jeē jecūhun vāha ga ni rō, ¹⁴ nájnūhun je cájecūhun ni rō jecu. Te súcuan te cuu cusíñ ni rō siquí rī quiví ndíji Jitoho yō Jesús, nájnūhun cácusíñ ni rī siquí maá ró.

¹⁵ Te siquí jeē súcuan ni cucáhnu ni rī, te jeē yúcuan ní jeni ni rī jeē núu na quihín rī Macedonia te jeē rī nuū maá ró xīhna gā, návāha cusíñ ni rō jeē jécondēhe rí rohó úū jínu núú. ¹⁶ Chi ni jeni ni rī jeē jécondēhe rí rohó, te yāha ri quihīn rī Macedonia, te jeē nándicó rí Macedonia te ndíji tucu ri nuū rō. Yūcuán na te cuu chindéé ñáhán ró ruhū jeē quihín rī ichi Judea nuú. ¹⁷ Te jeē súcuan ni jeni ni rī, ¿te á téte tu nácani vāha ni cúu ri jeē tu ní jéé rī nuū rō, chí naún? ¿A cájeni ni rō jeē cúu ri nájnūhun ñayuu ñayívi jéē yachí cahán jeē cuu, yūcuán na te tuú, chí naún? ¹⁸ Tuú chi máá Yaā Dios jíni yā jeē tu cáhán rī jíin ró jeē cuu, te yachí nacahān rī jeē ma cúu. ¹⁹ Chi ruhū jíin Silvano jíin Timoteo ni canacani ri jnūhun Jesucristo Sēhe Yaā Dios nuū rō jijnáhan ró. Te máá yá tu cáhán yā jeē cuu te nacahān tucu ya jeē ma cúu. Chi squícu ya jeē cahán yā. ²⁰ Chi ndihí jeē ni jéjnūhun Yaā Dios, squícu máá Cristo. Te jeē yúcuan cácahān yō jeē yóhoyo luu cújéhnu Yaā Dios, te cácahān yō Amén, chi ndihí squícu Cristo Jesús. ²¹ Te Yaā Dios cúu jeē sáha jeē ruhū jijnáhan ri jíin rohó jijnáhan ró, cáhīn nihīn yó jíin Cristo, te ni sándoo ya yohó jéē cuajniñu yó núu yā. ²² Te suni ni jēhe ya Espíritu yā jeē cóndee ini anuá yō, te cúu ya nájnūhun ñn sello jeē steén jeē cúu yó séhe Yaā Dios. Te sáha Espíritu jeē iyó ndáa ni yō jeē cuāha Yaā Dios tahu yō.

²³ Te jeē ná tu jeē rī nuū rō ñuu Corinto, nájnūhun ni jeni ni rī, suu cúu siquí jeē tu ní cúni rī cuxeēn rī nuū rō jeē tu cásáha vāha ró. Te máá Yaā Dios cúu Yaā jíni jeē cahán ndaā rī. Te íyó váha jeē na cúu rī te núu tu cáhán ndaā rī. ²⁴ Te nasūu jéē cáconi rī ndacu nihīn ri jniñu nuū rō siquí jnūhun cávandíje ró yá, chi je cáhīn nihīn ro jíin jnūhun ún. Chi sa suhva cáconi rī chindéé ñáhán rí rohó jéē na cúsiñ gā ni rō.

2 Núu súcuan te ni jeni ni rī jeē ma jéé rī ñga jínu nuū rō jíin jnūhun cuxeēn rī te cucuíhyá ni rō sáha ri. ² Chi núu cucuíhyá ni rō sáha ri, ¿te ndé ñayuu sáha jeē cusíñ ni maá rí? Tuá na ñga ñayuu, chi máni máá rohó, te ndese cuu te núu ni sáha ri jeē cucuíhyá ni rō. ³ Te jeē yúcuan cúu jeē ní tee ri carta un núu rō,

návāha nacani ni rō siquī cuēchi ró sáha, te ma cucuíhyá ni rī sáha cuēchi ró quívī jeē rī nuū rō. Chi sa suhva sáha ró jéē cusīñ ni rī. Te jíni vāha ri jeē núu cusīñ ni rī, te suni ndīhi ró jíjnáhan ró cusīñ ni rō. ⁴ Te jeē ní tee ri carta un núu rō, te yōhyo ni nacani ni rī siquī rō, te ni jnahuhū ni rī, te nde ndahyú rī ni tee ri. Te tu ní tée ri jeē sáha ri jeē cucuíhyá ni rō, chi sa suhva návāha cuni rō ndese yōhyo manī rī jíin rō.

Jeē íne cáhnu ni Pablo nuū tée ni sáha cuēchi

⁵ Te jeē ní cucuíhyá ni rī ni sáha tēe jeē ni sáha cuēchi ún, te nasūu máá-ni ri, chi suni nde máá ró jíjnáhan ró ni sáha de jeē ní cacucuíhyá ni rō jecu. Te cáhán rī jeē jecu-ni, chi tu cúní rī cuxeēn ndasí rí. ⁶ Te jíin jéē ní cacuxeēn rō nuū de ná ni candutútú ró, te jíin yúcuan-ni te ni cuu-ni. ⁷ Te vijna chi jíni ñúhún jeē cóne cáhnu ni rō nuū de, te sáha ró jéē ndúsīñ ni de, chi sanaa te caa ga cucuíhyá ni de, te ma ndúsīñ gā ni de. ⁸ Núu súcuan te cáhán ndahú rí jíin ró jíjnáhan ró jéē steén tucu ró jéē iyó manī rō jíin de. ⁹ Chi jeē siquí jniñu yáha cúu jeē ní tee ri carta un núu rō, návāha coto ndee rī rohó núu cuatáhú vāha ró jniñu ndácu ri nuū rō. ¹⁰ Núu súcuan te núu íne cáhnu ni rō nuū ñayuu, te suni súcuan ruhū. Chi jeē íne cáhnu ni rī nuū ñayuu núu ni sáha i cuēchi, te sáha ri súcuan siquī jeē manī rī jíin ró jíto jínuú Cristo. ¹¹ Chi cánuú cone cáhnu ni yō, chi tu cúní yō jeē nihín Satanás cuēchi siquī yō, chi je jíni vāha yó ndese ndúcú un stáhú yóhó sáha yó cuēchi.

Jeē tu ní íyo nayúú ni Pablo ini ñuu Troas

¹² Ná ni jehēn rī ñuu Troas jeē nácani ri jnūhun Jitoho yō Cristo, te vāha ni sáha ya jeē ní íyo modo jeē nácani ri jnūhun ya. ¹³ Te vēsú súcuan te tu ní íyo nayúú ni anuá rī, chi tu ní níjnáhan ri jíin hermano yō Tito. Yūcuán na te ni nacuatáhú rí nuū ñayuu yūcuán, te cuananducú rí de ichi Macedonia.

Jnūhun jeē cujéhnu ndúú yó jíin Cristo

¹⁴ Te na cútahū yō nuū Yaā Dios, chi níní ndéca vāha ya yohó cuángoo yó jíin Cristo Jesús, te ndúú yó jíin yá jeē cujéhnu ndasí yá snāā yā poder ndīhi enemigo yā. Te jéjníñu ya yohó jéē scuité núu yó jnúhun ya tǎcá-ni lugar, nájnūhun jíte núu ñin xicō asīn. ¹⁵ Te cúu yó nájnūhun ñin sūje jeē jeén asīn nuū Yaā Dios sáha Cristo. Te nájnūhun jeē jíin xicō un núu ñayuu cācu ánuá jíin núu ñayuu jnahnu ndetū. ¹⁶ Nuū ñayuu jnahnu ndetū chi cúu yó nájnūhun ñin xicō jeē cúu i sáha, te nuū ñayuu cācu ánuá chi cúu yó nájnūhun ñin xicō vāha jeē cótecu i sáha. Te ni ñin yó ma cánda yó sáha yó jniñu yáha, te núu ma chindéé ñáhán yá yohó. ¹⁷ Te ruhū jíjnáhan ri, tu cásáha ri nájnūhun cásáha cuehē tēe jeē cánducú de nihín de xūhun síquī jnūhun Yaā Dios. Chi sa cánacani ndaā rī jnūhun ya, chi máá Yaā

Dios ni tají rúhū, te máá yá jíni jeē cánacani ndaā rī siquī jeē cáncandíje ri Cristo.

Jnūhun siquī contrato jeē

³ Te jeē cácahān rī súcuan, ¿te á cájeni ni rō jeē cánducú tucu ri cahān rī jeē vāha ga tēe cácuu ri, chí naún? ¿Te chí jíni ñúhún jéē steén rī carta recomendación nuū rō, chí jéē cacán rī cuāha ró núu rī jíjnáhan ri, nájnūhun cásáha sava i? ² Tuú chi máá-ni ró cácuu nájnūhun ñin carta recomendación rī. Te jeē ñúhun ni rī jeē ní cacandíje vāha ró ni sáha ri, suu cúu nájnūhun jeē yosó jnúhun carta un ini anuá rī. Te ndīhi ñayuu chi nájnūhun cáhu i, cúu jeē jíni i ndese ni nasāma ró. ³ Chi máá ró cácuu nájnūhun ñin carta jeē ní tee Cristo te cáscaca ri. Te nasūu jíin tinta ni tee ya, chi sa suhva jíin Espíritu Yaā Dios, Yaā técu. Te nasūu núu tabla yuū nájnūhun ni tee ya ley yā, chi sa suhva nuū anuá ñayuu ni tee ya.

⁴ Te cácahān rī súcuan, chi cácuahnu ni rī Yaā Dios siquī jeē ni sáha Cristo. ⁵ Te nasūu jéē cájeni ni rī jeē cúu canda máá rí sáha ri jniñu ún. Chi sa suhva máá Yaā Dios sáha jeē cuu squícu ri. ⁶ Te máá yá ni sáha jeē cuu cuajniñu vāha ri siquī contrato jeé yá. Te contrato yáha tu cáhán jeē squícu yó ley jeē ní tee jíin letra, chi sa suhva jeē caca yó jíin vida jeé, suu jeē ni jéhe Espíritu yā. Chi contrato ley jeē yosó jíin letra, jnahnu ndetū ñayuu sáha. Te jeē sáha máá Espíritu cúu jeē cótecu yō ñí cáni.

⁷ Te ley jenahán jeē ni jéhe ya nuū Moisés, ni yosó letra nuū tabla yuū. Te yōhyo ni cujéhnu, te ni ndindéé ndasí ni sáha, te nde Moisés ndīñ nuū de ni sáha. Te tu ní cúu coto vāha ñayuu Israel nuū de ni sáha. Te vēsú súcuan te cuéé-ni cuéé-ni ni ndahvā jeē ndindéé núu de. Te núu súcuan ni cujéhnu ndasí ley jeē sáha jeē cuu ñayuu te jnahnu ndetū i, ⁸ te sa víhyá gā cujéhnu ndasí gá jnūhun cotecu yō jeē jéhe Espíritu nuū yō. ⁹ Chi núu yōhyo ni cujéhnu ley un jéē jnahnu ndetū ñayuu sáha, te sa víhyá gā cujéhnu jnūhun jeē ndáhva Yaā Dios cuēchi yó. ¹⁰ Chi ley un jéē ní cujéhnu nde saá, tuá cujéhnu cuiti, siquī jeē cujéhnu ndasí gá jnūhun Espíritu jeē iyó vijna. ¹¹ Te núu súcuan ni cujéhnu ley jeē ni íyo jecu-ni tiempo, te sa cujéhnu ndasí gá jnūhun jeē coo ñí cáni.

¹² Te jeē súcuan cáñuhun ni rī, jeē yúcuan cáhīyo téyí ni rī nácani ri jnūhun yáha. ¹³ Chi tu cásáha ri nájnūhun ni sáha Moisés jeē ní jesí de ñin sahma nuū de, návāha tú coto ñayuu Israel ndese cuandahvā jeē ní ndindéé núu de. ¹⁴ Te ñayuu ún tu ní cájecūhun ni i. Te nde vijna núu cácahu ñayuu Israel tutu contrato ley jenahán, suni tu cájecūhun ni i, chí nájnūhun jesí sahma un núu jeē níjnūni i, te tu cújiyo cuiti. Chi nde jeē candíje i Cristo, yūcuán na te cujiyo. ¹⁵ Te suni súcuan nde vijna núu cácahu i tutu ley Moisés, te nájnūhun jeē jesí ñin sahma nuū jeē níjnūni i. ¹⁶ Te jeē násāma ini ñin ñayuu quīvi i nuū maá Jitoho yō Cristo, yūcuán na te cújiyo-ni

jeē jési ún. ¹⁷ Chi Jitoho yō cúu máá Espíritu. Te nuū íne Espíritu maá Jítóho yō, yūcuan cúu nuū iyó libre ñayuu jeē tuá yíhi i chíji ley jenahán. ¹⁸ Te jeē yúcuán máá yó jijnáhan yó, tuá jési nuū jeē níjnūnī yō. Chi cácuu yó nájnūhun espejo jeē jéhe nduva, cúu jeē cájica ndaā yō te suu stéén ndese yōhyo luu cújéhnū máá Jítóho yō. Te máá yó tāca quíví cuanasāma yó cuanduu luu ga anuá yō nájnūhun cáa máá yá. Chi máá Jítóho yō jeē cúu ya Espíritu, súcuán sáha ya jíin yó.

4 Núu súcuán te tu ndínuu ni rī cánacani ri jnūhun ya. Chi siquī jeē ní cundáhú ni yā ruhū jijnáhan ri te ni jéhe ya jniñu yáha nuū rī. ² Te tu cásáha ri jniñu néé jéé cúcanu yō sáha, ni tu cájica cuu ri jíin jnūhun ndíchí stáhú, ni tu cásama ri jnūhun Yaā Dios. Chi sa suhva cácahān rī máni jnūhun ndaā. Te súcuán te cuu cuni tāca ñayuu ini anuá i jeē cácahān ndaā rī jító jínúú Yaā Dios. ³ Te núu iyó ñayuu tu jécūhun ni jnūhun jna-ma ya yohó jéé cánacani ri, te súcuán cúu nuū máni máá ñayuu jnahnū ndetū. ⁴ Te jeē tu cácañíje i, te máá jéxeén jeē ndácu jniñu ini ñayívi yáha, ní jesi nuū jeē níjnūnī i, návāha ma ndíndēe jnūhun Cristo ini anuá i, te ma cúni i jeē yóhyo luu cújéhnū Cristo, Yaā jeē ínuú cáa jíin Yaā Dios. ⁵ Te jeē cánacani ri jnūhun, te nasūu jnūhun máá rí, chi sa suhva jnūhun Jitoho yō Jesucristo cánacani ri. Te máá rí chi cácuu ri mozo-ni nuū rō jijnáhan ró jéé siquī jeē maní rī jíin Jesús. ⁶ Chi ná ni sáha Yaā Dios ñayíví te ni cahān yā jeē na cundi-jin nuū néé. Te suni súcuán ni sáha ya jeē ní cundijin nuū anuá yō jeē cájécūhun ni yō siquī Jesucristo, ndese ndíndēe núu yā, cúu jeē yōhyo luu cújéhnū ya nájnūhun cúu Yaā Dios.

Jeē cándiquīn yō jnūhun cácañíje yó yá

⁷ Te tāca jnūhun yáha jeē yóhyo luu cújéhnū, chi nájnūhun jeē ñūhun ini ñn quísi ñuhun. Chi cácuu yó nájnūhun quísi ñuhun, chi tú na fuerza yō. Te jeē yúcuán cájini vāha ri jeē maá Yaā Dios cúu jeē jéhe poder siquī jnūhun yáha jeē yóhyo luu cújéhnū, te nasūu fuerza maá rí cúu. ⁸ Te jeē yúcuán, vésú tāca lado cájito ri jnūndóho, te tu sáha jeē ma ndúsíi gā ni rī. Te vésú cácuuquíhyá ni rī siquī jnūndóho, te cáñuhun ni rī jeē quee vāha jniñu ri. ⁹ Te vésú cájito xeēn ñayuu ruhū, te máá yá tu stóo ya ruhū jijnáhan ri. Te vésú cánducú i snáa i ruhū jíin jniñu sáha ri, te ma cúu. ¹⁰ Te ndé-ni cúu nuū cuángoo ri, te nájnūhun ni ndoho Jesús jeē ni jíhī yā, suni súcuán cándoho ri jeē jé yajni cuu rī, návāha suni cuu stéén rī fuerza Jesús jeē técu yā ini yiquí cúñu rī. ¹¹ Chi jeē níni cátecu rī, te tāca quíví je yajni cahni ñayuu ruhū jeē siquí Jesús. Te súcuán te cájito ñayuu jeē técu Jesús ini yiquí cúñu rī jeē cúu. ¹² Núu súcuán te ruhū jijnáhan ri, níni cúu jeē jé yajni cuu rī siquī jnūhun ya, te yúcuán sáha jeē cote-cu maá ró níi cáni jijnáhan ró.

¹³ Te yósó núu tútu íi: Ni candíje ri te jeē yúcuán ní cahān rī, achí. Te suni jeē cácañíje máá rí cúu jeē cá-

nacani ri jnūhun ya. ¹⁴ Chi cájini rī jeē maá Yaā jeē ní nastécu Jítóho yō Jesús, suni súcuán nastécu yā ruhū, te sáha ya jeē ñn cáhnu ni cuiñi ndíhi yó núu yā. ¹⁵ Chi tāca jnūndóho yáha cándoho ri návāha coo vāha ró jijnáhan ró. Te súcuán te cayā cuehē gā ñayuu jeē sáha ya jeē vāha i. Yūcuán na te suni yōhyo cuehē i nacu-atáhú i nuū Yaā Dios, te kujéhnū ga yā sáha.

¹⁶ Jeē yúcuán cúu jeē tu ndínuu ni rī, te vésú cuandíhi fuerza yiquí cúñu rī, te sa suhva cuanduu fuerza gā anuá rī tāca quíví. ¹⁷ Chi jnūndóho jeē ndóho yó ñayívi yáha, tú-ni xeēn cúu, te yachí yāha. Te sáha jeē níhín yō ñn tahū jeē kujéhnū yó níi cáni jeē cáa ndasí gā vésú jnūndóho ún. ¹⁸ Te tu táñúhún yó nuū tāca jnūndóho jító yó núu vijna, chi sa suhva táñúhún yó nuū tāca jéé vāha jeē tu jító yó núu vijna. Chi tāca jéé jító yó núu vijna, chi yachí ndíhi, te tāca jéé tu jító yó núu, chi coo níi cáni.

5 Chi yiquí cúñu yō jeē ndeé yó ñayívi yáha, cúu nájnūhun ñn vehe jeē náa. Te cájini yō jeē núu na náa, te cuāha Yaā Dios ñn yiquí cúñu jeé, te suu cúu nájnūhun ñn vehe jeē coo níi cáni ichi ándiví. Te nasūu ñn vehe jeē sáha ñayuu cúu, chi jeē sáha Yaā Dios cúu. ² Te níni jéé ndeé yó vehe yáha jeē cúu yiquí cúñu yō, te cájitu ni yō sáha, chi yōhyo cúni yō jeē núcūhun yó yiquí cúñu jeé yó nde ándiví. ³ Chi jeē núcūhun yó un, te ma cóo máa na anuá yō jeē náa yiquí cúñu yō yáha. ⁴ Chi níni jéé iyó gá yō ini vehe yiquí cúñu yō yáha, te jítu ni yō te cúcuíhyá ni yō. Te nasūu jéé cuní yō jeé stóo yó yiquí cúñu yō te coo máa-ni ánuá yō. Chi sa suhva cúni yō nucūhun yó jéé jeé, návāha ndahvā yiquí cúñu yō jeē náa, te coo máa jéé cótecu níi cáni. ⁵ Te Yaā Dios cúu jeē ni sáha ya jeē súcuán coo yó. Te ni jéhe ya Espíritu yā jeē cóndee ini anuá yō, te sáha Espíritu jeē iyó ndaā ni yō jeē cuāha Yaā Dios tahū yō. ⁶ Núu súcuán te níni cúu jeē cácuáhnu ni rī. Chi cájini rī jeē níni ndeé gá rī chíji yiquí cúñu yáha, te jíca cúu ri jíin núu ndeé máá Jítóho yō. ⁷ Chi vijna chi cácañíje ri jeē iyó yá jíin rí, vésú ná tu coto ri nuū yā. ⁸ Te cácuáhnu ni rī, chi sáha ri cuenta jeē vāha ga núu na quénda ri chíji yiquí cúñu yáha te quihín rī condee rī jíin máá Jítóho yō. ⁹ Jeē yúcuán cúu jeē cánducú ndéyí rí sáha ri jeē cusíi ni yā jíin rí, vésú núu ndeé gá rī yiquí cúñu rī chí vésú núu condee rī jíin yá. ¹⁰ Chi cánuú jéé ndíhi yó cuiñi yuhu mesa Cristo jeē sándaā yā jniñu yó. Te ná ñn ná ñn yó níhín yō siquī ndese ni casáha yó, á jéé vāha chí jéé neé, ná ni condee yō chíji yiquí cúñu yō.

Siquī jeē ndávicoo yó núu jnūhun maní Yaā Dios jíin yó

¹¹ Núu súcuán te cándiso íyo ri nuū maá Jítóho yō, te jeē yúcuán ndúcú ndéyí rí scandíje ri ñayuu. Te jíni Yaā Dios jeē cáhíyo ndaā rī, te ñūhun ni rī jeē suni súcuán cájini maá ró. ¹² Te nasūu jéé cánducú tucu ri cahān rī jeē vāha ga tēe cácuu ri, chi sa suhva cástūhun rí jeé cuu cusíi ni rō jeé siquí rī jijnáhan ri. Te súcuán te cuu

stíó cuíñí rō nuū ñayuu jeē cutéyí i siquī ndese cáa ñayuu, te tu sáha i cuenta ndese cáa ini anuá ñayuu. ¹³ Te va sanaa te cájeni ni rō jeē té loco cácuu ri jeē cácahān rī súcuan. Te siquī jeē cándihvī ni rī jehē Yaā Dios cúu. Te tuú chi cáhīyo vāha xinī rī, te jeē yúcuan cájejniñu ri jeē quéndōo vāha ró. ¹⁴ Chi siquī jeē ní cundáhú ni Cristo ruhū jijnáhan ri cúu jeē cánuú nacani ri jnūhun ya. Chi cájini vāha ri jeē ni jīhī mañúhún-ni ya jeē siquí ndihī yó, te jeē yúcuan nájnūhun ni jīhī ndihī yó jíin yá. ¹⁵ Chi ni jīhī yā jeē siquí ndihī yó návāha tāca yó jēé técu, ma cótecu ga yō jeē sáha yó jēé cuní maá yó, chi sa suhva jeē cuní maá yá jeē ni jīhī yā te ni natecu yā jeē siquí yō. ¹⁶ Jeē yúcuan tuá casáha ri cuenta ndese-ni cándāa ñayuu, nájnūhun casáha ñayuu ñayiví. Te vēsú súcuan ni casáha ri cuenta siquī Cristo nde saá, jeē ñn tēe-ni cúu ya, te vijna chi cájini rī jeē cúu ya Sēhe Yaā Dios. ¹⁷ Chi núu ñn ñayuu yíhi i ndaha Cristo, te je ni ndujeé i. Te tāca modo neé ní nevāha i, je ni yāha cuahān, te vijna je ni ndujeé ndihī.

¹⁸ Te Yaā Dios cúu jeē sáha ndihī jeē yáha, chi jíin Cristo ni sáha ya jeē ní ndivícoo yó núu jnúhun manī yā jíin yó. Te ni tejníñu ya ruhū jeē cánacani ri jnūhun jeē ndivícoo ñayuu nuū jnúhun manī yā jíin i. ¹⁹ Chi jíin Cristo te ni sáha Yaā Dios jeē ñayuu ñayiví ndivícoo i nuū jnúhun manī yā jíin i. Te tu ndácunehen ya cuēchi ni casáha ñayuu. Te ni tejníñu ya ruhū jeē cánacani ri jnūhun yáha ndese ndivícoo i nuū jnúhun manī yā jíin i. ²⁰ Núu súcuan te cácuu ri tēe cájica jniñu máa Cristo. Te jeē cahán rī, te nájnūhun jeē maá Yaā Dios cahán ndahú yá jíin ró. Núu súcuan te cácahān ndahú rī jíin ró jeē cahán Cristo, jeē na ndivícoo ró núu jnúhun manī Yaā Dios jíin ró. ²¹ Te Cristo, vēsú tú ni ñn cuēchi ya, te ni sáha Yaā Dios jeē ní nucondee cuēchi yó sáquī yā. Te súcuan te yóhó jēé yíhi ndaha Cristo, ni nucondee siquī yō jeē iyó ndāa yō nájnūhun íyó ndāa Yaā Dios.

6 Núu súcuan te siquī jeē cácuu ri tēe casájniñu jíin yá, te cácahān ndahú rī jíin ró jeē ma stóo un ró jnúhun jeē ni sáha Yaā Dios jeē vāha rōhó. ² Chi áchí yá nuū tútu iī:

Máa tiempo cuní maá rí te cuni sōho rī jnūhun cáhán ndahú ró jíin rí.

Te máa tiempo jnáma ri ñayuu, te jnama ri rohó. Achí yá. Te vijna-ni cúu máa tiempo jeē cuní yā, chi vijna-ni cúu tiempo ni quiiji Yaā jnáma yóhó.

³ Te cánducú rí jeē ma sáha ri ni ñn jniñu jeē casí jeē candíje ñayuu, návāha ma cahán i siquī jniñu ndíso ri.

⁴ Chi sa suhva cánducú rí jeē ndihī jeē sáha ri, steén jeē cácuu ri tēe cájejniñu nuū Yaā Dios. Jeē yúcuan cájendeyí ni rī jíin jēé ndóho ri jnūndóho, jíin jēé cúmanī nuū rī, jíin jēé yí sáha jíin rí. ⁵ Chi ni ñyo tijni jíinu jeē ní cacani i ruhū, jeē ní cachune i ruhū vecāa, jeē ní candonda i siquī rī, jeē ní casájniñu nīhin ri, jeē ní cajehni rī mähna máa rí, jeē ní cáhīyo ndite ni rī. ⁶ Te suni cánducú rí jeē cuajnúhún i ruhū siquī jeē ndoo cájica ri, te

cájecūhun vāha ni rī jnūhun ndaā, te cáhīyo paciencia ni rī, te vāha ni rī, te ndéé Espíritu Santo ini rī, te cá-cundáhú ndije ni rī jnáhan ri. ⁷ Te cánacani ndaā rī jnūhun, te poder Yaā Dios íne jíin rí. Te jíin jnúhun ndaā cándahva rī tācá jniñu neé, chi nájnūhun jeē cáje-jnáhan ri siquī. Chi nájnūhun jeē ndónnda un sáquī rī te ndónnda ri siquī. ⁸ Iyó jíinu yíñúhún ñayuu jíin rí, te íyó jíinu tuú. Iyó jíinu jéjnúhún i ruhū, te íyó jíinu cácahān i siquī rī. Iyó jíinu cácahān i jeē té stáhú cácuu ri, te íyó jíinu cácahān i jeē té ndaā cácuu ri. ⁹ Iyó jíinu casáha i nájnūhun jeē tu jíin i ruhū jijnáhan ri, te íyó jíinu jeē jiní vāha i ruhū. Iyó jíinu jeē cuní ñayuu cahni i ruhū, te cátecu nahín rí. Te vēsú cástóho i ruhū, te tu cájihī rī sáha. ¹⁰ Te vēsú iyó jēé cáccuñhyá ni rī, te níni cáccusí ni rī. Te vēsú tēe ndáhú cácuu ri, te sácúca rí cuehē ñayuu jíin jnúhun ya. Te vēsú tú na vé cánevāha ri, te jíin máa yá te ndihī-ni cúu jeē cánevāha ri.

¹¹ Hermano ñuu Corinto, súcuan cúu jeē cácahān cají rí jíin ró jijnáhan ró, chi siquī jeē maní rī jíin ró, jeē yúcuan cáchí ndihī ri ndese cándoho ri. ¹² Máa rí jijnáhan ri cácahān cají rí siquī jeē maní ndasí rí jíin ró, te máa ró jijnáhan ró sanaa te tu súcuan cúu.

¹³ Nájnūhun cáhán tatá jíin séhe, súcuan cáhán ndahú rí jíin ró jeē nájnūhun íyó mání rī jíin ró, súcuan na cóo maní tucu ró jíin rí.

Siquī jeē cúu yó templo Yaā Dios

¹⁴ Ma quíví nduu rō jíin jniñu neé casáha ñayuu tu cá-candíje, chi ma cúu coo ñnuú ró jíin i. ¿Chi ndese cuu quijnáhan jniñu casáha ñayuu ndaā jíin jniñu casáha ñayuu tú ndaā? ¿Te ndese cuu coyūcú ñnuú ñayuu cájica jíin luz yā jíin ñayuu cájica nájnūhun nuū neé?

¹⁵ ¿Ndese cuu coo ñnuú ni Cristo jíin Satanás? ¿Te ndese cuu cuiñí cáhnu ñayuu cá-candíje jíin ñayuu tu cá-candíje? ¹⁶ ¿Te ndese cuu quijnáhan templo Yaā Dios jíin ídolo? Chi máa ró cácuu templo Yaā Dios, Yaā técu, chi ndéé yá ini anuá rō, nájnūhun ni cahān yā:

Condee rī ini i te caca cuu ri mēhñú i, te cuu ri Yaā Dios maá i, te cuu i ñayuu maá rí.

¹⁷ Te jeē yúcuan ní cahān gā yā:

Ma quíví nduu rō jíin jniñu neé casáha i, te cusíin ró jijnáhan ró, áchí Jítóho yō.

Te ma jñí ró tāca jēé tú ndaā. Yūcuán na te naquihin ri rohó,

¹⁸ te cuu ri Tatá rō jijnáhan ró, te cuu ró séhe yí rí jíin séhe sñhí rí, áchí Jítóho yō, Yaā jñí ndihī poder.

Achí tutu.

7 Núu súcuan, ñání mání, cánevāha yó táca jnúhun yáha jēé ni jéjnúhun ya. Jeē yúcuan na sándoo yó máa yó tāca jēé sajnéhén yiqui cúñu yō jíin ánuá yō. Te na cónso ñyo yó núu Yaā Dios, te coo ndoo coo iī yō nuū yā jíin ndihī jniñu cuní yā.

Jeē ní canacani ni ñayuu Corinto siquĩ cuēchi i

² Coo manī rō jíin rí jijnáhan rō víi. Chi tu ní sáha ri falta nuū ní ñin rō, te tu ní stávi rí anuá ni ñin rō, te ni ñin rō tu ní stáhú rí. ³ Te nasūu jēē nducú rí cahān rī nuū rō cúu jeē cahán rī súcuan, chi je ni cahān rī jeē yóhoyo manī rī jíin rō. Te níni ñúhun ni rī rohó, vēsú cuu yō chí coteecu yō. ⁴ Te cucáhnū ndasí ni rī rohó jijnáhan rō, te cúsiñ teyí ni rī jeē siquĩ rō. Te vēsú cájito ri tāca jnúndóho yáha, te íyó ndeyí ni rī te cúsiñ ndasí ni rī jeē siquĩ rō.

⁵ Ná ni jengoo ri Macedonia te tu ní íyo nayúu ni anuá rī, chi sa suhva yí ni íyo jnúndóho jíin rí tāca lado. Chi ni íyo jeē ní castáhn jnáhan jíin rí, te ni cayūhu rí sanaa te caca yátá ñáyuu cácadíje. ⁶ Te Yaā Dios jeē sáha jeē ndúndeyí ni ñayuu cácuuíhyá ni, ni sáha ya jeē ní candundeyí ni rī, chi ni quiiji Tito ni sáha ya. ⁷ Te ni candusiñ ni rī, nasūu máá ñin-ni siquĩ jeē ní quiiji de, chi suni jeē ní ndundeyí ni de ni casáha rō. Chi ni castūhún de jeē cáñuhun ni rō coto tucu rō rúhū, jíin jēē cácuuíhyá ni rō jeē siquĩ cuēchi rō, jíin jēē cánacani ni rō jehē rī. Te jeē yúcuan ní cusíñ gā ni rī.

⁸ Te carta jeē ní tají rí nuū rō, vēsú ni sáha jeē ní cacucuíhyá ni rō, te tuá nácani cuíhyá ni rī jeē ni sáha súcuan. Chi vēsú ni cucuíhyá ni rī saá, te vijna te tuá, chi jíin rī jeē jecu-ni quiiví ni cacucuíhyá ni rō ni sáha. ⁹ Te vijna te cúsiñ ni rī, te nasūu síquĩ maá jēē ní cacucuíhyá ni rō. Chi cúsiñ ni rī jeē ní jejniñu jeē ní cacucuíhyá ni rō, chi ni sáha jeē ní canacani ni rō siquĩ cuēchi rō. Chi ni cacucuíhyá ni rō nájnūhun cúní maá Yaā Dios, te nasūu jēē ni sáhuhū rī rohó. ¹⁰ Chi núu cúcuuíhyá ni yō nájnūhun cúní Yaā Dios, te suu sáha jeē nácani ni yō siquĩ cuēchi yó te jnama ya yohó, te ma cóo ga jeē nácani cuíhyá ni yō. Te jeē cácuuíhyá ni ñayuu tu cácadíje, tu jéjniñu jeē nácani ni i, chi sa jnahnū ndetū i. ¹¹ Te ni cacucuíhyá ni rō nájnūhun cúní Yaā Dios, te vijna te cájito rō náa vāha ni jejniñu. Chi ni canacani ndasí ni rō ni sáha, te ni canducú rō jeē quéndōo ndaā rō, te ni cacuxeēn rō nuū téé ni sáha cuēchi, te ni cayūhu rō jeē ní castávi rō núu yā. Yūcuán na te yóhoyo ni cacuni rō coto tucu rō núu rī, te yóhoyo ni candíhvī ni rō ni cacuxeēn rō nuū téé ni sáha cuēchi ún. Te súcuan ni castéén rō jeē tú cuēchi rō, chi tu ní cájejnūhún rō cuēchi ni sáha tēé ún. ¹² Te jeē ní tee ri carta un, nasūu máá-ni jeē cúxeēn rī nuū téé ni sáha cuēchi ún, ni nasūu máá-ni jeē cahán rī jehē tēé ni ndoho ni sáha de. Chi sa suhva ni tee ri návāha nucūhun ni rō ndese yóhoyo ni canacani ni rō jehē rī jító jíinúu Yaā Dios. ¹³ Jeē yúcuan ní candusiñ ni rī jeē siquĩ rō.

Te víhyá gā ni cacusiñ ni rī jeē ní jini rī jeē cúsiñ ni Tito, chi ni nduu nayúu ini de ni casáha rō. ¹⁴ Chi je ni cahān rī jíin de jeē cúsiñ ni rī jeē váha ñayuu cácuu rō, te vijna te tu ní quéndōo ri jnúhun canu jeē siquĩ rō. Chi nájnūhun ni cajini rō jeē íyó ndáa tāca jnúhun ni cac-

ahān rī jíin rō, suni súcuan ni cundaā jnúhun ni cacahān rī jíin Tito jeē cúsiñ ni rī siquĩ rō jeē váha cácuuícu rō. ¹⁵ Te víhyá gā manī de jíin rō vijna jeē ñúhun ni de jeē váha ni cajetáhú rō jeē cahán de, te ni cahíyo yíñúhún rō ni candiso íyo rō núu de. ¹⁶ Núu súcuan te cúsiñ ni rī siquĩ jeē cucáhnū ndasí ni rī rohó jijnáhan rō.

Jeē na cúsiñ ni i socó i cuehē

8 Hermano, vijna te suni cácuu rī castūhun rí nuū rō jijnáhan rō ndese cuehē jeē váha ni sáha Yaā Dios jíin ñáyuu cácadíje cáyūcú Macedonia. ² Chi vēsú yóhoyo ni jito ndee jnúndóho i, te suni yóhoyo ni cacusiñ ni i jíin jnúhun ya. Te vēsú ñayuu ndahú ndasí cácuu i, te yóhoyo vāha ni cajequin i cuehē xūhun jēē cúu ñayuu ndahú cácadíje. ³ Chi cúu ri testigo jeē ní cacusiñ ni maá i ni cajēhe i ndésaa ni canda i, te nde víhyá gā ni cajēhe i. ⁴ Chi ni cacahān ndahú ndasí i jíin rí jeē na cuáha ri jnúhun chindéé ñáhán i jíin yó cuāha i xūhún cuu hermano cándoho ndáhú. ⁵ Te víhyá gā ni casáha i vēsú jeē ní cajeni ni rī, chi xíhna gā ni casocó i máá i nuū Jítóho yō, te saá te ni cajēhe i máá i sáha i tāca jēē cácuu rī, ndíhí ndese nújnahan ni Yaā Dios. ⁶ Te jeē súcuan ni casáha ñayuu Macedonia, te ni castíhvī ni rī Tito jeē na jéé tucu de nuū maá rō, sáha de jeē jínu jniñu jeē ni squéjéé de jíin rō jeē suni caquin rō cuehē xūhún cuu ñayuu ndahú. ⁷ Chi máá rō yóhoyo vāha casáha rō táca-ni, chi vāha cácadíje rō, vāha cánacani rō jnúhun, vāha cájecūhun ni rō, vāha cándíhvī ni rō, vāha manī rō jíin rí jijnáhan ri. Núu súcuan te suni cánuú sáha vāha rō jniñu yáha jēē cuáha rō jēē cúu ñayuu ndahú.

⁸ Te nasūu jēē cuní rī ndacu ri jniñu nuū rō, chi sa cástūhun rí nuū rō ndese yóhoyo cácuu ni sava ga ñayuu jéhe i xūhún, te súcuan te cuni rī jeē suni máá rō cácuu ndáhú ndije ni rō ñayuu ndahú. ⁹ Chi je cájini rō ndese yóhoyo vāha ni Jítóho yō Jesucristo jíin yó. Chi siquĩ jeē ní cundáhú ni yā rohó te ni nasáha ndáhú yá maá yá, vēsú cucá ndasí yá nde andívi núu. Te súcuan ni sáha ya jeē cácuu rō ndíhí jeē ndíso jnúhun ya, siquĩ jeē ní nasáha ndáhú yá maá yá.

¹⁰ Te jeē váha máá rō cúu jeē na cáchi rī ndese jéni ni rī siquĩ jniñu yáha. Vāha ni caquejéé rō nde jendujin, chi nasūu máá-ni jeē ní cajequin rō xūhún, chi suni yóhoyo ni cacusiñ ni rō sáha rō. ¹¹ Núu súcuan te vijna te sínu rō. Te nájnūhun ni cacusiñ ni rō ni caquejéé rō jíin, suni súcuan na cúsiñ ni rō sínu rō, chi cuāha rō núu ndese cánevāha rō. ¹² Chi núu cúsiñ ni yō cuāha yó, te jétáhú yá núu ndese névāha yó, chi tu jíicán yā jeē cuāha yó jēé tu névāha yó.

¹³ Te nasūu jēē cahán rī jeē cáhni ndahú rō máá rō jeē cáa ga nihīn i vēsú jeē ndóo nuū maá rō. ¹⁴ Chi sa suhva jeē ñin cūhva-ni conevāha rō jíin i. Chi cánevāha cuehē rō vijna, te cuu cuāha rō jēē cúmanī nuū i. Yūcuán na te núu ndé ñin quiiví conevāha i, te suni cuu cuāha i te núu ni cumanī nuū rō. Te súcuan te ñin cūh-

va-ni conevāha ró jijnáhan ró, ¹⁵ nájñuhun cáhán tutu i siquĩ ñáyuu jeē ní canastútú maná nde jenahán: Tēe jeē ní nastútú cuéhē, tu ní ndóo ga nuū de. Te tēe jeē ní nastútú jecu-ni, suni tu ní cúmanī nuū de. Achí tutu.

Jñuhun Tito jín úū gā jnáhan de

¹⁶ Te na cútahū rī nuū Yaā Dios jeē ni sáha ya jeē ndíhvī ni Tito jehē rō nájñuhun cándíhvī ni maá rí.

¹⁷ Chi ni jetáhú de jeē ní cacahān rī jín de jeē jeé de nuū rō. Te siquĩ jeē ndíhvī ni de jehē rō, jeē yúcuan cuájeē de, chi súcuan cúu ni maá de.

¹⁸ Te suni cátají rí ñn hermano cuajeē jín Tito nuū rō. Te tāca grupo ñayuu cácañde cájejnúhún i tēe un jéé váha jéjníñu de siquĩ jñuhun jeē jnáma ya yohó. ¹⁹ Te tāca grupo ñayuu cácañde suni ni catee i jniñu siquĩ de jeē cáca de jín rí chindéé ñáhán de quindēca de xūhun jín rí jeē ní cajēhe ñayuu. Te jniñu yáha cásáha ri návāha cahān ñayuu jeē yóhoyo váha Yaā cúu maá Jí-toho yō, chi cuni i ndese yóhoyo cácusī rī rō cásocō rō xūhún. ²⁰ Te quingoo ndíndúú rí návāha ni ñn ñayuu ma tēe i cuēchi siquĩ rī siquĩ xūhun cásocō ñayuu.

²¹ Chi ndúcú rí jeē squícu ndaā rī tācá jniñu, nasūu maá ñn-ni nuū Yaā Dios, chi suni nuū ñáyuu.

²² Te suni cátají rí ñga hermano yō cuajeē de jín ndíndúú tēe yáha. Te tijni jínu ni steén de jeē yóhoyo cúsiñ ni de ndíhvī ni de tācá jniñu. Te vijna chi ndíhvī gā ni de jehē rō, chi cúcáhnú ndasí ni de jeē cásquícu ró. ²³ Te núu cácañhún ñayuu siquĩ Tito, te achi rō jeē cúu de tēe chindéé ñáhán jéjníñu jín rí nuū rō siquĩ jñuhun ya. Te uū gā hermano yō yáha, achi rō jeē cácuu de tēe jeē ní catejníñu ñayuu cácañde, te cáhīyo yíñhún de nuū Cristo. ²⁴ Núu súcuan te stéén rō nuū de jeē cáhīyo manī ndije ró jín de, návāha na cúni tāca grupo ñayuu cácañde. Te súcuan cuni i jeē tu ní cácusī cāhá ni rī siquĩ rō.

Siquĩ jeē cájequin i xūhún cuu tācá hermano

9 Te vijna te tuá jini ñhún tee ri nuū rō siquĩ xūhun jeē cájequin rō cuu tācá hermano cándoho ndáhú. ² Chi je jín rī jeē cánujnahan ni rō cuāha ró. Te jeē yúcuan máni cúsiñ ni rī cahán rī jín ñáyuu Macedonia jeē rohó ñáyuu Acaya, je ni casátūhva ró xūhun ndé jendujin. Te jeē súcuan ni cacusiñ ni maá ró, te jeē yúcuan cuehē ñayuu Macedonia ni cacondíhvī ni i ni cajēhe maá i. ³ Te táj rí ndínuní hermano yáha cuájeē maá de nuū rō xíhna gā, návāha jeē jinú maá rí te ma quéndōo néé rí siquĩ jñuhun ni cahān rī jeē squícu váha ró jín jniñu ún. Chi coo tūhva ndije ró jín xūhun nájñuhun ni cahān rī jín i. ⁴ Chi sanaa te jecoo jecu tēe Macedonia jín rí, te núu cuni de jeē tu cáhīyo tūhva ró, te coo jñuhun canu nuū rī, te suni nuū maá ró jijnáhan ró, chi ni cahān teyí rí jeē cáhīyo tūhva ndije ró. ⁵ Jeē yúcuan ní jeni ni rī jeē cánuú cahān rī jín tāca hermano yáha jecoo de xíhna gā, te sáa te jinū rī, návāha stíhvī ni de rōhó jéé yáchī na cóo tūhva xūhun jéé ní

cacahān rō jeē cuáha ró. Te súcuan te coo tūhva siquĩ jeē váha ni rō, te nasūu jéé safuerza rī rohó.

⁶ Cocuhun ni rō jñuhun yáha, jeē núu jecu-ni cuāha ró te suni jecu-ni nanihīn rō: Chi tēe jeē tíhli-ni táji, suni tíhli-ni nastútú. Te tēe jeē táji cuehē, suni cuehē nastútú. Achí tutu. ⁷ Tācá ñn ñn ró cuāha ró ndésaa ni tee ni rō. Ma cúxī ni rō cuāha ró, chi nasūu fuerza cúu. Chi Yaā Dios manī yā jín ñáyuu jeē cúsiñ ni cuāha. ⁸ Te maá Yaā Dios cuu sáha ya jeē nducuehē ndinuū jeē váha cuu ró jijnáhan ró, návāha níni conevāha ró ndíhi tācá jeē jini ñhún ró, te coo sobra gā jeē cuāha ró jéé cúu tācá jniñu váha. ⁹ Chi súcuan cáhán tutu i siquĩ tāca ñáyuu jéhe:

Ni scáa i ni jēhe i nuū ñáyuu ndahú.

Te tācá jniñu váha sáha i, chi quendōo ñí cáni. Achí tutu. ¹⁰ Te Yaā Dios jéhe ya tata nuū tēe táji, te nihīn de staā jeē cáji de. Te suni súcuan cuāha ya ndinuū jeē váha cuu ró, te sáha ya jeē cáyā te nducuehē jniñu váha cásáha ró. ¹¹ Súcuan cucúcá ró jín táca-ni, návāha cuu cuāha cuehē rō. Te xūhun jéé cuáha ró quíhīn nuū hermano cándoho ndáhú, suu sáha jeē nácuatáhú i nuū Yaā Dios. ¹² Chi xūhun jéé cuáha ró núu i, nasūu maá ñn-ni jeē nihín i jeē cúmanī nuū i, chi suni sáha jeē nácuatáhú ndasí i nuū Yaā Dios. ¹³ Te cahān i jeē yóhoyo váha Yaā cúu Yaā Dios, chi xūhun jéé ní cajēhe ró stéén jeē váha cácañde ró jñuhun Cristo. Te suni sáha jeē cahān i jeē yóhoyo cújéhnú Yaā Dios siquĩ jeē ní cajēhe cuehē rō nuū i jín núu sava ga ñayuu. ¹⁴ Te suni cacān tahú i jehē rō, chi coo manī ndasí i jín ró siquĩ jeē yóhoyo váha ni sáha Yaā Dios jín ró. ¹⁵ Te na cútahū yō nuū Yaā Dios, chi ni jēhe ya Sēhe ya nuū yō, jeē cúu ñn tahú cáhnú ndasí jéé ma cánda cuítī yō castūhún ndíhi yó.

Jeē ndíso jniñu Pablo cúu de apóstol

10 Te ruhū Pablo, cáhán ndahú rí jín ró jijnáhan ró jín modo maá Cristo jeē víta ni yā te váha ni yā. Ruhū, chi cacahān rō jeē iyó suchí ni rī núu ndéé rí jín ró, te núu ndéé jícá rí te tu yúhú cuítī rī cahān nīhin ri jín ró, cacahān rō. ² Núu súcuan te cáhán ndahú rí jín ró jeē núu na jéé rī te ma cahán rō jñuhun jeē sáha jeē cuxeēn rī nuū rō. Chi sava ró cacahān jeē casáha ri jniñu ya siquĩ jeē máni jeē na níhín rī siquĩ ún. Núu súcuan te íyó tūhva ri cuxeēn rī nuū ñáyuu cacahān súcuan. ³ Chi vésú cácuu ri ñayuu cáyúcú ini ñayíví, te tu cájejnáhan ri modo cájejnáhan ñayuu ñayíví. Chi nájñuhun jeē cájejnáhan ri siquĩ tācá jniñu neé. ⁴ Chi nasúu ndajníñu ñayíví jéjníñu ri cájejnáhan ri, chi jín poder Yaā Dios cájejnáhan ri snáa rī tāca fuerza jeē cúu contra siquĩ yā. ⁵ Súcuan cásnáa rī tāca jñuhun ndúxí jín jñuhun téyí jeē nducú casi jeē ma cúni ñayuu ndese Yaā cúu Yaā Dios. Te cájesi ri nuū ndíhi jeē tú váha jeē cájeni ni ñayuu, návāha cuandetū i nuū Cristo. ⁶ Te jeē jínu cuandetū váha maá ró, yúcuán na

te coo tūhva ri cuāha ri castigo nuū tāca gá ñayuu jeē tu cájendetū.

⁷ Máá ró jijnáhan ró máni cájeni ni rō modo ñayuu tu cájecūhun ni. Núu na-ni tēe jéni ni de jeē Cristo ni tejniñu ya de, te na sáha de cuenta jeē suni súcuan ni tejniñu ya ruhū jijnáhan ri. ⁸ Te núu ni cahān teyí rí jíin ró jeē ndíso jniñu ri, te tu cúcanu rī sáha. Chi máá Jítoho yō ni tejniñu ya ruhū jijnáhan ri, návāha sáha ri jeē ije ánuá rō jíin jnúhun ya, nasūu jéē snāā rī. ⁹ Núu súcuan te tu cúni rī jeē cáni ni rō jeē nducú rí síuhú rí rohó jíin carta rī. ¹⁰ Chi cácahān sava ró jéē tāca carta rī yōhyo stíhví ni te níhin ndácu jniñu, te sa suhva núu ndéé rí jíin ró te tu cúndeyí ni rī ndacu níhin ri jniñu, te suni tu cúu cahān vāvihí rí, achí ró. ¹¹ Te ñayuu cácahān súcuan na sáha i cuenta jeē nájnūhun níhin cáhān carta rī jeē íne jíca rí, suni súcuan níhin ndacu ri jniñu nuū rō jeē cóndee rī jíin ró.

¹² Te va ma chúndeyí cuítì ni nde ri jeē sajeñhu ri maá rí, nájnūhun cásáha sava tēe un jéē cájejnúhún nde de máá de. Tāca tēe ún chi cáacunéé de jeē cájeni ni de jeē cujéñhu ga de vésú jnáhan de, te tu cásáha de cuenta ndese cúni Yaā Dios jeē caca de. ¹³ Te ruhū jijnáhan ri, chi cutéyí nde ri maá cúhva-ni jniñu jeē ni jéhe Yaā Dios nuū rī, te ma yáha ga rī. Máá Yaā Dios ni tee cūhva yá ndésaa cúu jeē sáha ri, te máá yá ni jéhe jnūhun jeē ni jíin rī nuū rohó ñayuu ñuu Corinto. ¹⁴ Jeē yúcuan ná ni jinūcoo ri nuū rō jeē xihna ñúhún te nasūu jéē ni yáha ri nuū cúhva jniñu ní jéhe ya nuū rī. Chi xihna gā maá rí ni jinūcoo nuū rō ni canacani ri jnūhun vāha Cristo. ¹⁵ Te tu cácutéyí rí síquī jniñu ní casáha inga tēe, nájnūhun jeē jniñu máá rí cúu. Chi sa suhva cáñuhun ni rī jeē cuehē gā candíje ró, te súcuan te cuu sáha ri cuehē gā jniñu ya mēñhu ró, te níni máá cúhva jeē ni jéhe ya nuū rī. ¹⁶ Yūcuán na te cácuni rī scuité núu ga rī jnūhun jnáma ya yohó núu tāca gá ñuu yúcu ndé yúcuan gá. Te súcuan te ma quívi nduu rī cutéyí rí nuū jeē jé ni canacani inga tēe jnūhun.

¹⁷ Te núu ndé tēe cúni de cutéyí de, na cutéyí de síquī jeē sáha máá Jítoho yō, nasūu síquī jéē sáha máá de. ¹⁸ Chi nasūu tēe jeē jejnúhún máá cúu jeē quéndōo yíñúhún, chi sa suhva tēe jeē jejnúhún máá yá.

Jeē cahán Pablo síquī tēe cánacani jnūhun stáhú

11 Cone cáhnu ni rō jijnáhan ró jeē cahán rī jecu jnūhun modo nájnūhun cácahān ñayuu canéé. Núu súcuan te cáhnu coo ni rō víi. ² Chi cúcuíñí rí jehē rō jijnáhan ró, nájnūhun cúcuíñí Yaā Dios. Chi cácuu rō nájnūhun ñn sūchi síhí íyó ndoo, te ni sáha ri jeē quijnáhan ró jíin Cristo, nájnūhun quijnáhan ñn sūchi síhí jíin máñúhún-ni yñ i. ³ Te yúhú rí sanaa te cuāha ro jnúhun stáhú táca tēe un rōhó, te siáá rō jnūhun jeē chiñúhún ndáá rō Cristo nde jíin ini jíin ánuá rō. Chi suni súcuan ni sáha Satanás jíin Eva, chi ni quívi ini ñn coō, te ni stáhú un ña jíin jnúhun ndíchí stáhú. ⁴ Chi núu quíjicoo tēe nuū rō jeē tu cánacani ndaā de

jnūhun Jesús nájnūhun ni canacani ri nuū rō, te va yōhyo vāha cájetáhú nde ró de. Te suni súcuan vāha cájetáhú nde ró núu inga espíritu jíin núu inga jnūhun jeē tu quijnáhan jíin Espíritu jíin jnúhun jeē ní cacandíje ró jéē jnáma ya rohó. ⁵ Te tāca tēe cácañíje ró un jéē cácahān jeē apóstol cujéñhu ga cácuu, tú cuítì jeē cujéñhu ga nde de nuū rī. ⁶ Chi vésu tu níhín vāha nde ri modo cahān rī, te jécūhun vāha ni rī. Chi jíin ndíhi jniñu ni casáha ri mēñhu ró ni castéén cají rí nuū rō jeē súcuan cúu.

⁷ Tu ní jíicán rī xūhun núu rō síquī jeē ní nacani ri jnūhun jnáma ya yohó. Te súcuan ni cotecu ndahú rí návāha quendōo vāha ga maá ró jíin jnúhun ya. ¿Te va cuēchi ni sáha ri jeē ni sáha ri súcuan, chí naún? ⁸ Chi sava ga grupo ñayuu cácañíje ni quihin ri xūhun jéē ní cajéhe i nuū rī, návāha súcuan-ni nacani ri jnūhun ya nuū rō jijnáhan ró. ⁹ Te ná ni condee rī jíin ró te ni ndíhi xūhun rí, te tu ní jíicán cuítì rī nuū ní ñn ró. Chi hermano jeē ní quíjicoo ichi Macedonia ni cajéhe de nuū rī jeē cúmaní. Te jeē súcuan tu ní stáhān rī rohó, te ni ma sáha cuítì rī. ¹⁰ Te nájnūhun cúcáñhu vāha ni rī jeē jíin rī jnūhun ndaā Cristo, suni súcuan jíin rī jeē ma quíhin ri xūhún nuū ni ñn ñayuu ñé ndáñúú Acaya, návāha ma cási i jeē cúsiñi rī jeē súcuan-ni nacani ri jnūhun ya. ¹¹ ¿Te á síquī jeē tú maní rī jíin ró cúu jeē cahán rī súcuan, jéni ni rō, chí naún? Tuú chi máá Yaā Dios jíin yā jeē maní rī jíin ró jijnáhan ró.

¹² Te sáha ri ná-ni sáha ri, chi ma quíhin ri xūhun ró, návāha casi rī nuū jeē casátéyí tēe un máá de jeē cácahān de jeē ñnuú cásáha de jniñu ya jíin rí. ¹³ Te tēe ún chi nasūú apóstol ndaā cácuu de, chi máni máá jnúhun stáhú cácahān de, te cásáha de máá de jeē cácuu de apóstol Cristo. ¹⁴ Te tu nāā ni yō jíto yó jéē casáha de súcuan, chi je jíin yō jeē suni Satanás násama máá te stáhú jéē sáha máá nájnūhun ñn ndajéhé Yaā Dios jeē jíca jíin luz yā. ¹⁵ Te jeē yúcuan suni tu nāā ni yō jíto yó jéē tēe cájejniñu nuū Satanás, cásáha de máá de jeē tēe ndaā cácuu de. Te ñn quívi te naniñin de síquī jniñu néé cásáha de.

Jnūndóho ni ndoho Pablo síquī jeē cúu de apóstol

¹⁶ Inga jínu cáhān rī jíin ró jeē ni ñn ró ma cáni ni rō jeē tēe cánéé cúu ri. Te núu súcuan cájeni ni rō, te va cuatáhú nde ró jéē cahán rī nájnūhun tēe cánéé, návāha suni cuu cutéyí nde ri jecu nájnūhun cásáha tēe ún. ¹⁷ Jeē cahán rī vijna chi nasūu jéē ní ndacu máá Jítoho yō cúu, chi sa nájnūhun tēe cánéé cáhān rī jeē cutéyí nde ri. ¹⁸ Chi cuehē de casátéyí de máá de modo jeē iyó ini ñayíví, te suni súcuan na sátéyí nde ri maá rí núu súcuan. ¹⁹ Te va tēe cáhīyo cájí xíní cácuu nde ró, te jeē yúcuan cúu vāha ni nde ró cuatáhú ró ñn tēe cánéé núu súcuan. ²⁰ Chi va vāha-ni cájendeyí ni rō nuū tēe un jéē casáfuerza de rōhó cuajniñu ró núu de, chí cásáha de jeē ndundáhú ró, chí cáquende de ndajniñu ró, chí cásájéñhu de máá de nuū rō, chí ndé cá-

catu de nuū rō. ²¹ Te vēsú cúcanu nde ri cahān rī, te na cáhān rī jeē tu ní cúnđeyí ni nde ri satéyí rí maá rí nájñuhun casáha tēe ún.

Te vijna te núu íyó sava tēe chúnđeyí ni de sátéyí de máá de, te va suni chundeyí ni nde máá rí núu súcuan. Te va cáhān rī nájñuhun cáhān ñn tēe cánée. ²² Núu cá-cutéyí de jeē tēe hebreo cácuu de, te suni súcuan ruhū. Núu tēe Israel cácuu de, te suni ruhū. Núu yucūn Abraham cácuu de, te suni ruhū. ²³ Núu tēe cá-jejniñu nuū jnúhun Cristo cácuu de, te víhyá gā ruhū. Te va cáhān rī nájñuhun tēe cánée jēe cutéyí rí súcuan. Chi ni caa ga ni sájñiñu ri vēsú maá de jijnáhan de, te ni caa ga ni cacani i ruhū, te cuehē gā jínu ni ine ri vecāa, te suni cuehē gā jínu ni cacuni ñayuu cahni i ruhū. ²⁴ Te jnáhan ri hebreo, uhūn jínu ni cacani xeēn de ruhū jíin cuarta ññ, ñn cūhva jeē jé yajni cuu rī sáha. ²⁵ Unī jínu ni cacani de ruhū jíin yujnu xíi, te ñn jínu ni cajēhe de yuū xinī rī. Unī jínu ni quēe barco jeē ní jica ri siquī jnúhun ya. Te ñn jecuáa jíin ñn ndiáca ni yosō candá rí nuū cunú ndute mar. ²⁶ Cuehē jínu ni ndoho ri ni jica ri ichi, te ni cācu ri nuū táca yúte, te ni cācu ri nuū táca ñácuñhá. Ni cācu ri nuū ñáyuu nación rī jíin núu ñáyuu ñuu jícá. Ni cācu ri cháha chúcuan ná ni ñyo ri ñuu jíin rancho jíin mar. Ni cācu ri nuū táca jnáhan ri jeē tu íyó ndáa. ²⁷ Ni sájñiñu ññin ri te yíí ní ndoho ri. Cuehē jínu ni jehni rī maá rí máhna. Ni jíi rī sōco, ni jichī rī ndute. Cuehē jínu ni ñyo ndite ni rī, ni cuijnu rī, ni cumanī sahna ri

²⁸ Te siquī táca jēe yáha chi íyó gá. Chi ndiquivī ndóho ri jeē nácani ndasí ni rī jehē táca grupo ñayuu cácanđije. ²⁹ Núu ñn ñayuu tu fuerza ini i, te suni ndóho ri jehē i. Te núu ñn ñayuu quivī i cuēchi sáha jnáhan i, te ndóho ri jnúhun cúcanu jíin jnúhun náxeēn ni. ³⁰ Núu súcuan te núu cánuú cutéyí nde ri, te va cutéyí rí siquī táca jēe steén jeē tú na fuerza ini rī. ³¹ Te Yaā Dios, Yaā cúu Tátá maá Jítóho yō Jesucristo, jíin yā jeē cahān ndaā rī. Te ññ cáni na cáhān ñayuu jeē vāha ndasí Yaā cúu ya. ³² Ná ni ñyo ri ñuu Damasco, te gobernador jeē ndácu jniñu ndañū jeē jññ rey Aretas, ni jeni de soldado ni cacondito táca yéhyí jeē ní condū ndihyú ñuu ún, chi jññ de ruhū quihñ rī vecāa ni cuni de núu. ³³ Te ni quivī ri chíi ñn jica, te ñayuu cácanđije ni cascúun i ruhū ventana ñn vehe jeē néne jicā jeē ndihyú ñuu ún. Te súcuan ni cācu ri nuū tēe ún.

Jeē ní jito ndijin Pablo jeē ni stúu ya nuū de

12 Te tu níhín jniñu jeē cutéyí rí. Te vāha ga na cástuhun rí nuū rō siquī jeē ní jito ri jeē ni stúu maá Jítóho yō nuū rī te ni steén ndijin yā nuū rī. ² Jíin rī ñn tēe cándije Cristo, te je ni cuu uxī cuūn cuiyā jeē ní sáha ya jeē ní caa tēe un ní jehēn de nde andiví únī. Te tu jíin rī núu ni jehēn rī jíin yiqui cúñu rī, chí ní jehēn anuá-ni ri. Máa Yaā Dios cúu jeē jíin. ³ Te jíin rī jeē ní ndonehen ya ruhū. Te á ní jehēn rī jíin yiqui cúñu rī, chí ní ndōo, tu jíin rī, chi máa-ni Yaā Dios cúu jeē jíin. ⁴ Chi

ni sáha ya jeē ní caa ri ni jehēn rī nde jardín andiví. Te yūcuan ní jini sōho ri táca jnúhun sáhi ndasí jēe ma cúu castuhun yóhó ñáyuu. ⁵ Te siquī jeē ni sáha ya súcuan jíin rí cúu jeē cutéyí rí, te ma cutéyí rí siquī ndese cúu máa rí. Chi cutéyí rí máni jeē tú na fuerza ini rī. ⁶ Te núu cúní rī cutéyí rí siquī maá rí nuú, te nasūu jēe canée rí núu sáha ri súcuan núu, chi ndaā cúu jeē íyó jeē cutéyí rí. Te ni ma sáha ri, chi tu cúní rī jeē cani ni ñayuu jeē cujēhnu ga rī vēsú jeē ní jito i chí jēe ní jini i jnúhun ri.

⁷ Te tu cúní yā jeē yáha ri cutéyí rí siquī jeē ni steén ndijin yā jniñu jēhnu ndasí un núu rī, te jeē yūcuan ni quiji ñn jnúndóho jeē ndiquín ruhū te stóho ruhū. Te ñn jeē ni jéhe ya jnúhun ni tají Satanás cúu, ñn jeē stóho ruhū, návāha ma yáha ri cutéyí rí. ⁸ Te unī jíin ni cahān ndahú rí jíin máa Jítóho yō jeē na téjiyo ya quihñ. ⁹ Te ni cahān yā jíin rí: Tuú chi tu cúmanī jeē cundáhú ni rī rohó. Chi ñayuu jeē tú na fuerza ini, sáha ri jeē nducuehē gā fuerza maá rí ini i, ni achi yā. Núu súcuan te cúsiñ ni rī jeē tú na fuerza ini rī, chí súcuan te nducuehē gā fuerza Cristo ini rī. ¹⁰ Jeē yūcuan cúu jeē cúsiñ ni rī jeē tú na fuerza rī, jíin jēe cácahān ndevāha ñayuu jíin rí, jíin jēe cúmanī nuū rī, jíin jēe cájito xeēn i ruhū, jíin jēe ndóho ri jnúndóho siquī Cristo. Chi jeē tú na fuerza maá rí, yūcuan sáha jeē nihín rī fuerza maá yā.

Jeē nácani ni Pablo siquī ñayuu cácanđije ñuu Corinto

¹¹ Te va tēe cánée cúu ri jeē ni sátéyí nde ri maá rí. Te siquī jeē tu cácanđije ró rúhū, jeē yūcuan ní satéyí rí maá rí. Chi cánuú jēe máa ró cuajnúhún ró ruhū nuú. Chi vēsú tú jniñu ri jeē maá rí, te va tu núu cuiñi nde ri nuū táca tēe un jēe cácahān rō jeē apóstol cujēhnu cácuu de. ¹² Chi mēhñu ró ní sáha ri táca jniñu jeē steén jeē cúu ndije ri apóstol. Chi jíin cuēhē paciencia ni sáha ri táca jniñu jēhnu jeē steén poder Yaā Dios, jíin táca jniñu jeē nahán ní canaa ni rō ni cajito ró. ¹³ Te tu ní sáha ri jeē núu ga cácuu ró núu táca gá grupo ñayuu cácanđije, chí máa ñn-ni jeē tu ní stáhān rī rohó jēe cuáha ro jēe jíin níhún rí. Cone cáhnu ni rō núu súcuan ni sáha nde ri falta nuū rō víi.

¹⁴ Te vijna je íyó túhva ri jecondēhe rí rohó vuelta unī. Te suni tú na vé cacán rī nuū rō, chí nasūú ndajniñu ró cúu jeē cuní rī, chí sa suhva jeē quendōo vāha ró jíin jnúhun ya. Chi nájñuhun sēhe ri cácuu ró, te sēhe chí tu cánuú caya i jeē cúu tátá i, chí sa tátá cánuú cuāha de jeē quendōo vāha sēhe de. ¹⁵ Jeē yūcuan cúsiñ ni rī stáñi ri jeē névāha ri, te nde stáñi ri fuerza maá rí, návāha sáha ri jeē quendōo vāha ánuá rō jijnáhan ró. Te manī gā coo ri jíin ró, vēsú sanaa te jecu-ni cáñyo manī rō jíin rí.

¹⁶ Te íyó jecu rō cácahān jeē vēsú tú na vé ni jícán rī nuū rō, te tēe stáhú cúu ri, chí ni nducú rí modo ndichí nihín rī xūhun ró, cácahān rō. ¹⁷ ¿A táca tēe ní tají rí nuū rō, á ñn máa de ni stahú de rōhó jēe nihín de

xūhun ró cuu máá rí, chí naún? Tú cuiṭi. ¹⁸ Ni cahān ndahú rí jíin Tito jeē jécondēhé de rōhó, te ni tají rí ñn hermano ni jeē jíin de. ¿Te chí ní stahú Tito rohó ní quihin de xūhun núū rō jeē cuu máá de, chí naún? Tuú chi inuú-ni cásáha ndindúú rí, te ñn-ni ánuá ndindúú rí.

¹⁹ ¿Sanaa te cájeni ni rō jeē cahán rí jnūhun yáha návāha quendōo vāha ri jíin ró, chí naún? Nasūu súcuan cúu, chi Yaā Dios jiní yā jeē cahán rí maá-ni jnūhun jeē cuní Cristo. Te ndihí jeē cahán rí chi ndúcú rí jeē ije ró jíin jnūhun ya, ñánī mánī. ²⁰ Chi yúhú rí jeē núu na jéé rí, te sanaa te cuni rí jeē tu cásáha ró jniñu nújnahan ni rí. Te máá ró jijnáhan ró, suni ma nújnahan ni rō ruhū. Chi sanaa te cátejnahán ró, cácu-cuésún ni rō, cáquiṭi ni rō, cásándúxí ró, cásájnúhún ró, cácahān rō siquṭi jnáhan ró, cácutéyí ró, cájica néé ró. ²¹ Te yúhú rí jeē núu na jéé tucu ri te cuāha Yaā Dios jnūhun canu nuū rí jeē súcuan cásáha ró. Te sanaa te cucuíhyá ni rí núu íyó cuéhē rō jeē ní casáha cuēchi ichi yátá, te tu nácani ni rō stóo ró jniñu jnéhén jniñu jíca jnéni jíin jniñu néé ndasí ní casáha ró.

Saludo jíin jnūhun cástūhun Pablo jeē sándihí

13 Yāha cúu vuelta unī jeē jécondēhe rí rohó. Te sándaā yō jniñu nájnūhun cáhán tutu: Jíin jnūhun jeē cahán uū chí únī testigo te cundaā tācá jniñu, áchí. ² Te vijna jeē íne jícá rí te cáhán tucu ri nájnūhun ni cahān rí ná ni ine ri jíin ró. Cáhán rí nuū ñáyuu ni casáha cuēchi un jíin núū ndihí ró, jeē núu na jéé tucu ri te ma cóo vītá ni rí jíin ró. ³ Te yūcuán cuu prueba jeē cánducú ró, suu núu jendaá jeē cahán rí jíin fuerza Cristo. Chi Cristo tu cúmanī fuerza yā jeē sándaā yā jíin ró, chi stéén yā poder yā mēhñu ró. ⁴ Te vēsú tu ní stéén yā fuerza yā ná ni jihī yā jicā cruz, te

vijna chi técu yā jíin poder Yaā Dios. Te nájnūhun ni ndoho máá yá, suni súcuan cándoho ri vijna jeē tu fuerza rí. Te vēsú súcuan te jíin poder Yaā Dios cátecu rí jíin yá jeē cuajniñu ri nuū rō jeē siquṭi jnūhun ya.

⁵ Coto ndee rō maá ró núu cáhīin nīhin ró jíin jnūhun cácandíje ró yá. Sáha vāha ro cuenta. ¿Te á tu cájini rō jeē ndeé Jesucristo ini anuá rō, te núu ndaā jeē ní cācandíje ndije ró? ⁶ Te ñúhun ni rí jeē suni cáccáhnu ni rō jeē máá rí cácandíje ndije ri. ⁷ Te cájicān tahú rí nuū Yaā Dios jeē ma sáha ró ni ñn jniñu néé. Te vēsú núu cuajnúhún ró jeē váha ndácu ri jniñu nuū rō, chí vēsú núu ma cuajnúhún ró, te tú na vé sáha, chi máni jeē na sáha ró jniñu ndaā cúu jeē cánducú rí. ⁸ Chi tu jésí ri nuū jniñu ndaā, chi sa suhva scáca ri. ⁹ Núu súcuan te cácusī ni rí núu tú na fuerza maá rí, te núu íyó fuerza maá ró. Te níni cácān tahú rí jeē na íje ga ni rō jijnáhan ró jíin jnūhun ya. ¹⁰ Te téé ri carta yáha nuū rō nde ná tu jeē rí, návāha núu na jéé rí te tuá jini ñúhún cuxeēn rí nuū rō. Chi ni jēhe Jitoho yō jniñu ndíso ri yāha jéé sáha ri jeē íje ánuá rō jíin jnūhun ya, nasūu jéé snáā rí.

¹¹ Je ni cahān yō núu súcuan hermano, te na cóo jeē váha jíin ró jijnáhan ró. Te na cóndihvṭi ni rō ije ró jíin jnūhun ya, te coo ndeyí ni rō. Te na cóo inuú ni rō te coyūcu mánī rō jíin jnáhan ró. Te Yaā ndíso jnūhun ndeyí sīi ni jíin jnūhun cúndáhú ni, coo ya jíin ró jijnáhan ró. ¹² Te jeē cahán rō jíin táca jnáhan ró, te yíñúhún techūhu ró ndaha i. ¹³ Sándeyí ni rō jijnáhan ró, áchí hermano cácandíje jeē cáyūcu yáha.

¹⁴ Te ñúhun ni rí jeē Jitoho yō Jesucristo na sáha ga yā jeē váha rōhó jijnáhan ró, te Yaā Dios cundáhú ni yā rohó, te Espíritu Santo condee cáhnu ya jíin ró. Súcuan na cóo. Amén.

GÁLATAS

1 Máá rí cúu Pablo apóstol. Te nasūu ñáyuu ni jeni ruhū ni nasūu ñáyuu ni tájí ruhū jeē nácani ri jnūhun, chi sa suhva máá Jesucristo jíin Tátá yō Yaā Dios, Yaā ní nastécu Jesús mēhñu ndíyí. **2** Te ruhū jíin táca hermano cáyūcu jíin rí yāhá, cátee ri carta yáha cuájeē nuū rohó ñáyuu cávandíje níí región Galacia. **3** Te cáñuhun ni rí jeē Tátá yō Yaā Dios jíin Jítóho yō Jesucristo, na sáha ga yā jeē váha rōhó, te sáha ya jeē coo ndeyí coo síí ni rō. **4** Chi Jesús ni socō yā maá yá jeē ni jíhí yā jeē siquí cuéchi yó, návāha jnama ya yohó núú táca jéē neé íyó ñayívi yáha, chi súcuan ni nujnahān ni maá Tátá yō Yaā Dios. **5** Jeē yúcuan na cáhán yō jeē yóhoyo luu cújéhnu ya níí cáni. Súcuan na cóo. Amén.

Siquí jeē tuá na inga jnūhun cácu ñayuu

6 Te náhán náā ni rí jító ri jeē yóhoyo yachí cánducú ró stóo ró Yaā Dios, Yaā ní cana rōhó jéē quívi ró ndaha ya siquí jeē cundáhú ni Cristo yohó. Chi ni candiquín rō inga jnūhun jeē síin cáhán. **7** Te tú cuítí na inga jnūhun jnama yóhó íyó. Te cáhíyo jecu ñayuu castáhān i rōhó, te cácuni i nasama i jnūhun ndese jnáma Cristo yohó. **8** Te núu ñn ñayuu nacani inga jnūhun nuū rō ndese jnáma ya rohó, te núu tu quíjnáhan jíin jnúhun ni canacani ri nuū rō xíhna gā, na jnáhnú ndetū ñayuu ún. Te vésú máá rí chí ñn ndajéhé jeē quíji nde andívi nacani inga jnūhun núú, na jnáhnú ndetū. **9** Je ni cahān rí jíin ró, te suni súcuan cáhán tucu ri vijna: Na-ni tēe nacani inga jnūhun nuū rō, te núu tu quíjnáhan jíin jnúhun jeē ní cajetáhú ró, na jnáhnú ndetū tēe ún.

10 Te jeē cahān rí súcuan, ¿á ndúcú rí jeē cuajnúhún ñáyuu ruhū, chí Yaā Dios? ¿Chí ndúcú rí jeē cúsií ni ñayuu jíin rí, cájeni ni rō? Núu ndúcú gá rí jeē cúsií ni ñayuu jíin rí, te nasūu mozo Cristo cúu ri núu súcuan.

Ndese ni jinū Pablo cúu de apóstol

11 Te cástūhun rí nuū rō, hermano jijnáhan ró, jéē jnúhun jnáma ya yohó jéē nácani ri, nasūu jéē ní jeni ni maá rí jíin ñáyuu cúu. **12** Chi nasūu ñáyuu ni stéén nuū rí, ni nasūu ñáyuu ni sáha jeē ní cutūhva ri, chi sa suhva máá Jesucristo ni steén nuū rí.

13 Chi je ni cajini jnūhun ró ndese ni sáha ri nde saá, ná ni chíñúhún rí sahān jnáhan ri ñayuu hebreo. Te cájini rō jeē yóhoyo ni jito xeēn rí ñayuu cávandíje nuū Yaā Dios, te ni condíhvī ni rí snāā rí i núú. **14** Te váha ga ni cutūhva ri sahān ún vésú cuehē gā tēe nación rí jeē

ni cajehnu jíin rí, chi ni condíhvī gā ni rí siquí táca jéē ní cajequin jíin rí. **15** Te vésú súcuan te Yaā Dios je ni nacāji ya ruhū nde ná tu cacu ri, te ñn quívi te ni cusíí ni yā ni cana ya ruhū jeē quívi ri ndaha ya, siquí jeē yóhoyo ni cundáhú ni yā ruhū. **16** Te ni steén yā Sēhe ya nuū rí, návāha nacani ri jnūhun ndese jnáma ya ñayuu táca nación jeē tu jíin jnūhun ya. Yūcuán na te tu ní cájnūhun rí ni ñn ñayuu, **17** ni tu ní jéhén rí ñuu Jerusalén nuū tēe cácuu apóstol xíhna gā vésú ruhū. Chi sa suhva ni jehēn-ni ri nde región Arabia, te saá te ni nuhūn tucu ri ñuu Damasco.

18 Yūcuán na te nde ni yāha unī cuiyā, te ni jehēn rí Jerusalén. Te ni jini jnáhan ri jíin Pedro, te ni condee rí jíin de xahūn-ni quívi. **19** Te tu ní jító ri nuū táca gá apóstol, chi máá ñn-ni nuū Jacobo ñani maá Jítóho yō. **20** Jnūhun yáha jéē tēe ri cuajeē nuū rō, chi jíin Yaā Dios jeē ndaā cúu.

21 Yūcuán na te ni jehēn rí níí región Siria jíin Cilicia. **22** Te ñayuu cávandíje jeē yíhi ndaha Cristo, jeē cáyúcú región Judea, ná tu coto cuítí i nuū rí saá. **23** Chi máni jnūhun-ni ni cajini i cácahān ñayuu: Tēe ni jito xeēn yohó nde saá, vijna chi nácani de jnūhun cándíje yó jéē ní nducú de snāā de nde saá, áchí i. **24** Te ni cacahān i jeē yóhoyo cújéhnu Yaā Dios jeē súcuan ni sáha ya jíin rí.

Jeē ní cajetáhú táca gá apóstol un Pablo

2 Yūcuán na te nde nuū uxí cuñ cuiyā, te ni jehēn tucu ri Jerusalén jíin Bernabé, te suni ni jeca ri Tito ni jehēn de jíin rí. **2** Te ni jehēn rí chí máá Yaā Dios ni steén yā jeē jíin níñhún quíhín rí. Te ni candutútú síin nene tēe cácujeñnu nuū ñáyuu cávandíje ún. Te ni castūhun rí nuū de siquí jnúhun jnáma ya yohó jéē nácani ri nuū ñáyuu táca nación tu jíin jnūhun ya. Te súcuan ni sáha ri návāha cuajnúhún de jniñu ri, te ma quéndōo cáhá jniñu sáha ri jíin jéē ni sáha ri. **3** Te ni tu ní cásáha fuerza de Tito, tēe ni jica jíin rí, jeē cóndee jnunī circuncidar de, vésú nasūu tēe hebreo cúu de. **4** Te súcuan ni cundaā, vésú ni quívicoo jecu tēe stáhú jéē sáha de jeē hermano cácuu de. Te tēe un ní quívicoo de návāha yuhu-ni coto de ndese ni ndulibre yō nuū ley circuncidar siquí jeē yíhi yó ndaha Cristo Jesús. Chi cácuni de jeē squícu tucu yó ley un, nduu tucu yó mozo nuū ley un. **5** Te tu ní cájetáhú cuítí rí nuū tēe ún, chí cúní rí jeē quéndōo níhin ró jíjnáhan ró jíin jnúhun jnáma ya yohó.

⁶ Te máá tée cácujuhnu nuū ñáyuu cá candíje ún, tuá na inga jniñu jée ní cándacu de nuū rī. Te máá rí chi tu ní chíhi ri cuenta siquī jeē cácujuhnu de, chi suni Yaā Dios tu sáha ya cuenta, chi inuú-ni cúu ndivii tēe nuū yā. ⁷ Chi sa suhva ni cajini de jeē jnūhun jnáma ya yohó, ndiso jniñu ri nacani ri nuū ñáyuu tācá nación jeē tu casáha circuncidar, nájnūhun nácani Pedro jnūhun un núu ñáyuu hebreo jeē casáha circuncidar. ⁸ Chi Yaā Dios jeē ní tají Pedro jeē nácani de jnūhun nuū ñáyuu hebreo, suni máá yá ni tají rúhū jeē nácani ri jnūhun nuū ñáyuu tācá nación tu jíní jnūhun ya. ⁹ Jeē yúcuan, Jacobo jíin Pedro jíin Juan, ni cajini de jeē Yaā Dios ni jēhe ya jniñu luu yáha nuū rī. Te tēe un cácahān ñáyuu cá candíje jeē maá de cácujuhnu ga. Te ni cajini de ndaha ri jíin ndaha Bernabé, jeē ní castéen de jeē cáhiyo manī de jíin rí, jíin jée ní cacundaā ni de jeē maá rí quingōo nacani jnūhun nuū ñáyuu tāca gá nación, te máá de jíjnáhan de nuū ñáyuu hebreo. ¹⁰ Te máá ñn-ni jeē ní cajicān de cúu jeē cónahán rí chindée ñáhán rí ñáyuu cándoho ndáhú, te jniñu ún je ni condihvī ni rī ni sáha ri.

Jeē ni cáhān Pablo nuū Pedro

¹¹ Te ná ni quiji Pedro ñuu Antioquía, te ni cahān cají rí nuū de, chi ni stívi de jniñu. ¹² Chi nde ná tu quecoo sava jnáhan de hebreo jeē ní tají Jacobo, te yéji de staā jíin ñáyuu jeē násūú hebreo cácuu. Yūcuán na te nuū ní quecoo tēe ún, te ni cusīn de jeē tuá yéji de jíin i, chi yúhú de jeē cúni tāca tēe un jée tuá squícu de ley jnáhan de hebreo. Chi áchí ley jeē ma cúu caji de staā jíin ñáyuu jeē tu casáha circuncidar. ¹³ Te sava ga tēe hebreo jeē cá candíje, suni ni cacujiyo de nuū i, nájnūhun ni sáha Pedro, chi cáyūhú de jeē cúni tēe ún. Te nde máá Bernabé ni cascáhán de ni cujiyo. ¹⁴ Yūcuán na te ni jini rī jeē ní canayūhú de caji de staā jíin ñáyuu ún, cúu jeē tuá jíca de jíin modo jeē cahán jnūhun jnáma ya yohó. Te ni cahān rī nuū Pedro, jíto jíinúú tācá de: Róhó jée cúu tēe nación yō hebreo, tuá squícu ró ley jnáhan yó hebreo, chi yéji rō jíin ñáyuu ún. ¿Te najehē safuerza rō i jeē squícu i ley jnáhan yó hebreo núu súcuan? ni achi rī.

Ñn-ni modo jnáma ya ñáyuu hebreo jíin táca gá nación

¹⁵ Te yóhó chi cúu yó ñáyuu hebreo, te cácahān yō jeē násūu ñáyuu tāca gá nación casáha cuēchi cácuu yó. ¹⁶ Te vēsú súcuan te jíní yō jeē ní ñn yó tu quéndōo ndaā yō nuū Yaā Dios jeē squícu yó jniñu ndácu ley Moisés jenahán, chi máá jée candíje yó jeē Jesucristo ndahva yā cuēchi yó. Jeē yúcuan suni máá yó ni candíje yó Jesucristo, návāha ndahva yā cuēchi yó síquī jeē candíje yó, nasūu jíin jée nducú yó squícu yó ley un. Chi áchí tutu īi: Ni ñn ñáyuu ma quéndōo ndaā i nuū Yaā Dios jíin jée nducú i squícu i jniñu jeē ndácu ley, achí.

¹⁷ Te máá yó ñáyuu hebreo, núu cúni yō jeē ndahva Yaā Dios cuēchi yó síquī jeē ni jíhī Cristo jehē yō, suu cúu jeē jécūhun ni yō jeē suni ñáyuu casáha cuēchi cúu yó, nájnūhun tāca gá ñáyuu. Núu súcuan ¿te á cuēchi ni sáha yó jeē ni stóo yó ley jenahán ná ni candíje yó Cristo? Tú cuiti jeē súcuan. ¹⁸ Chi sa núu naquihin tucu yó ley jeē ni stóo yó un, te súcuan tēe yó cuēchi síquī maá yó. ¹⁹ Chi ruhū, nájnūhun ni jíhī rī ni sáha ley un, te jeē yúcuan má cúu ga ndacu jniñu nuū rī. Te súcuan te cuu cotecu rī jeē sáha ri jeē cuní Yaā Dios. ²⁰ Chi nájnūhun je ni jíhī rī jíicā cruz jíin Cristo, te vijna chi tuá técu rī jeē maá rí, chi máá Cristo cúu jeē técu ini rī. Te jeē técu rī ini ñayīvi yáha vijna cúu jeē candíje ri jeē Sēhe Yaā Dios chindée ñáhán yá ruhū. Chi ni cundáhú ni yā ruhū te ni socō yā maá yá jehē rī. ²¹ Núu súcuan te tu cúni rī casi rī nuū jnūhun jeē ndáhva Yaā Dios cuēchi yó síquī jeē yóhoy vāha ni yā jíin yó. Chi núu jeē quéndōo ndaā yō nuū yā jeē nducú yó squícu yó ley jenahán, yūcuán na te tu ndé jéjníñu jeē ni jíhī Cristo nuū.

Jnūhun ley jíin jnūhun cándíje

3 Róhó hermano ñuu Galacia, ¿naun tu cájecūhun ni rō? ¿Ndé tēe ni saca núu xinī rō jeē tuá cájetáhú ró jnūhun ndaā? Chi ná ni canacani ri jnūhun ya nuū rō, te cájí ndasí ni cajecūhun ni rō jeē ni jíhī Jesucristo jíicā cruz jehē rō. ² ñn-ni jnūhun yáha cájnūhun rí rohó: ¿Ndese ni canihīn rō Espíritu Santo? ¿A jée ní cacundeyí ró squícu ró jniñu ndácu ley Moisés? Tú cuiti, chi jeē ní cacandíje ró jnūhun jnáma ya rohó jée ní cajini sōho ró. ³ ¿Ndese cúu jeē tu cájecūhun cuiti ni rō? Chi xīhna gā ni cacandíje ró jée ni jíhī Cristo jeē jnama ya rohó, te ni canihīn rō Espíritu. Te vijna ¿á cájeni ni rō jeē stóo ró jnūhun ún te fuerza maá ró squícu ró ley un, te cácu ró naún? ⁴ Núu súcuan te tu ndé ní jéjníñu cuiti jeē ní castóho ñáyuu rohó síquī jnūhun jnáma Cristo rohó, chi vijna cánducú ró squéndōo ró jnūhun ún. Nacā jeē vāha te núu jeē tu ní castóo ró, chi sa cá-candíje ndije ró yá. ⁵ ¿Te na síquī cúu jeē jéhe Yaā Dios Espíritu yā nuū rō te sáha ya jniñu jéhnu mēhñu ró? Tu sáha ya síquī jeē cánducú ró squícu ró ley un, chi síquī jeē ní cacandíje ró jnūhun jnáma ya rohó jée ní cajini sōho ró.

⁶ Abraham ni candíje de jeē sáha Yaā Dios jeē ni jéjnūhun ya, te jeē yúcuan ní ndahva yā cuēchi de. ⁷ Núu súcuan te na jécūhun ni rō jíjnáhan ró jée ñáyuu cá candíje jeē sáha Yaā Dios jehē i, ndívi i yucūn Abraham síquī jeē súcuan cá candíje i. ⁸ Chi nde jenahán je cáhán tutu īi jeē ñáyuu tācá nación tu jíní jnūhun Yaā Dios, ndahva yā cuēchi i núu candíje i ún. Te nde ná tu cuu tāca jée yáha te je ni jejnūhun ya jnūhun vāha yáha nuū Abraham: Jeē rohó cúu jeē quéndōo ndetū ñáyuu tācá nación. ⁹ Núu súcuan te ñáyuu cá candíje, quéndōo ndetū i jíin Abraham, tēe ni candíje jeē ni jéjnūhun ya.

¹⁰ Te sa jnahnū ndetū ñayuu jeē cánducú i quendōo ndaā i jeē jíin ley Moisés. Chi súcuan yósó núū tútu iī: Jnahnū ndetū tāca ñáyuu jeē tu squícu ndihī cuitī jnūhun yósó núū tútu ley, achí. ¹¹ Núu súcuan te cájí cúu jeē ni ñn ñayuu ma quéndōo ndaā i nuū Yaā Dios siquī jeē nducú i squícu i ley un. Chi cáhán tutu: Ñayuu jeē ní ndahva yā cuēchi i, técu i jeē candíje i jeē sáha ya jehē i, achí. ¹² Te ley Moisés tu cáhán jeē cótecu yō ní cáni siquī jeē candíje yó, chi sa suhva cáhán: Núu ndé ñáyuu squícu jniñu yáha, te cotecu i sáha, achí.

¹³ Te Cristo ni jnama ya yohó núū jnúhun cáhán ley jeē jnahnū ndetū yō siquī cuēchi yó, chi máá yá ni ndo-ho siquī jnúhun jeē jnahnū ndetū yō. Chi yósó núū tu-tu iī: Tāca ñáyuu condita caa jicā yújnu, jnahnū ndetū i, achí. ¹⁴ Te Cristo Jesús ni jihī yā jicā yújnu cruz návāha quendōo ndetū ñayuu tācá nación sáha ya. Chi jnūhun jeē ni jéjnūhun ya quendōo ndetū Abraham, jinū nuū i. Te súcuan te núu candíje yó jeē ni sáha Yaā Dios jehē yō, te nihīn yō Espíritu jeē ni jéjnūhun ya quiji.

Siquī ley jíin síquī contrato jeē ni jéjnūhun ya

¹⁵ Hermano, na cáhán rī ñn jnūhun ndese cásáha ñayuu ñayiví: Núu ñn tēe sáha de ñn contrato chí ñn acta, te núu je ni cucutú ni sáha de firmar, te ma cúu ga najnanū, ni ma cúu jecosō gā. ¹⁶ Te suni súcuan ni sáha Yaā Dios ñn contrato jeē ni jéjnūhun ya nuū Abraham jíin yúcūn de jeē quiji. Te tu cáhán tutu iī siquī cuehē yucūn de, chi sa cáhán siquī ñn-ni yucūn de, te suu cúu Cristo. ¹⁷ Núu súcuan te jnūhun jeē cahán rī yáha cúu jeē xīhna gā ni sáha Yaā Dios ñn contrato jíin Abraham, jeē quiji Cristo jnama ya yohó, te ni sácútu yá. Yūcuán na te ni yáha cuūn ciento ocō uxī cuiyā, te sáá te ni jēhe ya ley nuū Moisés. Te ley un jēē ní quee cueé gá, ma cúu nacanu contrato un, ni ma cúu casí nuū jnúhun jeē ni jéjnūhun ya jeē jnama ya yohó.

¹⁸ Chi núu jeē jíin ley Moisés jnama Yaā Dios ñayuu, yūcuán na te nasūu síquī contrato jeē ni jéjnūhun ya cúu. Chi sa suhva siquī máá jēē ni jéjnūhun Yaā Dios nuū Abraham cúu jeē ní jnama ya de.

¹⁹ Núu súcuan ¿te ndese jéjníñu ley Moisés? Jéjníñu chí ni jēhe ya un cuéé gá návāha nastúu cuēchi i. Te ni ndacu jniñu máá-ni nde ná tu quiji Cristo, Yaā cúu yucūn jeē ni jéjnūhun Yaā Dios jeē quiji. Te nde ná ni jēhe Yaā Dios ley un núu ñayuu, te ni tají yá tācá nda-jéhé yā ni cacastūhun núu Moisés, te Moisés ni nacachī nuū i. ²⁰ Te sñn cúu jnūhun jeē ni jéjnūhun ya nuū Abraham jeē quiji Cristo, chi máñúhún-ni ya ni jéjnūhun, te tu ní jíni ñúhún ni ñn jeē nacachī nuū Abraham.

Siquī ndese jéjníñu ley jenahán

²¹ Núu súcuan ¿te á cúní cahán jeē ley jeē ni jēhe Yaā Dios nuū Moisés, téjiyo jeē ni jéjnūhun ya ún? Tú cuitī jeē súcuan. Chi núu jeē ni jēhe Yaā Dios ñn ley jeē cóte-cu ñayuu ní cáni sáha, yūcuán na te quendōo ndaā i

nuū yā siquī jeē squícu i jniñu ndácu ley un núu. ²² Te tuú chí yósó núu tútu iī jeē ndihī ñayuu ñayiví, nájnūhun yéndihyū i vecāa chí cáyihī i chíji cuēchi. Te súcuan cúu návāha tācá i jeē candíje i jeē ni jihī Jesu-cristo jehē i, nihīn i máá jēē ni jéjnūhun ya nuū i siquī jeē candíje i ún.

²³ Chi nde ná tu quee jnūhun candíje yó Cristo, te nájnūhun ni yéndihyū yō ni sáha ley jenahán, návāha condetu yó quiví quiji Cristo, Yaā candíje yó. ²⁴ Núu súcuan te ley ni cuu ñn jeē ndíto yóhó nájnūhun ñn mozo ndíto sūchi lúli, te ni jéjníñu nde quiví ní quiji Cristo, návāha candíje yó jēē ni jihī yā jehē yō, te ndah-va Yaā Dios cuēchi yó. ²⁵ Te vijna jeē ní quee Cristo, Yaā candíje yó, te tuá yíhī yó ndaha ley jeē cúu nájnūhun mozo ndíto yóhó.

²⁶ Chi ndiví rō cácuu sēhe Yaā Dios siquī jeē ní cacandíje rō Cristo Jesús. ²⁷ Chi tāca rō jeē ní jendute rō síquī jeē ni quiví rō ndaha Cristo, ni sáha ya jeē ní nduu rō nájnūhun cúu máá yá. ²⁸ Te vijna chí tuá cúu rō ni ñayuu hebreo ni ñayuu griego, ni mozo jeē ní jeen ñayuu, ni ñayuu sájniñu cuenta maá, ni tēe ni ñahan. Chí ñn na cúu rō núu yā jeē cáyihī rō ndaha Cristo Jesús. ²⁹ Te núu cáyihī rō ndaha Cristo, núu súcuan te yucūn Abraham cácuu ndije rō, te nihīn rō maá táhū jeē ni jéjnūhun ya.

4 Jeē cahán rī jíin rō jijnáhan rō cúu jeē yáha: ñn sūchi chíí táhū, vésú maá i naquihin ndihī jeē névāha tátá i, te núu lúli i chí ñnuú cúu i jíin mozo. ² Chí yíhī i ndaha tāca jēē ndíto i jíin jēē ndíto ndajníñu i, nde quee quiví jeē ní jeni tátá i, te sáá te nihīn i. ³ Te suni súcuan yóhó, chí nde ná tu jecūhun ni yō siquī Cristo te ni cuu yó nájnūhun sūchi lúli, te ni yíhī yó chíji tācá costumbre jeē ní cajequin ñayuu ñayiví. ⁴ Te nde ná ni quee quiví jeē ní jeni Yaā Dios, te ni tají yá Sēhe ya, ni cacu ya chíji ñn ñahan, te ni cacu ya yucūn ñayuu nación hebreo jeē cáyihī chíji ley Moisés. ⁵ Súcuan ni cacu ya návāha jnama ya yohó jēē tuá quihī yó chíji ley un, te návāha naquihin Yaā Dios yohó cuu yó sēhe ya.

⁶ Te siquī jeē cácuu rō sēhe ya, te ni tají Yaā Dios Espíritu Sēhe ya ni quiví ini anuá rō, te sáha ya jeē cácahán jee rō: Tátá maá ná. ⁷ Núu súcuan te tuá cácuu rō nájnūhun mozo, chí sēhe ya cácuu rō. Te jeē cácuu rō sēhe Yaā Dios, te suni nihīn rō maá táhū jeē ni jéjnūhun ya jeē jíin Cristo.

Jeē nácani ni Pablo siquī ñáyuu cáccandíje

⁸ Chí nde saá, nde ná tu jecūhun ni rō ndese Yaā cúu Yaā Dios, te ni cacu rō mozo nuū tāca jēē násūu yāā ndaā cúu. ⁹ Te vijna chí je cájini rō ndese Yaā cúu ya, te vāha ga na cáhán rī jeē maá yá je jíni yā rohó. Núu súcuan ¿te najehē cácuu rō nandió cóo rō nduu tucu rō mozo nuū tācá costumbre ñayuu ñayiví jēē tu níhín jníñu cuitī? ¹⁰ Chí máni jeē cánēe iī rō quiví jíin yóo jíin vico jíin cuiyā. ¹¹ Te yúhú rí sanaa te tu ní jéjníñu cuitī jeē ní nacani ri jnūhun nuū rō.

¹² Cáhán ndahú rí jíin ró hermano, jeē na cáni ni rō nájñuhun jéni ni maá rí jeē tuá squícu ri costumbre ñayuu hebreo. Chi ruhū ni nasáha ri maá rí nájñuhun máá ró jeē tu ní cáyihí ró núū ley costumbre ñayuu hebreo. Te tú na vé ni casáha ró jéē cucuíhyá ni rī nde saá. ¹³ Chi cájini rō ndese ni cuu ná ni nacani núú rí jñuhun nuū rō ndese jnáma ya yohó. Chi siquī jeē cuhú rī te ni jecuíñī rī ñuu rō ni nacani ri jñuhun. ¹⁴ Te vésú jñūndóho ni cuu jeē ní cocuhū rī, te tu ní cásájéē ni rō nuū rī, ni tu ní cásquéhichī ni rō ruhū. Chi sa ni cajetáhú ró ruhū nájñuhun jeē cúu ri ñn ndajéhé Yaā Dios, chí nájñuhun jeē cúu ri maá Cristo Jesús. ¹⁵ Núu súcuan ¿te najehē cúu jeē tuá cácusī ni rō jíin rí vijna? Chi náhán rí jeē vāha ni casáha ró jéē ní cajnahuhū ni rō núu jeē cúu te tava rō tinūu vāha máá ró, cuāha ró nduu tinūu rí nuú. ¹⁶ Te vijna ¿á ní nduu ri enemigo rō siquī jeē cachí rí máni jñuhun ndaā nuū rō, chí naún?

¹⁷ Te cáhīyo tēe jeē cándihvī ni siquī rō jijnáhan ró, te nasūu jéē quéndōo vāha ánuá rō, chi sa jeē cácuni de nasásñin de róhó jíin rúhū, návāha condihvī ni rō jeē cúu máá de. ¹⁸ Te íyó vāha jeē cándihvī ni de jehē rō, te núu jeē quéndōo vāha ánuá rō cúu núu. Chi níni jíni ñúhún sáha de jeē vāha róhó, vésú núu íne ri jíin ró chí núu tú ri íne. ¹⁹ Séhē mánī jijnáhan ró, jeē siquī rohó cúu jeē inga jínu jnáhuhū ni rī, chí nájñuhun ñn ñahan scácu sēhe, súcuan ndóho ri jehē rō. Te suu cúu jeē jnáhuhū ni rī ndétu ri jeē na ndúndaā anuá rō ndacu ró Cristo. ²⁰ Nacā jeē vāha núu jeē ndeé rí jíin ró vijna ñúhún, návāha cuu cahān manī rī jíin ró. Te tu cújñúní cuiñi ni rī ndese ga cúu jeē cáni ni rī siquī rō.

Jñuhun yátá sīquī Agar jíin Sara

²¹ Róhó jijnáhan ró jéē cácuni rō quiñi ró chíji ley Moisés, cachí nuū rī: ¿A tu ní cájini sōho ró ndese cáhán ley un? ²² Chi cáhán tutu īi jeē Abraham ni iyo uū sēhe yí de. Te ñn i cúu sēhe Agar, ñahan cúu mozo vehe de. Te inga i cúu sēhe ñahan íyó libre, suu ñasiñí de Sara jeē ní cuu ña ñahan numá. ²³ Te sēhe ñahan cúu mozo, ni cacu i nájñuhun cácu tāca gá sūchi lúli. Te sēhe ñahan cúu libre, ni cacu i máá sīquī jeē súcuan ni jejnūhun Yaā Dios. ²⁴ Te yāha cúu ñn jñuhun yátá, chi ndindúú ñahan un cúu ña nájñuhun ndindúú contrato jeē ni sáha Yaā Dios jíin ñayuu. Máá ñahan nání Agar, cúu ña nájñuhun contrato ley jeē véji nde yucu Sinaí. Te ñayuu cáyihí chíji contrato ley, cácuu i mozo nuū ley un. ²⁵ Chi Agar cúu nájñuhun ley jeē ni jéhe Yaā Dios xinī yucu Sinaí jeē íin nde Arabia. Te cúu ña nájñuhun Jerusalén, ñuu ñayuu hebreo, jeē íyó vijna, chí tāca sēhe ñuu Jerusalén, cácuu i nájñuhun mozo nuū ley un. ²⁶ Te Jerusalén jeē íyó andiví, chí sa suhva íyó libre nájñuhun Sara. Te yóhó ñayuu cácandíje, nájñuhun sēhe un cácuu yó, chí íyó libre yō nuū contrato ley. ²⁷ Chi suhva yósó núu tútu īi:

Róhó jeē ní cuu ró ñahan numá jéē tú sēhe ró, na cúsiñi ni rō.

Róhó jéē tu ní jéhnde chíji ró jéē scácu ró, na cána jee ró jéē cúsiñi ni rō.

Chi coo cuehē gā sēhe róhó jéē ní cuu ró ñahan numá vésú ñahan jeē jé ni scácu sēhe. Achí tutu.

²⁸ Hermano, sēhe Yaā Dios cácuu yó, chí súcuan ni jejnūhun ya nuū yō, nájñuhun ni jejnūhun ya nuū Abraham jeē cacu sēhe de Isaac. ²⁹ Te nde saá te inga sūchi ní cacu nájñuhun cácu tāca gá ñayuu, ni jito xeēn i Isaac, sūchi ní cacu ni sáha Espiritu. Te nájñuhun ni iyo saá, suni súcuan cájito xeēn ñayuu tāca sēhe Yaā Dios nde vijna. ³⁰ ¿Te ndese cáhán tutu īi? Achí: Quenehen ró ñahan cúu mozo na quíhín ña jíin sēhe ña. Chi sēhe ñahan cúu mozo, ma nihín i tahū jíin sēhe ñahan libre, achí yá jíin Abraham. ³¹ Núu súcuan hermano, tu cúu yó nájñuhun sēhe ñahan cúu mozo, chí nájñuhun sēhe ñahan libre cúu yó.

Na cuiñi ñihin yó jíin jñuhun jeē ni sáha libre yohó

5 Te Cristo ni sáha libre yā yohó jéē tuá yíhi yó chíji ley Moisés. Núu súcuan te cuiñi ñihin ró jíin jñuhun jeē ni sáha libre yā yohó, te ma ndívicoo tucu ró cuu ró mozo nuū ley un.

² Sáha ró cuenta jijnáhan ró, chí ruhū Pablo cahán rī jíin ró jeē núu squícu ró ley circuncidar, yūcuán na te tu nihín jñiñu cuiñi jeē ní candíje ró jéē ni jíhī Cristo jehē rō. ³ Te inga jínu cáhán ñihin ri jíin táca tēe cánducú cuu circuncidar, jeē núu súcuan te suni cánuú jéē squícu de ndívii cuiñi gā jñuhun cáhán ley Moisés.

⁴ Róhó jéē cánducú ró quendōo ndaā rō jeē squícu ró ley un, je ni casiáá rō Cristo núu súcuan. Je ni castóo ró jñuhun jeē ndahva yā cuēchi ró sīquī jeē cundáhú ni Yaā Dios rohó. ⁵ Te máá yó chí cájica yó jíin Espiritu, te cácandíje yó jéē ní ndahva yā cuēchi yó, te jeē yúcuán ñuhun ni yō jeē quendōo ndaā yō quiví cuiñi yó núu Yaā Dios. ⁶ Chi yóhó jéē cáyihí ndaha Cristo Jesús, vésú núu jeē cúu yó circuncidar chí tu cúu yó, tú na vé nihín jñiñu. Jeē nihín jñiñu cúu jeē candíje yó jeē sáha ya jehē yō. Te yūcuán sáha jeē cundáhú ni yō jnáhan yó.

⁷ Vāha ni cacandíje ró núu. ¿Te ndé ñn ni jesi jeē tuá cajetáhú ró jñuhun ndaā núu súcuan? ⁸ Jñuhun jeē ní cascáhán de róhó, chí tú vēji nuū maá Yaā ní cana róhó ní quívicoo ró ndaha ya. ⁹ Te ma náa ni rō jeē tēe cástáhú róhó, jñuhun cástéén de cúu nájñuhun levadura, chí vésú jecu-ni levadura, te ndáa ndíhi ñu-jen sáha. ¹⁰ Te cúcáhnū ni rī jeē maá Jítoho yō sáha ya jeē ma cándíje ró jijnáhan ró inga jñuhun jeē sñin cáhán. Te máá Yaā Dios cuāha ya castigo tēe jeē sáca núu xinī rō, núu na-ni tēe cúu de.

¹¹ Te ruhū, hermano, núu jeē nácani ga rī jñuhun ley circuncidar nde vijna, te jnáhan ri ñayuu hebreo ma cóto xeēn i ruhū nuú. Chi ma quiñi ni i jeē nácani ri jñuhun jeē ni jíhī Cristo jicā cruz, núu jeē súni nácani ri jñuhun circuncidar nuú. ¹² Te tāca tēe jeē sáca núu xinī

rō siquī jnūhun ún, vāha ga na cāhnde gā de máá de núu súcuan.

¹³ Chi máá ró jijnáhan ró hermano, ni cana ya rohó návāha coo libre rō nuū ley un. Te vēsú iyó libre rō, te ma cáni ni rō jeē cúu quīvicoo ró táca cuēchi jeē cúu modo neé cúní máá ró, chi sa suhva na sáha ró máá ró mozo jeē chindéé ñáhán ró jnáhan ró siquī jeē cundáhú ni rō i. ¹⁴ Chi je ni squícu ró ndīhi ley núu squícu ró ñn-ni jnūhun ndácu jniñu yáha: Cundáhú ni rō jnáhan ró nájnūhun cundáhú ni rō máá ró, achí. ¹⁵ Te núu máni jeē ndónnda xeēn rō siquī jnáhan ró jéē cuajnáhan ró, te coto ma snāá rō jniñu jeē ni sáha ya mēhñu ró jijnáhan ró.

Modo cuní ñayuu tu cándije jíin modo sáha Espíritu

¹⁶ Súcuan cāhán rī jíin ró jijnáhan ró: Caca ró nájnūhun cúní máá Espíritu, te yūcuán na te ma sáha ga rō modo jeē cuní máá ró. ¹⁷ Chi tāca jéē cuní máá yó, yūcuán jésí nuū jeē cuní máá Espíritu. Te jeē cuní Espíritu, jésí nuū modo neé jéē cuní máá yó. Te jeē ndīndúú yáha chi cájesi nuū jnáhan, te jeē yúcuán tu cúu sáha ró jniñu vāha jeē cuní rō sáha ró. ¹⁸ Te núu máá Espíritu steén nuū rō, núu súcuan te tuá cáyihī ró chíji ley jenahán.

¹⁹ Te iyó ndijin tācá jniñu cásáha ñayuu cájica jíin modo neé máá, te yāha cúu: Cásiquí ndéē jnáhan i, cásáha i jniñu jnéhén, cásáha neé ndasí i.

²⁰ Cáchiñúhún i ídolo, cásáha tásí i, cájito uhū jnáhan i, cájeynáhan i, cáccuñí ni i. Te yachī cáquī ni i, te cándihvī ni i jeē cúu máá-ni i, te cátejnéhan i cásásñn i máá i. ²¹ Te cáccuésún ni i, cájehni i ndīyi, cánajñi i, cásáha i vico neé, jíin táca gá jeē súcuan. Te cāhán nīhin ri jíin ró, nájnūhun je ni cahān rī jíin ró saá, jeē ñayuu casáha súcuan, ma nihín tahú i quīvicoo i ñuu nuū ndácu Yaā Dios jniñu.

²² Te ñayuu jeē nduú i jíin Espíritu, tācá jniñu yáha sáha ya jíin i: Jeē cundáhú ni jnáhan, jeē cúsiñi, jeē iyó ndeyí sñi ni, jeē iyó paciencia, jeē maní ni, jeē váha ni, jeē squícu vāha, ²³ jeē tu sáha jeē cujéhnū, jíin jéē jésí modo jeē cuní máá. Te tú na ley cacān cuēchi siquī rō núu sáha ró táca jniñu yáha. ²⁴ Te ñayuu cáyihī ndaha Cristo, nájnūhun je ni cajehni i modo neé máá i jicā cruz, nde jíin táca jéē ndíyo neé ni i te cútñdí i. ²⁵ Te jeē súcuan ni jēhe máá Espíritu ñn vida jeé núu yō, te suni na cáca yó jíin modo steén Espíritu.

²⁶ Te ma sandúxí yó jéē squíñi ni yō jnáhan yó, te ni ma cucuésún ni yō siquī jnáhan yó.

Jnūhun jeē chindéé ñáhán yó jnáhan yó

6 Hermano, núu ñn jnáhan ró ni sáha cuēchi, te rōhó jéē cájica jíin Espíritu, na náchuhun ichí ró i. Te jíin jnūhun vítá cahān rō jíin i, te suni condito ró máá ró jeē ma cacān ini rō sáha ró táca cuēchi. ² Te

chindéé ñáhán ró jnáhan ró núu na vé cúu jeē ndóho i, chi súcuan cúu jeē squícu ró ley Cristo.

³ Chi núu ñn ñayuu jéni ni i jeē ñayuu teyí cúu i, vēsú nasūu súcuan cúu, te stáhú i máá i núu súcuan. ⁴ Te tācá ñn ñn ró na cóto ndee rō ndese cáa jniñu sáha ró. Te núu vāha sáha ró, yūcuán na te cuu cusīñi ni rō jíin jéē sáha máá ró, te tu níñi jéē scāni jnáhan ró máá ró jíin jnáhan ró. ⁵ Chi tācá ñn ñn yó cánuú squícu yó jíin jniñu ní jéhe ya nuū máá yó.

⁶ Te rōhó jéē cascuáha jnūhun vāha ya, na chindéé ñáhán ró tēe cástéén nuū rō jíin táca jéē vāha cánevāha ró.

⁷ Ma stívi ró cani ni rō jeē cuu sáha ró cuēchi. Chi ma cúu sácatā rō nuū Yaā Dios cani ni rō jeē tu sáha ya cuenta. Chi táca núu ndese sáha ñayuu, suu yūcuán nanihīn i. ⁸ Chi ñayuu jeē sáha i jeē cuní modo neé máá i, nihīn i jeē jnahnú ndetū i sáha modo jeē cuní máá i ún. Te ñayuu jeē sáha jeē cuní máá Espíritu, chi nihīn i jeē cótecu i ññí cáni andiví sáha Espíritu. ⁹ Te ma cuíta yó jeē sáha yó jniñu vāha núu súcuan, chi jeē quée máá quívī te nanihīn yō, te núu ma cuíta yó.

¹⁰ Núu súcuan te tāca jínu jeē cúu sáha yó, te na sáha vāha yó jíin táca ñayuu, te hermano yō jeē cáccandije cúu jeē cánuú gá.

Saludo jíin jnūhun cástūhun Pablo jeē sándñhí

¹¹ Condēhe ró jeē náhnu letra tēe ri cuajeē nuū rō jijnáhan ró, chi ndaha máá rī tēe ri yāhá. ¹² Te tēe jeē casáfuerza de rōhó cuu ró circuncidar, cásáha de siquī jeē cáccuni de cuajnúhún ñayuu de. Te cásáha de návāha ma cóto xeēn ñayuu de jeē cánacani de jnūhun jeē ni jíhī Cristo jehē yō. ¹³ Te ni máá de jeē casáha de circuncidar, suni tu squícu vāha de ndīhi ga ley jenahán. Te cáccuni de jeē cuu ró circuncidar, návāha cuu sátéyí de máá de núu quihin ró jnúnī circuncidar sáha de. ¹⁴ Te ruhū tu cúní rī satéyí rī máá rī siquī ní ñn jeē yúcuán, chi máá ñn-ni siquī jeē ni jíhī Jitoho yō Jesucristo jicā cruz. Chi siquī yūcuán cúu nájnūhun ni jíhī rī, chi ni siaá rī táca jéē iyó ini ñayiví, te suni nájnūhun ñn ndīyi cúu ri nuū ñayiví. ¹⁵ Chi núu yíhi yó ndaha Cristo Jesus, te tu níhín jniñu núu cúu yó circuncidar chí tuú. Chi jeē níhín jniñu cúu jeē ní nasá-jeé yá anuá yō. ¹⁶ Te ñúhun ni rī jeē táca ró jeē jíca ró jíin modo yáha, na sáha ga yā jeē coo ndeyí coo sñi ni rō, te cundáhú ni yā rohó. Te suni ñúhun ni rī jeē súcuan sáha ya jíin táca gá i jeē cúu ndije i ñayuu cáccandije Yaā Dios.

¹⁷ Te vijna jíin ññí gá cuahān yō, cúní rī jeē ma stáhān gā ni ñn ñayuu ruhū. Chi yiquí cúñu rī ndíso seña jeē ni tújī rī ni ndoho ri jeē cúu ri mozo máá Jitoho yō Jesús.

¹⁸ Hermano, ñúhun ni rī jeē na sáha ga Jitoho yō Jesucristo jeē vāha rōhó jíijnáhan ró. Súcuan na cóo. Amén.

EFESIOS

1 Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū. Te tée ri carta yáha cuájeē nuū rohó ñáyuū ñuu Efeso, jeē cácuu ró ñáyuū maá yá jeē cávandíje ró Cristo Jesús. **2** Te ñúhun ni rī jeē Tatá yō Yaā Dios jíin Jítoho yō Jesucristo, na sáha ga yā jeē váha rōhó, te sáha ya jeē coo ndeyí coo síñ ni rō.

Jeē sáha Cristo jeē quéndōo vāha ánuá yō

3 Na cáhán yō jeē yóhyo cújéhu Yaā Dios, Yaā cúu Tatá Jítoho yō Jesucristo. Chi ni jēhe ya tāca jéē váha íyó andiví jéē quéndōo vāha ánuá yō, chi yíhi yó ndaha Cristo. **4** Chi nde ná tu jecōo ñayiví te ni nacāji ya yohó jéē quívi yó ndaha Cristo, návāha coo ndoo ánuá yō te caca ndaā yō nuū yā. **5** Je ni cundáhú ni yā yohó nde saá, te ni tana ya yohó jéē náquihin séhe ya yohó. Te jíin Jesucristo ni sáha ya súcuan, chi ni nujnahan ni yā sáha ya. **6** Te jeē yúcuu níní na cáhán yō jeē yóhyo cújéhu ya, chi yóhyo vāha ni sáha ya yohó jíin táca jéē váha ni yā, síquī jeē yíhi yó ndaha Cristo, Sēhe ya jeē maní yā jíin. **7** Te síquī jeē yóhyo vāha ni yā jíin yó, te Sēhe ya un ní jnama ya yohó jéē ni jíhī yā jehē yō, te ni ine cáhnu ni yā nuū cuéchi yó. **8** Te ni steén yā jeē cundáhú ndasí ni yā yohó, te ni sáha ya jeē jécūhun ni yō te cundíchí yó jíin jnúhun ya. **9** Te ni sáha ya jeē cuni yō ñn jnúhun ya jeē ní yisāhí, jeē tu ní sáha ya jeē cuni ñayuu jenahán. Chi súcuan ni tee ni yā nde saá, te nujnahan ni yā sáha ya. **10** Te yāha cúu jnúhun ún: Nde na quée tiempo te sáha ya jeē ndíhi jeē yúcu andiví jíin jéē yúcu ñayiví, ñnuú-ni nduu, quíhi ndaha Cristo.

11 Te síquī jeē yíhi yó ndaha Cristo, te nihīn yō tahū yō, chi je ni nacāji Yaā Dios yohó nde saá. Chi súcuan ni tee ni maá yá, chi sáha ya tācá-ni jeē jé ni cundaā ni yā jeē nujnahan ni yā sáha ya. **12** Súcuan ni sáha ya návāha máá rí jeē xíhna gā ni cacandíje ri Cristo, caca ndaā rī te súcuan sájéhu ri yā jeē yóhyo luu cújéhu ya. **13** Te suni máá ró jíinánhan ró, ni cajini ró jnúhun ndaā jnúhun vāha jeē jnáma ya rohó, te ni cacandíje ró Cristo. Te ni canihīn rō Espíritu Santo jeē ni jéjnúhun ya jeē cuáha ya. Te ndéé Espíritu yā ún ini anuá yō, te cúu ya nájnūhun sello jeē steén jeē cúu yó séhe Yaā Dios. **14** Te sáha ya jeē jíin ndije yó jéē cucuéeé gá te cuáha Yaā Dios tahū yō, nde na sínu ya jniñu jeē jnáma ya ñayuu yā. Te quiví ún cahān yō jeē cújéhu ya, chi yóhyo luu cújéhu ya.

Jeē jíicán tahú Pablo jehē ñáyuū cávandíje

15 Te ruhū ni jini jnúhun ri ndese cávandíje ró jéē ni sáha Jítoho yō Jesús jehē rō, jíin ndese cávandáhú ni rō ndíhi ñayuu cáyíhi ndaha Yaā Dios. **16** Te jeē yúcuu tu jécuiñī rī jeē nácuatáhú rí jehē rō, te jeē jíicán tahú rī te tu náa ni rī cacān tahú rī jehē rō. **17** Chi jíicán tahú rī jeē na sáha Yaā Dios jeē jécūhun vāha ni rō te ndundíchí ró jíin jnúhun ya, te cuni gā rō ndese Yaā cúu ya. Chi máá yá cúu Yaā Dios Jítoho yō Jesucristo, te cúu ya Tatá yō jeē lúu ndasí cújéhu. **18** Te jíicán tahú rī jeē na sándijin gā yā nuū jeē níjnūnī rō, návāha jecūhun ni rō ndese cáa ndíhi jeē cáñuhun ni rō nihīn rō síquī jeē ní cana ya rohó. Te jecūhun ni rō ndese cúcá cácuu ró jíin táca jnúhun jéhu luu ndíso jnúhun ya jeē cúu ñayuu maá yá. **19** Te jíicán tahú rī jeē na jécūhun ni rō ndese yóhyo jéhu poder yā jeē sájniñu ya ini anuá yohó jéē cúu yó ñáyuū cávandíje. Chi tu ndíhi cuiti poder yā. **20** Te suu poder un cúu jeē ni steén yā ná ni sáha ya ñn jniñu jéhu ga jeē ní nastécu yā Cristo mēñu ndíyi te ni scúcōo ya lado váha ya nde andiví. **21** Te ni jeni ya Cristo síquī tāca jéē cújéhu, jíin jéē ndíso jniñu, jíin jéē jñí poder, jíin jéē ndácu jniñu, jíin síquī táca jeē cácahān ñayuu jeē cújéhu, cúu tiempo yáha, cúu tiempo quíji. **22** Te ni jēhe ya jeē cújéhu Cristo síquī ndiví. Te ni sáha ya jeē cúnuú yá cújéhu ya nuū ñáyuū cávandíje. **23** Te ñayuu cávandíje un cácuu i nájnūhun yíqui cúñu ya, chi ñn na cúu i jíin yá te ñúhun chítú yá ini anuá i, chi Yaā jeē ñúhun chítú ní cáhnu-ni cúu ya.

Ni cácuu yó síquī jeē ní cundáhú ni yā yohó

2 Te ni sáha ya jeē cotecu rō ní cáni jíin Cristo. Chi je ni cacuu ró nájnūhun ndíyi nuū yā, ni sáha cuéchi ró jíin jniñu néé ní casáha ró. **2** Chi ni cajica ró jíin jniñu yúcuu nde saá, ná ni cacondiquīn rō jniñu ñayuu ñayiví, ná ni cajetáhú ró núu jexeén jeē ndácu jniñu nuū tāca táchī xeén, te jíca nuū tachí. Te suu cúu jeē scánda ini ñayuu níhni ni nuū Yaā Dios. **3** Te máá rí jíinánhan ri, suni súcuan ni cajica ri, chi ni casáha ri jniñu néé jéē cuní maá rí, jíin táca jéē jíicán yíqui cúñu rī, jíin jéē cájeni néé ni rī nde saá. Jeē yúcuu suni ni cacuu ri ñayuu jeē nihīn castigo xeén jeē cuáha ya nuú, chi ñnuú-ni ni casáha ri nájnūhun casáha máá i. **4** Te Yaā Dios chi yóhyo cuehē ni cundáhú ni yā yohó, te vāha ndasí ni yā jíin yó. **5** Te náa cúu yó nájnūhun

ndīvi nuū yā ni sáha cuēchi yó, te ni nastécu yā yohó jéē cótecu yō nī cání jíin Cristo. Chi siquī jeē yóhyo vāha ni yā cúu jeē ní jnama ya yohó. ⁶ Te ni nastécu yā yohó jéē cótecu inuú yó jíin Cristo Jesús, te scúcōo ya yohó jíin yá nde andívi. ⁷ Súcuan ni sáha ya návāha nī gá tiempo jeē quiji, te stéén yā ndese yóhyo manī yā jíin yó, jíin ndese vāha ni yā jíin yó jeē siquí Cristo Jesús. ⁸ Chi siquī jeē yóhyo manī yā jíin ró cúu jeē ní jnama ya rohó, chi ni cacandíje ró jéē sáha ya jehē rō. Te nasūu síquī jeē ní casáha máá ró cúu, chi tahū jeē ni jéhe ya nuū rō cúu. ⁹ Chi tú na jniñu vāha ní casáha yó jéē jnama ya yohó, te jeē yúcuan ni ñn yó ma cúu sátéyí yó máá yó. ¹⁰ Chi cúu yó ñn jniñu luu jeē ní nasáha máá yá, chi ni nasáha ya yohó jéē cundúú yó jíin Cristo Jesús, návāha sáha yó táca jniñu vāha jeē jé ni sátūhva Yaā Dios jeē sáha yó.

Jeē sáha Cristo jeē ndívi yó núu jnúhun manī Yaā Dios jíin yó

¹¹ Núu súcuan te na núcūhun ni rō ndese ñayuu ni cacuu ró ndé saá. Chi tu ní cacuu ró ñayuu hebreo, chi sa suhva ni cacuu ró ñayuu táca nación jeē tu jíin jnúhun ya. Te ñayuu hebreo jeē casáha circuncidar yiqui cúñu, ni cacahān i jeē cacuu ró ñayuu tu sáha circuncidar. ¹² Na núcūhun ni rō jeē ndé saá tu ní cáhīin ró jíin Cristo, te ni cacuu ró ñayuu ñuu jicá núu nación Israel. Te tu ní cājini rō táca jnúhun contrato jeē ni jéjnhun Yaā Dios. Te tu ní íne Yaā Dios jíin ró ñayīvi yáha, te tú na vé jeē vāha ní cáñuhun ni rō jeē cóo. ¹³ Te vijna chi ni ndívicoo ró núu Yaā Dios jeē tu ní cājini rō jnúhun ya nde saá, chi ni quívicoo ró ndaha Cristo siquī jeē ni jíhī yā jehē rō. ¹⁴ Chi Cristo cúu Yaā sáha jeē ndumanī jnáhan yó. Chi ni sáha ya jeē ñayuu hebreo jíin ñayuu táca gá nación, ni nduu yó ñn na nuū yā. Chi ni sáha ya jeē tuá jíto uhū jnáhan yó, te suu cúu nájnūhun jeē ní jenu ya ñn jeē ndihyú sava mēhñu yó jeē sásñn yóhó. ¹⁵ Chi ni socō yā máá yá ni jíhī yā, te súcuan ni ndahva yā ley jenahán jíin jnúhun ndácu jniñu jíin jéē tajnúni ndíso máá. Chi ley un ní sásñn ñayuu hebreo jíin táca nación jeē tu ní jíin i ley un. Te ni nasquijnáhan ya ndíhī yó jéē ní nduu yó ñn na nación jeé, yíhī yó ndaha ya. Te súcuan ni sáha ya jeē ní ndumanī jnáhan yó. ¹⁶ Te jíin jéē ni jíhī yā jicā cruz, te ni snáā yā jnúhun cājito uhū jnáhan ñayuu hebreo jíin táca gá nación. Te ni sáha ya jeē ndívicoo yó núu jnúhun manī Yaā Dios jíin yó, te ni nduu yó ñn na ñayuu máá yá.

¹⁷ Chi ni quiji Cristo ni nacani ya jnúhun vāha nuū táca ñayuu jeē na ndívi i nuū jnúhun manī yā jíin i, cúu róhó ñayuu tu ní cājini jnúhun ya, te suni ñayuu jnáhan ri hebreo jeē cājini jnúhun ya. ¹⁸ Te vijna te siquī jeē ni jíhī Cristo, te ndíhī yó, cúu ñayuu hebreo chí ñayuu táca gá nación, cuu quívicoo yó núu Tatá yō Yaā Dios, te ñn-ni Espíritu yā sáha. ¹⁹ Núu súcuan te tuá cúu ró nájnūhun ñayuu ñuu jicá ni ñayuu tatú, chi

ñn na ni nduu ró jíin ñayuu ñuu máá yá. Te jnáhan ñayuu vehe Yaā Dios cácuu ró. ²⁰ Te cácuu ró nájnūhun ñn ñn parte ñn vehe cáhnu jeē cúvāha siquī cimientu, te cimientu un cúu jnúhun Cristo jeē ní canacani táca apóstol jíin téé ni canacani jnúhun ya jenahán. Te máá Jesucristo cúu nájnūhun yuū cánuú gá jeē yítuu vehe. ²¹ Te nī vehe cúvāha vāha siquī máá yá, cúsúcun cuáhān, cúu ñn templo íi jeē ndeé máá Jítoho yō. ²² Te suu cúu máá ró jijnáhan ró, chi ndúú ró jíin Cristo, te inuú-ni sáma ya rohó jíin táca ñayuu cácaníje, cacuu ró nájnūhun ñn ñn yuū templo. Te suu cúu jeē ndeé Espíritu Yaā Dios ini rō nájnūhun ini ñn templo.

Jeē ndíso jniñu Pablo nácani de jnúhun nuū ñayuu tu jíin jnúhun Yaā Dios

3 Te jeē yúcuan ruhū Pablo, jícan tahū rī nuū yā. Te íne ri vecāa siquī jeē ní nacani ri jnúhun Cristo Jesús nuū rohó ñayuu táca nación jeē tu ní jíin jnúhun ya nuú. ² Te jíin rī jeē ní cājini ró jnúhun ndese yóhyo vāha ni sáha Yaā Dios jíin rí, chi ni jéhe ya jniñu nuū rī jeē nácani ri jnúhun vāha ya nuū rō. ³ Te jnúhun ya jeē ní yisāhí, ni nastúu ya nuū rī, nájnūhun je ni tee ri jecu siquī un núu rō. ⁴ Te núu na cáhu ró te cuu jecūhun ni rō jeē ní jini vāha ri jnúhun Cristo jeē ní yisāhí un. ⁵ Te tu ní stéén yā jnúhun sáhī un núu ní ñn ñayuu táca cuíyā ní quiji ichi yátá. Te vijna cúu jeē steén ndijin yā jíin Espíritu yā nuū táca apóstol jeē ní jeni ndoo ya, jíin núu téé cánacani jnúhun ya. ⁶ Te súcuan cáhān jnúhun ní yisāhí un: Ñayuu táca gá nación, ñn cáhnu-ni nihīn i tahū i jíin ñayuu hebreo, chi ni cacandíje i jnúhun jeē jnama ya i. Te inuú-ni ni nduu ndíhī i, te ñn cáhnu-ni quéndōo ndetū anuá i sáha Cristo, nájnūhun ni jnúhun Yaā Dios. ⁷ Te jeē siquí jnúhun yáha cúu jeē ní jeni ya ruhū jeē nácani ri jnúhun nuū rō. Chi ni cutahū rī jniñu luu yáha jeē ni jéhe ya nuū rī. Te jíin poder yā ní sáha ya un jíin rí. ⁸ Te ruhū chi cúu ri tēe núu ga nuū táca ñayuu núu ga jeē yíhī ndaha ya. Te vésú súcuan te nuū máá rí ni jéhe ya jniñu luu yáha jéē nácani ri jnúhun vāha ya nuū ñayuu táca nación jeē tu jíin, ndese yóhyo cúca yó ndíhī jeē ndíso jnúhun Cristo, jeē ma cánda cuítī yō jecūhun ni yō. ⁹ Chi ni jeni ya ruhū jeē steén cājí rí jeē suni máá i jnama ya i. Te yúcuan cúu jnúhun Yaā Dios jeē ni yísāhī ndé jenahán ndasí, chi máá yá ni sáha ndíhī-ni. ¹⁰ Te súcuan ni sáha ya jíin ñayuu, návāha vijna te táca jéé cácujuhnu jíin jéé ndíso jniñu nuū sucún, na cúni ndese ndíchí ndasí Yaā Dios. Chi ndíchí ndasí ni sáha ya jíin ñayuu cácaníje. ¹¹ Chi súcuan ni tee ni yā nde nī cání, te ni sáha ya jeē Jítoho yō Cristo Jesús ni squícu ya ún. ¹² Te siquī jeē ni sáha Cristo, te vijna te jíin ndije yó jéé cúu quívi yó cáhān yō jíin Yaā Dios siquī jeē candíje yó Cristo. ¹³ Núu súcuan te cáhān ndahú rí jíin ró jeē ma cucuíhyā ni rō siquī jnúndóho jeē ndóho ri jehē rō. Chi suu sáha jeē quéndōo ndetū anuá rō jijnáhan ró.

Cristo yōhoyo cundáhú ni yā yohó

¹⁴ Te jeē yúcuan cúu jeē jécuiñĩ yitĩ rí nuū maá Yaā cúu Tátá Jitoho yō Jesucristo. ¹⁵ Te maá yá cúu Tátá nuū ndihĩ ñayuu yā jeē yúcu andivĩ jíin ñáyivĩ. ¹⁶ Te jícán tahu rĩ jeē jíin poder yā jeē kujéhnú ndasí yá, na sáha ya jeē ije vāha ni rō jíin jnúhun ya, te coo fuerza ini anuá rō, sáha Espiritu yā. ¹⁷ Te jícán rĩ jeē candíje nihin ró Cristo, návāha condee yā ini anuá rō, te jniñ vāha ró jnúhun jeē cundáhú ni yā rohó, te cuiñĩ nihin ró jíin. ¹⁸ Te súcuan te cuu jecūhun vāha ni rō jíin táca ñáyuu candíje, ndese cáa jnúhun cundáhú ni Cristo yohó. Chi yōhoyo jíté, cáni, cúnú, súcún jnúhun ún, chi yōhoyo cuehē sáha. ¹⁹ Te jícán rĩ jeē na cúni vāha ró ndese cundáhú ni yā yohó, vēsú tu cúu cuiñĩ jecūhun ni yō ndihĩ ndihĩ. Te súcuan te cundúú ró jíin Yaā Dios jeē cunuú yá ini anuá rō.

²⁰ Núu súcuan te na cáhán yō jeē yóhoyo luu cújéhnú ya, chi maá yá cúu Yaā iyó poder jeē sáha ya jeē vāha ndasí gá vēsú ndihĩ jeē jicán yō chí jéé jéni ni yō. Te sáha ya un jíin poder yā jeē sájniñu ini anuá yō. ²¹ Te na cáhán yō jeē yóhoyo luu cújéhnú ya jeē siquĩ jeē ni sáha ya jehē ñayuu cácandíje jíin jéé siquĩ Cristo Jesús. Te súcuan na cóo nde ñé cáni cuiñĩ tiempo jeē quíji. Amén.

Inuú-ni cácuu ñayuu cácandíje sáha Espiritu

4 Te ruhū jeē íne ri vecāa siquĩ jnúhun maá Jítoho yō, cáhán ndahú rí jíin ró jeē na cáca ndaā rō nájñuhun cánuú caca ró jéé cácuu ró ñáyuu ni cana ya. ² Te níní na cóo suchí ni rō, te coo vítá ni rō. Te na cóo paciencia rō, te cuandeyĩ ni rō jíin jnáhan ró jéé cundáhú ni rō i. ³ Te na cóndihvĩ ni rō coyūcu mánĩ inuú ró, sáha maá Espiritu nuū véji jnúhun manĩ ni. ⁴ Chi ñn-ni cácuu ñayuu maá yá, te iyó ñn-ni Espiritu, te inuú cáñūhun ni yō jeē cóo jeē vāha siquĩ jeē ní cana ya yohó. ⁵ Te iyó ñn-ni Jitoho yō, jíin ñn-ni jnúhun cándíje yó, jíin ñn-ni jnúhun jéndute yó. ⁶ Te iyó ñn-ni Yaā Dios jeē cúu Tátá yō jijnáhan yó. Te maá yá kujéhnú siquĩ ndihĩ yó, te sájniñu ya jíin ndihĩ yó, te ndéé yá ini ndihĩ yó.

⁷ Te táca ñn ñn yó ní cacutahū yō sñin sñin jniñu sáha yó, núu ndese ni tana Cristo cūhva tahū un núu yō.

⁸ Jeē yúcuan cáhán tutu iĩ:

Ná ni ndaa ya cuanuhun yā andivĩ, te ni stutú yá cuehē jeē yíndihyū, cuahān yā jíin.

Te ni saja ya tahū nuū táca ñáyuu.

⁹ Te jeē cahán tutu jeē ní ndaa ya, suni cúní cahān jeē xihna gā nde andivĩ ni cuun ya nde nuū cunú gá ñáyivĩ yáha. ¹⁰ Te Yaā ní cuun, suni maá yá cúu jeē ní ndaa nde nuū sucún gá andivĩ, návāha cuhun chitú yá ñé cáhnu-ni. ¹¹ Te ni tana ya sñin sñin jniñu sáha ñayuu. Chi ni jeni ya sava ñayuu cuu apóstol, te sava ga nacani jnúhun ya, te sava ga scándíje ñayuu jnúhun jeē jnáma ya i, te sava ga coo pastor condito ñayuu cácandíje, te

sava ga steén. ¹² Súcuan ni jeni ya ñayuu maá yá jeē cuajniñu i nuū yā, návāha cuehnu ga ñayuu Cristo jíin jnúhun ya. ¹³ Te súcuan coo nde nduu inuú-ni ndihĩ yó jíin jnúhun cándíje yó, te cuni vāha yó ndese Yaā cúu Sēhe Yaā Dios. Te súcuan ije vāha yó ndé na cúchitú yó jíin ndihĩ jnúhun jeē ñúhun chitú ini Cristo. ¹⁴ Te súcuan te ma cóo ga yō nájñuhun sūchi lúlí jéé yachĩ jéni yāha jéni yūcuán ni i, ni ma quívi nduu yō cháha chúcuan jíin sñin sñin jnúhun jeé cástéén tēe stáhú jéé yóhoyo ndito de squívi de yóhó nuū jnúhun stáhú. ¹⁵ Chi sa suhva na cóndiquĩn yō jnúhun ndaā jíin jnúhun cundáhú ni. Te súcuan cuehnu yó jíin táca jniñu cúní Cristo, Yaā kujéhnú nuū ñáyuu cácuu nájñuhun yiquĩ cúñu yā, chi ñn na cúu i jíin yá. ¹⁶ Te sáha ya jeē nduu inuú ni táca i jeē cáhije i cuahān i, chi cácuu i nájñuhun ñn na yiquĩ cúñu jíin yá. Te jéjiniñu vāha táca ñn ñn i ndese ni nihĩn jniñu i, návāha scuéhnú jnáhan te ije jíjnáhan jíin jnúhun cundáhú ni.

Jeē ndújeé yó sáha Cristo

¹⁷ Núu súcuan te yāha cúu jnúhun cáhán rĩ jíin ró, te jeē achí Jítoho yō cúu jeē cahán nihin ri jíin ró: jeē ma cáca ga rō nájñuhun cájica sava ga ñayuu jeē tu jíin i ndese Yaā cúu Yaā Dios, chi cájica i jíin jnúhun jeé jéni sáa-ni maá i. ¹⁸ Te iyó nee nuū jeē níjnūnĩ i, te tu névāha i Espiritu jeé véji nuū Yaā Dios, chi tu jíin i jnúhun ya, siquĩ jeé níhni ni i. ¹⁹ Te tuá cúcanu i, chi ni quívicoo i jíin jniñu néé ndasí, te ndíhvĩ ni i sáha i táca jniñu jnéhén. ²⁰ Te róhó jíjnáhan ró, nasūu súcuan ní cáscuáha ró jnúhun Cristo, ²¹ te núu ndaā jeé ní cajini ró jnúhun ya jíin jéé ní cacutūhva ró jíin jnúhun ndaā Jesús. ²² Núu súcuan te na stóo ró táca jniñu ní casáha ró ichi yátá, ná ni casáha ró modo cuní maá ró jeé ní cujnéhén ánuá rō ni sáha jniñu néé stáhú jéé ní ndiyo ni rō. ²³ Te na ndújeé ánuá rō jíin jéé níjnūnĩ rō. ²⁴ Te na cuáha ró jnúhun ndujeé ró, chi nasáha Yaā Dios rohó nájñuhun cúní maá yá jeé cáca ndaā rō jíin jniñu vāha jniñu ndoo.

²⁵ Núu súcuan te ma cahán gā rō jnúhun stáhú, te na cáhán ndaā rō jíin táca jnáhan ró, chi ñn-ni cácuu ndihĩ yó.

²⁶ Núu véji ñn jeé squitĩ ni rohó, te ma quitĩ neé ni rō. Te ma quitĩ ni rō nde quēe niāndii. ²⁷ Ma cuáha ró jnúhun jeé sáha jexeén jeé quívi ró cuéchi.

²⁸ Ñayuu ní sacuíhná, ma sacuíhná gá i, chi sa suhva na sájniñu i, te na cócuu i jíin jniñu vāha, návāha nihĩn i jeé cuáha i nuū ñáyuu cúmanĩ nuū.

²⁹ Ni ñn jnúhun néé ma cahán rō, chi sa suhva na cáhán rō jnúhun vāha jeé scuéhnú jnáhan jíin jnúhun ya, te sáha jeé quéndōo vāha ñayuu jíin sōho. ³⁰ Ma sáha ró cuéchi návāha ma cucuíhyá ni Espiritu Santo Yaā Dios. Chi Espiritu yā cúu nájñuhun sello jeé steén jeé cúu yó séhe Yaā Dios, nde quíji quívi jínu jniñu jeé jnáma ya rohó.

³¹ Te na siáá rō tāca jnúhun cútucu ni, jiín jnúhun xeēn ni, jiín jnúhun quítí ni, jiín jnúhun cáhán ndevāha, jiín táca jnúhun néé. ³² Chi sa suhva na cóo vāha ni rō jiín jnáhan rō, te cundáhú ni rō i. Na cóne cáhnu ni rō nuū jnáhan rō, nájñuhun ni ine cáhnu ni Yaā Dios nuū rō siquī Cristo.

Ndese cánuú caca ndaā sēhe Yaā Dios

5 Núu súcuan te na ndácu rō Yaā Dios, chi cácuu rō sēhe ya jeē maní yā jiín. ² Te níni cundáhú ni rō jnáhan rō, nájñuhun ni cundáhú ni Cristo yohó, te ni socō yā maá yá jehē yō, ni cuu ya nájñuhun ñn londe jeē jeén asīn nuū Yaā Dios jeē ni sócō yā maá yá.

³ Te vijna jeē cácuu rō sēhe Yaā Dios, te ni ma sáha rō ni ma ndájñuhun rō síquī jnúhun jíca jnéni, ni tācá jniñu jnéhén, ni jnúhun ndiyo ni ndajniñu. ⁴ Te ni ma cahán rō tāca jnúhun sáha jeē cúcanu jnáhan, ni jnúhun cánéé īi, ni jnúhun jeē tu ndé jéjñiñu cuiñi. Chi tācá un tu níhín jniñu. Chi sa suhva na nácuatáhú rō nuū Yaā Dios. ⁵ Chi je cájini rō jeē ní ñn ñayuu cájica jnéni, ni jeē sáha jniñu jnéhén, ni jeē ndiyo ni tācá ndajniñu, ma nihín tahu i quívi i ndaha Cristo jiín Yaā Dios jeē ndacu ya jniñu nuū i. Chi tāca jéē ndiyo ni i cúu nájñuhun ídolo i jeē cáchiñúhún i. ⁶ Te coto rō jéē ma stahú ni ñn i róhó jiín táca jnúhun cáhán saá ni i, chi siquī tāca jnúhun néé yáha cúu jeē quíji castigo xeēn Yaā Dios nuū tāca ñáyuu níhni ni. ⁷ Ma quívi nduu rō jiín i núu súcuan.

⁸ Chi tāca quívi saá ni coyūcu rō nájñuhun nuū néé, te vijna chi cáyūcu rō jíin luz maá Jítoho yō, cúu jeē cájecūhun ni rō siquī yā. Te na cáca rō nájñuhun cájica ñayuu jeē steén luz yā ini anuá i. ⁹ Chi jniñu sáha luz yā jiín yó cúu tācá jniñu maní ni, jniñu ndaā, jiín jniñu váha. ¹⁰ Scuáha rō sáha rō táca jniñu jeē nújnahan ni maá Jítoho yō. ¹¹ Te ma quívi nduu rō jiín táca jeē tu níhín jniñu jeē casáha ñayuu cáyūcu nájñuhun nuū néé. Chi sa suhva steén rō nuū i jeē tú vāha casáha i. ¹² Chi cúcanu yō cahān yō siquī jniñu casáha yuhu maá i. ¹³ Te luz yā sáha jeē nátūu tācá jniñu néé casáha i. Te núu cuatáhú i luz yā te caca i jíin luz ún. ¹⁴ Jeē yúcuan cáhán tutu:

Róhó jeē cúhuun ni, jeē nájñuhun quíxi, natahū ni, te quenda rō méhñu ñáyuu jeē cácuu nájñuhun ndīyi. Te Cristo steén yā luz yā ini anuá rō. Achí tutu.

¹⁵ Núu súcuan te coto vāha rō ndese caca yúcún rō. Te ma cáca rō nájñuhun cájica ñayuu canéé, chi caca rō nájñuhun cájica tēe ndichí. ¹⁶ Ma snáa rō tiempo, chi condíhvī ni rō jiín jniñu ya, chi íyó cuéhē cuēchi quivī yáha. ¹⁷ Núu súcuan te ma cóo néé xínī rō, chi sa suhva na jécūhun vāha ni rō na jniñu nújnahan ni maá Jítoho yō. ¹⁸ Te ma nájini rō, chi tēvi rō sáha. Chi sa suhva na ndúcú rō jeē cúnuú Espiritu Santo ini anuá rō. ¹⁹ Te cahān rō jiín jnáhan rō jíin salmo jíin himno, yaa īi jeē cahán jnúhun ya. Te ini anuá rō cahān rō jíin yá jíin tá-

ca yaa, chi yūcuan cúu jeē jíta ánuá rō nuū yā chíñúhún rō yā. ²⁰ Te níni nacuatáhú rō síquī tācá-ni nuū Tatá yō Yaā Dios te ndacunehen rō síhvī maá Jítoho yō Jesucristo.

Ndese squícu vāha ñayuu cáchandje nuū jnáhan i

²¹ Te cuatáhú rō nuū jnáhan rō síquī jeē cáhīyo yíñúhún rō nuū Cristo.

²² Róhó ñahan cácuu ñasihí, cuatáhú rō nuū yīi rō, nájñuhun jétáhú rō nuū Jítoho yō. ²³ Chi yīi cújénu nuū ñasihí, nájñuhun cújénu Cristo nuū yohó ñáyuu cáchandje, jeē cácuu yó nájñuhun yiqui cúñu yā, chi ñn na cúu yó jíin yá. Te maá yá jnáma ya yohó. ²⁴ Chi nájñuhun ñayuu cáchandje cájetáhú i nuū Cristo, suni súcuan ñasihí cuatáhú ña ndíhi jeē cahán yīi ña.

²⁵ Te róhó tēe cácuu yīi, cundáhú ni rō ñasihí rō, nájñuhun ni cundáhú ni Cristo yohó ñáyuu cáchandje, te ni socō yā maá yá jehē yō. ²⁶ Súcuan ni sáha ya jeē cóo ndoo coo īi yō nuū yā, te ni nacate ya anuá yō jíin jnúhun ya jíin jéē ní jendute yó. ²⁷ Te yóhó ñáyuu cáchandje chi cuiñi yó núu yā, te luu cujénu yó. Te ma cóndee cuēchi ánuá yō, ni jeē tú luu, ni ñn jeē súcuan, chi sa suhva coo ndoo coo īi yō nuū yā, te tú na vé cumanī gā. ²⁸ Te nájñuhun Cristo ni cundáhú ni yā ñayuu cáchandje, suni súcuan cánuú jéē cundáhú ni yīi ñasihí de, nájñuhun cúndáhú ni de maá de. Chi tēe cúndáhú ni de ñasihí de, maá de cúndáhú ni de. ²⁹ Chi ni ñn tēe tu jíto uhū de maá de, chi sa suhva yéji de te ndíto yúcún de maá de. Te suni súcuan sáha Cristo jíin yóhó ñáyuu cáchandje nuū yā. ³⁰ Chi cácuu yó nájñuhun yiqui cúñu yā, te ñn ñn yó cácuu nájñuhun ñn ñn parte yiqui cúñu yā. ³¹ Te suu cúu nájñuhun tēe jeē stóo de tátá de náná de, te quijnáhan de jíin ñasihí de, te ñn na cúu ndíndúú de. ³² Yóhoyó jénu jnúhun sáhi yáha, te cáhán rī jeē ñáyuu cáchandje suni súcuan quijnáhan i jíin Cristo. ³³ Te suni súcuan ná ñn ná ñn rō cundáhú ni rō ñasihí rō, nájñuhun cúndáhú ni rō maá rō. Te ñasihí na cúu yíñúhún ña jíin yīi ña.

6 Te róhó sēhe jíjnáhan rō, cuandije rō núu tatá rō nuū naná rō, chi yūcuan cúu jeē váha sáha rō jéē candije rō Jítoho yō. ² Chi yāha cúu ñn jnáhan jeē uxí jnúhun ndácu jniñu jeē ni jéhe ya, te xīhna gā jnúhun yáha ndíso tahū: Coo yíñúhún rō nuū tatá rō nuū naná rō, ³ návāha quendōo ndetū rō, te nánhán cotecu rō ini ñayīvi yáha. Achí.

⁴ Te róhó tátá jíjnáhan rō, ma squítí ni rō sēhe rō, chi sa suhva scuéhnu rō i jíin jnúhun cuandije i, te steén rō nuū i jeē candije i maá Jítoho yō.

⁵ Te róhó mozo jíjnáhan rō, cuandije rō núu patrón rō ñayīvi yáha, te coo yíñúhún rō te conso īyo rō núu de. Te na sájniñu ndaā sájniñu ndije rō, caní ni rō jeē nuū Cristo cájejniñu rō. ⁶ Ma sájniñu ndúxi rō jeē maá jéē coto de te cuajnúhún de róhó. Chi sa suhva sáha rō cuenta jeē mozo Cristo cácuu rō. Te sáha rō jéē nújnahan ni Yaā Dios nde jíin ini jíin ánuá rō. ⁷ Te na cúsiñ ni

rō sájniñu ró, te na cáni ni rō jeē nuū maá Jítóho yō cá-
jejniñu ró, nasūu núu ñáyyuu. ⁸ Chi je cájini rō jeē jniñu
váha sáha ñn ñn ró, te nihīn rō yāhu jniñu yúcuan núu
maá Jítóho yō, vēsú cúu ró mozo chí tée sájniñu maá.

⁹ Te róhó patrón jijnáhan ró, suni súcuan sáha ró jíin
mozo rō, te ma cahán xeēn rō jíin i. Chi na cócuhun ni
rō jeē suni maá ró jíin maá i yíhi ró ndaha Jítóho yō,
Yaā ndeé andívi. Te tu sáha ya cuenta ndese cúu ñn ñn
ñayuu, chi ñnuú sáha ya jíin i.

Na cúcutú yó jíin táca fuerza Yaā Dios

¹⁰ Te íyó ñga jnūhun, hermano jijnáhan ró. Nducú ró
jeē na cóo fuerza ini rō jíin fuerza maá Jítóho yō jeē
nduú yá jíin ró, chi íyó téyí poder yā. ¹¹ Na cúcutú ró
jíin táca fuerza Yaā Dios, návāha cuu cuiñi ñihin ró jée
ma stahú jexeén róhó. ¹² Chi nájnūhun jeē cájejnáhan
yó jíin táca jée neé. Te nasūu ñáyyuu cúu jeē cájejnáhan
yó jíin, chi sa suhva jíin táca táchī cájica nuū sucún. Te
yúcuan cúu jeē cácujuhnu, jíin jée cándiso jniñu, jíin
jée cándacu jniñu nuū ñáyyuu ñayívi yáha jeē nájnūhun
cájica i nuū néē. ¹³ Núu súcuan te na cúcutú ró jíin
ndihī fuerza Yaā Dios, návāha cuu cuiñi ñihin ró quívī
jíto ndee jexeén rohó. Te súcuan coo tūhva ró jíin táca
ndihī jeē cuíñi ñihin ró jíin. ¹⁴ Núu súcuan te cuiñi ñihin
ró jíin jnūhun ndaā jeē cúu nájnūhun jeē yíhi ñihin
sanchíi chíji ró. Te sácutú ró maá ró jíin jnūhun caca
ndaā rō, te suu cúu nájnūhun jeē cúcutú soldado jíin
sahma cáa jeē ndihyú de. ¹⁵ Te níni cotūhva ró nacani
ró jnūhun ndeyí jnūhun siñ ni jeē véji nuū Yaā Dios. Te
suu cúu nájnūhun jeē chíhi soldado ndijēn jehē de.
¹⁶ Te jeē cánuú gá cúu jeē candíje ró jeē íyó yá jíin ró.

Te yúcuan cúu nájnūhun jeē tūhva ró maá ró yatā ñn
escudo. Chi jíin jnūhun cándíje ró un te cuu ndahva rō
ndihī jeē tají maá jexeén, jeē cúu nájnūhun nduva jeē
cayú yáñuhūn punta. ¹⁷ Te cuiñi ró jíin jnūhun ni jnama
ya rohó, jeē cúu nájnūhun ñn lélú cāa. Te cuajniñu ró
jnūhun jeē yosó núu tútu Yaā Dios jeē ni jéhe Espíritu
Santo nuū rō. Chi yúcuan cúu nájnūhun jéjniñu solda-
do espada de. ¹⁸ Te níni cácan tahú rō nuū Yaā Dios
siquī ndihī-ni, te cahān ndahú ró jíin yá jíin fuerza Es-
píritu. Núu súcuan te ndito na cóo ni rō, te ma jécuiñī
rō jeē cacán tahú rō jehē táca ñáyyuu maá yá. ¹⁹ Te suni
cahān rō jehē rī, návāha nihīn rī jnūhun cahān rī, te
coo téyí ni rī nacani cájí rí jnūhun jeē jnáma ya yohó,
suu jnūhun jeē ní yisāhí un. ²⁰ Chi ni tají yá ruhū jeē jíca
ri nácani ri jnūhun ya ún, te jeē siquí un cúu jeē íne ri
vecāa. Te na cácan tahú rō jeē coo téyí ni rī cahān rī
jnūhun ya, nájnūhun cánuú cahān rī.

Saludo jeē sándīhí

²¹ Tíquico cúu ñn hermano jeē maní yō jíin, te cúu de
tēe squícu vāha chéndéé ñájnáhan jíin rí nuū jniñu maá
Jítóho yō. Te maá de castūhún ndihī ndese cuahān
jniñu ri te ndese íyó rí. ²² Jeē yúcuan ní tají rí de cuajeē
de nuū rō, návāha cachi de ndese cáhīyo ri, te coo
ndeyí ni rō jijnáhan ró sáha de.

²³ Te ñūhun ni rī jeē Tatá yō Yaā Dios jíin Jítóho yō Je-
sucristo, na sáha ya jeē coo ndeyí coo siñ ni táca róhó
jée cácuu hermano, te coo maní gā rō jíin yá, te candí-
je vāha ró. ²⁴ Te ñūhun ni rī jeē na sáha ga yā jeē váha
róhó jijnáhan ró jée maní ndije ró jíin Jítóho yō Jesu-
cristo. Súcuan na cóo. Amén.

FILIPENSES

1 Máá rí cúu Pablo jíin Timoteo, mozo Jesucristo. Te cátee ri carta yáha cuájeē nuū tāca róhó hermano cáyūcú ñuu Filipos, jeē cácuu ró ñáyuu maá yá jeē cáyihí ró ndaha Cristo Jesús. Te suni cátee ri nuū tée cándiso jníñu cándito róhó, jíin núu tēe cájejniñu mēhñu ró. ² Te cáñuhun ni rī jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te sáha ya jeē coo ndeyí coo siñ ni rō.

Jeē jicán tahu Pablo jehē ñáyuu cácandíje

³ Tāca jíinu jeē núcūhun ni rī rohó jíjnáhan ró, te nácuatáhú rí nuū Yaā Dios. ⁴ Te náa jicán tahu rī, te níni cúsiñ ni rī jicán tahu rī jehē rō. ⁵ Chi ni chindéé ñájnañhan ró jíin rí jeē scáca yó jnúhun váha ya, nde quiví ní cacandíje ró te nde vijna. ⁶ Te jíni ndije ri jeē maá Yaā ní squéjéé jniñu váha jíin ró, cocu ya jíin ndé quiví ndíji Jesucristo, te sínu ndihí ya. ⁷ Te íyó váha jeē súcuan jéni ni rī siquí tāca róhó, chí yōhyo manī rī jíin ró, te inuú-ni ni sáha ya jeē váha yóhó. Te súcuan cúu vésú íne ri vecāa chí vésú cuiñi ri nuū tāca tēe cújéñu, cahān rī jehē jnúhun jeē jnáma ya yohó jēē jnúhun ndaā cúu. ⁸ Chi Yaā Dios jíni yā ndese yōhyo manī rī jíin ró jíjnáhan ró, nájnūhun yōhyo manī Jesucristo jíin yó. ⁹ Te jicán tahu rī jeē na cáa ga jeē cundáhú ni rō jnáhan ró, jíin jēē na jécūhun ga ni rō te cundíchí ró jíin táca jnúhun ya. ¹⁰ Te súcuan te cuu nacāji ró táca jēē váha condiquín rō, te caca ndaā rō, te ma cóo ni ñn cuēchi siquí rō quiví ndíji Cristo. ¹¹ Te súcuan te cayā cuehē jniñu váha jeē sáha Jesucristo jíin ró. Te sáha jeē coo yíñúhún ñáyuu jíin Yaā Dios te cahān i jeē yóhyo luu cújéñu ya.

Jnúhun jeē técu nduú yó jíin Cristo

¹² Hermano, cúní rī jeē na cúcáñu ni rō jíjnáhan ró ndese ni sáha jnúndóho ni ndoho ri. Chi ni sáha jeē ni jítē núu ga jnúhun jeē jnáma ya yohó. ¹³ Chi táca soldado cáyūcú ini palacio, jíin táca gá ñáyuu, cájini i jeē íne ri vecāa jeē siquí Cristo. ¹⁴ Te siquí jeē íne ri vecāa, jeē yúcuan cúu jeē vihyá gā nihín ndeyí ni cuehē táca hermano cácandíje nuū Jítóho yō. Te cáñiyo téyí gá ni de nácani de jnúhun ya, te tu ndé ndínuu ni de.

¹⁵ Te ndaā chi sava tēe cánacani de jnúhun Cristo siquí jeē cuesún ni de jíin jēē nduxí de. Te sava ga de chí sa suhva cánacani de jnúhun ya siquí jeē váha ni de. ¹⁶ Sava de cánacani jnúhun Cristo siquí jeē nducú de jeē váha máa-ni de, te tú ndije de, chí cácu ni de jeē

nihín gā rī jnúndóho jeē íne ri vecāa. ¹⁷ Te sava ga de chí cánacani de jnúhun siquí jeē cundáhú ni de ruhū, chí cájini de jeē íne ri vecāa siquí jeē cahān rī jehē jnúhun jeē jnáma ya yohó. ¹⁸ Tú na vé sáha núu súcuan, chí táca-ni modo cascuíté núu de jnúhun Cristo, vésú núu ndije de chí tuú. Te yáha cúu jeē cúsiñ ni rī sáha.

Te suni cusíñ gā ni rī, ¹⁹ chí jíni rī jeē tāca jēē yáha sáha jeē váha ga coo jíin rí, chí cájicān tahu rō jehē rī, te Espíritu Jesucristo chindéé ñáhán yá ruhū. ²⁰ Chi ñúhun ni rī te cúu ndasí ni rī jeē ma sáha ri ni ñn jeē sáha jeē cucanu ri nuū yā. Chí sa suhva coo téyí ni rī cahān rī jnúhun ya, návāha ndujéñu ga Cristo sáha máa rí vijna, nájnūhun je ni sáha ri ññ véji ri, te vésú na cótecu rī chí vésú na cúu rī. ²¹ Chí jeē técu rī cúu jeē nduú rí jíin Cristo, te jeē cúu rī cúu jeē vihyá gā váha coo jíin rí. ²² Te núu cotecu gā rī, te cuu scáca ga rī jniñu máa Jítóho yō. Núu súcuan te tu cúcáñu ni rī ndé ñn cúu jeē váha ga, núu jeē cótecu rī chí jēē cúu rī. ²³ Chí mēhñú ndíndúú jnúhun yáha íne ñhin ri. Chí ñn cúu jeē cúní rī quihín rī condee rī jíin Cristo, chí yúcuan cúu jeē vihyá gā váha coo jíin rí. ²⁴ Te suni cánuú gá jeē cótecu gā rī jeē siquí rohó jíjnáhan ró. ²⁵ Núu súcuan te íyó ndaā ni rī jeē quéndōo ri condee gā rī jíin ró, návāha stéén gā rī nuū rō ndese caca váha ga rō jíin yá, te cusíñ gā ni rō jíin jnúhun cácandíje ró. ²⁶ Núu súcuan te condee tucu ri jíin ró, te cusíñ teyí ni rō jeē siquí ruhū, sáha máa Cristo Jesús.

²⁷ Te máa ñn-ni jeē condihví ni rō caca ndaā rō, nájnūhun cánuú caca ró siquí jeē cácandíje ró jnúhun Cristo. Yúcuan na te vésú na jíin rī coto jnáhan yó, chí condee jicá rí, te nihín rī jnúhun ro jēē cáñiñ ñhin ró jíin jnúhun ya, te cáñiyo inuú ni rō, te inuú-ni cánducú ndeyí ró siquí jnúhun jeē cácandíje yó jēē jnáma ya yohó. ²⁸ Te ma yūhú cuiñi rō sáha jeē cájito uhū rohó. Chí jeē jito uhū i róhó, yúcuan stéén jeē jnahnú ndetū i, te suni stéén jeē cácu ánuá máa ró jíjnáhan ró sáha Yaā Dios. ²⁹ Chí ni jēhe Cristo uū jeē váha nuū rō: nasūu máa ñn-ni jeē candíje ró yá, chí suni jeē na ndóho ró jēē siquí yá. ³⁰ Chí máa rí jíin róhó jíjnáhan ró, nájnūhun jeē cájejnáhan yó jíin táca jēē neé. Chí ni cajito ró jēē súcuan ni sáha máa rí, te cáñiñ rō jnúhun jeē sáha ga rī nde vijna.

Jeē ni sáha suchí yá máa yá te ni ndujéñu ya

2 Núu súcuan te sáha Cristo jeē cáñiyo ndeyí ni rō, jíin jēē cúsiñ ni rō siquí jeē váha ni yā jíin ró. Te

ndéé Espiritu yā jíin ró, te manī rō jíin jnáhan ró, te cájito ndáhú ró i. ² Núu súcuan te na cócu ga rō jíin táca jnúhun yáha, návāha cusī teyí ni rī. Te inuú-ni na cóo ni rō, te coyūcu manī rō, te inuú na cóo ánuá rō, te inuú cani ni rō. ³ Te ni in jniñu ma sáha ró jéē nducú ró jéē váha máá-ni ró, ni jéē satéyí ró maá ró. Chi sa suhva sáha suchí ró maá ró, te sáha ró cuenta jéē váha ga jnáhan ró vésú maá ró. ⁴ Te ma cóndihvī ni rō maá-ni jniñu jéē quéndōo vāha máá-ni ró, chi suni na cóndihvī ni rō jniñu jéē quéndōo vāha jnáhan ró.

⁵ Te na cáni ni rō jijnáhan ró nájñuhun ni jeni ni Cristo Jesús. ⁶ Chi máá yá kujéñu inuú yá jíin Yaā Dios, te vésú súcuan te tu ní jéni ni yā jéē kujéñu inuú yá jíin Yaā Dios. ⁷ Chi ni siaá yā jéē kujéñu ya, te ni nduu ya nájñuhun índāa mozo, te ni cacu ya ni nduu ya tēe. ⁸ Te ná ni nduu inuú yá jíin tēe, te ni sáha suchí yá maá yá. Te ni jendije ya nde jíin jnúhun jéē cúū yā, te nde jíin jnúhun canu jéē cúū yā jicā cruz. ⁹ Jéē yúcuan ní sáha Yaā Dios jéē yóhoyo ni ndujéñu luu ya, te sáhvī yá kujéñu ndasí gá nuū tāca gá síhvī. ¹⁰ Te tāca jéē cáhīn andivī jíin ñáyivī jíin chíji ñayivī, núu na cúni i síhvī Jesús te jecuiñī yití i. ¹¹ Te cahān ndaā ndivī i jéē Jesucristo cúu máá Jítóho. Te súcuan stéén i jéē yóhoyo kujéñu máá Tátá yā Yaā Dios.

Ñayuu cáandije cúu i nájñuhun quimi jéē ndíndéé

¹² Núu súcuan hermano jijnáhan ró, nájñuhun níni ní cajendije ró jnúhun ni cahān rī ná ni condee rī jíin ró, suni súcuan víhyá gā cuandije ró vijna jéē ndeé jicá rí jíin ró. Te cóndihvī ni rō jéē caca ndaā rō jíin jnúhun ní jnama ya rohó, te caca yíñuhún ró conso íyo ró núū yā. ¹³ Chi Yaā Dios jicu ya jíin ró jéē cúu ni rō sáha ró jniñu váha, te chindéé ñáhán yá rohó jéē squícu ró jniñu núnahan ni yā.

¹⁴ Ndihi jéē sáha ró, ma cahān sōo ró, ni ma tejnáhan ró, ¹⁵ návāha cuu ró séhe Yaā Dios jéē tú na cuēchi coo siquī rō te coo ndaā rō. Te caca ndoo ró méhñu ñayuu níhni ni jéē casáha néé. Chi méhñu ñayuu un stéén rō jniñu váha ró, te súcuan cácuu ró nájñuhun quimi jéē ndíndéé núū néé ñayivī. ¹⁶ Te stéén rō jnúhun ya nuū i jéē cótecu i níí cáni sáha. Te súcuan te cusī teyí ni rī quivī ndíji Cristo, chi cuni rī jéē tu ní jíca cāhá rí, ni tu ní sájniñu cāhá rí. ¹⁷ Te vésú na cúū rī jéē socō rī maá rí nuū yā jéē siquí rohó, te yúcuan cúu jéē nducú rí scandíje ga rī rohó, návāha socō rō maá ró sáha ró jniñu váha jéē cáandije ró yá. Jéē yúcuan cúsiñi ni rī, te cúni rī jéē suni cusī ni rō jíin rí jijnáhan ró. ¹⁸ Núu súcuan te na cúsiñi ni maá ró jíin rí, te inuú na cúsiñi ni yō jijnáhan yó.

Jnúhun Timoteo jíin Epafrodito

¹⁹ Te ñuhun ni rī jéē cuāha máá Jítóho yō Jesús jnúhun jéē tají yáchī rī Timoteo jéē de nuū rō, návāha ndusiñi ni rī núu na níhín rī jnúhun ndese cáhīyo ró.

²⁰ Chi tuá na inga tēe íyó yáha jéē inuú jéni ni jíin rí,

nájñuhun máá de jéē ndihvī ndije ni de jehē rō. ²¹ Chi tācá de cánducú de jéē cúu máá de, te nasūu jéē cuní Cristo Jesús. ²² Te je cájini rō jéē tēe vāha cúu Timoteo. Chi nájñuhun sēhe jíin tátá, súcuan ni jéniñu de jéē nácani de jnúhun vāha ya jíin rí. ²³ Núu súcuan te ñuhun ni rī tají rí de jéē de nuū rō, te núu je ni cucáhu ni rī ndese coo jíin rí. ²⁴ Te jéni ndije ni rī jéē cuāha Jítóho yō jnúhun jéē suni máá rí jinū yachī rī nuū rō jijnáhan ró.

²⁵ Te suni jéni ni rī jéē cánuú tají rí hermano yō Epafrodito jéē de, chi tēe sájniñu jíin rí siquī jnúhun ya cúu de te chindéé ñájñahan de jíin rí. Chi máá ró ni catají ró de jéē cuajniñu de nuū rī tāca jéē cúmanī nuū rī. ²⁶ Chi yóhoyo cúu ni de ndacoto tucu de nuū rō jijnáhan ró. Te ni cucuíhyá ndasí ni de, chi ni canihīn rō jnúhun jéē ní cocuhū de. ²⁷ Chi jendaá ni cocuhū de, te je yajni cuu de núú. Te Yaā Dios ni cundáhú ni yā de, te nasūu máñuhún-ni de, chi suni ruhū, návāha tú caa ga cucuíhyá ni rī jehē de núú. ²⁸ Jéē yúcuan cúu jéē ndihvī gā ni rī tají rí de nuū rō, návāha ndusiñi ni rō jéē ndáco-to tucu ró núū de. Te suni ruhū ma cucuíhyá ndasí gá ni rī. ²⁹ Núu súcuan te na cúsiñi ni rō jéē nájñu de nuū rō, chi cúu de hermano yō jéē candíje de maá Jítóho yō. Te coo yíñuhún ró jíin táca tēe índāa nájñuhun cáa de. ³⁰ Chi jéē siquī jniñu Cristo cúu jéē jé yajni cuu de núú. Chi ni chundeyí ni de jéē cúu de siquī jéē chindéé ñáhán de ruhū jíin jniñu jéē tu ní íyo modo sáha máá ró jijnáhan ró.

Jnúhun jéē cáca ndaā vāha yó

3 Te vijna, hermano jijnáhan ró, na cúsiñi ni rō jíin máá Jítóho yō. Ruhū chi tu jnánini ni rī jéē tēe tucu ri jnúhun yáha núū rō, chi cuajniñu jéē quéndōo vāha ga rō. ² Conditó ró máá ró nuū tēe casáha jniñu néé, jéē cándāa ná cándāa ina. Chi cánducú de stújí de róhó jéē casáha de circuncidar, te tu casáha de jniñu ndaā. ³ Te máá yó cácuu ñayuu ni cuu circuncidar ndije, chi cáchiñuhún yó nuū Yaā Dios nde jíin ini jíin ánuá yō, te cácusī ni yō jéē yihí yó ndaha Cristo Jesús, te tu ténuū yō jéē quéndōo ndaā yō jíin jniñu jéē sáha máá-ni yó. ⁴ Núu jéē súcuan cúu te ruhū chi suni cuu tenuū rī jniñu jéē sáha máá-ni ri nuú. Chi núu ndé tēe jéni ni de jéē cuu tenuū de máá de, te ruhū chi víhyá gā cuu tenuū rī maá rí. ⁵ Chi ni casáha circuncidar ruhū nuū uná quivī ná ni cacu ri. Te yucūn Israel cúu ri, te suni jnáhan yucūn Benjamín, te in hebreo sēhe hebreo cúu ri. Te suni ni cuu ri tēe grupo fariseo jéē ni squícu ri tāca ley jnáhan ñuu rī hebreo. ⁶ Te ni jito xeēn rī ñayuu cáandije, chi yóhoyo ni cóndihvī ni rī jéē ma sáma i modo ley jenahán. Te ni in tu ní cúu cahān jéē tu squícu ri ley un, chi ni squícu vāha ri. ⁷ Te tāca jéē ní tenuū rī ún, chi sáha ri cuenta jéē tu ndé níhín jniñu cuiti, chi vijna te ni candíje ri Cristo. ⁸ Te suni chíhi ri cuenta jéē vāha ga na náa ndihī jéē ní tenuū rī ún, chi vāha ndasí gá cúu jéē ni quivī ri ndaha máá Jítóho rī

Cristo Jesús. Te jeē siquĩ maá yá te ni siaá rĩ ndĩhi ún, te sáha ri cuenta jeē nájñuhun yācá-ni cúu. Chi ni quĩvĩ ri ndaha Cristo, ⁹ te ndúú yá jíin rí. Te tuá nducú rí quendōo ndaā rĩ jeē jíin ley un, chi sa suhva Yaā Dios ni ndahva yā cuēchi ri jeē ní candíje ri Cristo. Chi súcuan squendōo ndaā yā ñayuu cácandíje. ¹⁰ Te vijna te cúni rĩ jecūhun vāha ni rĩ ndese Yaā cúu ya. Te cúni rĩ jeē poder jeē ní natecu yā cone jíin rí. Te cúni rĩ ndoho ri jíin yá, te nde jinū rĩ ndoho ri nájñuhun ni ndoho máá yá jeē ní jíhĩ yā. ¹¹ Chi yōhyo ñúhun ni rĩ natecu rĩ nájñuhun ni natecu yā.

Jeē nducú ndeyĩ Pablo sínu de carrera de

¹² Te ná tu nihĩn rĩ ndĩhi jeē ni cáhān rĩ ún, ni ná tu ije ri jíin. Te nducú ndeyĩ rí siquĩ ún, chi ñúhun ni rĩ jeē nihĩn rĩ tācá un, chi jeē yúcuān cúu jeē ni níhĩn Cristo Jesús ruhū xĩhna gā. ¹³ Hermano jijnáhan ró, tu sáha ri cuenta jeē jé ni nihĩn rĩ ndĩhi ún. Te íyó ñn jeē sáha ri, cúu jeē squendōo ri tāca jéé ní cuu ichi yátá, te nducú ndeyĩ rí nihĩn rĩ tāca jéé íyó ichi núú. ¹⁴ Chi cúu un nájñuhun jeē jínu ri ñn carrera cuahān rĩ nde jinū rĩ andivĩ, te nihĩn rĩ premio jeē cuáha Yaā Dios. Chi ni cana ya yohó jéé quihĩn yō nuū yā andivĩ siquĩ jeē yĩhi yó ndaha Cristo Jesús.

¹⁵ Te tāca yó jeē jé ni ije vāha yó jíin jnúhun cándíje yó, súcuan na cáni ni yō. Te núu ndé ñn ró sñn jéni ni rō, te Yaā Dios suni stéén yā nuū rō jeē násūu súcuan cúu. ¹⁶ Te jíni ñúhún cani ni yō te caca yó modo jeē quijnáhan jíin jéé jé ni nihĩn yō.

¹⁷ Hermano, na ndácu ró rúhū jijnáhan ró. Te condēhe váha ró ndese cájica ñayuu ndaā, chi cájica i nájñuhun ni castéén rĩ nuū rō. ¹⁸ Te je ni cuu tijni jínu ni cahān rĩ jíin ró, te nde ndahyú rĩ cahán tucu ri vijna, jeē íyó cuéhē ñayuu cájica i ñn modo jeē steén jeē jíto uhū i jnúhun jeē ni jíhĩ Cristo jicā cruz. ¹⁹ Te ñn quivĩ te jnahnū ndetū ñayuu ún. Chi máni jeē cáji vāha i cúu jeē cáchiñúhún i. Te sátéyĩ i máá i jíin jniñu néé jeē jéhe jnúhun canu. Te máni máá jéé íyó ini ñayvĩ cúu jeē ndĩhvĩ ni i. ²⁰ Te máá yó chi ñayuu coyūcú andivĩ cúu yó, te cándetu yó jéé nde yūcuán ndiji Jitoho yō Jesucristo, Yaā jnáma yohó. ²¹ Te máá yá nasama ya yiquĩ cúñu ndahú yó, návāha nduu yó nájñuhun cáa máá yá jeē lúu cújéhnu ya. Te súcuan sáha ya jíin poder yā jeē cújéhnu ya siquĩ ndĩhi-ni.

Níní na cúsiĩ ni yō jíin Jítoho yō

4 Núu súcuan hermano jijnáhan ró, cuiñĩ níhĩn ró jíin jnúhun máá Jítoho yō. Chi yōhyo manĩ rĩ jíin ró, te cúni rĩ jeē coto jnáhan yó, te cúsiĩ ni rĩ jíin ró, te nájñuhun premio rĩ cácuu ró.

² Te cáhān ndahú rí jíin rōhó Evodia jíin Síntique jeē inuú na cóo ni rō, chi cácuu ró hermana jeē cácandíje ró máá Jítoho yō. ³ Te suni cáhān ndahú rí jíin rōhó, téé jeē ní chindéé ñájñáhan vāha jíin rí, jeē na chindéé ñáhán ró hermana un, chi ni casájniñu níhĩn ña jíin rí

siquĩ jnúhun jeē jnáma ya yohó. Te suni súcuan ni sáha Clemente jíin sava ga ñayuu ni sájniñu jíin rí. Te ni jecosō sihvĩ i nuū libro jeē yosó síhvĩ ñayuu cotecu ñĩ cáni.

⁴ Te níní na cúsiĩ ni rō jijnáhan ró jíin máá Jítoho yō. Te inga jínu cáhān rĩ jeē na cúsiĩ ni rō. ⁵ Sáha vāha ró jíin táca ñayuu, návāha cuni i jeē súcuan vāha ni rō. Chi máá Jítoho yō, yajni-ni cúu ya jíin ró.

⁶ Ma nácani ndasĩ ni rō siquĩ ni ñn. Chi sa cahān rō jíin Yaā Dios siquĩ tāca jéé nácani ni rō. Chi cacān tahú rō, te cahān ndahú ró, te suni nacuatáhú ró nuū yā.

⁷ Yūcuán na te sáha Yaā Dios jeē cóo ndeyĩ coo siĩ ndasĩ ni rō, te súcuan coo jíin ró nde cūhva jeē ma jécūhun ni rō ndese cúu jeē sáha ya ún. Te condito vāha ya anuá rō jíin jéé níjnūnĩ rō, coo cuehē jnúhun ndeyĩ jnúhun siĩ ni jíin ró, siquĩ jeē yĩhi ró ndaha Cristo Jesús.

Jeē na cáni ni yō siquĩ tāca jéé váha

⁸ Te ñn na jnúhun íyó, hermano jijnáhan ró. Na cáni ni rō siquĩ tāca jéé íyó ndaā, jíin jéé sáha yĩñúhún, jíin táca jniñu sáha vāha, jíin jniñu íyó ndoo, jíin táca jéé íyó mánĩ ni, jíin jéé lúu sáha. Te máni na núcūhun ni rō tāca jéé váha jeē sáha jeē nácuatáhú ró nuū yā.

⁹ Tāca jéé ni stéén rĩ nuū rō, jeē ní cacutūhva ró núú rĩ, jíin jéé ní cajini ró ní cahān rĩ, jíin jéé ní cajito ró ni sáha ri, tāca yúcuān suni na sáha máá ró. Yūcuán na te máá Yaā jeē jéhe jnúhun ndeyĩ siĩ ni, coo ya jíin ró.

Jeē ní casocō ñayuu Filipos nuū Pablo

¹⁰ Te yōhyo cúsiĩ ni rĩ sáha máá Jítoho yō, chi vijna te ni canucūhun tucu ni rō jeē chindéé ñáhán ró rúhū. Te nasūu jéé ní naa ni rō sáha ró súcuan, chi siquĩ jeē tu ní íyó modo. ¹¹ Te nasūu jéé cahán rĩ siquĩ jeē ndóho ndahú rí, chi je ni cutūhva ri cusĩ ni rĩ jíin jéé névāha ri. ¹² Jíní rĩ cotecu ndahú rí, te jíní rĩ cotecu cucá rí. Chi ni cāan ri jíin táca-ni, núu jeē ndutú chíji ri chí jéé ndóho ri sōco, núu jeē cónevāha cuehē rĩ chí jéé cúmanĩ nuū rĩ. ¹³ Ndihi-ni cúu sáha ri, chi máá Cristo jéhe ya fuerza ini rĩ. ¹⁴ Te vēsú súcuan te vāha ni casáha ró jéé ní chindéé ñáhán ró ruhū jíin jnúndóho jeē ndóho ri.

¹⁵ Te rōhó ñayuu ñuu Filipos, je cájini rō ndese ni cuu. Chi nde quivĩ ní quejéé rí nácani ri jnúhun jeē jnáma ya yohó, ná ni quenda ri Macedonia vēji ri, te ni casocō rō xūhun núú rĩ siquĩ jeē ní canihĩn rō jnúhun ya ni nacani ri. Te ni ñn grupo ñayuu cácandíje tu ní sáha súcuan, chi máá-ni rōhó jijnáhan ró. ¹⁶ Te ná íne ri ñuu Tesalónica, te ni catajĩ ró jecu jeē jíni ñúhún rí, ni jinū ñn uū jínu. ¹⁷ Te nasūu jéé nducú rí jeē cuáha ró núú rĩ, chi sa nducú rí jeē na cáyá gā jniñu váha ró, návāha cayā tahū rō nuū Yaā Dios. ¹⁸ Chi je ni nihĩn rĩ ndĩhi jeē jíni ñúhún rí, te ndóo ga. Te íyó cuéhē nuū rĩ, chi ni nihĩn rĩ jeē ní catajĩ ró vēji jíin Epafródito. Te jeē ní catajĩ ró cúu nájñuhun ñn ofrenda jeē asĩn jeén, ni casocō rō nuū Yaā Dios, te cúsiĩ ni yā jíin. ¹⁹ Te Yaā Dios chi cuāha

ya nuū rō tāca jéē cúmanī nuū rō, chi cúca ndasí yá jíin táca jéē váha jeē lúu íyó núū Cristo Jesús. ²⁰ Te na cáhán yō jeē yóhoyo luu cújéhnu Tátá yō Yaā Dios níí cáni. Amén.

Saludo jeē sándīhí

²¹ Cachi rō nuū tāca ñáyuu maá yá jeē sándeyí ni i, áchí rí, chi cá candíje i Jesucristo. Te hermano yō

cáyūcu jíin rí yáha, cácahān de jeē sándeyí ni rō jíjnāhan ró. ²² Te tāca ñáyuu maá yá jeē cáhīyo yáha, suni cácahān i jeē sándeyí ni rō. Te ñáyuu cáyūcú vehe rey cújéhnu ñuu Roma yáha, máá i cácahān gā súcuan. ²³ Te ñúhun ni rí jeē maá Jítóho yō Jesucristo, na sáha ga yā jeē váha róhó jíjnāhan ró. Súcuan na cóo. Amén.

COLOSENSES

1 Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū. Te jíín hermano yō Timoteo ² cátee ri carta yáha cuájeē nuū rohó ñáyyu ñuu Colosas, jeē cácuu ró ñáyyu maá yá jeē cá-candíje vāha nuū Cristo. Te cáñuhun ni rī jeē Tatá yō Yaā Dios na sáha ga yā jeē vāha róhó, te sáha ya jeē coo ndeyí coo síi ni rō.

Jeē jicán tahu Pablo jehē ñáyyu cá-candíje

³ Te jeē cájicān tahu rī nuū Yaā Dios, Yaā cúu Tatá maá Jítóho yō Jesucristo, te níni cánacuatahú rí nuū yā jeē siquí rohó jíínáhan ró. ⁴ Chi ni cajini jnūhun ri ndese vāha cá-candíje ró Cristo Jesús, jíín ndese cá-cundáhú ni rō táca ñáyyu maá yá. ⁵ Chi cáñuhun ni rō nihīn rō jeē ñúhun vāha nde andiví cuu ró. Chi ná ni cajini ró jnūhun ndaā jeē jnáma ya rohó, te ni caquejéé ró ñúhun ni rō. ⁶ Te jnūhun un jéé ní canacani nuū rō, chi ndúcuehē cuahān te níhín jníñu ñí cáhnu ñayiví. Te suni súcuan ni sáha jíín róhó jíínáhan ró ndé quiví ní cajini ró te ni cajecūhun ni rō jeē ndaá cúu jeē yóhoyo vāha ni Yaā Dios jíín ró. ⁷ Te jnūhun un cúu jeē ni stéén Epafra nuū rō, tēe sájniñu jíín rí jeē maní rī jíín. Chi cúu de tēe jéjníñu squícu vāha nuū Cristo jeē ndíto de róhó. ⁸ Te máá de ni castūhun núū rī siquí rohó, ndese cá-cundáhú ni rō jnáhan ró sáha máá yá.

⁹ Jeē yúcuan suni tu cájecuñí rī jeē cájicān tahu rī jehē rō, nde quiví ni níhín rī jnūhun ún te nde vijna. Te cájicān rī nuū yā jeē na jécūhun vāha ni rō te coo ndíchí ró jíín jnūhun ya, sáha máá Espíritu, návāha cu-ni rō ndíhi ndese nújnahan ni maá yá. ¹⁰ Te cájicān rī jeē caca ndaā rō nájñūhun cánuú caca ró jéé cácuu ró ñáyyu maá Jítóho yō. Te súcuan te sáha ró ndíhi jeē nújnahan ni yā, te nihīn níñu ró jíín táca jniñu vāha, te jecūhun ga ni rō ndese Yaā cúu Yaā Dios. ¹¹ Te cájicān rī jeē cuáha ya fuerza ini rō, nájñūhun íyó fuerza maá yá jeē cujéñu luu ya. Te súcuan te cuu cuandeyí ni rō jíín táca-ni jnūndóho, te cusíi teyí ni rō. ¹² Te cuu nacuatáhú ró nuū Tatá yō, chi máá yá ni chihi fuerza yohó jéé ñn cáhnu-ni jíín táca ñáyyu maá yá nihīn yō tahu yō. Chi cájica yó jíín luz yā jeē yíhi yó ndaha ya. ¹³ Chi ni jnama ya yohó jéé ni yíhi yó ndaha máá jéé jñí poder nuū néé, te ni squívi ya yohó ndaha Séhe ya jeē maní yā jíín, ndácu ya jniñu nuū yō. ¹⁴ Chi Séhe ya un ní jnama ya yohó jéé ni jíhī yā jehē yō, te ni ine cáhnu ni yā nuū cuéchi yó.

Jeē ni sáha Cristo jeē ní ndívi yó núū jnūhun maní Yaā Dios jíín yó

¹⁵ Yaā Dios jeē tu cúu coto yó, ni sáha ya jeē ní quiji Séhe ya, te súcuan ni jito yó máá yá. Te Séhe ya ún, je íyó yá nde ná tu jecōo táca jéé iyó. ¹⁶ Chi jíín Séhe ya ni sáha Yaā Dios ndíhi jeē ni jécōo, ndíhi jeē iyó andiví jíín jéé iyó ñayiví, jeē jiní yō nuū jíín jéé tu jíín yō nuū. Te suni ni sáha ya táca ndajéhé jeē cándacu jniñu, jíín jéé cándiso jniñu, jíín jéé cácujeñu, jíín jéé cájñi poder. Jíín Cristo ni sáha Yaā Dios jeē ni jécōo ndíhi, te jeē cúu Cristo cúu. ¹⁷ Te je íyó Cristo nde ná tu coo ndíhi jeē iyó. Te ndaha máá yá yíhi vāha ndíhi-ni. ¹⁸ Te máá yá cújéñu nuū ñáyyu cá-candíje, nájñūhun cújéñu xiní nuū yiquí cúñu, chi nájñūhun yiquí cúñu yā cácuu i, cúu jeē ñn na cúu i jíín yá. Te máá yá sáha jeē cotecu i ñí cáni, te xíhna gā maá yá ni natecu mēñu ndívi, návāha cujéñu ya nuū táca-ni. ¹⁹ Chi ni cusíi ni Yaā Dios jeē ndíhi ndese cúu máá yá, suni súcuan cúu Cristo. ²⁰ Te siquí jeē ni jíhī Cristo, te ni cusíi ni Yaā Dios sáha ya jeē ndívicoo táca-ni nuū jnūhun maní yā jíín, táca jéé yúcu ñayiví jíín jéé yúcu andiví. Chi jíín jéé ni jíhī Cristo jicā cruz, te ni sáha Yaā Dios jeē ndívicoo táca-ni nuū jnūhun maní yā jíín.

²¹ Te máá ró jíínáhan ró, chi síin siquí ni cahīn ró ndé saá, te ni cajito uhū rō yā ini anuá rō, chi máni jniñu néé ní casáha ró. Te vijna chi je ni sáha Yaā Dios jeē ní ndívicoo ró núū jnūhun maní yā jíín ró. ²² Súcuan ni sáha ya siquí jeē ni sócō Cristo maá yá ni jihī yā, návāha coo ndoo coo iñ rō cuiñi ró núū yā, te ma cóo jnéhén ró, te tú na cuéchi coo siquí rō. ²³ Te súcuan sáha ya núu cuiñi níhin ró jéé candíje vāha ró, te núu quendōo níhin ró jíín jnūhun vāha jeē cáñuhun ni rō jeē jnáma ya rohó, te ma siaá cuiñi rō. Chi jnūhun un ní cajini ró, te ni jite núu ñí cáhnu ñayiví. Te ruhū Pablo suni jéjníñu ri jeē nácani ri jnūhun ún.

Jeē jéjníñu Pablo siquí ñáyyu cá-candíje

²⁴ Te vijna te cusíi ni rī jeē ndóho ri jehē rō jíínáhan ró. Chi jíín yiquí cúñu rī ndóho ri jeē cúmaní gā ndoho ri jíín Cristo jehē ñáyyu cá-candíje, suu ñáyyu cúu nájñūhun yiquí cúñu yā. ²⁵ Te cúu ri tēe jéjníñu siquí ñáyyu cá-candíje, chi súcuan ni tejníñu Yaā Dios ruhū, návāha nacani ndíhi ri jnūhun ya nuū rō te quendōo vāha ró. ²⁶ Te nácani ri jnūhun ya jeē ní yisáhí, jeē tu ní cajini ñáyyu nde jenahán ndasí te nde ñí cáni vēji. Te

vijna te je ni steén cají yá jnūhun un núū ñáyuū maá yá. ²⁷ Chi ni cusīñ ni yā jeē steén yā nuū i ndese cúcúca ndasí i jíin ndīhi jeē ndíso jnūhun sāhi yáha jéē lúu cújéhnu, te cuitē núu quihīn nuū tācá nación jeē tu jíiní. Te jnūhun sāhi yáha cúu jeē ndeé Cristo ini anuá rō, ndúú yá jíin ró, te jeē yúcuan cáñuhun ni rō tāca jéē lúu jéhu jeē coo.

²⁸ Te jnūhun Cristo un cúu jeē cánacani ri, te cástfhví ni rī tāca ñáyuū, te cástéén rī jnūhun ya návāha jecūhun vāha ni i. Te súcuan te ije vāha ni ndivii i jeē yīhi i ndaha Cristo Jesús. ²⁹ Te siquī yúcuan cúu jeē sájniñu ri, chi ndīhvī ni rī nácani ri jnūhun jíin táca fuerza Cristo jeē chindéé ñájnañan ya jíin rí.

2 Chi cúní rī jeē na jécūhun ni rō ndese yōhyo ndúcú ndéyí rí jehē rō, jíin jéhē ñayuu ñuu Laodicea, jíin ndé tāca ñáyuū jeē tu ní cájini cuiti nuū rī. ² Chi cúní rī jeē coo ndeyí ni anuá i, te ñnuú-ni coyūcu mání i, te jecūhun ndīhi ni i ndese yōhyo cúcá i jíin jnúhun jeē candíje nīhin i. Chi cuni i ndese Yaā cúu Cristo, chi máá yá cúu jnūhun Yaā Dios jeē ni yísāhi un. ³ Te ini Cristo yísāhi tāca jnúhun jeē cucúca ró jíin, suu jnūhun ndíchí jíin jnúhun jécūhun ni. ⁴ Te jnūhun yáha cáhán rī jíin ró jijnáhan ró, návāha ma stahú ni ñn i rōhó jíin táca jnúhun stáhú jéē lúu cáhán. ⁵ Chi vésú ndeé jíca rí jíin ró, te ñúhun ni rī rohó, te cúsiñ ni rī jeē jíin rī ndese cájica ndaā rō te cáchandíje nīhin ró Cristo.

⁶ Núu súcuan te nájnūhun ni cajetáhú ró jeē Jítoho rō cúu Jesucristo, suni súcuan na cáca ndaā rō jíin yá. ⁷ Te na jñí vāha jnūhun ya ini rō, te na íje vāha ró jíin jnúhun cáchandíje ró yá, nájnūhun je ni cajini rō. Te níni nacuatáhú ró nuū Yaā Dios.

Jeē ndújeé yó sáha Cristo

⁸ Coto má cuāha ró jnúhun jeē stahú ni ñn ñayuu rohó jíin jnúhun ndíchí jéē tu jéjníñu, jíin jnúhun ndúxí stáhú. Chi tu cáchandíje i jnūhun Cristo, chi sa cáchandíje i tāca jéē tajnúni ñayuu, modo jeē castéén ini ñayiví yáha.

⁹ Chi ndīhi ndese cúu máá Yaā Dios, suni súcuan cúu Cristo. ¹⁰ Te ndīhi ndese cúu Cristo, suni súcuan cúu ró jíin náhan ró, chi cáyihí ró ndaha ya. Te máá yá cújéhnu nuū tāca jéē cujéhnu jíin jéē ndíso jníñu andiví. ¹¹ Te siquī jeē cáyihí ró ndaha ya, suu cúu jeē nájnūhun ni cuu ró circuncidar. Te jeē súcuan ni sáha ya circuncidar rohó, chi nasūú ñn jnūñi jeē yīhi yiquí cúñu rō cúu, chi sa suhva jeē ní sándoo ya tāca cuéchi ni casáha ró jíin modo neé máá ró. Chi súcuan cúu jeē sáha Cristo circuncidar rohó. ¹² Te jeē ní cajendute ró cúu nájnūhun jeē ní quindūji ró jíin Cristo, te suni nájnūhun jeē ní natecu rō jíin yá. Chi ni cacandíje ró jéē jíin poder Yaā Dios ni nastécu yā Cristo mēhñu ndíyí. ¹³ Chi ni cacuu ró nájnūhun ndíyí nuū yā siquī cuéchi ró, chi ná tu sáha ya circuncidar anuá rō nde saá. Te vijna te ni sáha Yaā Dios jeē cotecu rō ññ cáni jíin Cristo, chi ni ine cáhnu ni yā nuū tāca cuéchi ró. ¹⁴ Te nájnūhun jeē iyó ñn

acta jeē jicán cuēchi siquī yō jeē ni stívi yó ley yā. Te ni ndahva yā acta un, chi ni chunaa Cristo cuēchi yó jéē ni jíhi yā jicā cruz. ¹⁵ Chi ná ni jíhi yā jicā cruz, te ni quende yā ndīhi poder tāca jéneé jéē cácujuhnu jíin jéē cájnñ poder. Te ni quende yā jeē tuá cujéhnu, chi ni sáha ya jeē cuángoo nuū quíndihyū, te súcuan ni steén yā poder yā.

Na ndúcú yó jeē quéndō vāha yó ndé andiví

¹⁶ Núu súcuan te ma cuatáhú ró núu cácahān ñayuu cuēchi siquī rō, siquī ñn jeē yéji rō chí síquī ñn jeē jíhi ró, chí jéē tu nées i rō quiví víco jíin quiví núcosō yoō jíin quíví ndétátú. ¹⁷ Chi tāca ley siquī un ní jejniñu máá ndé ná tu quiji Cristo. Te vijna te ni quiji ya te tuá jíin ñúhún táca ún. ¹⁸ Ma cuāha ro jnúhun jeē cási ni ñn ñayuu jeē níhín rō tahū rō. Chi cáchiñúhún i tāca ndajéhé yā, te cácahān i jeē súcuan casáha suchí i máá i. Te cácahān i jeē cájini ndije i jeē iyó ndaā jnūhun cánacani i, te tuú. Te súcuan casáha téyí sáa-ni i máá i, chí cájeni néé ni i. ¹⁹ Te tu cáhīn i jíin Cristo, Yaā cujéhnu nuū ñáyuū cácuu nájnūhun yiquí cúñu yā chí ñn na cúu i jíin yá. Chi máá yá scuéhnu ya i jíin jnúhun ya, te nduu ñnuú ni tācá i jeē cáhije i cuahān i, nájnūhun ni jeni ni Yaā Dios.

²⁰ Núu súcuan te nájnūhun jeē je ni cajihí rō jíin Cristo, cúu jeē ní casiáá rō tāca jéē tajnúni jeē castéén ini ñayiví. Núu súcuan zte naun casáha ga rō nájnūhun casáha ñayuu ñayiví jéē jéndije ró táca jéē tajnúni i? ²¹ Chi cácahān i: Ma quehé ró ma cáji rō jeē yáha chí jéē yúcuan, ni ma jñí ró, áchi i. ²² Te máni jeē tajnúni ñayuu jíin costumbre máá i cúu te tu níhín jníñu jeē quéndō ndaā ñayuu. ²³ Te ndaā chí cájeni ni i jeē jnúhun ndíchí cúu ún, chí sáha jíin i jeē chíñúhún níhin i, jíin jéē sáha suchí i máá i, jíin jéē stóho i yiquí cúñu i. Te tu níhín jníñu cuiti jeē casí tācá jniñu néé jéē cuní i sáha i.

3 Núu súcuan te nájnūhun ni natecu Cristo, suni súcuan ni canatecu rō jeē ní cuu ró nájnūhun ndíyí ni sáha cuéchi ró. Te na cóndihvī ni rō siquī tāca jéē iyó andiví núu ndeé Cristo lado váha Yaā Dios nuū cujéhnu ya. ² Te na cáni ni rō siquī tāca jéē iyó andiví, nasūu síquī jeē iyó ini ñayiví. ³ Chi nájnūhun je ni cajihí rō jíin Cristo, te vijna chí nájnūhun cátecu rō jíin yá andiví, chí cáyihí ró ini ndaha Yaā Dios. ⁴ Te quiví ndíji Cristo, Yaā sáha jeē cótecu yō ññ cáni, yūcuán na te suni quendacoo ndijin máá ró jíin yá, te cujéhnu luu ró jíin yá.

Ñayuu jíca jíin modo cuní máá, jíin ñáyuū ní ndujeé

⁵ Núu súcuan te casí rō tāca modo cuní máá ró jeē cáhīyo ró ini ñayiví yáha. Chi ma cáca jnéni ró, ma sáha ró jniñu jnéhén, ma ndíyo ni rō sáha ró táca jniñu néé, ma cutóó ró, ma ndíyo ni rō ndajniñu. Chi tācá ndajniñu jeē ndíyo ni yō cúu nájnūhun ídolo yō jeē chíñúhún yó. ⁶ Chi siquī tācá jniñu yáha cúu jeē cuāha

Yaā Dios castigo xeēn nuū ñáyuu nīhni ni nuū yā. ⁷ Te suni jíin jniñu yáha ní cajica ró ndé saá, ná ni casáha ró súcuan. ⁸ Te vijna te na stóo ró táca jéē yáha: jeē quití ni, jeē xeēn ni, jeē sáha jniñu néé, jeē cahán ndevāha nuū jnáhan, jíin jéē cahán tāca jnúhun tú vāha. ⁹ Ma stahú ró jnáhan ró, chi yūcuan cúu modo maá ró jeē ní cajica ró jíin ndé saá, te je ni castóo ró. ¹⁰ Te ni canduu ró ñáyuu jeé, cuandacu ró máa Yaā ni sáha róhó, te cuajecūhun vāha ni rō ndese Yaā cúu ya. ¹¹ Te ñayuu ní ndujeé tuá cúu i ñayuu griego, ni ñayuu hebreo, ni ñayuu ni sáha circuncidar, ni ñayuu tu ní sáha circuncidar, ni ñayuu ñuu jicá, ni ñayuu yucú jeē ní indāa néé, ni mozo jeē ní jeen ñayuu, ni ñayuu sájniñu cuenta maá, chi inuú cúu ndihí i nuū yā. Chi Cristo cúu Jitoho ndihí i, te ndéé yá ini anuá ndihí i, ndúú yá jíin i.

¹² Chi ni nacāji Yaā Dios rohó jíin náhan ró jeē cúu ró ñáyuu maá yá jeē maní yā jíin. Núu súcuan te níni cundáhú ni rō jnáhan ró, te coo vāha ni rō jíin jnáhan ró. Te coo suchí ni rō, te coo vítá ni rō, te coo paciencia ni rō. ¹³ Cuandeyí ni rō jíin jnáhan ró, te cone cáhnu ni rō nuū i te núu na vé ni sáha i nuū rō. Chi nájnūhun ni ine cáhnu ni Cristo nuū rō, suni súcuan sáha máa ró. ¹⁴ Te jeē cánuú gá cúu jeē cundáhú ndasí ni rō jnáhan ró. Chi yūcuan sáha jeē ndúu inuú ni rō te ije vāha ni rō jíin jniñu vāha. ¹⁵ Te jnūhun coyūcu mání na cúnuú ini anuá ró sáha Yaā Dios. Chi ni cana ya rohó jéē nduu ró ñn na ñayuu jéē cóyūcu mání rō. Te níni na nácuatáhú ró núu yā.

¹⁶ Te scuáha vāha ró jnúhun Cristo návāha cunuú jnúhun ún ini anuá rō. Te stéén rō nuū jnáhan ró, te stéhví ni rō i jíin táca jnúhun ndichí yá. Te jíin salmo jíin himno, yaa íi jeē cahán jnūhun ya, na cáta luu ró jéē nácuatáhú ró ini anuá ró nuū Yaā Dios. ¹⁷ Te tācá jniñu sáha ró, núu jeē cahán ró chí jéē sáha ró cúu, ndihí na sáha ró jéē ndujéhnu síhví máa Jítoho yō Jesús, te nacuatáhú ró núu Tatá yō Yaā Dios sáha ya.

Ndese cánuú squícu ñayuu cá candíje nuū jnáhan i

¹⁸ Róhó ñahan cácuu ñasihí, cuatáhú ró nuū yā ró, chi súcuan cánuú sáha ró síquī jeē candíje ró Jítoho yō. ¹⁹ Te róhó téē cácuu yā, cundáhú ni rō ñasihí ró, te ma cútucu ni rō jíin ña. ²⁰ Róhó séhe jíin náhan ró, tācá-ni jniñu cuandíje ró núu tatá ró nuū naná ró, chi súcuan cúsiñ ni maá Jítoho yō. ²¹ Te róhó tátá jíin náhan ró, ma squití ni rō séhe ró, návāha ma cucuíhyá ni i. ²² Róhó mozo jíin náhan ró, tācá-ni jniñu cuandíje ró núu patrón rō ñayví yáha. Ma sájniñu ndúxí ró jeē maá jéē coto de te cuajnúhún de róhó. Chi na sájniñu ndaā sájniñu ndíje ró, te conso íyo ró núu Yaā Dios. ²³ Te tācá jniñu sáha ró, na cúsiñ ni rō sáha ró, te na cáni ni rō jeē nuū Jítoho yō cájejniñu ró, nasūu núu ñáyuu. ²⁴ Chi je cájini rō jeē maá Jítoho yō cuāha ya cuehē tahū cuu ró nñí cáni. Chi nuū maá Cristo cájejniñu ró, chi maá yá cúu Jítoho rō. ²⁵ Te ñayuu casáha jniñu néé, chi sa suhva

ndutahū i síquī jeē ni sáha i. Chi tu sáha Yaā Dios cuenta ndese cúu ñn ñn ñayuu, chi inuú sáha ya jíin i.

4 Róhó patrón jíin náhan ró, vāha ndaā na sáha ró jíin mozo rō. Te na núcūhun ni rō jeē suni íyó Jítoho maá ró, Yaā ndeé andiví.

² Te ndiví rō ma jécuiñí rō jeē jicán tahú rō, chi coo ndito ni rō jíin, te nacuatáhú ró núu Yaā Dios. ³ Te suni cacān tahú rō jehē rí jíin náhan ri, jeē na sáha Yaā Dios jeē cóo ga modo nacani ri jnūhun, návāha cuu cahán rí jnūhun Cristo jeē ní yisāhí, jeē tu ní cájini ñayuu jehān. Te síquī jnúhun un cúu jeē íne ri vecāa. ⁴ Te cacān tahú rō jeē cuu cahán cají rí ndese cánuú cáhān rí.

⁵ Sáha yúcún vāha ró jíin ñáyuu tu cá candíje. Ma cúhuun ni rō síquī i, chi condíhví ni rō scandíje ró i. ⁶ Te máni cahán vāha ró jíin ñáyuu, te cahán rō jnūhun cuajniñu jeē quéndōo vāha i sáha. Te cani ni rō ndese vāha nastió cúñí rō jnūhun nuū ñn ñn i.

Saludo jeē sándíhví

⁷ Tíquico cúu ñn hermano jeē maní yō jíin, te téē squícu vāha chíndéé ñájnáhan jíin rí cúu de, te jéjniñu de jíin rí nuū maá Jítoho yō. Te maá de castūhún ndihí nuū rō ndese cuahán jniñu ri. ⁸ Jeē yúcuan ní tají rí de cuajeé de nuū rō jíin náhan ró, návāha cuni rō ndese cáhíyo ri jíin jniñu, te coo ndeyí ni rō sáha de. ⁹ Te suni cuajeé Onésimo jíin de, téē cúu jnáhan maá ró jíin náhan ró. Te cúu de hermano jeē squícu vāha jeē maní yō jíin. Te ndíndúú de castūhun núu rō ndese cuahán tācá jniñu ichi cháha.

¹⁰ Sándeyí ni rō jíin náhan ró, áchí Aristarco, téē íne jíin rí vecāa. Te suni súcuan cáhán Marcos, ñani primo Bernabé. Te je ni ndacu ri jniñu nuū rō síquī Marcos, te núu ni jecondéhé de róhó te sáha vāha ró jíin de. ¹¹ Te suni súcuan cáhán Jesús, téē jeē suni nání Justo, jeē sándeyí ni rō. Te maá-ni de cácuu téē hebreo cá candíje jeē chíndéé ñáhn cáncani jnūhun jíin rí síquī ndese ndácu Yaā Dios jniñu. Te yōhyo ndeyí íyó ni rí casáha de. ¹² Sándeyí ni rō jíin náhan ró, áchí Epafras, téē cúu jnáhan maá ró, te mozo Cristo cúu de. Te níni jicán tahú ndasí de jehē rō, jeē na cúñí nīhin ró, te ije vāha ni rō jeē squícu vāha ró ndihí jniñu cúní Yaā Dios. ¹³ Chi cáhán ndaā rí jeē yóhyo ndíhví ni de jehē rō jíin náhan ró, jíin jehē ñáyuu ñuu Laodicea jíin Hierápolis. ¹⁴ Lucas, téē cúu médico jeē maní yō jíin, suni cáhán de jeē sándeyí ni rō, te suni súcuan cáhán Demas.

¹⁵ Cachi rō nuū tācá hermano ñuu Laodicea jeē sándeyí ni i, áchí rí. Te suni súcuan cahán rō jíin Ninfas, jíin táca ñáyuu cá candíje cándutútú vehe ña. ¹⁶ Te ná ni jīnu ni cacahu ró carta yáha, te suni tají ró na cáhu ñayuu cá candíje ñuu Laodicea. Te suni cahu maá ró carta jeē cuahán nuū ñáyuu Laodicea te ndíji nuū rō.

¹⁷ Te cachi rō nuū Arquipo jeē na ndúcú ndeyí de squícu de jniñu ní tee Jítoho yō síquī de, áchí rí.

¹⁸ Ruhū Pablo, yāhā-ni cúu jeē tée ri jíín ndaha máá rí, jeē sándeýí ni rō. Te nucūhun ni rō ruhū jeē íne ri

vecāa. Te ñúhun ni rī jeē na sáha ga Yaā Dios jeē váha róhó jíínáhan ró. Súcuan na cóo. Amén.

1 TESALONICENSES

1 Máá rí cúu Pablo jíin Silvano jíin Timoteo, te cátee ri carta yáha cuájeē nuū rohó ñáyuu cávandíje ñuu Tesalónica, jeē cáyihí ró ndaha Tátá yō Yaā Dios jíin Jítóho yō Jesucristo. Te cáñuhun ni rī jeē Tátá yō Yaā Dios jíin Jítóho yō Jesucristo, na sáha ga yā jeē váha rōhó, te sáha ya jeē coo ndeyí coo sīñ ni rō jijnáhan ró.

Ñayuu Tesalónica cúu i ñn ejemplo vāha

2 Níní cánacuatóhú rí nuū Yaā Dios jeē siquí rohó jíjnáhan ró, te tu náā ni rī cacān tahu rī jehē rō jeē cájicān tahu rī. **3** Te níní ndácunehen ri rohó núū Tátá yō Yaā Dios, jeē váha casáha ró táca jniñu chi cávandíje ró, jíin jéē váha cájejniñu ró núū yā chi manī rō jíin yá, jíin jéē cájendeyí ni rō chi cáñuhun ni rō jeē coo jeē váha sáha Jítóho yō Jesucristo. **4** Chi manī Yaā Dios jíin ró jíjnáhan ró hermano, te cájini rī jeē ní nacāji ya rohó. **5** Chi ná ni canacani ri jñūhun nuū rō jeē jnáma ya rohó, te nasūu jéē ni cáhān rī súcuan-ni, chi ni nacani ri jíin poder Espíritu Santo, te ni cacucáhnu vāha ni rī jeē jnúhun ndaā cúu. Te cájini rō ndese ni casáha vāha ri ná ni coyūcu rí jíin ró, chi ni nducú rí jeē quéndōo vāha ró.

6 Te rōhó jíjnáhan ró chi ni candacu ró rúhū, te suni ni candacu ró máá Jítóho yō. Chi ni cajetáhú ró jñūhun ya, te ni cacusīñ ni rō ni sáha Espíritu Santo, vēsú ni cajito ró cuehē jñūndóho siquī ún. **7** Te súcuan cácuu ró ñn ejemplo nuū ndihí ñayuu cávandíje jeē cáyūcú región Macedonia jíin Acaya jíñā. **8** Chi jeē siquí rohó jíjnáhan ró cúu jeē ní jite núu jñūhun Jítóho yō, te nasūu máni Macedonia jíin Acaya, chi suni nñí cáhnu-ni ni jite núu jñūhun ndese cávandíje ró Yaā Dios. Te jeē yúcuan tuá jíni ñúhún jeē nácani máá rí jñūhun nuū i. **9** Chi sa máá i cánacani ndese ni cajetáhú váha ró rúhū ná ni jecoo ri nuū rō, jíin ndese ni castóo ro ídolo te ni quívicoo ró ndaha Yaā Dios, Yaā ndaā Yaā técu, jeē cuajniñu ró núū yā. **10** Te cánacani i jeē cándetu ró jéē ichi ándiví ndiji Sēhe ya Jesús jeē ní nastécu yā. Te máá Jesús jnama ya yohó núū castigo xeēn jeē quíji.

Jniñu jeē ni sáha Pablo ñuu Tesalónica

2 Chi cájini rō hermano, jeē tu ní jécōo cāhá-ni ri nuū rō. **2** Te cájini rō jeē ní castóho i ruhū te ni cacahān ndevāha i nuū rī ini ñuu Filipos. Te vēsú súcuan te máá Yaā Dios ni chindéé ñáhán yá ruhū, ni sáha ya jeē ní iyo ndeyí ni rī, te ni jecoo ri ñuu rō ni canacani ri

jñūhun jeē jnáma ya rohó. Súcuan ni casáha ri vēsú xeēn ni iyo jñūndóho. **3** Te jñūhun ni canacani ri, nasūu jñūhun ni castívi ri cúu, ni nasūu jéē nihín rī siquī rō, ni nasūu jéē ní castáhú rí rohó. **4** Chi máá Yaā Dios ni jito ndee yā ruhū, te ni tejniñu ya ruhū jeē nácani ri jñūhun jeē jnáma ya rohó. Te jeē yúcuan cúu jeē cácahān rī. Te tu cácahān rī jñūhun jeē núnahan ni ñayuu, chi sa jeē núnahan ni Yaā Dios, chi máá yá jito ndee anuá rī. **5** Te cájini rō jeē tu ní cánducú rí cuajnúhún rí rohó ñn modo stahú, ni tu ní cácahān rī jeē cúsiñ ni rī jíin ró návāha nihín rī xūhun ró. Te jíni Yaā Dios jeē súcuan cúu. **6** Te ni tu ní cánducú rí jeē cuajnúhún ró ruhū, ni jeē cuajnúhún inga ñayuu ruhū, vēsú súcuan cánuú coo núú, chi apóstol Cristo cácuu ri. **7** Chi sa suhva víta ní cacahān rī jíin ró, nájñūhun sáha ñahan ndéca yiquín jéē yucún ndíto ña sēhe ña. **8** Te siquī jeē cákundáhú ndasí ni rī rohó, jeē yúcuan ní cacondihvī ni rī nacani ri jñūhun vāha Yaā Dios nuū rō. Te nasūu máá yúcuan-ni, chi suni nde vida rī cuāha ri jeē siquí rō nuú, chi yōhyo manī rī jíin ró. **9** Te cánahan ró hermano, jeē tú ni ñn ró ní stáhān rī jeē cacān rī nuū rō ná ni canacani ri jñūhun vāha Yaā Dios nuū rō. Chi ni canducú ndeyí rí ni casájniñu ndasí rí siquī jeē cótecu rī. Te nduú ñuu ni casájniñu ri.

10 Máá ró cájini rō, te suni Yaā Dios jíni yā ndese ndaā ndoo ni cajica ri nuū rohó ñáyuu cávandíje. Te ni ñn tu cúu cahān cuēchi siquī rī. **11** Te suni cájini rō ndese ni castíhvī ni rī ná ñn ná ñn ró, te ni cacahān rī jñūhun ndeyí ni jíin ró, nájñūhun sáha ñn tátá jíin sēhe de.

12 Te ni cacahān nñhin ri jíin ró jeē na cáca ndaā rō nuū Yaā Dios nájñūhun cánuú caca ró. Chi ni cana ya rohó jéē quíngoo ró núū ndácu ya jniñu, nuū luu cujéhnu ró jíin yá.

13 Te jeē yúcuan níní nácuatóhú rí nuū Yaā Dios, chi ni cajetáhú ró jñūhun ya jeē ní canacani ri. Chi ni cajini rō jeē násūu jñūhun ñn tēe cúu, chi jñūhun Yaā Dios cúu. Te máá jéndaá jeē jñūhun un sájniñu ini anuá rohó ñáyuu cávandíje nde ndacu ró yá. **14** Hermano, ñayuu ñuu rō ni cajito xeēn i rōhó, te súcuan ni candoho ró nájñūhun ni candoho ñayuu cávandíje cáyūcú región Judea jeē cáyihí ndaha Yaā Dios jíin Cristo Jesús. Chi nájñūhun ni candoho i ni sáha jnáhan i ñayuu hebreo, suni súcuan ni candoho ró. **15** Chi suu ñayuu hebreo ni cajehni de máá Jítóho yō Jesús, nájñūhun ni cajehni de táca tēe ñuu de jeē ní canacani jñūhun ya nde jehnahán. Te suni nde ruhū jíjnáhan ri ni cascúnu de. Te casáha de jniñu jeē tu núnahan ni Yaā Dios, te cúu de

contra siquĩ tãca ñáyyu. ¹⁶ Chi jésicoo de jeē ma nãcari ri jnũhun nuũ ñáyyu tãcã naciõn jeē tu jíni, nãvãha tú cãcu i. Te súcuan sãha de jeē nducuehẽ gã cuẽchi siquĩ de. Te vijna te yachĩ quiji quivĩ jeē cuãha Yaã Dios castigo xeẽn nuũ de.

Jeē cuní Pablo quicõndẽhé tucu de ñayuu Tesalónica

¹⁷ Hermano, ni cacujiyo ri ñn núnúu-ni nuũ rõ jijnãhan ró. Te vësú tu cájito jnãhan yó, te níni cáñuhun ni rĩ rohó. Te yõhyo ni cacuu ni rĩ ndacoto ri nuũ rõ jijnãhan ró. ¹⁸ Te jeē yúcuan ní cajeni ni rĩ jecoo ri nuũ rõ nuũ. Te ruhũ Pablo, tijni jínu ni nducú rí modo jeē rĩ, te Satanás ni jesi ichi ri jijnãhan ri. ¹⁹ Chi tuá na ñnga cáñuhun ni rĩ, te tuá na ñnga cácusĩ ni rĩ, chi suu máá ró jijnãhan ró. Te jeē siquĩ máá ró cúu jeē nihín rĩ premio rĩ te cusĩ teyĩ ni rĩ cuiñi yó nuũ máá Jítoho yõ Jesucristo quivĩ ndĩji ya. ²⁰ Suu jeē siquĩ rohó cúu jeē cácusĩ teyĩ ni rĩ.

3 Te jeē yúcuan tuá ni cácanda ri condetu ri nde nihín rĩ jnũhun ndese cáhĩyo ró. Te ni casãndaã rĩ jeē quẽndõ máa-ni ri ñuu Atenas. ² Te ni catajĩ rĩ hermano yõ Timoteo, tẽe jéniñũ jíni rĩ nuũ Yaã Dios siquĩ jnũhun jeē jnãma Cristo yohó. Te ni jecõndẽhé de röhó nãvãha sãha de jeē cuiñi nihín ró te coo ndeyĩ ni rõ jíni jnũhun cácandĩje ró. ³ Te ni jeē de nãvãha ma nãyũhũ ni ñn ró síquĩ tãca jnũndõho jeē sãha ñayuu. Chi je cájini rõ jeē súcuan cánuú ndoho yó. ⁴ Chi nde ná ni coyũcu rĩ jíni ró, te ni cacastũhun rĩ nuũ rõ jeē nihín nahín yó jnũndõho. Te je cájini rõ jeē súcuan ni cuu, nãjnũhun ni cacahãn rĩ. ⁵ Te jeē yúcuan, náa tuá ni cánda ri condetu ri jeē nihín rĩ jnũhun ndese cáhĩyo ró, te ni tajĩ rĩ de ni jeē de, nãvãha cuni rĩ núu cácandĩje nahín ró. Chi ni jeni ni rĩ á sanaa te jexeẽn jeē jito ndee yohó ní cundeyĩ jíni ró, te naa cãhá-ni jniñũ jeē ní casãha ri jíni ró.

⁶ Te vijna chi je ni ndee Timoteo nuũ rĩ jijnãhan ri jeē ni jéẽ de ñuu rõ Tesalónica. Te ni nacani de jeē cácandĩje vãha ró, te cácundãhũ ni rõ jnãhan ró. Te ni cachi de jeē cáñuhun ni rõ ruhũ, chi cáhĩyo manĩ rõ jíni rĩ. Te cácuni rõ ndacoto ró núu rĩ, nãjnũhun cácuni rĩ ndacoto ri nuũ rõ. ⁷ Te jeē yúcuan ní candusĩ ni rĩ siquĩ jeē cácandĩje vãha ró, hermano, vësú xeẽn iyó jnũndõho siquĩ rĩ. ⁸ Te vijna je ni cananihín ni rĩ, chi cáhĩin nihín ró jíni máá Jítoho yõ. ⁹ Núu súcuan te tu jínu cuiñi nacuatãhũ rĩ nuũ Yaã Dios jeē siquĩ rohó jijnãhan ró. Chi jito ya jeē cácusĩ ndasĩ ni rĩ jeē súcuan cáhĩyo ró. ¹⁰ Te nduú ñuú cájicãn tahú ndasĩ rĩ jeē ndãcoto tucu ri nuũ rõ, te stéẽn gã rĩ na-ni jnũhun cúmanĩ jecũhun ni rõ siquĩ jnũhun cácandĩje yó.

¹¹ Te cácuni rĩ jeē máá Tãtã yõ Yaã Dios jíni Jítoho yõ Jesucristo, na núne ya ichi jeē cuu jecoo tucu ri nuũ rõ. ¹² Te na sãha máá Jítoho yõ jeē cuehẽ ndasĩ gã cundãhũ ni rõ jnãhan ró jíni tãca gã ñayuu, nãjnũhun cácundãhũ ni rõ rohó jíniãhan ró. ¹³ Te na sãha ya jeē jje ánuã rõ jeē cuiñi nihín ró, nãvãha coo ndoo ró jéẽ

ma cóo cuẽchi ró núu máá Tãtã yõ Yaã Dios, quivĩ ndĩji Jítoho yõ Jesucristo jíni tãca ñáyyu yñi ndaha ya.

Siquĩ jeē caca ndaã yõ modo jeē cúsiñ ni yã

4 Te vijna hermano, iyó ñnga jnũhun jeē cácahãn ndahú rĩ jíni ró te cáhãn nihín ri jíni ró, chi súcuan cúni máá Jítoho yõ Jesús. Je ni castéẽn rĩ nuũ rõ ndese cánuú caca ndaã rõ nãvãha cusĩ ni Yaã Dios. Te cácahãn ndahú rĩ jíni ró jeē sa víhyã gã na cáca ró súcuan.

² Chi je cájini rõ na jniñũ ni candacu ri nuũ rõ jeē ní ndacu máá Jítoho yõ Jesús. ³ Te cúni Yaã Dios jeē na cóo ndoo coo iĩ rõ nuũ yã, te ma cáca jnéni ró. ⁴ Te ná ñn ná ñn ró na cóndeca yíñũhũn ró ñasihĩ máá ró, te súcuan caca ndoo ró. ⁵ Te ma sãha ró jniñũ néẽ jéẽ ndiyo ni rõ jesiñi, nãjnũhun cásaãha ñayuu tãcã naciõn jeē tu cájini i jnũhun Yaã Dios. ⁶ Ni ñn ró ma sãha ró cuẽchi jeē quẽnde rõ ñasihĩ jnãhan ró. Chi máá Jítoho yõ cuãha ya castigo xeẽn nuũ ñáyyu casãha tãcã jniñũ súcuan, nãjnũhun je ni cacahãn nihín ri ni castũhun rĩ nuũ rõ. ⁷ Chi tu ní cána Yaã Dios yohó jéẽ sãha yó jniñũ jnéhẽn, chi sa jeē caca ndoo yó. ⁸ Núu súcuan te ñayuu jeē squéhichĩ jnũhun yãha, nasũu jnũhun ñn tẽe squéhichĩ i, chi sa jnũhun Yaã Dios, Yaã ni jéhe Espiritu Santo nuũ yõ.

⁹ Te tu jíni ñũhũn jéẽ tẽe ri nuũ carta yãha jéẽ coo manĩ rõ jíni tãca hermano, chi je ni steẽn Yaã Dios nuũ rõ jeē coo manĩ rõ jíni jnãhan ró. ¹⁰ Te je cáhĩyo manĩ rõ súcuan jíni tãca hermano cáyũcu ñĩ cáhnu Macedonia jíñã. Te cáhãn ndahú rĩ jíni ró hermano, jeē sa víhyã gã na cóo manĩ rõ jíni i. ¹¹ Te na cóndihvĩ ni rõ coyũcú nayúú ró, te ma cóndihvĩ ni rõ siquĩ ndese cásaãha jnãhan ró, chi condihvĩ ni rõ sãha ró jniñũ máá ró, nãjnũhun ni candacu ri nuũ rõ. ¹² Súcuan na sãha ró nãvãha ñayuu tu cándĩje, cuatãhũ i röhó, te suni ma cúmanĩ jeē cotecu rõ.

Siquĩ jeē ndĩji Jítoho yõ

¹³ Suni cácuni rĩ, hermano, jeē na jécũhun ni rõ jijnãhan ró síquĩ ñáyyu cájihĩ, nãvãha ma cucuihyã ni rõ nãjnũhun sava ga ñayuu jeē tu cáñuhun ni i jeē nátecu ndiĩ. ¹⁴ Chi nãjnũhun cácandĩje yó jéẽ ni jíñi Jesús te ni natecu yã, suni súcuan cácandĩje yó jéẽ nastecu Yaã Dios tãca ñáyyu ni cacandĩje nuũ Jesús te ni cajihĩ.

¹⁵ Jeē yúcuan cácastũhun rĩ ñn jnũhun jeē ní castũhun máá Jítoho yõ nuũ rĩ: Jeē yohó jéẽ cátecu gã quivĩ ndiji máá Jítoho yõ, nasũu máá yó cosnũu jéẽ ndaa yó quihĩn yõ. Chi xĩhna gã ñayuu je ni cajihĩ ndaa i quihĩn i. ¹⁶ Chi máá Jítoho yõ nuu ya quiji ya ichi ándivĩ, te cana jee ya jeē máá yã ndãcu jniñũ, te cana jee ndajéhe cújẽhnu ga, te cuecu trompeta Yaã Dios. Te xĩhna gã natecu tãca ndiĩ jeē ní cacandĩje Cristo. ¹⁷ Yũcuán na te yohó jeē cátecu gã yõ quivĩ ndiji ya, suni ndonehen ya yohó jíni i, quihĩn yõ mẽhũn vícõ. Te naquijnãhan yó jíni máá Jítoho yõ sava ándivĩ. Te súcuan condee yõ ñĩ cáni jíni máá Jítoho yõ. ¹⁸ Núu

súcuan te jíin jnúhun yáha cahān ndeyí ni rō jíin táca jnáhan ró.

5 Te tu jíni ñúhún jeē tée ri nuū carta yáha síquī cuiyā chí quivī jeē coo tācá un, hermano. ² Chi je cájini vāha ró jeē ñn sanaa ni yō te quee quivī ndíji máá Jítóho yō, nájnūhun ñn sanaa ni yō te quíji ñacuīh-ná jecuāā. ³ Chi ná-ni cácahān ñayuu jeē nayúú-ni ñn te tú na jnūndóho coo, te ná-ni cácahān i súcuan te ñn sanaa ni i te quíji jnūndóho síquī i jeē náā i, te ma cácu cuiñi i. Chi quíji quivī un nájnūhun ñn sanaa-ni te quejéé jéhdē chíji ñn ñahan scácu sēhe. ⁴ Te rōhó hermano, tu cácu ró ñáyuu cájica nájnūhun nuū néé jeē ñn sanaa-ni te quíji quivī un síquī rō nájnūhun quíji ñacuīhná. ⁵ Chi ndihí ró cácu ñayuu jeē nájnūhun cájica ró nduú, chi stéén luz yā ini anuá rō. Chi tu cácu yó nájnūhun ñayuu jeē tu jécūhun ni síquī Yaā Dios, jeē nájnūhun cájica i nuū néé. ⁶ Núu súcuan te ma cúhuun ni yō nájnūhun ñayuu cáquixī, chi sa ndito na cóo ni yō te coo cájī xínī yō. ⁷ Chi jecuāā cúu jeē cáquixī ñayuu, te suni jecuāā cúu jeē nájini i. ⁸ Te máá yó chi nájnūhun jeē cájica yó nduú, te na cóo cájī xínī yō. Te na cúcutú yó jíin jnúhun cándíje ñihin yó jíin jnúhun cúndáhú ni yō jnáhan yó, nájnūhun cúcutú soldado jíin sahma cáa. Te na cúcutú yó jíin jnúhun jeē cáñuhun ni yō jeē cācu yó, nájnūhun cúcutú soldado jeē ñúhun lélú cāa xínī de. ⁹ Chi Yaā Dios tu ní jéni ya yohó jeē cuáha ya castigo yohó, chi sa suhva jeē jnama ya yohó sáha máá Jítóho yō Jesucristo. ¹⁰ Te máá yá ni jihī yā jehe yō, návāha cotecu ñnuú yó jíin yá, vēsú núu cotecu gā yō ñayivī yáha chí cúu yō. ¹¹ Núu súcuan te cahān rō jnúhun ndeyí ni jíin táca jnáhan ró, te scuéhnu jnáhan ró jíin jnúhun ya, nájnūhun je casáha ró.

Jeē jéni ichí Pablo tācá hermano

¹² Te cácahān ndahú rí jíin ró hermano, jeē cuatáhú ró tēe cájéñiñu cándito rōhó, jeē cácujuhnu de nuū rō jíin jniñu máá Jítóho yō, te cájéni ichí de rōhó. ¹³ Te coo

yíñúhún ndasí ró nuū de, te coo manī rō jíin de síquī jniñu ya jeē casáha de. Te na cóyūcu manī rō jíin táca jnáhan ró.

¹⁴ Te suni cácahān ndahú rí jíin ró hermano, jeē na stíhví ni rō ñayuu cájica cúxí. Te cahān rō jnúhun ndeyí ni jíin ñáyuu jeē yachī ndínuu ni i. Te chindéé ñáhán ró ñayuu jeē tu fuerza ini. Te cuandeyí ni rō jíin ndihí ñayuu.

¹⁵ Te coto má nasáha ndevāha ro jíin ni ñn ñayuu te núu sáha ndevāha i jíin ró. Chi máni jeē váha nducú ró sáha ró jíin táca jnáhan ró jíin ndihí-ni ñayuu.

¹⁶ Níní na cóo síñ ni rō jijnáhan ró. ¹⁷ Te níní na cácan tahú rō. ¹⁸ Te nacuatáhú ró jeē síquí tācá-ni. Chi súcuan cúní Yaā Dios jeē sáha ró jeē cácañíje ró Cristo Jesús.

¹⁹ Te ma cási rō nuū jniñu jeē sáha Espíritu Santo jíin ró. ²⁰ Te ni ma cujéé ni rō nuū jnúhun cácahān tēe cá-nacani jnúhun Yaā Dios. ²¹ Chi coto ndee rō tāca jnúhun, te núu jeē váha cúu, te cuatáhú ró. ²² Te ma quivī nduu rō jíin ni ñn jniñu néé.

²³ Te máá Yaā Dios jeē jéhe jnúhun ndeyí síñ ni, ñúhun ni rī jeē sáha ndihí ya jeē cóo ndoo coo ññ rō nuū yā. Te ñúhun ni rī jeē cóndito vāha ya anuá rō jíin jéé ñijnūñi rō, jíin yiqui cúñu rō, návāha tú na cuēchi coo síquī rō quivī ndíji máá Jítóho yō Jesucristo. ²⁴ Chi Yaā jeē ní cana rōhó, sáha ya ndihí un jíin ró, chi síqucu ya jeē ni jéjnūhun ya.

Saludo jíin bendición jeē sándíñí

²⁵ Hermano jijnáhan ró, cacān tahú rō jehē rī jijnáhan rī.

²⁶ Te núu na cáhán rō jíin táca hermano, te techūhu yíñúhún ró ndaha i.

²⁷ Te cáhán ñihin ri jíin ró, chi súcuan cúní máá Jítóho yō, jeē na cáhu ró carta yáha núu tācá hermano.

²⁸ Te ñúhun ni rī jeē máá Jítóho yō Jesucristo na sáha ga yā jeē váha rōhó. Súcuan na cóo. Amén.

2 TESALONICENSES

1 Máá rí cúu Pablo jíin Silvano jíin Timoteo, te cátee ri carta yáha cuájeē nuū rohó ñáyuu cávandíje ñuu Tesalónica, jeē cáyihí ró ndaha Tátá yō Yaā Dios jíin Jítóho yō Jesucristo. ² Te cáñuhun ni rí jeē Tátá yō Yaā Dios jíin Jítóho yō Jesucristo, na sáha ga yā jeē váha rōhó, te sáha ya jeē coo ndeyí coo síi ni rō jijnáhan ró.

Jeē sándaā yā cuēchi quivī ndíji Cristo

³ Cánúú jéē niní nacuatahú rí nuū Yaā Dios jeē siquí rohó jíináhan ró hermano. Chi súcuan iyó váha, chi yōhyo váha cuahije ró jíin jnúhun jeē cávandíje ró yá, te yōhyo cuanducuehē jeē cávandáhú ni rō táca jnáhan ró. ⁴ Te jeē yúcuan cúu jeē cácusī teyí ni rí cá-nacani ri jnúhun ró núú táca grupo ñayuu cávandíje nuū Yaā Dios. Chi váha cávandíje ró, te váha cájendeyí ni rō jeē cájito xeē ñayuu rohó jíin jéē cándoho ró táca gá jnúndóho. ⁵ Te jíin táca jéē yáha chíhi ya cuenta jeē cácuu ró ñayuu váha jeē quívicoo ró ñuu nuū ndácu ya jniñu. Chi siquí ñuu un cúu jeē cándoho ró. Te jeē súcuan chíhi ya cuenta siquí rō, yáha stéén nuū yō jeē váha Yaā cúu ya.

⁶ Te suni iyó váha jeē nastóho ya ñayuu castóho rōhó. ⁷ Te quivī ndíji Jítóho yō Jesús, quivī un sáha Yaā Dios jeē ndétatu rōhó jéē cándoho, te suni ruhū jijnáhan ri. Chi jíin yáñuhūn quiji Jesús ichi ándiví jíin táca ndajéhé yā jeē ndíso poder. ⁸ Te cuāha ya castigo nuū ñayuu jeē tu ní cájēhe i jnúhun cuni i ndese Yaā cúu Yaā Dios, te tu ní cájetáhú i jnúhun máá Jítóho yō Jesucristo jeē jnáma ya i. ⁹ Te ñayuu ún chi ndoho i nēí cáni, chi cujiyo i nuū máá Jítóho yō, te ma cúu quívicoo i nuū lúu ndasí cújéhnu ya jíin poder yā. ¹⁰ Súcuan sáha ya quivī ndíji ya jeē lúu cujéhnu ya sáha ñayuu cávandíje jeē yíhi ndaha ya. Te nahán naa ni i coto i nuū yā. Te suni súcuan rōhó jíináhan ró, chi ni cacandíje ró jnúhun jeē ní canacani ri nuū rō.

¹¹ Te jeē yúcuan cúu jeē niní cájicān tahu rí jehē rō, jeē na cúu ró ñayuu váha jeē ní cana ya rohó. Te jíin fuerza yā na sáha ya jíin ró jeē squícu ró táca jniñu váha jeē ní catee ni rō sáha ró síquī jeē cávandíje ró. ¹² Te súcuan te cujéhnu máá Jítóho yō Jesucristo sáha ró, te suni cujéhnu máá ró jijnáhan ró sáha ya. Chi Yaā Dios yō jíin Jítóho yō Jesucristo, súcuan cúu jeē sáha ya jeē váha yóhó.

Jnúhun siquí maá téē sáha xeēn cuēchi

2 Vijna te cahān rí siquí jeē ndíji máá Jítóho yō Jesucristo jíin jéē ndutútú yó núú yā. Cácahān ndahú rí jíin ró jijnáhan ró hermano, ² jeē ma cuáha ró jnúhun sacā nuu cani ni rō, ni ma cunéé ni rō núu cácahān ñayuu jeē jé ni quee quivī ndíji máá Jítóho yō. Ma candíje cuiti rō vésú núu cahān i jeē ni níhīn i ñn jnúhun siquí un núu Espíritu, chí ñn jnúhun jeē ni cáhān ñnga, chí núu cachi i jeē ruhú jijnáhan ri ni tají ñn carta jeē cahān súcuan. ³ Ma cuáha cuiti rō jnúhun jeē stahú ni ñn i rōhó. Chi nde ná tu quiji quivī ún te xīhna gā ndunīhni ni cuehē ñayuu nuū yā, te quenda ndijin máá téē sáha xeēn cuēchi, te téē jnáhnū ndetū cúu máá téē ún. ⁴ Chi téē jito uhū Yaā Dios cúu de, te ndonda de contra siquí táca jéē casnání i yaā i jíin táca jeē cáchiñúhún i. Te xeēn gā sáha de, chi nde cucōo de ini templo Yaā Dios jeē iyó Jerusalén, te cahān de jeē maá de cúu Yaā Dios.

⁵ ¿A cánahán ró jnúhun yáha? Chi súcuan ni cahān rí jíin ró ná ni iyo ri jíin ró. ⁶ Te je cájini rō ndé vé cúu jeē jési jeē ná tu quenda ndijin téē ún, chi nde na quee quivī maá de. ⁷ Chi je jícu sāhi táca cuēchi xeēn ini ñayiví, te vijna chi iyó jéē jési nuū, návāha ma cáa ndasí gá cuēchi, chí nde na cújiyo máá jéē jési nuū. ⁸ Te sáá te quenda ndijin maá téē xeēn ún. Te máá Jítóho yō Jesús cahni ya téē un jíin táchī yuhu-ni ya, te jíin jéē ndíndēe yá ndíji ya te snáhnū ndetū yā de. ⁹ Te jeē quiji téē xeēn ún chi máá Satanás sáha. Te quiji de jíin cuéhē poder, te sáha de táca jniñu jénu jeē stahú de, jeē nahán naa ni ñayuu coto i. ¹⁰ Te jíin táca jniñu néé te stahú ndasí de ñayuu jeē jnahnú ndetū, chí tu ní cúní i cuatáhú i jnúhun ndaā jeē cácu i núú. ¹¹ Te jeē yúcuan cuāha Yaā Dios jnúhun jeē cuatáhú i jnúhun jeē tú ndaā cuiti, te candíje i jnúhun stahú un. ¹² Te súcuan te jecondee cuēchi siquí ndíhi i jeē tu ní cávandíje i jnúhun ndaā, chí sa jniñu néé ni cacusiñ ni i jíin.

Ñayuu jeē ní nacāji ya jeē cácu i

¹³ Te cánúú jéē niní nacuatahú rí jijnáhan ri nuū Yaā Dios jeē siquí rohó jéē cácuu ró hermano jeē maní Jítóho yō jíin. Chi nde ná ni jecōo ñayiví, te je ni nacāji Yaā Dios rohó jéē jnáma ya rohó. Chi sáha Espíritu yā jeē cáhīyo ndoo cáhīyo i rō nuū yā te cávandíje ró jnúhun ndaā. ¹⁴ Chi jeē yúcuan ní cana ya rohó jíin jnúhun jeē

jnáma ya yohó jeē ní canacani ri, návāha quīvicoo ró núū cujéhnū luu ró jíín máá Jítóho yō Jesucristo.

¹⁵ Núu súcuan te cuiñi nīhin ró hermano, te conahán váha ró jnúhun jeē ní cacutūhva ró núū rī, núu jeē ní cacahān rī chí jéē ní tee ri nuū carta. ¹⁶ Máá Jítóho yō Jesucristo jíín Tátá yō Yaā Dios ni cundáhú ni yā yohó, te ni sáha ya jeē coo sīñ ni yō niñ cáni, jíín jéē ñúhun ni yō tāca jéē váha jeē coo siquī jeē váha ni yā jíín yó.

¹⁷ Te na sáha ga yā jeē cóo ndeyí ni anuá rō jijnáhan ró, te na sáha ya jeē íje ró cáhān rō tāca jnúhun váha ya, te sáha ró tāca jniñu váha.

Jeē na cácan tahu i jehē de

3 Te íyó inga jnúhun cánuú, hermano. Na cácan tahu rō jehē rī jijnáhan ri, návāha yachī cuitē núu jnúhun máá Jítóho yō, te cuatáhú váha ñayuu, nájnūhun ni cajetáhú máá ró. ² Te suni cacān tahu rō jeē na cácu ri nuū tāca tée casáha néé jéē cátejnahān jíín rí. Chi tú ndihī tée cácanđije jnúhun ya. ³ Te máá Jítóho yō chí vāha squícu ya jeē ni jéjnūhun ya, te sáha ya jeē íje ni tāca ró jíín jnúhun ya, te coto ya rohó núū jeneé. ⁴ Te cácucahnū ni rī sáha máá Jítóho yō, jeē cócuu ró jíín jniñu jeē ní candacu ri nuū rō, te suni cocuu ga rō jíín. ⁵ Te ñúhun ni rī jeē maá Jítóho yō steén gā yā ndese coo manī gā rō jíín Yaā Dios nde jíín ini jíín ánuá rō, jíín jéē cuándeýí ni rō nájnūhun ni sáha Cristo.

Jeē cánuú sájniñu yó

⁶ Te cándacu ri jniñu nuū rō hermano, chí súcuan ni ndacu máá Jítóho yō Jesucristo, jeē na cújiyo ró núū tācá hermano cájica cúxí te tu cájica vāha de nájnūhun ni castéén rī nuū rō. ⁷ Chi je cájini rō ndese cánuú

ndacu ró rúhū jijnáhan ri, chí tu ní cájica cúxí rí ná ni cahīyo ri jíín ró. ⁸ Ni tu ní cáyeji rī staā ni ñn ró súcuan-ni, chí ni cachunaa rī. Chi sa ni canducú ndeyí rí ni casájniñu téyí rí nduú ñuú, návāha ma stáhān rī ni ñn ró. ⁹ Te vēsú íyó derecho rī jeē cacán rī nuū rō nuú, te tu ní cájicān rī, chí súcuan ni casáha ri návāha cuu ri ñn ejemplo nuū rō ndese sáha ró jijnáhan ró. ¹⁰ Chi ná ni coyūcu rí jíín ró, te ni candacu ri jniñu yáha nuū rō: Núu ndé ñn ñayuu tu cúní i sájniñu i, te suni ma cáji i núu súcuan. ¹¹ Chi ni canihīn rī jnúhun jeē cájica cúxí sava ró, te tu casájniñu ró, chí yāha yúcuan-ni sáha ró. ¹² Te cándacu ri jniñu nuū rohó jéē casáha súcuan, te cástíhví ni rī rohó jeē na cóo nayúú ró te sájniñu ró, návāha nihīn rō jeē cáji rō siquī jniñu sáha máá ró. Chi súcuan ndácu máá Jítóho yō Jesucristo jniñu.

¹³ Hermano, ma ndínuu ni rō jijnáhan ró sáha ró tāca jniñu váha. ¹⁴ Te núu ndé ñn i tu jétáhú i jnúhun jeē cahán rī nuū carta yáha, te condēhe váha ro ndé-ni i cúu, te ma quijnáhan ga rō jíín i, návāha na cúcanu i te nacani ni i. ¹⁵ Te nasūu jéē cóto uhū rō i, chí sa cahān rō jíín i nájnūhun jíín ñani rō jeē na sájniñu vāha i.

Bendición jeē sándñhí

¹⁶ Te ñúhun ni rī jeē maá Jítóho yō, Yaā jeē jéhe jnúhun ndeyí sīñ ni, níni na sáha ya jeē coo ndeyí coo sīñ ni rō siquī tācá-ni, te coo ya jíín ró jijnáhan ró.

¹⁷ Ruhū Pablo, yāhá-ni cúu jeē tée ri jíín ndaha máá rí jeē cahán rī jeē sándeýí ni rō jijnáhan ró. Te súcuan jéhe ri firma nuū tāca carta rī, návāha cuni rō jeē carta máá rí cúu. Súcuan cáa letra rī. ¹⁸ Te ñúhun ni rī jeē maá Jítóho yō Jesucristo, na sáha ga yā jeē váha ró jijnáhan ró. Súcuan na cóo. Amén.

1 TIMOTEO

1 Máá rí cúu Pablo, apóstol Jesucristo, chi Yaā Dios jeē jnáma yóhó, jíin Jítóho yō Jesucristo jeē ñūhun ni yō coto yó, ni catají yá ruhū jeē nácani ri jñūhun ya. ² Te téee ri carta yáha cuájeē nuū rō Timoteo, chi cúu ndije ró nájñūhun sēhe ri siquī jeē ni scándije ri rohó. Te ñūhun ni rī jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo siñ ni rō.

Jeē ma candíje i tāca jnúhun stáhú

³ Ná ni quihin ri ichi jeē quihín rī Macedonia, te ni cahān ndahú rí jíin ró jeē quéndōo ró ñuu Efeso. Te suni súcuan cáhán rī jíin ró vijna, návāha cahān ñihin ró jíin sava ñayuu yúcuan jeē ma stéén i ñga jñūhun jeē tú ndaā. ⁴ Te ma cuatáhú i tāca jnúhun jeē cúu máa cuento-ni, jíin jnúhun jeē cahán siquī ndese vēji yucūn tāca jíi yō. Chi tāca jéē yúcuan sáha jeē nahán cánda-jñūhún i siquī, te tu ndé jéjñíñu, te tu sáha jeē ije i squícu i nuū Yaā Dios siquī jñūhun cácandíje yó.

⁵ Te ndácu ri jñiñu yáha chi cúní rī jeē na cundáhú ni i jnáhan i siquī jeē iyó ndoo iyó ndaā anuá i, te cácandíje ndije i ya. ⁶ Te sava ñayuu chi ni cajica yátá i, te ni cascuíta i jñūhun ya, ni quívicoo i nuū tāca jnúhun jeē tu ndé jéjñíñu. ⁷ Chi cácu ni i cuu i maestro ley yā, te ni tu cájecūhun ni i na jñūhun cúu jeē cácahān i, jíin na vé cúu jeē castéén ñihin i.

⁸ Te jíiní yō jeē iyó váha ley un, te núu jecūhun ni yō ndese jéjñíñu. ⁹ Chi cánuú sáha yó cuenta jeē tu ní jécōo ni ñin ley jeē siquí ñayuu ndaā, chi sa suhva siquí ñayuu jeē tu cájetáhú, jeē níñni ni, jeē casáha jñiñu néé, jeē casáha cuēchi, jeē tu cáchiñúhún Yaā Dios ni tu cácandíje ley yā, jeē cájehni tatá jíin náná, jíin jéē cájehni ndíyí. ¹⁰ Te suni ni jecōo siquí ñayuu cájica jnéni, jíin téee casáha ndíyí jíin jnáhan yíí, jíin ñayuu casacuíh-ná ñga ñayuu, jíin ñayuu castáhú, jíin ñayuu cácahān ñihin jñūhun yáa. Te ni jecōo siquí tāca gá ñayuu jeē casáha jñiñu tu quíjñáhan jíin jnúhun ya jeē steén ndaā váha. ¹¹ Te jñūhun ya un cúu jñūhun yōhyo jéñu jeē jnáma Yaā Dios yohó. Te yōhyo ndetū Yaā cúu ya. Te ni tejñíñu ya ruhū nácani ri jñūhun ya.

Jeē nácuatáhú Pablo siquí jeē ní cundáhú ni yā de

¹² Te nácuatáhú rí nuū Jítóho yō Jesucristo, Yaā ni jéhe fuerza ini rī, chi ni quihin ya ruhū ni sáha ya jeē cuu squícu ri, te ni tejñíñu ya ruhū nácani ri jñūhun ya.

¹³ Te súcuan ni sáha ya jíin rí vēsú ni cahān ndevāha ri

siquí yā nde saá, te ni sáha ndevāha ri jíin ñáyuu cá-candíje, te xeēn ni sáha ri. Te vēsú súcuan te ni cundáhú ni yā ruhū, chi ná tu candíje ri yā nde saá, te tu ní jécūhun ni rī na vé cúu jeē sáha ri. ¹⁴ Súcuan ni sáha Jítóho yō jeē váha ndasí jíin rí. Te ni sáha ya jeē candíje ri jíin jéē cundáhú ni rī jnáhan ri siquí jeē ni quívi ri ndaha Cristo Jesús.

¹⁵ Te ndaā ndije cúu jñūhun yáha, te jeē cánuú candíje ndíhi ñayuu cúu: jeē ní quiiji Cristo Jesús ini ñayívi návāha jnama ya ñayuu iyó cuēchi. Te ruhū cúu téee jeē vihyá gā ni sáha cuēchi. ¹⁶ Te ni cundáhú ni Yaā Dios ruhū, návāha jíin ruhū jeē vihyá gā ni sáha cuēchi te stéén Jesucristo ndese yōhyo íne cáhnu ni yā. Te súcuan ni sáha ya jeē cúu ri ñin ejemplo nuū tāca ñáyuu candíje ñíí cuáhān yō, návāha ñihin tahú i cote-cu i ñíí cáni. ¹⁷ Núu súcuan te ñíí cáni na cáhán yiñúhún yó jeē yōhyo luu cújéñu máa Yaā jeē cúu Rey siquí ndíhi, jeē técu ñíí cáni, jeē tu náa cuíti. Te tu cúu coto yó núu yā vijna, te máa ñin-ni ya iyó, te ndíchí yá. Amén.

¹⁸ Nájñūhun sēhe ri cúu ró Timoteo, te jñiñu yáha téjñíñu ri rohó, jéē na ndúcú ndeyí ró siquí jñiñu váha. Te na cándíje váha ró, te na cóo ndaā anuá rō. Chi nde saá je ni cacahān tāca hermano jíin jnúhun Yaā Dios jeē súcuan condiso jñiñu ró. ¹⁹ Chi sava ñayuu tuá iyó ndaā anuá i nuū yā, te ni casnáa i jñūhun cácandíje i. ²⁰ Himeneo jíin Alejandro cúu uū téee ni casáha súcuan. Te je ni siaá rī de nuū Satanás, jeē stóho ún de, návāha jíin jnúndóho ún te cutūhva de jeē ma cáhán ndevāha ga de siquí Yaā Dios.

Siquí ndese cacān tahú yō

2 Núu súcuan te xīhna gā ndácu ri jeē cacān tahú rō jehē tāca ñáyuu. Te cahān ndahú ró jehē i, te cacān rō na-ni na vé jíiní ñúhún i, te nacuatáhú ró nuū yā jeē siquí i. ² Te cacān tahú rō jehē tāca téee cácujeñu jíin jéē ndácu jñiñu, návāha sáha de jeē cuu coyūcu váha yó te tú na jñúndóho coo siquí yō, te cuu chiñúhún váha yó Yaā Dios te sáha yíñúhún yó jíin táca-ni. ³ Chi yāha cúu jeē váha jeē nújñahan ni Yaā Dios, Yaā jnáma yóhó. ⁴ Chi máa yá cuní yā jnama ya tāca ñáyuu te cuní i ndese iyó jnúhun ndaā yā. ⁵ Chi iyó ñin-ni Yaā Dios, te suni iyó ñin-ni Yaā jeē cahān jíin Yaā Dios jehē ñáyuu. Te Yaā un cúu máa Jesucristo jeē ní nduu téee. ⁶ Te ni socō yā maá yá ni jihí yā jeē ní chunaa yā cuēchi ndíhi yó. Te ná ni quiiji máa quívi ún, te ni quejéé ní canacani jñūhun ún. ⁷ Te jeē siquí yúcuan ní

jeni ya ruhū cúu ri apóstol jeē nácani ri jnūhun ya, návāha stéén rī nuū ñáyuu tǎcá nación jeē tu jíni jnūhun ya, jeē na cándíje i jnūhun ún te sáha i jniñu ndaā. Te siquī jeē cándíje ri Cristo te ndaā cúu jeē cahán rī.

⁸ Núu súcuan te cúni rī jeē ndihi-ni lugar na cǎcán tahú tǎca tée. Te na cóo ndoo ánuá de jeē ma quití ni de ni ma tejnáhan de. ⁹ Te suni súcuan tǎcá ñahan, na cǎsi vāha ña máá ña nájnūhun cánuú, návāha ma cóo jnūhun canu. Te ma cóndihvī ni ña jeē sáha luu ndasí ña xinī ña, chí jéé cuhun ña siquī oro chí perla chí sah-ma váha ga. ¹⁰ Chi sa suhva na quéndōo luu ánuá ña jíin jniñu váha sáha ña, nájnūhun cánuú sáha ñahan ndoo ánuá jeē cájejniñu nuū Yaā Dios. ¹¹ Te núu cáhiin ña jíin ñáyuu cascuáha jnūhun ya, te na cúni nahín ña te cuatáhú ña. ¹² Chi tu jéhe ri jnūhun jeē steén ñahan nuū ñáyuu ndutútú, ni jeē ndácu ña jniñu nuū tēe. Chi sa suhva na cúni nahín ña. ¹³ Chi xīhna gā Adán ni sáha ya, te sáa te ni sáha ya Eva. ¹⁴ Te tu ní stáhú jexeén Adán, chí sa suhva ni stahú un ñasihí de, te ni sáha ña cuēchi. ¹⁵ Te jeē scácu tǎcá ña sēhe te coo vāha ña, te núu na quéndōo ña jíin jnúhun cándíje ña ya, jíin jéé cundáhú ni ña jnáhan ña, jíin jéé cóo ndoo ánuá ña, jíin jéé sáha yíñúhún ña.

Ndese cánuú coo tēe cándiso jniñu nuū ñáyuu cácan-díje

3 Ndaā cúu jnūhun yáha: Núu ñn tēe cúni de condiso jniñu de condito de ñayuu cácan-díje, te vāha jniñu ndúcú de sáha de. ² Núu súcuan te tēe ndí-so jniñu nuū ñáyuu cácan-díje, cánuú jeē ma cóo ni ñn jeē nihín ñayuu cuēchi siquī de. Te na cóo ñn-ni ñasihí de, te cǎjí coo ni de, te ndito coo xinī de, te sáha yíñúhún de. Te cánuú jeē niní cuanúu de vehe nuū ñáyuu cǎjica, te níní stéén vāha de jnūhun ya. ³ Te ma cúu de tēe nájiñi, te ma tejnáhan de, te ma ndíyo ni de xūhún. Chi sa suhva coo vāha ni de, te coo vítá ni de, te ma cutóo ni de siquī xúhun. ⁴ Te cánuú jéé na ndácu vāha de jniñu ini vehe de, te sáha de jeē squícu vāha sēhe de te coo yíñúhún i nuū de. ⁵ Chi núu ñn tēe tu jíni de ndacu vāha de jniñu ini vehe de, ¿te ndese cuu condiso jniñu de nuū ñáyuu cácan-díje nuū Yaā Dios? ⁶ Núu súcuan te tēe ndíso jniñu nuū ñáyuu cácan-díje, ma cúu de tēe jeē saá ní candíje, chí núu súcuan te sanaa te sándúxí de máá de, te ñnuú-ni cuēchi je-condee siquī de jíin jéxeén. ⁷ Te cánuú cuu de tēe jeē suni nde ñayuu tu cácan-díje, cuajnúhún i de, návāha ma nihín i cuēchi siquī de, te ma cúndeyí jexeén jíin de.

Ndese cánuú coo tēe cájejniñu mēhñu ñáyuu cácan-díje

⁸ Te suni súcuan tēe cájejniñu mēhñu ñáyuu cácan-díje, cánuú jéé na cóo yíñúhún de, te na squícu de jíin jnúhun cáhán de. Te ma cúu de tēe nájiñi, te ni ma

ndíyo ni de xūhún. ⁹ Te na cuñi ñihin de jíin jnúhun cándíje yó jéé ní yisāhi ndé jenahán, te na cóo ndoo anuá de. ¹⁰ Te cánuú jéé xīhna gā coto ndee rō de, te núu ni jini rō jeē tú na cuēchi de, yūcuán na te cuu cuajniñu de mēhñu ñáyuu cácan-díje. ¹¹ Te suni súcuan ñasihí de jíin náhan ña, cánuú coo yíñúhún ña, te ma sajnúhún ña, te cǎjí coo ni ña, te squícu vāha ña tǎcá-ni jniñu. ¹² Te tēe cájejniñu mēhñu ñáyuu cácan-díje, na cóo ñn-ni ñasihí de, te na ndácu vāha de jniñu nuū sēhe de jíin núu ñáyuu vehe de. ¹³ Chi tǎca tēe cájejniñu vāha mēhñu ñáyuu cácan-díje, chí vāha quéndōo yíñúhún de, te nihín de modo jeē cǎjí gá ná-cani de jnūhun Cristo Jesús jeē cácan-díje yó.

Jnūhun sáhi yá jeē cácan-díje yó

¹⁴ Te vēsú ñūhun ni rī cuajeē yachī rī coto jnáhan yó, te tēe ri jnūhun yáha cuájeē nuū rō, ¹⁵ návāha núu cu-cuéé rí, te je jíni rō ndese cánuú sáha vāha ñayuu cácuu sēhe Yaā Dios. Chi máá i cácuu ñayuu cácan-díje nuū Yaā Dios, Yaā técu. Te máá i cásáha jeē iyó cutú jnúhun ndaā, chí cáhiin ñihin i jíin. ¹⁶ Te jendaā ndije chí jéhnu ndasí cúu jnūhun yáha jeē cácan-díje yó, jeē ní yisāhi ndé jenahán:

Yaā Dios ni steén yā maá yá, chí ni nduu ya tēe, te Espíritu ni steén jeē iyó ndaā jniñu ni sáha ya, te tǎcá ndajéhé andiví ní cajito jniñu ní sáha ya. Te ni jitē núu jnūhun ya nuū ñáyuu tǎcá nación, te ni cacandíje ñayuu ñí ñáyiví núu yā, te ni ndaa ya cuanuhun yā andiví.

Siquī ñáyuu cǎjica yátá nuū jnúhun cácan-díje yó

4 Te cǎjí stéén Espíritu Yaā Dios jeē quiví cuándihí te coo sava ñayuu caca yátá i nuū jnúhun cácan-díje yó. Te cuatáhú i tǎca jéé cácahán jnūhun stáhú jíin jnúhun ní castéén tachí. ² Chi cuni nahín i jnūhun cástéén tēe cástáhú-ni, jeē tu cácahán ndaā de. Chi tēe un ní cahije ndasí ni de jíin jnúhun stáhú, te tuá sáha jíin ánuá de jeē nácani ni de. ³ Te cahán de jeē cuēchi cúu jeē coo ñasihí tēe, te suni súcuan núu caji ñayuu sava ndeyu. Te ndeyu ún chí ni sáha Yaā Dios jeē cúu ñayuu cácan-díje jeē jíni jnūhun ndaā, návāha caji i te nacuatáhú i nuū yā. ⁴ Chi ndihi jeē ni sáha Yaā Dios, iyó vāha, te ma squexícó yō ni ñn, chí sa nacuatáhú yó te caji yō. ⁵ Chi jíin jéé cáhu yó jnúhun Yaā Dios jíin jéé nácuatáhú yó nuū yā, te iyó ndoo ndihi-ni.

Tēe jéjniñu vāha nuū Jesucristo

⁶ Te núu stéén rō jnūhun yáha núu tǎcá hermano, núu súcuan te cuu ró tēe jéjniñu vāha nuū Jesucristo, te ije ró jíin jnúhun vāha ya jeē candíje ró, chí ni cutūh-va ró te ndíquín rō. ⁷ Te ma quíví nduu rō jíin tǎca jnúhun jeē cúu cuento-ni jeē cǎjeni cǎhá ni ñayuu. Chi níní na scuáha ró ndese chiñúhún vāha ró Yaā Dios. ⁸ Chi jeē scuáha yó ejercicio jeē cóo ndacuī yiquí cúñu yō, jecu-ni nihín jniñu. Te jeē scuáha yó chiñúhún vāha

yó yá, suu yūcuan cúu jeē váha níhín jníñu siquĩ tǎcá-ni, jeē cúu vida yáha jíin vida quiji. ⁹ Te ndaā ndije cúu jñūhun yáha, te jeē cánuú candíje ndíhi ñayuu cúu. ¹⁰ Te jeē siquĩ yáha cúu jeē sájniñu níhin yó síquĩ jñūhun ya te ndóho yó jeē cácahān ndevāha i nuū yō. Chi ñúhún ni yō jeē coto yó núu maá Yaā Dios, Yaā técu. Te maá yá cúu Yaā jnáma tǎca ñáyuu, te ñayuu cácañíje jñūhun cúndáhú ni yā i, maá i cúu jeē jnáma ya.

¹¹ Tǎca jñūhun yáha cánuú jeē ndacu ró núu i te stéén rō. ¹² Ma cuáha ro jñūhun jeē kujéé ni ni ñin i nuū rō siquĩ jeē suchí ró. Chi sa coo ró ñin ejemplo nuū ñáyuu cácañíje, jeē cúni i ndese vāha cáhán rō, ndese vāha sáha ró, ndese cúndáhú ni rō jnáhan ró, ndese cándíje ró, ndese íyó ndoo ánuá rō. ¹³ Te níni ndé ná tu jinū rī nuū rō, te condíhvī ni rō jeē cáhu ró tutu iī nuū hermano cándutútú, jíin jeē stíhvī ni rō i, jíin jeē steén rō nuū i. ¹⁴ Ma cúhuun ni rō jíin táhū jeē ni jéhe Yaā Dios nuū rō jeē nácani ró jñūhun ya. Chi tǎca téé jéhu cándiso jníñu nuū ñáyuu cácañíje, ni casóó de ndaha de xinī rō, te ni sáha Yaā Dios jeē ní cacahān de jeē súcuan condiso jníñu rō.

¹⁵ Núu súcuan te cocuu ró jíin tǎca jniñu yáha, te condíhvī ni rō jíin, návāha cuni tǎca ñáyuu jeē váha íje ró cuáhān rō jíin. ¹⁶ Coo cuidado rō jeē caca ndaā rō jíin jeē steén vāha ró jñūhun ya, te cuiñi níhin ró jíin ndíhi. Chi núu súcuan sáha ró te quendō vāha ánuá maá ró jíin ñáyuu chuhun ni jñūhun cáhán rō.

Ndese sáha vāha yó jíin ñáyuu cácañíje

5 Ma cúxeēn rō nuū tǎca téé jéhu, chi sa cahān vāha ró jíin de jeē ma stívi de, nájnūhun cáhán rō jíin tátá rō. Te tǎca téé suchí, suni cahān vāha ró jíin de nájnūhun jíin ñani rō. ² Te suni súcuan cahān rō jíin tǎca ñahan jéhu, nájnūhun jíin náná rō. Te suni súcuan jíin tǎca ñahan suchí, nájnūhun jíin cuáha ró, te yíñúhún ndajnūhun ró jíin ña.

³ Te ñayuu cácañíje na cuáha i jeē jini ñúhún ñahan ni caquendō ndáhú, te núu ni quendō ndáhú ndije ña jeē tú na ñayuu condito ña. ⁴ Chi ñin ñahan ní quendō ndáhú, núu íyó séhe ña chí séhe chání ña jeē jévāha, te na cóto maá i ña. Chi cánuú cutūhva i jeē xíhna gā nuū ñáyuu vehe i squícu i coto i. Te na náccoto i náná i tátá i siquĩ jeē ní cacondito ña i. Chi yāha cúu jniñu váha jeē nújnahan ni Yaā Dios. ⁵ Te ñin ñahan ní quendō ndáhú ndije jeē maá ñin na ña, ñúhún ni ña jeē maá Yaā Dios condito ya ña, te tu jécuiñi ña jeē jicán tahú ña nduú ñuú. ⁶ Te sa suhva núu máni ndíhvī ni ña siquĩ tǎca jeē cúsiñi ni maá-ni ña, yūcuán na te vésú técu ña, te nájnūhun je ni jihī ña. ⁷ Jniñu yáha ndacu ró núu ñáyuu, návāha ma cóo cuēchi siquĩ i. ⁸ Te núu ñin ñayuu tu ndíto i jnáhan vehe i, te víhyá gā ñayuu ini vehe i, núu súcuan te sáha i jniñu jeē tu quíjnahan jíin jñūhun cándíje yó, te cúu i ñin jeē neé gá vésú ñáyuu tu cácañíje.

⁹ Te ñahan viuda cuu quívi síhvī ña nuū lista ñayuu jeē cáchindéé ñáhán ró jíin xúhun, te núu je ni jínu ña unī xico cuiyā, te núu ni íyo ñin-ni yñ ña. ¹⁰ Te suni cánuú jeē cuajnúhún ñáyuu ña jeē váha jniñu ni sáha ña, núu jeē ni scuéhnu vāha ña sēhe ña, jíin jeē ní jēhe núu ña vehe nuū ñáyuu cájica, jíin jeē ní jejniñu ña nuū hermano cácañíje, jíin jeē ní chindéé ñáhán ña ñayuu cándoho jñūndóho, jíin jeē ni sáha ña tǎca gá jniñu váha.

¹¹ Te tǎca ñahan viuda jeē íyó suchí gá, chi ma soó ró síhvī ña nuū lista. Chi sanaa te nducú ña jeē cúsiñi ni maá-ni ña, te ma cóndíhvī ni ña siquĩ Cristo, chi cuu ni ña condeca tucu ña tēe. ¹² Te súcuan jecondee cuēchi siquĩ ña, chi tu ní squícu ña jeē ni jéjnūhun ña ná ni jecoso síhvī ña nuū lista. ¹³ Te suni caca cuu ña tǎcá-ni vehe te quee cúxí ña. Te nasūu máni jeē cáca cúxí ña, chi suni siquĩ jeē sajnúhún ña, te quívi nduu ña cahān ña jñūhun jeē tu íyó váha jeē cahán ña. ¹⁴ Jeē yúcuán cúni rī jeē tǎca ñahan viuda jeē íyó suchí, na nándāha ña, te scuéhnu ña sēhe, te coto vāha ña vehe ña, návāha ñayuu cácuu contra ma cúu cahān i siquĩ ña. ¹⁵ Chi sava ñahan viuda je ni cajica yátá ña te sáha ña jniñu jeē cuní Satanás.

¹⁶ Te núu ñin tēe chí ñin ñahan cándíje, núu íyó ñahan viuda vehe i, te na cóto maá i ña. Te ma cóndee gasto ña siquĩ grupo ñayuu cácañíje, návāha cuu cuáha vāha i nuū ñahan viuda jeē tu ndé ñin coto ña.

¹⁷ Te tǎca téé jéhu cándito ñayuu cácañíje, na jécunaā doble yāhu de, te núu cándíhvī ni de cástéén de cáncani vāha de jñūhun ya. ¹⁸ Chi cúu nájnūhun cáhán tutu iī: Ma cánda stíquĩ caxín tē trigo, núu ma cuáha ró jeē cáji tē. Te suni cáhán: Tēe jeē sájniñu tátú, jíni ñúhún quiyāhu de, áchí.

¹⁹ Ma cuajnúhún ró te núu jéquin ñayuu cuēchi siquĩ ñin tēe jéhu cándito ñayuu cácañíje te núu tu íyó úú chí únī testigo. ²⁰ Te núu cásáha ñayuu cuēchi, te cánuú cuxeēn rō nuū i, jito jínúu ndíhi ñayuu, návāha na cónso íyo sava ga i. ²¹ Te cáhán níhin rī jíin ró, jito maá Yaā Dios jíin Jítoho yō Jesucristo jíin tǎca ndajéhe yā jeē ní nacāji ya: Squícu vāha ró jniñu yáha, te ma sáha ró cuenta ndese cúu ñin ñin i, chi inuú-ni sándaā rō siquĩ ndíhi-ni i. ²² Ma cáni yachī rō ñin tēe jeē condiso jniñu de nuū ñáyuu cácañíje, chi xíhna gā coto ndee rō de. Chi sanaa te stívi de, te cuēchi de suni condee siquĩ rō jíin de. Te coto ró maá ró jeē ma quívi ró jíin jniñu neé.

²³ Te siquĩ jeē núu-ni núu-ni cúhú chíji ró, te ma cóho ga rō máni ndute, chi suni coho ró jecu vino.

²⁴ Cuēchi sava ñayuu chi je íyó ndijin nde ná tu quívi i nuū cúndaā cuēchi i. Te cuēchi sava ga i chí cúcuéé te natūu nahín. ²⁵ Te suni súcuan tǎca jniñu váha, chí íyó ndijin. Te vésú ná tu natūu jniñu váha ún, te ma cúu quisāhi nñí cáni, chí natūu nahín.

6 Tǎca ñáyuu cácuu mozo, na cóo yíñúhún váha i nuū patrón i, návāha ma cahán neé ñayuu siquĩ Yaā Dios jíin síquĩ jñūhun ya jeē castéén yō. ² Te mozo

jeē yíñi nuū patrón cá candíje, ma cáni ni i jeē cūhva-ni sáha yíñuhún i nuū de siquī jeē hermano cá candíje cácuu de. Chi sa cuajniñu vāha ga i nuū de, chi tēe cándíje tēe manī i jíin cúu tāca tēe un jēē sájniñu i nuū. Jnūhun yáha stéén rō te stíhvī ni rō i.

Siquī jeē chíñuhún váha yó yá te cusī ni yō jíin cūhva jeē névāha-ni yó

³ Te núu ndé tēe stéén de jnūhun tú ndaā jeē tu quíjnáhan jíin jnūhun vāha ndaā maá Jítoho yō Jesucristo, jíin jnūhun ni steén Yaā Dios jeē cá candíje yó, ⁴ núu súcuan te máni tēe ndúxí tēe tu jécūhun cuiñi ni cúu de. Chi cánéé xínī de, chi máni cúní de tejnāhan de siquī tāca jnūhun stéén de. Te tācá un sáha jeē cácu-cuésún ni, jíin jēē cátejñáhan, jíin jēē cácahān ndevāha, jíin jēē cájeni néé ni siquī jnāhan, ⁵ jíin jēē máni cástáhān jnāhan. Súcuan cásaaha tēe jeē ní ndunéé xínī, jeē tu cájini jnūhun ndaā. Te cájeni ni de jeē nihín de cuehē xūhun siquī jnūhun cá candíje de stéén de. Na cújiyo ró núu ñayuu cándāa súcuan. ⁶ Te jendaá jeē yóhyo vāha quéndōo yó te núu chíñuhún váha yó yá, te núu cúsiñi ni yō jíin cūhva jeē névāha-ni yó. ⁷ Chi tú na vé ni cácu yó jíin ñayivī yáha, ni tú na vé condiso yó quíhīn yō jíin núu na cúu yō. ⁸ Te núu íyó jēē cáji yō jeē cusúcún yó, te na cúsiñi ni yō jíin yúcuan-ni. ⁹ Chi ñayuu jeē cuní cucúcá, chi yachī quívī i cuēchi jeē jíto ndee jexeén i. Te quívī i jíin cuéhē jniñu cá néé jniñu stívī jēē ndíyo ni i. Te tācá un sáha jeē tívī ñayuu te jnahnū ndetū i. ¹⁰ Chi jeē ndíyo ni yō xūhún, yúcuan sáha jeē quejéé táca jniñu néé. Te sava ñayuu jeē ndíyo ni xūhún, ni castóo i jnūhun cá candíje i, te ni canihīn i cuehē ndasí jnúndóho.

Jeē na ndúcú ndéyí yó siquī jnūhun cándíje yó

¹¹ Te rōhó chi tēe jéjníñu nuū Yaā Dios cúu ró, te cunu ró coto ró táca cuēchi yáha. Te condiquīn rō jniñu ndaā, te chíñuhún váha ró Yaā Dios, te candíje vāha ró, te cundáhú ni rō jnāhan ró, te cuandeyí ni rō, te coo vítá ni rō. ¹² Te nducú ndéyí ró siquī jnūhun cándíje yó

yá. Te cuiñi nīhin ró jíin jnūhun jeē ni níhīn tahú yō cotecu yō ñí cáni. Chi jeē yúcuan cúu jeē ní cana ya rōhó, te cáji ní cahān rō jeē vāha cándíje ró yá, jíto jíinú cuehē ñayuu. ¹³ Te cáhān nīhin ri jíin ró, jíto maá Yaā Dios, Yaā jeē sáha jeē técu tācá-ni, jíin Jesucristo, Yaā jeē cáji ní cahān yā ni nacani ya jnūhun vāha nuū Poncio Pilato. ¹⁴ Squícu vāha ró jniñu ndácu ya nuū rō, te ma stívī ró sáha ró, návāha ma cahān ñayuu cuēchi siquī rō. Te súcuan sáha ró ñí ndé quivī ndíji Jitoho yō Jesucristo. ¹⁵ Chi quiji ndijin yā maá quivī jeē ní jeni Yaā Dios. Te Yaā Dios chi maá ñn-ni ya cúu Yaā yóhyo ndetū, te jñí ya ndihī poder. Te cúu ya Rey nuū tāca rey, jíin Jítoho nuū tāca jítoho. ¹⁶ Te máñuhún-ni ya cúu jeē iyó ñí cáni. Te ndéé yá ñn lugar nuū ndí ndaxín, nuū ma cúu quívī yó. Te ni ñn ñayuu ñayivī yáha tu ní jíto cuiñi i nuū yā, te ni ma cúu coto i nuū yā. Te ñí cáni na cóo yíñuhún yó nuū yā, chi jñí maá yá poder ñí cáni. Amén.

¹⁷ Te cahān rō jíin ñayuu cucá ndajniñu ñayivī yáha, jēē ma cúndúxí i. Te ma tēnuū i xūhún i, chi yachī naa ún. Chi sa suhva na tēnuū i jeē coo vāha i sáha Yaā Dios, Yaā técu, chi maá yá jéhe cuehē yā tācá-ni jeē cúsiñi ni yō jíin. ¹⁸ Te ndacu ró jniñu nuū i jeē na sáha vāha i, chi jeē sacúcá ndije i maá i cúu jeē sáha i tācá jniñu vāha. Te na cúu i ñayuu vāha ni jeē cuáha i jeē cúu jnāhan i. ¹⁹ Te súcuan caya i cuehē jniñu vāha jeē coo cúcá i nuū yā ñí tiempo jeē quíji. Te nihīn tahú i cotecu i ñí cáni.

Jniñu sándēhi ndácu Pablo nuū Timoteo

²⁰ Te rōhó Timoteo, condito ró táca jniñu ní chihi ya ndaha ró. Te ma quívī nduu rō jíin táca jnūhun cáhá-ni, cuenta ñayivī yáha, jíin táca jnūhun stáhú jēē cácahān i jeē jnūhun ndíchí ndáa cúu. ²¹ Chi sava ñayuu cándiquīn táca jnūhun yáha, ni cajica yátá i ni castóo i jnūhun cá candíje i ya.

Te ñuhun ni rī jeē Yaā Dios na sáha ga yā jeē váha rōhó. Súcuan na cóo. Amén.

2 TIMOTEO

1 Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū jeē nácani ri jnūhun jeē ni jéjnūhun ya jeē cótecu yō nī cání siquī jeē yíhi yó ndaha Cristo Jesús. **2** Te téé ri carta yáha cuájeē nuū rō Timoteo, chi cúu ro nájñūhun sēhe ri jeē maní rī jíin. Te ñūhun ni rī jeē Tatá yō Yaā Dios jíin Jítoho yō Jesucristo, na sáha ga yā jeē váha rōhó, te cundáhú ni yā rohó, te sáha ya jeē coo ndeyí coo siñ ni rō.

Jeē nácani de jnūhun Cristo

3 Níní tu náā ni rī cacān tahu rī jehē rō nuū Yaā Dios nduú ñuú, te nácuatáhú rí nuū yā jeē siquí rō. Chi nuū maá yá jejníñu ri, nájñūhun ni casáha tāca jíi rī, te íyó ndoo ánuá rī nuū yā. **4** Te núcūhun ni rī jeē ni ndáhyū rō ná ni quenda ri cuahān rī. Te cúu ni rī ndacoto jnáhan yó, návāha cusíñ ndasí ni rī. **5** Te núcūhun ni rī jeē váha ndije cándíje rō Cristo, nájñūhun ni candíje náná jéhnú rō Loida, jíin náná rō Eunice xíhna gā. Te cúcáhnu ni rī jeē suni súcuan cándíje máá rō vijna.

6 Te jeē yúcuan nástíhvī ni rī rohó jéē na cóndíhvī gā ni rō jíin táhū jeē ni jéhe Yaā Dios nuū rō jeē nácani rō jnúhun ya. Te tahu un ní nihīn rō ná ni tee ri ndaha ri xinī rō. **7** Chi Espíritu jeē ni jéhe Yaā Dios nuū yō, tu sáha jeē yūhu yó nacani yó jnúhun, chi sa sáha jeē iyó fuerza ini yō, jíin jéē cundáhú ni yō jnáhan yó, jíin jéē ndító íyó xinī yō. **8** Núu súcuan te ma cúcanu rō nacani ndaā rō jnūhun máá Jítoho yō. Te suni ma cúcanu rō jeē siquí máá rí jeē íne ri vecāa siquí jnúhun ya. Chi sa cuāha rō jnúhun ndoho rō jíin rí siquí jeē cánacani yó jnúhun jnáma ya yohó, núu ndese ni jéhe Yaā Dios fuerza ini yō. **9** Chi ni jnama ya yohó, te ni cana ya yohó jéē coo ndoo ánuá yō cuajníñu yó núu yā. Te tu ní cána ya yohó síquī jeē váha ni sáha yó, chi siquí jeē ní tee ni maá yá jeē cundáhú ni yā yohó jéē yíhi yó ndaha Cristo Jesús. Chi nde ná tu jecōo ñayíví, te je cundáhú ni yā yohó. **10** Te vijna jeē ní quenda ndijin Jesucristo, Yaā jnáma yohó, te ni steén cají Yaā Dios jeē cundáhú ni yā yohó. Chi máá Cristo ni snáā yā poder cuehyī jéni yohó, chi jíin jnúhun jnáma ya yohó ni steén cají yá nuū yō jeē cótecu yō nī cání chi ma jnahnú ndetū yō.

11 Te ni jeni Yaā Dios ruhū jeē nácani ri jnūhun ún, te ni tají yá ruhū cúu ri apóstol jeē steén rī nuū ñáyyu tācá nación jeē tu jíin jnūhun ya. **12** Te siquí un cúu jeē ndóho ri tāca jnúndóho yáha íne ri vecāa. Te tu cúcanu rī, chi jíin rī ndese Yaā cúu Yaā candíje ri, te cúcáhnu ni

rī jeē cúu coto ya jniñu jeē ní chihi ya ndaha ri nde vijna te nde quivī ndíji ya.

13 Te cuiñi nīhin rō jíin tāca jnúhun ya jeē steén ndaā, suu jnūhun jeē ni steén rī nuū rō. Te caca rō jíin jnúhun cándíje yó, te cundáhú ni rō jnáhan rō siquí jeē yíhi rō ndaha Cristo Jesús. **14** Te condito rō tāca jniñu váha jeē ní chihi ya ndaha rō, sáha poder maá Espíritu Santo jeē ndeé ini yō.

15 Je jíin rō jeē tāca ñáyyu cáyūcu Asia ni castóo i ruhū. Te uū i cúu Figelo jíin Hermógenes. **16** Te jíicán tahu rī jeē cundáhú ni Jítoho yō ñáyyu vehe Onesíforo, chi cuehē jínu ni nanihīn ni rī ni sáha de, te tu ní cúcanu de siquí rī jeē ní ine ri vecāa. **17** Chi sa suhva ná ni quiji de ñuu Roma, te ni nanducú yúcún de ruhū nde ni nanihīn de ruhū. **18** Te jíicán tahu rī jeē máá Jítoho yō cundáhú ni yā de quivī ndíji ya. Te je jíin váha máá rō ndese yōhyo ni chindéé ñáhán de ruhū ná ni cahīyo ri ñuu Efeso.

Jeē cúu yó nájñūhun soldado váha nuū Jesucristo

2 Núu súcuan te rōhó, séhē mánī, na cóo fuerza ni rō siquí jeē yíhi rō ndaha Cristo Jesús te sáha ya jeē váha rōhó. **2** Te tāca jnúhun jeē ní jini rō ní cahān rī, jíto jínúu ñáyyu cuehē, jnūhun ún na nástéén rō nuū tēe cásquicu váha, návāha suni cuu steén tucu máá de nuū sáva ga i.

3 Te rōhó na cuándeyí ni rō coto rō jnúndóho, chi cúu rō nájñūhun ñn soldado váha nuū Jesucristo. **4** Ni ñn soldado jeē íin nuū guerra, tu sájnéñu de máá de jíin jniñu máá de, chi cánuú jeē sáha de máni máá jéē ndácu tēe ní tejníñu de. **5** Te suni súcuan tēe cásíquí deporte, ma nihín de premio te núu tú condíhvī ni de cosíquí váha de máá modo chíjñiñu. **6** Te tēe sájníñu nīhin ñuhun, máá de cúu jeē nihín xíhna gā jeē cuáha itu. **7** Nacani ni rō siquí jeē cahān rī, te máá Jítoho yō sáha ya jeē jécūhun ni rō siquí ndíhi.

8 Te cocuhun ndasí ni rō Jesucristo, Yaā ní quiji yucūn rey David, te ni natecu yā mēhñu ndíyi, nájñūhun cáhán jnūhun jnáma ya yohó jéē nácani ri. **9** Te jeē síquí jnūhun un ndóho ri jnúndóho, te nde ni cajihni i ruhū íne ri vecāa nájñūhun ñn tēe ni sáha cuehí xēen. Te jnūhun Yaā Dios chi ma cúu cuhni i jeē ma cuité núu. **10** Núu súcuan te jéndeeyí ni rī jíto ri tāca jnúndóho yáha síquí jeē cundáhú ni rī ñáyyu jeē ní nacāji ya, návāha suni cācu máá i jeē quivī i ndaha Cristo Jesús, te quihīn i nuū cujéhnú i ñí cání. **11** Chi ndaā cahán jnūhun yáha:

Núu vēsú na cúu yō jeē siquí yā, te suni cotecu yō jíin yá,

¹² te núu cuandeyí ni yō ndoho yó, te suni ndacu yó jniñu jíin yá.

Te núu ma cuajnúhún yó yā, te suni ma cuajnúhún yá yohó.

¹³ Te vēsú tu squícu vāha yó, te máá yá chi máni squícu ya,

chi tu cúu sáfalta yā, chi squícu ya jeē ni cáhān yā.

Tēe sájniñu squícu vāha jíin jnúhun ya

¹⁴ Jnúhun yáha na nástíhví ni rō ñayuu, te cahān nīhin ro jíin i, jíto máá Jítoho yō, jeē ma tejnāhan i siquí tāca jnúhun sáá-ni. Chi tu ndé jéjníñu cuítí, chi sa stívi ñáyuu jíni sōho. ¹⁵ Te nducú ndéyí ró jeē cuajnúhún Yaā Dios rohó, jéē cúu ró tēe sájniñu squícu vāha jíin jnúhun ya, návāha ma cúcanu rō nuū yā siquí ní ñin, chi vāha nacani ró jnúhun ndaā yā. ¹⁶ Te ma quívi nduu rō jíin táca jnúhun sáá-ni ñayívi yáha, chi suu sáha jeē ndúcuehē gā jniñu néé quívicoo ñayuu cácahān. ¹⁷ Te tāca jnúhun cástéén i chi cúu nájnūhun ñin ndíhyi xeēn jeē sacáhú gā cuahān. Te Himeneo jíin Fileto cúu uū tēe jeē casáha súcuan. ¹⁸ Chi tēe un ní cajica yátá de nuū jnúhun ndaā, te cácahān de jeē jé ni cuu ni canatecu ndíyí. Te súcuan cásaca nuu de xiní sava ñayuu cácañíje. ¹⁹ Te Yaā Dios ni jeni ya ñayuu maá yá, te íyó cutú ndaā i jeē ma cáca yátá i, nájnūhun yósó núu tútu íi: Je jíni Jítoho yō Yaā Dios tāca ñáyuu jeē yíhi ndaha máá yá. Te suni cáhān: Tāca ñáyuu jeē ndácunehen síhví Cristo, na cújiyo i nuū jniñu néé, áchí.

²⁰ Te ini ñin vehe cáhnu íyó cuéhē cohō, nasūu máni cohō oro cohō plata, chi suni cohō yujnu cohō ñuhun. Te íyó jéē fino te íyó jéē corriente. ²¹ Te núu ñin ñayuu sándoo i máá i jeē quéndā i nuū tācá jniñu néé, te cuu i nájnūhun ñin cohō fino. Te coo ndoo coo íi i nuū Jítoho yō, te nihīn jniñu i ndese cúní maá yá. Te coo túhva i jeē sáha i tācá jniñu vāha.

²² Núu súcuan te cunu ró coto ró táca jéē tú vāha jeē cándiyo ni tēe suchí. Te condiquīn rō jniñu ndaā, jíin jnúhun cándíje ró yá, jíin jnúhun cúndáhú ni, jíin jnúhun coyūcu máni jíin jnāhan. Te súcuan sáha ró ndé jíin táca ñáyuu ndoo ánuá jeē ndácunehen síhví máá Jítoho yō. ²³ Te ma quívi nduu rō jíin táca jnúhun cánéé íi jeē tu íyó cájí, chi je jíni rō jeē sáha jeē tejnāhan ñayuu. ²⁴ Te mozo maá Jítoho yō, tú vāha jeē tejnāhan de, chi sa suhva cánuú jéē coo vāha ni de jíin táca ñáyuu. Te coo vāha ni de stéén de, te cuandeyí ni de jíin i. ²⁵ Te jíin jéē víta ni de te caní ichí de ñayuu níhni ni. Chi sanaa te nacani ni i sáha Yaā Dios, te jecūhun ni i ndese íyó jnúhun ndaā. ²⁶ Te nducájí ni i te cācu i nuū jexeén jeē ní jñi ún i, chi ni cundeyí jíin i jeē sáha i jeē cuní maá.

Siquí ndese coo ñayuu sáha néé quívi cuándiñi

3 Te suni na jécūhun ni rō jeē quívi cuándiñi te quee quívi coo jnúndóho. ² Chi coo ñayuu jeē chiñúhún máá, te ndiyo ni i xūhún, te sátéyí i máá i, te sándúxí i máá i. Te cahān neé i siquí Yaā Dios, te cunīhni ni i nuū tatá i nuū naná i, te ma nácuatáhú i, te ma chiñúhún i Yaā Dios. ³ Te ma cóo maní i jíin jnāhan i ni ma cundáhú ni i. Te sájnúhún i, te ma cúu casi i tāca jéē ndíyo néé ni i, te yōhvo xeēn coo i, te quítí ni i coto i tācá jniñu vāha. ⁴ Te suni nastúu i jnāhan i, te ma yūhú i sáha i cuēchi, te coo ndúxí ndasí i, te nducú i jeē cúsiñi ni maá-ni i, te ma nducú i quívi i nuū Yaā Dios. ⁵ Te sáha-ni i jeē chiñúhún i ya, te casi i nuū poder yā jeē ma sáma modo i.

Ma quívi nduu rō jíin ñáyuu casáha súcuan. ⁶ Chi sava tēe ún quívi de vehe te stáhú de tācá ñahan cánéé jéē íyó ndasí cuéchi. Te yachí quívicoo ña jíin táca jnúhun tú ndaā jeē cúsiñi ni ña jíin. ⁷ Te vēsú níni scuáha ña na-ni jnúhun, te tu cúu cuítí jecūhun ni ña jnúhun ndaā yā. ⁸ Te nájnūhun ni casáha tēe tásí Janes jíin Jambres jenahán, jeē ní canducú de casi de nuū Moisés, suni súcuan sáha tēe ún, chi nducú de casi de nuū jnúhun ndaā. Chi coo nee jeē níjnūni de, chi ma candíje ndije de jnúhun cándíje yó. ⁹ Te ma quée jniñu sáha de, chi cuni táca ñáyuu jeē tēe cánéé xíní cácuu de, nájnūhun ni cajini ñayuu jeē ní íyo néé xíní ndíndúú tēe jeē ní nducú casi nuū Moisés.

Jniñu sándiñi ndácu Pablo nuū Timoteo

¹⁰ Te róhó chi je ni cutūhva vāha ró ndese stéén rī, ndese jíca ndaā rī, ndese tēe ni rī sáha ri, ndese cándíje ri yā, ndese néé ri paciencia, ndese cúndáhú ni rī jnāhan ri, jíin ndese jéndeýí ni rī. ¹¹ Chi ni cajito xeēn ñayuu ruhū, te ni ndoho ri jnúndóho. Te jíni rō tāca jéē ní ndoho ri ñuu Antioquía, ñuu Iconio, jíin ñuu Listra. Te jíni rō ndese ni cajito xeēn i ruhū. Te máá Jítoho yō ni jnama ya ruhū nuū ndíhi ún. ¹² Chi ndaā cúu jeē tāca ñáyuu jeē ndíhví ni cuajniñu vāha nuū Cristo Jesús, ndoho i jeē coto xeēn ñayuu i. ¹³ Te ñayuu casáha jniñu néé jíin ñáyuu castáhú, chi sa víhyá gā cocuu i jíin jniñu néé, chi stáhú i ñayuu, te suni candíje máá i jnúhun stáhú.

¹⁴ Te róhó chi sa cuiñi níhin ró jíin jéē ní cutūhva ró jíin jéē ní cucáhnu vāha ni rō. Chi jíni rō ndese ñayuu cúu jeē ní castéén nuū rō. ¹⁵ Chi nde ná lulí ró, te je jíni rō ndese cáhān tutu íi jeē steén nuū rō ndese candíje ró jeē ni jíhi Cristo Jesús jehē rō návāha cācu ró. ¹⁶ Te ní tutu íi cúu jnúhun jeē ni cáhān Yaā Dios, te vāha níhín jniñu jeē steén nuū yō, jeē cahān nuū yō, jeē náchuhun ichí yóhó, jíin jéē scuéhnu yóhó jíin jniñu ndaā, ¹⁷ návāha tēe cájéjníñu nuū Yaā Dios, ije ni de te coo túhva vāha de sáha de tācá jniñu vāha.

4 Te cáhān rī jíin ró, jíto Yaā Dios jíin Jítoho yō Jesu-cristo, Yaā quiji ndacu jniñu, te sándaā yā jniñu

ñayuu cátecu jíin ñáyuu ní cajihī. ² Cáhán nīhin ri jeē na nácani ró jnúhun ya, te stíhvī ni rō i candíje i. Te níni sáha ró súcuan núu núne i chí vēsú tu núne i. Te sáha ró jéē na jécūhun ni i, te cahān rō nuū i, te cani ichí váha ró i, te jíin cuéhē paciencia steén rō nuū i. ³ Chi quee tiempo jeē ma cuájnuhún cuiti ñayuu jnúhun ya jeē steén ndaā vāha, chi sa cuajnúhún i jnúhun cúsiñ ni maá i, te nducú i cuehē maestro jeē steén nuū i máni jnúhun jeē nújnahan ni i cuni nahín i. ⁴ Te cujiyo i nuū jnúhun ndaā, te condíhvī ni i tāca jnúhun jeē maá cuento-ni cúu. ⁵ Te rōhó chi níni coo ndito ni rō, te cuandeyí ni rō jíin jnúndóho, te condíhvī ni rō nacani ró jnúhun jnáma ya yohó, te squícu vāha ró jíin jniñu ya jeē sáha ró.

⁶ Te ruhū chi je ni socō rī maá rí jeē cúu rī, te je cuacuyajni quivī cuu rī. ⁷ Te je ni cundeyí rí jeē ní nducú ndéyí rí siquī jniñu váha, te je ni jīnu ni jica ri ñayīvi yáha, te tu ní siáá rī jnúhun cándíje ri yā. ⁸ Te vijna je íyó túhva premio jeē nihín rī siquī jeē ní jica ndaā rī. Chi Jitoho yō cuāha ya un núu rī maá quívī sándaā yā jniñu, chi maá yá cúu juez ndaā. Te nasūu núu maá ñn ruhū cuāha ya, chi suni cuāha ya nuū tāca ñáyuu jeē cúu ni i jeē ndíji ya chi manī i jíin yá.

Jeē cána Pablo quiji Timoteo nuū de

⁹ Nducú ndéyí ró quiji yachī rō nuū rī. ¹⁰ Chi Demas ni stóo de ruhū, chi ndíyo ni de ndajníñu ñayīvi yáha, te cuahān de ñuu Tesalónica. Te Crescente chi cuahān de Galacia, te Tito cuahān de Dalmacia. ¹¹ Te maá ñn na Lucas íne jíin rí. Te jeē quíji ró, te condeca ró Marcos quiji ró jíin de, chi vāha cuajníñu de jeē chindéé ñáhán

de ruhū jíin jniñu ya. ¹² Tíquico ni tají rí de cuahān de ñuu Efeso. ¹³ Te jeē quíji ró, te condaha ró cotón jeē ni stóo ri vehe Carpo ñuu Troas. Te suni condaha ró tāca libro, te jeē cánuú gá cúu tācá tutu ní tee maá rí.

¹⁴ Alejandro, tēe cúu herrero, yōhyo xeēn ni sáha de jíin rí. Te maá Jitoho yō cuāha ya yāhu de jeē súcuan ní sáha de. ¹⁵ Te condito ró maá ró nuū de, chi yōhyo ni cuu de contra siquī jnúhun cástéén yó.

¹⁶ Te ná ni ine ri jeē xíhna ñúhún núu tāca tóhō, te tú ni ñn tēe ní índichi jíin rí, chi ndíhi de ni castóo de ruhū. Te ñúhun ni rī jeē Yaā Dios cone cáhnu ni yā nuū de. ¹⁷ Te vēsú súcuan te maá Jitoho yō ni chindéé ñáhán yá ruhū, te ni jēhe ya fuerza ini rī, te súcuan ni sínu ri ni nacani ndíhi ri jnúhun jnáma ya yohó, ni caji-ni nahín ñáyuu tācá nación tu jíin jnúhun ya. Súcuan ni jnama Jitoho yō ruhū nuū tāca tée xeēn. ¹⁸ Te jnama ga yā ruhū nuū tācá jniñu néé, te condito ya ruhū nde quivī ri andiví núu ndácu ya jniñu. Te na cáhán yō jeē yóhyo luu cújéhnu ya ññ cáni. Amén.

Saludo jíin bendición jeē sándñhí

¹⁹ Te cahān rō jeē sándeeyí ni Prisca jíin Aquila, jíin ñáyuu vehe Onesíforo, achí rí. ²⁰ Erasto ni quendōo de ñuu Corinto. Te ni quendōo Trófimo ñuu Mileto, te cúhú de. ²¹ Te condíhvī ni rō quiji ró nde ná tu quejéé vico míjin. Sándeeyí ni rō, achí Eubulo jíin Pudente jíin Lino jíin Claudia jíin táca gá hermano.

²² Te ñúhun ni rī jeē maá Jitoho yō Jesucristo na cóo ya jíin ró, te Yaā Dios sáha ga yā jeē váha rōhó jíjnahan ró. Súcuan na cóo. Amén.

TITO

1 Máá rí cúu Pablo, mozo Yaā Dios jíin apóstol Jesucristo, chi ni tají Yaā Dios ruhū jeē scándije ri ñayuu ní nacāji ya, návāha jecūhun ni i jnūhun ndaā yā jeē candíje yó, ² te cocuhun ni i jeē cótecu i ñí cáni. Chi nde ná tu jecōo ñayívi te ni jejnūhun Yaā Dios jeē cótecu yō, te iyó ndāā jnūhun ni cahān yā. ³ Te vijna jeē ní quee tiempo ni jeni ya, te stéén cají yá jnūhun ya nuū yō. Te ni tejníñu ya ruhū ni ndacu ya jniñu jeē nácani ri jnūhun ya ún. Chi Yaā jnáma yóhó cúu ya. ⁴ Te téé ri carta yáha cuájeē nuū rō Tito, chi nájñuhun sēhe ri cúu ndije ró síquī jeē ínuú-ni cándije yó yá. Te ñúhun ni rī jeē Tatá yō Yaā Dios jíin Jítóho yō Jesucristo, Yaā jnáma yóhó, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo siñ ni rō.

Jniñu ya jeē ni sáha Tito nde isla Creta

⁵ Te ni stóo ri rohó ndé isla Creta, návāha sándaā rō síquī jniñu jeē cúmanī gā cundaā, te cani ró táca téé jéhu condito ñayuu cáncandije táca ñuu, nájñuhun ni ndacu ri jniñu nuū rō. ⁶ Te téé jéhu un cánuú jeē ma cóo ni ñn jeē nihín ñayuu cuēchi síquī de. Te cánuú coo ñn-ni ñasihí de. Te sēhe de cánuú cuu i sūchi cáncandije jeē ma nihín ñayuu cuēchi síquī i jeē tu sáha váha i chí jéé nihni ni i nuū de. ⁷ Chi téé cáncandije candiso jniñu nuū ñayuu cáncandije, cánuú caca ndaā de chi cáncandiso jniñu de síquī jniñu Yaā Dios. Te ma satéyí de máá de, ma quití yachí ni de, ma cúu de téé nájñi, ma cuajnáhan de, te ma ndíyo ni de xūhún. ⁸ Chi sa cánuú jéé niní cuāha núu de vehe nuū ñayuu cájica, te niní sáha de jniñu váha, te ndito coo xiní de, te coo de téé ndaā, te coo ndoo ánuá de, te casi de modo jeē cuní máá de. ⁹ Te cánuú cuiñi nihin de jíin jnúhun ndaā jeē ni scuáha de, návāha cuu stíhví ni de ñayuu jíin táca jnúhun ndaā váha, te suni cuu sáha de jeē jécūhun ni ñayuu cácuu contra, te casi i yuhu i.

¹⁰ Chi iyó cuéhē ñayuu nihni ni, te cástéén i ñnga modo jéni ni máá i jeē súcuan cācu ñayuu, te stáhú i ñayuu. Te jnáhan yó hebreo cúu jeē vihyá gā casáha súcuan. ¹¹ Te cánuú jéé casi rō yuhu táca téé ún, chi cástéén de jnūhun jeē tu iyó váha stéén de, chi cúní de nihín de xūhun síquī ún. Te súcuan sáca nuu de xiní ndíhi ñayuu táca vehe.

¹² Te ñn téé isla Creta jeē nácani jnūhun, ni cahān de síquī jnáhan ñuu de: Jnáhan yó ñayuu Creta, chi máni ñayuu stahú cácuu i, te nájñuhun quití xéén casáha i, te máni ndíhví ni i cají cuehē i, te cúxí i, áchí de. ¹³ Te ndaā cúu jnūhun ni cahān téé ún. Jeē yúcuan na cúx-

eēn rō nuū i, návāha ndaā váha na cándije i. ¹⁴ Te ma sáha i cuenta táca jnúhun ni catava jnáhan yó hebreo, jeē maá cuento-ni cúu, ni ma squícu i jniñu cáncacu téé ni quendacoo nuū jnúhun ndaā.

¹⁵ Te ñayuu jeē ní ndundoo jeē níjnūní, máni modo iyó ndoo iyó váha jéni ni i jító i táca-ni. Te ñayuu tu cándije jeē tu ní ndundoo jeē níjnūní, máni jéni ni i ñn modo tú ndoo tú váha síquī táca jéé jító i. Chi nde jeē níjnūní i jíin ánuá i iyó jnéhén. ¹⁶ Te vésú cácahān i jeē jiní i Yaā Dios, te jíin jniñu casáha i te jiní yō jeē tú ndije i. Chi ñayuu ndevāha ñayuu nihni ni cácuu i, te tu cúu sáha i ni ñn jniñu váha.

Jnūhun ya jeē steén ndaā váha

2 Te máá ró chi niní na cáhán rō táca jnúhun jeē quijnáhan jíin jnúhun ya jeē steén ndaā váha. ² Te cahān rō jíin táca téé jéhu jeē na cóo cají ni de, te sáha yíñuhún de, te ndito coo xiní de, te candíje nihin de jnūhun cundáhú ni yā de, te cundáhú ni de jnáhan de, te cuandeyí ni de. ³ Te suni súcuan táca ñahan jéhu, na sáha yíñuhún ña, te ma sajnúhún ña, te ma nájñi ña. Te na stéén ña táca jéé váha. ⁴ Te na stéén ña nuū táca ñahan súchí jéé coo maní ña jíin yí ña jíin séhe ña. ⁵ Te ndito coo xiní ña, te coo ndoo ánuá ña, te coto váha ña jniñu vehe ña, te coo váha ni ña, te cuatáhú ña nuū yí ña, návāha ma cahán neé ñayuu síquī jnúhun Yaā Dios.

⁶ Te suni súcuan stíhví ni rō táca téé suchí jeē ndito na cóo xiní de. ⁷ Te róhó, cuu ró ñn ejemplo nuū de jeē sáha ró táca jniñu váha. Te jeē steén rō nuū de te ndaā steén rō te coo ndije ni rō. ⁸ Te ndaā váha stéén rō, návāha ma cúu cahān ñayuu síquī. Te súcuan te cu-canu ñayuu cácuu contra, chi ma cúu cahān i ni ñn cuēchi síquī rō.

⁹ Te cahān rō jíin ñayuu cácuu mozo jeē na cuatáhú i nuū patrón i, te na sáha i táca jniñu jeē núnahan ni de, te ma cahán máá i núu ndácu de jniñu nuū i. ¹⁰ Te ma sacuíhná i ndajniñu de, chi na cúu i ñayuu ndaā ndije, návāha jíin táca jniñu jeē sáha i, te cuni táca ñayuu jeē yóhoyo luu cúu jnūhun jeē steén síquī Yaā Dios, Yaā jnáma yóhó.

¹¹ Chi vijna je ni steén Yaā Dios ndese sáha ya jeē váha ñayuu, chi cúní yā jnama ya ndíhi ñayuu ñayívi. ¹² Te jnūhun jeē váha ni yā jíin yó, suu stéén nuū yō jeē na síáá yō jniñu neé jíin táca jéé ndíyo neé ni yō. Te ndito na cóo xiní yō ini ñayívi yáha, te caca ndaā yō, te chiñuhún váha yó Yaā Dios. ¹³ Te suni stéén nuū yō jeē

cocuhun ni yō jeē quéndōo ndetū yō jeē quiji máá quívi jéhnū jeē quénda ndijin Yaā Dios, Yaā cujéhnū ndasí, suu Jesucristo, Yaā jnáma yóhó. ¹⁴ Chi ni socō yā maá yá jehē yō, návāha jnama ya yohó núū táca jniñū neé, te sándoo ndihí ya anuá yō jeē cuu yó ñáyuu maá yá, te condihví ni yō sáha yó jniñū váha.

¹⁵ Tāca jnúhun yáha cánuú stéén rō, te stíhví ni rō i, te cahān rō nuū i, chi súcuan ndíso jniñū ró. Te ma cuáha ro jnúhun jeē sajéē ni ni ñn i nuū rō.

Ndese cánuú sáha ñáyuu cácandíje

3 Te na nástíhví ni rō i jeē cuatáhú váha i nuū tēe cácujehnū jíin tēe cándiso jniñū ñuu. Te na squícu i jniñū cándacu de, te coo ñamā ni i sáha i tācá jniñū váha. ² Te ma cahán neé i siquí ni ñn ñáyuu, te coyūcu mání i jíin ñáyuu, te coo váha ni i, te coo vítá ni i jíin ndihí ñáyuu.

³ Chi máá yó suni ni cuu yó ñáyuu canéé jeē tu jécūhun ni nde saá, te ni cacuníhni ni yō nuū Yaā Dios. Te ni cacandíje yó táca jnúhun tú ndaā, te ni cajejníñū sáa-ni yó núū tāca jéē ní ndiyo neé ni yō jíin na-ni jniñū ni cusí ni yō. Te ni cajica yó jíin jniñū neé jíin jnúhun cuésún ni. Chi ni cajito uhū ñáyuu yohó, te ni cajito uhū yō i. ⁴ Yūcuán na te Yaā Dios, Yaā jnáma yóhó, ní steén yā jeē váha ni yā te cúndáhú ni yā ndihí ñáyuu ñayívi. ⁵ Te ni jnama ya yohó, te tú na jniñū váha ní cásaha yó jéē jnáma ya yohó, chi sa siquí jeē ní cundáhú ni yā yohó. Chi ni nacate ya anuá yō, te súcuan ni nacacu jeé yó, te ni ndujeé yó ni sáha ya jíin máá Espíritu Santo. ⁶ Te yōhyo ni cunuú Espíritu Santo ini anuá yō, jeē ni sáha Yaā Dios jeē jíin Jesucristo, Yaā jnáma yóhó. ⁷ Te súcuan te ni ndahva yā cuēchi yó síquí jeē váha ni yā, te nihín tahú yō cotecu yō ní cání, nájnūhun ñúhun ni yō.

⁸ Ndaā cúu jnúhun yáha, te cúní rí jeē niní cáhān níhin ro táca jnúhun yáha, návāha ñáyuu cácandíje Yaā Dios, na cóndihví ni i cocuu i jíin jniñū váha. Chi iyó váha tāca jéē yáha, te níhín jniñū jeē quéndōo váha ánuá ndihí ñáyuu. ⁹ Te ma quívi nduu rō jíin táca jnúhun cánéé íi, jíin jnúhun siquí ndese vēji tāca jíi yō, jíin táca jnúhun sáha jeē cátejñáhan i cácahān i jeē cánuú squícu yó ley Moisés. Chi máni jnúhun cáhá-ni jeē tu níhín jniñū cúu.

¹⁰ Te núu iyó ñáyuu jeē sáha jeē ndusíni ini ñáyuu cá-candíje, te cahān rō nuū i ñn uū jínu, te núu ma chúhun ni i, te quenehen ró i. ¹¹ Chi jíin rō jeē ñn ñáyuu sáha súcuan, stívi ndasí i chi jíin i jeē tú váha sáha i, te jeē yúcuán jécondēe cuēchi siquí i.

Jeē cána Pablo quiji Tito nuū de

¹² Te jeē tají rí Artemas chí Tíquico cuajeē de, yūcuán na te nducú ndéyí ró quiji ró núū rí ñuu Nicópolis, chi je ni cundaā ni rí jeē yúcuán condee rí tiempo mǐjin.

¹³ Te condihví ni rō chindéé ñáhán ró Zenas, tēe cúu abogado, te suni súcuan Apolos. Chi cuáha ró jéē jíiní ñúhún de jeē quíngoo ga de ichi nuū quihín de. Te co-to ró jéē ma cúmaní ni ñn nuū de. ¹⁴ Te ñáyuu cáhiin jíin yó, cánuú cutūhva i sáha i tācá jniñū váha, te chindéé ñáhán i ñáyuu cúmaní nuū, návāha ma cótecu saá-ni i.

Saludo jíin bendición jeē sándíhí

¹⁵ Tāca ñáyuu cáyūcu jíin rí yáha, cácahān i jeē sándeyí ni rō. Te cahān rō jeē achí rí jeē sándeyí ni ñáyuu jíin jeē maní yō jíin síquí jeē cácandíje yó. Te ñúhun ni rí jeē na sáha ga Yaā Dios jeē váha róhó jíin náhan ró. Súcuan na cóo. Amén.

FILEMÓN

1 Máá rí cúu Pablo, te íne ri vecāa jeē siquí jnúhun Cristo Jesús. Te jíin hermano yō Timoteo cátee ri carta yáha cuájeē nuū rō Filemón. Chi cúu ró tēe jeē cáhiyo manī rī jíin, chi chindéé ñájnáhan ró jíin rí siquí jníñu Yaā Dios. ² Te suni cátee ri carta yáha nuū ñáyuu cáandíje cándutútú ini vehe ró, te suni nuū hermana yō Apia, jíin núū Arquipo, tēe chindéé ñájnáhan jíin yó siquí jníñu cánducú ndeyí yó jíin. ³ Te cáñuhun ni rī jeē Tatá yō Yaā Dios jíin Jítóho yō Jesucristo, na sáha ga yā jeē váha róhó jíjnáhan ró, te sáha ya jeē coo ndeyí coo siñ ni rō.

Tēe cúndáhú ni te cándíje váha cúu Filemón

⁴ Te jeē jicán tahú rī nuū Yaā Dios te tu náā ni rī cacān tahú rī jehē rō, te níní nácuatáhú rí nuū yā jeē siquí rō. ⁵ Chi níhín rī jnúhun jeē váha cándíje ró jnúhun cúndáhú ni Jítóho yō Jesús rohó, te cúndáhú ni rō tāca ñáyuu yíñi ndaha Yaā Dios. ⁶ Te jicán tahú rī jeē ñáyuu ni cacandíje siquí jeē candíje máá ró, na jécūhun váha ga ni i siquí tāca jéē váha jeē sáha ya yohó jeē jíin Cristo Jesús. ⁷ Chi cúsiñ ndasí ni rī te íyó ndeyí ni rī, hermano, siquí jeē cundáhú ni rō ñáyuu cáandíje. Chi máá ró ni sáha jeē ní ndusiñ ni i.

Jeē jicán Pablo ñin favor jehē Onésimo

⁸ Núu súcuan te cáhán ndahú rí jíin ró, vēsú cuu ndacu ri nuū rō ndese cánuú sáha ró, chi cúu ri apóstol Cristo. ⁹ Te tuú chi sa cáhán ndahú rí jíin ró siquí jeē cáhiyo manī yō. Te cundáhú ni rō ruhū sáha ró jéē cuní ruhū Pablo, chi je jéñu ri, te íne ri vecāa jeē siquí jnúhun Cristo Jesús. ¹⁰ Te cáhán ndahú rí jíin ró jehē mozo rō Onésimo jeē ní jeen ró te ni jinu. Te vijna te cúu i nájnūhun sēhe ri, chi ni scándíje ri i ini vecāa yāhá.

¹¹ Te nde saá chi tu ní cúu i mozo squícu nuū rō, chi ni jinu i. Te nde vijna chi váha cuajníñu i nuū rō jíin núū rī. ¹² Te nátají rí i najeē i nuū rō. Núu súcuan te cahān váha ró jíin i, te sáha ró cuenta jeē nájnūhun máá rí ni

najinū, chi yōhyo manī rī jíin i. ¹³ Te cusíñ ni rī núu jeē na cúu quendōo i jíin rí yāhá, návāha cuajníñu i nuū rī lugar máá ró níní jéē íne ri vecāa jeē siquí jnúhun váha ya. ¹⁴ Te tu ní cuní rī sáha ri súcuan, chi nde cuāha máá ró jnúhun. Chi nasūu jéē safuerza rī rohó, chi jeē váha ni rō te sáha ró favor jíin rí, nájnūhun cúsiñ ni máá ró.

¹⁵ Chi sanaa te jeē siquí yáha cúu jeē ní jinu i ni cujiyo i nuū rō jecu-ni tiempo, suu návāha ví quendōo i jíin ró sáha Yaā Dios. ¹⁶ Te vijna tuá cúu i ñin mozo jeē ní jeen ró, chi ni nduu i ñin jeē váha ga, suu ñin hermano jeē maní rō jíin. Te ruhū chi yōhyo manī rī jíin i, te nagā ni cuu máá ró jeē ma cóo manī rō jíin i. Te nasūu jéē maní rō jíin ñin tēe súcuan-ni, chi siquí jeē cúu i ñin hermano jeē candíje nuū Jítóho yō.

¹⁷ Te núu sáha ró cuenta jeē ruhū cúu jnáhan ró cándíje, núu súcuan te cahān váha ró jíin i jeē jinu i nuū rō, nájnūhun jeē ruhū cahān rō jíin. ¹⁸ Núu na-ni falta ni sáha i nuū rō, chí núu taú i nuū rō, te cacān rō chunaa máá rí. ¹⁹ Ruhū Pablo, jíin ndaha máá rí tēe ri yāha jéē máá rí nachunaa. Súcuan cáhán rī vēsú cuu cahān rī jeē sa máá ró taú nuū rī sáha ró jéē cúsiñ ni rī siquí jeē ni scándíje ri rohó te ni cācu ánuá rō. ²⁰ Núu súcuan, hermano, sáha ró favor yáha jíin rí siquí jeē candíje ró Jítóho yō. Sáha ró jéē ndusiñ ni rī, siquí jeē cúu ró hermano candíje Cristo.

²¹ Te tēe ri yáha núū rō, chi cúcáñu váha ni rī jeē cuatáhú ró, te nde vihyá gā sáha ró vēsú jeē ni jicān rī.

²² Te suni jicán rī jeē sátūhva ró núū cóndee rī, chi ñúhun ni rī jeē quénda ri yāhá te jeē rī nuū rō sáha Yaā Dios siquí jeē cájicān tahú rō jehē rī.

Saludo jíin bendición jeē sándíñí

²³ Epafras, tēe íne jíin rí vecāa jeē siquí jnúhun Cristo Jesús, cáhán de jeē sándeýí ni rō. ²⁴ Te suni súcuan cácahān Marcos, jíin Aristarco, jíin Demas, jíin Lucas, tēe cáchindéé ñájnáhan jíin rí siquí jníñu ya.

²⁵ Te ñúhun ni rī jeē Jítóho yō Jesucristo na sáha ga yā jeē váha róhó jíjnáhan ró. Súcuan na cóo. Amén.

HEBREOS

Jeē ní tají Yaā Dios Sēhe ya ni nacani ya jnūhun

1 Tijni jínu te tijni modo ni cahān Yaā Dios jíin táca jíi yō nde jenahán, chi ni tají yá tēe ni canacani jnūhun ya. ² Te vijna te tiempo cuándihí yāha ní tají yá maá Sēhe ya ni nacani ya jnūhun nuū yō. Te jíin Sēhe ya ni sáha ya ñayīvi jíin táca gá, te ndívii jeē iyó ní chihi ya ndaha Sēhe ya. ³ Te Sēhe ya yōhyo luu cújéhu ya, nájnuhun luu cújéhu maá yá. Te ndihí ndese cúu maá yá, suni súcuan cúu Sēhe ya. Te jíin poder jnūhun ni cahān Sēhe ya te iyó cutú ndihí-ni. Te ni sándoo ya yohó táca cuéchi yó, te sáa te ni cucōo ya lado váha mesa maá Yaā kujéhu nde andíví.

Jeē kujéhu ga Sēhe Yaā Dios vēsú tǎcǎ ndajéhé yā

⁴ Te ni ndujéhu ndasí gá Sēhe ya vēsú tǎcǎ ndajéhé andíví, chi ni nihín yā tahū jeē ndíso ya jniñu jéhu ndasí gá vēsú jniñu cándiso ndajéhé. ⁵ Chi súcuan ni cahān Yaā Dios jíin Sēhe ya, te nasūu jíin ndajéhé yā:

Máa ró cúu Sēhe ri,
te vijna te ni sajeñu ri rohó jéē cúu ri Tatá rō.
Te suni ni cahān yā jnūhun Sēhe ya, te nasūu jnūhun ndajéhé yā:

Máa rí cúu Tátá nuū Sēhe ri,
te máa i cúu Sēhe nuū rī.

⁶ Te suni ná ni tají yá Sēhe ya kujéhu, ni quiji ini ñayīvi yáha, te ni cahān yā:

Ndihí ndajéhé rī na chíñúhún i Sēhe ri.
⁷ Te ni cahān tucu ya jnūhun ndajéhé yā:
Nájnuhun quée tachí, súcuan cájica ndajéhé rī sáha ri,
te tǎcǎ un jéē cájejniñu nuū rī, nájnuhun yáñuhún cácuu.

⁸ Te jnūhun Sēhe ya chi sa suhva cáhán yā:

Máa ró cúu Yaā Dios, te ndacu ró jniñu nǎí cáni, te jniñu ndácu ró, máni jniñu ndaā cúu.

⁹ Cúsñi ni rō jíin jniñu váha, te jíto uhū rō jniñu néé. Jeē yúcuan ruhū, Yaā Dios maá ró, ni sáha ri jeē yóhyo ga cúsñi ni rō vēsú tǎcǎ gá jeē iyó andíví.

¹⁰ Te suni cáhán yā:

Máa ró cúu Jitoho, te nde xīhna ñúhún ni sáha ró jéē ni jécōo ñayīví.

Te andíví chi suni jeē ni sáha ró cúu.

¹¹ Te tǎcǎ un chi naa, te máa ró chi nǎí cáni iyó ró. Te tǎcǎ un chi cutúhú nájnuhun cutúhú ñi sahna,

¹² te nacaquin jnahnū rō te nasama ró jíinhan.

Te máa ró chi ma sáma cuiñi rō,
te quiví cótecu rō ma ndíhi cuiñi.

¹³ Te súcuan ni cahān tucu yā jíin Sēhe ya, te nasūu jíin ndajéhé yā:

Cucōo ró lado váha ri nuū kujéhu ró,
te na sáha ri jeē quende rō poder tǎcǎ jéē cájito uhū rohó.

Achí yá. ¹⁴ Te tǎcǎ ndajéhé yā chi mozo-ni cácuu, te tají yá cuango jeē chindéé ñáhán ñáyuu jeē nihín tahū jeē jnama ya.

Jeē ma cúhuun ni yō jíin jnúhun jnáma ya yohó

2 Núu súcuan te cánuú jéē váha ga chuhun ni yō tǎcǎ jnúhun ya jeē ní cajini yó, chi núu tuú te sanaa te scuíta yó. ² Chi nde jenahán ní jejniñu ya ndajéhé yā ni cacastūhun jnúhun ya, te ni cajini ñayuu jeē iyó ndáa. Te ñayuu nihni ni jíin ñáyuu tu ní cájendetū jnūhun ún, vetū-ni ni canihín i castigo. ³ Te núu súcuan ni cuu, te yóhó, ¿ndese cácu yó núu ma chúhun ni yō jnūhun cánuú gá jeē jnáma ya yohó? Chi xīhna gá maá Jitoho yō ni nacani ya jnūhun yáha, te sáa te tēe jeē ní cajini nahín ni canacani ndaā tucu maá de nuū yō. ⁴ Te Yaā Dios suni ni chindéé ñáhán yá de jeē ní canacani de jnūhun ya. Chi ni sáha ya jíin de jeē ní casáha de sñi sñi jniñu jéhu jeē nahán náa ni yō jíto yó poder yā. Te suni ni jéhe ya Espíritu Santo yā nuū ñi ñi yó, ndese ni nujnahan ni maá yá sáha yó.

Jeē ní nduu Jesús jnáhan ñayuu

⁵ Te Yaā Dios nasūu núu ndajéhé yā ni jéhe ya jnūhun jeē condiso jniñu siquí ñayīvi jéē quiñi, chi sa suhva nuū Sēhe ya Cristo ni jéhe ya. Te siquí ñayīví un cúu jeē cahán rī yáha. ⁶ Chi suhva yósó núu tútu jeē ni cáhán David jíin yá:

¿Na vé cúu ñayuu jeē ñúhun ni ní i?
Te ndíhví ni ni síquí i, te máa ñáyuu cúu i.

⁷ Chi jecu-ni tiempo ni sáha ní jeē núu i nuū tǎcǎ ndajéhé ni.

Yúcuán na te sajeñu ní i te squéndōo yíñúhún ní i, te cani ní i jeē ndacu i jniñu nuū tǎcǎ jéē ni sáha ní.

⁸ Te ndihí jeē iyó chi sáha ní jéē kujéhu i siquí. Achí tutu. Te jeē ni sáha Yaā Dios jeē kujéhu i siquí ndihí, núu súcuan te ma quéndōo ni ñi jeē ma cújéhu i siquí. Te vēsú súcuan te vijna te ná tu coto yó jéē kujéhu i siquí ndihí jeē iyó. ⁹ Te jeē jiní yō vijna cúu Jesús, Yaā jeē ní nduu núu jecu-ni tiempo nuū tǎcǎ

ndajéhé yā. Chi ni ndoho ya jeē ni jīhī yā jehē yō, te jeē yúcuan ní ndujéhnū luu tucu ya, te ndīhī cáhīyo yǎñúhún núū yā. Chi jeē váha ni Yaā Dios jíin yó, jeē yúcuan ní jihī Jesús jehē yō.

¹⁰ Te ndīhī jeē iyó chi cuenta Yaā Dios cúu, chi máá yá ni sáha. Te suni ndéca ya cuehē ndasí séhe ya jeē quihín i andiví núū luu kujéhnū i jíin yá. Te váha níhín jníñu jeē ni jéhe ya jnūndóho nuū Jesús, chi jeē ní ndoho ya súcuan te cuu condeca váha ya ñayuu ní jnama ya. ¹¹ Chi Jesús jeē ni sándoo ya i te máá i jeē ní candundoo i, chi ñin-ni Tátá i jíin yá. Te jeē yúcuan tu cúcanu Jesús jeē cahán yā hermano yā jíin i, vésú ndasí núu i. ¹² Chi yósó núū tútu jeē ni cáhān yā jíin Tátá yā:

Cachi na jnúhun ní núū tācá hermano na,
te mēhñu núū cándutútú i cata ná ndese cújéhnū ní.

¹³ Te suni cáhān yā nájñūhun cácahān hermano yā:

Ruhū chi cándije ri yā.

Te cáhān tucu yā:

Yáha íne ri jíin táca gá séhe Yaā Dios jeē ni jéhe ya nuū rī.

Achí Jesús.

¹⁴ Te nájñūhun cáca cuu ñayuu jeē cúu i yiqui cúñu, suni súcuan ni cacu Jesús, návāha cuu yā jehē yō. Te súcuan ni snáā yā poder jexeén jeē squívi ñayuu nuū cuéchi te jíhī i. ¹⁵ Te ni cacu ya súcuan návāha cuu quenehen ya táca ñayuu chíji jnúhun jeē yuhú i cuu i. Chi níí vida i ndóho i sáha ún. ¹⁶ Te jendaá tu ní quíji ya jeē chindéé ñáhán yá tācá ndajéhé yā, chi sa suhva jeē chindéé ñáhán yá ñayuu cácañdije jeē ní nduu yucūn Abraham. ¹⁷ Jeē yúcuan ní jini ñúhún nduu inuú yá jíin táca hermano yā, návāha cuu ya sutū kujéhnū jeē squícu váha ya tācá jniñu jehē i nuū Yaā Dios. Chi ni cundáhú ni yā i, te ni ndahva yā cuéchi i jeē ni sócō yā máá yá jehē i. ¹⁸ Chi suni máá yá ni ndoho ya jeē ní jito ndee jnūndóho ya, te jeē yúcuan cuu chindéé ñáhán yá ñayuu jeē jíto ndee jnūndóho i.

Cújéhnū ga Jesús vésú Moisés

3 Hermano, ni cana Yaā Dios rohó, te cácuu ró ñayuu ndoo máá yá. Núu súcuan te na nácani váha ni rō siquī Cristo Jesús, Yaā cúu apóstol jeē ní tejníñu Yaā Dios, te suni cúu ya sutū kujéhnū siquī jnúhun cácañdije yó. ² Chi ni squícu váha ya nuū Yaā Dios, Yaā ní tee jniñu un síquī yā, nájñūhun ni squícu váha Moisés nuū ñayuu jeē ni cáhān Yaā Dios jeē cácuu i ñayuu vehe ya. ³ Chi cújéhnū ndasí gá Jesús vésú Moisés, nájñūhun cújéhnū ndasí gá tēe sáha vehe nasūu máá vehe. ⁴ Chi tācá vehe iyó tēe ni sáha. Te máá Yaā Dios cúu jeē ni sáha táca jéé iyó. ⁵ Te Moisés ni squícu váha de jíin jniñu jeē ní cuu de mozo ni condito de ñayuu vehe Yaā Dios. Te ni castūhún de siquī táca jnúhun jeē steén yā tiempo quiji. ⁶ Te Cristo chi sa cúu ya máá Séhe jeē ndácu jniñu nuū ñayuu vehe Tátá yā, te váha squícu ya jeē ni jéjñūhun ya nuū i. Te suni máá yó cácuu ñayuu vehe ya, te núu na cuíñi níhin yó

jíin jnúhun cándije yó ndé quiví sándīhí, te núu cúsiñ ni yó jeē ñúhun ni yó táca jéé váha jeē coo.

Jnúhun jeē ndetātu ñayuu Yaā Dios

⁷ Núu súcuan te na chúhun ni yó jeē cahán Espíritu Santo nuū tútu i:

Vijna te núu cuni sōho ró jéé cahán Yaā Dios,

⁸ te ma cúnīhni ni rō nájñūhun ni cacunīhni ni ñayuu jenahán.

Chi tu ní cájendetū i nuū yā ná ni cajica i nuū ñúhun téhé.

⁹ Chi yúcuan ní casáha jíi rō jniñu jeē ni quítī ni rī, achí yá,

vésú ni cajito i tācá jniñu ni sáha ri uū xico cuiyā.

¹⁰ Jeē yúcuan ní quitī ni rī jíin ñayuu tiempo un.

Te ni cáhān rī jeē máni jeē castóo i ichi ndaā, chí tu cácuu i condiquīn i jnúhun ri.

¹¹ Te jeē yúcuan ní quitī ni rī, te ni cáhān teyí rí jeē ma quívicoo cuiti i nuū ndetátú i sáha ri.

Achí yá.

¹² Núu súcuan hermano, coto má conéé ánuá ni ñin ró jéé cáca yátá ró jeē tuá cándije ró Yaā Dios, Yaā técu. ¹³ Chi sa suhva táca quíví na stíhví jnáhan ni rō, níni gá iyó tiempo, návāha ma cúnīhni ni ni ñin ró te stáhú róhó sáha ró cuéchi. ¹⁴ Te núu na cuíñi níhin yó ndé quiví sándīhí jíin jnúhun jeē ní quejéé yó jíin, yúcuán na te cuu yó jnáhan Cristo.

¹⁵ Chi cáhān tutu:

Vijna te núu cuni sōhó ró jéé cahán Yaā Dios,

te ma cúnīhni ni rō nájñūhun ni cunīhni ni ñayuu jenahán.

Achí. ¹⁶ ¿Te ndé-ni cúu ñayuu jeē ní jini jnúhun ya te ni cunīhni ni? Suu ndīhī ñayuu jeē ni scácu Moisés jeē ní quendacoo Egipto. ¹⁷ ¿Te ndé-ni cúu ñayuu jeē ni quítī ni yā nuū uū xico cuiyā? Suu ñayuu jeē ní casáha cuéchi, te ni cajihī i nuū ñúhun téhé. ¹⁸ ¿Te ndé-ni i cúu jeē ni cáhān teyí yá jeē ma quívicoo cuiti i nuū ndetátú i sáha ya? Suu máá ñayuu jeē tu ní cájendetū nuū yā.

¹⁹ Núu súcuan te jíni yó jeē tu ní cúu quívicoo i nuū ndetátú i, siquī jeē tu ní cácañdije i ya.

4 Te níni iyó gá jnúhun jeē ni jéjñūhun ya jeē quívicoo ñayuu nuū ndetátú i sáha ya, te na cónso iyo yó jéé ma stívi yó, návāha tú coo jíin sava ró jéé ma níhín rō quíví ró. ² Chi suni máá yó ni cajini sōho yó jnúhun jeē jnáma ya yohó, nájñūhun ñayuu jenahán un. Te nuū maá i tu ní jéjñūhun jnúhun ni cajini i ún, siquī jeē tu ní cácañdije i. ³ Te yóhó jéé cácañdije, máá yó cúu jeē quívicoo yó núu ndetātu yó. Te siquī ñayuu tu cácañdije ni cáhān yā suhva:

Jeē yúcuan ní quitī ni rī, te ni cáhān teyí rí

jeē ma quívicoo cuiti i nuū ndetátú i sáha ri.

Te súcuan ni cáhān yā vésú je iyó túhva nuū ndetátú i nde ná ni jecōo ñayíví. ⁴ Chi súcuan yósó jnúhun nuū tútu i siquī quíví uxá:

Ni sínu Yaā Dios tāca jēē ni sāha ya, te ni ndetātu yá quivī uxá.

⁵ Te suni nuū tútu un yósó tucu:

Ma quívicoo cuiṭi i nuū ndetātú i sāha ri. Achí yá. ⁶ Núu súcuan te sava ñayuu chi quívicoo nahín i nuū ndetātú i. Te ñayuu jenahán jēē ní cajini jnūhun jeē jnáma ya i, tu ní quívicoo i siquī jeē tu ní cájendetū i nuū yā. ⁷ Jeē yúcuan ní jeni tucu ya inga quivī jeē quívicoo ñayuu, te quivī un cúu vijna. Chi ná ni yāha cuehē tiempo jeē ni cáhān yā jíin ñáyuu jenahán, te yósó núu tútu jeē ni sāha ya jeē suni ni cahān David suhva:

Vijna te núu cuni sōho ró jēē cahán yā, te ma cúnīhni ni rō núu súcuan.

Achí tutu. ⁸ Te nde jenahán ní squívī Josué ñayuu Israel un ñuu nuū ndetātú i. Te tu ní cúu squívī de i nuū ndetātu ánuá i sāha ya. Chi núu súcuan te ma cahán gā Yaā Dios jíin táca ñáyuu jeē vijna cúu quivī jeē quívicoo i nuū ndetātú i. ⁹ Núu súcuan te íyó túhva nahín ñn nuū ndetātu ñáyuu Yaā Dios, nájñūhun ni ndetātu máá yá. ¹⁰ Chi ñayuu jeē quívicoo nuū ndetātú i jíin yá, chi ndetātú i jeē ní casájniñu i, nájñūhun ni ndetātú Yaā Dios nuū jníñu ni sāha máá yá. ¹¹ Núu súcuan te na ndúcú ndéyí yó quivī yó núu ndetātu yó un, te ma sāha ni ñn yó cuéchi jeē ma cándíje yó, nájñūhun ni casáha i nde saá.

¹² Chi jñūhun Yaā Dios ndíto técu te íyó poder. Chi cúu nájñūhun ñn espada jeē xeén ndíndúú lado, chi nástúu cájī ndese íyó jēē níjnūnī yō jíin ánuá yō, nájñūhun sāha espada jeē jéhnde te nástúu nuū ñu-jnáhan yiqui jíin meque. Te jñūhun ya nástúu ndíhī ndese jéni ni yō jíin ndese cúnī yō sāha yó. ¹³ Te tu íyó ni ñn jeē yísāhī jeē tu jíiní maá Yaā jeē náquihin cuenta, chi ndíhī-ni jíiní vāha ya, te ndíhī-ni túu ndijin nuū yā.

Jesús cúu sutū kujéhu ga

¹⁴ Te cánevāha yó ñn sutū kujéhu ga, te je ni ndaa ya ni ndívi ya nuū iyó Yaā Dios. Te Jesús Sēhe Yaā Dios cúu ya. Jeē yúcuan na cuñī nīhin yó jíin jnúhun jeē ní candíje yó. ¹⁵ Chi névāha yó ñn sutū kujéhu jeē jíto ndáhú yóhó jeē tu fuerza yō squícu vāha yó. Chi nájñūhun ndóho yó jēē jíto ndee jexeén yohó, suni súcuan ni ndoho ya jeē ní jito ndee un yá, vésú tú cuiṭi cuéchi ya. ¹⁶ Núu súcuan te ma yūhu yó, chi na quívī yó yuhu mesa yā, cúu jeē cacān tahú yō. Chi manī yā jíin yó, te cúndáhú ni yā yohó, te siquī jeē vāha ni yā te chíndéē ñáhán yá yohó táca jínu jeē jíiní ñúhún yó.

⁵ Chi tāca sūtū jeē ní kujéhu jenahán, ni nacāji Yaā Dios de mēhñu ñáyuu, te ni jeni ya de jeē cuiñī de nuū yā jehē ñayuu, te socō de ndajníñu jíin quitī nuū yā jeē siquí cuéchi i. ² Te cuu cahān vītá de jíin ñáyuu tu jécūhun ni jíin ñáyuu castévi, chi máá de suni tú na fuerza ini de squícu vāha de. ³ Jeē yúcuan cúu jeē suni cánuú sócō de quitī nuū yā jeē siquí cuéchi máá de, nasūu máá-ni jeē siquí cuéchi ñayuu.

⁴ Te ni ñn tēe tu cúu sájéhu de máá de jeē cuu de sutū kujéhu, chi sa máá Yaā Dios cúu jeē nacāji ya de, nájñūhun ni nacāji ya Aarón nde jenahán. ⁵ Te suni súcuan Cristo, tu ní sájéhu ya maá yá jeē cuu ya sutū kujéhu, chi sa Yaā Dios ni sāha, chi ni cahān yā jñūhun yáha:

Máá ró cúu Sēhe ri, te vijna te ni sájéhu ri rohó jēē cúu ri Tatá rō.

⁶ Te suni cáhán tucu ya nuū tútu iṭ:

Níí cáni cúu ró sūtū, nájñūhun sutū Melquisedec jenahán.

⁷ Te Cristo, ná ni condee ya ñayiví, te ni jicān tahú yā, te nde ni ndahyū yā te ni ndahyū cohó yá. Te ni cahān ndahú yá jíin Yaā Dios, Yaā jeē cúu jnama ya jeē ma cúu yā nuú. Te siquī jeē yíñúhún ní chíñúhún yá Yaā Dios, te ni chíndéē ñájñáhan Yaā Dios jíin yá nuū jñúndóho ún. ⁸ Chi vésú Sēhe Yaā Dios cúu ya, te ni jendetū yā ni ndoho ya ini ñayiví, te súcuan ni jini yā ndese cúu jñūhun jéndetū. ⁹ Te ná ni cuu ni squícu ndíhi ya jeē ní jendetū yā, te ni cucutú jnúhun jeē jnáma ya táca ñáyuu jéndetū nuū yā, te cotecu i níí cáni.

¹⁰ Chi ni jeni Yaā Dios yā jeē cúu ya sutū kujéhu nájñūhun sutū Melquisedec.

Siquī jeē ma cáca yátá i

¹¹ Te íyó cuéhe jñūhun jeē castūhun rí siquī tāca jēē yáha. Te yíí cúu jeē jécūhun ni rō sāha ri, siquī jeē tu cácu ni rō chuhun ni rō. ¹² Te je ni cunahán cáca ndíje ró, te jíiní ñúhún jēē cúu ró tēe stéén nuú. Te tuú chi sa cájini ñúhún tucu máá ró tēe stéén nuū rō táca jnúhun Yaā Dios jeē tú yíí cuiṭi. Chi sa ni canduu ró nájñūhun sūchi yíquín jēē jíiní ñúhún caxin i, chi ná tu ije i caji i jeē ndáva. Súcuan cácu ró chi ná tu ije ró jíin jnúhun yíí gá. ¹³ Chi núu máni máá nájñūhun sūchi yíquín jéxin cácu ró, núu súcuan te tu cúu jecūhun vāha ni rō jñūhun ndaā. ¹⁴ Te ñayuu jeē jé ni ije, chi cáyeji i jeē ndáva, cúu jeē ní cutūhva vāha i te je cúu nacāji i jeē vāha jíin jēē neé.

⁶ Núu súcuan te na yáha yó núu tāca jnúhun Cristo jeē tú-ni yíí, te na quíhín yō nuū jnúhun yíí gá, návāha na íje vāha ni yō jíin jnúhun ya. Te ma ndejéé tucu yó jíin jnúhun jeē ni scuáha yó xíhna gā, suu jñūhun jeē nacani ni yō stóo yo cuéchi yó jēē cúu yō sāha, jíin jēē candíje yó Yaā Dios, ² jíin síquī jeē jéndute, jíin síquī jeē soó ndaha xiní ñáyuu, jíin síquī jeē nátecu ndíyī, jíin síquī jeē jnahnú ndetū ñayuu níí cáni. ³ Núu súcuan te na yáha yó núu tāca jēē yáha te quivī yó núu jnúhun yíí gá, te núu cuāha Yaā Dios jñūhun.

⁴ Chi íyó ñáyuu jeē jé ni jecūhun ni i, te je ni jini i tāca jēē jéhe Yaā Dios, te je ni quivī i nuū jnúhun stéén Espíritu Santo, ⁵ te suni je ni jini i jñūhun vāha Yaā Dios jíin ndese coo poder yā tiempo quiji. ⁶ Te ñayuu un núu caca yátá i, te ma cúu ga ndejéé jeē i jeē nacani ni i. Chi jeē cáca yátá i cúu nájñūhun jeē nacahni tucu i Sēhe Yaā Dios jicā cruz, te cájēhe i jñūhun canu yā cáji-

to ñayuu. ⁷ Te ñayuu chi cácuu i nájñuhun ñuhun jeē cúun vāha saū nuū te ndóyo vāha. Te núu cánecoo jeē váha caji tēe cásáñiñu, yūcuán na te cúsiñ ni Yaā Dios jíin. ⁸ Te núu máni iñu yóquin jíin yucū sajnēñu cánecoo nuū, núu súcuan te tu jéjñiñu cuiñi, te squéndōo iñ yā, te ññ quivī te cayū. Súcuan jñahnū ndetū ñayuu cájica yátá.

Jeē ñúhun ni yō tāca jéē váha jeē coo

⁹ Te máá ró jijnáhan ró hermano, vēsú cácahān rī súcuan jíin ró, te cácuahñu ni rī jeē cácuu ró ñayuu cuiñi ñihin, chi ñayuu ni jnama ya cácuu ró. ¹⁰ Te Yaā ndaā cúu Yaā Dios, te tu náa ni yā jñiñu cásáha ró. Chi siquī jeē cáñiyo manī rō jíin yá te ni cacundáhú ni rō hermano rō cácañiñe, te ni cachindéé ñáhán ró i, te súcuan cásáha ró ndé vijna. ¹¹ Te cácuu rī jeē niní súcuan sáha ga ná ññ ná ññ ró ndé quivī sándñhí, chi jeē sáha ró súcuan te ñihin rō ndiñi jeē cáñuhun ni rō. ¹² Te cácuu rī jeē ma cúhuun ni rō, chi sa ndacu ró ñayuu cácañiñe jeē jíin paciencia cándetu i, te jeē yúcuan ñihin tahú i tāca jéē ni jéjñuhun ya.

¹³ Chi quivī jeē ni jéjñuhun Yaā Dios nuū Abraham, te ni ndacunehen ya maá yá jeē ni jéjñuhun téyí yá, chi tuá na inga ndacunehen ya jeē cujéñu ga vēsú maá yá jeē cuu testigo yā. ¹⁴ Te ni cahān yā: Jendaá ndije jeē vāha ndasí sáha ri jíin ró, te sáha ri jeē nducuehē ndasí yúcūn rō, achí yá jíin Abraham. ¹⁵ Te jíin paciencia ni condetu de, te súcuan te ni ñihin de jeē ní jéjñuhun ya. ¹⁶ Te núu cáhán teyí ñayuu, te ndacunehen i síhví ññ jeē cujéñu ga vēsú maá i. Te núu iyó ññ jñuhun jeē tu cácañiñe jñahan, te núu ññ tēe cáhán teyí de jíin síhví Yaā Dios, yūcuán na te jécuiñiñi jeē cátejñahan. ¹⁷ Te suni súcuan Yaā Dios, chi ni jéjñuhun téyí yá nuū ñayuu jeē cuāha ya tahū i. Chi ni cuni yā jeē cucáhñu vāha ni i jeē ma nácani yátá ni yā siquī jeē ni jéjñuhun ya nuū i. ¹⁸ Chi ma nácani yátá cuiñi ni yā siquī jñuhun jeē ni cáhān yā uñ jínu, ññ jeē ni jéjñuhun ya, te inga jeē ni cáhān teyí tucu ya siquī suni jñuhun ún. Chi tu stáhú cuiñi yā. Te jeē yúcuan máá yó jeē ní tūhva yó yá, chi yōhyo iyó ndeyí ni yō, te cáñuhun teyí ni yō jeē squícu ya jeē ni cáhān yā. ¹⁹ Te siquī jeē súcuan ñúhun ni yō, te suu sáha jeē quéndōo ñihin ánuá yō jíin jñuhun ya, te quéndōo ndaā ni yō, nájñuhun quéndōo ñihin barco jeē jññ gancho yuū. Te sáha jeē cúu quivī yó andiví núu íí gā, nájñuhun cuarto íí gā jeē ni iyó ichi yátá sahna ni ndita caa ini vehe íí jehahán. ²⁰ Te ini yūcuán chi xñhna gā Jesús ni quivī, návaha nune ya ichi quivícoo yó. Te jeē yúcuan ññ cáni cúu ya sutū cujéñu nájñuhun sutū Melquisedec.

Jeē cúu Jesús sutū nájñuhun Melquisedec

7 Te máá Melquisedec ni cuu de rey ññu Salem, te ni cuu de sutū nuū Yaā Dios, Yaā cujéñu téyí. Te ni jéjñahan de Abraham ná ni nandicó Abraham jeē ní cundeyí de ni cajejñahan de jíin táca rey. Te ni jicān

tahú de jehē Abraham. ² Te tāca úxí ndajñiñu jeē ní quende Abraham nuū tāca rey un, ni jēhe de ññ ññ siquī un núu Melquisedec. Te síhví Melquisedec cuni cahān: rey jeē sáha jñiñu ndaā. Te suni nání de rey Salem, te jñuhun Salem cuni cahān: jeē iyó ndeyí síñ ni. Te jeē yúcuan suni nání de: rey jeē sáha jeē iyó ndeyí síñ ni ñayuu. ³ Te tu cáhán tutu jñuhun tátá de ni náná de ni tāca jíi de. Ni tu cáhán núu ni cacu de, ni núu ni jihí de. Chi cúu de nájñuhun Jesús, Sēhe Yaā Dios, chi ññ cáni cúu de sutū.

⁴ Te condēhe jijnáhan ró náa jéñu ni cuu Melquisedec, chi jíi jéñu yó Abraham ni jēhe de ññ ññ siquī tāca jéē uxí nuū de siquī tāca jéē ní quende de nuū rey un. ⁵ Te jíin yō jeē tāca úxí ndajñiñu ni canihñ ñayuu, ni cajēhe i ññ ññ siquī un ní caquihin tēe cácuu sutū yucūn Leví, nájñuhun cáhán ley Moisés. Te ni caquihin de nuū ñayuu cácuu jñahan de, chi ññ-ni yucūn Abraham cácuu de jíin i. ⁶ Te Melquisedec nasūu yucūn Leví cúu de, te vēsú súcuan te ni quihin de ññ ññ siquī tāca jéē uxí nuū Abraham. Te suni ni jicān tahú de jehē Abraham, vēsú cúu Abraham tēe jeē ni jéjñuhun ya nuū. ⁷ Te jíin vāha yó jéē tēe cújéñu ga cúu jeē jicān tahú jehē tēe núu ga. ⁸ Te ñayiví yáha chi tāca sutū cáquihin de ññ ññ siquī tāca jéē uxí nuū ñayuu, vēsú cácuu te tēe cájihí. Te Melquisedec suni ni quihin de, te máá de chi cáhán tutu íí jeē técu de. ⁹ Te suni cuu cahān yō jeē Leví, tēe jeē ní quihin ññ ññ siquī tāca jéē uxí nuū ñayuu, suni nájñuhun nuū maá de ni quihin Melquisedec ññ ññ siquī tāca jéē uxí. Chi jeē ni jéhe Abraham nuū Melquisedec, suu cúu nájñuhun jeē suni ni jēhe de jeē siquī Leví jíin ndiñi ga yucūn de jeē quíji. ¹⁰ Chi yucūn Abraham cúu Leví, te vēsú ná tu cacu de quivī jeē ni jéjñahan Melquisedec Abraham, te nájñuhun jeē ni jéhe máá de cúu jeē ni jéhe Abraham.

¹¹ Te yucūn Leví ni cane sutū Aarón jíin táca gá sutū ní quijicoo. Te ni castéén de ley yā nuū ñayuu Israel jehahán. Te núu ní cúu sáha de jeē quendōo ndaā ñayuu jíin ley un núu, te tuá cánuú jeē núcuññi inga clase sutū lugar Aarón jíin yúcūn de. Te inga clase sutū cúu Cristo jeē cúu ya nájñuhun sutū Melquisedec. ¹² Te núu nucuiññi inga clase sutū, te suni cánuú sáma ley siquī yucūn de. ¹³ Núu súcuan te ni sáma ley un, chi cáhán tutu íí jeē Jítoho yō Jesús cúu inga clase sutū ún, te ni cacu ya chíji inga yucūn. Te yucūn ní quiji ya ún, tú ni ññ ní cúu sutū. ¹⁴ Chi jíin vāha yó jéē chíji yucūn Judá ni cacu Jítoho yō. Te yucūn ún chi tu ní cáhán cuiñi Moisés jeē cánecoo sutū.

¹⁵ Te cáji cúu jeē ní nucuiññi Cristo jeē cúu ya inga clase sutū nájñuhun sutū Melquisedec. ¹⁶ Te tu cúu ya sutū jeē ní cacu chíji yucūn Leví nájñuhun cáhán ley jehahán. Chi cúu ya sutū siquī jeē ndíso ya poder cotecu yā ññ cáni te ma cúu cuiñi yā. ¹⁷ Chi súcuan ni cahān Yaā Dios jñuhun ya:

Ññ cáni cúu ró sutū,
nájñuhun sutū Melquisedec.

¹⁸ Núu súcuan te jniñu jeē ní ndacu ley jenahán siquī sutū, chi ni naa vijna, chi tu ní níhín jniñu quendōo nñí cáni. ¹⁹ Chi ley Moisés tu ní sáha jeē quendōo ndaā ñayuu. Te ni nihīn yō ñn jnūhun vāha ga jeē ñūhun ni yō jeē ndáhva Cristo cuēchi yó, te súcuan ni cuyajni yó núu Yaā Dios.

²⁰ Te jíin jeē ni cáhān teyí Yaā Dios te cúu Jesús sutū.

²¹ Chi tāca gá tēe ún, nasūu jíin jnūhun jeē ni cáhān teyí yá ní cúu de sutū. Te Jesús chi ni cahān teyí Yaā Dios jeē cuu ya sutū, chi súcuan cáhān tutu:

Ni cahān teyí máá Jítóho yō Yaā Dios, te ma nácani yátá ni yā:

Nñí cáni cúu ró sūtū,
nájñūhun sutū Melquisedec.

Achí yá. ²² Núu súcuan te jíin Jesús ni cucutú ñn contrato vāha ga vēsú ley jenahán. ²³ Te tāca gá sutū ún, chi ni ñyo cuehē de, chi siquī jeē cájihī de te tu ní cúu cuiñi de nñí cáni. ²⁴ Te Jesús chi cúu ya sutū jeē cuiñi nñí cáni, chi técu yā ññí cáni. ²⁵ Jeē yúcuan ndíso jniñu ya jnama ya ñayuu quíjicoo nuū Yaā Dios, cotecu i nñí cáni. Chi nñí cáni técu yā te cáhān yā jehē i jíin Yaā Dios.

²⁶ Núu súcuan te vāha ndasí sutū kujéhu cúu Jesús, jeē nájnūhun jíni ñúhún yó. Chi sutū ñi cúu ya, te tú na cuēchi ya, te íyó ndoo ya, te tu cúu ya jnáhan ñayuu casáha cuēchi, te cújéhu téyí yá nde nuū sucún gá andiví. ²⁷ Te máá yá tu jíni ñúhún sáha ya nájnūhun ni casáha sutū cácujeñu jenahán, jeē ndiquiví ni casocō de quití siquī cuēchi máá de xihna gā, te sáa te siquī cuēchi ñayuu. Chi ñn jínu-ni ni socō yā máá yá jehē yō, te ni cuu-ni. ²⁸ Chi ni jeni ley Moisés tāca sūtū kujéhu jeē tú na fuerza squícu vāha. Yūcuán na te cuéé gá te ni cahān teyí Yaā Dios. Te jíin jeē ni cáhān teyí yá, te ni jeni ya Sēhe ya jeē cúu ya sutū kujéhu, te sutū ndaā sutū vāha cúu ya ññí cáni.

Jeē ndíso jniñu Cristo siquī ñn contrato jeé

8 Núu súcuan te jnūhun cánuú gá jeē jé ni cahān rī cúu yāhá: Névāha yó ñn sutū kujéhu nájnūhun ni cahān rī, te ndéé yá lado váha mesa nuū ndácu jniñu máá Yaā kujéhu nde andiví. ² Te vijna te cúu ya sutū nde andiví, jeē cúu ndije lugar ñi jeē ni sáha máá Jítóho yō Yaā Dios, nasūu ñayuu. Chi tu cáa nájnūhun vehe ñi jenahán jeē ní casáha ñayuu. ³ Te tāca sūtū kujéhu ni jeconaā de jeē socó de ndajniñu jíin quití nuū Yaā Dios. Núu súcuan te Jesucristo suni ni jini ñúhún jeē socó yā jeē cúu ya sutū. ⁴ Te núu ní íyo ga yā ñi ñayiví, te ni ma quijnáhan jeē cúu ya sutū jíin táca gá sutū, chi níni cá-socō gā de quití nájnūhun cáhān ley Moisés. ⁵ Te jniñu casáha de, tu quijnáhan jíin jeē íyó andiví. Chi cúu ñn muestra-ni jeē steén siquī andiví. Te cúu nájnūhun jeē ni cáhān Yaā Dios jíin Moisés quiví ní quejéé de sáha de vehe ñi jenahán: Coto vāha ró jéé sáha ró táca ndajniñu nájnūhun jító jeē ni steén rī nuū rō nde xiní yúcu, áchí Yaā Dios jíin de. ⁶ Te vijna te sáha Cristo jniñu jéhu ndasí gá vēsú jeē casáha tāca sūtū ún, chi ndíso

jniñu ya siquī contrato jeé jeē yóhyo vāha ga, chi ndíso jnūhun jéhu ga jeē ni jéjnūhun Yaā Dios.

⁷ Chi contrato ley xihna ñúhún, núu jeē ni sáha jeē queé vāha jniñu núu, te tuá cánuú jeé cóo contrato uū.

⁸ Chi ñayuu jenahán un jeē tu ní cáquendōo ndaā, suhva ni cahān Yaā Dios jíin i, áchí tutu:

Quiji quiví jeē nasáha ri ñn contrato jeé jíin ñayuu Israel jíin ñayuu Judá, áchí Jítóho yō Yaā Dios.

⁹ Te ma cóo nájnūhun contrato jeē ni sáha ri jíin jíi i jenahán,

quiví jeē ní jñi ri ndaha de jíin náhan de, te ni quenehen ri de ini nación Egipto. Chi tu ní cásquícu vāha de jíin contrato ley rī.

Jeē yúcuan tuá ní táñúhún rí de, áchí Yaā Dios.

¹⁰ Núu súcuan te suhva coo contrato jeē nasáha ri jíin ñayuu Israel,

nde na quíji quiví yúcuan, áchí Jítóho yō Yaā Dios: Sáha ri jeē jécūhun ley rī nuū jeē níjnūni i, te suni ini anuá i tee ri jnūhun ley rī.

Te cuu ri Yaā Dios máá i, te máá i cuu ñayuu máá rí.

¹¹ Te tuá jíni ñúhún steén i nuū jnáhan i nuū ñáni i, návāha cuni i ndese Yaā cúu Jítóho i.

Chi ndihí i cuni ndese Yaā cúu ri, nde ñayuu núu ga jíin ndé ñayuu kujéhu ga.

¹² Chi cone cáhnu ni rī nuū i jeē ní casáha i jniñu néé, te ni ma núcūhun ga ni rī cuēchi ni casáha i.

Achí Yaā Dios. ¹³ Te jeē ni cáhān yā jeē cuáha ya ñn contrato jeé cúu jeē ní cachi yā jeē tuá cuajniñu contrato xihna ñúhún. Te ñn jeē ní cutúhú jeé tuá jejniñu, chi jíni yō jeē je yajni naa.

Vehe ñi ñayiví yáha ní steén ndese cáa andiví

9 Te ndaā chi contrato xihna ñúhún ní ndacu jniñu ndese chiñúhún i ya, jíin ndese coo ñn vehe ñi ñi ñayiví yáha. ² Te ni cuvāha vehe ñi ún, te ni ñyo uū cuarto. Te cuarto xihna ñúhún jeé naní cuarto ñi, ni ñi can-delero oro jíin mesa oro jíin pan ñi. ³ Te ni ñyo sahna jeé ndíta caa jeé ndihyú inga cuarto jeé naní cuarto ñi ndasí gá. ⁴ Te ini un ní ñyo ñn altar oro nuū cayú sūje cútú, jíin yéjnū jeé ñúhún contrato ley, te máni oro cúu nñí síquī yejnú. Te ini yejnū un íne ñn tijehēn oro jeé ñúhún maná jeé ní cuun andiví. Te suni íne vara Aarón jeé ní nane numa, jíin tabla yuū jeé yosó jnūhun contrato ley. ⁵ Te siquī yejnú un ní cahān ndíndúú figura ndajéhé querubín jeé steén jeé íne Yaā Dios. Te ni sáha cuandahū siquī tapa yejnū nuū ní cóso yuyú nñí jeé ndáhva cuēchi. Te tu núne yó cáhān gā yō siquī táca yúcuan vijna.

⁶ Te ná ni jínu táca un, te núu-ni núu-ni quívicoo sutū ini cuarto xihna ñúhún jeé casáha de jniñu jeé cúu de sutū. ⁷ Te ini cuarto uū, chi tu cúu quívicoo na-ni sutū jíin inga ñayuu, chi máñúhún-ni sutū kujéhu ga cúu jeé quíví, te suni ñn-ni vuelta jeé cuiyá. Te suni ma cúu

quívi de núu tú níñi quití jeē socó de nuū Yaā Dios jeē síquí cuéchi máá de jíin síquí cuéchi ñayuu. ⁸ Te jíin yúcuan stéén Espíritu Santo nuū yō jeē ná ni iyo ga cuarto iī xīhna ñúhún ini ñayívi, te tu ní núne ichi jeē quívi ñayuu ini lugar iī ndasí jeē cúu andiví. ⁹ Chi tāca yúcuan cúu jeē ni stéén ndese cúu tiempo vijna. Chi jeē ní casocō i ndajníñu jíin quití nuū Yaā Dios, chi tu ní cúu cuiti sáha jeē quéndōo ndoo ánuá ñayuu ní casocō ún. ¹⁰ Chi tācá un ní steén máni síquí yiquí cúñu yō, ndese caji yō, ndese coho yó, ndese ndundoo yó. Te ni jejníñu máá-ni nde ni quiji Cristo jíin ñin modo vāha ga.

¹¹ Chi vijna je ni quiji Cristo, te cúu ya sutū cujéñu ga jeē ndíso jníñu ya síquí tāca jéē váha jeē ní quiji vijna. Te cúu ya sutū ini lugar iī nde andiví jéē cujéñu ga te vāha ga vésú cuarto iī jenahán. Te nasūu jéē ní casáha ñayuu cúu, chi nasūu cuenta ñayívi yáha cúu. ¹² Te jeē ni quívi ya ini lugar iī ndasí gá nde andiví, te nasūu jíin níñi ndixúhú ni níñi becerro, chi jíin níñi máá yá ni quívi ya, ni socō yā ñin jínu-ni jeē ní cání. Te súcuan ni jnama ya yohó jéē cótecu yō ní cání. ¹³ Chi nde jenahán te níñi stíquí jíin níñi ndixúhú jíin yāá becerro jeē ni cáyu nuū altar, ni cacosō yuyú de síquí ñayuu jeē tu iyó ndoo ánuá i, te súcuan ni ndundoo i nuū yā. ¹⁴ Te núu ni nihīn jníñu níñi tācá quití ún, te nagā ni cuu níñi máá Cristo. Chi Yaā ndoo cúu ya, te ni socō yā máá yá nuū Yaā Dios, ni sáha Espíritu jeē iyó ní cání. Te níñi yā nácate ánuá yō nuū jníñu néé jéē cúu yō sáha. Te súcuan te cuu cuajníñu yó núu Yaā Dios, Yaā técu.

¹⁵ Jeē yúcuan cúu jeē ndíso jníñu ya síquí ñin contrato jeé. Chi ni jihī yā, te súcuan ni quende yā cuéchi ni casáha ñayuu ná ni iyo i chíji contrato xīhna ñúhún. Te ñayuu jeē cána Yaā Dios i quívicoo i ndaha ya, nihīn i tahū i jeē cóo ní cání, nájnūhun ni jejnūhun ya. ¹⁶ Chi cúu nájnūhun núu sáha ñin tēe acta jeē cahán síquí tahū, te nde na cúu de te níhín jníñu. ¹⁷ Chi núu técu gā tēe ni sáha, te tu níhín jníñu. Te nde núu ni jihī de, te sáá te jéjníñu. ¹⁸ Te suni súcuan contrato xīhna ñúhún, suni ni jini ñúhún cucutú jíin níñi quití ní jihī. Te contrato jeé chi ni cucutú jíin níñi Cristo jeē ni jihī yā. ¹⁹ Chi ná ni cuu ni cachi Moisés tācá jniñu ndácu contrato ley un núu ndivii ñayuu, te ni quihin de níñi becerro jíin níñi ndixúhú jíin ndute, te jíin ixi cácuéhé jíin yúcū hisopo ni cosō yuyú de síquí libro ley jíin síquí ndivii ñayuu. ²⁰ Te ni cahān de: Yāha cúu níñi jeē cúcutú contrato ley jeē ní sáha Yaā Dios jíin yó, achí de. ²¹ Te suni níñi un ní cosō yuyú de nde máá vehe iī jíin tāca ndajníñu ni cajejníñu de jeē cáchiñúhún de ya. ²² Te je yajni ndihī ndajníñu, chi cáhán ley un jeē jíni ñúhún ndundoo jíin níñi. Te núu ma cáti níñi te ma cóne cáhnu ni yā nuū cuéchi núu.

Jeē ni sócō Cristo máá yá jeē quénde yā cuéchi

²³ Núu súcuan te tācá ndajníñu un jéē cácuu muestra tāca jéē iyó andiví, ni jini ñúhún ndundoo jíin níñi

quití. Te tāca máá jéē iyó andiví, chi ni jini ñúhún ndundoo jíin níñi Cristo jeē yóhoyo vāha ga. ²⁴ Te Cristo chi tu ní quívi ya ini lugar iī jeē ní casáha ñayuu, chi ñin muestra-ni ni cuu un jéē steén ndese iyó lugar iī ndije nde andiví. Chi máá andiví ní quívi ya, te vijna íne ya nuū Yaā Dios jeē cahán yā jehē yō. ²⁵ Te máá sūtū cujéñu ga quívi de tāca cuíyā ini cuarto iī gā jeē socó de níñi quití. Te Cristo tu ní sócō yā máá yá cuéhē jínu, chi ñin jínu-ni. ²⁶ Chi núu jeē súcuan te cánuú jéē cuéhē jínu ndoho ya nde ná ni jecōo ñayívi te nde vijna núu. Te tuú chi sa tiempo cuándihī yāhá ni quenda ndijin yā ñin jínu-ni jeē ní cání, ni socō yā máá yá jeē ní quende yā cuéchi. ²⁷ Te nájnūhun ni cundaā jeē cúu tāca ñayuu ñin jínu-ni, yūcuán na te sándaā Yaā Dios jniñu i, ²⁸ suni súcuan Cristo ni jihī yā ñin jínu-ni jeē ni sócō yā máá yá jeē ní quende yā cuéchi cuéhē ñayuu. Yūcuán na te ndiji ya inga jínu, te nasūu jéē socó tucu ya máá yá jeē quénde yā cuéchi, chi sa suhva jeē jnáma ya ñayuu jeē cándetu i jeē ndiji ya.

10 Chi ley Moisés ni cuu ñin muestra-ni tāca jéē váha jeē ní quiji jíin Cristo, ñin jeē steén-ni ndese coo máá jéē váha. Jeē yúcuan tu cúu cuiti sáha ley un jéē quéndōo ndaā ñayuu jeē quíjicoo i nuū Yaā Dios jeē cásocō i quití nuū cuíyā nuū cuíyā. ² Chi núu ní cúu sáha ley un jéē quéndōo ndaā i, te jecuíñi jeē cásocō i quití núu. Chi núu ní cúu, te ñin jínu-ni te je ni quendōo ndoo ánuá ñayuu cásocō ún, te ma yūhu gá anuá i jeē ni sáha i cuéchi núu. ³ Te tuú chi jeē cásocō i quití ún tāca cuíyā, sa sáha jeē núcūhun ni i cuéchi i. ⁴ Chi níñi stíquí jíin níñi ndixúhú, ma cúu cuiti quende cuéchi.

⁵ Jeē yúcuan ná ni quiji Cristo ini ñayívi, te ni cahān yā jíin Yaā Dios:

Jeē jéñi i quití jíin jéē jéhe i ofrenda nuū ní, chi tu ní nújnahan ni ní.

Te ni sátūhva ní yiquí cúñu máá ná jeē socó na.

⁶ Te tu ní cúsiñi ni ni jéē jéñu i quití te sócō i tí jeē ndúndoo cuéchi i núu.

⁷ Yūcuán na te ni cahān ná: Yāha véji ná jéē squícu ná jniñu jeē nújnahan ni ní, Tātā Yaā Dios.

Chi súcuan je yósó jnúhun na núu tútu.

Achí Jesús. ⁸ Xīhna gā ni cahān yā jeē tu ní nújnahan ni Yaā Dios te tu ní cúsiñi ni yā jeē jéñi i quití te jéhe i ofrenda, jíin jéē jéñu i tí te sócō i tí jeē ndúndoo cuéchi i núu, nájnūhun ndácu ley jenahán jniñu. ⁹ Te ni cahān gā yā: Yāha véji ná jéē squícu ná jniñu jeē nújnahan ni ní, Tātā Yaā Dios. Te jeē ni cahān yā súcuan, te ni sáha ya jeē jecuíñi jeē cásocō i quití, chi ni socō yā máá yá. ¹⁰ Te ni sáha Yaā Dios jeē iyó ndoo iyó iī yō nuū yā síquí jeē ni sáha Jesucristo jeē nújnahan ni Yaā Dios, suu jeē ni sócō yā yiquí cúñu yā ñin jínu-ni jeē ní cání.

¹¹ Te tāca sūtū ún ndiquíviñi ni cahān de ni cajejníñu de nuū yā, te cuéhē jínu cájehni de suu quití jeē socó socó de. Te tācá un chi ma cúu cuiti quende cuéchi. ¹² Te Cristo chi ñin jínu-ni jeē ní cání ni socō yā máá yá jeē síquí cuéchi yó. Te sáá te ni cucōo ya lado váha Yaā Dios nuū cujéñu ya. ¹³ Te yūcuan ndétu ya vijna nde

quiji quiv̄i jeē quénde yā poder tāca jéē jíto uhū nuū yā. ¹⁴ Chi jeē ni sócō yā maá yá ñn jínu-ni, te ni sáha ya jeē ñí cání quendō ndaā ñayuu ni sándoo ya. ¹⁵ Te máá Espíritu Santo suni cájí cáhán yā siqūi jnúhun yáha, chi x̄ihna gā cahán yā:

¹⁶ Suhva coo contrato jeē nasáha ri jíin i, nde na quíji quiv̄i yúcuan, áchí Jítóho yō Yaā Dios: Sáha ri jeē jécūhun ley rī ini anuá i, te suni nuū jeē ñjñn̄i i tee ri jnúhun ley rī.

¹⁷ Yūcuán na te cáhán gā yā:

Ma núcūhun cuīti gā ni rī tāca cuéchi jíin jniñu néé ní casáha i.

Achí yá. ¹⁸ Núu súcuan te núu je ni ine cáhnu ni yā nuū cuéchi yó, te tuá cánuú jéē socó gā yō jeē siqūi cuéchi yó.

Jeē ní nune ichi quiv̄i yó núu Yaā Dios

¹⁹ Jeē yúcuan hermano, ma ñn jeē cání ni yō, chi cuu quiv̄i yó lugar ñ ndasí ndé nuū iyó Yaā Dios, siqūi jeē ní jeti ñíñ̄i Jesucristo. ²⁰ Chi ni nune ya ñn ichi jéé jéé cóte-cu yō ñí cání sáha ya. Chi ná ni jih̄i yā te ni tahndē sah-ma ndíta caa jeē ndihyú lugar ñ ndasí gá ini vehe ñ. Te súcuan ni steén Yaā Dios jeē núne quiv̄i yó lugar ñ ndasí gá nuū iyó yá. ²¹ Te Jesús cúu sutū kujéhu ndasí jeē ndíto yóhó ñayuu cácuu sēhe Yaā Dios. ²² Núu súcuan te na quiv̄icoo yó núu Yaā Dios, te na cóo ndije ndaā anuá yō, te na cándije ñhin yó jéé iyó ndaā ndih̄i jnúhun ya. Chi jíin ñíñ̄i Cristo ni ndundoo ánuá yō nuū tāca cuéchi ni casáha yó, nájnūhun ni ndundoo yó núu yā jeē ní jendute yó jíin ndute. ²³ Te na cuīñi ñhin yó jíin jnúhun jeē cácahán yō jeē ñhūhun ni yō jeē sáha ya jeē váha jíin yó. Te ma cáca yátá yó, chi váha squícu máá Yaā Dios jeē ni jéjnūhun ya nuū yō. ²⁴ Te na nácani ni yō ndese st̄íhv̄i jnáhan ni yō jeē cundáhú gá ni yō jnáhan yó, jíin jéé sáha yó jniñu váha. ²⁵ Te níni na ndútútú yó chíñhún yó yā, te ma cúhuun ni yō nájnūhun cásáha sava i, chi sa víhyá gā na st̄íhv̄i jnáhan ni yō, chi je cájini yō jeē cuácuyajni quiv̄i ndíji ya.

²⁶ Te núu je ni jecūhun ni yō te ni jetáhú yó jnúhun ndaā, te núu máni sáha sáha-ni yó cuéchi, núu súcuan te tuá na ñnga iyó jéé cúu siqūi cuéchi yó. ²⁷ Chi sa quéndō máni ga jnúhun xeē siqūi yō jeē quiji quiv̄i juicio te quiji yáñuhūn xeē jeē cayū ñayuu jeē cájito uhū i ya. ²⁸ Ñayuu squéhich̄i ley Moisés, te núu uū chí ún̄i ñayuu cahán cuéchi siqūi i, te cuu nahín i, te tuá na jnúhun cúndáhú ni iyó. ²⁹ Te nagā ni cuu jeē ma ndóho xeē gā ñayuu jeē squéhich̄i i máá Séhe Yaā Dios, chi nájnūhun jeē jeñú níhnu i siqūi yā. Te sáha i jeē tu ndé jéjn̄iñu ñíñ̄i yā jeē ní jeti siqūi contrato jeē ndúndoo i nuū yā nuú. Te súcuan sáha ndeváha i nuū máá Espíritu Yaā Dios jeē sáha jeē váha yóhó. ³⁰ Chi je jíni yō jeē ni cáhán maá yá: Máá rí sáha jeē ndutahū i siqūi cuéchi i, máá rí cuáha castigo i, áchí Jítóho yō. Te suni cáhán: Máá Jítóho yō sándaā yā siqūi cuéchi

ñayuu yā. ³¹ Núu súcuan te xeē ndasí cúu jeē quiv̄i ñayuu ini ndaha Yaā Dios, Yaā técu, jeē ndútahū i siqūi cuéchi i.

³² Te na núcūhun ni rō ndese ni cuu ichi yátá, nde náa sá ní quejéé ró caca ró jíin luz yā, te ni cajendeȳi ni rō ni candoho ró tijni jnúndóho xeē. ³³ Chi sava ró ní cacahán neé i nuū rō te ni castóho i róhó ní cajito ñayuu. Te sava ga rō ni cajēhe ró jnúhun cuīñi ró jíin ñayuu ni candoho súcuan. ³⁴ Chi ni cacundáhú ni rō ñayuu ní cah̄in vecāa jeē siqūi yā, te ni cacusīñi ni rō vēsú ni caquende ñayuu ndajniñu ró. Chi ni casáha ró cuenta jeē ndé andiv̄i cáneváha ró ñn tahū jeē váha ndasí gá jeē coo ñí cání. ³⁵ Núu súcuan te ma siaá rō jnúhun jeē ní candije ndije ró jéé váha ni yā, chi cuehē ndasí táhū nih̄in rō siqūi ún. ³⁶ Chi cánuú jéé cuándeȳi ni rō náváha sáha ró jéé nújnahan ni Yaā Dios, te nih̄in rō jeē ni jéjnūhun ya. ³⁷ Chi cáhán tutu ñ:

Ñn núnúu-ni te ndee Yaā ndiji, te ma cucuéé yá.

³⁸ Te ñayuu jeē ní ndahva rī cuéchi i, cotecu i jeē candije i jeē sáha ri jehē i.

Te núu na cáca yátá i, te ma cúsīñi ni rī jíin i.

Achí Yaā Dios. ³⁹ Te yóhó tu cácuu yó jnáhan ñayuu cájica yátá jeē jnáhnú ndetū i. Chi sa cácdije yó jéé nih̄in tahū yō cotecu anuá yō.

Siqūi jnúhun cándije

11 Te jeē candije yó, suu cúu jeē cúndaā ndije ni yō jeē nih̄in yō tāca jéé ñhūhun ni yō, jíin jéé jini váha yó jéé iyó ndije tāca jéé tu cájito yó núu vijna. ² Te ñayuu jenahán chi ni jéjnūhún yá i siqūi jeē súcuan ni cacandije ñhin i.

³ Siqūi jeē candije yó cúu jeē jécūhun ni yō jeē ni sáha Yaā Dios ñayiv̄i jíin jnúhun ni cahán-ni ya. Te jíin poder Yaā Dios jeē tu jíto yó núu, ni jecō tāca jéé jíto yó núu.

⁴ Ni candije Abel jeē sáha ya jehē de, te jeē yúcuan ní socō de jeē váha ga nuū Yaā Dios vēsú Caín. Te jeē yúcuan ní jéjnūhún yá jeē iyó ndaā de, chi ni jetáhú yá jeē ni sócō de quit̄i nuū yā. Te vēsú ni jih̄i de, te cáhán gā ejemplo de jíin yó nde vijna, chi ni candije ndaā de.

⁵ Ni candije Enoc jeē sáha ya jehē de, te jeē yúcuan ní naquihin ya de cuahán de andiv̄i, te tu ní jíhí de. Te tu ní cánanih̄in ñayuu de, chi ni ndoñhún-ni de ni sáha ya. Te áchí tutu jeē nde ná tu naquihin ya de te ni cus̄iñi ni yā jíin táca jéé ni sáha de. ⁶ Te núu tu cándije yó jéé sáha ya jehē yō, te tú na modo cus̄iñi ni Yaā Dios jíin yó. Chi ñayuu jeē cuní quiv̄icoo ndaha ya, cánuú jéé candije ndaā i jeē iyó yá jíin jéé cuáha ya tahū nuū ñayuu jeē nducú i candije i ya.

⁷ Te Noé ni candije de jeē sáha Yaā Dios jehē de, ná ni castūhun yá nuū de jeē coo jnúndóho jeē ná tu coto de jeē coo. Te jeē yúcuan ní jendetū de ni sáha de bar-co cáhnu jeē naní arca, náváha cácu de jíin ñíñ̄i vehe de. Te jeē súcuan ni candije de, te ni cane cuéchi siqūi

ñayuu jeē tu ní cándije i ya. Te ni ndahva yā cuēchi de siquī jeē ní candije de jeē sāha ya jehē de.

⁸ Te Abraham ni candije de jeē sāha ya jehē de, te jeē yúcuan ní jetáhú de ná ni cahān yā jíin de jeē quihín de ñn lugar nuū cuáha ya cuu tahū de. Te ni quenda de cuahān de, vēsú tu jíin de ndé nuū quihín de. ⁹ Ni candije de jeē sāha ya jehē de, te jeē yúcuan ní condee tatú de nuū ññhun jeē ni jéjnūhun ya jeē cuáha ya nuū de. Te ni condee de vehe ññ, te suni súcuan Isaac jíin Jacob, chi sēhe de ún suni ñnuú níññ tahū i jíin de jeē ni jéjnūhun ya. ¹⁰ Chi ni ññhun ni de condee de máá ñuu andiví jéē iyó cutú cimientu, te máá Yaā Dios ni jequin yā ni sama ya ñuu ún.

¹¹ Te suni ni candije máá Sara jeē sāha ya jehē ña, te jeē yúcuan ní nihín ña fuerza jeē ní jecūhun sēhe ña. Chi nde ná ni yāha ndasí cuíyā ña, te ni cacu ññ sēhe yí ña, chi ni candije ña jeē squícu Yaā Dios jeē ni jéjnūhun ya. ¹² Te súcuan ni cuu jeē ni táhū cuehē ñayuu ni sāha ññ-ni Abraham, vēsú je jéñnu ndasí de. Te yucūn de ni nducuehē ndasí, nájnūhun quími andiví, jíin ññti yumar, jeē ma cúu cuiti cahu yó.

¹³ Te tāca tēe cándije un, ní cajihī de. Te vēsú tu ní cájito de jeē ni jéjnūhun ya, te ni cajini vāha de jeē cóo, te ni cacusiñ ni de jeē cóto de inga tiempo. Te súcuan ni cacahān de jeē ñayuu ñuu jicá ñayuu tatú cácuu de ini ñayvī yáha. ¹⁴ Te tāca tēe jeē cahān súcuan, chi stéén cají de jeē nducú de ññ ñuu jeē cúu andiví núu cúu ñuu maá de. ¹⁵ Chi núu jeē cánacani ni de siquī ññú nuū ní quendacoo de, te iyó modo jeē nándicó cóo de te núu jeē cácuu de núu. ¹⁶ Te tuú chi ni cacuu ndasí ni de coyūcú de inga ñuu váha ga jeē cúu ñuu andiví. Jeē yúcuan tu cúcanu Yaā Dios jeē naní yá Yaā Dios de jíjnāhan de, chi je ni sātūhva ya ññ ñuu nuū cóyūcú de.

¹⁷ Ni candije Abraham jeē sāha ya jehē de, te jeē yúcuan ní jehēn de jíin Isaac jeē socó de i, ná ni jito ndee ya de. Te ni ñyo tūhva de jeē socó de sēhe de un jéē mañhún ni i nuū de, vēsú ni nihín de jñūhun jeē ni jéjnūhun ya suhva siquī i: ¹⁸ Isaac cúu tēe jeē squejéé rí yucūn rō quihín, achí jñūhun ni jejnūhun ya. ¹⁹ Te ni sāha de cuenta jeē cúu nastécu Yaā Dios i. Te nájnūhun súcuan ni cuu, chi cuu cahān yō jeē nájnūhun ni jihī i te ni natecu i nuū de, chi ni jesí-ni ya jeē ma cáhni de i.

²⁰ Ni candije Isaac jeē sāha ya jehē de, te jeē yúcuan ní cahān de jeē vāha tahū nihín sēhe de Jacob jíin Esaú tiempo quiji. ²¹ Te suni súcuan ni candije Jacob, te jeē yúcuan, náa je yajni cuu de te ni cahān de jeē vāha tahū nihín ndñndúú sēhe yí José. Te yítuu de vara de, ni chiñhún de Yaā Dios. ²² Te suni súcuan ni candije José, te jeē yúcuan, náa cuacuyajni cuu de, te ni cahān de jeē tāca yúcūn Israel, ññ quiví quendacoo i nación Egipto. Te ni ndacu de jññu jeē chíndūji i yiquí de ñuu nuū quívicoo i.

²³ Te ná ni cacu Moisés, te tátá i náná i ni cacandije de jeē sāha ya jehē de, te jeē yúcuan ní cacondito sáhi

de i unī yoō. Chi ni cajito de jeē lúu cáa i, te tu ní cáyūhú de siquī acta jeē ni sāha rey jeē na cúu tāca súchi yí. ²⁴ Te suni súcuan ni candije Moisés, te jeē yúcuan ná ni jehnu de te tuá ni jéhe de jñūhun cuu de sēhe ññhan cúu sēhe síhí rey Egipto. ²⁵ Chi sa ni cuu ni de ndoho de jíin táca jñāhan de ñayuu Yaā Dios, nasūu jéē cusíñ ni de jecu-ni tiempo jíin cuēchi. ²⁶ Chi ni sāha de cuenta jeē núu cahān neé ñayuu siquī de jeē siquí Cristo, te yúcuan sāha jeē cucá ndasí gá de ndñi jeē ndíso jñūhun Yaā Dios, vēsú jeē nihín de ndñi ndaññu cúca íyó nación Egipto. Chi ni ññhun ni de jeē cuáha ya tahū de. ²⁷ Te jeē súcuan ni candije de, jeē yúcuan ní quenda de nación Egipto cuahān de. Te tu ní yúhú de jeē quití ni rey nuū de. Chi ni ññ nihín de siquī jññu sāha de, chi ni sāha de cuenta jeē je jíto de nuū Yaā jeē tu cúu coto yó núu vijna.

²⁸ Te jeē súcuan ni candije de, te jeē yúcuan ní cahān de jeē na cáhni ñayuu londe pascua. Te ni ndacu de jññu jeē na cóso yuyú i ñññ tē yehyí i, návāha núu na quiji ndajéhé jeē cáhni yā tāca sēhe nuú ñayuu Egipto, te ma cáhni yā sēhe nuú ñayuu Israel. ²⁹ Te siquī jeē ni cacandije ñayuu Israel jeē sāha ya jehē i, te ni cayāha-ni i mēññu Mar Rojo, chi ni nune ya te ni natūu-ni ññhun íchi. Te suni súcuan ni cacuni tēe Egipto yāha de núu, te ni nandihyū-ni ndute siquī de ni cajihī de.

³⁰ Ni cacandije soldado jeē sāha ya jehē de, te jeē yúcuan ní cotúú jeē ní condúu ndihyú ñuu Jericó, ná ni cajicó ndúu de uxā quiví. ³¹ Te Rahab, vēsú ññhan tññi ni ni cuu ña, te ni candije ña jeē sāha ya jehē ña. Te ni chindéé ññhán ña tēe Israel jeē ní quijicoo ni condéhé yuhu ndese íyó ñuu ña. Te jeē yúcuan tu ní jíhí ña jíin ñayuu ñññi ni ñuu ña ún.

³² ¿Te ndé jñūhun ga cahān rī núu súcuan? Chi tuá na tiempo jeē nácani ga rī jñūhun Gedeón jíin Barac jíin Sansón jíin Jefeé jíin David jíin Samuel jíin táca tēe ni canacani jñūhun ya nde jenahán. ³³ Ni cacandije de jeē sāha ya jehē de jíjnāhan de, te jeē yúcuan ní cacundeyí de ni canajññi de táca ñuu náñnu, te vāha ni candacu de jññu nuū, te ni chindéé ññhán yá de nájnūhun ni jejnūhun ya. Te nuū sava de ni jesí Yaā Dios yuhu ndícaha jeē tu ní cáyeji tē de. ³⁴ Te sava de tu ní cáyú de sāha ññhūn jeē cayú xeēn. Te sava de ni cácu de jeē tu ní jíhí de jíin espada. Te sava de ni nanihín ni de náa tuá fuerza de núu, te ndacuí teyí ní ñyo de nuū guerra, te ni cacundeyí de siquī soldado táca ñuu jicá jéé jíto uhū ún de. ³⁵ Te sava ññhan ni natecu sēhe ña jeē ni jíhí i.

Te sava ga ñayuu chi sa suhva ni candoho xeēn i nde ni cajihī i. Te tu ní cájēhe i jñūhun jeē siaá i jñūhun ya te cácu i, chi ni catee ni i jeē natecu i coyūcu váha ga i andiví. ³⁶ Te sava ga i ni casácatā ñayuu nuū i, te ni cacani ñayuu i, te nde ni caconuhñi cadena i ni cahñi i vecāa. ³⁷ Te ni cajēhe yuū xinī i, te ni cajehnde i jíin sier-ra, te ni cajito ndee i jíin jñúndóho, te ni cajehni i jíin espada. Ni cajica cuu i cháha chúcuan, te máá ññ

lánchi máá ññ ndíxúhú ní cañuhun i. Ni candoho ndáhú i, ni cajito i jnūndóho, ni castóho ñayuu i. ³⁸ Vāha ndasí ñáyuu ni cacuu i jeē tú cuiti ñayuu ñayīvi súcuan, te vēsú súcuan te ni casáha ñayuu jeē ní cajica cuu i nuū ñūhun téhé jíin chíji yucu, ni cahīin i yaū cava jíin yāū ñuhun. ³⁹ Te tāca ñáyuu yáha, vēsú ni jejnúhún yá i jeē ní cacandíje nīhin i jeē sáha ya jehē i, te tu ní cájito i nuū jeē ni jéjnūhun ya. ⁴⁰ Chi ní sātūhva Yaā Dios ññ jniñu váha ga, te suu cúu jeē sáha Cristo jíin yó, návāha ññ cáhnu-ni nihīn yō tahū yō jíin i, te jeē yúcuan cúu jeē ná tu nihīn i ndīhi tahū i.

Jeē na cócunuū yō nuū maá ññ-ni Jesús

12 Te íyó cuéhē ndasí ñáyuu un jéē ní cacandíje nīhin i jeē sáha ya jehē i, te nájñūhun ni jicó ndúū i yóhó, cástéén gā i nuū yō nde vijna jeē suni súcuan na cándíje yó. Núu súcuan te suni máá yó, na téjiyo yó táca jéē sajnéñu jíin cuéchi jeē ni cáan yó jíin. Te na cuándeýí ni yō cunu yó jíin carrera jeē ni jéhe ya jeē cunu yó. ² Te na cócunuū váha yó Jesús, Yaā jeē ni scándíje yóhó te sáha ya jeē íje váha yó jíin jnūhun ya nde jīnu ije yó. Chi máá yá ni jendeýí ni yā ni ndoho ya jicā cruz. Te vēsú jñūhun canu cúu jeē súcuan cuu yā, te tu ní sáha ya cuenta. Chi ni ñuhun ni yā jeē sa cusīñ ndasí ni yā ná ni cuu ni ndoho ya. Yūcuán na te ni cucōo ya lado váha mesa nuū ndácu Yaā Dios jniñu. ³ Te na nacani ni rō ndese ni jendeýí ni yā ni ndoho ya jeē ni sáha ndevāha ñayuu íyó cuéchi jíin yá. Te súcuan te ma cuíta ró ni ma ndínuu ni rō jíin jnūndóho. ⁴ Chi ni ná tu ndoho ró jéē ndé cuu rō jeē cánducú ndéýí ró snáá rō cuéchi. ⁵ Te sanaa te je ni canaa ni rō jñūhun cáhán tutu īī, jeē stīhvī ni Yaā Dios rohó jéē cácuu ró séhe ya: Séhē, ma quítí ni rō jeē snahnú Jitoho yō rohó, te ni ma ndínuu ni rō núu cáhán yā nuū rō. ⁶ Chi Jitoho yō snáhnú yā ñayuu jeē maní yā jíin, te jéhe ya castigo tāca jéē náquihin ya cuu séhe ya. Achí tutu. ⁷ Núu súcuan te na cuándeýí ni rō jeē snahnú Yaā Dios rohó, chi sáha ya jíin ró nájñūhun sáha tátá jíin séhe. Chi tú na séhe íyó jéē tu snáhnú tátá i. ⁸ Te núu ma snahnú yā rohó, nájñūhun ndóho tāca séhe, núu súcuan te nájñūhun séhe ndáhú cácuu ró, nasūu séhe ndije ya. ⁹ Te tátá yō ñayīvi yáha, suni ni snahnú de yóhó, te ni īyo yíñúhún yó jíin de. Te nagā ni cuu jeē ma cuándetū yō nuū maá Tátá yō andiví jeē snahnú yā yohó, te cotecu yō ññ cáni. ¹⁰ Te ndaā chi máá de ni casnáhnú de yóhó jecu-ni quivī, ndese ni cuu ni maá de. Te máá yá chi snáhnú yā yohó ññ modo jeē quéndōo váha ga yō, návāha coo ndoo yó nájñūhun íyó ndoo máá yá. ¹¹ Te ndaā chi tu cácusīñ ni yō maá hora jeē ndóho yó castigo, chi sa cúcuíhyá ni yō. Te cúcuéé gá te cuni yō jeē ní quéndōo ndaā yō te coo ndeýí sīñ ni yō jeē ni snáhnú yā yohó.

Siquī ñáyuu jeē casquéhichī i jñūhun cáhán Yaā Dios

¹² Núu súcuan te ma cóo ró nájñūhun tēe ni cuíta īī ndaha te quísi i xinī yití, chi sa ndacuī na sáha ró máá ró nuū jnūndóho. ¹³ Te sáha ró ichi ndóo caca ndaā rō, návāha nduvāha rōhó jéē tu fuerza ini, jeē cácuu ró nájñūhun tēe chácuá jeē tu cúu caca váha.

¹⁴ Te na cóndihvī ni rō jeē condee manī rō jíin táca ñáyuu, jíin jéē cóo ndoo coo īī rō nuū yā. Chi ma cúu coto ni ññ ñayuu nuū maá Jítoho yō te núu tu íyó ndoo i. ¹⁵ Te coto má cáca yátá ni ññ ró te scuíta ró jñūhun jeē sáha Yaā Dios jeē váha rōhó, návāha tú cuu ró nájñūhun ññ yucū uvuá jeē stīvi te sáha daño jíin cuéhē ñayuu. ¹⁶ Te ni ññ ró ma cáca jnéni. Te ni ma cóo jéē ni rō nuū Yaā Dios, nájñūhun ni īyo Esaú. Chi máá ññ cohō ndeyu ni jicān de nuū ññani de, ni sama de jíin derecho de jeē cúu de sūchi núu, te súcuan ni xícó de derecho de. ¹⁷ Te cájini rō jeē cucuéé gá te ni cuni de jeē na cáhán tátá de jeē váha tahū nihīn de, te tu ní cúu, chi tuá ni táñúhún Yaā Dios de. Chi tu ní nihīn jniñu jeē ní nacani ni de, vēsú ni nducú ndéýí de te nde ndahú de.

¹⁸ Te rōhó jíináhan ró tu ní quíjicoo ró núu íyo cúu, nájñūhun īyo ni cuu máá yucu nuū ni jéhe ya ley yā nuū ñáyuu Israel. Chi ni cane yáñuhūn yucu Sinaí, te nee lúchi jnúú jíto, te quée tachī xeén. ¹⁹ Te ni jecu trompeta, te ni cahān Yaā Dios. Te ñayuu jeē ní cajini sōho jeē cahán yā, ni cacahān ndahú i jeē ma cahán gā yā jíin i. ²⁰ Chi tu ní cúndeýí i jíin jñūhun jeē ní ndacu ya jniñu nuū i, chi ni cahān yā: Vēsú ññ quítí-ni núu quīvi tī yucu yáha, jíini ñúhún cuu tī jíin yúū chí jíin lanza, achí yá. ²¹ Te siquī jeē íyo ndasí cúu jeē cájito i ún, te ni cahān Moisés: Quísi i ruhū jeē yuhú rí, achí de.

²² Te vijna rōhó jéē cándíje, tu ní quíjicoo ró núu yúcu yúcuan. Chi sa suhva nuū maá yucu Sion jíin núu maá ñuu Yaā Dios, Yaā técu, ni quivícoo ró. Te ñuu un cúu Jerusalén jeē íyó andiví, nuū cáhīyo tútú cuéhē ndasí mil ndajéhé cáchiñúhún Yaā Dios. ²³ Te ni quivícoo ró ró núu cáyūcu tútú ñáyuu cándíje jeē cácuu séhe Yaā Dios, jeē íyó lista i andiví. Te ni quivícoo ró núu Yaā Dios, Yaā sándaā jniñu ndīhi ñayuu, jíin núu cáhīyo ánuá ñayuu váha jeē jé ni squéndōo ndaā yā i. ²⁴ Te suni nuū maá Jesús, Yaā ndíso jniñu siquī contrato jeé ní quivícoo ró. Te yahu ndasí gá jniñu sáha ññī yā jeē ni jéti jeē ndáhva cuéchi yó, nasūu ññīñ Abel jeē ni jicān cuéchi.

²⁵ Núu súcuan te coto má squéhichī rō jñūhun jeē cahán yā jíin ró jíináhan ró. Chi ñayuu jeē tu ní cá-jetáhú ná ni cahān yā jíin i ñayīvi yáha, tu ní cáca cu i. Te xeén gā ndoho yóhó te núu ma cuatáhú yó nuū yā jeē cahán yā nde ichi ándiví núu súcuan. ²⁶ Te nde saá ní quísi i ñayīvi jéē ni cahān yā. Te vijna chi cáhán yā: ññ na jínu quísi ri ñayīví, te nasūu máá-ni ñayīví, chi suni táca jéē íin andiví, achí yá. ²⁷ Te jñūhun yáha jéē cahán, ññ na jínu, chi cúní cahān jeē téjiyo ya táca jéē

tu íyó cutú, suu jeē ní cuvāha, návāha na quéndōo jeē cóo cutú nří cáni. ²⁸ Núu súcuan te cuāha Yaā Dios ĩn ñuu nuū yō jeē cóo cutú nří cáni. Te jeē yúcuan, na nácuatáhú yó nuū yā, te na chíñúhún yó yā, te na cóo yříñúhún yó, návāha cusĩ ni yā jíin yó. ²⁹ Chi Yaā Dios maá yó cóo nájnūhun ĩn ñuhūn jeē snāā ndihī jeē neé.

Ndese sáha yó te cusĩ ni Yaā Dios

13 Ma jécuiñĩ rō jijnáhan rō jēē cundáhú ni rō hermano rō cá candíje. ² Conahán rō jeē cánuú cuāha núu rō vehe nuū ñáyuu cájica. Chi íyó jínu jeē súcuan ni cajēhe núu ñayuu vehe, te tu ní cájini i jeē nuū maá ndajéhé andivĩ ní cajēhe núu i vehe.

³ Te conahán rō chindéé ñáhán rō ñayuu cáhīn vecāa, chi sáha rō cuenta jeē nájnūhun cáhīn cáhnu rō jíin i vecāa. Te suni nacani ni rō jehē jnánhan rō jēē cándoho i sáha ñayuu, chi núu súcuan coo jíin maá rō te suni ndoho rō.

⁴ Coó yříñúhún rō síquĩ jnúhun quíjnáhan ñayuu, te ma cosíquĩ ndéē jnánhan rō. Chi maá Yaā Dios sándaā yā cuēchi ñayuu tĩni ni jíin ñáyuu casíquĩ ndéē jnánhan.

⁵ Te ma ndíyo ni rō xūhún, chi na cóo sí ni rō jíin jēē cánevāha rō. Chi maá yá ni cahān: Ma siaá cuiĩ rī rohó, ni ma stóo cuiĩ rī rohó, áchí yá. ⁶ Núu súcuan te ma ĩn jeē cáni ni yō, chi cuu cahān yō:

Máá Jítóho rī chindéé ñáhán yá ruhū,
te ma yūhu rī núu na vé cuní ñayuu sáha i jíin rī.
Achi yō.

⁷ Te na núcūhun ni rō tācá pastor rō, jeē ní castéén de jnūhun Yaā Dios nuū rō. Te sáha vāha ro cuenta ndese ni nihīn jnīñu jeē ní casáha de, te na ndácu rō de jeē ní cacandíje de jeē sáha ya jehē de.

⁸ Te Jesucristo chi ĩn-ni cáa ya ichi yátá jíin vijna jíin nří cáni. ⁹ Núu súcuan te ma cuāha rō jnúhun candíje rō táca jnúhun jeē sřin cáhán jeē tu quíjnáhan jíin jnúhun maá yá. Chi íyó váha jeē na ĩje ánuá yō sáha jnūhun jeē váha ni yā jíin yó. Te tu jíni ñúhún yó jnūhun jeē tajnúni síquĩ jeē yéji yō, chi tu níhín jnīñu cuiĩ jíin ñáyuu cáhīn jíin.

¹⁰ Te maá yó chi cánevāha yó ĩn jeē ni sócō maá jéhé yō, cóo Cristo. Te tāca sūtū jeē cásocō gā de modo jeē cahán ley jenahán, tú na vé nihín de nuū yā jeē ni sócō yā maá yá. ¹¹ Te sutū kujéhu ga, ná ni sócō de niñĩ tācá quiĩ ini cuarto ĩi gā jeē síquĩ cuéchi, te yiqui cúñu tĩ ni cajehmu de ichi yátá ñuu. ¹² Te suni súcuan ni

ndoho maá Jesús ichi yátá ñuu, návāha jíin níñĩ maá yá te sándoo ya ñayuu. ¹³ Núu súcuan te ma cóo ĩnuú gā ni yō jíin ñáyuu tu cá candíje, chi nájnūhun quihīn yō jíin yá ichi yátá ñuu, te na ndóho yó jíin yá jeē sácatā i. ¹⁴ Chi ñayivĩ yáha tu íyó ñuu nuū coo yó nří cáni, chi sa cánducú yó maá ñuu nuū cóyūcu yó quivĩ quiĩ. ¹⁵ Núu súcuan te jeē jíin Jesucristo te níni na cáhán yō jeē yóhoyo cújéhu Yaā Dios, chi suu cóo nájnūhun ĩn jeē sócō yō nuū yā, suu jeē nácuatáhú yó nuū yā. ¹⁶ Te ma nāā ni rō sáha vāha rō núu jnánhan rō, te cuāha rō jēē cúmanĩ nuū i. Chi nájnūhun ĩn jeē cásocō rō nuū Yaā Dios cóo táca jēē yáha, te cusĩ ni yā jíin.

¹⁷ Te cuandíje rō núu tēe cácuu pastor rō, te cuandētū rō nuū de. Chi cándito de rōhó jēē quéndōo vāha ánuá rō, chi cájini de jeē cánuú nacūāha de cuenta nuū yā. Te condihvĩ ni rō sáha vāha rō, návāha cusĩ ni de síquĩ rō te ma cucuíhyá ni de síquĩ rō. Chi núu tu súcuan te ma cóo jeē váha jíin rō.

¹⁸ Te cacān tahu rō jehē rī jijnáhan ri. Chi vāha íyó ni anuá rī jeē tú na cuēchi ri. Chi cácuu rī caca yříñúhún rī jíin táca jniñu. ¹⁹ Te suni cáhán ndahú rī jíin rō jeē cacān tahu ndasí rō jehē maá rī, návāha cuāha ya jnūhun jeē yachī gā cuajeē tucu ri nuū rō.

Bendición jíin saludo jeē sándĩhĩ

²⁰ Te maá Yaā jeē jéhe jnūhun ndeyĩ sřĩ ni nuū yō, ni nastécu yā Jítóho yō Jesucristo mēñū ndéyi. Te Jesús cóo pastor kujéhu jeē ndíto ñayuu cácuu nájnūhun lanchi ya. Chi jíin níñĩ yā ni sácutú yá contrato jeē yá jeē coo nří cáni. ²¹ Te ñúhún ni rī jeē Yaā Dios na sáha ya jeē ĩje ni rō jijnáhan rō, návāha cuu sáha rō táca jniñu váha ndese nújnahan ni yā. Te ñúhún ni rī jeē jíin fuerza Jesucristo jeē ndéé yá ĩni yō, na sáha Yaā Dios jeē cuu yó ñáyuu cusĩ ni yā jíin. Te na cáhán yō jeē yóhoyo luu cújéhu ya nří cáni. Amén.

²² Hermano jijnáhan rō, cáhán ndahú rī jíin rō jeē cone cáhnu ni rō jeē stihvĩ ni rī rohó jíin jecu-ni jnūhun ni tee ri nuū carta yáha. ²³ Te cástūhun rī jeē hermano yō Timoteo, je ni quenda de vecāa. Te núu yachī quiĩ de yāhá, te cuajecoo ndíndúú rī nuū rō coto jnánhan yó.

²⁴ Te cahān rō jíin táca tēe cácuu pastor rō jíin táca hermano cá candíje jeē sándeyĩ ni de, áchí rī. Te ñayuu Italia suni cácahān i jeē sándeyĩ ni rō.

²⁵ Te ñúhún ni rī jeē na sáha ga Yaā Dios jeē váha rōhó jíjnáhan rō. Súcuan na cóo. Amén.

SANTIAGO

1 Máá rí cúu Santiago, mozo Yaā Dios jíin Jítóho yō Jesucristo. Te tée ri carta yáha cuájeē nuū rohó ñáyuu cácanđije jeē cácuu ró ndihúxí uū yucūn Israel, te ni cajitē núu ró ñí ñáyíví. Sándeyí ni rō jijnáhan rō.

Yaā Dios sáha jeē jécūhun ni yō

² Ñánī mánī, na cúsiñ ndasí ni rō jijnáhan ró núu quiiji tijni tāca jnūndóho siquī rō. ³ Chi cájini rō jeē núu jító ndee jnūndóho rōhó núu cácanđije vāha ró, te yūcuan sáha jeē cútūhva ró cuándeyí ni rō. ⁴ Te na cuándeyí ni rō nde ije vāha ró jíin, návāha cuu sáha ró ndihi jniñu vāha, te ma cúmanī jeē squícu vāha ró núu yā.

⁵ Te núu ndé ñn ró cúmanī jecūhun ni rō caca ndíchí ró jíin jnúhun Yaā Dios, na cácan rō nuū yā, te sáha ya jeē jécūhun ni rō. Chi sáha ya ndihi jeē cájicān ñayuu, te tu cúxeēn yā nuū i jeē jicān i. ⁶ Te jeē jicān rō, te cánuú candíje ró jéē sáha ya jeē jicān rō, te ma cáni siquí ni rō. Chi ñayuu jéni siquí ni, cúu i nájnūhun ndute mar jeē ndóna jísó cóyo cuahān cháha chúcuan sáha tachī. ⁷ Ñayuu ún ma cáni ni i jeē sáha Jítóho yō jeē jicān i. ⁸ Chi ñayuu jeē jéni ñn jéni uū ni, chi mánī násāma ni i jíin tāca jniñu cásáha i.

⁹ Tācá hermano ndahú, na cúsiñ ni de jeē sáha Yaā Dios jeē cujéhu de. ¹⁰ Te hermano cucá, na cúsiñ ni de núu ni ndundáhú de. Chi tāca tée cucá, yachī naa jeē cucá de, nájnūhun nāā ita yucū. ¹¹ Chi núu ni cane niāndii te cújihní, te íchí-ni yucū, te cóyo-ni ita, te nāā-ni jeē lúu cáa. Te suni súcuan ndoho tāca tée cucá níni sá jíc de jíin jniñu de.

Siquí jeē jító ndee jnūndóho yóhó

¹² Yóhoy ndetū tēe jeē jéndeýí ni de núu jító ndee jnūndóho de. Chi núu je ni cundeyí de jíin, te nihīn de premio jeē cujéhu de cotecu de ñí cáni. Chi súcuan ni jejnūhun Yaā Dios jeē cuáha ya nuū ñáyuu jeē maní jíin yá. ¹³ Núu ñn ñayuu jicān ini i jeē sáha i cuēchi, te ma cáni ni i jeē nuū Yaā Dios vēji jeē jicān sáha i cuēchi. Chi ni ñn ma cúu cuiti sáha jeē quívi Yaā Dios cuēchi, te ni máá yá tu squívi ya ni ñn ñayuu nuū cuēchi. ¹⁴ Chi sa suhva jeē ndíyo néé ni maá i, suu sáha jeē jicān ini i sáha i cuēchi, te scānda ini i chi stáhú un i. ¹⁵ Te jeē ndíyo néé ni i, yūcuan quéjéé cuēchi. Te cuēchi ún, núu je ni cunīhin, te sáha jeē jnahnú ndetū ñayuu. ¹⁶ Núu súcuan te ma stávi ró caní ni rō jijnáhan ró, ñánī mánī.

¹⁷ Tāca jéē cútahū yō jeē vāha jeē lúu íyó, chi vēji nde andiví núu maá Yaā Dios, Yaā ni sáha tāca jéē ndíndēe íin andiví. Te máá yá tu násāma cuiti ini yā nájnūhun násāma nduva jíin cuándahū. ¹⁸ Te ni sáha ya jeē cóte-cu yō ñí cáni, chi ni candíje yó jnúhun ndaā yā. Te ni nduu yó nájnūhun sēhe nuú yá nuū tāca gá sēhe ya jeē quíji, chi súcuan ni nujnahan ni yā sáha ya.

Siquí ndese chiñúhún ndāā yō yā

¹⁹ Núu súcuan te tāca rōhó ñánī mánī, ñama na chúsóhó ró jnúhun ya, te sa suhva ma cahán yachī rō, ni ma quití yachī ni rō. ²⁰ Chi ñayuu cáquití ni, tu sáha i jniñu ndaā jeē cuní Yaā Dios. ²¹ Núu súcuan te na siáá rō tācá jniñu jnéhén jíin jniñu néé jéē ni cáyā jíin ró. Te na cóo vítá ni rō te cuatáhú ró jnúhun ya jeē ni quívi ini anuá rō. Chi jnúhun un ndíso poder jeē cācu ánuá rō.

²² Te na squícu ró jéē steén jnúhun ún, te nasūu máá jéē cúni sōho ró súcuan-ni, chi núu súcuan te cástáhú ró maá ró, chi tu níhín jniñu núu tu squícu ró. ²³ Chi tēe jeē jéni sōho de jnúhun ya súcuan-ni, te tu squícu de, cúu de nájnūhun ñn tēe jeē jító de nuū espejo ndese cáa nuū de. ²⁴ Te jító vāha de nuū de, te cuahān-ni de, te nāā ni de ndese cáa nuū de. ²⁵ Te núu ñn tēe tu nāā ni de jnúhun jíini sōho de, chi sa suhva chúhun vāha ni de jeē cahán maá ley ndaā Jesús jeē ni sáha libre yohó, te núu cuiñi níhin de jíin, te squícu de jeē ndácu, yūcuán na te quéndōo ndetū de jíin jniñu vāha jeē sáha de.

²⁶ Te núu ndé ñn ró jéni ni rō jeē chiñúhún vāha ró Yaā Dios, te núu tu ndíto ró yáá ró, núu súcuan te stáhú ró maá ró, te tu ndé jéjníñu jeē chiñúhún ró yā.

²⁷ Ñayuu jeē chiñúhún ndoo chíñúhún ndāā i máá Tátá yō Yaā Dios, chi jniñu yáha sáha i: Chíndéé ñáhán i sūchi ní caquendōo ndáhú jíin ñahan ní caquendōo ndáhú, núu na-ni jnūndóho íyó. Te tu sájnéhén i ánuá i jíin jniñu néé íyó ñáyíví.

Ma cúhichī ni yō coto yó ñayuu ndahú

2 Ñánī mánī, cácanđije ró Jítóho yō Jesucristo jeē cujéhu luu ya. Núu súcuan te ma sáha ró cuenta ndese cúu ñn ñn ñayuu, chi inuú sáha ró jíin ndihi i. ² Chi íyó jínu quívi ñn tēe ini vehe nuū cándutútú ró, te yíhi xehyu oro ndaha de, te ñíhun de sahma vāha. Te suni íyó jínu quívi ñn tēe ndáhú, te ñíhun de sahma tahndé. ³ Te tú vāha núu sáha yíñúhún ró jíin tēe ñíhun sahma vāha, te cahān rō jíin de: Cucōo ní lugar

váha yāhá. Te cahān rō jīn tēe ndáhú: Yūcuán cuiñi ní, chí yáha cucōo ní nuū ñūhun, achi rō. ⁴ Chi núu cásáha rō súcuan, te tu jéni vāha ni rō siquī jnáhan rō, chí sñn sáha rō jíin tēe cúca jíin tēe ndáhú.

⁵ Ñánī mánī, chusóhó rō jnūhun cáhán rī: Yaā Dios ni nacāji ya ñayuu ndahú ini ñayivi yáha jēe cóo cúca i jíin jnūhun cácandíje i ya, te nihīn i tahū i ñuu nuū ndácu ya jniñu. Chi ni jejnūhun ya cuāha ya un núu ñáyuu jeē maní jíin yá. ⁶ Te máá rō chí sa suhva cājēhe rō jnūhun canu ñayuu ndahú. ¿Te á násūu tēe cúca cúu jeē castáhú rōhó síquī jeē nihín de xūhun rō, te yachī jéquin de cuēchi síquī rō nuū tohó? ⁷ Te suni cácahān neé de síquī Cristo, te suu sñhvī máá yá cúu jeē cánani rō cristiano.

⁸ Vāha cásáha rō te núu cásquicu ndije rō máá jnūhun jéhnū ga jeē cahán ley, nájnūhun yósó núu tútu iī: Cundáhú ni rō jnáhan rō nájnūhun cundáhú ni rō maá rō, achi. ⁹ Te núu sñn sáha rō jíin ñáyuu cucá jíin ñáyuu ndahú, núu súcuan te cuēchi cásáha rō, te jécondee cuēchi síquī rō jeē stívi rō ley Yaā Dios. ¹⁰ Chi núu ñn ñayuu stívi i ñn-ni jniñu ndácu ley, te vēsú na squícu i ndīhi ga, te nájnūhun ni stívi i ndīhi ley, te ndīhi un jécondee cuēchi síquī i. ¹¹ Chi Yaā jeē ni cáhān jeē ma cósíquí ndéē jnáhan rō, suni ni cahān yā jeē ma cáhni rō ndīyi. Te vēsú tu ní cásíquí ndéē jnáhan rō, te núu ni jehni rō ndīyi, núu súcuan te je ni stívi ndīhi rō ley. ¹² Te tāca jēe cahán rō jíin jēe sáha rō, chí sáha rō cuenta jeē sándaā yā ndīhi un jíin máá ley Jesús jeē ni sáha libre rohó. ¹³ Chi quivī sándaā yā jniñu, te ñayuu jeē tu ní cundáhú ni jnáhan, suni ma nihín i jnūhun cundáhú ni. Te ñayuu ni cundáhú ni jnáhan, cusñ i i jeē ní ndahva yā cuēchi i máá quívī sándaā yā jniñu.

Tu jéjniñu jeē candíje yó núu tu squícu yó

¹⁴ Ñánī mánī, núu cáhán ñn tēe jeē candíje de jeē sáha ya jehē de, te núu tu sáha de jniñu váha, ¿te ndé jéjniñu jeē candíje de ún? ¿A cuu cācu ánuá de jíin jēe cahán-ni de jeē candíje de, te núu tu sáha de jniñu váha? ¹⁵ Te núu ñn hermano yō chí hermana yō, cúmanī sahma i jíin jēe cāji i tāca quívī, ¹⁶ te núu ñn rō cáhán jíin i: Cuandeyí ni rō, te cusúcun váha rō te caji vāha rō, achi rō jíin i, te núu tu ní jēhe ro jēe jíni ñūhún i cotecu i, ¿te ndé jéjniñu jeē cahán rō súcuan? ¹⁷ Te suni súcuan cúu jeē núu áchí rō jeē candíje rō jeē sáha ya jehē rō, te núu tu sáha rō jniñu váha, núu súcuan te tu ndé jéjniñu cuiñi jeē cahán-ni rō jēe candíje rō.

¹⁸ Te sanaa te cahān ñn ñayuu: Róhó chí cándíje rō jēe sáha ya jehē rō, te ruhū chí sáha ri jniñu váha. ¿Na jíin stéen rō jeē candíje rō jeē sáha ya jehē rō, te núu tú na jniñu váha sáha rō? Te ruhū chí sáha ri jniñu váha te súcuan stéen rī jeē candíje ri jeē sáha ya jehē rī. ¹⁹ Ndaā chí cándíje rō jeē iyó ñn-ni Yaā Dios. Te va iyó váha núu súcuan. Te tachī chí suni súcuan cácandíje, te cáquísi i jeē cáyūhú, chí tu cásáha jniñu váha. ²⁰ ¿Te naun tu jécūhun ni rō? ¿A tu jíni rō jeē núu tu

sáha rō jniñu váha, te tu ndé jéjniñu cuiñi jeē cahán rō jeē candíje rō? ²¹ Te jíi yō Abraham, ni ndahva yā cuēchi de síquī jeē ni sáha de jniñu váha. Chi ni jetáhú de jeē ni cáhān yā jeē cahni de sēhe de Isaac socō de i nuū altar. ²² Te jécūhun ni rō jeē síquī jeē ní candíje de jeē sáha ya jeē ni jéjnūhun ya nuū de, jeē yúcuan ní jetáhú de jeē ni cáhān yā jeē socó de sēhe de. Te jeē ní jetáhú de, suu ni steén jeē candíje ndije de jeē sáha ya jeē ni jéjnūhun ya nuū de. ²³ Te súcuan ni cundaā jnūhun cáhán tutu iī: Abraham ni candíje de jeē ni jéjnūhun ya nuū de, te jeē yúcuan ní ndahva yā cuēchi de, áchí tutu. Te ni conaní de amigo Yaā Dios.

²⁴ Núu súcuan te je ni cajini rō jeē ndáhva Yaā Dios cuēchi ñayuu jeē casáha i jniñu váha síquī jeē cácandíje i jeē sáha ya jehē i, te nasūu máá jēe cahán-ni i jeē candíje i. ²⁵ Te suni súcuan Rahab, vēsú ñahan tñjñi ni ni cuu ña xīhna gā, te ni ndahva yā cuēchi ña síquī jeē ni sáha ña jniñu váha. Chi ni jēhe núu ña vehe nuū tāca mozo ni tají Josué, te ni chuhichí ña de inga ichi, návāha cācu de nuū tēe cánducú cahni de. Te jeē yúcuan ní ndahva Yaā Dios cuēchi ña. ²⁶ Te ñn ñayuu núu tuá anuá i nuū yiqui cúñu i, te ndīyi cúu i. Te suni súcuan núu cándíje yó jeē sáha ya jehē yō, te núu tu sáha yó jniñu váha, te nájnūhun ndīyi cúu yó.

Jnūhun síquī yaá yó

3 Ñánī mánī, ma cáni ni cuehē rō cuu rō maestro steén jnūhun ya. Chi cajini rō jeē yóhó jēe steén jnūhun, cuehē gā cuēchi ndenehen ya síquī yō. ² Chi ndīhi yó stívi cuehē jniñu. Te núu ñn tēe cuu condito de yáá de jeē ma stívi de jíin ni ñn jeē cahán de, núu súcuan te yóhyo vāha tēe cúu de, te suni cuu condito de ññí gá de jeē ma stívi de. ³ Chi cúu nájnūhun jeē chíhi yó freno yuhu caballo, te súcuan snáhnú yō ññí tñ jeē quihín tñ jíin yó ndé nuū cuní yō. ⁴ Te suni súcuan tāca barco, vēsú náhnū ndasí, te vēsú ñhīn chúndahá táchī, te jíin ñn timón lulí-ni te cuu scuicó tēe scáca, te quihīn de jíin ndé nuū cuní de. ⁵ Te suni súcuan cúu yáá yó, chí vēsú lulí-ni, te cuehē teyí sáha yó jíin. Te suni jíni yō jeē ñn ñuhūn lulí cuu jññi jeē cayú ñn yucu cáhnu ndasí. ⁶ Te suni súcuan yáá yó, chí sáha nájnūhun ñn ñuhūn, chí scuíquín cuehē teyí jniñu néé. Te yáá yó cúu ñn parte lulí yiqui cúñu yō, te sáha jeē quívī ññí yó cuēchi. Te infierno cúu jeē scuíquín jnūhun néé jíin yáá yó, te yáá yó scuíquín cuehē jniñu néé ññí tiempo jeē iyó yó ini ñayivi. ⁷ Te ñayuu chí cuu snáhnú i tācá quiti jíin saa jíin cóo jíin quiti ñūhun nuū mar, te je ni snáhnú i cuehē tñ. ⁸ Te ni ñn ñayuu ma cúu condito i yáá i. Chi ñn jeē neé jēe ma cúu condito i cúu. Te nájnūhun yuhu cóo jeē ñūhun chitú veneno jeē jéhnī, súcuan cúu yáá yó. ⁹ Jíin yáá yó chíñúhún yó Tatá yō Yaā Dios, te suni jíin yáá yó cahán ndevāha yo síquī ñáyuu jeē ni sáha ya ánuá i nájnūhun iyó máá yá. ¹⁰ ñn-ni yuhu cáne jnūhun chíñúhún yó yá jíin jnūhun cáhán ndevāha yó. Ñánī mánī, tu iyó váha cuiñi jeē

súcuan. ¹¹ ¿A ñn-ni tesōcó cáne ndute váha jíin ndute úvuá, chí naún? ¹² Ñánī mánī, ¿á cuu cuun ndehē oliva xinī yújnu higo, te á cuu cuun ndehē higo xinī yoyúcú uva, chí naún? Te suni súcuan ñn tesōcó ma cúu cane ndute úvuá jíin ndute váha.

Jnūhun ndíchí jēē véji nuū Yaā Dios

¹³ Te núu ndé ñn ró ndíchí te jécūhun vāha ni, núu súcuan te jíin jēē jíca ndaā rō steén rō jeē súcuan cúu ró. Te na cóo suchí ni rō modo jeē jéhe jnūhun ndíchí yá. ¹⁴ Te núu cácuésún teyí ni rō te ndúcú ró jēē cu-jéhnu máá ró, núu súcuan te ma cutéyí ró cani ni rō jeē ndíchí ró. Chi suu cúu jeē stahú ró, te cúu ró contra siquī jnūhun ndaā. ¹⁵ Chi ñayuu cándāa súcuan, nasūu núū Yaā Dios véji jeē ndíchí i. Chi cuenta ñayūvi, jíin cuenta anuá neé ñayuu, jíin cuenta máá jéxeén cúu. ¹⁶ Chi nuū iyó ñayuu cucuésún ni jíin ñayuu nducú jēē cujéhnu máá, suni yūcuan iyó jnūhun sáca núu jíin táca jniñu neé. ¹⁷ Te jnūhun ndíchí jeē véji nuū Yaā Dios, núu ni sáha jeē ní ndundíchí ñayuu, yūcuán na te iyó ndoo ánuá i. Te suni yúcu manī i jíin jnáhan i, te vítá ni i, te tú nīñni ni i. Te cúndáhú ni i jnáhan i, te sáha i jniñu váha. Te suni iyó ndaā i, te tu stáhú i. ¹⁸ Te ñayuu cáyūcu mánī jíin jnáhan, jíin jnūhun manī casáha i táca jniñu ndaā, te nanihīn i jeē quéndōo ndaā i.

Jeē ma cutóo ni yō jeē iyó ini ñayūvi

4 ¿Te ndese quéjéé jēē cájejnáhan ró jíin jēē cátejnáhan ró? Quéjéé síquī jeē cándiyo neé ni rō, te yōhyo scánda ini anuá rō. ² Chi cándiyo ni rō, te tu cánevāha ró, te suu sáha jeē cájehni rō ndēyi. Cándiyo ni rō jeē névāha jnáhan ró, te tu níhīn rō, te suu sáha jeē cátejnáhan ró te cájejnáhan ró. Te tu cánihīn rō jeē cuní rō, chi tu cájicān rō nuū Yaā Dios. ³ Te núu cájicān rō, te tu cánihīn rō, chi tu cájicān vāha ró, chi mánī jeē cusī ni máá ró cúu jeē cájicān rō nuū yā. ⁴ Ñayuu castóo Yaā Dios cácuu ró. ¿A tu cájini rō jeē núu cutóo ni rō jeē iyó ini ñayūvi, yūcuan cúu jeē cájito uhū rō Yaā Dios? Chi ñayuu jeē cutóo ni jeē iyó ñayūvi, ndúu i ñayuu jíto uhū nuū Yaā Dios. ⁵ Te tu cáhán saā-ni jnūhun yáha jēē yosó núu tútu iī: Máá Espíritu jeē ni jéhe Yaā Dios jeē ndeé ini yō, cúcuñí ni yā jeē súcuan casáha yó, chí manī yā jíin yó, achí. ⁶ Te jeē váha ni Yaā Dios, te jéhe ya fuerza ini yō jeē ma sáha yó súcuan. Chi cáhán tutu iī: Yaā Dios jési yā nuū ñayuu casáha téyí máá, te vāha ni yā chindéé ñáhán yá ñayuu casáha suchí máá, achí. ⁷ Núu súcuan te cuandetū rō nuū Yaā Dios. Te cuiñi nīhin ró jēē ma cuátáhú ró jex-eén, te cunu coto rōhó jíjnáhan ró. ⁸ Manī gā coo ró jíin Yaā Dios, te víhyá gā steén yā jeē manī yā jíin ró. Róhó jēē casáha cuēchi, na sándoo ró máá ró, stóo ró cuēchi. Te rōhó jēē cáconi rō coo manī rō jíin Yaā Dios níni jēē cáconi rō cutóo ni rō jeē iyó ini ñayūvi, na sándoo ró ánuá rō jeē tuá coo ró súcuan. ⁹ Na jnáhuhū ni rō, te cucuíhyá ni rō, te na ndáhyú rō siquī jeē iyó

cuēchi ró. Te vēsú ni cajecū rō, te vijna na ndáhyú cohó ró. Te vēsú ni cacusiñi rō, te vijna na nducuíhyá ni rō. ¹⁰ Na sásuchí ró maá ró nuū Yaā Dios, te sájéhnu ya rōhó.

Ma cóndihvī ni yō siquī cuēchi jnáhan yó

¹¹ Hermano jijnáhan ró, ma cahán neé ró siquī jnáhan ró. Chi tēe jeē cahán neé siquī jnáhan, chí jēē ndihvī ni siquī cuēchi jnáhan, nájñūhun jeē siquī ley yā cahán neé de, chí tu squícu de ley jeē cundáhú ni yō jnáhan yó, te nájñūhun cáhán de jeē tu iyó ndaā ley yā. Te núu cáhán rō jeē tu iyó ndaā ley yā, núu súcuan te nasūu jēē squícu ró, chí sa jeē cahán rō siquī. ¹² Iyó ñn-ni Yaā jeē ni jéhe ley, te máa-ni ya cúu jeē sándaā siquī cuēchi. Te jnama ya ñayuu cácandíje te snáhnú ndetū yā ñayuu tu cácandíje. Núu súcuan ¿te na jniñu ndíso ró jēē sándaā rō siquī jnáhan ró?

Tú vāha jeē satéyí yó máá yó

¹³ Vijna te cáhán rī jíin rōhó jēē cácahān: Vijna chí sájnē te quihīn yō ñuu yūcuan, te coyūcu yó ñn cuiyā, te cuaan yó xíco yó, te nihīn yō siquī, achí ró. ¹⁴ Te tu jíni cuiñi rō ndese coo sajnē. ¿Chí na vé va víhí cúu vida rō? Cúu nájñūhun ñn vicō nūhún jēē ñn núnúu-ni núcūhun, te yūcuán na te ndéchí-ni cuahān. ¹⁵ Chi sa vāha ga na cáhán rō: Núu cuní máá jítoho yō te cotecu yō te sáha yó jēē yáha chí jēē yūcuan, achí ró. ¹⁶ Te sa suhva máni cácutéyí ni rō cácahān rō. Te tú vāha jeē súcuan cácutéyí ni rō. ¹⁷ Te núu ñn ñayuu jíni i sáha i jniñu váha, te núu tu sáha i, te cuēchi cúu núu súcuan.

Jnūhun cáhán nuū tēe cúcá

5 Te cáhán rī jíin táca rōhó tée cúcá, jēē na ndáhyú rō te ndahyū cohó ró siquī jnūndóho jeē quíji nuū rō. ² Chi ndajniñu cúcá cánevāha ró, je téhyú. Te sah-ma váha ró, je téte tiquíxin. ³ Te oro jíin plata cánevāha ró, chí je cáne xehyu. Te xehyu un stéén jeē ní casáha ró jniñu stáhú jíin xúhun ró. Te yūcuan cúu jeē ndúnihīn cuēchi siquī rō, nájñūhun ñn ñuhūn jeē snáā yiquí cúñu rō. Chi ni cacaya cuehē rō ndajniñu váha quivī cuándihī yáha. ⁴ Te táca téte ni cajehnde trigo rō, tu ní cáchunaa vāha ró yáhu de. Te vijna cácana jee de nuū Yaā Dios, Yaā cúu jítoho nuū táca ndajéhé andiví, jeē súcuan ni casáha ró. Te jíni sōho ya jeē cácana jee tēe ni cajehnde ún. ⁵ Cátecu vāha ndasí ró ini ñayūvi yáha, te casáha ró táca jēē cácusī ni máá ró. Te cájito yúcún ró máá ró, te cúu ró nájñūhun quíñi néñu jeē ndétu quivī cúu. ⁶ Te ni catee ró cuēchi siquī ñayuu ndaā, te nde ni cajehni rō i. Te tu ní cúu casi i jeē casáha ró.

Jeē na cóo paciencia ni yō te cacān tahú yō

⁷ Hermano, núu súcuan te coo paciencia ni rō condetu ró ndé quivī ndíji máá jítoho yō. Tēe sájniñu ñuhun, cánuú coo paciencia ni de condetu de nde quíji saū

néhen jíin sáū néñu isa, te sáá te nihīn de nunī váha jeē jéhe itu. ⁸ Te suni súcuan coo paciencia ni rō, te ndeyí coo ni rō condetu ró, chi cuacuyajni ndee maá Jítóho yō. ⁹ Te ma cahán sōo ró siquī jeē sáha jnáhan ró, hermano, návāha ma jécondee cuēchi siquī rō. Chi máá Yaā jeē sándaā cuēchi, je yajni ndiji ya. ¹⁰ Nánī mánī, conahan ró jijnáhan ró ndese ni casáha tēe ni canacani jnūhun máá Jítóho yō nde jenahán, chi ni cacuu de ñn ejemplo nuū yō. Chi vēsú ni candoho de, te ni iyo paciencia ni de. ¹¹ Te cáhán yō jeē ñáyuu cájendeyí ni jíin jnúndóho, ndetū cúu i sáha Yaā Dios. Chi ni cajini ró jnúhun ndese ni jendeyí ni Job jíin jnúndóho, te suni cájini rō jeē yóhoyo váha ga ni quendōo de ni sáha máá Jítóho yō ná ni yāha jnúndóho. Chi yóhoyo cúndáhú ni yā yohó, te váha ndasí ni yā jíin yó.

¹² Nánī mánī, jeē cánuú gá cúu jeē ma cahán cāha ró síhví Yaā Dios jíin jnúhun cácahān teyí ró. Ma cahán rō verdad de Dios, Yaā ndeé andiví, ni ma cahán rō verdad de Dios, Yaā chíí ñayiví, te ni ñn ga jnūhun súcuan ma cahán teyí ró. Chi núu cahān rō jeē cuu, te súcuan-ni cahān rō. Te núu cahān rō jeē tuú, te súcuan-ni cahān rō, ma scáa gā rō cahān rō, návāha ma ndénehen Yaā Dios cuēchi siquī rō.

¹³ Te núu íyó ñn ró jéē ndóho jnúndóho, te na cácan tahú rō. Te núu íyó ñn ró jéē cúsiñ ni, te na cáta ró yaa jeē chíñhún ró yá. ¹⁴ Te núu íyó ñn ró jéē cuhú, te na cána ró tēe jéhnu cándito ñayuu cácandíje. Te na cácan tahú de jehē ñayuu cuhú. Te jíin síhví máá Jítóho yō na chíhi de aceite i. ¹⁵ Te núu cácandíje de jeē sáha Jítóho yō jeē cájicān tahú de, yūcuán na te jnama ya ñayuu cuhú. Chi nasávāha ya i, te núu ni sáha i cuēchi, te cone cáhnu ni yā nuū i. ¹⁶ Núu súcuan te nacani ndaā rō cuēchi ró núu jnáhan ró, te cacān tahú rō jehē jnáhan ró návāha nduvāha ró jíin náhan ró. Chi núu ñn tēe ndaā ndíhví ni de jícán tahú de, te yóhoyo váha níhín jníñu, chi sáha ya jeē jicán de. ¹⁷ Chi Elías, tēe ni nacani jnūhun Yaā Dios jenahán, suni ñn tēe jeē nájnūhun íyó máá yó ni cuu de. Te ni jicān tahú ndasí de jeē ma cúun saū, te tu ní cúun saū unī cuiyā iñū yoō. ¹⁸ Yūcuán na te ni jicān tahú tucu de, te ni cuun saū, te ni canecoo tucu tāca jéē jéhe ñuhun.

¹⁹ Nánī mánī, núu ñn ró ni stóo ichi ndaā, te núu ñnga rō nachuhichí ró jnáhan ró, ²⁰ núu súcuan te cuni rō jeē núu ni nachuhichí ró tēe ni quiví cuēchi, te je ni jnama ró de jeē jnahnú ndetū de núu, te súcuan íyó jnúhun cáhnu ni nuū cuehē cuēchi de.

1 PEDRO

1 Máá rí cúu Pedro, apóstol jeē ní tají Jesucristo, te tée ri carta yáha cuájeē nuū rohó ñáyuu ní cajitē núu, te cáyūcu jíca ró nñí Ponto, Galacia, Capadocia, Asia, jíin Bitinia. ² Te máá Tátá yō Yaā Dios ni nacāji ya rohó, chi súcuan ni tee ni yā nde ná tu jecōo ñayīví. Te jíin Espíritu Santo ni sáha ya jeē iyó ndoo iyó íi rō cá-jetáhú ró núū yā, te ni nacate ya anuá rō jíin nñí Jesu-cristo. Te ñúhun ni rī jeē na cáyá gā tāca jéē váha jeē sáha ya rohó, jíin jéē coo ndeyí coo sīñ ni rō jíinánhan ró.

Jeē ñúhun ni yō tāca jéē váha jeē cóo andiví

³ Na cáhán yō jeē yóhoyo cújéhnū Yaā Dios, Yaā cúu Tátá máá Jítoho yō Jesucristo. Chi ni cundáhú ndasí ni yā yohó, te ni sáha ya jeē ní nacacu jeé yó, síquī jeē ní natecu Jesucristo mēhñu ndíyi. Te jeē yúcuan níni cáñuhun ni yō tāca jéē váha jeē coo. ⁴ Chi nihín rō tahū jeē ñúhun váha ini andiví jeē cúu ró jíinánhan ró. Te tahū un má náā cuiṭi, ni ma tívī cuiṭi, ni ma ndíhī cuiṭi. ⁵ Chi cácadíje ró jéē sáha Yaā Dios jehē rō, te jeē yúcuan ndíto ya rohó jíin poder yā, návāha jnama ya rohó quívī sándíhī, chi ni sándaā yā jeē súcuan coo. ⁶ Jeē yúcuan cácusī ndasí ni rō, vēsú cájito ró cuéhē ndinū jnūndóho jecu-ni quívī. ⁷ Chi nájnūhun jeē stuhvá ñayuu oro jíin ñúhūn, jíto ndee i núu jeē váha cúu, suni súcuan cánuú coto ndee jnūndóho róhó núu cácadíje níhin ró chí tuú. Chi jeē cácadíje níhin ró, chi yahu ndasí gá cúu vēsú oro, ndajníñu jeē náā. Te yúcuan cúu jeē cuajnúhún yá rohó, te sájéhnū ya rohó, te squéndōo yíñúhún yá rohó quívī quenda ndijin Jesucristo.

⁸ Te vēsú tu ní cájito ró núū yā, te cáhīyo manī ndasí ró jíin yá. Te cácadíje níhin ró yá vēsú tu cájito ró núū yā vijna. Te yóhoyo luu cácusī ndasí ni rō, chi nde tuá níhín cuiṭi yō jnūhun castūhun yó ndese cúsiñ ni yō. ⁹ Te nihín tahú rō jeē cācu ánuá rō, chi jeē yúcuan cúu jeē cácadíje ró.

¹⁰ Te tée ni canacani jnūhun Yaā Dios nde jenahán, ni cananducú yúcún de ni cacajnúhun váha de síquī jnūhun ndese jnama ya yohó. Te ni cacachi de ndese sáha Yaā Dios jeē váha róhó jíinánhan ró. ¹¹ Chi nde ná tu coo, te ni steén Espíritu Cristo nuū de jíinánhan de ndese quíji jnūndóho síquī Cristo jíin ndese luu ndujéhnū tucu ya jeē yáha jnūndóho ún. Te ni cananducú yúcún de jeē na jécūhun ni de ndé quívī quíji Cristo te ndese coo tāca jéē ni cáhān máá Espíritu jeē ndeé ini de. ¹² Te ni steén Yaā Dios nuū de jeē násūu máá de coto jniñu jeē ní canacani de ún, chi sa máá yó cúu jeē

cóto. Te vijna je ni cajini sōho máá ró jnūhun ún, chi tāca tée nácani jnūhun jnama ya yohó, ni canacani de nuū rō, ni sáha poder Espíritu Santo jeē ní quíji ichi andiví. Te jnūhun ún chi nde máá ndajéhé Yaā Dios cá-nanducú návāha na jécūhun ni.

Cúni yā jeē coo ndoo ánuá yō

¹³ Jeē yúcuan ndito na cóo xinī rō jíinánhan ró, te cáji coo ni rō. Te cocuhun ndasí ni rō jeē nihín rō tāca jéē váha jeē sáha Yaā Dios rohó quívī quenda ndijin Jesucristo. ¹⁴ Te na cúu ró séhe jeē cájetáhú váha. Te ma sáha ga rō tācá jniñu jeē ní cacusiñ ni rō sáha ró nde ná tu jecūhun ni rō jnūhun Yaā Dios. ¹⁵ Chi sa suhva na cóo ndoo ánuá rō jíin táca jniñu casáha ró, chi Yaā ní cana róhó, Yaā iyó ndoo cúu ya. ¹⁶ Chi súcuan cáhán tutu íi: Na cóo ndoo ró jíinánhan ró, chi ruhū iyó ndoo ri, achí yá.

¹⁷ Te núu cácahān rō Tátá rō jíin Yaā Dios, núu súcuan te na cáca yíñúhún ró nuū yā tāca quívī jéē cájica ró ñayīví yáha. Chi máá yá sándaā síquī ndese ni casáha ññ yó, te tu sáha ya cuenta ndese cúu ññ yó, chi ñnuú sáha ya jíin ndíhī yó. ¹⁸ Chi ni jnama ya rohó núu tácá costumbre jeē ní cajequin jíi rō, jeē ní cajejníñu cāha ró núu. Te cájini váha ró jéē yahu cúu jeē ní jnama ya rohó. Chi tu ní chúnaa yā jíin ndajníñu jeē náā, nájnūhun oro jíin plata, ¹⁹ chi sa suhva jíin nñí Cristo jeē yáhu ndasí gá cúu. Chi ni socō yā máá yá nájnūhun ññ londe, quíti iyó váha iyó ndoo. ²⁰ Chi jeē yúcuan ní jeni Yaā Dios máá Cristo nde ná tu jecōo ñayīví, te ni cane ndijin Cristo máá tiempo cuándihī yáha, návāha quendōo váha ánuá rō jíinánhan ró. ²¹ Te jeē jíin Cristo te cácadíje ró Yaā Dios. Chi ni sáha Yaā Dios jeē ní natecu yā mēhñu ndíyi jíin jéē ní ndujéhnū ya. Te jeē yúcuan cácadíje ró Yaā Dios, te cáñuhun ni rō coto ró yá.

²² Te vijna chi je ni candundoo ánuá rō, chi ni cajetáhú ró jnūhun ndaā ni sáha Espíritu jíin ró, návāha cundáhú ndije ni rō hermano cácadíje. Núu súcuan te na cundáhú ndasí ni rō jnáhan ró nde jíin ini jíin ánuá rō. ²³ Chi je ni canacacu jeé ró, te nasūu chíji yucūn ñayuu jeē cúu. Chi sa jnūhun Yaā Dios jeē ndíto técu nñí cáni ni sáha jeē ní nacacu ró. ²⁴ Chi súcuan cáhán tutu íi:

Nájnūhun yucū cúu ndíhī tāca ñáyuu, chi jecu-ni quívī técu i.

Te nájnūhun ita yucū cúu jeē cujéhnū i.

Chi íchí-ni yucū, te ndáhvā-ni ita.

²⁵ Te jnūhun Jitoho yō Yaā Dios, sa quéndōo ñíí cáni. Achí tutu. Te jnūhun un cúu máá jnūhun jnáma ya yohó jéé ní canacani ri nuū rō.

2 Núu súcuan te na siáá rō tācá jniñu néé, tāca jéé stahú, jéé tú ndije, jeé cucuésún ni, jíin jéé sajnúhún síquī jnáhan. ² Te nájnūhun sūchi yíquín sá ní cacu jeé jéxin te jéhu, súcuan na cóndihvī ni rō scuáha ró jnūhun ndaā yā, návāha cuehnu ró jíin te cācu ánuá rō. ³ Chi je cájini rō jeé yóhyo vāha ni maá Jítoho yō.

Cristo cúu nájnūhun yuū yítuu vehe

⁴ Núu súcuan te manī gā coo ró jíjnáhan ró jíin Jítoho yō Cristo. Chi cácuu ró nájnūhun templo nuū ndeé Yaā Dios, chi ndeé yá ini anuá rō. Te Cristo cúu nájnūhun ñn yuū cánuú gá jeé yítuu yíquī templo, te sáha ya jeé cótecu rō ñíí cáni. Te ñayuu vēsú ni casquéhichī i ya, te Yaā Dios chi je ni nacāji ya Cristo chi cánuú ndasí yá, nájnūhun nacāji yó ñn yuū váha jeé quítuu yíquī vehe. ⁵ Te máá ró chi cácuu ró nájnūhun ñn ñn yuū jeé cúvāha templo Yaā Dios, te cotecu rō ñíí cáni. Te na cuáha ró jnūhun jeé sama ya rohó jíjnáhan ró jéé cúvāha templo yā, cúu jeé ndeé Espíritu yā ini anuá rō nájnūhun ini ñn templo. Te suni cúní Yaā Dios jeé cuu ró sūtū cáhīyo ndoo cájéjníñu nuū yā. Chi síquī jeé ní sáha Jesucristo jehē rō, te na sócō rō maá ró jeé cuajníñu ró núu yā sáha ró táca jniñu váha jeé nújnahan ni Yaā Dios. ⁶ Chi súcuan cáhán tutu íi:

Vijna te nde ñuu rī Sion jéquin rī ñn yuū jeé cánuú gá jeé quítuu yíquī vehe, chi ní nacāji ri yā nájnūhun ñn yuū váha jeé cánuú téyí.

Te ñayuu jeé candíje i ya, jnama nahín yá i. Achí Yaā Dios, áchí tutu. ⁷ Te máá ró jeé cácandíje ró, chi yuū váha jeé cánuú téyí cúu ya nuū rō. Te nuū ñayuu tu cácandíje chi tuú, chi sa cúndaā jeé cahán tutu íi:

Máá yúu jeé ní casquéhichī tēe cásama vehe, suu cúu yuū cánuú gá yítuu yíquī vehe. ⁸ Te suni cúndaā jnūhun jeé cahán tutu síquī ñayuu tu cácandíje:

Cúu ya nájnūhun ñn yuū jeé cácachihī i jehē i, nájnūhun toto jeé cotúú i sáha. Achí. Chi jeé cácachihī i jehē i cúu jeé casánīhni ni i nuū jnūhun ya. Te je ni cundaā jeé jnahnú ndetū i síquī jeé cácanīhni ni i.

Jnūhun ñayuu maá Yaā Dios

⁹ Te máá ró cácuu ñayuu jeé ní nacāji Yaā Dios. Te suni cácuu ró sūtū cájéjníñu nuū maá Yaā cúu Rey, te ñayuu cáhīyo ndoo, jíin ñayuu maá yá cácuu ró. Súcuan ní sáha Yaā Dios rohó návāha nacani ró jnūhun ndese yóhyo jéhu jniñu sáha ya, chi máá yá ní cana rōhó ná ní coyūcu ró nájnūhun nuū néé. Te ní squívi-coo ya rohó núu luz yā jeé yóhyo vāha stéén yā ini

anuá rō. ¹⁰ Chi nde saá te nasūu ñáyuu Yaā Dios cácuu ró, te vijna je ní nduu ró ñáyuu maá yá. Te nde saá chi ná tu cundáhú ní yā rohó, te vijna je cúndáhú ní yā rohó jíjnáhan ró.

Jeé cuajníñu vāha yó núu Yaā Dios

¹¹ Ñání manī, ini ñayīvi yáha cácuu ró nájnūhun ñayuu ñuu jicá jéé cájica cuu tátú. Núu súcuan te cáhán ndahú rí jíin ró jéé ma sáha ró táca jniñu jeé ndíyo néé ní rō jíin modo maá ró. Chi tācá un cájé-jnáhan jíin ró, ndúcú jéé jnahnū ndetū anuá rō. ¹² Te ndaā na cáca ró méhñu ñáyuu tu jíin jnūhun Yaā Dios. Chi vēsú cácahān i síquī rō, nájnūhun cácahān i síquī ñáyuu casáha jniñu néé, te núu na cóto i jniñu váha casáha ró, te quivī sándaā Yaā Dios jniñu te cahān i jeé yóhyo cújéhu ya.

¹³ Jeé síquī maá Jítoho yō te cuatáhú ró nuū tāca tóhō cándiso jníñu nuū ñáyuu. Cuatáhú ró nuū maá rey, chi tēe cújéhu ga cúu de. ¹⁴ Te cuatáhú ró nuū tācá gobernador jeé ní jeni rey návāha stóho de ñayuu casáha jniñu néé te cuajnúhún de ñayuu casáha jniñu váha. ¹⁵ Chi cúní Yaā Dios jeé sáha ró jniñu váha, te jeé súcuan sáha ró te tāca ñáyuu canéé jéé tu cájécūhun ní, casi i yuhu i.

¹⁶ Te na cáca ndaā rō jeé cácuu ró ñáyuu ní nduu libre anuá, te nasūu jéé ní nduu libre rō jeé sáha ró jniñu néé. Chi sa cácuu ró mozo Yaā Dios, te cuajníñu vāha ró núu yā. ¹⁷ Coo respeto rō nuū tāca ñáyuu. Cundáhú ní rō hermano cácandíje. Conso íyo ró núu Yaā Dios. Coo yíñúhún ró nuū maá rey.

Jeé na ndóho yó jéhē jnáhan yó nájnūhun ní ndoho Cristo

¹⁸ Róhó jéé cácuu mozo, cuatáhú ró nuū patrón rō, te coo respeto rō nuū de. Te nasūu máá-ni nuū tēe vāha ní jíin tēe vītá ní, chi suni nuū tēe xeēn ní. ¹⁹ Chi ñn jeé váha cúu núu jéndeýí ní ñn tēe jeé stóho cāha ñáyuu de síquī jeé squícu de nuū Yaā Dios. ²⁰ Chi núu cástóho i róhó jéé casáha ró cuéchi, te ní ñn ma cuajnúhún róhó núu jéndeýí ní rō jíin jeé ndóho ró. Te núu cástóho i róhó jéé casáha ró jniñu váha, te núu jéndeýí ní rō jíin, yāha cúu jeé váha jeé nújnahan ní Yaā Dios. ²¹ Chi jeé yúcuan cúu jeé ní cana ya rohó jíjnáhan ró. Chi suni máá Cristo ní ndoho ya jeé síquī rō, te súcuan ní cuu ya ñn ejemplo nuū rō jeé na ndóho ró jéhē jnáhan ró, te súcuan condiquīn rō ichi ya. ²² Te máá yá tú cuítī na cuéchi ní sáha ya, ní tú cuítī na jnūhun stáhú ní cáhán yā. ²³ Ná ní cacahān neé i nuū yā, te tu ní nacahān neé yá. Te ná ní castóho i ya, te tu ní téjnáhan ya jíin i, chi sa ní chihī ya maá yá ndaha Yaā Dios, Yaā sándaā vāha síquī ndihī ún. ²⁴ Te ní condiso máá Cristo cuéchi yó jíin yíquī cúñu yā ná ní jihī yā jicá cruz, návāha quenda yó chíji cuéchi te caca ndaā yō. Chi ní tujī yā, te jeé yúcuan ní canduvāha ánuá rō.

²⁵ Chi ní casana ró nájnūhun lanchi, te vijna je ní can-

dicó ró ni ndīvicoo ró núū Cristo, Yaā cúu pastor rō te ndíto vāha ya anuá rō.

Ndese cánuú coyūcu váha yī jín ñasihí

3 Suni súcuan róhó ñasihí jínáhan ró, cuatáhu ró nuū yī ró, návāha núu cúu de tēe tu cándije jnūhun ya, te cuu scándije ró de, jeē tuá niní jín jéē cahán rō, chi máá jín jéē casáha vāha ró. ² Chi cuni de jeē cájica ndaā rō te cáhīyo respeto rō. ³ Te jeē casáha luu ró máá ró, chi nasūu máni máá ichi síquī rō sáha ró, jeē sáha luu ndasí ró xinī rō, chí jéē cúhun ró síquī oro chí sahma váha ga. ⁴ Chi sa nducú ró jeē quéndōo luu ánuá rō, te coo luu ró ñn modo jeē ma náā cuiti, suu jeē cóo vītá ni rō te coo nahín ni rō. Chi yāha cúu jeē yahu ndasí gá nuū Yaā Dios. ⁵ Chi ñahan ní cahīyo ndoo ánuá nde jenahán, suni súcuan ni casáha luu ña ánuá ña. Chi ni cañuhun ni ña Yaā Dios, te ni cajetáhu ña nuū yī ña. ⁶ Te súcuan ni sáha Sara, chi ni jetáhu ña nuū yī ña Abraham, te ni cahān yīñúhún ña jín de. Te róhó jínáhan ró, núu sáha vāha ró te núu ma yūhu ró ni ñn, yūcuán na te coo ró nájnūhun ni īyo Sara.

⁷ Te suni súcuan róhó yī, na cóo vītá ni rō jín ñasihí ró. Te yīñúhún coo ró jín ña, síquī jeē núu ga fuerza ña vēsú rohó, te suni síquī jeē inuú ní canihīn tahu rō cotecu rō ñí cáni síquī jeē váha ni Yaā Dios. Te súcuan sáha ró návāha tú casi nuū jnūhun jícán tahu rō.

Jnūhun ñayuu cándoho síquī jeē cájica ndaā

⁸ Núu súcuan te inuú na cáni ni rō jínáhan ró, te cucihyá ni rō jeē ndóho jnáhan ró, te cundáhu ni rō i nájnūhun ñani rō. Te na cóo manī rō te cani suchí ni rō. ⁹ Núu casáha neé ñáyuu jín ró, te ma nasáha neé ró jín i. Te núu cácahān neé i nuū rō, te ma nácahān neé ró núu i. Chi sa suhva cacān tahu rō jeē na quéndōo vāha i. Chi Yaā Dios ni cana ya rohó jéē suni súcuan quéndōo vāha ró. ¹⁰ Chi súcuan cáhán tutu ī: Ñayuu cácuni cotecu vāha te cusī ni tāca quivī, na cóto i yuhu i jeē ma cáhān neé i, te na cóto i jeē ma cáhān i jnūhun stáhu.

¹¹ Na cújiyo i nuū jniñu neé, te na sáha i jniñu váha. Na ndúcú i coyūcu mánī i, te na cóndihvī ni i jín.

¹² Chi máá Jítoho yō ndíto ya ñayuu ndaā, te jín nahín yá jeē cájicān tahu i. Te ñayuu casáha jniñu neé, chi tu jétáhu yá i.

Achí tutu.

¹³ Te ni ñn ma sáha neé jín ró te núu máni jniñu váha cándihvī ni rō sáha ró. ¹⁴ Te vēsú núu ndóho ró síquī jeē cájica ndaā rō, te yōhyo ndetū cácu ró. Núu súcuan te ma yūhu ró coto ró i, ni ma cunéé ni rō. ¹⁵ Chi sa jín ini jín ánuá rō chíñúhún ró maá Jítoho yō Cristo. Te níní coo tūhva ró nastíó cuíñí vīta ró te cahān yīñúhún ró jín ñáyuu jeē castichí rohó síquī tāca jéē cáñuhun ni rō. ¹⁶ Te caca ndaā rō jeē tú na cuēchi condee anuá rō, návāha ñayuu cácahān neé síquī rō, cucanu i jeē ni stáú yáhu i róhó jéē cájica

ndaā rō chi cácañdije ró Cristo. ¹⁷ Chi núu cúni Yaā Dios te vāha ga jeē ndóho ró síquī jeē casáha ró jniñu váha vēsú síquī núu sáha ró jniñu neé.

¹⁸ Chi máá Cristo suni ni ndoho ya, te ñn jínu-ni ni jihī yā jeē síquī cuēchi ndihī yó. Yaā vāha cúu ya, te ni ndoho ya jehē yohó ñáyuu ní casáha jniñu neé, návāha quivicoo yó núu Yaā Dios sáha ya. Chi ni jihī yiqui cúñu yā, te ánuá yā chi técu-ni ñí cáni. ¹⁹ Te ná ni jihī yā te ni jehēn anuá yā ni nacani ya jnūhun nuū anuá ñayuu cáyindihyū. ²⁰ Chi nde jenahán tu ní cájetáhu i, ná ni īyo paciencia ni Yaā Dios te ni condetu ya níní sáha Noé barco jeē naní arca. Te jín arca un ní cācu jecu-ni ñayuu, chi unā-ni i ni cācu nuū ndúte. ²¹ Te nájnūhun ni cacācu i nuū ndúte, súcuan cúu jeē jéndute yó vijna te cácu ánuá yō. Te jeē jéndute yó, nasūu jéē ndúndoo yiqui cúñu yō, chi sa jeē jicán yō nuū Yaā Dios jeē ndúndoo ánuá yō. Te súcuan te cācu yó, chi ni cundúú yó jín Jesucristo nuū jnūhun ni natecu yā. ²² Te ni ndaa ya cuanuhun yā andiví, te ndéé yá ichi ndáváha Yaā Dios nuū cujéñu ya. Te tāca ndajéhé andiví, jín jéē cándacu jniñu, jín jéē cájñi poder, cájendetū nuū yā.

Jeē na cuajñiñu yó jín táhu jeē ni jéhe ya nuū yō

4 Núu súcuan te nájnūhun ni ndoho Cristo jehē yō jín yiqui cúñu yā, suni súcuan na táva ni maá ró ndoho ró. Chi ñayuu jeē ní ndoho jín yiqui cúñu, tuá sáha i cuēchi. ² Núu súcuan te ñí tiempo jeē cuahán gā rō, na sáha ró jniñu jeē cuni Yaā Dios, te ma sáha ga rō jniñu jeē ndíyo neé ni rō jín modo maá ró. ³ Chi nde ñí véji ró, te ni casáha ró cuéhē cuēchi jeē cánuj-nahan ni rō síquī jeē tu ní cájini rō jnūhun Yaā Dios. Te tiempo un máni máá jéē neé ni casáha ró, te ni candiyo ni rō tāca jéē neé, ni canajñi ró, ni casáha ró vico neé, ni cajihī ndasí ró nuū vico ró, te ni cachiñúhún ró ídolo jeē ni cáhān Yaā Dios jeē ma chíñúhún yó. ⁴ Te cáacunéé ni i jeē tuá cájica ró jín i jeē sáha ró táca cuēchi xeñ jín i. Te jeē yúcuan cúu jeē cácahān neé i síquī rō. ⁵ Te máá i chi ñn quivī te nacuāha i cuenta nuū maá Yaā jeē iyó tūhva ya sándaā yā jniñu ñayuu técu jín ñáyuu ní cajihī. ⁶ Chi jeē yúcuan suni ni quiji jnūhun vāha ya nuū tāca ndíyī ná ni cotecu i. Te ni cundaā síquī cuēchi ni casáha i ñayiví yáha, nájnūhun cundaā síquī ndihī ñayuu, návāha nacani ni i te cotecu anuá i ñí cáni nájnūhun técu Yaā Dios.

⁷ Te je cuacuyajni quivī jeē náā tāca jéē iyó. Núu súcuan te ndito na cóo xinī rō jínáhan ró, te cóndihvī ni rō cacān tahu rō. ⁸ Te jeē cánuú gá cúu jeē cundáhu ndasí ni rō jnáhan ró. Chi núu cundáhu ni yō jnáhan yó, te iyó jnūhun cáhnu ni nuū cuehē cuēchi. ⁹ Sáha vāha ró jín ñáyuu jeē jinú i vehe ró, te ma cúxī ni rō. ¹⁰ Tāca ró cuajñiñu ró núu jnáhan ró, núu ndese iyó máá táhu rō jeē ni jéhe Yaā Dios jeē cuajñiñu ró núu yā. Te síquī vāha ró jín táhu jeē sññ sññ ni jéhe ya nuū ñn ñn ró. ¹¹ Núu tahu jeē nácani ró jnūhun cúu, te na cáhān rō nájnūhun jeē maá Yaā Dios cahán. Te núu

tahū jeē chindéé ñáhán ró jnáhan ró cúu, te na sáha ró jíin fuerza jeē ni jéhe ya nuū rō, návāha jíin ndihī jeē casáha ró te cahān ñayuu jeē yóhoyo cújéhnu Yaā Dios siquī jeē ni sáha ya jíin Jesucristo. Te na cáhán yō jeē luu cújéhnu Cristo te jñī ya poder ñí cáni. Amén.

Jeē ndóho yó síquī jeē candíje yó Cristo

¹² Ñánī mánī, núu vēji jnūndóho xeēn jeē coto ndee rohó, te ma cunéé ni rō cani ni rō jeē maá ró ni nihīn jnūndóho xeēn gā. ¹³ Chi sa cusīñ ni rō jeē cándoho ró jecu jnūndóho jeē ní ndoho Cristo, návāha suni cusīñ ndasí ni rō quivī quénda ndijin yā jeē cújéhnu luu ya. ¹⁴ Te yóhoyo ndetū rō te núu cácahān neé i nuū rō siquī jeē cácaandíje ró Cristo. Chi máá Espíritu Yaā Dios jeē cújéhnu ndasí, ndéé yá ini rō. Máá i chi cácahān neé i síquī yā, te máá ró chi cáchiñhún ró yā. ¹⁵ Te núu ndoho ró, te na ndóho ró síquī jeē cácaandíje ró Cristo. Te ma ndóho ró síquī tāca cuéchi nájñuhun cándoho ñayuu jéhni ndēyī, ñayuu sacuíhná, ñayuu sáha jniñu néé, jíin ñayuu quívī nduu nuū jniñu jnáhan jeē tu cánuú quívī nduu. ¹⁶ Te sa núu ñn ró ndóho síquī jeē candíje ró Cristo, te ma cúcanu rō, chi sa nacuatáhú ró nuū Yaā Dios siquī jeē cúu ró cristiano.

¹⁷ Chi je ni jinū quivī jeē quejéé sándaā Yaā Dios cuēchi, te xīhna gā ñayuu cácuu sēhe ya sándaā yā cuēchi. Te núu xīhna gā cuēchi máá yó quejéé yá sándaā yā, núu súcuan te xeēn gā coo jeē ndénehen ya cuēchi siquī ñayuu jeē tu ní jétáhú jnúhun vāha ya. ¹⁸ Te núu yóhoyo yí cácu ñayuu vāha, núu súcuan ¿te ndese cācu ñayuu casáha jniñu néé jíin tāca cuéchi? ¹⁹ Núu súcuan te rōhó jéé cándoho siquī jeē súcuan cúní Yaā Dios, ma jécuiñī rō sáha ró jniñu vāha, te na chíhi ró máá ró ndaha máá Yaā jeē ni sáha rōhó, chi squícu ya jeē ni jéjnūhun ya.

Jeē jéhe de consejo ñayuu cácaandíje

5 Vijna te na cáhán rī jíin tāca rōhó téé jéhnu cándito ñayuu cácaandíje, chí suni tēé jéhnu ndíto ñayuu cácaandíje cúu máá rí. Te cúu ri testigo jeē ní jito ri ndese ni ndoho Cristo. Te suni ndujéhnu ri jíin ró sáha Cristo quivī quénda ndijin yā. ² Na cóto yúcún ró ñayuu jeē ndeé jniñu ró condito ró, jeē cácuu i nájñuhun lanchi Yaā Dios. Te na cúsñi ni rō condito ró i, chí súcuan cúní Yaā Dios. Te nasūu síquī jeē sáfuerza yā rohó, ni nasūu síquī jeē nihín rō xūhún, chí sa siquī jeē cuní rō cuajniñu ró. ³ Te nasūu jéé ndacu ñihín rō

jniñu nuū ñayuu cándito ró, chí sa nducú ró cuu ró ñn ejemplo nuū i jeē cácuu i lanchi ya. ⁴ Yūcuán na te quivī quénda ndijin maá Yaā cúu Pastor cújéhnu nuū rohó téé cácuu pastor lanchi ya, te cuāha ya premio nuū rō jijnáhan ró jéé yóhoyo luu te ma náā cuiti.

⁵ Te suni rōhó tāca téé suchí, na cuándetū rō nuū tāca téé jéhnu jíñā. Te ndihī rōhó ñayuu cácaandíje, cuándetū rō nuū jnáhan ró, te cani suchí ni rō. Chi suhva cáhán tutu:

Yaā Dios jési yā nuū ñayuu casáha téyí máá, te vāha ni yā chindéé ñáhán yá ñayuu casáha suchí máá.

Achí. ⁶ Núu súcuan te na cáni suchí ni rō, chí cáyihī ró ndaha Yaā Dios jeē jñī poder. Te sájéhnu ya rohó, na jíinú maá quívī. ⁷ Tāca jéé cánacani ndasí ni rō siquī, chíhi ró ndaha máá yá te máá yá coto, chí ndíto ya rohó.

⁸ Te cájí na cóo xinī rō te ndito coo ni rō. Chi jexeén jeē jíto uhū rohó, jíca cuu nducú squívī rōhó jíjínáhan ró núu cuéchi. Te xeēn gā sáha vēsú ndicaha jeē tyo ndáhyú. ⁹ Te cuiñī ñihín ró jéé ma cúndeyí jexeén jíin ró, te ñihín candíje ró jnúhun cúndáhú ni yā rohó. Chí cájini rō jeē suni súcuan cándoho hermano rō jeē cáyūcu ñí cáhnu ñayíví. ¹⁰ Te núu ni jínu jeē ndoho ró jecu-ni tiempo, te Yaā Dios chí sáha ya jeē ije vāha ni rō jíin jnúhun ya, jíin jéé cuiñī ñihín ró, te cuāha ya fuerza ini rō, te quendōo cutú ró ñí cáni. Chí máá yá cúu jeē sáha tāca jéé vāha yóhó, te ni cana ya yohó jéé cújéhnu luu yó jíin yá ñí cáni, siquī jeē nduú yó jíin Jesucristo. ¹¹ Te na cáhán yō jeē yóhoyo luu cújéhnu ya te jñī ya poder ñí cáni. Amén.

Saludo jeē sándihí

¹² Jíní rī jeē Silvano cúu ñn hermano jeē squícu vāha. Te máá de cuajeē nuū rō jíin carta yáha jéé ní tee ri jecu jnúhun. Te jíin yáha stíhví ni rī rohó, te cáhán rī jíin ró jeē ndaá cúu jeē tāca jéé vāha ni sáha Yaā Dios rohó, suu stéén nuū rō jeē cundáhú ndije ni yā rohó. Te na cuiñī ñihín ró jíin jnúhun yáha.

¹³ ñayuu cácaandíje jeē cáyūcú ñuu Babilonia, jeē ní nacāji ya i nájñuhun ni nacāji ya rohó, cácahān i jeē sándeýí ni rō. Te Marcos, tēé cúu nájñuhun sēhe ri, suni súcuan cáhán de. ¹⁴ Te núu na cáhán rō jíin jnáhan ró, te techūhu mánī rō ndaha i.

Te na cóo ndeyí coo siñ ni ndihī ró jéé cáyihī ró ndaha Jesucristo. Súcuan na cóo. Amén.

2 PEDRO

1 Máá rí cúu Simón Pedro, te cúu ri mozo Jesucristo, te cúu ri apóstol jeē ní tají yá. Te téē ri carta yáha cuájeē nuū rō jijnáhan rō, jeē ni sáha Yaā Dios jeē inuū-ni jíin rí jijnáhan ri ni canihīn rō jnūhun luu váha jeē cácanđije yó yá. Chi Yaā ndaā cúu Yaā Dios, suu máá Jesucristo jeē jnáma yóhó. ² Te ñúhun ni rī jeē na sáha ga yā jeē váha ndasí róhó jíin jéē yóhoyo coo ndeyí coo siī ni rō siquī jeē cájecūhun vāha ni rō ndese Yaā cúu Yaā Dios jíin Jítóho yō Jesús.

Siquī ndese cánuú coo ñayuu cácanđije

³ Te Yaā Dios, jíin poder yā ni jēhe ya nuū yō tāca jéē sáha jeē cúu caca ndaā yō nuū yā jíin jéē chiñúhún váha yó yá. Chi ni steén yā maá yá nuū yō, chi cúu ya Yaā jeē ní cana yóhó, siquī jeē yóhoyo cújéhu ya jíin táca jniñu jéhu sáha ya. ⁴ Jeē yúcuan ní jejnūhun ya tāca jéē yóhoyo jéhu yóhoyo vāha sáha ya yohó, návāha jíin táca ún te nduu ró nájñūhun íyó máá yá, te cācu ró núū jniñu jeē cándiyo néē ni ñayuu casáha i ini ñayivi yáha. ⁵ Núu súcuan te na ndúcú ndeyí ró jíin jnūhun yáha. Te jeē cácanđije ró, te siquī ún na chísoó ró jeē caca ndaā rō. Te jeē cájica ndaā rō, te siquī ún chísoó ró jeē cóndihvī ni rō jecūhun vāha ni rō. ⁶ Te siquī ún chísoó ró jeē casi rō modo jeē cuní maá ró. Te siquī ún chísoó ró jnūhun cuandeyí ni rō, te siquī ún chísoó ró jeē chiñúhún váha ró Yaā Dios. ⁷ Te siquī ún chísoó ró jeē cóo manī rō jíin jnáhan rō, te siquī ún chísoó ró jeē cundáhú ni rō jnáhan rō.

⁸ Chi núu cayā tācá jniñu yáha jíin ró, te suu sáha jeē ma cótecu saá-ni ró, chi sa quee vāha jniñu sáha ró, síquī jeē cájecūhun ni rō ndese Yaā cúu Jítóho yō Jesucristo. ⁹ Te ñayuu jeē tu casáha jniñu yáha, nájñūhun jeē cáhīyo cuáá i, chi tu jécūhun ni i jnūhun ya, te je ni naa ni i jeē ni sándoo ya i tāca cuéchi ni casáha i ichi yátá. ¹⁰ Jeē yúcuan na ndúcú ndeyí ró hermano, návāha coo seguro jeē ní cana ya rohó jíin jéē ní nacāji ya rohó. Chi núu sáha ró tāca jniñu yáha, te ma cáca yátá cuiti rō. ¹¹ Yūcuán na te nune vāha ichi quivi ró ini ñuu máá Jítóho yō Jesucristo, Yaā jnáma yóhó, nuū ndácu ya jniñu nñí cáni.

¹² Jeē yúcuan ma jécuiñī rī sáha ri jeē núcūhun ni rō tāca jnūhun yáha, vēsú je cájini rō te cáhīn nīhin ró jíin jnūhun ndaā jeē cácanđije ró. ¹³ Chi jéni ni rī jeē iyó váha stíhvī ni rī rohó vijna técu gā rī, návāha nucūhun ni rō. ¹⁴ Chi máá Jítóho yō Jesucristo ni castūhun yá nuū rī jeē tuá cotecu nahán rí ñayivi yáha. ¹⁵ Jeē yúcuan na ndúcú ndeyí gá rī stíhvī ni rī rohó, návāha

núu je ni jihī rī, te níni nucūhun ni rō tāca jnūhun yáha.

Jeē ní cajito de jeē kujéhu Cristo

¹⁶ Ná ni castéén rī jnūhun máá Jítóho yō Jesucristo nuū rō, ndese ndiji ya jíin poder yā, te tu ní cácahān rī ñn cuento-ni jeē ní catava ndichí ñayuu. Chi ná ni cahīyo ri jíin yá xinī yúcu, te ni cajito jíin núu rī jeē tucu ni nduu ya jeē ní nduluu jéhu ya. ¹⁷ Chi ni cajini rī jeē Tatá yō Yaā Dios ni cahān yñúhún yá jíin Jesús, te ni sajeéhu ya Jesús. Chi ichi ándiví ní quiji jnūhun luu, ni cahān Yaā Dios: Yáha cúu Séhe ri jeē maní ndasí rí jíin, te cúsiñ ni rī jíin, áchí yá. ¹⁸ Te ni cajini sōho ri jnūhun un jéē ni cáhān ichi ándiví, chi ni cahīn ri jíin máá Jítóho yō xinī yúcu iī ún.

¹⁹ Te súcuan cájini yō jeē iyó ndaā ndije tāca jnūhun ni cateē téē ni canacani jnūhun ya nde jenahán. Te vāha jeē na chúhun ni rō jnūhun un jijnáhan rō, chi suu cúu nájñūhun ñn luz jeē cayú nuū néē, nde na cúndijin quivī ndiji ya, te steén yā ini anuá rō nájñūhun jeē ndíndéē lucero. ²⁰ Te xīhna gā na jécūhun ni rō jeē ni ñn jnūhun cáhān tutu iī, nasūu jéē súcuan-ni ni cajeni ni téē cúu. ²¹ Chi tāca téē ndoo jeē ní canacani jnūhun ya nde jenahán, tu ní cácahān cuiti de jnūhun jeē cúu ni maá de. Chi sa suhva ni canacani de jnūhun Yaā Dios jeē ni steén Espiritu Santo nuū de.

Siquī téē cástéén jnūhun stáhú

(Judas 4-13)

2 Te mēhñu ñayuu Israel ún suni ni cahīyo téē ni canacani jnūhun stáhú. Te suni súcuan coo téē steén jnūhun stáhú méhñu ró. Te squivi de jnūhun stáhú jéē tévi ñayuu sáha. Te ni ma cuajnúhún de Jítóho yō jeē jnáma ya de, te súcuan sáha de jeē jnahnú ndetū yachī de. ² Te cuehē ñayuu condiquīn i modo neé jéē castéén de. Te sáha de jeē cahán neé ñayuu siquī jnūhun vāha ya jeē cúu ichi ndaā. ³ Te siquī jeē cándiyo ni de xūhún, te quende de xūhun ró siquī jnūhun stáhú steén de nuū rō. Te tu quixín jnūndóho jnahnú ndetū de, chi nde jenahán je ndétu jnūhun ndonda ya siquī cuéchi de.

⁴ Chi tu ní íne cáhnu ni Yaā Dios nuū tācá ndajéhé yā jeē ní casáha cuéchi, chi sa ni jnaa yā infierno cáyindihyū nuū néē, cánuhnī jíin cadena. Te ni chindihyū yā nde quivī sándaā yā siquī. ⁵ Te suni tu ní íne cáhnu ni yā nuū ñayuu jenahán, chi sa ni scúun ya saū xeén siquī ñayuu ni casáha néē un. Te máá-ni Noé, téē ni

nacani jnūhun ndaā, ni scácu ya de jíin úxā gā ñayuu. ⁶ Te suni ni ndonda ya siquĩ cuéchi ñayuu ñuu Sodoma jíin ñuu Gomorra, te ni cayū ñuu i ni nduu máá yāa na. Te súcuan cúu i ñn ejemplo nuū tāca gá ñayuu sáha néé jéé quíji ga. ⁷ Te ni scácu ya Lot, chi tēe ndaā ni cuu de, te ni cucuíhyá ndasí ni de ni jito de jniñu néé ní casáha i. ⁸ Chi tēe váha un ní condee de mēhñu ñayuu ún, te ndiquivĩ ni nacani cuíhyá ni de jeé ní jini sōho de ni jito de tācá jniñu néé ní casáha i. ⁹ Núu súcuan te máá Jítoho yō chi jnáma ya ñayuu cáchiñúhún núu yā, te núu vēji jnūndóho siquĩ i. Te chíndihyū yā ñayuu casáha néé, návāha ndoho i castigo quivĩ sándaā yā cuéchi i.

¹⁰ Te víhyá gā stóho ya tēe casáha jniñu jnéhén jéé ndíyo néé ni de, te cácuu jéé ni de siquĩ jniñu ndácu máá Jítoho yō. Níhni ndasí ni de, te cáhundeyí ni de sáha de jeé cácuu maá de, te tu cáyūhú de cahān ndevāha de siquĩ tāca jéé cácujuhnu nuū sucún. ¹¹ Te ni máá ndajéhé jeé cáhiñu nuū Jítoho yō, vēsú cácujuhnu ga yā jíin fuerza jíin jniñu ndíso ya, te tu cácahān ndevāha ya siquĩ tāca jéé cácujuhnu ún.

¹² Te tēe ún chi cácuu de nájnūhun quití yúcu jéé ni jéconāā tĩ jíin modo sáha tĩ, te cátañu tĩ návāha nihñ ñayuu tĩ cahni i tĩ. Chi cácahān néé de siquĩ tāca jéé tu cájécūhun ni de. Te cuu de nájnūhun jíhí tācá quití ún.

¹³ Te jeé ní castóho de ñayuu, suni súcuan naniñu de ndoho de. Te cácusĩ ni de jíin táca jéé cácajni ni de, te casáha de tācá jniñu jeé cándiyo néé ni de. Te cácuu de tēe quini jeé casáha jniñu cúcanu ñayuu. Te jeé cándutútú de jíin ró vico ró, te níni cácusĩ ni de jíin jniñu néé jniñu stáhú.

¹⁴ Te cándiyo ni de cájito de ñahan, te tu cájecuĩñi de sáha de cuéchi. Te cástáhú de ñayuu tahya ni. Chi ni cacāan de jíin jnúhun ndíyo ni de tācá ndajniñu. Te tēe jnahnū ndetū cácuu de. ¹⁵ Te ni casana de, chi ni castóo de jnūhun jeé cúu ichi ndaā. Te ni candiquĩ de modo Balaam, tēe ni nacani jnūhun nde jenahán, séhe Beor. Chi tēe un ní cusĩ ni de nihñ de xūhun sáquĩ jnūhun néé jéé cahán de. ¹⁶ Te ñn burro ni cahān tĩ nájnūhun ñn ñayuu, vēsú quití ñññ cúu tĩ. Te ni cahān tĩ nuū tēe ún, te súcuan ni jesí tĩ jeé ma quihín de cahān de tāca jnúhun néé stívi.

¹⁷ Te tāca tēe súcuan chi cácuu de nájnūhun tesōco íchi, nájnūhun vicō jeé stehí táchĩ. Te jnahnū ndetū de quivícoo de nuū néé nuū lúchi jnúu coyūcú de nñí cáni.

¹⁸ Chi yōhyo casándúxi de máá de jíin jnúhun cácahān saá-ni de. Te cánducú de squiví tucu de sava ñayuu nuū jniñu néé jniñu ndíyo ni. Te súcuan cástáhú de ñayuu jeé sa ní quenda i ni cācu i nuū ñayuu casáha jniñu néé. ¹⁹ Te cácahān de jeé cáhīyo libre i sáha i ndese-ni cúni máá i, te ni máá de tu cáhīyo libre de, chi cácuu de mozo nuū cuéchi, chi máni jniñu jnéhén casáha de. Chi tācá jniñu jeé cúndeyí jíin ñn tēe jeé sáha de, suu yūcuan ndúu de mozo nuū. ²⁰ Chi núu je ni cajini de ndese Yaā cúu máá Jítoho yō Jesucristo, Yaā jnáma yóhó, te núu súcuan ni quenda de ni cācu de

nuū jniñu jnéhén íyó ini ñayiví, te yūcuán na te núu ndívicoo tucu de nuū jniñu un jéé cúndeyí tucu jíin de, núu súcuan te néé gá quendōo de jeé sándññí vēsú jeé xíhna ñúhún. ²¹ Chi vāha ga núu jeé tu ní cájini de jnūhun ichi ndaā nuú, vēsú jeé ní cajini de, te stóo tucu de jniñu ndoo jeé ní ndacu ya nuū de. ²² Chi cúnndaā jíin de nájnūhun cáhán ñn jnūhun jenahán: Ina ni nacaji tĩ jeé ní ndujen tĩ. Te quiví ní ndundoo, ni nacuchi tucu tĩ ndehyū, achí.

Siquĩ jeé ndíji Jítoho yō

3 Ñánĩ mánĩ, yāha cúu carta uū jeé tēe ri nuū rō. Te jíin ndindúu carta yāha cúni rĩ jeé nacani ni rō siquĩ ndihí jeé váha ndaā jeé jéni ichí rí rohó. ² Te na núcūhun ni rō tāca jnúhun jeé ní canacani tēe ndoo Yaā Dios nde jenahán, jíin jniñu ní ndacu máá Jítoho yō, Yaā jnáma yóhó. Te suu cúu jeé ní castéén tēe cácuu apóstol nuū rō.

³ Te xíhna gā jnūhun yāha na jécūhun ni rō: Jeé nuū cuándññi quiví te quijicoo tēe sácatā siquĩ jnúhun ndaā yā, chi sáha de tācá jniñu néé jéé ndíyo ni maá de. ⁴ Te cahān de jíinahan de: ¿Najehē cúu jeé tu ndíji Cristo nájnūhun ni jejnūhun ya? Chi nde quiví ní cajihí jíi yō te nde vijna, tu ndé sáma cuítĩ ndihí jeé íyó ndé ná ni jecōo ñayiví, achi de. ⁵ Chi tu cácuu de jecūhun ni de jeé ndé jenahán ní cuvāha andiví jíin jnúhun ni cahān Yaā Dios. Te ni ndacu ya jniñu jeé na cuvāha ñayiví jíin ndute, te mēhñú ndute ni nane ñuhun íchi. ⁶ Te suni jíin ndute ni naa ñayiví jenahán, chi ni ndaa ndute jeé ní cuun saū xeén. ⁷ Te suni súcuan jíin jnúhun ni cahān Yaā Dios ni sátūhva ya jeé cayū andiví jíin ñayiví íyó vijna. Chi máá quiví juicio te cayū ndihí, te jnahnū ndetū ñayuu ni casáha néé.

⁸ Te suni ma náā ni rō jnūhun yāha, ñánĩ mánĩ: Jeé nuū máá Jítoho yō chi ñn quiví cúu nájnūhun mil cuiyā, te mil cuiyā cúu nájnūhun ñn quiví-ni. ⁹ Chi nasūu jéé cucuéé máá Jítoho yō siquĩ jnúhun ni jejnūhun ya, nájnūhun cájeni ni sava ñayuu. Chi sa suhva íyó paciencia ni yā nuū yō, chi tu cúni yā jeé jnahnú ndetū ni ñn yó, chi sa cúni yā jeé ndihí yó nacani ni yō stóo yó cuéchi yó.

¹⁰ Te quiví ndíji máá Jítoho yō, ñn sanaa-ni te quee, nájnūhun ñn sanaa-ni te quee ñacuññá jecuáa. Te quiví ún chi ñññ ndasí andiví, te naa-ni. Te ndihí jeé íyó andiví chi naa sáha ñuhūn. Te ñayiví jíin táca jéé íyó ini, ndihí cayū.

¹¹ Te núu súcuan naa tācá un, te cánuu ndasí jéé coo ndoo ánuá rō te chíñúhún váha ro yá jíinahan ró. ¹² Te condetu ró te condihví ni rō jeé na quee yachí quiví ndíji Yaā Dios. Te quiví ún cayū andiví te naa-ni, te tāca jéé íyó chi ndute sáha yáñuhūn. ¹³ Te máá yó chi cándetu yó andiví jéé jíin ñayiví jéé, chi súcuan ni jejnūhun Yaā Dios. Te yūcuán chi máni jniñu ndaā jíin jniñu váha coo.

¹⁴ Núu súcuan, ñánī mánī, níní jéē cándetu ró jéē squícu tǎcá jniñu yáha, te na ndúcú ndéyí ró návāha quivī ndíji ya te nihīn yā rohó jéē cáyūcu mánī rō, te coo ndoo ró jéē tú na cuēchi ró. ¹⁵ Te na jécūhun ni rō jeē siquī jeē iyó paciencia ni maá Jítóho yō, jeē yúcuan cácu yó. Chi hermano yō Pablo jeē maní yō jíin, suni súcuan ni tee de nuū rō, chi súcuan ni steén Yaā Dios jnūhun ndíchí yá nuū de. ¹⁶ Te cáhán de siquī jnúhun yáha núū tǎca carta jeē ní tee de. Te nuū carta de un iyó jecu jnūhun jeē yí jécūhun ni yō. Te ñayuu tu jécūhun ni jíin ñayuu tu íje jíin jnúhun cándíje, cá-nasama i modo steén jnūhun yí un, nájnūhun násama

i jeē cahán sava ga tutu ií. Te súcuan sáha i jeē jnahnú ndetū maá i.

¹⁷ Te rǎhó ñánī mánī, vijna te je ni cajini rō ndese coo tǎcá jniñu yáha. Núu súcuan te coto má condiquīn rō jnūhun stáhú cástéén ñayuu casáha néé. Chi núu tuú te snáa rō jnūhun cáhīin nīhin ró jíin. ¹⁸ Chi sa na cóndihvī gā ni rō cuni rō ndese Yaā cúu máá Jítóho yō Jesucristo, Yaā jnáma yóhó. Te na íje ga ni rō jíin jnúhun cúndáhú ni yā rohó. Te na cáhán yō jeē yóhoyo luu cújéhnú ya nde vijna jíin nǎ cáni. Súcuan na cóo. Amén.

1 JUAN

Jnūhun cotecu yō nī cāni

1 Jnūhun cátee ri cuajeē nuū rō jijnáhan ró cúu jnūhun máá Yaā jeē je iyó ndé ná tu jecōo tāca jéē iyó. Te ni cajini sōho ri jeē ni cáhān yā, te ni cajito jínúū rī yā, chi ni cajito vāha ri nuū yā, te ni cajinī ri yā. Te máá yá cúu Jnūhun cotecu yō nī cāni. ² Chi Yaā yáha jéē sáha ya jeē cótecu yō, ni quenda ndijin yā. Te cácahān rī jnūhun ya, chi ni cajito ri yā. Te cácastūhun rí nuū rō jijnáhan ró sīquī Yaā cúu Jnūhun cotecu yō nī cāni, Yaā ni condee jín Tátá yō Yaā Dios, te ni quenda ndijin yā nuū rī jijnáhan ri. ³ Jeē ní cajito ri jín jéē ní cajini sōho ri, yūcuan cúu jeē cácastūhun rí nuū rō, návāha coo inuú ni rō jín yó jijnáhan yó. Te jendaá chi cáhīyo inuú ni yō jín máá Tátá yō Yaā Dios jín Séhe ya Jesucristo. ⁴ Te jnūhun yáha cátee ri cuajeē nuū rō, návāha cusī teyí ni rō jijnáhan ró.

Yaā Dios cúu luz

⁵ Te yáha cúu jnūhun ni steén Jesucristo nuū rī, te vija cácastūhun rí nuū rō: Yaā Dios cúu luz, chi yōhyo ndaā yā, te tú cuīti na jniñu néé iyó jín yá. ⁶ Núu cácahān yō jeē cáhīyo inuú ni yō jín yá, te núu cájica yó nájñūhun nuū néé jeē sáha yó jniñu néé, núu súcuan te cástáhú yó, te nasūu jniñu ndaā casáha yó. ⁷ Te núu cájica yó jín luz yā jeē casáha yó jniñu ndaā, nájñūhun iyó máá yá jín luz yā jeē sáha ya jniñu ndaā, yūcuán na te cáhīyo inuú ni yō jín táca jnáhan yó. Te nīñī máá Séhe ya Jesucristo sándoo yóhó núu ndīhi cuēchi yó.

⁸ Núu cácahān yō jeē tú na cuēchi yó, te cástáhú yó máá yó jeē jéni ni yō súcuan, te tu ñūhun jnūhun ndaā ini yō. ⁹ Te núu nacani ndaā yō cuēchi yó núu yā, te cone cáhnu ni yā nuū cuēchi yó, te sándoo ya yohó ndīhi jeē neé casáha yó. Chi jín yō jeē Yaā vāha Yaā ndaā cúu ya. ¹⁰ Te núu cácahān yō jeē tú na cuēchi yó, te nájñūhun sáha yó jéē Yaā stahú cúu ya, te tu cándīje ndije yó jnúhun ya.

Cristo cúu Yaā cahán jehē yō

2 Tāca jnúhun yáha téé ri cuajeē nuū rohó jéé cácuu ró nájñūhun sēhe ri, návāha ma sáha ró cuēchi jijnáhan ró. Te núu ndé ñn ró ní sáha cuēchi, te iyó máá Yaā cahán jehē yō nuū máá Tátá yō Yaā Dios. Jesucristo Yaā ndaā cúu ya. ² Te ni socō yā máá yá jeē ndahva yā cuēchi yó, te nasūu cuēchi máá-ni yó, chi suni cuēchi ñayuu nī ñáyīví.

³ Núu squícu yó jniñu ndácu Yaā Dios nuū yō, jín yúcuu cácahnu ni yō jeē jín ndije yó ndese Yaā cúu ya. ⁴ Te núu cáhān ñn ñayuu: Ruhū chi jín rī ndese Yaā cúu ya, te núu tu squícu i jniñu ndácu ya, núu súcuan te stáhú i, te tu cáhān i jnūhun ndaā. ⁵ Te sa ñayuu squícu jnūhun ya, je ni ije vāha ni i jeē maní i jín yá. Súcuan te cuni yō núu ndúu yó jín yá chí tuú. ⁶ Núu cáhān ñn ñayuu jeē nduú i jín yá, cánuú jéé caca ndaā i nájñūhun ni jica Jesucristo.

Jniñu jéé ndácu ya nuū yō

⁷ Hermano, nasūu ñn jniñu jéé ndácu ri nuū rō jeē cahán rī jeē na cúndáhú ni rō jnáhan ró. Chi jniñu jeē je cájini rō nde ná ni quejéé ró candīje ró cúu. Te jniñu yáha jeē ndácu ya, vēji nde jenahán, te suu cúu jnūhun ni cajini sōho ró ndé quivī ní quejéé ró candīje ró. ⁸ Te vēsú súcuan, te níni jniñu jéé cúu, te jniñu ndaā cúu nuū Cristo jín núu máá ró jijnáhan ró. Chi je cuayāha jniñu néé jéé iyó núu néé, te je stéén máá luz ndaā ini anuá yō vijna.

⁹ Núu ñn ñayuu cahán i jeē jíca i jín luz yā, te núu jito uhū i jnáhan i, ñayuu ún chi jíca ga i nájñūhun nuū néé jín cuēchi. ¹⁰ Te ñayuu jeē cundáhú ni jnáhan, chi jíca i jín luz yā, cúu jeē sáha i jniñu váha. Te ni ñn ma cúu sáha jeē quivī i cuēchi. ¹¹ Te ñayuu jito uhū jnáhan, chi iyó i nuū néé, te jíca i nuū néé. Te tu jín i ndé chi quíhín i, chi nuū néé un ní jesi jeē tu jécūhun ni i.

¹² Róhó jéé cácuu sēhe, téé ri jnūhun yáha cuájeē nuū rō, chi jeē sīquī Jesucristo te ni ine cáhnu ni Yaā Dios nuū cuēchi ró. ¹³ Róhó tátá jijnáhan ró, suni téé ri nuū rō, chi cájini rō ndese Yaā cúu Yaā iyó ndé xīhna ñúhún. Róhó téé suchí jijnáhan ró, suni téé ri nuū rō, chi ni cacundeyí ró jeē tu ní cúu squivī jexeén rohó cuēchi.

Róhó jéé cácuu sēhe, téé ri jnūhun yáha cuájeē nuū rō, chi cájini rō ndese Yaā cúu máá Tátá yō Yaā Dios.

¹⁴ Róhó tátá jijnáhan ró, suni téé ri nuū rō, chi cájini rō Yaā iyó ndé xīhna ñúhún. Róhó téé suchí jijnáhan ró, suni téé ri nuū rō, chi cáhīn nīhin ró, te cácañíje ró jnúhun Yaā Dios, te ni cacundeyí ró sīquī jéxeén.

¹⁵ Ma cutóo ni rō sīquī ñayiví, ni táca jéé iyó ini ñayiví. Chi núu ndé ñayuu cutóo ni i sīquī ñayiví, ñayuu ún tu iyó mánī i jín Tátá yō Yaā Dios. ¹⁶ Chi táca jéé cúu cuenta ñayiví, nasūu ndé nuū Tátá yō Yaā Dios vēji, chi cuenta ñayiví cúu. Te yūcuan cúu tāca jéé cájini ni yō jeē cuní modo neé máá yó, jín jéé ndīyo ni yō jeē jito yó núu, jín jéé sandúxí yó máá yó sīquī ndajniñu

névaha yó. ¹⁷ Te cuandihí ñayivi jíin táca jéé ndiyo néé ni yó. Te ñayuu casáha jeé cuní maá Yaā Dios, chi cotecu i ñíí cáni.

Jnūhun ndaā jíin jnúhun stáhú

¹⁸ Róhó jéé cácuu nájnūhun sēhe ri, cáhán rí jíin ró jeé cuandihí quiví. Te je ni cajini jnūhun ró jéé quíji maá téé cuu contra siquí Cristo. Te nde vijna je ni canecoo cuehē tēe jeé cácuu contra siquí Cristo. Te jeé yúcuan jíin yó jeé cuandihí quiví. ¹⁹ Mēhñu maá yó ni quendacoo de, te nasūu jnáhan yó cácuu de. Chi núu jeé jnáhan yó cácuu de, te quendōo de jíin yó nuú. Te ni quenda de cuango de, návaha cuni cají yó jéé násūu jnáhan yó cácuu ndihí de.

²⁰ Te maá ró jijnáhan ró, chi Cristo ni jēhe ya Espiritu Santo, ndeé yá ini anuá rō, te jeé yúcuan cájini rō jnūhun ndaā. ²¹ Núu súcuan te téé ri yāha cuájeé nuū rō, siquí jeé cájini rō jnūhun ndaā, nasūu síquí jeé tu cájini rō. Te cájini rō jeé tú na jnūhun stáhú íyó nuū jnūhun ndaā.

²² ¿Ndé ñn cúu jeé cahán máni jnūhun stáhú? Suu tēe jeé cahán jeé Jesús, tu cúu ndije ya Cristo, Yaā ní tají Yaā Dios. Yúcuan cúu tēe jeé cúu contra siquí Cristo, chi tu jéjnuhún de maá Tátá yó Yaā Dios jíin Séhe ya. ²³ Táca ñayuu jeé tu jéjnuhún i Séhe ya, suni tu íyó maá Tátá jíin i. Te ñayuu jeé jejnuhún i Séhe ya, suni íyó maá Tátá jíin i.

²⁴ Núu súcuan te chuhun vāha ni rō maá jnúhun ni cajini sōho ró ndé jeé xíhna ñúhún. Te núu ñúhún vāha ni rō jnūhun ní cajini sōho ró ndé jeé xíhna ñúhún, yūcuán na te suni ndúú ró jíin maá Tátá yó jíin Séhe ya. ²⁵ Te yāha cúu jnūhun jeé ni jéjnuhún Jesucristo nuū yó: jeé cótecu yó ñíí cáni sáha ya.

²⁶ Jnūhun yāha ní tee ri nuū rō jeé cástūhun rí siquí ñayuu cánducú stáhú róhó. ²⁷ Te maá ró jijnáhan ró, chi ni jēhe Jesucristo Espiritu Santo, ndeé yá ini anuá rō. Te jeé yúcuan tu jíin ñúhún jéé steén ni ñn ñayuu nuū rō ndé vé cúu jendaá, chi maá Espiritu cúu jeé steén ndihí nuū rō, te steén yā jnūhun ndaā, chi tu stáhú cuií yā. Núu súcuan te caca ndúú ró jíin Cristo, nájnūhun stéén Espiritu nuū rō.

²⁸ Séhē jijnáhan ró, vijna te na cáca ndúú ró jíin Cristo, návaha núu na quénda ndijin yā, te ma yūhu yó, ni ma cúcanu yó nuū yā quiví ndíji ya. ²⁹ Chi je cájini rō jeé Yaā ndaā cúu Jesucristo, te suni na jécūhun ni rō jeé táca ñayuu casáha jniñu ndaā, sēhe Yaā Dios cácuu i.

Jnūhun ñayuu cácuu sēhe Yaā Dios

3 Nacā jeé yóhoyó ni cundáhú ni Tatá yó Yaā Dios yohó, chi ni nihín yó jnūhun cuu yó séhe ya, te suu cúu ndije yó. Jeé yúcuan, ñayuu ñayivi tu cájini i jeé cúu yó séhe ya, chi tu jíin i ndese Yaā cúu maá yá. ² Ñání mání, vijna te cúu yó séhe Yaā Dios, te ná tu cuni yó ndese coo yó ñíí cáni. Te je jíin yó jeé quiví quén-

da ndijin Jesucristo, te nduu yó nájnūhun íyó maá yá, chi coto yó núu yā ndese íyó yá. ³ Te táca ñayuu jeé súcuan ñúhún ni i, chi sándoo i ánuá i, nájnūhun íyó ndoo Jesucristo.

⁴ Te ñayuu casáha cuēchi, chi stívi i ley Yaā Dios. Chi núu sáha yó cuéchi, te stívi yó ley yā. ⁵ Te je cájini rō jeé ní quíji Jesucristo ini ñayivi návaha quende yā cuēchi yó. Te maá yá tú na cuēchi ya. ⁶ Te táca ñayuu jeé nduú i jíin yá, tu cájica i jíin cuéchi. Te táca ñayuu cájica jíin cuéchi, tu jíin i ya, ni tu jécūhun ni i ndese Yaā cúu ya. ⁷ Séhē jijnáhan ró, coto ró jéé ma stáhú ni ñn i róhó. Chi na jécūhun ni rō jeé ñayuu casáha jniñu ndaā, maá i cácuu ñayuu ndaā, nájnūhun íyó ndaā maá yá. ⁸ Te ñayuu casáha cuēchi, maá i cácuu sēhe jexeén. Chi jexeén cúu jeé sáha cuēchi vēji nde jeé xíhna ñúhún. Jeé yúcuan ní quíji Séhe Yaā Dios, jeé snáā yā táca jniñu néé sáha jexeén.

⁹ Ni ñn ñayuu jeé cúu sēhe Yaā Dios, tu jíca i jíin cuéchi, chi ni sáha Yaā Dios jeé ní nduu i nájnūhun íyó maá yá. Te ma cúu ga caca i jíin cuéchi, chi sēhe Yaā Dios cácuu i. ¹⁰ Súcuan cuni yó ndé ñn cúu sēhe Yaā Dios jíin séhe jexeén: Táca ñayuu jeé tu sáha jniñu ndaā, jíin jéé tu cundáhú ni jnáhan, nasūu séhe Yaā Dios cúu i.

Jeé na cundáhú ni yó jnáhan yó

¹¹ Yāha cúu jnūhun jeé ní cajini sōho ró ndé jeé xíhna ñúhún: jeé na cundáhú ni yó jnáhan yó. ¹² Te ma sáha yó nájnūhun ni sáha Caín, jeé ní cuu de sēhe jexeén, te ni jehni de ñani de. ¿Te najehē ni jehni de ñani de? Siquí jeé ñani de ni sáha jniñu ndaā te máni jniñu néé ní sáha maá de.

¹³ Hermano jijnáhan ró, ma cunéé ni rō te núu ñayuu ñayivi cáquiti ni i nuū rō. ¹⁴ Te maá yó chi siquí jeé cundáhú ni yó jnáhan yó, súcuan jíin yó jeé jé ni cácu yó jéé cótecu yó ñíí cáni. Te ñayuu jeé tu cundáhú ni jnáhan, íyó i jíin jnúhun jnahnú ndetū i. ¹⁵ Chi táca ñayuu quití ni nuū jnáhan, nájnūhun ñayuu jéjnuhún ndívi cúu i. Te cájini rō jeé ñayuu jéjnuhún ndívi, ma nihín tahu i cotecu i ñíí cáni. ¹⁶ Jeé ni jíhí Cristo jehē yó, yúcuan cúu jeé steén cají ndese cúu jnūhun cundáhú ni. Te maá yó, chi suni súcuan jíin ñúhún cundáhú ni yó jnáhan yó vésú na cúu yó jehē i. ¹⁷ Te núu névaha yó jéé cótecu yó ñayivi, te núu jíin yó jeé cúmaní nuū jnáhan yó, te núu tú cundáhú ni yó i cuāha yó jéé jíin ñúhún i, núu súcuan ¿te á íyó mání yó jíin Yaā Dios, chi naún?

¹⁸ Séhē jijnáhan ró, ma cundáhú ni yó jíin maá jnúhun cáhán-ni yó, chi sa suhva na cundáhú ndije ni yó nde jíin jniñu sáha yó.

Ndese cucáhu ni yó jeé váha sáha yó núu Yaā Dios

¹⁹ Te súcuan cundaā ni yó jeé squícu yó jnúhun ndaā, te cucáhu ni yó jeé váha sáha yó núu yā. ²⁰ Chi núu ánuá yó tú vāha sáha siquí jeé iyó cuéchi yó, te Yaā Dios chi cújehnu ga yā vésú anuá yó, te jíin ndihí ya

tācá un. ²¹ Núu súcuan ñánī mánī, núu vāha sáha ánuá yō sīquī jeē tú na cuēchi yó, yūcuán na te cúcáhu ni yō jeē váha sáha yó núu Yaā Dios. ²² Te tāca jéē cacán yō nuū yā, te sáha ya jeē cahán yō, chi squícu yó jniñu ndácu ya te sáha yó jniñu jeē cúsiñ ni yā. ²³ Te yāha cúu jniñu ndácu ya: jeē na cándije yó jéē ni sáha Sēhe ya Jesucristo jehē yō, jíin jéē na cundáhú ni yō jnáhan yó, nájnūhun ni ndacu ya jniñu nuū yō. ²⁴ Te tāca ñáyuu squícu jniñu ndácu Yaā Dios, ndúú i jíin yá, te ndéé yá ini anuá i. Te jíin máá Espíritu jeē ni jéhe ya jeē ndeé ini anuá yō, jíin yúcuan te jíin yō jeē ndeé Yaā Dios ini yō.

Jnūhun jeē véji nuū Espíritu jíin jnúhun cáhán contra Cristo

4 Ñánī mánī, ma candíje ró tāca tée jéē cácahān de jeē jíin Espíritu Yaā Dios cánacani de jnūhun. Chi sa suhva coto ndee rō de, núu nde nuū Yaā Dios véji jnūhun cácahān de, chí tuú. Chi ini ñayiví je ni canecoo cuehē tēe cánacani jnūhun stáhú, te cácahān de jeē ndé nuū Yaā Dios véji. ² Te súcuan nacuni rō ndé-ni i cúu jeē jíin Espíritu Yaā Dios cahán: tāca ñáyuu jeē cácahān ndaā jeē ní quiiji Jesucristo, ni nduu ya tēe, máá i cúu jeē jíin Espíritu Yaā Dios cácahān. ³ Te tāca ñáyuu jeē tu cájejnúhún jeē súcuan ni nduu ya tēe, máá i chi nasūu jíin Espíritu Yaā Dios cácahān i. Chi sa suhva cácuu i contra sīquī Cristo. Te je ni cajini jnūhun ró jéē quíjicoo ñayuu súcuan, te vijna je cáhiyo i ini ñayiví.

⁴ Séhē jijnáhan ró, máá ró cácuu sēhe Yaā Dios, te je ni cacundeyí ró sīquī tée cástáhú un. Chi jéhu ga cúu poder máá Yaā jeē ndeé ini rō, vésú poder máá jéē ndeé jíin ñáyuu ñayiví jéē castáhú. ⁵ Máá i cácuu cuenta ñayiví, te jeē yúcuan cácahān i jnūhun cuenta ñayiví. Te ñayuu cácuu cuenta ñayiví, cájini nahín i jnūhun ún. ⁶ Te máá yó chi sēhe Yaā Dios cácuu yó. Te ñayuu jeē cájini i ndese Yaā cúu Yaā Dios, máá i cájini nahín i jnūhun cácahān yō. Te ñayuu jeē násūu sēhe Yaā Dios cácuu, máá i tu cájini nahín i jnūhun cácahān yō. Te súcuan nacuni yō ndé-ni cúu jeē cahán jnūhun ndaā jíin ndé-ni cúu jeē cahán jnūhun stáhú.

Máni jnūhun cundáhú ni iyó jíin Yaā Dios

⁷ Ñánī mánī, na cundáhú ni yō jnáhan yó, chi jnūhun cundáhú ni, nde nuū Yaā Dios véji. Te tāca ñáyuu cundáhú ni jnáhan, chi sēhe Yaā Dios cúu i, te jíin i ndese Yaā cúu Yaā Dios. ⁸ Te ñayuu jeē tu cundáhú ni jnáhan, tu jíin i ndese Yaā cúu Yaā Dios, chi máni jnūhun cundáhú ni iyó jíin Yaā Dios. ⁹ Súcuan ni steén Yaā Dios ndese cundáhú ni yā yohó, chi ni tají yá Sēhe ya ni quiiji ini ñayiví yáha, vésú mañúhún-ni ya iyó, návāha cotecu yō ñé cání sáha ya. ¹⁰ Te yāha cúu jnūhun cundáhú ni: nasūu jéē xíhna máá yó ni iyó manī yō jíin Yaā Dios, chi sa suhva máá yá cúu jeē ní cundáhú ni yā yohó. Te ni tají yá Sēhe ya ni quiiji, návāha socō yā máá yá jeē quende yā cuēchi yó.

¹¹ Ñánī mánī, núu súcuan ni cundáhú ni Yaā Dios yohó, te suni súcuan cánuú jeē cundáhú ni yō jnáhan yó. ¹² Ni ñin ñayuu tu ní jíto cuiñi nuū Yaā Dios. Te núu cundáhú ni yō jnáhan yó, te ndeé Yaā Dios ini anuá yō, te je ni ije vāha ni yō jíin jnúhun cundáhú ni. ¹³ Te máá Espíritu Santo jeē ni jéhe ya jeē ndeé ini yō, máá yá steén jeē nduú yó jíin Yaā Dios, te ndeé Yaā Dios ini yō. ¹⁴ Te ni cajito ri te cácastūhun rí jeē máá Tátá yō ni tají yá Sēhe ya ni quiiji návāha jnama ya ñayuu ñayiví. ¹⁵ Te núu ndé ñáyuu jejnúhún i jeē Sēhe Yaā Dios cúu Jesús, te ndúú i jíin Yaā Dios, te Yaā Dios ndeé yá ini i.

¹⁶ Te máá yó, je ni jini yō te ni candíje yó jéē cundáhú ni Yaā Dios yohó. Chi máni jnūhun cundáhú ni iyó jíin Yaā Dios. Te ñayuu cundáhú ni jnáhan, ndúú i jíin Yaā Dios, te ndeé yá ini anuá i. ¹⁷ Te súcuan cúu jeē íje vāha ni yō jíin jnúhun cundáhú ni, návāha ma yūhu yó quiví sándaā yā jniñu yó. Chi nájnūhun cundáhú ni Cristo, suni súcuan cándāa máá yó ini ñayiví yáha. ¹⁸ Te núu manī yō jíin yá, te tu yúhú yó nuū yā. Chi núu ni ije yó jíin jnúhun manī yō jíin yá, te tú na sīquī yuhú yó nuū yā. Chi jnūhun yúhú un cúu jeē yuhú yó ndoho yó castigo. Jeē yúcuan ñayuu cáyūhú chi ná tu ije vāha i jíin jnúhun manī i jíin yá.

¹⁹ Te yóhó chi manī ndasí yó jíin Yaā Dios, chi xíhna gā máá yá ni cundáhú ni yā yohó. ²⁰ Te núu ñin ñayuu cahán i jeē manī i jíin Yaā Dios, te núu quíñi ni i nuū jnáhan i, núu súcuan te ñayuu stahú-ni cúu i. Chi núu ñin ñayuu tu iyó mánī i jíin jnáhan i jeē jíto i nuū, te ni ma cúu coo manī i jíin Yaā Dios jeē tu jíto i nuū yā. ²¹ Chi je ni ndacu ya jniñu yáha nuū yō: Ñayuu jeē manī i jíin Yaā Dios, suni na cóo manī i jíin jnáhan i.

Jeē cundeyí yó sīquī jeneé iyó ini ñayiví

5 Tāca ñáyuu jeē cácahān de jeē Jesús cúu Cristo, Yaā ní tají Yaā Dios, máá i cácuu sēhe Yaā Dios. Te ñayuu manī jíin Yaā cúu Tátá, suni cácuu cundáhú ni i ñayuu cácuu sēhe ya. ² Súcuan jíin yō jeē cundáhú ni yō ñayuu cácuu sēhe ya, núu manī yō jíin yá te squícu yó jniñu ndácu ya. ³ Chi jeē squícu yó jniñu ndácu Yaā Dios cúu jeē manī yō jíin yá. Te jniñu ndácu ya chi tú veyí. ⁴ Chi tāca ñáyuu cúu sēhe Yaā Dios, cundeyí i sīquī jeneé iyó ini ñayiví. Te jeē candíje yó jéē cundáhú ni yā yohó, yūcuu cúu fuerza jeē sáha jeē cundeyí yó. ⁵ Máá-ni ñayuu jeē candíje jeē Jesús cúu Sēhe Yaā Dios, máá i cúu jeē cundeyí sīquī jeneé iyó ini ñayiví.

Jnūhun cáhán ndaā sīquī Sēhe Yaā Dios

⁶ Te jeē ní quiiji Jesucristo ini ñayiví, chi ni jendute ya jíin ndute, te ni jeti ñiñi yā jeē ní jíhí yā jehē yō. Te nasūu máá ñin-ni jeē ní jendute ya jíin ndute, chi suni ni jeti ñiñi yā. Te máá Espíritu Yaā Dios cahán ndaā sīquī yā, chi nuū máá Espíritu véji jnūhun ndaā. ⁷ Chi ini andiví iyó únī jeē cácahān ndaā sīquī jnúhun yáha: máá Yaā cúu Tátá, jíin Yaā cúu Jnūhun, jíin Espíritu Santo. Te ndinúni yá, chi ñin-ni cúu ya. ⁸ Te ini ñayiví suni

íyó únī jeē steén ndaā: máá Espíritu, jíin jéē ní jendute Jesús, jíin jéē ní jeti niñī yā. Te ndinúni yáha, chi inuú-ni stéén siquī yā. ⁹ Te cájetáhú yó jnūhun cáhān ndaā tēe, te jéhnú ga cúu jnūhun cáhān maá Yaā Dios. Te jnūhun ni cahān yā cúu jnūhun siquī Séhe ya. ¹⁰ Ñayuu cácandíje jeē Séhe Yaā Dios cúu Jesús, je ni cacundaā ni i jnūhun yáha jeē ni cáhān Yaā Dios. Te ñayuu jeē tu cácandíje jeē ni cáhān Yaā Dios, nájnūhun cásáha i jeē Yaā stahú cúu ya, chi tu cácandíje i jnūhun ni cahān ndaā yā siquī Séhe ya. ¹¹ Te jnūhun ndaā un cúu jeē ni sáha ya jeē cótecu yō niñ cání, te Séhe ya ndíso jnūhun cotecu yō. ¹² Ñayuu jeē iyó Séhe ya jíin i, je ni nihīn tahú i cotecu i. Te ñayuu jeē tu íyó Séhe ya jíin i, ma nihín tahú i cotecu i.

Jnūhun consejo jeē sándīhí

¹³ Jnūhun yáha tée ri nuū rohó ñayuu cácandíje Séhe Yaā Dios, návāha cucáhnu ni rō jeē ni nihīn tahú rō cotecu rō niñ cání.

¹⁴ Te cúcáhnu ni yō Yaā Dios, chi jíin yō jeē núu na vé jicán yō nuū yā jeē suni cúní maá yá, te jíin nahín yá

jeē jicán yō. ¹⁵ Te núu jíin yō jeē jíin nahín yá jeē jicán yō, núu súcuan te suni jíin yō jeē sáha ya jeē jicán yō.

¹⁶ Núu ññ ñayuu jíin i jeē sáha jnāhan i cuēchi jeē násūu cuēchi jeē jnahnú ndetū i cúu, te na cácan tahú i nuū Yaā Dios, te cuāha ya jnūhun cotecu jnāhan i, te núu násūu cuēchi jeē sáha jeē jnahnú ndetū i cúu. Iyó cuēchi jeē jnahnú ndetū i sáha, te tu cáhān rī jeē cacán tahú rō jehē ñayuu sáha cuēchi súcuan. ¹⁷ Tācá jniñu néé cúu cuēchi, te íyó cuēchi jeē násūu jéē jnahnú ndetū i cúu.

¹⁸ Te jíin yō jeē tāca ñayuu cácuu séhe Yaā Dios, tu jíca i jíin cuēchi. Chi Yaā cúu Séhe Yaā Dios, ndíto vāha ya i. Te tú na vé cúu sáha jexeén jíin i.

¹⁹ Te jíin yō jeē séhe Yaā Dios cácuu yó. Te ñayuu niñ ñáyīvi yīhi i ndaha jexeén.

²⁰ Te suni jíin yō jeē ní quiiji Séhe Yaā Dios, te ni sáha ya jeē jécūhun ni yō, návāha cuni yō ndese Yaā cúu máá Yaā ndaā. Te ndúu yó jíin Yaā ndaā, suu jíin máá Séhe ya Jesucristo. Máá yá cúu ndije Yaā ndaā, te máá yá sáha jeē cótecu yō niñ cání. ²¹ Séhē jijnáhan ró, na cújiyo ró núu tāca jéē násūu Yaā ndaā cúu. Súcuan na cóo. Amén.

2 JUAN

Jnūhun ndaā jíin jnúhun cúndáhú ni

1 Máá ná cúu tēe jéhnú ndíso jníñu, te tēe ná carta yáha cuájeē nuū ni jēē cúu ní hermana ni nacāji Yaā Dios, jíin núū séhe ní jíinánhan i. Te manī na jíin ní jíinánhan ní sáha jnūhun ndaā yā, te nasūu máá-ni ná, chi suni tāca ñáyuu jini jnūhun ndaā. ² Te manī na jíin ní jíinánhan ní síquī jeē cá candíje yó jnúhun ndaā yā jeē iyó ini anuá yō, te coo jíin yó ní cání. ³ Te ñúhun ni na jēē Tatá yō Yaā Dios jíin Séhe ya Jitoho yō Jesucristo, na sáha ga yā jeē váha níhín, te cundáhú ni yā níhín, te sáha ya jeē coo ndeyí coo síni ní, jíin jnúhun ndaā jíin jnúhun cúndáhú ni.

⁴ Yōhyo ni cusíni ní ná, chi ni jini na jēē sava séhe ní cájica i jíin jnúhun ndaā, nájnūhun ni ndacu máá Tatá yō Yaā Dios jniñu nuū yō. ⁵ Hermana, cáhán ndahú ná jíin ní jeē na cúndáhú ni yō jnánhan yó. Te jnūhun tēe ná yáha cuájeē nuū ní, nasūu ñin jniñu jēé sá ndacu ya cúu, chi jniñu ní ndacu ya nuū yō nde ná ni quejéé yó candíje yó cúu. ⁶ Te jeē cundáhú ni yō jnánhan yó cúu jeē caca yó nájnūhun ni ndacu ya jniñu nuū yō. Te jniñu ní ndacu ya cúu jeē caca ní jíin jnúhun cúndáhú ni, nájnūhun ni cajini sōho ní nde ná ni quejéé ní candíje ní.

Siquī tēe cástáhú

⁷ Chi cuehē tēe cástáhú ni canecoo de níñi ñáyiví, te tu cájejnúhún de jeē ní quiiji Jesucristo ni nduu ya tēe. Te tēe tu cájejnúhún súcuan, cácuu de tēe stáhú, te cácuu de contra síquī Cristo. ⁸ Coto ní jēē ma snáa ni táhú síquī jniñu váha ni casáha ní, chi sa suhva jeē na níhín ni ndíhi tahū ní.

⁹ Núu ndé ñáyuu jniñi ñnga jnūhun, te tu quéndōo i jíin jnúhun ni steén Cristo, núu súcuan te tu iyó Yaā Dios jíin i. Te ñáyuu quéndōo jíin jnúhun ni steén Cristo, chi iyó Tatá yō jíin i, te suni iyó Séhe ya jíin i. ¹⁰ Te núu jinū ñin ñáyuu vehe ní, te núu tu quíjnánhan jnūhun steén i jíin jnúhun yáha, te ma cuáha ní jnúhun condee i vehe ní, ni ma cahán ni jnúhun ndeyí ní jíin i. ¹¹ Chi ñáyuu cahán jnūhun ndeyí ní jíin i, chíndéé ñájnánhan jíin i síquī jniñu néé casáha i.

Jnūhun sandíhí

¹² Iyó cuehē gā jnūhun cahán na jíin ní jíinánhan ní, te tu cúní na tee ná núu tútu jíin tinta. Chi ñúhun ni na cuájeē ná coto jnánhan yó, te ndajnūhun yó, návāha cusíni ndasí ni yō.

¹³ Tāca séhe cuhū ní, ñahan jeē suni ni nacāji ya, cácahán i jeē sá ndeyí ní ní. Súcuan na cóo. Amén.

3 JUAN

Jeē jejnúhún de tēe nání Gayo

1 Máá rí cúu tēe jéhnú ndíso jníñu, te tēe ri carta yáha cuájeē nuū rō, amigo Gayo, chi manī rī jíin ró sáha jnūhun ndaā.

² Nánī mánī, jícan tahu rī jeē vāha na quíhín tācá jniñu sáha ró, jíin jeē na cóo vāha ró, nájñuhun íyó vāha ánuá rō jíin jnúhun ya. ³ Yōhyo ni cusīñ ni rī ná ni quecoo sava hermano te ni cacastūhún de nuū rī ndese vāha squícu ró tāca jniñu ndaā, chi jíca ndaā rō. ⁴ Tuá na inga sáha jeē cúsiñ gā ni rī, chi mánī jeē nihín rī jnūhun jeē cájica ndaā ñayuu cácuu nájñuhun sēhe ri siquī jeē ni scándíje ri i.

⁵ Nánī mánī, yōhyo vāha sáha ró jeē chindéé ñáhán ró tācá hermano, te víhyá gā núu tēe ñuu jíca cácuu de. ⁶ Chi tēe un ní canacani de jnūhun nuū ñayuu cá-candíje yāhá, ndese cúndáhú ni rō de. Te jícan rī jeē chindéé ñáhán gá rō de, núu na vé jíni ñúhún de jeē caca ga de ichi nuū quíhín de, nájñuhun nújnahan ni Yaā Dios. ⁷ Chi tēe un ní quendacoo de cájica de siquī jniñu Jesucristo. Te tú na vé cáquihin de nuū ñayuu jeē tu jíni jnūhun Yaā Dios. ⁸ Jeē yúcuan cánuú coto yó de, chindéé ñáhán yó de jeē cánacani de jnūhun ndaā.

Siquī jeē tú vāha sáha Diótfefes

⁹ Je ni tee ri ñn carta nuū ñayuu cá-candíje jíñā. Te Diótfefes, tu jétáhú de jnūhun cáhán rī, siquī jeē cuní

de cujéhnú máá de nuū i. ¹⁰ Jeē yúcuan, núu na jéé rī te cahān rī nuū de siquī jniñu sáha de, chi yōhyo sájñuhún de te cáhán de jnūhun stáhú síquī rī jíjnahan rī. Te nasūu máá yúcuan-ni sáha de, chi suni tu jétáhú de tācá hermano jéngoo nuū de, te jési de jeē ma cuátáhú ñayuu nuū tācá hermano un. Te ñayuu cá-jetáhú nuū hermano un, quénehen de i nuū cándutútú ñayuu cá-candíje.

¹¹ Nánī mánī, ma ndácu ró ñayuu casáha jniñu néé, chi sa suhva ñayuu casáha jniñu vāha. Chi sēhe Yaā Dios cácuu ñayuu casáha jniñu vāha. Te ñayuu casáha jniñu néé, tu cájini i ndese Yaā cúu Yaā Dios.

Jeē cácahān i jeē vāha sáha Demetrio

¹² Tāca ñayuu chi cácahān i jeē vāha sáha Demetrio. Te jniñu ndaā jeē sáha de, stéén jeē tēe ndaā cúu de. Te suni súcuan cácahān maá rí, te cájini rō jeē iyó ndáā jnūhun cáhán rī.

Jnūhun sandíñí

¹³ Iyó cuéhē gā jnūhun cahān rī jíin ró, te tu cúní rī tee ri jíin tinta jíin pluma. ¹⁴ Chi ñúhún ni rī cuajeē yachī rī coto jnahan yó, te ndajnūhun yó.

¹⁵ Te ñúhún ni rī jeē na cóo ndeyí coo siñ ni rō. Tācá amigo yō yāha cácahān i jeē sándeyí ni rō. Te suni cahān rō jíin ñn ñn amigo jíñā jeē sándeyí ni i, áchí rí, te cocahān yō.

JUDAS

1 Máá rí cúu Judas ñani Jacobo, te mozo Jesucristo cúu ri. Te tée ri carta yáha cuájeē nuū rohó ñáyuu jeē ní cana máá Tátá yō Yaā Dios, te ni sáha ya jeē iyó ndoo íyó íi rō nuū yā jeē cácuu ró ñáyuu manī yā jíin. Te Jesucristo ndíto vāha ya rohó jéē cáyihī ró ndaha ya. ² Te ñúhun ni rī jeē na cúndáhú gá ni yā rohó, te sáha ya jeē coo ndeyí coo siñ ni rō, te coo manī ndasí yá jíin ró, te na ndúcuehē gā tāca jéē yáha núū rō.

Siquī tēe cástéén jnūhun stáhú (2 Pedro 2.1-17)

³ Ñánī manī, yōhoyo ní cuu ni rī tee ri nuū rō siquī jnúhun ni jnama ya rohó jíin rúhū jijnáhan yó. Te ni jini rī jeē cánúú gá tee ri carta jeē stíhvī ni rī rohó návāha nducú ndeyí ró jeē ma cási ñáyuu nuū jnúhun cácandíje yó. Te jnūhun ún chi je ni jēhe ya ñin jíinu-ni nuū tāca ñáyuu maá yá. ⁴ Chi sava tēe ni castáhú de rōhó ní quívicoo de mēhñu ró. Te tēe ún chi nde jenahán je cáhán tutu íi jeē jnahnú ndetū de siquī jniñu casáha de. Cácuu de tēe ndevāha, chi cácahān de jeē vāha ni Yaā Dios, te jeē yúcuan vetū-ni sáha de jniñu néé, cácahān de. Te tu cájejnúhún ndije de Jitoho yō Jesucristo jíin Yaā Dios, jeē mañúhún-ni ya cujéhnu nuū yō.

⁵ Te vijna chi vēsú je cájini vāha ró, te cúní rī jeē na núcūhun ni rō ndese ni sáha máá Jítoho yō. Chi ni jnama ya ñáyuu Israel jenahán, ni chindéé ñájánhan ya i jeē ní jinu i ini ñuu tatú Egipto cuahān i. Te vēsú súcuan te cuéé gá te ni snāā yā sava i jeē tu ní cácandíje i. ⁶ Te suni nucūhun ni rō siquī ndajéhé yā jeē ní castóo jniñu ndíso, te ni castóo nuū ní ndeē andiví. Te Yaā Dios ni chindihyū yā jijnáhan, te cándetu nde quiji quiví cáhnu jeē sándaā yā jniñu. Te cánuhnī jíin cadena, cáyūcu ñíí cáni nuū cunú núū néé. ⁷ Te suni ní stóho ya ñáyuu ñuu Sodoma jíin ñuu Gomorra jíin sava ga ñuu jeē ní iyo yajni, chi suni ni casáha néé i nájnūhun ni casáha tācá ndajéhé un ndé jenahán gá. Te máá i ni cajica jnéni i te ni casáha i tāca cuéchi néé ndasí. Te ni canihīn i castigo ñuhūn jeē cayú ñíí cáni, te súcuan cúu i ñin ejemplo nuū ndíhi ñáyuu.

⁸ Te tēe cástáhú jeē ní quívicoo mēhñu ró, vēsú cájini de jeē súcuan ni sáha ya, te cájeni cāhá ni de, te casáha jnéhén de yiquí cúñu de, te cásquéhichī ni de tēe cándacu jniñu Jitoho yō, te cácahān ndevāha de siquī tāca jéē cácujeñnu nuū sucún. ⁹ Te nasūu súcuan ní sáha ndajéhé Miguel, vēsú ndajéhé cujéhnu ga cúu ya. Chi tu ní cáhán ndevāha ya ni tu ní ndácunehen ya cuéchi siquī jexeén ná ni casásáhán jnāhan ya jíin jéx-

eén un jeē siquí yiquí cúñu Moisés ná ni jihī de. Chi suhva-ni ni cahān yā: Máá Yaā Dios, Yaā cúu Jitoho, cuxeēn yā nuū rō, ni achi Miguel. ¹⁰ Te tēe cástáhú yáha chi cácahān neé de siquī tāca jéē tu cájecūhun ni de. Te tāca modo cánevāha de siquī jeē sá cáa de, nájnūhun quiñi yúcú jéē sá cáa ti, suu yúcuan sáha jeē jnahnú ndetū de.

¹¹ Nacā xeēn ndoho de núu súcuan, chi tu cájetáhú de Yaā Dios, nájnūhun jeē tu ní jétáhú Caín. Te siquī jeē cácuu de nihīn de xūhún te cástéén de jnūhun stáhú, nájnūhun ni sáha Balaam. Te jnahnú ndetū de nájnūhun Coré, tēe ni jihī siquī jeē ní cunīhni ni de.

¹² Tēe yáha núu cándutútú de jíin ró jeē cáyeji manī rō, te casáha de jniñu cúcanu rō. Chi cáyeji cájini siñ ni de, te tu casáha de cuenta ndese caji inga ñáyuu, chi máni máá de ndíhvī ni de caji vāha de. Te cácuu de nájnūhun vicō íchi jéē stechí táchī. Te suni cácuu de nájnūhun yujnu jeē tu jéhe ndehē maá tiempo. Te cácuu de nájnūhun yujnu jeē ní quenda nde jíin yoho, te tú cuiñi gā na modo nane numa. ¹³ Te nájnūhun jeē jisó cóyo ndute mar te cáne tiñū, súcuan jícu de jíin jniñu néé jéē cúu jnūhun canu. Te cácuu de nájnūhun quiñi jeē ní sana ichi. Te je iyó túhva nuū néé nuū lúchi jnúú coyúcú de ñíí cáni.

¹⁴ Te jeē ní yāha iñū yucūn Adán, te ni cacu Enoc, te ni nacani de jnūhun jeē ni stéén Yaā Dios nuū de siquī tāca tēe yáha, áchí de: Máá Jítoho yō ni steén yā nuū rī jeē ñin quiví te quiji ya jíin cuéhē mil ñáyuu maá yá.

¹⁵ Te sándaā yā jniñu tāca ñáyuu, te snáhnú ndetū yā tāca ñáyuu casáha néé. Chi máni jniñu néé casáha i siquī jeē canéé máá i, te cácahān i cuehē jnūhun ndevāha siquī yā. Ni achi Enoc. ¹⁶ Tāca tēe yáha máni cácahān sōo de, te cácahān de siquī ñáyuu. Te máni jeē cúsiñ ni máá de cánducú de. Te cácahān de jeē tēe téyí cácuu de, te cácahān yíñúhún de jíin ñáyuu návāha nihīn de jecu nuū i.

Jeē stíhvī ni Judas ñáyuu cácandíje

¹⁷ Te máá ró jijnáhan ró ñánī manī, na núcūhun ni rō jnūhun jeē jé ni canacani tēe cácuu apóstol máá Jítoho yō Jesucristo. ¹⁸ Chi ni cacahān de: Nde nuū cuándihī quiví te quiñicoo tēe sácatā siquī jnúhun ndaā yā, te sáha de tācá jniñu néé jéē ndíyo ni maá de. Súcuan ni cacastūhún apóstol. ¹⁹ Tēe un cúu jeē casásíin ñáyuu. Te máni cándihvī ni de tāca jéē cutíndí ni maá de, chi tu ndeé Espiritu yā jíin de.

²⁰ Te máá ró ñánī mánī, na íje vāha ni rō jíín jnúhun ndoo ndasí jéē cáandíje ró. Te cacān tahu rō jíín fuerza Espíritu Santo. ²¹ Te quendōo nīhin ró jíín jnúhun jeē cundáhú ni Yaā Dios rohó. Te condetu ró quívī jeē cótecu rō ñí cāni sáha máá Jítóho yō Jesucristo siquī jeē cundáhú ni yā rohó.

²² Te sava ñayuu jeē cájeni siquí ni, nducú ró modo scandíje ró i. ²³ Te sava ga i chi nducú ndéyí ró jeē cácu i nuū cuéchi i, jeē nájnūhun stáa ró i nuū ñuhún. Te cundáhú ni rō i jnama ró i, te coto ró máá ró, te cuqui ni ni rō coto ró nde sahma i jeē ní cujnehén jíín jniñu néé cásáha i.

Jnúhun cújéhnú Yaā Dios ñí cāni

²⁴ Te Yaā Dios chi máñúhún-ni máá yá cúu Yaā ndichí, Yaā jnáma yóhó. Te íyó poder yā jeē coto ya rohó jéē ma quívī ró cuéchi, jíín jéē sáha ya jeē cuíñi ró núū ndíndēe yá, te quívī ún coo ndoo ró núū yā, te cusíñ ndasí ni rō sáha ya. ²⁵ Te na cáhán yō jeē yóhyo luu cújéhnú ya siquī jeē ni sáha ya jíín Jítóho yō Jesucristo. Te na cáhán yō jeē cujéhnú téyí yá, te ndácu ya jniñu jíín poder jeē ndíso ya nde jenahán ndasí jíín ndé vijna jíín ndé ñí cāni. Súcuan na cóo. Amén.

APOCALIPSIS

Jeë ni stéén Jesucristo tãcá jniñu quiji

1 Jnūhun yáha cúu jeë ní cachi Yaā Dios nuū Jesucristo ndese coo tãcá jniñu quiji, návāha nacastūhun yá nuū ñáyuu cávandíje jeë cácuu i mozo yā. Te stéén yā nuū i tãcá jniñu jeë yachī coo. Te ni tají yá ndajéhé yā ni quiji ya ni steén ndijin yā jniñu un núu ruhū Juan jeë cúu ri mozo yā. ² Te máá rí cástūhun ndáā rī siquī tãca jéē ní jito ri ún, te nácani ndaā rī jnūhun Yaā Dios jíin jnúhun jeë ní cahān ndaā Jesucristo.

³ Yōhyo ndetū ñayuu cahu tutu yáha, te suni yōhyo ndetū ñayuu cuni nahín jeë cáhu ñayuu tãca jnúhun yáha jeë ní cachi Yaā Dios, te chuhun ni i. Chi je cuacuyajni quivī coo tãcá jniñu yósó núu tútu yáha.

Jeë téé Juan carta nuū ndihúxá grupo ñayuu cávandíje

⁴ Máá rí cúu Juan, te téé ri jnūhun yáha cuájeë nuū rohó, ndihúxá grupo ñayuu cávandíje jeë cáyūcu Asia. Te ñúhun ni rī jeë máá Yaā Dios na sáha ga yā jeë váha rōhó jíjnáhan ró, te sáha ya jeë coo ndeyí coo siī ni rō. Chi máá yá cúu Yaā iyó vijna, te ni ŷyo ya ñí cáni, te coo ya ñí cáni. Te ñúhun ni rī jeë suni súcuan sáha ndihúxá Espíritu jeë cáhīin ya yuhu mesa nuū ndácu Yaā Dios jniñu. ⁵ Te ñúhun ni rī jeë suni súcuan sáha Jesucristo, Yaā cahán ndaā tãca jnúhun. Te xīhna gā máá yá ni natecu mēhñu ndíyī. Te cújéhu ya nuū tãca rey jeë iyó ñayiví. Te máá yá cúndáhú ni yā yohó, te ni nacate ya yohó núu cuéchi yó jíin níñī yā. ⁶ Te ni sáha ya jeë ní nduu yó rey jíin sūtū cácejniñu nuū Tatá yā Yaā Dios. Te na cáhán yō jeë yóhyo luu cújéhu ya te jñí ya poder ñí cáni. Amén.

⁷ Cuni sōho jíjnáhan ró, chi ndiji Cristo jíin vícō. Te ndivii ñayuu coto i nuū yā, te nde jíin ñayuu jeë ní castújí i ya. Te tãca raza ñayuu ñí cáhnu ñayiví ndahyū i jeë tu ní cávandíje i ya. Súcuan nahín coo.

⁸ Suhva cáhán máá Jítoho yō, Yaā jñí ndihí poder: Máá rí cúu nájnūhun letra A xīhna ñúhún jíin letra Z jeë sándīhí na, chi máá rí ni squejéé ndihí te máá rí sínu, áchí máá Yaā iyó vijna, te ni ŷyo ya ñí cáni, te coo ya ñí cáni.

Jeë ní jito Juan jeë cújéhu luu Cristo

⁹ Máá rí cúu hermano rō Juan jíjnáhan ró. Te ñuú-ni ndóho ri jnūndóho jíin ró siquī jeë cávandíje yó Jesucristo, te ñuú-ni ndácu Yaā Dios jniñu nuū yō, te

ñuú-ni jéndeyí ni yō sáha Jesucristo. Te siquī jeë ní nacani ri jnūhun Yaā Dios jíin jéē ní cachi ndaā rī jnūhun Jesucristo, jeë yúcuán ní cajñí i ruhū cuenta preso, te ni cachune i ruhū isla jeë naní Patmos. ¹⁰ Te ñn domingo ni jito ndijin rī jeë ni stéén maá Espíritu Santo nuū rī. Te ni jini sōho ri ñn jeë cána jee ñhīn ichi yátá rī nájnūhun jeë tívī trompeta. ¹¹ Te ni cahān jíin rí:

Máá rí cúu nájnūhun letra A xīhna ñúhún jíin letra Z jeë sándīhí na, chi máá rí cúu Yaā iyó ndé xīhna ñúhún te coo ri ñí cáni. Te na téé ró núu ñn tutu tãca jéē cóto ró, te tají ró quihīn nuū ndihúxá grupo ñayuu cávandíje jeë cáyūcu i ñí cáhnu Asia, suu ini ñuu Efeso, jíin ñuu Esmirna, Pérgamo, Tiatira, Sardis, Filadelfia, jíin Laodicea. Achí.

¹² Yúcuán na te ni ndicó cóto ri jeë cóto ri ndé ñn cúu jeë cahán jíin rí. Te ná ni ndicó cóto ri te ni jito ri uxā candelero oro. ¹³ Te mēhñú ndihúxá candelero un índichi máá Yaā ní nduu téé. Te ñúhun ya ñn sahna cáni jeë jinú nde nuū jehé yā. Te núhí ñn cinturón oro jicā yā. ¹⁴ Te ixi xíní yā chi yaa nájnūhun ixi lánchi, nájnūhun yuhvā volcán. Te tinūu ya ndíndēe nájnūhun yáñuhūn. ¹⁵ Te jehé yā xíñú jito nájnūhun cāa cuaán jéē ni ndúhvā nuū horno. Te ñhīn ndasí cáhán yā, nájnūhun ñhīn cuehē yūte náhnu. ¹⁶ Te ndaváha ya jñí ya uxā quīmī. Te yuhu ya quénda jeë cáa nájnūhun espada jeë xeén ndíndúú lado, te suu cúu jnūhun ya jeë niní sándaā yā siquī cuéchi. Te nuū yā cáa nájnūhun niāndii jeë nándii ndaxín.

¹⁷ Te ná ni jito ri yā te ni cotúú rí nuū jéhé yā nájnūhun jeë ni jíhī rī. Te ni soó yá ndaváha ya siquī rī, te ni cahān yā:

Ma yūhu ró. Máá rí cúu Yaā iyó ndé xīhna ñúhún te coo ri ñí cáni. ¹⁸ Te Yaā técu cúu ri. Chi ni jihī rī te ni natecu rī, te vijna chi técu rī ñí cáni. Te máá rí jñí poder siquī cuéhyī jéhni ñayuu jíin síquī lugar nuū cáyūcu ánuá ndíyī. ¹⁹ Núu súcuan te tee ró núu tútu tãca jéē ní jito ró, jeë cúu vijna jíin jéē cóo ichi núu. ²⁰ Te yáha cúu jnūhun sáhi síquī ndihúxá quīmī ni jito ró jñí ndaváha ri, jíin síquī ndihúxá candelero oro. Ndihúxá quīmī ún cúu nájnūhun ndihúxá jeë cácujeñu nuū ndihúxá grupo ñayuu cávandíje. Te ndihúxá candelero cúu nájnūhun ndihúxá grupo ñayuu cávandíje.

Jnūhun cuahān nuū ndihúxá grupo ñayuu cacandíje:

Jnūhun cuahān ñuu Efeso

2 'Tee ró jnúhun yáha na quíhín nuū jeē cujéhu nuū ñayuu cacandíje ñuu Efeso: Súcuan cáhán ruhū, Yaā jeē jñí ndihúxá quími jíin ndaváha ri, te jíca cuu ri mēhñú ndihúxá candelero oro. ² Je jíin rī tācá jniñu váha cásáha ró, jeē cándihvī ni rō siquī jnúhun ri, jíin jéē cájendeyí ni rō. Te jíin rī jeē tu cájehe ró jnúhun quívicoo ñayuu casáha néé méhñu ró. Te jíin rī jeē ní cajito ndee rō tēe cástáhú jeē cácahān de jeē cúu de apóstol, te ni cajini rō jeē tēe stáhú cácuu de. ³ Te ni cajendeyí ni rō ni candoho ró jnúndóho, te tu ní ndínuu ni rō jeē cácuu ndasí ró jíin jniñu ri. ⁴ Te vēsú súcuan te íyó jecu jeē cahán rī nuū rō, chi tuá cáhīyo manī váha ró jíin rí nájñuhun ni iyo manī rō jíin rí quivī jehé. ⁵ Núu súcuan te nucūhun ni rō ndese ni castóo ró jnúhun jeē ní iyo manī rō jíin rí, te nacani ni rō, te na sáha ró nájñuhun ni casáha ró ndé quivī ún. Te núu ma nácani ni rō, te yachī jeē rī te stáa ri candelero rō nuū íin, cúu jeē ma cuíñi ga rō jíin ñayuu cacandíje. ⁶ Te vēsú súcuan te íyó ñin jeē váha cásáha ró, chi tu cánujnahān cuiñi ni rō cájito ró jniñu néé cásáha ñayuu cándiquīn jnúhun jeē steén Nicolás. Te suni máá rí tu nújnahān cuiñi ni rī jíto ri. ⁷ Ñayuu iyó sóho na chúsóhó i jeē cahán maá Espíritu Santo jíin táca grupo ñayuu cacandíje. Táca ñayuu jeē cúndeyí síquī jeneé, cuāha ri jnúhun caji i ndehē jeē cúun xinī yújnu jeē sáha jeē cótecu i ñíí cáni. Te yujnu un íin nuū jardín Yaā Dios nde andiví, áchí yá.

Jnūhun cuahān ñuu Esmirna

⁸ 'Te tee ró jnúhun yáha na quíhín nuū jeē cujéhu nuū ñayuu cacandíje ñuu Esmirna: Súcuan cáhán ruhū, Yaā jeē iyó ndé xīhna ñúhún te coo ri ñíí cáni, te ni jihī rī te ni natecu rī. ⁹ Je jíin rī tācá jniñu váha cásáha ró, jíin jnúndóho cándoho ró, jíin jéē cándoho ndáhú ró. Te vēsú súcuan te cúcá ró ndihī jeē ndíso jnúhun ri. Te jíin rī jeē cácahān néé ñayuu siquī rō jijnáhan ró. Ñayuu un cácahān i jeē ñayuu hebreo, ñayuu maá Yaā Dios cácuu i, te tuú chi cástáhú-ni i, chi sa ñayuu yíhi ndaha Satanás cácuu i. ¹⁰ Te ma yúhú cuiñi rō tāca jéē ndoho ró. Chi jexeén je yajni sáha jeē quívicoo sava ró vecāa jeē cóto ndee rohó jíináhan ró, te ndoho ró jnúndóho uxī quivī. Te na cuiñi ñihin ró ndé cuu rō, te cuāha ri premio jeē cótecu rō ñíí cáni. ¹¹ Ñayuu iyó sóho na chúsóhó i jeē cahán maá Espíritu Santo jíin táca grupo ñayuu cacandíje. Táca ñayuu jeē cúndeyí síquī jeneé, ma nihín i jnúndóho jeē jnahnú ndetū i cuu i vuelta uū, achí yá.

Jnūhun cuahān ñuu Pérgamo

¹² 'Te tee ró jnúhun yáha na quíhín nuū jeē cujéhu nuū ñayuu cacandíje ñuu Pérgamo: Súcuan cáhán

ruhū, Yaā jeē névāha espada jeē xeén ndíndúú lado, te suu cúu jnúhun ri jeē sándaā rī siquī cuéchi. ¹³ Je jíin rī tācá jniñu váha cásáha ró, te jíin rī jeē cáyūcu ró mēhñu ñayuu jeē ndácu Satanás jniñu nuū. Te vēsú súcuan te cáhīin ñihin ró jíin jnúhun ri, te tu ní cá-nayūhu ró jeē cacandíje ró rúhū, ni quivī ni jíhī Antipas, tēe ni squícu váha ni nacani ndaā jnúhun ri. Chi ñuu rō cáyūcu ñayuu cájejniñu nuū Satanás, te ni cajehni i Antipas. ¹⁴ Te vēsú súcuan te íyó jecu jeē cahán rī nuū rō jijnáhan ró. Chi mēhñu rōhó ñayuu ñuu Pérgamo iyó sava ñayuu cándiquīn jnúhun ni steén Balaam. Chi tēe un ní steén de nuū Balac ndese squívi de ñayuu Israel cuéchi jeē cáji i jeē ní sócō nuū ídolo jíin jéē cosíquí ndéē jnáhan i. ¹⁵ Te suni íyó sava ñayuu mēhñu ró jeē cacandíje ga i jnúhun ni steén Nicolás, te jnúhun ún chi tu nújnahān cuiñi ni rī. ¹⁶ Núu súcuan te nacani ni rō siquī cuéchi ró. Chi núu tuú te yachī jeē rī jíin espada jeē quénda yuhu ri, te suu cúu jnúhun ri jeē sándaā rī siquī cuéchi. Te jíin yúcuan te stóho ri ñayuu jeē candíje ga jnúhun néé un. ¹⁷ Ñayuu iyó sóho na chúsóhó i jnúhun jeē cahán maá Espíritu Santo jíin táca grupo ñayuu cacandíje. Táca ñayuu jeē cúndeyí síquī jeneé, scáji rī i maná jeē yísahí ichi ándiví. Te suni cuāha ri ñin yuū cuijín núu i, te nuū ún condee ñin síhví jéé, te ni ñin ñayuu ma cúni síhví un, chi máá-ni i jeē nihín. Achí yá.

Jnūhun cuahān ñuu Tiatira

¹⁸ 'Te tee ró jnúhun yáha na quíhín nuū jeē cujéhu nuū ñayuu cacandíje ñuu Tiatira: Súcuan cáhán ruhū, maá Séhe Yaā Dios jeē ndíndēe tñūu rí nájñuhun yáñuhūn. Te jehē rī xíñú jíto nájñuhun cāa cuaán jéē ni ndúhvā. ¹⁹ Je jíin rī tācá jniñu váha cásáha ró, chi cá-cundáhú ni rō jnáhan ró, te cacandíje ñihin ró rúhū, te cájejniñu ró núu rī, te cájendeyí ni rō. Te jíin rī jeē vihyá gā cásáha ró vijna vēsú nde quivī jehé. ²⁰ Te vēsú súcuan te íyó jecu jeē cahán rī nuū rō. Chi íyó ñin ñahan mēhñu ró jéē naní Jezabel, te cájehe ró jnúhun stéén ña nuū rō. Te áchí ña jeē nácani ña jnúhun Yaā Dios. Te tuú chi jíin jnúhun stéén ña te stáhú ña ñayuu cacandíje jeē cácuu i mozo rī. Te sáha ña jeē casíquí ndéē jnáhan i, jíin jéē cáyeji i jeē ní sócō nuū ídolo. ²¹ Te ni jēhe ri tiempo jeē na nácani ni ña, te tu cúni ña nacani ni ña stóo ña jeē casíquí ndéē ña. ²² Núu súcuan te na sáha ri jeē jécāva ña jíin cuéhyī. Te táca ñayuu casíquí ndéē jíin ña, suni cuāha ri jnúndóho xeén nuū i, te núu ma nácani ni i stóo i jniñu néé nájñuhun sáha ña. ²³ Te sáha ri jeē cúu ñayuu jeē ní scándíje ña. Te súcuan cuni táca grupo ñayuu cacandíje jeē máá rí cúu Yaā jíin ndihī ndese cáca jeē níjnūnī jíin ánuá ñayuu. Te cuāha ri yāhu ñin ñin ró núu ndese ni casáha ró. ²⁴ Te sava ga rō jeē cáyūcú ñuu Tiatira, jeē tu ní cájetáhú jnúhun stéén ñahan ún, ni tu ní cájniñó jnúhun jeē cácahān i jeē jnúhun sáhi gá Satanás cúu, jíin máá ró cahán rī jeē ma tēe ga rī inga jniñu siquī rō.

²⁵ Chi máá-ni jeē na quéndōo nīhin ró jíin jnúhun ndaā cácanđíje ró, te quendōo nīhin ró jíin ndé quivī ndíji ri. ²⁶ Tāca ñáyuu jeē cúnđeyí síquī jeneé, jíin jéē squícu vāha jniñu cúní rī nde vijna te nde quivī sándīhí, sáha ri jeē cujéhnū i ndacu i jniñu nuū tācá nación, ²⁷ nájñūhun ni sáha Tátá rī jeē cujéhnū ri ndácu ri jniñu. Te ndacu nīhin i jniñu nuū tācá nación. Te nájñūhun cúun yúú i quīsī tahú, súcuan squéhichī i ñáyuu tu cájendētū nuū rī. ²⁸ Te sáha ri jeē coto i ruhū jeē luu cujéhnū ri quenda ndíjin rī, nájñūhun jíto i lucero jeē cáne cúnđíjin. ²⁹ Ñáyuu iyó sóho na chúsóhó i jñūhun jeē cahán maá Espíritu Santo jíin táca grupo ñáyuu cácanđíje. Achí yá.

Jñūhun cuahān ñuu Sardis

3 'Te tee ró jnúhun yáha na quíhín nuū jeē cujéhnū nuū ñáyuu cácanđíje ñuu Sardis: Súcuan cáhán ruhū, maá Yaā jeē névāha ndíhúxá Espíritu Yaā Dios jíin ndíhúxá quīmī. Je jíin rī tācá jniñu cásáha ró, te cácanhān ñáyuu jeē cátecu rō, te nuū rī chi nájñūhun ndíyī cácuu ró. ² Na nátañū ni rō, te ndejéé nīhin ró jíin jniñu jeē jecu na iyó te ndúcú naa. Chi je jíin rī jeē tu squícu vāha vāha ró núu Yaā Dios. ³ Te na núcūhun ni rō tāca jnúhun jeē ní castéén nuū rō. Te cuatáhú ró jnúhun ún te nacani ni rō síquī cuéchi ró. Chi núu tú natañū ni rō, te cuajeē rī nuū rō ñn sanaa-ni nájñūhun jeē ñn sanaa-ni te quíji ñacuīhná, te ma cúni rō na hora jinū rī nuū rō. ⁴ Te vēsú súcuan te iyó nahín jecu rō ñuu Sardis jeē tu ní cásáha ró cuéchi, jeē cúu nájñūhun jeē tu ní sájnehén ró sahma ró. Jeē yúcuan cuíjín yaa coo sahma ró caca ró jíin rí, chi ñáyuu vāha cácuu ró. ⁵ Chi tāca ñáyuu jeē cúnđeyí síquī jeneé, cuāha ri sahma cuíjín yaa cuhun i. Te ma ndáhva rī síhvī i nuū libro jeē yosó síhvī ñáyuu cotecu ñí cáni. Te cuajnúhún rí i nuū Tátá rī jíin núu tācá ndajéhé yā. ⁶ Ñáyuu iyó sóho na chúsóhó i jñūhun jeē cahán maá Espíritu Santo jíin táca grupo ñáyuu cácanđíje. Achí yá.

Jñūhun cuahān ñuu Filadelfia

⁷ Te tee ró jnúhun yáha na quíhín nuū jeē cujéhnū nuū ñáyuu cácanđíje ñuu Filadelfia: Súcuan cáhán ruhū, Yaā ndoo Yaā ndaā, te névāha ri ndacáa rey David. Te máá rí nune jeē quívī ñáyuu nuū ndácu ri jniñu, te ni ñn ma cúu casí, te máá rí jésí, te ni ñn ma cúu nune. ⁸ Je jíin rī tācá jniñu vāha cásáha ró. Te ni nune ri nájñūhun ñn yéhyí quívicoo ró, te ni ñn ma cúu casí. Chi vēsú jecu-ni fuerza rō iyó, te ni cacandíje ró jnúhun ri, te tu cájesi rō yuhu ró jéē cácanđíje ró rúhū. ⁹ Te iyó sava ñáyuu yíhī ndaha Satanás, te cácanhān i jeē ñáyuu hebreo, jíin ñáyuu maá Yaā Dios cácuu i, te tuú chi cástáhú-ni i. Núu súcuan te sáha ri jeē jécōo i nuū rō te jecuīñī yití i nuū rō, te cuni i jeē maní rī jíin rō. ¹⁰ Te vāha ni casquícu ró jnúhun ní cahān rī jeē cuáñđeyí ni rō. Te jeē yúcuan jnama ri rohó quívī jeē quíji ñn jñūndóho xeēn síquī ñáyuu ñí cáhnu ñáyiví,

jeē coto ndee ún i jíināhan i. ¹¹ Te yachī ndíji ri. Núu súcuan te quendōo nīhin ró jíin jnúhun cácanđíje ró, návāha ni ñn ma quénde premio rō. ¹² Tāca ñáyuu jeē cúnđeyí síquī jeneé, sáha ri jeē cuu i nájñūhun síhīn yuū luu ini templo Yaā Dios maá rí. Te ma cújiyo i nuū ndeé yá un. Te tee ri síhvī Yaā Dios maá rí jneé i, jíin síhvī jéé máá rí, jíin síhvī ñuu Yaā Dios maá rí. Te ñuu un cúu Jerusalén jeé, te cuun quíji ichi áñdiví ndé nuū Yaā Dios maá rí. ¹³ Ñáyuu iyó sóho na chúsóhó i jñūhun jeē cahán maá Espíritu Santo jíin táca grupo ñáyuu cácanđíje. Achí yá.

Jñūhun cuahān ñuu Laodicea

¹⁴ Te tee ró jnúhun yáha na quíhín nuū jeē cujéhnū nuū ñáyuu cácanđíje ñuu Laodicea: Súcuan cáhán ruhū, maá Yaā cúu jñūhun ndaā, Yaā cúu testigo vāha jeē cahán ndaā. Te máá rí ni sáha ndíhī jeē ni cáhān Yaā Dios jeē na jécōo. ¹⁵ Je jíin rī tācá jniñu cásáha ró. Te cácuu ró nájñūhun jeē tú mījin ni tú jihní, cúu jeē jecu-ni cácanđíje ró jnúhun ri, te ni tu cájito uhū rō ni tu cándíhvī ni rō síquī. Te nacā jeē vāha núu jeē mījin ró chí jéé jihní ró nuú. ¹⁶ Te tuú chi máá yívixī-ni ró, chi ni tu cájito uhū rō ni tu cándíhvī ni rō síquī. Te jeē yúcuan squéhichī rī rohó nájñūhun ñn jeē tésīhī rí jeē séyūhu rí jeē tu nújnahan ni rī. ¹⁷ Te cácanhān rō jeē cucá ró, te quéndōo vāha ró, te tu cúmanī ni ñn nuū rō. Te tu cásáha ró cuenta jeē cuécá íi cándoho ró, te ndáhú ndasí ró, te cácuáá ró, te máá ñí lí rō. Te tāca jéé yáha cúní cahān jeē tu cácanđíje vāha ró. ¹⁸ Núu súcuan te cáhān rī jíin ró jeē nuū rī cuan ró oro jeē ni ndúhvā nuū ñuhún te ni nduu máá nene, te suu cúu jeē sáha ri jeē coo cúcá ndíje ró ndíhī jeē ndíso jñūhun ri. Te nuū rī cuan ró sahma cuíjín cuhun ró, návāha tú cucanu rō jeē máá ñí lí rō, cúu jeē quéndōo ndaā rō sáha ri. Te cuan ró tájnā nuū rī, quívī tñūu ró, návāha ndundíjin tñūu ró, cúu jeē jecūhun ni rō jñūhun ri. ¹⁹ Tāca ñáyuu jeē cundáhú ni rī, chí cáhān rī nuū i te stóho ri i, návāha na chúhun ni i. Núu súcuan te na cóndíhvī ni rō jíināhan ró, te nacani ni rō jeē stóo ró cuéchi ró. ²⁰ Cuni sóho, chí íin ri yehyí ánuá rō te cáhān rī. Te núu ndé-ni rohó cuni sóho te nune ró yéhyí ánuá rō, te quívī ri caji rī staā jíin ró, te suni caji maá ró jíin rí. Te suu cúu jeē cóndee rī anuá rō. ²¹ Tāca ñáyuu jeē cúnđeyí síquī jeneé, cuāha ri jñūhun conene i jíin rí nuū mesa nuū ndácu ri jniñu. Chi máá rí suni ni snāā rī poder jeneé, te ni cucōo ri jíin Tátá rī nuū mesa nuū ndácu ya jniñu. ²² Ñáyuu iyó sóho na chúsóhó i jñūhun jeē cahán maá Espíritu Santo jíin táca grupo ñáyuu cácanđíje. Achí yá.

Tāca jéé cáyūcú andíví cáchiñúhún núu yā

4 Yūcuán na te ni ndacoto ri, te ni jito ri jeē nune ñn yéhyí andíví, te máá Yaā jeē ni cáhān jíin rí jeē xihna ñúhún, ni cahān tucu jíin rí nájñūhun jeē tñvī trompeta. Te ni cahān:

Caa quiji ró yáha, te na stéén rī nuū rō tācá jniñu jeē cóo ichi núú gā, achí yá.

² Te máá Espíritu Santo ni scóto-ni ya ruhū. Te ni jito ri jeē andiví íin ñn mesa nuū ndácu jniñu, te néne máá yá nuū mesa un. ³ Te máá yá jeē néne yūcuan cáa ya nájnūhun ndíndēé ñn yuū quiyi ndíí chí ñn yuū cuehé ndíí. Te ñn ticō vēhnde ní jicó ndūū yuhu mesa yā, te ndíndēé nájnūhun ñn yuū cuíí ndíí. ⁴ Te xiin mesa yā ni jito ri jeē ní jicó ndūū ocō cuñ gā mesa nuū ndácu jniñu. Te nuū mesa un néne ocō cuñ tēe jéhnū cándiso jniñu. Te cáñuhun de sahma cuijín yaa, te xinī de cáñuhun corona oro. ⁵ Te nde nuū mesa nuū ndácu ya jniñu ndíndēé taja te níñin te cáhán taja. Te ichi núú mesa yā íin ndihúxá Espíritu Yaā Dios, jeē cáa nájnūhun uxā yití náhnū jeē cayú ñuhūn. ⁶ Te ichi núú mesa yā ún suni íyó nájnūhun ñn mar jeē jíto quiyi nájnūhun vidrio.

Te xiin mesa yā un ní jicó ndūū cuñ jeē técu. Te íyó cuehé tñūū ññí cáhnū ichi núú jíín ichi yátá un. ⁷ Te ñn jeē técu un cáa nájnūhun ndicaha. Te inga cáa nájnūhun stiquī. Te jeē uní chi néne nuū tēe. Te jeē cuñ chi cáa nájnūhun yaha chócó jéé jicó núú tachí. ⁸ Te ndicúún jeē técu un íyó íñū ndijēn jeē ñn ñn. Te máni máá tñūū cúu ññí cáhnū nde jíín ññí chíji ndijēn. Te nduú ñūu tu jécuiññí cuiití jeē cahán:

Yaā í Yaā ndoo ndasí
 cúu máá Jítoho yō Yaā Dios, Yaā jññí ndihí poder,
 Yaā iyó vijna, te ni ñyo yá ññí cáni, te coo ya ññí cáni.
 Achí.

⁹ Chi máni jeē cácahān ndicúún un jéé cujéhnū ndasí máá Yaā jeē néne nuū mesa, Yaā jeē técu ññí cáni cuiití. Te yíñūhūn cácahān un jíín yá, te nácuatáhú núú yā.

¹⁰ Te tāca jínu jeē casáha súcuan, te ndihóco cuñ tēe jéhnū cándiso jniñu, cájecuiññí yití de nuū Yaā jeē técu ññí cáni cuiití, cáchiñūhūn de ya. Te cástáa de corona de, cájequin de ichi núú jehé mesa yā. Te cácahān de:

¹¹ Jítoho ná te Yaā Dios na cúu ní.
 Te vāha ndasí Yaā cúu ní jéé cácahān i jeē luu cújéhnū ní,
 te cáhīyo yíñūhūn i nuū ní, te jññí ní ndihí poder.
 Chi máá ní ni sáha ndihí jeē iyó,
 te siquī jeē súcuan ni cuu ni maá ní te ni jecōo ndihí.
 Achí de jíjnāhan de.

Jeē ní nune Londe Yaā Dios tutu

5 Yūcuán na te ni jito ri jeē Yaā néne mesa jeē ndácu jniñu, ndaváha ya jññí ya ñn tutu cáni jeē ní tuu. Te yósó jnúhun ndíndúú lado tutu ún, te ndihyú jíín úxá sello. ² Te ni jito ri ñn ndajéhé yā jeē ndiso poder, te ni cahān jee:

¿Ndé ñn cúu tēe vāha ndasí jeē cóndiso jniñu cahnde sello te nune tutu yáha? áchí ndajéhé yā.

³ Te ni andiví ni ñayiví ni jeē iyó chíji ñayiví, tu ní íyo ni ñn jeē cóndiso jniñu nune tutu ún, ni jeē cóto nuū.

⁴ Te ni ndahyū ndasí rí, chi tu ní íyo ni ñn jeē cóndiso

jniñu nune te cahu tutu ún, ni jeē cóto nuū. ⁵ Yūcuán na te ni cahān ñn tēe jéhnū un jíín rí:

Ma ndahyū rō, chí íyó ñn Yaā ndiso jniñu jeē cahnde yā ndihúxá sello ndihyú tutu, te nune ya. Te máá yá chí íyó cuehé poder yā, nájnūhun jeē iyó cuehé fuerza ñn ndicaha. Te ni cacu ya chíji yucūn Judá, jeē cúu yucūn rey David. Te ni snāā yā poder tāca jéneé.

⁶ Yūcuán na te ni jito ri Yaā jeē cúu Londe Yaā Dios jeē ní cajehni i te ni natecu. Te Londe un íin ya nuū íin mesa Yaā Dios, mēhñū ndicúún jeē técu, jíín tēe jéhnū cándiso jniñu. Te íyó úxá ndiquí jíín úxá tñūū Londe ún. Te tñūū un cúu ndihúxá Espíritu Yaā Dios jeē ní tají yá ni jengoo ññí cáhnū ñayiví. ⁷ Te Londe un ní jequihin ya tutu jeē jññí ndaváha Yaā jeē néne nuū mesa. ⁸ Te ná ni quihin ya tutu ún, te ndicúún jeē técu jíín ndihóco cuñ tēe jéhnū cándiso jniñu, ni cajecuiññí yití núú yā. Te ná ñn ná ñn tēe jéhnū un cándaha yaa jeē naní arpa, jíín cóhō cúu oro jeē ñúhun chítú súje cutú. Te sūje cutú un cúu máá táca jnúhun jeē cájicān tahú ñayuu yíñi ndaha Yaā Dios. ⁹ Te ni cajita de ñn yaa jeé, te suhva cáhán:

Vāha ndasí Yaā cúu ní jéé quihin ní tutu te cahnde ní sello jeē ndihyú.

Chi ni cajehni i níhín, te jíín ññí ni ní nacuaan ní ñayuu
 mēhñū táca raza, tācá yuhu, tācá ñuu, tācá nación,
 návāha cuu i ñayuu Yaā Dios.

¹⁰ Te ni sáha ní jéé cuu i rey jíín sūtū nuū Yaā Dios, te ndacu i jniñu ini ñayiví.

Achí de cájita de.

¹¹ Te ni jito ga rī, te ni jini sōho ri jeē cácahān cuehé ndajéhé yā jeē ní cajicó ndūū xiin mesa yā, jíín xiin ndicúún jeē técu, jíín xiin tēe jéhnū cándiso jniñu. Te íyó cuehé ndasí millón ndajéhé un. ¹² Te suhva ni cacahān jee ya:

Vāha ndasí Yaā cúu Londe jeē ní cajehni i.
 Te jeē yūcuan jññí ya poder, te yōhoyo cúcá yá,
 te yōhoyo ndíchí yá, te ndiso ya cuehé fuerza,
 te cáhīyo yíñūhūn ndihí nuū yā, te luu cújéhnū ya,
 te cácahān i jeē vāha ndasí Yaā cúu ya.

Achí.

¹³ Te suni ni jini sōho ri jeē cácahān ndihí jeē ni sáha Yaā Dios jeē iyó ini andiví jíín ini ñayiví jíín chíji ñayiví jíín ini mar. Te ndivii un ní cacahān:

Cúsiñ ni yō cahán yō jeē yōhoyo vāha Yaā cúu máá Yaā néne mesa nuū ndácu ya jniñu,
 jíín Yaā cúu Londe Yaā Dios.

Te na cóo yíñūhūn yó núú yā, chí cújéhnū luu ya,
 te jññí ya poder ññí cáni cuiití.

Achí.

¹⁴ Te ni cacahān ndicúún jeē técu:

Súcuan na cóo, áchí.

Te ndihóco cuñ tēe jéhnū cándiso jniñu ni cajecuiññí yití de, te ni cachíñūhūn de nuū Yaā jeē técu ññí cáni cuiití.

Siquĩ ndihúxá sello

6 Yūcuán na te ni jito ri jeē Yaā cúu Londe Yaā Dios, ni jehnde yā ñn jeē uxá sello un. Te ni jini sōho ri jeē cahán ñn jnáhan ndicúun jeē técu ún, nájnūhun cáhán taja:

Nehen te cuni rō.

² Te ni ndacoto ri, te ni jito ri ñn caballo cuijín. Te jeē yosó sáquĩ tĩ un ndáhá ñn arco jeē stáva nduva. Te ni jecūhun ñn corona xinī. Te ni quenda ni jelnáhan, te ni cundeyĩ sáquĩ ndihi.

³ Yūcuán na te Londe un ní jehnde yā sello uū. Te ni jini sōho ri jeē cahán inga jnáhan ndicúun jeē técu:

Nehen te cuni rō.

⁴ Te ni quenda ñn caballo cuehé, te jeē yosó sáquĩ tĩ ndíso jniñu jeē snáá jnūhun cáyūcu mánī ñayuu ñayĩví, te quejéé i cahni jnáhan i. Te ni nihīn ún ñn espada cáhnu.

⁵ Yūcuán na te Londe un ní jehnde yā sello unī. Te ni jini sōho ri jeē cahán inga jnáhan ndicúun jeē técu:

Nehen te cuni rō.

Te ni ndacoto ri, te ni jito ri ñn caballo jnuú. Te jeē yosó sáquĩ tĩ ndáhá ñn balanza jeē chícuāha, chi coo jnamā xeēn. ⁶ Te mēhñū ndicúun jeē técu un ní jini sōho ri ñn jeē cahán:

Máá ñn kilo-ni trigo nihīn i jíin yáhu i jeē sájniñu i ñn quivĩ. Te núu cebada, te unī-ni kilo nihīn i jíin yáhu i jeē sájniñu i ñn quivĩ. Te aceite jíin vino chi ma sáha ró jéé cúmanī. Achí.

⁷ Yūcuán na te Londe un ní jehnde yā sello cuūn. Te ni jini sōho ri jeē cahán tucu inga jnáhan ndicúun jeē técu:

Nehen te cuni rō.

⁸ Te ni ndacoto ri, te ni jito ri ñn caballo cuaán yaa, te jeē yosó sáquĩ tĩ cúu máá cuéhyĩ jéhni ñayuu. Te ichi yátá un ndíquin máá jnúhun jeē quivĩ ñayuu lugar nuū cáyūcu ánuá ndĩyĩ. Te ndíndúu un cándiso jniñu jeē ndónnda sáquĩ ñn jeē ndicúun parte ñayĩví, te cuu sáha jeē cúu ñayuu jíin guerra, jíin jnamā, jíin cuéhyĩ xeēn, jíin táca quitĩ xeēn jeē iyó ñayĩví.

⁹ Yūcuán na te Londe un ní jehnde yā sello uhūn. Te chíji altar cáhnu ni jito ri anuá ñayuu jeē ní cacandíje jnūhun Yaā Dios te ni canacani ndaā i jnūhun ya, te sáquĩ yūcuan ní cajehni ñayuu i. ¹⁰ Te ni cacana jee ánuá un:

Jitoho ná Yaā Dios, máá ní cúu Yaā ndoo te vāha squícu ní jéé ni jéjnūhun ní. ¿Te nasaa ga tiempo coo te sándaā ni jéhē ná, te nacuaāha ní jéé ndútahū ñayuu ñayĩví jéé ní cajehni sáñá? achí.

¹¹ Yūcuán na te ni jēhe ya sahma cuijín cahun i jíin náhan i, te ni cahān yā jíin i jeē na ndétátú i jecu gā tiempo. Chi iyó gá hermano i jeē cájejniñu nuū yā, jeē suni jíni ñúhūn cuu i návāha jīnu número i, achí yá.

¹² Yūcuán na te Londe un ní jehnde yā sello iñū. Te ni jito ri jeē ni jnáa ndasĩ. Te ni cujnuú níandii nájnūhun

ñn sahma jnuú. Te nñí yóo ni nduu nájnūhun niñĩ. ¹³ Te quĩmi andivĩ ní ñngoyo nuū ñúhun nájnūhun ñngoyo ndehē yĩhĩ yujnu higo sáha tachī níhin. ¹⁴ Te andivĩ ní cujiyo cuahān nájnūhun jeē nátuu ñn tutu cáhnu. Te táca yucu jíin táca isla ni cujiyo cuangoo inga lado.

¹⁵ Te táca rey ñayĩví, jíin jéé cácujeñnu, jíin jéé cucá, jíin táca capitán, jíin jéé cándiso poder, jíin mozo jeē ní ca-jeen ñayuu, jíin tée cásájniñu cuenta maá, ní cachisāhi máá ini yaū cava jíin mēhñu cava chíji yucu. ¹⁶ Te ni cacahān i jíin yucu jíin cava:

Ndicó cáva sáquĩ rī, na quĩsāhi rí návāha tú coto máá Yaā néne mesa ndácu jniñu, jíin Yaā cúu Londe jeē cuáha ya castigo xeēn ruhū. ¹⁷ Chi ni quee maá quivĩ cáhnu jeē cuáha ya castigo, ¿te ndé ñn canda condichi nuū yā? achí i jíin náhan i.

Ñayuu táca yúcūn Israel jeē ni jécondee sello jneē

7 Te ná ni cuu jniñu yáha, te ni jito ri cuūn ndajéhé yā jeē cáhīn ndicúun lado ñayĩví. Te cájesi yā nuū ndicúun tachī, návāha ma quee nuū ñúhun ni nuū mar ni nuū ní ñn yujnu. ² Te suni ni jito ri inga ndajéhé yā, vēji ichi núu cáne niāndii. Te ndáhá yá sello Yaā Dios, Yaā técu. Te ni cahān jee ya jíin ndicúun ndajéhé un jéé ndíso jniñu jeē sáha daño nuū ñúhun ichi jíin núu mar:

³ Ma sáha ró daño nuū ñúhun ni nuū táca yujnu ni nuū mar, chi nde na tée yó sello jneē táca ñayuu cájejniñu nuū Yaā Dios yō.

⁴ Te ni jini sōho ri jeē achí jéé iyó ciento uū xico cuūn mil ñayuu jeē ni jécondee sello jneē. Te ñayuu un cácuu táca yúcūn ñayuu Israel. ⁵ Te iyó úxī uū mil ñayuu cácuu yúcūn Judá jeē ni jécondee sello, jíin úxī uū mil yúcūn Rubén, jíin úxī uū mil yúcūn Gad, ⁶ jíin úxī uū mil yúcūn Aser, jíin úxī uū mil yúcūn Neftalí, jíin úxī uū mil yúcūn Manasés, ⁷ jíin úxī uū mil yúcūn Simeón, jíin úxī uū mil yúcūn Leví, jíin úxī uū mil yúcūn Isacar, ⁸ jíin úxī uū mil yúcūn Zabulón, jíin úxī uū mil yúcūn José, jíin úxī uū mil yúcūn Benjamín. Ndihĩ yúcūn yáha cúu jeē ni jécondee sello.

Ñayuu cuehé jeē cáñuhun sahma cuijín

⁹ Te ná ni cuu jniñu yáha te ni ndacoto ri, te ni jito ri cuehé ndasĩ ñayuu. Te cúu i ñayuu táca nación jíin táca raza jíin táca yuhu jíin táca ñuu. Te cáhīn i nuū mesa nuū ndácu Yaā Dios jniñu jíin núu maá Yaā cúu Londe. Te sáquĩ jeē cuehé ndasĩ i, te ni ñn ma cúu cahu nasaa i cúu. Te cáñuhun i sahma cuijín, te cándāhá i ñuū. ¹⁰ Te ni cacana jee i:

Yaā Dios máá yó cúu jeē ní jnama yóhó,

Yaā jeē néne nuū mesa jeē ndácu jniñu,

jíin Yaā cúu Londe Yaā Dios.

Achí i jíin náhan i. ¹¹ Te ndihĩ ndajéhé ni cajicó ndúu yā cáhīn ya xiin mesa Yaā Dios, jíin xiin tée jéhnu cándiso jniñu, jíin xiin ndicúun jeē técu. Te ni cajecuiñĩ yitĩ yá ni cachiñúhūn yá Yaā Dios ichi núu mesa yā. ¹² Te ni cacahān yā:

Amén. Cúsiꝛ ni yō cahán yō jeē yóhoyo vāha Yaā cúu Yaā Dios maá yó.

Te luu cújéhnun ya te ndíchí yá.

Te na nácuatáhú yó nuū yā, te na cóo yǎñúhún yó núū yā.

Chi jnǎi ya poder, te ndíso ya cuehē fuerza jeē ní cáni cuiṭi. Amén.

Achí táca ndajéhé yā.

¹³ Yūcuán na te ni cahān ñn tēe jéhnun un jíin rí:

¿Ndé ñáyuu cúu yāha jēe cáñuhun sahma cuijín, te ndé chí véjicoo i?

¹⁴ Te ni cahān rǎ jíin de:

Máá ní cúu jeē jíiní, Tátā.

Te ni cahān de jíin rí:

Yāha cácuu ñayuu jeē ní cayāha i jeē ní cajito i jnūndóho xeēn. Te ni canacate i sahma i jíin níñǎi maá Londe, te ni nduyaa vāha, cúu jeē ní ndundoo ánuá i ni sáha ya. ¹⁵ Jeē yúcuán cúu jeē cáhīin i nuū mesa nuū ndácu Yaā Dios jniñu, te cájejnǎi i ini templo yā nduú ñuú. Te Yaā jeē néne nuū mesa, coto ya i jeē quéndōo vāha i nuū yā. ¹⁶ Te ma cúu gā i sōco, te ma jichí gā i ndute. Te ma cayú gā i nuū niāndii, ni ma ndóho ga i jeē jihní. ¹⁷ Chi máá Yaā cúu Londe jeē néne nuū mesa jeē ndácu jniñu, coto ya i nájnūhun jeē cúu i lanchi ya. Te condeca ya i quihín yā jíin i nuū cáne ndute jeē cótecu i sáha. Te Yaā Dios nacuaa yā ndute núu i jíinánhan i, te ma ndahyú gā i. Achí tēe jéhnun ún.

Siquǎ sello uxā jíin cóhō cúu oro

8 Te Londe un ní jehnde yā sello uxā jeē ndihyú tu tu ún, te nayúú-ni ni t̄yo ini andiví nájnūhun sava hora. ² Te ni jito ri ndihúxá ndajéhé jeē cáhīin nuū Yaā Dios. Te ni cajēhe uxā trompeta nuū ndajéhé un. ³ Yūcuán na te ni quee inga ndajéhé, ndáhá yá ñn cohō cúu oro, te ni jecuiñǎi yā nuū altar. Te ni jēhe cuehē sūje cutú núu yā, návāha socō yā jíin jnúhun cájicān tahú ndihí ñayuu cáncandíje Yaā Dios. Te ni socō yā nuū altar oro jeē índichi ichi núu mesa nuū ndácu Yaā Dios jniñu. ⁴ Te nuū cohō cúu jnǎi ndajéhé un ní cane ñuhmā sūje cutú, ni caa nuū Yaā Dios nde jíin jnúhun cájicān tahú ñayuu cáncandíje Yaā Dios. ⁵ Yūcuán na te ni quihin ndajéhé un cóhō cúu un. Te ni scutú yá t̄cua ñuhūn jeē cayú nuū altar. Te ni jete yā nde ini ñayǎví. Te ni sáha jeē ni cáhān taja, te ni nǎhin, te ni ndindēe taja, te ni jnāa.

Jnúhun siquǎ trompeta

⁶ Yūcuán na te ndihúxá ndajéhé jeē cáncandíje ndihúxá trompeta, ni casatūhva ya jeē tiví yā.

⁷ Te ndajéhé ñn ni tiví yā trompeta. Te ni cuun ñǎñǎi ini ñayǎví jíin ñúhūn jeē ni sácā núu jíin níñǎi. Te ni cayú ñn jeē uní parte ñayǎví, jíin ñn jeē uní parte yujnu, jíin ñn jeē uní parte ite cuií.

⁸ Te ndajéhé uū ni tiví yā trompeta. Te ñn nájnūhun ñn yucu cáhnu jeē cayú ñuhūn ni ñingava cuahān nuū

mar. Te ñn jeē uní parte mar ni nduu níñǎi. ⁹ Te ni jihí ñn jeē uní parte quití ñúhūn nuū mar. Te ni naa cuehē barco, chi ñn ñn jeē táca úní ni naa.

¹⁰ Te ndajéhé uní ni tiví yā trompeta. Te ni ñingava ñn quǎmi cáhnu ichi ándiví, te cáyú nájnūhun cáyú ñn yití cáhnu. Te ni ñingava siquǎ ñn ñn jeē táca úní yūte jíin núu cáne ndute. ¹¹ Te quǎmi un nání quǎmi uvuā. Te ñn jeē uní parte ndute ni cuu uvuā. Te ni cajihí cuehē ñayuu ni sáha jeē ní cuu uvuā ndute ún.

¹² Te ndajéhé cuūn ni tiví yā trompeta. Te ñn jeē uní parte niāndii jíin yóo jíin quǎmi ni t̄ví. Te ni ndunee ñn jeē uní parte i, te tuá ni cúndijin ñn jeē uní parte nduú jíin ñuú.

¹³ Te ni ndacoto ri, te ni jini sōho ri jeē cána jee ñn ndajéhé yā jeē ndáva cuahān sava andiví:

Nacā xeēn gā ndoho ñayuu cáyūcú ini ñayǎví, chi je yajni cuecu uní gā trompeta jeē tiví uní gā ndajéhé, achí yá.

9 Te ndajéhé uhūn ni tiví yā trompeta. Te ni jito ri jeē ichi ándiví ní ñingava ñn quǎmi nde ini ñayǎví. Te nuū quǎmi un ní jēhe ndacáa jeē núne tūhñchi cúnú ndasí. ² Yūcuán na te ni nune un tūhñchi, te ni cane ñuhmā ni caa nájnūhun ñuhmā ñn ijnū cáhnu. Te ñuhmā un ní sáha jeē ní cunee niāndii jíin níñǎi núu tachí. ³ Te nuū ñuhmā un ní canecoo t̄ca ndicuéhyí, ni jité núu t̄i ní cáhnu ñayǎví. Te ni jēhe ya jnúhun jeē sáha t̄i nájnūhun cásáha t̄isuhma xeēn jeē iyó ini ñayǎví. ⁴ Te ni ndacu ya jniñu nuū t̄i jeē ma sáha t̄i daño ite jíin yúcuú cuií jíin yujnu, chi máni ñayuu jeē tu ndéé sello Yaā Dios jneē i cúu jeē tuu t̄i. ⁵ Te tu ní jēhe ya jnúhun jeē cáhni t̄i ñayuu, chi máni jeē stóho t̄i i uhūn yoō. Te sáha t̄i jeē jetú i nájnūhun jeē jetú ñayuu jeē túu t̄isuhma i. ⁶ Te quiví ún nducú ndasí ñáyuu modo cuu i, te ma nihín i modo. Te vésú cuní i cuu i, te tú na modo cuu i.

⁷ Te t̄ca ndicuéhyí un cáa t̄i nájnūhun caballo jeē cáhīyo tūhva quingoo nuū cuájánhan. Te xiní t̄i ñúhūn nájnūhun corona oro. Te nēe t̄i nuū tēe. ⁸ Te iyó ixi t̄i jeē cáa nájnūhun ixi xíní ñahan. Te jnúhun t̄i cáa nájnūhun jnúhun ndicaha. ⁹ Te níñǎi t̄i ndihyú nájnūhun sahma cáa. Te níñin ndijēn t̄i nájnūhun níñin jeē cuán-goo cuehē caballo nuū guerra cáñuhun t̄i carreta. ¹⁰ Te suhmā t̄i ndíso iñu nájnūhun t̄isuhma. Te jíin súhmā t̄i cuu stóho t̄i ñayuu uhūn yoō. ¹¹ Te iyó ñn jeē cujéhnun nuū t̄i, te suu cúu ndajéhé jexeén jeē ndíto tūhñchi cúnú ndasí un. Te ndajéhé un yuhu hebreo naní Abadón, te yuhu griego naní Apolión, jeē cuní cahān maá jēe snáa.

¹² Je ni yāha ñn jnūndóho, te iyó úu gā jnūndóho jeē quǎji.

¹³ Te ndajéhé iñu ni tiví yā trompeta. Te ni jini sōho ri ñn jnúhun jeē ni cáhān nde mēhñú ndicúún yiquǎ altar oro jeē íin nuū Yaā Dios. ¹⁴ Te ni cahān un jíin ndajéhé iñu jeē ndahá trompeta:

Nandají ró ndicúún ndajéhé jeē nuhní yuhu yúte cáhnu jeē naní Eufrates, achí.

¹⁵ Te ni nandajī ndicúún ndajéhé un, návāha cahni ñn jeē uní parte ñayuu ñayīví. Chi je cáhīyo tūhva ndajéhé un jeē siquī maá hora jíin quívī jíin yóō jíin cuíyā jeē cóo súcuan. ¹⁶ Te ni jini sōho ri jeē achí jéē iyó úū ciento millón soldado jeē cáyoso caballo.

¹⁷ Te ni steén gā yā nuū rī, te ni jito ndijin rī tǎcá caballo. Te tēe cáyoso siquī tǎ cáñuhun de camisa cāa jeē cuehé, jeē ndeé, jíin jéē cuaán. Te xinī caballo un cándāa nájnūhun xinī ndǎcaha. Te yuhu tǎ quéndā ñuhūn jíin ñúhmā jíin azufre. ¹⁸ Te jíin únī jeē quéndā yuhu caballo un, te ni jihī ñn jeē uní parte ñayuu, suu jíin ñúhūn jíin ñúhmā jíin azufre. ¹⁹ Chi yuhu tǎ jíin súh-mā tǎ iyó fuerza jeē cáhni tǎ ñayuu. Chi suhmā tǎ cándāa nájnūhun coō, te iyó xínī, te jíin yúcuan stóho tǎ ñayuu.

²⁰ Te sava ga ñayuu jeē tu ní jíhí jíin táca jnúndóho yáha, tu ní nácani ni i stóo i ídolo jeē ní casáha i. Te tu ní stóo i jeē cáchiñúhún i tǎca táchī jíin ídolo jeē ní cu-vāha jíin oro jíin plata jíin cáa cuaán jíin yúū jíin yujnu. Te tǎcá un chi tu cúu coto, ni tu cúu cuni sōho, ni tu cúu caca. ²¹ Te ni tu ní canacani ni i stóo i jeē jéhni i ndīyī, jíin jéē satásí i, jíin jéē jíca jnéni i, jíin jéē sacuíh-ná i.

Ndajéhé jeē ndahá libro lulí

10 Te ni jito ri inga ndajéhé yā jeē ndíso poder, ni cuun ya ichi ándiví. Te ñúsúcun yá vicō, te xinī yā ñúhūn ticō vēhndé. Te nuū yā ndíndēe nájnūhun niāndii, te sīhīn ya cáa nájnūhun uū sīhīn jeē cáa ná cáa ñuhūn. ² Te ndáhá yá ñn libro lulí jéē núne. Te ni jeni ya jehē váha ya nuū mar, te jehē jecó yá nuū ñúhūn íchi. ³ Te ni cana jee téyí yá, nájnūhun jeē ndahyú ndǎcaha. Te ná ni cana jee ya, te ni cacahān uxā taja. ⁴ Te ná ni cacahān uxā taja, te je iyó tūhva ri jeē tée ri jnúhun un núú. Te ni jini sōho ri ñn jnúhun ichi ándiví jeē ni cáhān jíin rí:

Chuvāha ró táca jnúhun jeē ní cacahān uxā taja ún, te ma steén rō, ni ma tée ró, áchí.

⁵ Yūcuán na te ndajéhé jeē ní jito ri jeē íin nuū mar jíin núū ñúhūn, ni ndonehen ya ndaha váha ya ichi ándiví. ⁶ Te ni ndacunehen ya sīhví máá Yāa jeē técu ní cáni, Yāa ni sáha andiví jíin ñáyīví jíin mar jíin táca ndihī jeē iyó ini. Te jíin sīhví yá un ní cahān teyí ndajéhé:

Ma cucuéé gá jeē jínu ñayīví. ⁷ Chi núu na quéjéé ndajéhé uxā tiví yā trompeta, yūcuán na te squícu-ni Yāa Dios jnúhun sāhi yá, nájnūhun ni castūhun yá nuū tǎca mozo yā, tēe ni canacani jnúhun ya nde jenahán, áchí ndajéhé.

⁸ Yūcuán na te máá jéē ní jini sōho ri jeē ni cáhān ichi ándiví, ni cahān tucu jíin rí:

Cuáhán te quihin ró libro lulí jéē núne jeē ndahá ndajéhé jeē íin nuū mar jíin núū ñúhūn, áchí.

⁹ Te ni jehēn rī nuū ndajéhé un, te ni jicān rī jeē na cuáha ya libro lulí un núú rī. Te ni cahān yā:

Quihin te caji rō. Chi vixī sáha ini yuhu ró nájnūhun ndūxi, te chíji ró chi cuhiyá sáha, áchí yá.

¹⁰ Yūcuán na te ni quihin ri libro lulí jeē ndahá ndajéhé yā, te ni yeji rī. Te vixī ni sáha ini yuhu ri nájnūhun ndūxi. Te ná ni cuu ni yeji rī, te ni jitē iyá ni rī. ¹¹ Te ni cacahān jíin rí:

Cánuú jéē nacani tucu ró jnúhun Yāa Dios, ndese coo siquī ñayuu cuehē ñuu jíin cuéhē nación jeē sīn sīn yuhu, jíin síquī cuehē rey cándacu jniñu, áchí jíin rí.

Siquí uū testigo yā

11 Yūcuán na te ni cajēhe ñn yujnu nuū rī, jeē cúu ñn cūhva jeē chícuāha. Te ni cacahān jíin rí:

Ndocuñī te chicuāha ró templo cáhnu Yāa Dios jíin altar, te cahu ró nasaa ñayuu cúu jeē cáchiñúhún núú yā yūcuán. ² Te ma chícuāha ró patio yatā templo. Chi je ni jēhe ya nuū ñayuu tǎcá ñuu jicá. Te coyūcú i ini ñuu íi yāhá, te uū xico uū yoō cueñū i síquī ñuu. ³ Te tají rí uū testigo rī jeē nácani jnúhun ri mil uū ciento uní xico quívī. Te cuhun de sahna ndáyí jéē cácu-cuíhyá ni de síquī cuéchi ñayuu, achí yá.

⁴ Te ndíndúu testigo un cúu nájnūhun ndíndúu yujnu olivo jíin ndíndúu candelero jeē íin nuū Yāa Dios, Yāa chíi ñayīví. ⁵ Te na-ni ñayuu núu nducú sáha ndevāha jíin ndíndúu testigo un, te quenda ñuhūn yuhu ndíndúu de, te cayū ndīhi ñayuu cájito uhū i de. Te súcuan cuu tǎca ñayuu jeē nducú sáha ndevāha jíin de. ⁶ Te iyó poder ndíndúu testigo un jéē cási de jeē ma cúun saū ní tiempo jeē nácani de jnúhun ya. Te suni iyó poder de sáha de jeē nduu níñī tǎcá ndute. Te cuu stívī de ñayīví jíin ndínuū jnúndóho, núu nasaa jínu cácuni de. ⁷ Te ná ni jīnu ni canacani de jnúhun ya, yūcuán na te quenda quitī xéén jeē néne tūhñchi ún. Te cuajnáhan jíin ndíndúu de, te cundeyí jíin de, te cahni de. ⁸ Te ndīyī ún cava nuū yáhu ñuu cáhnu nuū ní cajehni i máá Jítóho yō jicā cruz. Te ñuu un cácahān yatá i jeē ñuu Sodoma jíin Egipto cúu, síquī jeē xeēn cuéchi iyó ñuu ún. ⁹ Te ñayuu tǎcá ñuu, tǎca yúcūn, tǎcá yuhu, tǎcá nación, chi coto i jeē cáva ndíndúu ndíyī un únī quívī yosáva, te ma cuáha i jnúhun jeē quíndūji. ¹⁰ Te ñayuu ní cáhnu ñayīví cusīñ ndasí ni i jeē ní cajihī de, te sáha i vico, te cuāha i regalo nuū jnáhan i. Chi ndíndúu tée ni canacani jnúhun ya ún, ní casáha de jeē ní candoho ndasí ñayuu ñayīví. ¹¹ Te jeē yáha uní quívī yosáva ún, te Yāa Dios sáha ya jeē nastáa tachī de, te ndonda-ni de. Te yūhú ndasí ñayuu coto i jeē ní canatecu de. ¹² Yūcuán na te cuni sōho de jeē cána jee ichi ándiví:

Caa ró quijicoo ró ndé yāhá, áchí.

Te ndaa de mēhñu vīcō quingoo de andiví, cuni ñayuu cájito uhū i de. ¹³ Te máá hora un jnáa ndasí, te ndicó cáva naa ñn jeē uxí parte ñuu ún. Te jíin ñujnáa ún cuu uxā mil ñayuu. Te tǎca gá ñayuu jeē ndóo, yūhú ndasí i, te cahān i jeē cujéhnu Yāa Dios jeē ndeé andiví.

¹⁴ Súcuan yāha jnūndóho uū, te yachī coo jnūndóho unī.

Siquī trompeta uxā

¹⁵ Te ndajéhé uxā ni tivī yā trompeta. Te ni jini sōho ri ni cacahān jee ichi ándiví. Te súcuan ni cacahān:

Tācá nación ñayiví je ni nuquihī ndaha máá Jítóho yō Yaā Dios

jiín Cristo jeē ní tají yá.

Te ndacu ya jniñu nñí cáni cuiñi.

Achí.

¹⁶ Yūcuán na te ndihóco cuñ tēe jéhu cándiso jniñu jeē cánene de mesa de ichi núu Yaā Dios, ni cajecuiñí yití de, ni cachiñúhún de ya. ¹⁷ Te ni cacahān de:

Na cútahū na núu ní, Tātā Yaā Dios,

chi máá ní jñí ndihí poder,

te cúu ní Yaā iyó vijna, te ni ñyo ní nñí cáni, te coo ní nñí cáni.

Te ni najñí ní ndivii jeē iyó,

te jiín poder ni ní quejéé ní ndácu ní jniñu nuū.

¹⁸ Ñayuu tācá nación ni caquití ni i siquí ní.

Te vijna chi ni quee quiví jeē cuáha ní castigo i, jiín jéé sándaā ní jniñu tāca ndívi.

Te cuáha ni táhū nuū tāca mozo ni jéé ní canacani jnūhun ní,

jiín núu tāca ñayuu cájejniñu nuū ní, jiín ñayuu cáchiñúhún núu ní,

cúu ñayuu cácujeñu jiín jéé tuú.

Te vijna te snáhnú ndetū ni ñayuu castívi ñayiví. Achí de jijnáhan de.

¹⁹ Yūcuán na te ni nune templo Yaā Dios jeē iyó andiví. Te ni cajito ñayuu jeē yúcuan íne yejñu jeē ñúhún contrato yā. Te ni ndindéé taja, te ñhñ, te cáhán taja, te ni jñāa, te ni cuun xeñ ñiñí.

Jnūhun ñahan jiín cóo cáhnu

12 Yūcuán na te ini andiví ní cane ññ jeē nahán náā ni yō jító yó: ññ ñahan jeē ñúhún ña niāndii nájnūhun sahna, te íñ jehē ña siquí yoó, te ñúhún ññ corona xiní ña jeē ndeé uxí uū quími. ² Te ñúhún sēhe ña. Te ni ndahyū cohó ña jeē ndóho ña jéhnde chíji ña jeē scácu ña i. ³ Yūcuán na te ini andiví ní cane tucu ñga jeē náā ni yō jító yó: ññ coó cuehé cáhnu ndasí. Te iyó úxā xiní tē jiín úxí ndiqui tí. Te ndihúxá xiní tē ñúhún corona. ⁴ Te jiín súhmā tē ni stáa tí ññ jeē uní parte quími jeē iyó andiví, te ni síngoo tí ini ñayiví. Te ni ine tí nuū ñahan jeē scácu sēhe ún, ndétu tí cocó tē sēhe ña jeē jé yajni cacu i. ⁵ Te ni scácu ña ññ sēhe yí, te sūchi un ní jeconā jeē ndácu ñhñ i jniñu nuū ndévi nación. Yūcuán na te ni ndoñúhún sēhe yí ña ún, ni ndaa i cuahān i nde nuū íñ mesa Yaā Dios nuū ndácu ya jniñu. ⁶ Te ñahan un ní jinu ña cuahān ña nde nuū ñúhún téhé núu iyó ññ lugar jeē ni sátúhva Yaā Dios. Te yūcuán condee ña nihñ ña jeē cáji ña mil uū ciento uní xico quiví.

⁷ Yūcuán na te ni cajenáhan ini andiví. Chi ndajéhé jéhu ga jeē naní Miguel jiín táca ndajéhé jeē cácu mozo nuū yā, ni cajenáhan jiín cóo cáhnu. Te coó un jiín táca ndajéhé maá, ni cajenáhan jiín yá. ⁸ Te tu ní cácuñdeyí tē, te tuá ní cúu coyūcu tē andiví. ⁹ Súcuan ni cuu jeē ní quenehen ya coó cáhnu un jéé iyó ndé jehán ndasí. Te nání tē jexeén jiín Satanás, te máá tē cúu jeē stahú ndihí ñayuu ñayiví. Te ni scáne ya tē nde ini ñayiví jiín táca ndajéhé tē.

¹⁰ Yūcuán na te ni jini sōho ri ññ jnūhun jeē cáhán jee ichi ándiví:

Je ni quee quiví jeē jínu jnama ya yohó, jiín jéé steén ndijin yā jeē jñí ya poder, jiín jéé ndácu ya jniñu, jiín jéé ndíso jniñu máá Cristo jeē ní tají yá. Chi je ni quenehen ya maá jéé cáhán cuēchi siquí tācá hermano yō. Chi nduú ñuú ni cáhán cuēchi siquí i nuū Yaā Dios máá yó. ¹¹ Te ni cacundeyí i siquí Satanás un, ní sáha jnūhun jeē ni jíhí Yaā cúu Londe, jiín jéé ní cacahān ndaa i jnūhun Yaā Dios, jiín jéé tu ní cundáhú ni i máá i, chi ni jēhe i jnūhun candíje i vésú núu cuu i jeē siquí yā. ¹² Núu súcuan te na cúsiñ ndasí ni tāca róhó jéé cáyúcú andiví. Te nacā xeñ ndoho tāca róhó jéé cáyúcú ini ñayiví jiín núu mar. Chi ni cuun jexeén ni jinū nuū rō jijnáhan ró. Te quítí xeñ ni, chi jini jeē tuá coo cuehé gā tiempo jeē stahú ñayuu. Achí.

¹³ Te ni jini coó cáhnu ún jéé ni scáne ya maá cuáhan ini ñayiví, te ni jinu tí jiín ñahan ní scácu sēhe yí, jeé xeñ sáha tí jiín ña núu. ¹⁴ Te ni cajēhe uū ndijēn yaha chócó cáhnu nuū ñahan ún, návāha ndava ña quihñ ña lugar ña nuū ñúhún téhé, te cácu ña nuū coó ún. Te yūcuán condee ña uní cuiyā yosáva, te nihñ ña jeē cáji ña. ¹⁵ Te yuhu cóo un ní cane ndute nájnūhun ññ yūte cáhnu, cuahān yatā ña návāha jneni ña. ¹⁶ Te máá ñuhun chi ni chindéé ñáhán ñahan ún, chi ni nune-ni, te ni nungoo yūte jeē ní cane yuhu cóo ún. ¹⁷ Yūcuán na te xeñ ni quití ni coó cáhnu ni jito tí ña. Te cuahān tē cuajnáhan tí jiín táca gá sēhe ña, suu ñayuu casquícu jniñu ndácu Yaā Dios te cácuñdeyí vāha i jnūhun Jesucristo.

Jnūhun siquí uū quití xéén

13 Te ni indichi rí yumár. Te ni jito ri jeē ní cane ññ quití xéén ini mar. Te iyó úxā xiní tē jiín úxí ndiqui tí. Te ndihúxí ndiqui tí ñúhún corona. Te ndihúxá xiní tē ndeé ññ síhví néé jéé quití ni Yaā Dios sáha. ² Te quití xéén jeē ní jito ri ún, cáa tí nájnūhun cuiñí, te ndaha tí cáa nájnūhun ndaha oso, te yuhu tí cáa nájnūhun yuhu ndícaha. Te nuū quití un ní jēhe coó cáhnu poder maá jiín mesa nuū ndácu máá jniñu. Te ni sáha jeē cujéhu ndasí quití ún. ³ Te ni jito ri jeē ní tújī ññ xiní tē, jeé jé yajni cuu tē nuú. Te ni nduvāha tí jeé ní tújī tē. Te nahán ní naa ni ñayuu ñí cáhnu ñayiví ní jito i, te ni cajetáhú i nuū tē. ⁴ Te ni cachiñúhún i coó cáhnu siquí jeé ní sáha tí jeé cujéhu ndasí quití xéén un, te suni ni cachiñúhún i quití xéén un. Te ni cacahān i:

Tú ni ñin jeē cujéhnun nájñūhun quitī yáha, te tú ni ñin cundeyí cuajnáhan jíin t̄, áchí i jíjnáhan i.

⁵ Te tu ní jesi ya jeē cahān t̄ jeē quitī téyí cúu t̄, jíin jeē cahán ndevāha t̄ siquī yā. Te ni nihīn jniñu t̄ jeē ndácu t̄ jniñu uū xico uū yoō. ⁶ Te ni quejéé t̄ ni cahān ndevāha t̄ siquī Yaā Dios, jíin síquī síhví yá, jíin síquī nuū ndeé yá, jíin síquī tāca jeē iyó andiví. ⁷ Te tu ní jesi ya jeē cuajnáhan t̄ jíin ñayuu maá Yaā Dios, te cundeyí t̄ jíin i. Te suni ni nihīn jniñu t̄ jeē ndácu t̄ jniñu nuū ñayuu tāca yúcūn, tācá ñuu, tācá yuhu, tācá nación. ⁸ Te ñayuu ñí cáhnu ñayiví jeē tu yósó síhví i nuū tútu, ni cachiñúhún i quitī xéén un. Te Yaā cúu Londe jeē ní cajehni i, máá yá névāha tutu un jeē yósó síhví ñayuu cotecu ñí cáni, te je yósó síhví i nde quiví ni jécō ñayiví.

⁹ Ñayuu iyó sóho na chúsóhó váha i jñūhun cahān r̄i yāhá. ¹⁰ Tāca ñayuu jeē sáha jeē quiví jnáhan vecāa, suni vecāa cone máá i. Te tāca ñayuu jeē jéni jnáhan jíin espada, suni jíin espada cuu maá i. Núu súcuan te ñayuu maá Yaā Dios chi jíni ñúhún cuandeyí ni i jíin jnúndóho te ma jécuiñí i candije i jñūhun cúndáhú ni yā i.

¹¹ Yūcuán na te ni jito ri ñga quitī xéén jeē ní cane chíi ñuhun. Te iyó úu ndiquí t̄ jeē cáa nájñūhun ndiquí lánchi. Te nájñūhun tachí coō cáhnu, súcuan tachí cahán t̄. ¹² Te nájñūhun ndácu quitī xéén xihna ñúhún jniñu, suni súcuan ndácu quitī uū ún jniñu, ñin t̄ nuū quitī xihna ñúhún. Te quitī uū sáha t̄ jeē chíñúhún tāca ñayuu ñí cáhnu ñayiví nuū quitī xihna ñúhún, quitī ní tújī jeē jé yajni cuu t̄ te ni nduvāha t̄. ¹³ Te quitī uū suni sáha tācá jniñu jéhnun jeē nahán náa ni yō jíto yó. Chi ni scúun t̄ ñuhún ichi ándiví ní quiji ini ñayiví, ní cajito ñayuu. ¹⁴ Te ni stahú t̄ ñayuu ñayiví jíin tāca jniñu jéhnun jeē ni nihīn t̄ poder jeē sáha t̄, jíto jínúū quitī xihna ñúhún. Te ni ndacu t̄ jniñu jeē na sáha ñayuu imagen quitī xihna ñúhún, quitī ní tújī jíin espada, jeē jé yajni cuu t̄ te ni nduvāha t̄. ¹⁵ Te quitī uū ni nihīn t̄ poder jeē chutáchí t̄ xijní imagen quitī xihna ñúhún, návāha cuu cahān, te cahni tāca ñayuu jeē tu cájetáhú i chíñúhún i máá. ¹⁶ Te tāca ñayuu cujéhnun jíin ñayuu tu cujéhnun, tāca ñayuu cucá jíin ñayuu ndahú, tāca ñayuu sájniñu cuenta maá jíin mozo jeē ní cajeen ñayuu, ni sáha t̄ jeē ni jécondee ñin jñunī ndaváha i chí jnéé i. ¹⁷ Te ni ñin ñayuu ma cúu cuaan i xícó i te núu tu ndíso i jñunī jeē cúu síhví t̄ chí jñunī número jeē cúu síhví t̄. ¹⁸ Jñūhun ndichí cúu jeē cahán r̄i yāhá: Tāca ñayuu jécūhun váha ni cuu tava i cuenta número quitī xéén un, chí número un cúu síhví ñin t̄e. Te número un cúu iñū ciento unī xico iñū.

Yaa jeē cájita 144,000 ñayuu

14 Yūcuán na te ni ndacoto ri, te ni jito ri jeē ñin máá Yaā cúu Londe xinī yucu Sión. Te cáhīn ciento uū xico cuñ mil ñayuu jíin yá. Te jneē i ndeé síhví máá yá jíin síhví Tátá yā Yaā Dios. ² Te ni jini sóho

ri jeē ñhīn ndasí ichi ándiví, nájñūhun jeē jíca cuehē yūte chí jeē cahán ñhīn taja. Te jeē ñhīn un sáha nájñūhun jeē cátee cuehē ñayuu yaa jeē naní arpa. ³ Te cáhīn i ichi núu mesa nuū ndácu Yaā Dios jniñu, jíin núu ndicúún jeē técu, jíin núu ndihócó cuñ t̄e jéhnun cándiso jniñu. Te ni cajita i ñin yaa jeé. Te ni ñin ñayuu tu cúu cutūhva i yaa ún, chí máni máá ciento uū xico cuñ mil ñayuu jeē ní jnama ya i ini ñayiví. ⁴ Te tāca t̄e yáha cácuu jeē tu ní cásáha cuēchi jíin ñahan cásáha néé, chí t̄e ndoo ánuá cácuu de. Te cándiquīn de Londe ndé-ni cúu-ni nuū cuahán yā. Chí ni jnama ya de ini ñayiví, te máá de cácuu t̄e jeē xihna gā ni candije nuū Yaā Dios jíin núu Yaā cúu Londe. ⁵ Te tú cuítī na jñūhun stáhú cácahān de, chí t̄e ndoo ánuá cácuu de, cáhīn de nuū mesa Yaā Dios.

Jñūhun jeē ní cacahān ndinúní ndajéhé yā

⁶ Yūcuán na te ni jito ri ñga ndajéhé yā jeē ndáva cuahān sava andiví. Te ndíso ya jñūhun jeē jnáma Yaā Dios ñayuu cotecu i ñí cáni. Te ni nacani ya jñūhun un núu tāca ñayuu ñí cáhnu ñayiví, nuū ñayuu tācá nación, tāca yúcūn, tācá yuhu, tācá ñuu. ⁷ Te ni cahān jee ya:

Conso ñyo ró núu Yaā Dios, te na cahán r̄o jeē yóhoyo cujéhnun ya, chí je ni quee quiví jeē sándaā yā siquī r̄o ndese ni casáha ró. Te na chíñúhún ró yā, chí máá yá ni sáha andiví jíin ñayiví jíin mar jíin tāca núu cáne ndute, áchí ndajéhé yā.

⁸ Yūcuán na te ndíquin ñga ndajéhé yā vēji, te ni cahān yā:

Je ni naa ñi ñuu teyí Babilonia. Chí ni sáha jeē ñayuu tācá nación casiquí ndeé i Yaā Dios jeē ní castóo i ya te cándiquīn i ídolo jíin tāca jniñu néé, áchí ndajéhé uū.

⁹ Yūcuán na te ndíquin ñga ndajéhé unī vēji, te ni cahān jee ya:

Xeēn coo siquī ñayuu cáchiñúhún quitī xéén jíin imagen t̄, te jéhe i jñūhun condee jñunī t̄ jneē i chí ndaha i. ¹⁰ Chí nihīn i castigo xeēn siquī cuéchi ni casáha i, chí quitī ni Yaā Dios nuū i, te tuá cone cáhnu ni yā. Te ndoho i nuū cayú ñuhún jíin azufre, coto tācá ndajéhé Yaā Dios jíin Yaā cúu Londe. ¹¹ Te ñuhmā nuū cándoho i cánda ñí cáni cuítī. Te nduú ñuú tu ndetátú ñayuu cándoho ún jeē ní cachiñúhún quitī xéén jíin imagen t̄, jíin jeē ni jécondee jñunī síhví t̄. ¹² Jeē yúcuan ñayuu maá Yaā Dios jeē casquícu i jniñu ndácu ya te cándije váha i Jesús, cánuú jeē cuandeyí ni i. Achí ndajéhé unī.

¹³ Yūcuán na te ni jini sóho ri ñin jñūhun ichi ándiví jeē ni cahān jíin rí:

Tee ró jñūhun jeē cahán r̄i jíin ró yāhá: Nacā jeē ndetū tāca ñayuu cándije Jitoho yō jeē cájihī vijna jíin ndé ñí cuahán yō. Jendaá chí ndetátú i jeē ní casáha i jniñu váha, te jniñu i un má náa chí sáha jeē quendōo váha i ñí cáni, áchí Espiritu.

Jeē ní nastútú yá ñayuu ñayiví

¹⁴ Yūcuán na te ni ndacoto ri, te ni jito ri ñin vicō cuijín. Te nuū vicō un néne Yaā ní nduu tēe. Te xinī yā ñúhun corona oro, te ndáhá yá ñin hoz xeēn. ¹⁵ Te ni quenda inga ndajéhé yā ini templo, te ni cana jee, te cáhán jíin Yaā néne nuū vicō un:

Cahnde ni jíin hoz ní, te nastútú ní ñayuu ñayiví. Chi je ni quee quiví jeē nastútú ní i nájñuhun táhndé trigo jeē jé ni cuaan, áchí.

¹⁶ Yūcuán na te Yaā néne nuū vicō ni nastútú yá ñayuu váha ini ñayiví, nájñuhun táhndé trigo jíin hoz.

¹⁷ Yūcuán na te ni quenda inga ndajéhé yā ini templo jeē iyó andiví, te suni ndáhá yá ñin hoz xeēn. ¹⁸ Te nde nuū altar ni quenda tucu inga ndajéhé, te ndíso jniñu ya síquī ñuhūn altar. Te ni cana jee ya, te cáhán yā jíin ndajéhé jeē ndahá hoz xeēn:

Cahnde rō jíin hoz xeēn rō, te nastútú ró ñayuu casáha néé ini ñayiví, nájñuhun jeē cájehnde i chutū ndehē uva jeē jé ni jíichi, áchí.

¹⁹ Te ndajéhé un ní jehnde yā jíin hoz yā, te ni nastútú yá ñayuu casáha néé ini ñayiví, nájñuhun ndútútú ndéhē uva. Te ni jnaa ya i nuū nihín i castigo xeēn Yaā Dios, nájñuhun jnáa i ndehē uva nuū taxín.

²⁰ Te ni jēhe ya castigo i yatā ñúū, te ni jica niñí i nájñuhun ndūxi uva. Te ni ndaa ni jinū cūhva jeē sucún yuhu caballo, te ni jica cuahān nde unī ciento kilómetro.

Ndihúxá ndajéhé jíin ndihúxá jñūndóho jeē sándihí

15 Te ni jito ri inga jniñu jéhu ichi ándiví jéē náā ni yō jíto yó. Chi cáhiin uxā ndajéhé yā jeē cuāha ndihúxá jñūndóho sandihí na. Te jeē jínu ndihúxá jñūndóho yáha, te jínu jeē cuāha Yaā Dios castigo xeēn síquī cuéchi.

² Te suni ni jito ri ñin jeē cáa nájñuhun mar, te cáa nájñuhun vidrio jeē ndíndēe nájñuhun ñuhūn. Te yumar un cáhiin ñayuu ni cacundeyí síquī quití xéén jíin imagen tē, jíin jéē tu ní cáquihin i jñuní número jeē cúu síhví tē. Te cándahá i yaa jeē naní arpa jeē ni jēhe Yaā Dios nuū i. ³ Te cájita i yaa jeē ní tava Moisés, tēe cúu mozo Yaā Dios, jíin yaa maá Yaā cúu Londe. Te súcuan cáhán yaa ún:

Yóhoyo náā ni na cájito ná ndihí jniñu jéhu teyí jéē sáha ní,

Tátā Yaā Dios, chi jñí ní ndihí poder.

Te máni jniñu ndaā jniñu váha sáha ní, jeē cúu ní Rey nuū táca nación.

⁴ Tú ni ñin i iyó jéē ma cónso tōyo i nuū ní, Tátā Yaā Dios.

Te ndihí i cahān nahín i jeē yóhoyo cújéhu ní.

Chi máñuhún ni máá ní cúu Yaā ndoo Yaā ií.

Te quijicoo ñayuu táca nación, chiñuhún i nihín, chi je ni cajini i jeē ndaā váha sáha ní táca jniñu.

Achí i cájita i.

⁵ Yūcuán na te ni ndacoto ri, te ni jito ri jeē ini andiví núne cuarto ií ini templo nuū íne tabla yuū jeē yosó ley yā. ⁶ Te ini templo un ní quendacoo ndihúxá ndajéhé jeē cándiso jniñu síquī ndihúxá jñūndóho. Te cáñuhun ya sahma fino iyó ndoo te xíñú. Te núhni cinturón oro jicā yā. ⁷ Te ñin jnáhan ndicúún jeē técu ni jēhe ñin ñin cohō oro nuū ndihúxá ndajéhé un. Te ini cohō un ñúhun chitú castigo xeēn jeē ni jēhe Yaā Dios, Yaā técu niñí cáni. ⁸ Te ni chitú ndíñi ñuhmā ini templo, te suu ni steén jeē yóhoyo cújéhu Yaā Dios jíin poder jñí ya. Te ni ñin tu ní cúu quiví ini templo, chi nde na ndíhi ndihúxá jñūndóho jeē cuāha ndihúxá ndajéhé yā.

Síquī ndihúxá cohō jeē ñúhun castigo

16 Yūcuán na te ini templo ni jini sōho ri ñin jñuhun cáhán jee jíin ndihúxá ndajéhé yā:

Cuangoo te catí ró síquī ñayiví ndihúxá cohō jeē ñúhun castigo xeēn jeē ni jēhe Yaā Dios, achí.

² Te cuahān ndajéhé ñin, te ni jetí ya cohō yā síquī ñayiví. Te táca ñayuu jeē ndeé jñuní quití xéén un jíin jéē cáchiñuhún imagen tē, ni canecoo ndíhyi xeēn jeē jetú ndasí.

³ Te ndajéhé uū ni jetí ya cohō yā nuū mar, te ndute mar ni nduu nájñuhun niñí ndíyí. Te ni cajihí táca quití jeē ñúhun ini mar.

⁴ Te ndajéhé unī ni jetí ya cohō yā ini táca yúte jíin táca núū cáne ndute, te ni nduu niñí. ⁵ Te ni jini ri jeē cáhán ndajéhé jeē ndíso jniñu síquī ndúte:

Tátā Yaā Dios, maá ní cúu Yaā ndoo Yaā ií, Yaā iyó vija, te ni tōyo ní niñí cáni. Te ndaā sáha ní jeē súcuan ni ndonda ní síquī cuéchi i. ⁶ Chi ni casáha i jeē ní jetí niñí ñayuu ndoo ní jíin ñayuu ní canacani jñuhun ní. Te vija chi ni sáha ní jéē cájiti i niñí, chi ñayuu casáha jniñu néé cácuu i, jeē cánuú ndoho i súcuan.

⁷ Te ni jini sōho ri jeē cahān inga nde nuū altar:

Tátā Yaā Dios, máá ní cúu jeē jñí ndihí poder. Te jniñu váha jniñu ndaā ni sáha ní jéē ní ndonda ní síquī cuéchi i. Achí.

⁸ Te ndajéhé cuūn ni jetí ya cohō yā síquī níandii, te ni jēhe Yaā Dios jñuhun jeē ndujíhni ndasí níandii návaha cayū ñayuu. ⁹ Te xeēn ndasí ní cayū táca ñayuu. Te vésú súcuan te tu ní cánacani ni i stóo i cuéchi i, ni tu ní cácahān i jeē cújéhu Yaā Dios. Chi sa suhva ni cacahān ndevāha i síquī yā jeē ni jēhe ya táca castigo yáha nuū i.

¹⁰ Te ndajéhé uhūn ni jetí ya cohō yā nuū mesa nuū ndácu quití xéén jniñu. Te ni cunee niñí cáhnu nuū ndácu tñ jniñu. Te cánacayíhi ñayuu yuhu i jeē cájetū ndasí i. ¹¹ Te vésú súcuan te tu ní cánacani ni i stóo i jniñu néé casáha i. Chi sa ni cacahān ndevāha i síquī Yaā Dios andiví síquī jeē cájetū ndasí i jíin ndíhyi xeēn cándoho i.

¹² Te ndajéhé iñū ni jetí ya cohō yā síquī yúte cáhnu jeē naní Eufrates. Te ni ichi ndihí ndute yúte ún,

návāha nune ñn ichi jeē quíjicoo tāca rey ichi núū cáne niāndii.

¹³ Te ni jito ri jeē ini yuhu coō cáhnu jíin ini yuhu quití xéén jíin ini yuhu máá téé nácani jnūhun stáhú ní canecoo unī tachī jeē cáa nájnūhun sáhvá. ¹⁴ Te tachī ún chi ndajéhé jexeén cácuu, te cásáha jniñu jéhu jeē nāa ni ñayuu cájito i. Te ni quendacoo tachī un jeē nastútú táca rey ñé cáhnu ñayívi, jeē cuajnáhan de síquī Yaā Dios quiví jeē ndíji ya. Te máá yá cúu jeē jñí ndihí poder. ¹⁵ Cuni sōho jíin náhan ró, chi sanaa ni rō te ndíji ri, nájnūhun jeē ñn sanaa-ni te quíji ñacuñhá. Te nacā jeē ndetū ñayuu jeē ndito ni i, te ndíto yúcún i sahma i, návāha ma cáca vichí líi i, cúu jeē tú na cuéchi coo síquī i jeē cucanu i nuū tāca ñayuu, achí yá. ¹⁶ Te ni canastútú táchī un táca rey, ni candutútú ñn lugar jeē yuhu hebreo naní Armagedón.

¹⁷ Te ndajéhé uxā ni jeti ya cohō yā nuū tachí. Te ini templo andiví jíin núū mesa nuū ndácu ya jniñu, ni cane ñn jnūhun jeē ni cáhān jee:

Je ni jínu, áchí.

¹⁸ Yūcuán na te ni ndindēé taja, te ññin, te cáhān taja, te ni jnāa ndasí. Chi nde ñé cáni jeē iyó ñayuu ñayívi, tu ní jnáa ññin ndasí nájnūhun jeē ni jnáa ni jito ri. ¹⁹ Te máá ñuu cujéhu Jerusalén, ni cusñn ni nduu unī parte, te ñé cáhnu ñayívi ni naa táca ñuu. Te ñuu teyí Babilonia, chi ni sáha nahín yá jeē ní ndutahū i castigo xeēn, chi ni quití ndasí ni yā síquī cuéchi i. ²⁰ Te ni naa tāca isla, te suni yucu tuá gā. ²¹ Te ichi ándiví ní cuun ññí náhnu síquī ñayuu, jeē véyi nde uū xico kilo. Te ni cacahān ndevāha ñayuu síquī Yaā Dios jeē ní cuun ndasí ññí, chi ñn jnūndóho xeēn ni cuu.

Jeē ndonda ya síquī ñuu neé Babilonia

17 Yūcuán na te ni quíji ñn jnáhan ndihúxá ndajéhé jeē ní candāhá ndihúxá cohō ún, te ni cahān yā jíin rí:

Nehen, te na stéén rí nuū rō ndese coo castigo síquī maá ñahan jnéni jeē cúu ñuu cujéhu íne nuū iyó cuéhē ndute. ² Chi tāca rey ñayívi nájnūhun ni casíquí ndéé de jíin ñahan ún, cúu jeē ní castóo de Yaā Dios te cándiquīn de jnūhun néé ní steén ña. Te ni sáha ña jeē ñayuu ñé cáhnu ñayívi, nájnūhun nájni i te casíquí ndéé i Yaā Dios cúu jeē ní castóo i ya te cásáha ndasí i cuéchi. Achí ndajéhé yā.

³ Te ni sáha ga Espíritu Santo jeē ní jito ndíjin rí, te ndajéhé yā un cuáhān yā jíin rí nde nuū ñūhun téhé. Te ni jito ri ñn ñahan, yósó ña ñn quití xéén cacuéhé. Te ñé cáhnu tñ ndeé jnūhun néé jeē quití ni Yaā Dios sáha. Te iyó uxā xiní tñ jíin úxí ndíqui tñ. ⁴ Te ñahan un ñūhun ña sahma ndihí jíin sahma cuehé, te suni ñūhun ña síquī oro jíin yū luu jíin perla jeē ndeé yahu. Te ndáhá ña ñn cohō oro jeē ñūhun chitú jíin jniñu néé ndasí jíin jniñu jnehén jeē jíca jnéni ña. ⁵ Te jneé ña ndeé ñn sáhvá jeē cúu ñn jnūhun sáhi, te suhva cáhān: Yāha cúu ñuu teyí Babilonia, jeē cúu nájnūhun

náná tāca jeē cájica jnéni jíin jeē casáha néé ndasí ini ñayívi, áchí. ⁶ Yūcuán na te ni jini rí jeē ñahan un nájni ña jeē nájnūhun ni jihí ña ññí ñayuu maá Yaā Dios jíin ññí ñayuu ni cajihí síquī jeē ní canacani ndaā i jnūhun Jesús. Te nahán ní naa ni rí ni jito ri ña. ⁷ Yūcuán na te ni cahān ndajéhé un jíin rí:

¿Naun nāa ni rō jíto ró? Na cástūhun rí nuū rō ndese cúní cahān jnūhun sáhi síquī ñahan un jíin quití xéén yósó ña, jeē iyó uxā xiní tñ jíin úxí ndíqui tñ. ⁸ Quití xéén jeē ní jito ró, chi ni cotecu tñ, te vijna chi tuá tñ. Te ndenda tucu tñ ini tūhnchi cúnú, te yūcuán na te quihñ tñ nuū jnahnú ndetū tñ. Te ñayuu cáyūcu ñé cáhnu ñayívi, naa ni i coto i nuū quití un jeē ní cotecu tñ te ni jihí tñ, te natecu tucu tñ. Te cácuu i ñayuu jeē tu yósó sáhvá i nuū tútu jeē yósó sáhvá ñayuu cotecu ñé cáni jeē ni jécósó síhvá i nde quiví ni jécóo ñayívi.

⁹ Tāca ñayuu jécūhun vāha ni, cuu tava i cuenta ndese cúu: Ndhúxá xiní tñ cácuu nájnūhun uxā yucu nuū néne ñahan ún. ¹⁰ Te ndihúxá xiní tñ suni cácuu nájnūhun uxā rey. Te uhñn rey un je ni naa jeē ndácu de jniñu, te ñn de ndácu jniñu vijna, te ñnga de chi ná tu quíji de. Te núu na quíji de te jecu-ni tiempo coo de. ¹¹ Te quití xéén jeē ní cotecu te tuá iyó tñ vijna, máá tñ cuu rey unā. Te ñn jnáhan ndihúxá rey un cúu tñ. Te suni quihñ tñ nuū jnahnú ndetū tñ.

¹² Te ndihúxí ndíqui jeē ní jito ró cúu nájnūhun uxí rey, te ná tu ndacu de jniñu jíin náhan de. Te máá de jíin quití xéén un, chi ññin jniñu de cuu de rey jecu-ni tiempo. ¹³ Te ndihúxí rey un chi squíjnáhan de jnūhun, te nacuāha de poder de jíin jniñu ndíso de nuū quití xéén un návāha ndacu tñ jniñu. ¹⁴ Te cuajnáhan de jíin Yaā cúu Londe. Te Yaā cúu Londe quende yā poder de jíin náhan de. Chi máá yá cúu Jitoho nuū tāca jítoho, te máá yá cúu Rey nuū tāca rey. Te ñayuu cáhñn jíin yá, chi ni nacāji Yaā Dios i te ni cana ya i, te cásquícu vāha i. Achí ndajéhé un.

¹⁵ Te ni cahān gā yā:

Cuehē ndute jeē ní jito ró núū néne ñahan jíca jnéni, suu cúu ñayuu cuehē táca ñuu, táca yuhu, táca nación. ¹⁶ Te ndihúxí ndíqui jeē ní jito ró jeē névāha quití xéén un, suu cácuu rey jeē coto uhñ de ñahan jíca jnéni un. Te sáha de jeē quendōo ndáhú ña te quendōo vichí líi ña. Te caji de cūñu ña te cahmu de ña nuū ñuhún. ¹⁷ Chi Yaā Dios scánda ya ini de jeē na sáha de jniñu cúní yā. Te squíjnáhan de jnūhun jeē nacuāha de jniñu ndíso de nuū quití xéén un, ndacu tñ jniñu nde na squícu tāca jnūhun ni cahān Yaā Dios. ¹⁸ Te ñahan jeē ní jito ró cúu máá ñuu teyí jeē cujéhu nuū tāca rey ñayívi. Achí ndajéhé un.

Síquī jeē naa ñuu Babilonia

18 Yūcuán na te ni jito ri jeē ní cuun ñnga ndajéhé yā ni quíji ichi ándiví. Te cújéhu ndasí yá. Te jeē ndindēé yá te ni ndindēé núū ñayívi. ² Te ni cana jee ya:

Je ni naa iĩ ñuu teyí Babilonia. Te ni nduu vehe tāca táchī, nuū ñúhun ndīnuū tachī neé, jíin táca téji, quitī quíni jeē tu núnahan ni yō. ³ Chi ñuu un cúu nájnūhun ñn ñahan ndevāha, te ni sáha ña jeē ñáyuu tāca nación, nájnūhun nájinī i te cásiquí ndéē i Yaā Dios, cúu jeē ní castóo i ya te cásáha ndasí i cuēchi. Te tāca rey ñayīvi, nájnūhun ni casíquí ndéē de jíin ñahan ún jeē ní cajetáhú de jnūhun neé ní steén ña. Te ñayuu ní ñáyīvi jéē cájeen cáxicó, ní cacucúca i jíin cuéhē jeneé jeē ní nevāha ña.

⁴ Yūcuán na te ni jini sōho ri inga jnūhun jeē ni cáhān ichi ándiví:

Máa ró jeē cácuu ró ñáyuu maá rí, quendacoo ró ini ñuu jíñā, návāha ma quívi nduu rō jíin táca cuéchi jeē sáha ña, te návāha ma ndóho ró jnūndóho xeēn jeē ndoho ña. ⁵ Chi ni cayā cuéhē ndasí cuéchi ña, nájnūhun ñn montón cáhnu ndasí jéē ní cusúcún ndé andiví. Te vijna te nduxeēn Yaā Dios siquī cuéchi ña. ⁶ Stóho ró ña nájnūhun ni sáha ña jeē ní ndoho sava ga ñayuu. Te nachunaa rō nuū ña doble jnūndóho jeē ni jéhe ña nuū inga ñayuu. Te sáha ró jeē nandicó cóo doble siquī ña vésú jeē ni sáha ña siquī inga ñayuu. ⁷ Te yōhoyo ni satéyí ña maá ña, te cúca ndasí ní cotecu ña. Te suni jíin cúhva yúcuan nacuāha ró jéē ndóho xeēn ndasí ña. Chi jéni ni ña: Yāha néne ri ndácu ri jniñu, te tu cúu ri ñahan viuda, te ma quíji cuítī jnūndóho ndoho ri, achí ña. ⁸ Jeē yúcuan cúu jeē ñn quivī-ni te quíji cuéhē jnūndóho siquī ña. Chi cuu ndīyí, te cucuíhyá ndasí ni ña, te coo jnamā, te cayū ña nuū ñuhún. Chi yōhoyo íyó poder maá Jítoho yō Yaā Dios, Yaā ní ndonda siquī cuéchi ña, achí.

⁹ Te tāca rey ñayīvi jéē ní casíquí ndéē de jíin ña te ni cotecu cucá ndasí de jíin ña, ndahyū de te ndahyū cohó de coto de jeē cánda ñuhmā cayú ña. ¹⁰ Te cuiñi jícá de chi yūhú de coto de jeē súcuan ndoho ña castigo. Te cahān de jíjnáhan de:

Nacā jeē xeēn ndóho ró, ñuu cujéhnu Babilonia, chi yá-ni ñuu teyí ní cuu ró núú. Te vijna chi ñn núnúu-ni te ni quee castigo jeē náā rō, achi de jíjnáhan de.

¹¹ Te tāca téē ñayīvi jéē cájeen cáxicó ñuu ún, ndahyū de te ndahyū cohó de jehē. Chi tuá ndé ñn cuaan ndajniñu cáxicó de. ¹² Te ndajniñu cáxicó de un cúu oro, plata, yuū luu jíin perla jeē ndeé yahu, jíin sahma fino jíin sahma seda jeē ndihí jíin jéē cuehé. Te suni tāca yujnu jeē asīn jéēn xicō, jíin táca ndajniñu luu jeē ni sáha jíin marfil jíin yujnu lúu jeē ndeé yahu jíin cáa cuaán jíin cáa hierro jíin yúu cuijín luu. ¹³ Te suni cáxicó de canela jíin táca jíhyo asīn jíin súje cutú jíin súje uvuā jíin táca perfume jíin vino jíin aceite jíin harina fina jíin trigo. Te suni cáxicó de quitī ndíso jíin lanchi jíin caballo jíin carreta, te nde ñayuu cáxicó de jeē sájniñu sáa-ni i. ¹⁴ Te cahān de jíin ñuu ún:

Ni cujiyo ndīhi ndajniñu cúca jeē ní nujnahan ndasí ni rō. Te tāca jéē lúu jeē váha jeē ní cotecu cucá ró, chi ni naa ndīhi, te ma nánihīn cuítī gā rō, achi de jíjnáhan de.

¹⁵ Te tāca téē ni cajeen ni caxico ní cacucúca jéē siquí ndajniñu ñuu ún, chi cuiñi jícá de jeē yūhú de coto de castigo coo ñuu ún. Te ndahyū de te ndahyū cohó de.

¹⁶ Te cahān de jíjnáhan de:

Nacā jeē xeēn ndóho ñuu teyí yáha. Chi ni cuu nájnūhun ñn ñahan jeē ni ñúhun sahma fino, sahma ndihí jíin jéē cuehé. Te ni ñuhun ña siquī oro jíin yúu luu jíin perla jeē ndeé yahu. ¹⁷ Te vijna te ñn núnúu-ni te ni naa ndīhi táca ndajniñu váha ún, achi de jíjnáhan de.

Te cuiñi jícá táca téē cáscaca barco, jíin ñáyuu cuángoo nuū barco, jíin téē cásajniñu ini barco, jíin táca gá téē cásajniñu nuū mar. ¹⁸ Chi coto de ñuhmā jeē cayú ñuu ún, te cana jee de jíjnáhan de:

¿Ndé íne ga ñuu teyí jéē cujéhnu nájnūhun ni iyo ñuu yáha? achi de.

¹⁹ Te cosō de ticachā ñuhun xinī de jeē cácuquíhyá ni de. Te ndahyū de te ndahyū cohó de. Te cana jee de jíjnáhan de:

Nacā jeē xeēn ndóho ñuu teyí yáha. Chi jíin ndajniñu cúca jeē ni iyo ñuu un ní cacucúca táca ñáyuu cánevāha barco cájica nuū mar. Te vijna te ñn núnúu-ni te ni naa ndīhi-ni, achi de.

²⁰ Te na cúsiñi ni táca róhó jéē cáyucú andiví, siquī jeē ní naa ñuu ún. Te na cúsiñi ni rohó, táca téē apóstol, jíin téē canacani jnūhun Yaā Dios, jíin ñáyuu maá Yaā Dios. Chi ni sáha neé ñuu un síquī rō jíjnáhan ró, te jeē yúcuan ní ndonda Yaā Dios siquī, achi de.

²¹ Yūcuán na te ñn ndajéhé ndíso poder, ni quihin ya ñn yuū cáhnu nájnūhun ñn yōso cáhnu, te ni scāne ya ini mar. Te ni cahān yā:

Nájñūhun ni naa yōso yáha, suni súcuan naa Babilonia, ñuu cujéhnu téyí. Te ma núcoo cuítī gā jeē cóto yó núú. ²² Te ni cahān yā jíin ñuu ún: Ini calle rō ma cúni sōho cuítī gā ñayuu jeē scáta i yaa arpa jíin flauta jíin trompeta. Te suni ma cóo cuítī gā ñayuu casáha táca ndajniñu. Te suni ma cúni sōho ga i jeē ñhīn táca molino rō. ²³ Te ni ñn lámpara ma sáha ga jeē cúndijin nuū rō. Te ni ma cúni sōho ga i vico jeē cácusīñi ñahan téē nándaña mēhñu ró. Te ñayuu ní cajeen ni caxicó nuū rō, ni cacujéhnu ndasí i ini ñayīví. Te ni stahú ró ñayuu táca nación jíin jniñu tasí jíin jniñu mágica. Achí ndajéhé un.

²⁴ Te ñuu un ní nihīn castigo xeēn, chi siquī ñuu un ndeé cuéchi jeē ní jeti niñi táca téē ní canacani jnūhun Yaā Dios, jíin táca ñáyuu maá yá, jíin táca gá ñayuu ní cajehni i ññi cáhnu ñayīví.

19 Te ná ni cuu táca jéē yáha, te ni jini sōho ri jeē cahán jee cuéhē ndasí ñáyuu ini andiví: Yōhoyo cújéhnu Yaā Dios. Chi Yaā Dios maá yó cúu jeē ní jnama yóhó.

Te máa yá cujéhnu ndasí, te máa yá jññi ndīhi poder.

² Te ndaā te váha sándaā yā táca jniñu,

chi ni ndonda ya siquī cuéchi ñuu neé cújéhnu ún.

Chi ni stívi un ñáyuu ññi cáhnu ñayīvi jíin jnūhun casíquí ndéē Yaā Dios.

Te ni sáha ya jeē ní ndutahū ñuu un síquī jeē ní jehni tāca mozo yā.

Achí i jijnáhan i.

³ Te ni cacahān tucu i:

Yōhyo cújéhnū ya. Chi ñíí cáni canda ñuhmā ñuu un jéē cayú, achí.

⁴ Te ndihóco cuūn tēe jéhnū cándiso jníñu, jíin ndicúun jeē técu, ni cajecuiñī yití de, te ni cachiñúhún de Yaā Dios, Yaā néne nuū mesa ndácu jniñu. Te ni cacahān:

Amén. Súcuan na cóo. Yōhyo cújéhnū ya.

⁵ Te nde nuū mesa nuū ndácu ya jniñu ni cahān ñin jnūhun:

Róhó jéē cájéjniñu nuū Yaā Dios,
jíin róhó jéē cándiso iyo nuū yā,
jeē cácujehnū jíin jéē tu cácujehnū,
na cáhán rō jeē yóhyo vāha Yaā cúu ya.

Achí.

Vico jeē nándāha Yaā cúu Londe

⁶ Te ni jini sōho ri jeē cácahān ñayuu cuehē ndasí, te ñíhin nájnūhun ñíhin cuehē yūte, te nájnūhun jeē cahán ñíhin taja. Te ni cacahān:

Yōhyo cújéhnū ya. Chi Jítoho yō Yaā Dios, Yaā jñí ndíhi poder,
vijna te ndácu ñíhin ya jniñu.

⁷ Te na cúsiñ ni yō, te siñ ndasí na cóo ni yō,
te na cáhán yō jeē yóhyo cújéhnū ya.

Chi ni quee quiví jeē nándāha máa Yaā cúu Londe.
Te je iyó túhva ñahan nandāha jíin yá, te suu cúu ñayuu máa Yaā Dios.

⁸ Te ni nihīn ña jnūhun cahun ña sahma fino jeē ndóo ndasí te xíñú.

Achí i jijnáhan i. Te sahma fino un cúu tācá jniñu ndaā jeē casáha ñayuu máa Yaā Dios.

⁹ Te ni cahān ndajéhé yā jíin rí:

Tee ró jnúhun yáha: Nacā jeē ndetū tāca ñayuu jeē ní cana ya quingoo vico nándāha Yaā cúu Londe.

Te ni cahān gā ndajéhé un jíin rí:

Tāca jnúhun yáha cúu jnūhun ndaā ni cahān Yaā Dios, achí yá.

¹⁰ Te ni jecuiñī yití rí nuū jehé ndajéhé un jéē chiñúhún rí yā nuú. Te ni cahān yā jíin rí:

Ma sáha ró súcuan. Chi ruhū suni mozo Yaā Dios cúu ri, nájnūhun máa ró jíin táca hermano rō jeē cácañíje vāha jnūhun Jesús. Sa suhva nuū máa Yaā Dios chiñúhún ró. Achí yá.

Chi jnūhun síquī Jesús cúu jeē cácahān ndaā ñayuu cánacani jnūhun Yaā Dios.

Yaā yosó síquī caballo cuijín

¹¹ Yūcuán na te ni jito ri jeē núne andiví. Te ni cane ñin caballo cuijín, te Yaā yosó síquī tñ naní yá Yaā ndaā, Yaā squícu, chi squícu ya jeē ní jéjnūhun ya. Te ndaā sándaā yā jniñu te ndaā ndóna ya síquī tāca jéneé.

¹² Te tinūu yá ndíndēe nájnūhun yáñuhūn. Te xinī yā ñúhun cuehē corona. Te yósó ñin síhví yá jeē maá-ni ya cúu jeē jiní. ¹³ Te ñúhun ya ñin sahma jeē ni ñúndaji nuū ñíñí, te nání yá Jnūhun Yaā Dios. ¹⁴ Te tācá ndajéhé yā jeē iyó andiví, cáyosō caballo cuijín, cándiquīn yatā yā. Te cáñuhun sahma fino cuijín iyó ndoo. ¹⁵ Te ini yuhu máa Yaā jeē yosó síquī caballo, quenda jeē cáca nájnūhun ñin espada xeēn. Te espada un cúu jnūhun ya jeē stóho ya ñayuu tācá nación. Te ñíhin ndacu ya jniñu nuū i. Te sándaā yā síquī cuéchi i nájnūhun jeē jeñú síquī ndehē uva cájexīn. Te cuāha ya castigo xeēn ndoho i jeē quití ni yā síquī cuéchi i. Chi máa yá jñí ndíhi poder. ¹⁶ Te sahma ya jíin síhin ya yosó jnúhun yáha: Rey nuū tāca rey jíin Jítoho nuū tāca Jítoho, achí.

¹⁷ Yūcuán na te ni jito ri ñin ndajéhé yā jeē ñin nuū níñandii. Te ni cana jee ya xinī tācá quití ndáva nuū tachí:

Ndutútú ró quijicoo ró cuxíni ró ñin vico cáhnu sáha Yaā Dios. ¹⁸ Te caji rō cūñu tāca rey jíin capitán jíin tēe téyí, jíin cúñu tācá caballo jíin tēe ni cayosō síquī tñ. Te suni caji rō cūñu tāca gá ñayuu, cúu ñayuu casájniñu cuenta máa jíin mozo jeē ní cajeen ñayuu, cúu ñayuu cácujehnū jíin ñayuu tu cácujehnū. Achí ndajéhé yā.

¹⁹ Yūcuán na te ni jito ri máa quití xéén jíin táca rey ñayiví jíin cuéhē soldado de. Te ni candutútú de jeē cuajnáhan de jíin máa Yaā yosó caballo jíin táca ndajéhé yā. ²⁰ Te ni jñí ya quití xéén cuahān tñ preso jíin tēe ni nacani jnūhun stáhú jeē ní sáha tācá jniñu jéhnū jeē ní jito jínúú quití xéén. Chi jíin jniñu jéhnū un cúu jeē ní stáhú de tāca ñayuu jeē ní cajéhe jnūhun condiso jnuní quití xéén, jíin jéē ní cachiñúhún imagen tñ. Te quití xéén un jíin tēe ni nacani jnūhun stáhú un, cátecu ndíndúú te ni scáne ya nuū laguna ñuhūn jeē cayú jíin azufre. ²¹ Te jíin espada jeē cáne yuhu Yaā yosó caballo ni cajihí tācá soldado quití xéén un. Te tācá quití ndáva nuū tachí ni candutú chíji tñ ni cayejí tñ cūñu de jijnáhan de.

Síquī mil cuiyā

20 Te ni jito ri jeē ní cuun ñin ndajéhé yā ichi ándiví. Te ndáhá yá ndacáa jeē núne tūhnchi cúnú ndasí. Te suni ndáhá yá ñin cadena cáhnu. ² Te ni jñí ya máa cóo cáhnu jeē iyó ndé jenahán ndasí, te nání tñ jexeén jíin Satanás. Te ni jihni yā jeē conuhní mil cuiyā. ³ Te ni scáne ya ini tūhnchi cúnú ndasí. Te ni jesi vāha ya, te ni sácutú yá yuyáú, návāha ma stáhú gá un ñayuu tācá nación, chi nde na jínu mil cuiyā. Te jeē yáha mil cuiyā ún, yūcuán na te cánuú jéē ndají caca cuu jecu na tiempo.

⁴ Te ni jito ri tāca mesa nuū ndácu jniñu, te yūcuan cáyūcu táca ñayuu jeē ní canihīn jniñu i sándaā i jniñu. Te suni ni jito ri anuá tāca ñayuu jeē ní cajehnde xiní i síquī jeē ní canacani i jnūhun Jesús jíin jnúhun Yaā Dios. Te tu ní cachiñúhún i quití xéén jíin imagen tñ, ni tu ní cájéhe i jnūhun jeē cóndee jnuní tñ jneé i chí nda-

ha i. Te ni jito ri jeē ní natecu i te ni candacu i jniñu jíin Cristo mil cuiyā. ⁵ Yāha cúu ndīyi jeē nátecu xīhna gā. Te tāca gá ndīyi, tu ní cánatecu i, chi nde jeē jíinu mil cuiyā. ⁶ Te nacā jeē ndetū tāca ñáyuu ndoo ánuá jeē nátecu xīhna gā. Chi ma cúu cuiṭi i vuelta uū. Te cuu i sutū nuū Yaā Dios jíin núu Cristo, te ndacu i jniñu jíin yá mil cuiyā.

⁷ Te jeē jíinu mil cuiyā ún, te ndajī Satanás te quenda nuū yíndihyū. ⁸ Te stáhú tucu ñayuu tācá nación ñí cáhnu ñayīví. Te stáhú ñayuu ñuu Gog jíin Magog. Te sáha jeē ndutútú tāca soldado ñuu un jéē cuajnáhan de. Te coo cuehē ndasí de nájnūhun ñíṭi yumar. ⁹ Te cuiṭe núu de quingoo de ñí cáhnu ñayīví. Te cuicó ndúu de ñuu nuū cáyūcu ñáyuu maá Yaā Dios, ñuu jeē maní yā jíin. Te Yaā Dios chi scúun ya ñuhūn ichi ándiví, te cayū ndīhi de. ¹⁰ Te jexeén jeē ni stáhú táca ñáyuu ún, chi scáne ya quihīn nuū laguna ñuhūn jeē cayú jíin azufre. Te yūcuán chi xīhna gā ni scáne ya quiṭi xéén jíin téé ni nacani jnūhun stáhú. Te yūcuán ndoho nduú ñuu ñí cáni cuiṭi.

Jeē sándaā yā jniñu nuū mesa cuijín

¹¹ Yūcuán na te ni jito ri ñn mesa cuijín cáhnu, te néne maá Yaā ndácu jniñu. Te ñayīví jíin andiví ni ndoñhún cuáhān jeē ní jito ya nuū, chi tuá ni cúu quendōo nuū yā. ¹² Te ni jito ri tāca ndīyi, jeē ní cujéhn nu jíin jéé tu ní cujéhn, cáhīn nuū Yaā Dios. Te ni sáha ya jeē núne tāca libro, te suni ni nune inga libro jeē yosó sīhví ñáyuu cotecu ñí cáni. Te ni sándaā yā síquī tāca ndīyi ún, núu ndese jniñu ni casáha i jíin ndese yosó núu tāca libro un. ¹³ Te tāca ndīyi jeē ní cajihī nuū mar, ni nanecoo. Te suni ni nanecoo tāca ndīyi jeē ní cajihī i, jeē íne i maá lugar nuū cáyūcu ánuá ndīyi. Te ni sándaā yā síquī, núu ndese ni casáha ñn ñn i. ¹⁴ Yūcuán na te cuehyī jéhni ñayuu jíin lugar nuū cáyūcu ánuá ndīyi, ni snāā yā ni scáne ya cuango nuū laguna ñuhūn. Te jeē ndóho ñayuu nuū laguna ñuhūn, yūcuan cúu jeē cúu i vuelta uū. ¹⁵ Te yūcuan ní scáne ya tāca ñáyuu ni casáha jniñu néé jéé tu yosó sīhví i nuū libro jeē yosó sīhví ñáyuu cotecu ñí cáni.

Andiví jéé jíin ñáyīví jéé

21 Yūcuán na te ni jito ri andiví jéé jíin ñáyīví jéé. Chi andiví jíin ñáyīví xīhna ñúhún ni naa. Te suni tuá mar. ² Te ruhū Juan, ni jito ri ñuu iñ jeē cúu Jerusalén jeé. Te ñuu un ní cuun vēji ichi ándiví núu néne Yaā Dios. Te ñuu ún luu cáa nájnūhun ñn ñahan jeē ni sátūhva ña ni cucutú ña jeē nándaāha ña jíin yñ ña. ³ Te ni jini sōho ri ñn jnūhun jeē ni cáhān jee ichi ándiví:

Condēhé, chi vijna te ndéé Yaā Dios mēhñu ñáyuu. Te condee yā jíin i jíjnáhan i, te cuu i ñayuu maá yá. Te maá yá condee yā jíin i jeē cúu ya Yaā Dios i. ⁴ Te nacuaa yā ndute tñnúu i jíjnáhan i. Te ma cúu gā

ñayuu, ni ma ndahyú gā i, ni ma cucuíhyá gā ni i, ni ma jetú gā i. Chi je ni yāha tāca jnūndóho jeē ni íyo, áchí.

⁵ Yūcuán na te ni cahān maá Yaā néne nuū mesa: Condēhé, chi nasáha jeē rí tāca jéé iyó, áchí yá.

Te suni ni cahān yā:

Teé ró jnūhun yáha. Chi tāca jnūhun yáha cúu jnūhun jeē jiní ndije ró jéé ndaā cúu.

⁶ Te ni cahān gā yā:

Je ni jīnu. Máá rí cúu nájnūhun letra A xīhna ñúhún jíin letra Z jeē sándīhí na, chi máá rí ni squejéé ndīhi te máá rí sínu. Te tāca ñáyuu cájichí, súcuan-ni cuāha ri coho i ndute cáne jeē cótecu i ñí cáni. ⁷ Tāca ñáyuu jeē cúndeyí síquī jéneé, nihīn i ndīhi jeē yáha cuu tahū i. Te cuu ri Yaā Dios i, te cuu i sēhe ri. ⁸ Te tāca ñáyuu jeē cáyūhú ndoho síquī jnūhun ri, jíin ñáyuu tu cácañde, jíin ñáyuu casáha jniñu néé, jíin ñáyuu cájehni ndīyi, jíin ñáyuu cájica jnéni, jíin ñáyuu casáha tási, jíin ñáyuu cáchiñúhún ídolo, jíin táca ñáyuu castáhú, ñayuu ún chi quīvicoo i laguna ñuhūn jeē cayú jíin azufre. Te yūcuan cúu jeē cúu i vuelta uū.

Jerusalén jeé

⁹ Yūcuán na te ni quiji ñn jnáhan ndīhúxá ndajéhé jeé ní candāhá ndīhúxá cohō jeé ni ñúhún chitú ndīhúxá jnūndóho sandīhí. Te ni cahān yā jíin rí:

Nehen, te na stéén rī nuū rō ñahan jeé nándaāha ña cuu ña ñasihí Yaā cúu Londe, áchí yá.

¹⁰ Te ni sáha ga Espíritu Santo jeé ní jito ndijin rī, te ndajéhé un ní jeca ya ruhū cuahān yā jíin rí xīnī ñn yucu cáhnu súcún. Te ni steén yā nuū rī maá ñuu iñ cujéhn nu jeé cúu Jerusalén, te ni cuun vēji nde andiví núu néne Yaā Dios. ¹¹ Te ndíndēé ndasí ñuu un nájnūhun ndíndēé Yaā Dios. Te xīñú nájnūhun xīñú ñn yuū luu jeé ndeé yahu ndasí, nájnūhun yuū cuijín jeé quiyi nájnūhun vidrio. ¹² Te yuhu ñúu un ní jicó ndúu ñn jeé cáhnu súcún ndīhyú ñuu ún. Te íyó úxī uū yehyí. Te tāca yéhyí un iñ ñn ndajéhé yā. Te tāca yéhyí un yosó sīhví ndīhúxí uū yucūn Israel. ¹³ Te lado nuū cáne niāndii iyó únī yehyí. Te lado norte suni íyó únī yehyí. Te lado sur suni íyó únī yehyí. Te lado nuū quéé niāndii suni íyó únī yehyí. ¹⁴ Te íyó úxī uū yuū náhnu jeé cúu cimientu maá jéé ndihyú ñuu ún. Te tāca yúu un yosó sīhví ndīhúxí uū apóstol maá Yaā cúu Londe.

¹⁵ Te ndajéhé jeé ni cáhān jíin rí, ndáhá yá ñn yujnu oro jeé chícuāha yá ñuu un jíin táca yéhyí jíin maá jéé ndīhyú ñuu ún. ¹⁶ Te ñuu ún chi ñn cūhva-ni cúu ndicúún lado. Chi jeé cáni jíin jéé jité, ñnuú-ni cúu. Te ndajéhé un ní chícuāha yá ñuu un jíin yujnu ún. Te néé uū mil uū ciento kilómetro jeé ñn ñn lado. Te ñnuú-ni cūhva jeé cáni, jeé sucún, jíin jéé jité. ¹⁷ Te suni ni chícuāha yá maá jéé ndihyú ñuu ún, te néé unī xico cuūn metro jeé sucún. Te yūcuan cúu cūhva jejníñu ñayuu, jeé suni jéjníñu ndajéhé un.

¹⁸ Te maá jéé ndihyú ñuu un ní cuvāha jíin yúu cuijín quiyi. Te ñuu ún chi máá nene oro cúu, te cáa

nájnūhun vidrio quiyi. ¹⁹ Te tāca yūū jeē cúu cimientu maá jēē ndihyū ñuu ún, ní cucutú jíín ndinuū yuū luu jeē ndeé yahu. Yuū ñn cúu yuū cuijín quiyi. Te jeē uú cúu yuū ndeé ndí. Te jeē uní cúu yuū pinto. Te jeē cuún cúu yuū cuíi ndí. ²⁰ Te jeē uhún cúu yuū pinto jeē ñúhun raya. Te jeē iñú cúu yuū cuehé pinto. Te jeē uxá cúu yuū cuaán quiyi. Te jeē uná cúu yuū cuíi ndéé. Te jeē ñn cúu yuū cuaán ndí. Te jeē uxí cúu yuū cuíi cuijín. Te jeē uxí ñn cúu yuū cuehé cuaán. Te jeē uxí uū cúu yuū ndihí ndí. ²¹ Te ndihúxí uū yehyí un cácuu uxí uū perla jeē ndeé yahu. Te ñn ñn yéhyí cúu ñn ñn perla. Te máá nene oro cúu calle cáhnu ñuu ún, te quiyi nájnūhun vidrio.

²² Te tú na templo ni jító ri ini ñuu ún, chi nñí cáhnu ñuu un ndeé máá Jítóho yō, Yaā jññ ndihí poder, jíín Yaā cúu Londe. ²³ Te ñuu ún tu jíini ñúhún cundijin jíín luz niāndii jíín yōō. Chi jeē ndíndēe máá Yaā Dios cúu jeē cúndijin ñuu ún. Te luz ñuu un cúu máá Yaā cúu Londe. ²⁴ Te ñayuu tācá nación ñayivi jēē ní jnama ya, caca i jeē cúndijin luz ñuu un núū i. Te tāca rey ñayivi quijicoo de ñuu ún, quindeca de tācá ndajniñu jeē ndeé yahu jíín jēē cujéhnu de sáha. ²⁵ Te tāca yéhyí ñuu ún ma cóndihyū cuiñi nduú, chi tú na jecuáa coo. ²⁶ Te ini ñuu ún quijicoo ñayuu tācá nación, quindeca i tācá ndajniñu jeē ndeé yahu jíín jēē cujéhnu i sáha. ²⁷ Te ma quívicoo cuiñi ni ñn jeē jnehén. Ni ma quívicoo ñayuu casáha jniñu néé jíín jēē castáhu. Chi quívicoo máni máá ñayuu jeē yosó síhví i nuū libro jeē yosó síhví ñayuu cotecu ññ cáni, jeē névāha Yaā cúu Londe.

22 Yūcuán na te ndajéhé yā ni steén yā nuū rī ñn yūte íyó ndoo. Te ndute un sáha jeē cótecu yō ññ cáni. Te xíñú nájnūhun vidrio, te cáne nuū mesa nuū ndácu Yaā Dios jniñu jíín Yaā cúu Londe. ² Te jica yūte ún sava mēhñu calle cáhnu ñuu ún. Te ndíndúú lado yuyūte un yñi yujnu jeē cótecu yō ññ cáni sáha. Te yujnu un jéhe ndehē uxí uū jíinu jeē ñn cuiyā, chi tāca yōō cúun ndehē. Te ndaha yúcu i cúu tajná jeē ndúvāha ñayuu tācá nación. ³ Te tācá-ni jeē ni cáhān yā jeē násūu jēē váha cúu, ma cóo ini ñuu ún. Te ini ñuu ún cuiñi máá mesa nuū ndácu Yaā Dios jniñu jíín Yaā cúu Londe. Te ñayuu cácañi jeē cácuu i mozo yā, chiñúhún i ya. ⁴ Te coto i nuū yā, te condee síhví yá jneē i. ⁵ Te ma cóo ga jecuáa ñuu ún. Te ñayuu cáyūcu yúcuu tuá jíini ñúhún i jeē cúndijin lámpara nuū i, ni jeē cúndijin niāndii. Chi jeē ndíndēe máá Jítóho yō Yaā Dios cúu jeē cúndijin nuū i. Te ndacu i jniñu ññ cáni cuiñi.

Jeē cuácuyajni ndiji Cristo

⁶ Yūcuán na te ni cáhān ndajéhé un jíín rí:
Tāca jnúhun yáha cúu jnúhun jeē jíni ndije ró jēē ndaā cúu. Te Jítóho yō Yaā Dios, máá yá sáha jíín téé cánacani jnúhun ya jeē jíín Espíritu yā cánacani de. Te suu máá yá ni tají yá ndajéhé yā návāha steén nuū ñayuu cácuu mozo yā tācá jniñu jeē yachí coo.

⁷ Ndiji yachí rí, achí yá.

Te nacā jeē ndetū ñayuu chusóhó jnúhun Yaā Dios jeē yosó núū tútu yáha.

⁸ Te ruhū Juan, ni jini sōho ri tāca jnúhun yáha, te ni jito ri tācá jniñu yáha. Te ná ni jini sōho ri ni jito ri, yūcuán na te ni jecuiñi yití rí nuū jehé máá ndajéhé jeē ni steén tācá jniñu yáha núū rí, jeē chiñúhún rí yā nuú. ⁹ Te ni cáhān ndajéhé un jíín rí:

Ma sáha ró súcuu. Chi ruhū suni mozo Yaā Dios cúu ri, nájnūhun máá ró jíín táca hermano rō jeē cánacani jnúhun ya, jíín ndihí ñayuu cájetáhu jnúhun yósó nuū tútu yáha. Sa suhva nuū máá Yaā Dios chiñúhún ró. Achí yá.

¹⁰ Te ni cáhān gā ndajéhé un jíín rí:

Ma chísañi ró táca jnúhun Yaā Dios jeē yosó núū tútu yáha, chi je cuácuyajni tiempo jeē cúndaā ndíñi. ¹¹ Te ñayuu casáha jniñu néé, na sáha ga máá i jniñu néé. Te ñayuu jnehén ánuá, na quéndōo máá i súcuu. Te sa ñayuu casáha jniñu ndaā, na sáha ga i jniñu ndaā. Te ñayuu cáhīyo ndoo ánuá, na cáca ndoo ga i súcuu. Achí ndajéhé un.

¹² Jendaá jeē ndiji yachí rí, achí Jesús. Te quiñi ri jíín táhū cuāha ri nuū ñn ñn ñayuu, núu ndese jniñu ni casáha i. ¹³ Máá rí cúu nájnūhun letra A xíhna ñúhún jíín letra Z jeē sándñí na, chi íyó rí nde xíhna ñúhún te coo ri ññ cáni.

¹⁴ Nacā jeē ndetū ñayuu jeē jéhe i jnúhun ndundoo ánuá i nájnūhun ndúndoo sahma. Chi cuu caji i ndehē yujnu jeē sáha jeē cótecu i ññ cáni, te cuu quívicoo i yéhyí ñuu iñ ún. ¹⁵ Te ichi fuera ñuu ún cuiñi ñayuu tu cácañi, jíín ñayuu casáha tásí, jíín ñayuu cájica jnéni, jíín ñayuu cájehni ndíyi, jíín ñayuu cáchiñúhún ídolo, jíín ñayuu cácusñi ni stahú jnáhan.

¹⁶ Máá rúhū Jesús, ni tají rí ndajéhé rí návāha castūhun yá tāca jnúhun yáha nuū tāca grupo ñayuu cácañi. Te máá rí ni sáha jeē ni íyo rey David, te ni quiñi ri nuū yucún David. Te cúu ri nájnūhun lucero ndíndēe cáne cúndijin. Achí yá.

¹⁷ Te máá Espíritu Santo jíín máá ñahan jeē nándāha jíín Yaā cúu Londe, cácañi:

Nehen, quívicoo ró ndaha ya, achí.

Te tāca ñayuu jeē jíni sōho, suni na cáhān i:

Nehen, quívicoo ró ndaha ya.

Te tāca ñayuu cájichí jeē cácuu i coho i, na quívicoo i ndaha ya, te súcuu-ni na cóho i ndute jeē cótecu i ññ cáni sáha.

¹⁸ Te tāca ñayuu jíini sōho jnúhun Yaā Dios jeē yosó núū tútu yáha, cáhān ññin ri jíín i: Núu ndé ñayuu chísoó i nuū jnúhun cáhān tutu yáha, te Yaā Dios chísoó yá jnúndóho cáhān tutu yáha, ndoho i. ¹⁹ Te núu ndé ñayuu quende i jecu jnúhun cáhān tutu yáha, te Yaā Dios quende yā tahū i jeē yosó núū libro jeē yosó síhví ñayuu cotecu ññ cáni, te ma nihín i tahū i ini ñuu iñ ún. Te tutu yáha cúu jeē cáhān siquí tācá un.

²⁰ Te Yaā jeē ni cáhān tāca jnúhun yáha, suhva cáhān yā:

Jendaá jeē ndiji yachī rī, achí yá.
Amén. Súcuan na cóo. Jitoho ná Jesús, jícán tahu na
jeē ndíji yachī ní.

²¹ Te ñúhun ni rī jeē Jítoho yō Jesucristo na sáha ga yā
jeē váha róhó jíjnáhan ró. Amén.